


# Label Buk Baibel



The New Testament in the Label language of Papua New Guinea

**Label Buk Baibel**  
**The New Testament in the Label language of Papua New Guinea**  
**Buk Mak long tokples Label long Niugini**

copyright © 2012-2019 Wycliffe Bible Translators, Inc.

Language: Label

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-03-29

---

PDF generated using Haiola and XeLaTeX on 11 Nov 2022 from source files dated 30 Nov 2021  
13fa0832-6e31-5347-b6eb-57b79224ca94

## Contents

Matiu . . . . .	1
Mak . . . . .	55
Luk . . . . .	87
Jon . . . . .	141
Aposel . . . . .	179
Rom . . . . .	229
1 Korin . . . . .	255
2 Korin . . . . .	279
Galesia . . . . .	294
Epeses . . . . .	303
Pilipai . . . . .	311
Kolosi . . . . .	317
1 Tesalonika . . . . .	323
2 Tesalonika . . . . .	329
1 Timoti . . . . .	332
2 Timoti . . . . .	339
Taitus . . . . .	344
Pilimon . . . . .	347
Hibru . . . . .	349
Jems . . . . .	368
1 Pita . . . . .	375
2 Pita . . . . .	382
1 Jon . . . . .	387
2 Jon . . . . .	393
3 Jon . . . . .	394
Jut . . . . .	395
Tatatai . . . . .	397

## A Wakak a Warwara o e Iesu Karisito E Matiu i tumusi

### *A warwara talapor nigo*

E Matiu i tumus a buk ne, i ning tagun a ning a bonot pa pisir naur kakak a asaer ane Iesu, pa ning a risana otleng e Liwai. Lanigo i a tena los totokom, pa i titol taum ana matanitu Rom. Lamur e Iesu i kabah pasi, pa i hanot a kaklik a asaer (oroï Mt 9:9-13).

E Matiu i tumus a buk ne tetek anuna tarai, a tarai Juda. A tarai Juda la harnanai sur a tinan ot ana barsan ning e God i aslang pasi, sur ir king anunla. Ana warwara Hibu di atongi ana Mesaia, pa ana warwara Grik di atongi ana Karisito.

E Matiu i mang sur ir atai la mang, e Iesu ot ning a Karisito, a King ana tarai Juda. Sur i ma ning i warwara ana tinan ot ane Iesu ning i arlar ana king.

Pa i atong puasa i otleng dingla na warwarala tagun a Ningnigo na Buk Tabu o e Karisito. A tinan ot ane Iesu i amomol a warwarala ne. E Matiu i tumtumus otleng ana asaer ane Iesu ana matanitu ane God.

### **A tinan ana buk Matiu:**

A agon o e Iesu (1:1-2:23)

A titol ane Jon a Tena Baptais (3:1-12)

Di baptais e Iesu pa lamur e Satan i lari (3:13-4:11)

E Iesu i titol tumo e Galili (4:12-18:35)

E Iesu i han usaot e Jerusalem (19:1-20:34)

A ararop a wik pa minat e Iesu (21:1-27:66)

A kamkamtur ulak ane Iesu tagun a minat (28:1-20)

*A risan a mangis a tarai ane  
Iesu Karisito  
(Lk 3:23-38)*

<sup>1</sup> Ine a risan a mangis a tarai tagun nating ning e Iesu Karisito i hanot tagun la. E Iesu, a nat e Dewit, e Dewit a nat e Abaram.

<sup>2</sup> E Abaram e tamana e Aisak, E Aisak e tamana e Jekop, pa e Jekop e tamana e Juda pa na tastasna.

<sup>3</sup> E Juda e tamana e Peres dia ma e Serah, pa e kabatnan diau e Tamar.

E Peres e tamana e Hesron, e Hesron e tamana e Ram,

<sup>4</sup> pa e Ram e tamana e Aminadap,

e Aminadap e tamana e Nason, pa e Nason e tamana e Salmon,

<sup>5</sup> e Salmon e tamana e Boas, pa e tana a risana e Rehap.

E Boas e tamana e Obet, pa e tana a risana e Rut.

E Obet e tamana e Jesi,

<sup>6</sup> pa e Jesi e tamana e Dewit, i ning a king.

E Dewit e tamana e Solomon pa e tana a hane ning i taulai pas o e Uria.

<sup>7</sup> E Solomon e tamana e Rehoboam

e Rehoboam e tamana e Abia e Abia e tamana e Asa

<sup>8</sup> e Asa e tamana e Jehosapat e Jehosapat e tamana e Jehoram pa e Jehoram e tamana e Usia

<sup>9</sup> e Usia e tamana e Jotam

e Jotam e tamana e Ahas

pa e Ahas e tamana e Hesekia

<sup>10</sup> e Hesekia e tamana e Manase e Manase e tamana e Amon

pa e Amon e tamana e Josaia

<sup>11</sup> e Josaia i aitna e Jekonia taum ana tastasnala. Lamur tana, a tarai Babilon la dat pas a tarai Israel utumo e Babilon sur lar kes na dodot.

<sup>12</sup> Lamur ana tinan utumo e Babilon:

E Jekonia i aitna e Salatiel,

e Salatiel e tamana e Serubabel,

<sup>13</sup> e Serubabel e tamana e Abiut, e Abiut e tamana e Eliakim,

pa e Eliakim e tamana e Asor,

14 e Asor e tamana e Sadok,  
e Sadok e tamana e Akim,  
pa e Akim e tamana e Eliut,  
15 e Eliut e tamana e Eliaser,  
e Eliaser e tamana e Matan,  
pa e Matan e tamana e Jekop,  
16 e Jekop e tamana e Josep, i  
ning i taulai o e Maria. E  
Maria i agon e Iesu, ning di  
atongi a Karisito, i ning e God  
i sune seni.

17 A mangis a tarai turpasi o e  
Abaram tuk o e Dewit i arlar ana  
ning a bonot pa diat la, pa tagun  
e Dewit tuk ana tinan na dodot  
tumo e Babilon ning a bonot pa  
diat otleng la, pa tagun a tinan  
na dodot tumo e Babilon tuk ana  
Karisito ning a bonot pa diat a  
mangis a tarai otleng.

*A ususr ai o e Maria ning i agon  
e Iesu Karisito*  
(Lk 2:1-7)

18 Di agon pas e Iesu Karisito  
larne: E tana, e Maria, di ka suah  
alar tari sur ane Josep, ika lanigo  
ana nundiau a taulai, e Maria ka  
tasmani mang i tianan tana Tal-  
ngan Tabu. 19 E Josep ning di ka  
suah alar tar e Maria teteki, i a  
tena tostos, pa bel i mang sur ir  
ame e Maria na matan a tarai. Pa  
i nuki mang ir kutus kumnan sen  
anundiau a lele sur a taulai.

20 Ning i nuknuk kol ot ana utna  
ne, a angelo ana Leklek i hanot  
teteki ana reres a pa i atongi mang,  
"Josep, a nat e Dewit, gong u ur-  
matana nuknuk o e Maria, ur ben  
pasi ka sur anuma hane. Anasa a  
kaklik ning i tianan pasi, i hanot  
tagun a Talngan Tabu. 21 Ir agon  
pas a kaklik barsan pa ur pasar a  
risana e Iesu\*, anasa ir alaun pas  
anuna tarai kusun anunla na toltol  
laulau."

22 A ututnala rop ne i hanot  
sur dir tolsot pas a warwarala  
ana Leklek ning anuna propet ka  
apuasa tari mang, 23 "Oroi i, a

basbas a hane ir tianan pa ir agon  
pas a kaklik barsan pa dir atongi o  
e Emanuel," *Ais 7:14*  
a kamkamna mang, "E God i kes  
taum ondala."

24 Ning e Josep i mata, i muri  
lar otning a angelo ana Leklek i ka  
atai tari ono, pa i ben pas e Maria  
sur anuna hane. 25 Ika bel dia  
borbor taum pas tuk ning e Maria  
i agon pas a kaklik barsan. Pa e  
Josep i pasar a risana o e Iesu.

## 2

*A tena tastasmala la artabar  
tetek e Iesu*

1 Di agon e Iesu tumo na hanua  
Betlihem ting na papar Judia, ana  
rau ning e Herot i king. Lamur  
dingla na tena tastasmala tagun  
a nangnangla, la han mitingia ana  
pukna ning a Kamis i pusa ot ia,  
pa la hanot saot e Jerusalem. 2 Pa  
la deke mang, "Kanaha a kaklik  
ning di agoni, sur ir king anuna  
tarai Juda? Anasa mila oroi anuna  
nangnang ting na pukna ning a  
Kamis i pusa ot ia, pa ine mila han  
ute sur milar lotu teteki."

3 Ning e king Herot i longori,  
a nuknukna i talar pa nuknuk  
a tarai Jerusalem rop otleng.

4 Lamur i ben taum rop pas a  
leklek a tena artabarla tetek e God  
pa tena asaerla tagun a warkurai.  
Pa i deken la mang, "A Karisito  
ning e God ir sune i, dir agoni  
tahaia?" 5 La kelesi mang, "Tumo  
e Betlihem ana papar Judia, anasa  
a propet i ka tumus tari mang,

6 'Ika u e Betlihem ana piu ana  
mangis a tarai Juda,

Bel u natarna kol tana ning-  
nigola anuna mangis a tarai  
Juda,

Anasa a ningnigo ir hanot tagun u,  
ning ir nigon anuka tarai Is-  
rael arlar ana tena tai alar  
anuna sipsipla.'" *Mika 5:2*

\* 1:21: A rising Iesu a kamkamna mang a Leklek i alaun a tarai.

<sup>7</sup> Lamur e Herot i arsune kumanan pas a tena tastasmalla tagun a nangnangla sur ir talapor pas tanla mang, nangse momol ning a nangnang i hanot. <sup>8</sup> I sune sen la utumo e Betlihem ana warwara larne, “Mulor han pa mulor tai wakak sur a kaklik. Pa ning mulo ka pastek pasi, mulor atai iau, sur iau maleng ar han pa ar lotu teteki.”

<sup>9</sup> Ning la ka longor tar a king, la han. La oroi ulak pas a nangnang ning la ka oroi tari ting na pukna ning a Kamis i pusa ot iai. I nigon amon la tuk ning i tur saot na pukna ning a kaklik kaningia. <sup>10</sup> Ning la oroi a nangnang ning, la kilang a tnan gasgas. <sup>11</sup> La kas ting na rumai pa la oroi pas a kaklik, pa e tana e Maria. La kes ana bokona hanla pa la lotu tetek a kaklik. Lamur la sapang pas anunla na bek pa la tabari ana artabarla ne: a gol, pa a paura di tuni pa sasawana i toboh wakak ning di atongi ana insens, pa a torok ning i toboh wakak otleng ning di atongi ana mira. <sup>12</sup> E God ka atumarang tar la ana reresa, sur gong la ulak tar sur e Herot. Pa la ulak sur anunla a hanua ana maskan a ngas kama.

#### *A tinan kumna utumo e Ijip*

<sup>13</sup> Ning la ka han tar, a angelo ana Leklek i hanot tetek e Josep ana reresa pa i atongi mang, “Ur kamtur, ur ben pas ditana, pa mutol ar liu kumna utumo e Ijip. Pa mutol ar kes tumo ia, tuk ning ar atai ulak u, anasa e Herot ir tai sur a kaklik sur ir umkoli.” <sup>14</sup> Pa i kamtur, i ben pas ditana ana morom, pa ditol han utumo e Ijip. <sup>15</sup> Ditol kes tingia tuk ning e Herot i mat. Ana nunditol a keskes tingia, di tolsot pas a warwara anuna Leklek, ning a propet ka warwara nigo tar ono larne, “A kabah pas a natuklik mitumo e Ijip.” *Hosea 11:1*

<sup>16</sup> Ning e Herot i oroi i mang a tena tastasmalla tagun a nangnangla la ka asongo tari, i balakut kol pa i arsune sur dir umkol arop sen a kakak barsanla tumo e Betlihem pa ting na hananuala otleng ning la kes milau. I saran a warkurai sur dir umkol la ning naur a rau anunla, pa la otleng ning belot naur a rau anunla, anasa a tena tastasmalla la ka atai tari ana rau anuna kaklik. <sup>17</sup> Pa di ka tolsot pasi bot a warwara ning e propet Jeremaia i warwara nigo tar onoi mang.

<sup>18</sup> “Tumo e Rama di longor a elngeng takai,  
a tintinangis pa agaia,  
E Raket i domos na natnatnala,  
anasa la ka mat rop,  
pa bel di tolsot pasi su dir amanahi.” *Jer 31:15*

#### *E Josep la tamana la ulak utumo e Nasaret*

<sup>19</sup> E Herot ka mat, pa angelo anuna Leklek i hanot tetek e Josep ana reresa tumo e Ijip. <sup>20</sup> Pa i atongi tana mang, “Ur kamtur, ur ben pas ditana, pa mutol ir han utumo e Israel, anasa la ning la mang sur lar umkol a kaklik, la ka mat.” <sup>21</sup> Lamur i kamtur, i ben pas ditana, pa ditol han utumo e Israel. <sup>22</sup> Ika i longori mang, e Akelaus i keles e tamana e Herot, sur i maleng ir hanot a king tumo na papar Judia, pa e Josep i matmataut sur ir han utumo e Judia. Pa e God i sairas tari ana reresa, sur gong ditol han utumo na papar Judia. Pa ditol han kama utumo na papar Galili. <sup>23</sup> Pa ditol han pa ditol kes ana hanua a risana e Nasaret. Ana anunditol a keskes tingia, di tolsot pas a warwara anuna propetla mang, “Dir atongi mang i a te Nasaret.”

### 3

*E Jon a Tena Baptais i warawai  
(Mk 1:1-8; Lk 3:1-18; Jn 1:19-28)*

<sup>1</sup> Dingla na rau lamur, e Jon a Tena Baptais i hanot, pa i warawai ana hanua bel ting na papar Judia, <sup>2</sup> pa i atongi mang, “Mulor lingir a nuknukimulo, anasa a matanitu misaot na langit ka milau.” <sup>3</sup> E Jon ot ne, ning a propet Aisaia ka warwara puasa nigo tar onoi mang,

“A elngena mainla i arkabah ting na hanua bel mang,

‘Mulor sang a ngas anuna Leklek, mulor atosotos anuna ngasla.’”  
*Ais 40:3*

<sup>4</sup> E Jon i mermer ana kaen di toli ana hih a kamel, pa i dot ahati ana let di toli ana palaona bulumakau. I sira ien a mumla pa polona tatos. <sup>5</sup> A tarai misaot e Jerusalem, pa miting na hananuala rop tumo na papar Judia, pa miting na hananuala ning la kes milau a malum Jodan, la han teteki. <sup>6</sup> La patuai talapor ana nunla na toltol laulaula, pa i baptais la ting na malum Jodan.

<sup>7</sup> E Jon i oroi a galis a Parisaiola pa a Sodusila la han sur ir baptais la, pa i atongi tanla mang, “Ai, mulo na natnat a soila! Bel mulor tolsot pasi sur mulor liu kumna kusun a warkurai na arkeles ane God, ning ir hanot. <sup>8</sup> Ning mulo ka lingir momol a nuknukimulo, mulor tol a utunala ning ir apuasa i mang mulo ka lingir a nuknukimulo. <sup>9</sup> Pa gong mulo nuki mang, e God bel ir warkurai mulo anasa mulo a mangis a tarai ane Abaram. A atai mulo mang, e God i tolsot pasi sur ir tol otnan a mangis a tarai ane Abaram tagun a hatatla ne. <sup>10</sup> Di ka suah tar a hek ting na kama rakaila, pa rakaila rop ning bel la suah al wakak a wanala, dir ting sen la, pa dir minggen la uting na iah. <sup>11</sup> A baptais mulo ana malum sur ir apuasa i mang mulo ka lingir a nuknukimulo. Ika esaning ir mur tak, a rakrakaina i itna tana

rakrakaik. Bel a tostos sur ar los anuna su. A natarna kol tana. Ir baptais mulo ana Talngan Tabu pa iah. <sup>12</sup> I tong pas anuna saol ana naur a kuna sur ir minggen a witla usaot sur a wuwu ir wus sen a palpalnala kusun a patnala. Ning ka timlan rop tari, ir suah taum anuna wit ting na rumai a wit, pa ir tun sen a palpalnala ting na iah ning bel i sira mat.”

*E Jon i baptais e Iesu*  
*(Mk 1:9-11; Lk 3:21-22)*

<sup>13</sup> E Iesu i han mitumo na papar Galili uting na malum Jodan tetek e Jon sur ir baptaisi. <sup>14</sup> E Jon i mang sur ir sairasi, pa i atongi tana mang, “I mangasa ning u han tetek iau sur ar baptais u? Ir wakak ning u ur baptais iau.” <sup>15</sup> Pa e Iesu i kelesi mang, “Ur baptais iau ka. I wakak ning ur toli, sur dar tolsot pas asa rop ning i tostos namatana e God.” Pa e Jon i longor tana.

<sup>16</sup> Ning ka baptais tari, ono oting e Iesu i saur miting la malum, pa a langit i sapang, pa i oroi a Inguna e God i han purum arlar ana tabun pa i kes saot ono. <sup>17</sup> Lamur a elngena mainla misaot na langit i atongi mang, “Ine a natuklik, a katnani, a gas kol onoi.”

## 4

*E Satan i lar e Iesu*  
*(Mk 1:12-13; Lk 4:1-13)*

<sup>1</sup> Lamur a Talngan Tabu i nigon e Iesu uting na hanua bel sur e Satan ir lari. <sup>2</sup> Ning ka tamai pas diat a bonot a pukakiar a morom pa diat a bonot a pukakiar a kabakiar, i murak. <sup>3</sup> Pa a tena alam i hanot teteki, pa i atongi tana mang, “Ning u a Nat e God, ur atai a hatatla ne sur lar hanot a bret.” <sup>4</sup> E Iesu i kelesi mange, “Di ka tumus tari ting na Buk Tabu mang, ‘A tarai bel la laun ka ana

utna na hangan, la laun ana warwarala rop ning i purum kusun a pahana e God.’” *Lo 8:3*

<sup>5</sup> Lamur e Satan i ben pasi usaot e Jerusalem, a hanua ane God, pa i atur tari sot ot na pukul a rumai a artabar. <sup>6</sup> Pa i atongi tana mang, “Ning u a Nat e God, ur sirok purum, anasa di ka tumus tari ting na Buk Tabu mang, ‘Ir sune anuna angelola sur lar tai alar u.

Lar tong pas u ana kunla, sur gong u buh a ham ana ta hat.’” *Buk Song 91:11-12*

<sup>7</sup> E Iesu i kelesi mang, “Di ka tumus tari otleng ting na Buk Tabu mang, ‘Gong u lar a Leklek anuma God.’” *Lo 6:16*

<sup>8</sup> E Satan i ben ulak pasi usaot lamagit ana tnan mangir, pa i asangan tar a hananuala rop ana rakrakan hanua pa a matatarinla rop otleng tana. <sup>9</sup> Pa i atongi tana mang, “Ning ur kes ana bokona ham pa ur lotu tetek iau, a utunala rop ne ar sarani tam.” <sup>10</sup> E Iesu i atongi tana mang, “Satan, ur han masik, anasa di ka tumus tari ting na Buk Tabu mange, ‘Ur lotu tetek a Leklek anuma God, pa ur longor ka tana.’” *Lo 6:13*

<sup>11</sup> Lamur e Satan i han pas kusuni, pa a angelola la han teteki, pa la nangani.

*E Iesu i turpas anuna titol a warawai ting na papar Galili*  
(*Mk 1:14-15; Lk 4:14-15*)

<sup>12</sup> E Iesu i longori mang, di ka akas tar e Jon uting na rumai a dodot, pa i ulak utumo na papar Galili. <sup>13</sup> Pa i han mitumo e Nasaret, i kes tingia e Kapernaum, a hanua ning i kes ting na hang napir a puka tasi Galili, ana piu anuna mangis a tarai Sebulon pa mangis a tarai Naptali, <sup>14</sup> sur ir tolsot pas a warwara ane God ning a propet Aisaia ka warwara nigo tar onoi mang,

<sup>15</sup> “A piu anuna mangis a tarai Sebulon pa a piu anuna mangis a tarai Naptali, milau a ngas ning i han utumo latasi, ana ris a malum Jodan utumo, dia kes ting na papar Galili, ning a tarai ning bel a tarai Juda la kes ia.

<sup>16</sup> A tarai ning la kes ana mormorom la ka oroi a tnan talapor, pa la ning a mormorom a minat i poroi alar la, a talapor ka hanot tetek la.” *Ais 9:1-2*

<sup>17</sup> Turpasi ana rau ning, e Iesu i warawai mang, “Mulor lingir a nuknukimulo, anasa a matanitu misaot na langit ka milau.”

*Diat a kakak a asaer ning e Iesu i kabah nigon pas la*  
(*Mk 1:16-20; Lk 5:1-11*)

<sup>18</sup> Ning a pukakiar e Iesu i asal ana hang ana puka tasi Galili, pa i oroi tetek e Saimon, di atongi otleng o e Pita, pa e tasnalik e Endru. Dia minggen a uben tisa latasi, anasa diau naur a tena minggen uben. <sup>19</sup> I atongi tandiau mang, “Mu lamut, mu mur iau, sur ar asaer mu sur mu naur a tena ben tarai.” <sup>20</sup> Ono otning, dia kamtur pas kusun a ubenla, pa dia muri.

<sup>21</sup> Ning i han mitingia, i oroi pas maleng naur a tas, e Jems pa e Jon, naur a nat e Sebedi. Latamana kes tar ting na mon pa ditol suk anunditol a ubenla. Pa e Iesu i kabah diau. <sup>22</sup> Ono otning, dia kamtur pa dia han kusun a mon pa e tamandiau, pa dia mur e Iesu.

*E Iesu i alangolango a tin-samanla*  
(*Lk 6:17-19*)

<sup>23</sup> E Iesu i han taltal ting na papar Galili rop, pa i asaer a tarai ting na nunla na rumai a lotula. I warawai ana Wakak a Warwara ana matanitu misaot na langit. Pa i alangolango pas a taraila kusun a



urmatana ngas a tinsamanla rop.  
<sup>24</sup> Pa a warwara o e Iesu i han sarara ting na papar Siria rop. Pa la ben rop pas a tarai ning a urmatana ngas a tinsaman i alaulau la, a tarai ning a rakrakai a kankan i alaulau la, pa la ning a motla kaning onla, la otleng ning la sira mat lalang pa la ning a palaonla i mat. Pa e Iesu i alangolango pas la rop. <sup>25</sup> Pa a tnan kunum a tarai mitisa na papar Galili pa miting na papar Dekapolis, pa misaot e Jerusalem, pa misaot na papar Judia pa mitumo na ris a malum Jodan la mur e Iesu.

## 5

*E Iesu i warwara talapor o esi la ning la angis*

(Lk 6:20-23)

- <sup>1</sup> E Iesu i oroi pas a kunum a tarai, pa i han kas ting na mangir, pa i kes. Anun a tarai a asaer la han teteki. <sup>2</sup> Pa i asaer la mang,  
<sup>3</sup> “La ning la tasmani mang la kapan ana ingunla, la angis, anasa anunla a matanitu misaot na langit.  
<sup>4</sup> La ning la domos, la angis, anasa e God ir amoro la.  
<sup>5</sup> La ning la anatarna pas la, la angis, anasa lar los pas a rakrakan hanua sur anunla.  
<sup>6</sup> La ning la murak pa la mos sur a tostos a toltol, la angis, anasa lamur lar masur.  
<sup>7</sup> La ning na tena marmaris, la angis, anasa e God ir maris la otleng.  
<sup>8</sup> La ning a nuknukinla i totoh, la angis, anasa lar oroi e God.  
<sup>9</sup> La ning la sira amolmol a tarai, la angis, anasa e God ir atong la na natnatna.  
<sup>10</sup> La ning di alaulau la anasa la mur a tostos a toltol, la angis,

anasa anunla a matanitu misaot na langit.

- <sup>11</sup> “Mulo angis ning di atong laulau mulo, pa di alaulau mulo, pa di atong a asasongo na warwarala o mulo mang mulo tol na toltol laulaula, anasa mulo anuki. <sup>12</sup> Mulor gas, anasa i itna kol anumulo a arlou saot na langit. Anasa mangotleng larning di ka alaulau nigon a propetla ning la laun nigo ta mulo.

*A warwara larlar ana sol pa talapor*

(Mk 9:50; Lk 8:16; 14:34-35)

- <sup>13</sup> “Mulo a sol te na rakrakan hanua rop. Ika, ning a makmakana ka rop, dir amakmakan ulak mangmangasa pasi? Bel ta utna ma i topasi. Dir minggen apurum seni utumo lapiu, pa a tarai lar papas kama saot ono.

- <sup>14</sup> “Mulo a talapor te na rakrakan hanua rop. Ta hanua ning i kes saot na mangir, bel ir parau lar pas. <sup>15</sup> Bel tik ir asot tar ta lam pa ir aroh alari ana paket. Dir suah i ot saot na turtur ngasna sur ir talapor tek la rop ning la kes ting na rumai. <sup>16</sup> Larotleng ning, anumulo a talapor ir apuasa i namatan a tarai, sur lar oroi anumulo a wakak a titolla, pa lar atong aitna pas e Tamamulo ning i kes saot na langit.

*E Iesu i asaer a tarai ana Warkuraila*

- <sup>17</sup> “Gong mulo nuki mang a hanot sur ar kibas sen a warkuraila ane Moses pa asaerla anuna propetla. Bel a hanot sur ar kibas sen la, a hanot sur ar tolsot pas la. <sup>18</sup> A atong momoli ta mulo, bel ta natar a tumtumus lik o ta akinalang lik tagun a warkuraila ne ir rarop, tuk ning a bakut pa rakrakan hanua diar rarop. A warkuraila lar kes ot, tuk ning dir tolsot pasi. <sup>19</sup> Esi ning ir lakai ta natar a warkurai mite na warkuraila ne, pa ir asaer rongon a tarai

sur la otleng lar lakai i, dir atongi mang, i natarna kol ana matanitu saot na langit. Ika esining ir mur a warkuraila ne, pa ir asaer a tarai ono, dir atongi mang, i itna ana matanitu saot na langit. <sup>20</sup> Larne, a atongi ta mulo, ning anumulo a tostos a toltol bel ir itna bolos a tostos a toltol ana tena asaerla tagun a warkurai pa Parisaiola, bel mulor tolsot pasi sur mulo kas ting na matanitu saot na langit.

*A warwara ana balakut*

<sup>21</sup> “Mulo ka longor tari ning lanigo di ka atong tari tana tarai mang, ‘Gong u umkol tik. Esi ning ir umkol tik dir warkurai i.’ <sup>22</sup> Ika iau, a atongi ta mulo mang, esining ir balakut tetek ta tasnalik, dir warkurai i, pa esining ir atongi ana ta tasnalik mang, ‘Bel ta pukulum,’ dir warkurai i namatan a tarai a kiwung. Pa esining ir atongi ana ta barsan mang, ‘A longlong u,’ ngandek a warkurai ono, dir minggeni ting na tnan iah.

<sup>23</sup> “Ning ur han sur ur saran anuma artabar ting na logo na tun artabar, pa ur nuk pas ta utna ning e tasimlik i tiu u ono, <sup>24</sup> ur suah tar anuma artabar ting napir a logo na tun artabar. Ur han kaba, pa mur armoro nigo pas o e tasimlik. Lamur ur ulak, pa ur sarani bot anuma artabar.

<sup>25</sup> “Ning tik ir suah tar u ana warkurai, mur armoro nigo ning mu kaning ot mu han amon ting na numu a tinan, sakana ir saran tar u tetek a tena warkurai. Pa tena warkurai ir malmaling sen u tetek a tena tai alar pa ir akas tar u ting na rumai a dodot. <sup>26</sup> A atong momoli tam, bel ur purum lar pas tuk ot ning ur saran a ararop a toia ana num a arlou.

*A warwara ana laulau a nuknuk sur a hane*

<sup>27</sup> “Mulo ka longor tari ning di ka atong tari mang, ‘Gong u tol ka toltol laulau ana ta hane anuna

tik o ta barsan anuna tik.’ <sup>28</sup> Ika iau, a atongi ta mulo mang, ning ta barsan ir oroi tar ta hane pa a nuknukna i laulau teteki, ting na nuknukna ka tol tar a toltol laulau ana hane ning. <sup>29</sup> Ning a sot a matam ir ben rongon u, ur liok seni, pa ur minggen masuk seni. Ir wakak ning takai a puka palaom ka dir minggen seni, sakana dir minggen a palaom rop ting na tnan iah. <sup>30</sup> Ning a sot a kum ir ben rongon u, ur kutus seni, pa ur minggen masuk seni. Ir wakak ning takai a puka palaom ka dir minggen seni, sakana dir minggen a palaom rop ting na tnan iah.

*A warwara ana kutus taulai*

<sup>31</sup> “Di ka atong tari otleng mang, ‘Esi ning i kepsen anuna hane, ir saran tari otleng a paka buk na kutus tinaulai tana.’ <sup>32</sup> Ika iau, a atongi ta mulo mang, ning a hane bel i tol ta toltol laulau taum ta barsan, pa anuna barsan i kepsen orosi ka, pa a hane i taulai ulak, i tol a toltol laulau. Ika anuna barsan, i kamkamna ana laulau ning. Ning ta barsan ir taulai ana ta hane ning anuna barsan i kepsen seni, i otleng ka tol a toltol laulau, anasa a hane ning, i taulai ot.

*A warwara ana lele*

<sup>33</sup> “Mulo ka longor tari otleng ning lanigo di ka atong tari tana tarai mang, ‘Gong u lele asasongo. A utna ning u ka lele tar ono tetek a Leklek, ur tolsoti ot.’ <sup>34</sup> Ika iau, a atongi ta mulo mang, gong mulo arakrakai a lele ana ta ngas a warwara otleng. Gong mulo lele ana langit, anasa a langit a keskes a king ane God. <sup>35</sup> Gong mulo lele ana rakrakan hanua, anasa a rakrakan hanua a pukna ning i suah naur a hana ono. Gong mulo lele o e Jerusalem, anasa e Jerusalem a hanua ana tnan King. <sup>36</sup> Gong u lele ana pukulum, anasa

bel ur lingir lar pas ta hih a pukum lum sur ir kokok, o ir mutmut.<sup>37</sup> Mulor atongi ka mang 'ma' o 'bel'. Anasa, ning mulor atong ta ngas a warwara otleng, i ning i hanot kama kusun a Tena Laulau.

*Gong mulo keles a toltol laulau anuna tik*

*(Lk 6:29-30)*

<sup>38</sup> "Mulo ka longor tari ning di ka atong tari mang, 'Ning tik ir liok sen ta matan tik, dir kelesi otleng teteki, dir liok seni otleng ta matana. Pa ning tik ir tubul kuben sen ta ngesen tik, dir kelesi otleng teteki, dir tubul kuben seni otleng ta engesena.'<sup>39</sup> Ika iau, a atongi ta mulo mang, gong mulo keles a laulau anuna tik ning i toli tetek mulo. Ning tik i pasar tar a ris a sot a paham, ur saran otleng ning a ris tana.<sup>40</sup> Ning tik i mang sur ir dat tar u ana warkurai pa dir saran a warkurai tam sur ur saran anuma siot tana, ur noren tari otleng anuma saket.<sup>41</sup> Ning tik i angongos pas u sur mur han taum uting na ta hanua ning i milau ka, ur han taum ono uting na hanua ning i bakbak siklik.<sup>42</sup> Ur tabar tik ning i nunung u. Pa ning tik ir nunung u sur ir los pasi kaba ta utna kusun u, ur sarani kaba tana.

*A marmaris tetek na hirua*

*(Lk 6:27-28, 32-36)*

<sup>43</sup> "Mulo ka longor tari ning di ka atong tari mang, 'Ur mang sur a halim, pa ur nget anuma hirua.'<sup>44</sup> Ika iau, a atongi ta mulo mang, mulor mang sur anumulo na hirua, pa mulor nunung sur la ning la alaulau mulo.<sup>45</sup> Ning mulor toli larning, ir asangani mang mulo na natnat e Tamamulo, ning i kes saot na langit. Anasa i saran tar a Kamis sur ir talapor ana laulau a tarai pa wakak a taraila otleng, pa i saran tar a kiar tetek na tena tostos pa tetek la otleng ning bel la tostos.<sup>46</sup> Ning mulo mang sur la ka ning la mang sur

mulo, asa ma anumulo a arlou? Na tena los totokom, ning bel la lasan ana marmaris la toli otleng larne, gepi?<sup>47</sup> Ning mulo gas pas ka sur na halalalimulo, mulor wakak kol tan a tarai masikla mangmangasa? A tarai otleng ning bella tortorot la gasgas pas ka sur na halalalinla, gepi?<sup>48</sup> Mulor tostos momol, arlar ana Tamamulo ning i kes saot na langit, i tostos momol.

## 6

*A asaer ana artabar*

<sup>1</sup> "Mulor tumarang mulo sur gong mulo tol anumulo a wakak a titol na matan a tarai ka, sur lar oroi i pa lar atong aitna pas mulo. Ning mulo toli larne, bel ta arlou anumulo tana Tamamulo ning i kes saot na langit.<sup>2</sup> Pa ur tabar a kapan a taraila, gong u warwara nigo sur a tarai lar oroi u. A tarai ning bel la artabar ana momol a balanla, la sira warwara nigo ana anunla a artabar ting na rumai lotula pa ting na ngasla otleng, sur a tarai lar atong aitna pas la ono. Gong mulo toli arlar onla. A atong momoli ta mulo, ning a tarai la aitna pas la, i ot ning anunla a kidol a arlou.<sup>3</sup> Ning ur tabar a kapan a taraila, gong a kair a kum i tasman asaning a sot a kum i toli,<sup>4</sup> sur ur artabar kumna ka. Pa e Tamam ning i oroi asaning u tol kumnani, ir saran a arlou tam.

*A asaer ana nunung*

*(Lk 11:2-4)*

<sup>5</sup> "Ning mulor nunung, gong mulo arlar ana tena asasongola. La mang kol sur lar tur pa lar nunung ting na rumai lotu, pa ting na pukpuknala ning a tarai la hanan taum tingia, sur a tarai lar oroi la pa lar atong aitna pas la. A atong momoli ta mulo, ning a tarai la aitna pas la, i ot ning anunla a kidol a arlou.<sup>6</sup> Ika u, ning ur nunung, ur kas ting na num a

rumai pa ur tagar alar pas u, pa ur nunung tetek e Tamam ning bel tik i oroi i. Pa e Tamam ning i oroi asaning u tol kumnani, ir saran anuma arlou.

<sup>7</sup> “Ning mulor nunung, gong mulo abereng wara oros ka, arlar ana nunung ana taraila ning bel la tasman e God. La nuki mang dir longor la anasa la atong a galis a warwara. <sup>8</sup> Gong mulo arlar onla, anasa a Tamamulo ka tasman tar asa rop ning mulo kapan suri, ning belot mulo nunung.

<sup>9</sup> “Mulor nunung larne, “Tamamila saot na langit, i wakak ning dir hanrawai a risam.

<sup>10</sup> I wakak ning anuma matanitu ir hanot.

I wakak ning dir mur a nuknukim te na rakrakan hanua, arlar onoi ning di sira muri saot na langit.

<sup>11</sup> A pukakiar ne ur tabar mila ana utna na hangan amilai.

<sup>12</sup> Ur kepsen anumila na toltol laulaula,

larning mila otleng milar nuk duman sen anunla na toltol laulaula tetek mila.

<sup>13</sup> Gong u ben mila uting na arlam. Ur alaun mila kusun a Tena Laulau.\*

<sup>14</sup> “Ning mulor nuk duman sen na toltol laulaula ning a tarai la toli tetek mulo, e Tamamulo, ning i kes saot na langit, ir kepsen anumulo na toltol laulaula otleng. <sup>15</sup> Ika, ning bel mulo nuk duman sen na toltol laulaula, ning a tarai la tol tari tetek mulo, e Tamamulo otleng bel ir kepsen anumulo na toltol laulaula.

#### *A asaer ana tamai*

<sup>16</sup> “Ning mulor tamai sur mulor nunung, gong mulo tai arlar ana tena asasongola, anasa la tai na bal maris sur a tarai lar oroi i

mang la tamai. A atong momoli ta mulo, ning a tarai la aitna pas la, i ot ning anunla a kidol a arlou. <sup>17</sup> Ning ur tamai, ur kom a pukulum, pa ur damus a patarim, <sup>18</sup> sur gong a tarai la tasmani mang u tamai. E Tamam ka, ning bel tik i oroi i, ir tasmani. Pa e Tamam ning i oroi asaning u tol kumnani, ir saran anuma arlou.

#### *Na ututnala saot na langit*

*(Lk 12:33-34)*

<sup>19</sup> “Gong mulo suah taum a gongonla te lapiu, ning a koropos pa ros diar alaulau sen la ka, pa na tena kinkinaula lar kas pa lar kinau i. <sup>20</sup> Mulor suah taum a ututnala saot na langit, ning a koropos pa ros bel diar alaulau i, pa na tena kinkinaula otleng bel lar kinau lar pasi. <sup>21</sup> Anasa ting na hanua ning anuma gongonla kaning ia, anuma lalaun otleng kaning ia.

#### *A lam ana palaondala*

*(Lk 11:34-36)*

<sup>22</sup> “Naur a matandala dia arlar ana lam ana palaondala. Ning naur a matam dia wakak, a palaom rop ir bukus ana talapor. <sup>23</sup> Ika, ning naur a matam dia laulau, a palaom rop ir bukus ana mormorom. Ning anuma talapor i mormorom ka, a mormorom ning ir itna kol!

#### *Gong mulo nuknuk kol sur ta utna*

*(Lk 16:13; 12:22-31)*

<sup>24</sup> “Bel tik ir titol lar pas tetek ir naur a ningnigo. Ir nget ning a halindiau, pa ir mang sur ning a halindiau, ir katnan ning, pa takai ir saran a kaba hina kusuni. Bel mulor titol lar pas tetek e God pa tetek a mani otleng.

<sup>25</sup> “I maining, a atongi ta mulo mang, gong mulo nuknuk kol ana numulo a lalaun mang asaning

\* **6:13:** Dingla na tena tastasmai ana Buk Tabu la nuki mang dingla na warwarala otleng i kes te na ves ne. I larne: *Anasa anumi ka a matanitu pa rakrakai pa matatar, onone pa lamur pa bel ir rarop. Amen*

mulor ieni, pa sa mulor gangi. Pa gong mulo nuknuk kol ana palaomung otleng mang asa mulor mermer ono. A lalaun i itna tana utna na hangan, gepi? Pa a palaondi otleng i itna tana kaenla, gepi? <sup>26</sup> Mulor oroi a manila. Bel la oman tar ta utna, pa bel la sol tar al utna, pa bel la susuah taum ana ta rumai, ika e Tamamulo ning i kes saot na langit, i sira tabar la. Pa mulo, mulo itna kol tanla. <sup>27</sup> Esi ta mulo ning i nuknuk kol ana nuna lalaun, ir tolsot sur ir tugus barah siklik anuna lalaun? Belal.

<sup>28</sup> “Sur asaning mulo nuknuk kol sur a kaenla? Mulor oroi a wakak a purpurla misa na bual, mang la gomo mangmangasa. Bel la sira titol pa bel la sira tol kaen. <sup>29</sup> Ika a atongi ta mulo, e King Solomon ot ning anuna mermer rop i tai wakak, ika bel i tai wakak arlar ana purpurla ning. <sup>30</sup> E God i amermer a ulai sakas na bual ana wakak a purpurinla, ning anone i tapalas, pa latu dir tun seni ting na iah. Ning i toli larning ana ulai, i momol kol mang ir amermer mulo otleng. Anumulo a tortorot i natarna kol. <sup>31</sup> Gong mulo nuknuk kol pa mulo atongi mang, ‘Asa dalar ieni?’, o ‘Asa dalar gangi?’, o ‘Asa ning dalar mermer ono?’ <sup>32</sup> Anasa a taraila ning bel la tasman e God la rakrakai sur a ututnala rop ning, ika e Tamamulo ning i kes saot na langit i tasmani mang mulo kapan sur a ututnala rop ning. <sup>33</sup> Mulor tai nigo sur anuna matanitu pa anuna tostos a toltol, pa ir tabar mulo otleng ana ututnala rop ne. <sup>34</sup> Pa gong mulo nuknuk kol sur a pukakiar latu, anasa latu ir nuknuk ot suri. A mamahatla ona taktakai a pukakiar i to pasi ot a pukakiar ning.

## 7

*Gong mulo warkurai atoltol ana*

*tik*

*(Lk 6:37-38, 41-42)*

<sup>1</sup> “Gong mulo warkurai a toltol ana tik, sakana e God ir warkurai a toltol anumulo. <sup>2</sup> Anasa e God ir warkurai mulo arlar larning mulo warkurai tik. Pa a ngas a warkurai ning mulo warkurai tik ono, i ot ning e God ir warkurai ulak mulo ono. <sup>3</sup> Sur asaning u oroi pas ka a beren kaning namatana e tasimlik, pa bel u nuk pas a puka rakai kaning na matam? <sup>4</sup> Ning a puka rakai kaning na matam, ur atong mangmangasa i tetek e tasimlik mang, ‘Ar kepsen a beren kusun a matam?’ <sup>5</sup> U a tena asasongo, ur kepsen nigon a puka rakai kusun a matam, pa ur tai wakak, sur ur kepsen a beren kusun a matana e tasimlik.

<sup>6</sup> “Gong mulo tabar a papla ana utna ane God, sakana lar talingir, pa lar arat gingini mulo. Pa gong mulo minggen anumulo a sar tetek a boroila, sakana lar pas gingini i ka ana hanla.

*Mulor nunung pa e God ir tabar mulo*  
*(Lk 11:9-13)*

<sup>7</sup> “Mulor nunung, pa dir tabar mulo, mulor sereni, pa mulor pasteteki, mulor pinpidir, pa dir sapang pas mulo. <sup>8</sup> Anasa la rop ning la nunung dir tabar la, pa esining i sereni ir pasteteki, pa esining i pinpidir, dir sapang pasi.

<sup>9</sup> “Esi na halimulo, ning e natalik ir nunungi sur ta bret, ir tabari ka ana hat? <sup>10</sup> Pa ning ir nunungi otleng sur ta sis, ir tabari ka ana soi? <sup>11</sup> Mulo na laulau a tarai, ika mulo tasman ot a wakak a artabarla sur mulor tabar na natnatumulola ono. Ning mulo sira toli lerne, i momol kol mang, e Tamamulo ning i kes saot na langit ir saran a wakak a ututnala tetek esining ir nunungi. <sup>12</sup> A ututnala rop ning mulo mang sur a tarai lar toli tetek mulo, mulo otleng, mulor sira toli tetek la. Ine a kamkama

warkurai ane Moses, pa asasaerla ana propetla.

*A ngas sur a lalaun pa ngas sur a inirua tikin*  
(Lk 13:24)

<sup>13</sup> “Mulor kas ana natar a taman lik. Anasa a taman pa ngas ning i han sur a hinirua tikin, i palar pa i langolango, pa galis a tarai kol la sira kas ono. <sup>14</sup> Ika a taman pa ngas ning i han sur a lalaun, i natarna, pa silik tarai ka la sira pastek pasi.

*A atumarang ana asasongo na propetla*

(Lk 6:43-44)

<sup>15</sup> “Mulor tumarang ana asasongo na propetla. La sira han tetek mulo ana wakak a gininla arlar ana sipsipla, ika tingia na balanla, la mang sur lar alaulau mulo arlar ana ngalngalia na papla. <sup>16</sup> Mulor oroi lalan a asasongo na propetla ana gininla. I mangasa, dir git pas ta wana wain miting na kadas, pa ta wana fig miting na rosros? Bel! <sup>17</sup> Larka otleng ning a wakak a rakaila rop la sira suah a wakak a wanla, ika a laulau a rakaila rop la sira suah a laulau a wanla. <sup>18</sup> A wakak a rakai bel ir suah ta laulau a wana, pa a laulau a rakai otleng bel ir suah ta wakak a wana. <sup>19</sup> A rakaila rop ning bel la suah a wakak a wanala, dir ting sen la, pa dir minggen la ting na iah. <sup>20</sup> Manglarning, mulor oroi lalan a asasongo na propetla ana gininla.

*A Leklek ir puai mang, “Bel a tasman mulo”*  
(Lk 13:25-27)

<sup>21</sup> “Belsur la rop ning la atong iau mang, ‘Leklek, Leklek,’ lar kas uting na matanitu saot na langit. La ka, ning la sira mur a nuknuk e Tata, ning i kes saot na langit, lar kas uting na nun a matanitu. <sup>22</sup> Ana pukakiar a warkurai a galis lar atongi tak mang, ‘Leklek,

Leklek, mila warwara na propet ana risam, pa mila kepsen a motla otleng ana risam, pa mila tol a galis a ututnala na kulkulan ana risam.’ <sup>23</sup> Ar keles la mang, ‘Bel a tasman mulo. Mulo na tena laulau, mulor han masik kusun iau.’

*Naur a tena tol rumai*  
(Lk 6:47-49)

<sup>24</sup> “La rop ning la longor anuka warwarala ne, pa la longor ono, la arlar ana tena tastasmai, ning i tol tar anuna rumai saot na hat. <sup>25</sup> A kiar i punga, pa lomom i hanot, pa wuwu i ragati pa i um a rumai ning, ika bel i taroh, anasa di atur tari saot na hat. <sup>26</sup> La rop ning la longor anuka warwarala ne, ika bel la muri, la arlar ana longlong, ning i tol tar anuna rumai saot na woio, pa bel i por rakrakai a kasanga. <sup>27</sup> A kiar i punga, pa a lomom i hanot, pa wuwu i ragati pa i um a rumai ning, pa i taroh, pa i tarege kakat.”

<sup>28</sup> Ning e Iesu ka atong rop tar a warwarala ne, a kunum a tarai la kulkulan ana nuna asasaer, <sup>29</sup> anasa i asaer la arlar o esaning a warkurai kaning tana. Bel i asaer la arlar ana anunla na tena asaer tagun a warkurai la sira toli.

## 8

*E Iesu i alangolango pas a lepra*  
(Mk 1:40-45; Lk 5:12-16)

<sup>1</sup> Ning e Iesu i han punum misaot na mangir, a galis a kunum a tarai la muri. <sup>2</sup> Ning a barsan, a lepra, i han teteki, i kes ana bokona hana ting napirna, pa i atongi mang, “Leklek, ning u mang, ur tolsot sur ur alangolango pas iau.” <sup>3</sup> E Iesu i tuslan a kuna, pa i tong a palaona, pa i atongi tana mang, “A mang ot, ur langolango.” Ono otning a lepra i rop kusuni. <sup>4</sup> Lamur e Iesu i atongi tana mang, “Gong u atai tar tik ono. Ur han pa ur asangan u tetek a tena artabar tetek e God,

pa ur saran a artabar tetek e God larning e Moses ka atong tari. Ning ur toli larne, ir talapor tetek a tarai mang u ka langolango.”

*A tortorot ana ningnigo anuna tena harumla*

*(Lk 7:1-10)*

<sup>5</sup> Ning e Iesu ka hanot tumo e Kapernaum, ning a ningnigo anuna tena harumla mitumo e Rom i han teteki, pa i atai i sur ir nangani. <sup>6</sup> I atongi mang, “Leklek, ning a tena titol anuki kanumo na rumai i borbor, a palaona rop i mat, pa i kilang a rakrakai a kankan kol.” <sup>7</sup> E Iesu i atongi tana mang, “Ar han par alangolango pasi.” <sup>8</sup> A ningnigo ning i kelesi mang, “Leklek, bel a tostos sur ur kas ting na nuk a rumai. Ur atong ta warwara ka, pa anuka tena titol ir langolango. <sup>9</sup> Anasa iau a barsan ning a sira longor ana warkurai anunla ning la leklek tak, pa di saran tar a warkurai otleng tak sur ar nigon a tarai a harum. Ning ar atongi tana tik mang, ‘Ur han,’ ir han ka. Pa tetek tik otleng larne, ‘Ur han ute,’ ir han ka ute. Pa tetek anuka tena titol mang, ‘Ur tol a utna ne,’ ir toli ka.”

<sup>10</sup> Ning e Iesu i longor anuna warwara, i kulkulan kol onoi, pa i atongi tetek a tarai ning la muri mang, “A atong momoli tamulo, bel a oroi tar ta te Israel ning anuna tortorot i itna arlar ana barsan ning. <sup>11</sup> A atai mulo mang kaning lamur a galis a tarai lar han miting namatana tobar pa matana labur, pa lar kes taum o e Abaram, e Aisak pa e Jekop ana ngasa ting na matanitu saot na langit. <sup>12</sup> Ika, a tarai Israel ning lanigo e God i aslang pas la sur lar kes ana nuna matanitu, ir lu purum sen a galis kusun la uting na mormorom. Pa lar tangtangis pa lar arngingit ngesenla tingia.” <sup>13</sup> Pa e Iesu i atongi tana ningnigo anuna tena harumla mang, “Ur

han ka. Dir tol a utna ot ning u tortorot suri.” Ana puka kamis ot ning anuna tena titol i langolango kakat.

*E Iesu i alangolango pas a galis a tinsaman*

*(Mk 1:29-34; Lk 4:38-41)*

<sup>14</sup> E Iesu i kas uting na rumai ane Pita, pa i oroi a hane, a anmuna e Pita, i sasam a palaona i laplapang, kaning i borbor ting na logo. <sup>15</sup> E Iesu i tong a kuna, pa laplapang i rop kakat kusuni. I kamtur, pa i tabar e Iesu ana utna na hangan.

<sup>16</sup> Ning a kamis ka sup tar, di ben otnan a galis a tarai, ning a motla kaning onla, tetek e Iesu. I kepsen a motla ana warwara ka, pa i alangolango pas la rop, ning la sasam. <sup>17</sup> A utna ne i hanot sur dir tolsot pas a warwarala, ning a propet Aisaia ka warwara tar ono mang,

“I ot i los pas anundala na kankan, pa i kibas sen anundala na tinsamanla.” *Ais 53:4*

*La ning la mang sur lar mur e Iesu*

*(Lk 9:57-62)*

<sup>18</sup> Ning e Iesu i oroi a kunum a tarai ning la tur talilis pasi, i atongi tana anuna kakak a asaerla mang, “Dalar han utumo na ris a puka tasi.” <sup>19</sup> Pa ning a tena asaer tagun a warkurai i han teteki, pa i atongi tana mang, “Tena Asaer, ar mur u uting na hananuala rop ning ur han ia.” <sup>20</sup> Pa e Iesu i atongi tana mang, “A rokoio na papla anunla na tungla ot, pa a manila otleng anunla na pios ot, ika a Nat a Barsan bel anuna ta rumai sur ir borbor onoi.” <sup>21</sup> Pa ning a barsan otleng, tagun anuna tarai a asasaer i atongi tana mang, “Leklek, ur noren iau kaba sur ar han, sur ar por sen tar e tata.” <sup>22</sup> Ika e Iesu i atongi tana, “Ur mur iau, pa ur noren sen a minatla lar por anunla na minatla.”

*E Iesu i sairas a wuwu pa top*

*(Mk 4:35-41; Lk 8:22-25)*

<sup>23</sup> E Iesu i kas ana mon, pa anuna kakak a asaerla la kas namurna. <sup>24</sup> Lamur a rakrakai a wuwu i hanot kulkulan pa i ragati tetek la ting na puka tasi. A top i takube saot na mon. Ika e Iesu i borbor duman, <sup>25</sup> pa la han teteki, la amata pasi, pa la atai i mang, “Leklek, ur alaun dala. Dala kar hirua.” <sup>26</sup> Pa i atongi tanla mang, “Anumulo a tortorot i natarna kol. Sur asaning mulo matmataut?” I kamtur pa i sairas a wuwu pa top, pa i mililo rop. <sup>27</sup> Pa kakak a asaerla la kulkulan ono, pa la atongi mang, “Esi na ngas a barsan momol ne? A wuwu pa top dia longor tana!”

*E Iesu i kepsen a motla kusun naur a barsan*

*(Mk 5:1-20; Lk 8:26-39)*

<sup>28</sup> Ning e Iesu i sot tumo na ning a ris a tasi, ting na papar anuna tarai Gadara, naur a barsan ning a motla kaning on diau, dia han miting na kulam a minatla, pa dia han barati. Dia ngalngalia kol, pa bel tik i sira han bolos tingia na ngas ning. <sup>29</sup> Dia woiwoi mang, “Nat e God, asa u mang ur toli o miau? I mangasa, u han ute sur ur akadik mila ning belot a pukakiar a warkurai i sot?” <sup>30</sup> A kaba liur a boro i la hangan milau ka tingia. <sup>31</sup> Pa a motla la nunung rakrakai e Iesu mang, “Ning ur kepsen mila, ur sune kas tar mila uting na liur a boro i.” <sup>32</sup> E Iesu i atongi tanla mang, “Mulor han!” Pa a motla la purum kusun naur a barsan ning, pa la kas tar ana boroila. A boroila la liu purum uting na palis sur utumo na puka tasi, pa la dom rop.

<sup>33</sup> A tarai ning la tai alar a boroila ning, la dun ulak sur anunla a hanua. Ning la hanot, la atatai ana ututnala rop ning i hanot, pa on diau otleng, ning a motla la kes tar on diau. <sup>34</sup> A tarai

rop miting na hanua ning, la han sur lar oroi e Iesu. Ning la oroi pasi, la nunungi sur ir han kusun anunla a papar.

## 9

*E Iesu i alangolango pas a barsan ning a palaona i mat*

*(Mk 2:1-12; Lk 5:17-26)*

<sup>1</sup> E Iesu i kas ana mon, pa i han lakai utumo na ning a ris a puka tasi pa i hanot ting na anuna hanua. <sup>2</sup> Pa dingla na tarai la los otnan ning a barsan teteki, a palaona i mat pa i borbor tar ka ana logo ngasna. Ning e Iesu i oroi anunla tortorot, i atai a barsan ning mang, “Natuklik, gong u matmataut, di ka kepsen tar anum na toltol laulau.” <sup>3</sup> Dingla na tena asaer tagun a warkurai la warwara artalai tetek la ot mang, “A barsan ne i atong saksakan e God anasa i warwara larning i e God.”

<sup>4</sup> Pa e Iesu i tasman a nuknukinla, pa i deken la mang, “Sur asa mulo nuknuk laulau?” <sup>5</sup> Esi na ngas a warwara ning bel i ngangaten sur ar atongi? Ar atongi mang, ‘Di ka kepsen anum na toltol laulaula,’ o, ar atongi mang, ‘Ur kamtur, pa ur han?’ <sup>6</sup> Ar atongi larne, sur mulor tasmani mang, e God ka saran tar a warkurai tetek a Nat a Barsan, sur ir kepsen a toltol laulaula te lapiu.” Pa i atongi tetek a barsan ning a palaona i mat mang, “Ur kamtur, ur kibas a logo ngasim, pa ur han uting na rumai ngasim.” <sup>7</sup> I kamtur, pa i han uting na rumai ngasna. <sup>8</sup> Ning a kunum a tarai la oroi a utna ne, la kulkulan kol ono, pa la rakan aleklek pas e God, anasa i saran a rakrakai larne tetek a tarai.

*E Iesu i kabah pas e Matiu*

*(Mk 2:13-17; Lk 5:27-32)*

<sup>9</sup> Ning e Iesu i han miting ia, i oroi pas ning a barsan, a risana e Matiu, i kes ting na rumai a los



totokom. E Iesu i atai i mang, “Ur mur iau.” Pa e Matiu i kamtur pa i muri.

<sup>10</sup> Lamur ning e Iesu taum ana anuna kakak a asaerla, la hangan ting na rumai ane Matiu, a galis a tena los totokom pa tena laulaula la han tetek e Iesu, pa la hangan taum onla. <sup>11</sup> Ning a Parisaiola la oroi i, la deken anuna kakak a asaerla mang, “Sur asaning anu-mulo a tena asaer i hangan taum ana tena los totokomla pa tena laulaula?”

<sup>12</sup> E Iesu i longori pa i atongi mang, “A dokta bel i hanot sur la ning la langolango. I hanot sur la ka ning la sasam. <sup>13</sup> Mulor han, pa mulor asaer sur mulor tastasim ana kamkama warwara ne miting na Buk Tabu, ‘A mang sur a marmaris, pa bel a mang sur a artabar ning di sira tuni.’ *Hosea 6:6* Anasa bel a hanot sur ar kabah pas na tena tostos. A hanot sur ar kabah pas a tena laulaula.”

*A kabah ana tamai*  
(*Mk 2:18-22; Lk 5:33-39*)

<sup>14</sup> A kakak a asaerla ane Jon la han tetek e Iesu, pa la dekeni mang, “Sur asa ning mila ma na Parisaiola mila tamai, ika anuma kakak a asaerla bel?” <sup>15</sup> E Iesu i keles la mang, “Ning ta barsan ir taulai totoh, na halalna lar domos mangmangasa ning a barsan ning kaning ot i kes taum onla? Ika ta pukakiar ir hanot, ning dir ben maskan pas a barsan ning kusun la, pa lar bot tamai.

<sup>16</sup> “Bel tik ir suk ahat a dia tona kaen taum ana muarna ning i taksilir, sakana a dia tona kaen ir silir a muar a kaen, pa ir taksilir kol. <sup>17</sup> Bel tik ir tere a tona wain uting na turai a kotola ning di toli ana palaona inagoi, sakana a kotola lar tapuros pa lar laulau, pa a wain ir tapek. Dir tere a tona wain ot uting

na tona koto na wain, sur dia rop diar kes wakak.”

*E Iesu i alaun pas ning a hane lik, pa i alangolango pas ning a hane*

(*Mk 5:21-43; Lk 8:40-56*)

<sup>18</sup> Ning e Iesu kaning ot i warwara tetek la, ning a ningnigo i han teteki, pa i kes ana bokona hana sa lanigo tana, pa i atongi mang, “A natuk hane, onokane i mat. Lamut, dar han pa ur suah a kum saot ono, pa ir laun.” <sup>19</sup> Pa e Iesu i kamtur pa dia han taum ana nuna kakak a asaerla.

<sup>20-21</sup> Ning a hane i sasam ana suluk arlar ana ning a bonot pa pisir naur a rau. I nuki mang, ning ir tong ka a mermer ane Iesu, ir langolango. Pa i han tumo lamur ta e Iesu, pa i tuk a ris a tuka saket anunai. <sup>22</sup> E Iesu i talingir pa i oroi a hane ning, pa i atai mang, “Natuklik, gong u matmataut, anuma tortorot ka alangolango pas u.” Pa ono oting a hane ning i langolango.

<sup>23</sup> Ning e Iesu i kas ting na rumai ana ningnigo, i oroi a tarai ning la asangan anunla a bal maris ana minat. La wus a tulalla, pa kunum a tarai otleng la domos. <sup>24</sup> I atai mang, “Mulor purum kusuni. A hane lik ne bel i mat, kaning i borbor duman ka.” Pa la malani ka. <sup>25</sup> Ning e Iesu ka sune purum sen a taraila, i kas pa i tong a kuna kaklik hane ning, pa i kamtur kakat. <sup>26</sup> A warwara ana utna ne i han sarara ting na papar rop ning.

*E Iesu i apalpalas pas naur a kut*

<sup>27</sup> Ning e Iesu i han mitingia, naur a barsan, naur a kut, dia muri, dia arkabah rakrakai mang, “Nat e Dewit\*, ur maris miau.” <sup>28</sup> Ning i kas ting na rumai, naur a kut dia han teteki, pa i deken

\* 9:27: A tarai Juda la sira atong a Mesaia a Nat e Dewit.

diau mang, “I mangasa, mu tortorot ot hok sur ar tolsot pas a utna ne?” Dia kelesi mang, “Ma Leklek.”<sup>29</sup> Pa i tong naur a matan diau pa i atai diau mang, “Dir toli tetek mu arlar ana sa mu tortorot onoi.”<sup>30</sup> Pa dia tai kakat. Pa e Iesu i sairas rakrakai tar diau mang, “Gong mu atai tar tik ono.”<sup>31</sup> Ika dia han pa dia atatai amon o e Iesu ting na papar rop ning.

*E Iesu i kepsen a mot kusun a barsan*

<sup>32</sup> Ning naur a kut dia kaning ot dia han amon kusun e Iesu, di ben otnan tar ning a barsan teteki, i ngat, a mot kaning ono. <sup>33</sup> E Iesu i kepsen a mot kusuni, pa barsan ning i ngat i bot warwara. Pa kunum a tarai la kulkulan, pa la atongi mang, “Bel ta utna larne di oroi tari te e Israel. I bot ne di oroi.”<sup>34</sup> Ika a Parisaiola la atongi mang, “I sira kepsen a motla ana rakrakai ana leklek anuna motla.”

*Na tena solla bel la galis*

<sup>35</sup> E Iesu i han ting na tatatnan hanuala pa nanatar a hanuala rop. I sira asaer a taraila ting na nunla na rumai lotula, pa i sira warawai ana Wakak a Warwara ana matanitu ane God, pa i alangolango pas a tarai kusun a urmatana ngas a tinsamanla rop. <sup>36</sup> Ning i oroi a kunum a tarai, i maris kol la, anasa i talara a nuknukinla, pa bel ta harnanai tetek la, arlar ana sipsipla ning bel ta tena tai alar anunlai. <sup>37</sup> Pa i atongi tana nun a kakak a asaerla mang, “A barim ka makos, pa i galis kol, ika bel al galis a tena sol. <sup>38</sup> Mulor nunung a Leklek, esaning a tamana barim, sur ir sune a tena solla uting na nuna barim.”

## 10

*Ning a bonot pa pisir naur a kakak a asaer ane Iesu*  
(Mk 3:13-19; Lk 6:12-16)

<sup>1</sup> E Iesu i kabah pas anuna ning a bonot pa pisir naur a kakak a asaerla pa i saran a rakrakai tanla sur lar kepsen a motla pa lar alangolango pas a tarai kusun a urmatana ngas a tinsamanla rop.

<sup>2</sup> Ine a risan ning a bonot pa pisir naur a aposella: A ningnigona, e Saimon ning a risana otleng e Pita, ditas ma e Endru, e Jems pa e Jon ditas, naur a nat e Sebedi, <sup>3</sup> e Pilip, Batolomiu, Tomas, pa e Matiu a tena los totokom, Jems a nat e Alpius, Tadius, <sup>4</sup> pa e Saimon ning tagun a kunum Silot,\* pa e Judas Iskariot, esaning i asobor tar e Iesu.

*E Iesu i sune sen ning a bonot pa pisir naur a kakak a asaer*  
(Mk 6:7-13; Lk 9:1-6)

<sup>5</sup> E Iesu i sune sen ning a bonot pa pisir naur a kakak a asaerla, pa i atai la mang, “Gong mulo han tetek a tarai ning belsur a tarai Israel, pa gong mulo han uting na hananuala ana te Samariala. <sup>6</sup> Mulor han ka tetek a tarai Israel, ning la rongo arlar ana sipsipla. <sup>7</sup> Ning mulo han, mulor warawai amon larne, ‘A matanitu misaot na langit ka milau.’ <sup>8</sup> Mulor alangolango pas a tinsamanla, pa mulor alaun pas a minatla, mulor alangolango pas a leprala, pa mulor kepsen a motla. Di tabar oros mulo ka, larka otleng ning, mulor artabar oros ka. <sup>9</sup> Gong mulo asubaran ta mani ting na numulo a kaenla. <sup>10</sup> Gong mulo los ta rat ting na numulo a tinan, gong al kelkeles, gong ta su, pa gong ta bulse. Anasa i tostos sur dir tabar a tena titol ana utna anai.

<sup>11</sup> “Ning mulor han uting na tatatnan hanuala, pa nanatar a

\* **10:4:** Silot i a risan a tarai, ning la tur taum, anasa la mang sur lar lakran sen a matanitu Rom.

hanuala, mulor tai sur tik ning i wakak, pa mulor kes napirna tuk ana pukakiar ning mulor han kusun a hanua ning. <sup>12</sup> Ning mulor kas ting na ta rumai, mulor warwara agasgas pas la. <sup>13</sup> Ning a tarai miting na rumai ning lar gas pas mulo, mulor atongi mang, 'A bal molmol ir kes tetek mulo.' Ika ning bellar gas pas mulo, anumulo a bal molmol ir ulak tetek mulo. <sup>14</sup> Ning tik bel i gasgas pas mulo, pa bel i longor anumulo a warwara, ning mulor han kusun anuna rumai, o a hanua ning, mulor tang sen a kubus kusun a hamulo.† <sup>15</sup> A atong momoli ta mulo, ana pukakiar a warkurai, a warkurai tetek a hanua ning ir rakrakai kol tana warkurai tetek e Sodom pa e Gomora‡.”

*A urmatana kankan ning ir hanot*

(Mk 13:9-13; Lk 21:12-17)

<sup>16</sup> “Oroi, a sune sen mulo arlar ana sipsipla na arpotor tana ngalngaliah a papla. Mulor mananos wakak arlar ana soila, sur gong tik i ben rongon mulo, pa mulor tostos arlar ana tabunla, ning bel ta rongo kaning onla. <sup>17</sup> Mulor tumarang mulo, anasa a tarai lar saran tar mulo tetek a tena warkuraila, pa lar miras mulo ting na nunla na rumai lotu. <sup>18</sup> Pa dir dat mulo uting na warkuraila na matan a tatatnan ningnigola pa kingla, anasa mulo anuki. Mulor warwara talapor hok tetek la pa tetek a tarai ning belsur a tarai Juda. <sup>19</sup> Ning dir dat pas mulo, gong mulo matmataut sur asa mulor atongi, pa mulor warwara mangmangasa, anasa ana taem ot ning, e God ir saran tar a warwara ning mulor atongi. <sup>20</sup> Anasa belsur mulo mulor warwara, a Ingun

a Tamamulo ot ir suah a warwara ting na pahamulo sur mulor atongi.

<sup>21</sup> “Tik ir saran sen e tasnalik sur dir umkoli, pa ta barsan ir saran sen e natnalik sur dir umkoli. Pa kakakla lar tur na harum tetek e tamanla pa kabatnanla pa lar saran sen diau sur dir umkol diau. <sup>22</sup> Pa taraila rop lar nget mulo anasa mulo anuki, ika esining ir tur rakrakai tuk anuna lalaun ir rop, e God ir alauni. <sup>23</sup> Ning lar alaulau mulo ting na ta hanua, mulor liu uting on ta hanua masuk. A atong momoli ta mulo, ning bel mulor han rop ot uting na hananuala te e Israel, a Nat a Barsan ir hanot.

<sup>24</sup> “A kaklik a asaer bel i itna tana nuna tena asaer, pa tena titol otleng bel i itna bolos anuna lek-lek. <sup>25</sup> I tostos sur a kaklik a asaer ir arlar ana nuna tena asaer pa a tena titol ir arlar ana nun a lek-lek. Ning di ka atong iau e Belsebul,§ mulo otleng ning mulo kes taum hok, dir atong mulo ana rising ning i laulau kol tana.

*Mulor matmataut sur e God ka (Lk 12:2-7)*

<sup>26</sup> “Gong mulo ngaran a taraila. A ututnala rop ning di bunur tari, lamur ir kes puasa, pa a ututnala rop ning i kes kumna, lamur dir tasmani. <sup>27</sup> Asaning a atai mulo ono ana mormorom, mulor atatai ono ana kabakiar, pa asaning di wasisik ka ono tetek mulo, mulor tur saot ana rumai, pa mulor atong puasa i. <sup>28</sup> Gong mulo matatan la ning la umkol ka a palaondi, ika bel lar umkol lar pas a ingundi. Mulor matatan esaning ir tol asot pasi sur ir alaulau a palaondi pa ingundi otleng ting na nnan iah. <sup>29</sup> Di sira lou naur a tek ana toia ka, gepi? Ika bel ta halindiau ir hirua, ning a Tamamulo bel i

† **10:14:** A toltol ning di tang sen a kubus kusun a handi, a atumarang tetek la, ning bel la tortorot ana warwara ane God, lar tur ana nun a warkurai. ‡ **10:15:** E God i sai a hanua Sodom pa hanua Gomora, anasa ana toltol laulau ana tarai mitingia. Oroi e Stat 19. § **10:25:** Belsebul ning a risana e Satan.

malmaling ono. <sup>30</sup> I momol kol, e God ka tasman naisa rop a hih a pukulumulo. <sup>31</sup> I maining gong mulo matmataut, anasa mulo itna kol namatana e God, mulo itna tana galis a tekla.

*Esining i atong puasa e Iesu pa esining i puain seni*  
(Lk 12:8-9)

<sup>32</sup> “Esining ir atong puasa i na matan a taraila mang, i tagun iau, iau otleng ar atong puasa i, namatana e Tata ning i kes saot na langit mang, i tagun iau. <sup>33</sup> Ika esining ir puain sen iau na matan a taraila, iau otleng ar puain seni namatana e Tata ning i kes saot na langit.

*E Iesu bel i hanot sur ir saran a molmol*  
(Lk 12:51-53; 14:26-27)

<sup>34</sup> “Gong mulo nuki mang a hanot sur ar saran a bal molmol te na rakrakan hanua. Bel a hanot sur ar saran a bal molmol, a hanot ana liwan na harum. <sup>35</sup> A hanot sur a tarai lar kes na harum, i kamna hok.

‘A kaklik barsan ir nget e tamana, pa kaklik hane ir nget e tana, pa tinaulai a hane ir nget e tubuna.

<sup>36</sup> La ning la kes ting na rumai anuna ning a barsan, la ot ning anun na hiruala.’ *Mika 7:6*

<sup>37</sup> “Esining i maris kol e tamana pa e tana, ika anuna marmaris tetek iau bel i itna larning, bel i topasi sur i anuka kaklik a asaer. Pa esining i maris kol e natnalik, a natar barsan o a hane, ika anuna marmaris tetek iau bel i itna larning, bel i topasi sur i anuka kaklik a asaer. <sup>38</sup> Esining bel i kibas pas anuna rakai kutus pa i mur iau, bel i topasi sur i anuka kaklik a asaer. <sup>39</sup> Esining i mangan alar anuna lalaun, ir hirua, pa esining i noren sen anuna lalaun sur iau, ir laun.

*Esining ir gas pas ta kaklik a asaer ane Iesu ir kibas arlou*  
(Mk 9:41)

<sup>40</sup> “Esining ir gas pas mulo, i gas pas iau, pa esining i gas pas iau, i gas pas esaning i sune iau ute. <sup>41</sup> Esining ir gas pas a propet anasa a propet, ir kibas a ngas a arlou arlar ana propet ir kibasi. Pa esining ir gas pas a tena tostos, anasa a tena tostos, ir kibas a ngas a arlou arlar ana arlou ning a tena tostos ir kibasi. <sup>42</sup> Esining ir tabar anak ta kaklik a asaer, ning bel i sot na matan a tarai, ana ta kap a kotkoto na malum, anasa anuka kaklik a asaer, a atong momoli ta mulo, ir kibas ot anuna arlou.”

## 11

*E Iesu pa e Jon a Tena Baptais*  
(Lk 7:18-35)

<sup>1</sup> Ning e Iesu ka warwara rop tar tetek anuna ning a bonot pa pisir naur a kakak a asaer, i han mitingia sur ir asaer a tarai pa ir warawai ting na hananuala, tumo na papar Galili. <sup>2</sup> E Jon i kes ting na rumai a dodot pa i longor a titolla anuna Karisito. Pa i sune sen anuna kakak a asaerla sur lar deke mang, <sup>3</sup> “U ma, ning di warwara nigo tar hom mang ur hanot, o milar harnanai ot sur tik?” <sup>4</sup> Pa e Iesu i keles la mang, “Mulor ulak, pa mulor atai e Jon ana ututnala ne mulo ka longori pa mulo ka oroi tari: <sup>5</sup> A kutla la ka tai, la ning a hanla i mat la ka han tostos, a lep-rala la ka langolango, na talngana kutkut la ka longor, a minatla la ka kamtur, pa di warawai ana Wakak a Warwara tetek a kapan a tarai. <sup>6</sup> Esining i oroi a ututnala ne a toli, pa anuna tortorot bel i punga, ka angis.”

<sup>7</sup> Ning a kakak a asaerla ane Jon la han, e Iesu i atai a kunum a tarai o e Jon mang, “Lanigo ning mulo han uting na hanua bel tetek e Jon, asaning mulo tai suri? Ngandek a

kunai ning i dou ana wuwu? Bel.  
 8 Asa ning mulo han sur mulor oroi i?  
 A barsan ning i mermer ana wakak a  
 kaenla? Bel. Oroi, la ning la sira mermer  
 ana wakak a kaenla la sira kes ting na  
 rumai ana kingla. 9 Asa ning mulo han  
 sur mulor oroi i? A propet? Momol,  
 a atai mulo, e Jon i lekkek kol tana  
 propetla. 10 Di ka tumus tari ono ting  
 na Buk Tabu mang,

‘Oroi, ar sune sen anuka tena los  
 warwara sur ir nigo tam,

pa ir nigo tam sur ir tol talapor  
 anuma ngas.’ *Mal 3:1*

11 A atongi momoli ta mulo, e Jon  
 a Tena Baptais i lekkek kol tana  
 taraila rop mite lapiu. Ika esining  
 i natarna kol ana matanitu misaot  
 na langit, i lekkek tana.

12 “Turpasi ana rau ning e Jon a  
 Tena Baptais i turpas a warawai  
 tuk onone, a matanitu misaot na  
 langit i han rakrakai amon, pa a  
 tarai la rakrakai kol sur lar kas tin-  
 gia. 13 A propetla rop pa a Warku-  
 raila ane Moses la apuasa a war-  
 wara ana matanitu ane God, tuk  
 ana rau ning e Jon i turpas a titol  
 ono. 14 La warwara ana propet  
 Elaija ning ir hanot. Ning mulo  
 mang sur mulor tortorot ana war-  
 wara ning, anone, a tinan ot ane  
 Jon ka tolsot pasi, anasa i a propet  
 Elaija ning ir hanot. 15 Esining a  
 talngana kaning, i wakak ning ir  
 longor ono.

16 “Esi na warwara larlar ning  
 ar atongi ana tarai tagun onone?  
 La arlar ana kakakla ning la kes  
 ting na tinine hanua pa la arkabah  
 tetek na halalinla mang,

17 ‘Mila pasar kudu,  
 ika bel mulo tortor ono,  
 pa mila saken a saksak a bal maris,  
 ika bel mulo domos ono.’

18 E Jon i hanot, bel i ien ta wakak  
 a utna pa bel i gang a wain, pa

la atongi onoi mang, ‘A mot kan-  
 ing onoi.’ 19 A Nat a Barsan i  
 hanot, i hangan pa i gang, pa la  
 atongi onoi mang, ‘Oroi, a barsan  
 ne a tena hangan pa tena gang, a  
 hal a tena los totokomla pa tena  
 laulaula.’ Ika a titolla ane God i  
 apuasa i mang, anuna tastasmai i  
 a tastasmai momol.”

*A warkurai a arbalu tetek la  
 ning bel la lingir a nuknukinla*

*(Lk 10:13-15)*

20 Pa e Iesu i warwara na balakut  
 tetek a tarai ting na hananuala  
 ning ka tol tar anuna galis a utna  
 na kulkulan kol tingia, anasa bel  
 la lingir a nuknukinla. 21 I atongi  
 mang, “Ir laulau tetek mulo a tarai  
 Korasin, pa ir laulau otleng tetek  
 mulo a tarai Betsaida. Ngandek  
 ning di kar tol tar a ututnala na  
 kulkulan ne tetek a tarai Tair pa  
 tarai Saidon, arlar larning di ka  
 tol tari tetek mulo, la kar lingir  
 kapit a nuknukinla pa lar tobo, lar  
 mermer ana kaenla na bal maris  
 pa lar sabar a palaonla ana kubus  
 a iah. Ika mulo, bel mulo lingir  
 a nuknukim mulo. 22 A atongi  
 ta mulo mang, ana pukakiar a  
 warkurai, a warkurai tetek mulo  
 a tarai Korasin pa tarai Betsaida,  
 ir rakrakai kol tana warkurai tetek  
 a tarai Tair pa tarai Saidon. 23 Pa  
 mulo otleng a tarai Kapernaum,  
 mangmangasa, mulo nuki mang  
 dir alekkek pas mulo usaot? Bel!  
 Dir minggen purum mulo uting na  
 tnan iah. Ngandek ning di kar tol  
 tar a ututnala na kulkulan tetek a  
 tarai Sodom, arlar larning di ka tol  
 tari tetek mulo, e Sodom\* kanet.  
 24 A atongi ta mulo mang, ana  
 pukakiar a warkurai, a warkurai  
 tetek mulo a tarai Kapernaum ir  
 rakrakai kol tana warkurai tetek a  
 tarai Sodom.”

*La ning a mamahatla i monong  
 la, lar han tetek e Iesu*  
*(Lk 10:21-22)*

\* **11:23:** E God i sai a hanua Sodom, anasa ana toltol laulau ana tarai mitingia. Oroi e Stat 19.

<sup>25</sup> Ana taem ning, e Iesu i atongi mang, “Tata, u a Leklek misaot na langit pa rakrahan hanua rop. Ar rakan aleklek pas u, anasa u bunur a ututnala ne kusun a tena tastasmaila pa la ning la tastaman, pa u apuasa i tetek la ning la arlar ana kakakla. <sup>26</sup> A momolna, Tata, anasa u mang ot sur ir manglarning.

<sup>27</sup> “E Tata ka saran tar a ututnala rop tak. Bel tik i tasman e Natnalik, e Tamana ka, pa bel tik otleng i tasman e Tamana, e Natnalik ka, pa la otleng ning e Natnalik i mang sur ir apuasa e Tamana tetek la.

<sup>28</sup> “Mulo rop ning mulo palaona ngorngoro pa a mamahatla i monong mulo, mulor han tetek iau, sur ar amanah mulo. <sup>29</sup> Mulor los anuka ikep, pa mulor noren iau ar asaer mulo, anasa a magirak i wowowon pa sira anatarna pas iau, pa ingumulo ir manah. <sup>30</sup> Anasa a ikep ar sarani ta mulo bel i ngangaten, pa a lolos ar sarani ta mulo bel i mamahat.”

## 12

*E Iesu i a Leklek tagun a Pukakiar Sabat*  
(Mk 2:23-28; Lk 6:1-5)

<sup>1</sup> Lamur, ana ning a Pukakiar Sabat, e Iesu i han potor ting na barim a wit. Anuna kakak a asaerla la murak, pa la turpas a kumut kutus a witla pa la ieni.

<sup>2</sup> Ning a Parisaiola la oroi i, la atai i mang, “Oroi, anum na kakak asaer la tol a utna ning, pa bel la mur a warkurai tagun a Pukakiar Sabat.”

<sup>3</sup> E Iesu i keles la mang, “I mangasa, belot mulo was asaning e Dewit i toli, ning i taum ana taraila ning la armuri la murak? <sup>4</sup> I kas uting na rumai ane God, pa i ien a bret ning di ka tabar tar e God ono. Pa la otleng ning la han taum onoi la hangan ono. A bret ning, a warkurai ono i manglarne, na tena

artabar tetek e God ka lar ieni, pa tarai oros gong. <sup>5</sup> I mangasa, belot mulo was a warwara miting na Buk a warkurai? I atongi mang, na tena artabar tetek e God la sira titol ting na rumai a artabar ana Pukakiar Sabat, ika bel la rongo ono. <sup>6</sup> A atongi ta mulo mang, takai kane i itna tan a rumai a artabar. <sup>7</sup> Ning ngandek mulo ka tasman a kamkam a warwara ne, ‘A mang sur a marmaris, pa bel a mang sur a artabar ning di sira tuni,’ *Hosea 6:6*

bel mulor tiu la ning bel la rongo. <sup>8</sup> Anasa a Nat a Barsan a Leklek tagun a Pukakiar Sabat.”

*E Iesu i alangolango pas a barsan ning a kuna i rangrago*  
(Mk 3:1-6; Lk 6:6-11)

<sup>9</sup> E Iesu i han mitingia, pa i kas uting na nunla a rumai lotu. <sup>10</sup> Ning a barsan kaningia, a kuna i del. La tai sur ta ngas ning lar arup e Iesu ono, pa la dekeni mang, “I mangasa, i tostos ot arlar ana anundala a Warkuraila sur dir alangolango pas tik ana Pukakiar Sabat o bel?” <sup>11</sup> Pa i keles la mang, “Ning ta halimulo anuna ta sipsip ir punga tar uting na ta tung ana Pukakiar Sabat, mangmangasa, bel ir tong akesi pa ir dat kas ulaki? <sup>12</sup> A sipsip a utna oros ka, ika a barsan i itna kol. Larning, i tostos sur dir tol a wakakna ana Pukakiar Sabat.” <sup>13</sup> Pa i atai a barsan ning mang, “Ur kodos a kum.” I kodosi, pa kuna i tostos ulak, arlar ana ning a kuna ning i wakak. <sup>14</sup> A Parisaiola la purum, pa la warwara taum pas sur ta ngas ning lar umkol e Iesu ono.

*A tena titol ning e God i aslang pasi*

<sup>15</sup> Ning e Iesu i tasmani mang la warwara taum sur lar umkoli, i han masak mitingia. A galis a tarai la muri, pa i alangolango pas la rop ning la sasam. <sup>16</sup> Pa i atumarang la, sur gong la atai tar

tik mang, i esi. <sup>17</sup> I atongi larne sur ir tolsot pas a warwara ane God ning e Aisaia a propet ka warwara nigo tar ono mang,

<sup>18</sup> “Ine anuka tena titol ning ia ka aslang pasi, a katnani, a gas kol ono.

Ar akas tar a Inguk ono, pa ir apuasa a warkurai ning i tostos tetek na tarai miting na matanitula.

<sup>19</sup> Bel ir warwara na balakut, pa bel ir agaia, bel dir longor a elngena ting na ngasla.

<sup>20</sup> Bel ir kuben a kunai ning i dou, pa bel ir wus kol a lam ning bel i kubar wakak.

Ir toli larne tuk a tostos a warkurai ir tolsot pas a toltol laulau.

<sup>21</sup> Na tarai miting na matanitula lar tortorot ana risana pa lar harnanai sur ir alaun la.” *Ais 42:1-4*

### *E Iesu pa e Belsebul*

*(Mk 3:20-30; Lk 11:14-23)*

<sup>22</sup> La ben otnan tar ning a barsan tetek e Iesu, i ngat pa i kut, pa mot kaning ono. E Iesu i alangolango pasi, pa barsan ning i warwara pa i tai kakat. <sup>23</sup> Pa tarai rop la kulkulan, pa la deke mang, “Ngandek a Nat e Dewit\* ot ne?” <sup>24</sup> Ika a Parisaiola la longori pa la atongi mang, “A barsan ne, i sira kepsen a motla ana rakrakai e Belsebul, a leklek anuna motla.”

<sup>25</sup> E Iesu ka tasman tar a nuknukinla, pa i atongi tanla mang, “Ning ta matanitu lar harum artalai tanla ot, a matanitu ning ir rarop. Ning ta hanua, o al tarai miting na ta rumai, lar harum artalai tanla ot, bel ma lar kes taum. <sup>26</sup> Ning e Satan ir kepsen anuna tena titolla, bel lar tur taum ulak ma, lar han sarara. Manglarning, anuna matanitu ir tur rakrakai mangmangasa? <sup>27</sup> Ning iau a kepsen a motla ana

rakrakai e Belsebul, anumulo na tarai la sira kepsen la ana rakrakai esi? Mulo tasmani mang la kepsen a motla ana rakrakai e God, pa ine i asangani mang anumulo a ararup hok i rongo. <sup>28</sup> Ika, ning a kepsen a motla ana rakrakai a Inguna e God, mulor tasmani mang a matanitu ane God ka hanot tetek mulo.

<sup>29</sup> “Bel tik ir tol sot pas sur ir kas uting na rumai anuna ta rakrakai barsan, pa ir los pas a ututnala mitisau na rumai, ning bel ir dot akes nigon tari. Ning ot ir dot akes nigon tari, ir bot los a ututnala anuna barsan ning.

<sup>30</sup> “Esining bel i nangan iau, i sairas iau ka. Pa esining bel i nangan iau ona ben a tarai, i lu sarara la ka. <sup>31</sup> Pa a atongi ta mulo mang, e God ir kepsen na toltol laulau rop ana tarai, pa anunla na laulau a warwara otleng o e God, ika a warwara laulau ana Talngan Tabu bel e God ir kepsen lar pasi. <sup>32</sup> Esi otleng ning ir atong tar ta laulau a warwara ana Nat a Barsan, e God ir kepsen anuna toltol laulau ning, ika esining ir atong laulau a Talngan Tabu, e God bel ir kepsen lar pas anuna toltol laulau ning, ana lalaun anone pa ana lalaun lamur otleng.

### *A rakai pa wana*

*(Lk 6:43-45)*

<sup>33</sup> “Ning a rakai i wakak, i sira suah a wakak a wana, pa ning a rakai i laulau, i sira suah a laulau a wana. Dir oroi lalan a rakai ana wana. <sup>34</sup> Mulo na natnat a soila! Mulo ning a laulau a taraila, mulor atong mangasa ta wakak a warwara? Anasa a pahana tarai i atong puasa a toltol ning i bukusting na balanla. <sup>35</sup> A wakak a barsan i asangan anuna wakak a toltol ning kaning na balana, pa a laulau a barsan otleng, i asangan

\* **12:23:** A tarai Juda la sira atong a Mesaia a Nat e Dewit.

anuna toltol laulau ning kaning na balana. <sup>36</sup> A atongi ta mulo mang, a warwara laulaula rop ning a tarai la ka atong tari, lamur bot, ana pukakiar a warkurai, e God ir deken la ono. <sup>37</sup> Ana pukakiar ning, anuma warwara ot ir alan-golango u, o ir alaulau u.”

*La nunung e Iesu sur ir tol ta akinalang*

*(Mk 8:11-12; Lk 11:29-32)*

<sup>38</sup> Lamur dingla na tarai tagun na tena asaer tagun a warkurai pa a Parisaiola la atongi tana mang, “Tena Asaer, ur tol ta akinalang sur milar tasmani mang, u a tena titol ane God.” <sup>39</sup> I keles la mang, “A tarai tagun anone, a laulau a tarai, anunla a lalaun i bakbak kusun e God. La nunung sur ta akinalang, ika bel dir tol tar tik tetek la. Dir tol ka a akinalang arlar larning di tol tari o e Jona a propet. <sup>40</sup> Arlar o e Jona i laun natol a pukakiar ting na balan a tnan sis, larka otleng ning a Nat a Barsan ir borbor pas natol a pukakiar tingui na piu. <sup>41</sup> Bel mulo lingir a nuknukimulo, i maining, ana pukakiar a warkurai, a tarai Niniwe lar tur pa lar arup rakrakai a tarai tagun anone, anasa la lingir a nuknukinla ana warawai ane Jona, ika anone, esaning i leklek ta e Jona kanet. <sup>42</sup> Ana pukakiar a warkurai, a kwin mitumo namatana tobar ir tur pa ir arup rakrakai a tarai tagun anone, anasa i hanot miting bakbak sur ir longor a mananos ana King Solomon, pa anone, esaning i lek-lek ta e Solomon kanet.

*A mot i ulak*  
*(Lk 11:24-26)*

<sup>43</sup> “Ning ta mot ir purum kusun ta barsan, ir han uting na puknala ning belal malum ia, sur ir manah, ika bel ir pastek ta pukna

ning ir manah ia. <sup>44</sup> Pa ir atongi mang, ‘Ar ulak sur anuka rumai, ning a purum tar kusuni.’ Ning ir hanot, ir oroi mang ka belbel, di ka surupu tar, pa di ka atostos tari. <sup>45</sup> Lamur ir han pa ir ben ulak pas mais a mot, ning la laulau kol tana, pa lar kas rop ting na rumai ning, pa lar kes tingia. Pa a lalaun anuna barsan ning ir laulau kol tana nuna lalaun nating. Ir mang ka otleng tetek a laulau a tarai tagun anone, anunla lalaun lamur ir laulau kol.”

*E tana e Iesu pa na tastasna*

*(Mk 3:31-35; Lk 8:19-21)*

<sup>46</sup> Ning e Iesu kaning ot i warwara tetek a kunum a tarai, e tana pa na tastasna la hanot, pa la tur tumo lapiu, anasa la mang sur lar warwara taum onoi. <sup>47</sup> Pa ning a barsan i atai e Iesu mang, “E tnam pa na tastasim, kanumo la tur tumo lapiu. La mang sur lar warwara taum hom.” † <sup>48</sup> Pa i kelesi mang, “Esi e nang, pa esi la na tastasik?” <sup>49</sup> Pa i tusu tetek anuna tarai a asasaer pa i atongi mang, “Oroi, la ne e nang pa na tastasik! <sup>50</sup> Anasa esining i sira mur a nuknuk e Tata ning i kes saot na langit, i ka ning a tasik barsan, pa a tasik hane, pa e nang.”

## 13

*A warwara larlar ana tena omomai*

*(Mk 4:1-9; Lk 8:4-8)*

<sup>1</sup> Ana pukakiar ning, e Iesu i purum kusun a rumai pa i kes ting napir a puka tasi Galili. <sup>2</sup> A tnan kunum a tarai la tur talilis pasi. Pa i kas uting na mon pa i kes, pa a tarai rop la tur tumo korot na hang. <sup>3</sup> I warwara tetek la ana galis a utna ana warwara larlarla. I atongi mang, “A tena omomai i

† 12:47: Dingla na tena tastasmai ana Buk Tabu la nuki mang e Matiu bel i tumus a dihna 47. La nuki mang tik masuk i tumus tari lamur.



han sur ir sapran a pat a witla.  
 4 Ning i sapran amon la, dingla la  
 punga ting na ngas, pa a manila la  
 rowoi ot pa la ien sen la. 5 Dingla  
 otleng la punga ting na pukna ning  
 i hatat, pa belal galis a piu ono, pa  
 la gomo kapit, anasa a piu bel i  
 but. 6 Ika ning a kamis i sasai ot,  
 la main pa la marang rop, anasa  
 belal wakirinla. 7 Dingla na patna  
 otleng la punga tar ting na tinine  
 rosrosla, pa a rosrosla la gomo ot  
 pa la rau alar pas la. 8 Pa dingla  
 na patna otleng la punga ting na  
 wakak a piu pa la wai. Dingla la  
 wai takai a mar a wanala, dingla  
 otleng diono na bonot, pa dingla  
 natol a bonot. 9 Esining a talngana  
 kaning, i wakak ning ir longor  
 ono.”

*A kamkamna ning e Iesu i war-  
 wara ana warwara larlarla  
 (Mk 4:10-12; Lk 8:9-10)*

10 Anuna kakak a asaerla la han  
 teteki pa la dekeni mang, “Sur asa  
 ning u warwara tetek a tarai ana  
 warwara larlarla?” 11 Pa i keles  
 la mang, “E God ka saran tar a  
 tastasim ta mulo, sur mulor ta-  
 lapor ana ututnala ana matanitu  
 misaot na langit, ning nating i kes  
 kumna. Ika, bel i sarani tetek a  
 tarai rop. 12 Anasa esining i tong  
 akes a tastasmai ono, dir tabar  
 ulaki ana tnan, pa ir tastasmai  
 kol. Pa esining bel i tong akes ta  
 tastasmai ono, dir kepsen otleng  
 siklik ning kaning tana. 13 A asaer  
 la ana warwara larlarla, anasa  
 la oroi, ika bel la oroi lalani,

la longori, ika bel la longor  
 lalani, pa bel la tastasmai  
 ono.

14 A warwara na propet ane Aisaia  
 ka sot onla, ning i atongi mang,  
 ‘Mulor longlongori, ika bel mulor  
 longor lalani,  
 mulor tai, ika bel mulor oroi  
 lalani.

15 Anasa a tarai ne  
 na balanla i rakrakai,  
 na taltalnganla i kutkut,

pa na matmatanla i kut.  
 Ngandek ning lar ororoi lalan ana  
 matmatanla,  
 pa lar longlongor lalan ana  
 taltalnganla,  
 pa lar tastasmai ana  
 nuknukinla,  
 pa lar talingir, pa ar alaun pas la.’

*Ais 6:9-10*

16 Ika mulo, mulo angis, anasa  
 mulo tai ot ana matamulola, pa  
 mulo longlongor ot ana talngamu-  
 lola otleng. 17 A atong momoli ta  
 mulo, lanigo a galis a propet pa  
 a galis a tena tostos la tekes kol  
 sur lar oroi a ututnala ning a toli  
 namatamulo, ika bel la oroi i. Pa  
 la tekes kol otleng sur lar longor a  
 ututnala ne mulo longori, ika bel  
 la longori.

*E Iesu i pak a kamkama a war-  
 wara larlar ana tena omomai  
 (Mk 4:13-20; Lk 8:11-15)*

18 “Mulor longor a kamkama a  
 warwara larlar ana tena omomai.  
 19 Esining i longor a warwara ana  
 matanitu misaot na langit, pa bel  
 i tastasmai onoi, i arlar ana pat a  
 witla ning la punga ting na ngas.  
 A barsan laulau i hanot pa i kibas  
 sen a warwara ning di ka oman  
 tari ting na balana. 20 Pa a patnala  
 ning la punga ting na pukna ning  
 i hatat, la arlar ana barsan ning i  
 longor a warwara, pa ono otning,  
 i tong akesi ana gasgas. 21 Ika a  
 warwara bel i kes rakrakai ting  
 na balana, pa barsan ning bel ir  
 tur bongnani arlar ana wit ning  
 belal wakirna. Ning a mamahatla  
 ir hanot, pa dir alaulau i, anasa  
 i tortorot ana warwara ane God,  
 ir punga kapit. 22 A patnala ning  
 la punga tar ting na tinine ros-  
 rosula, la arlar ana barsan ning i  
 longor a warwara, ika a nuknukna  
 sur a wakak a keskes te lapiu, pa  
 nuknuk otleng sur anuna gongon  
 ning i asongo a nuknukna, la rau  
 alar a warwara ane God, pa bel i  
 wai. 23 Ika a patnala ning la punga

ting na wakak a piu, la arlar ana barsan ning i longor a warwara, pa i tastasmai ono. Ir suah takai a mar, o diono na bonot, o natol a bonot a wana.”

*A warwara larlar ana wit pa a karapa*

<sup>24</sup> E Iesu i atong takai a warwara larlar otleng tetek la mang, “A matanitu misaot na langit i arlar ana barsan ning i sapran a wakak a pata witla ting na nun a barim. <sup>25</sup> Ning a tarai la borbor, anuna hirua i hanot pa i sapran tar a pata karapala ting na tinine witla, pa i han. <sup>26</sup> Ning a pata wit i gomo ot pa i mang sur ir wai, di oroi i otleng a karapa i gomo na tinine. <sup>27</sup> A tena titolla ana tamana barim la han teteki, pa la atongi tana mang, ‘Leklek, mangmangasa, a pata wakak a witla rop ka ning u sapran tari ting na num a barim? Mitaha otleng a karapala?’ <sup>28</sup> I keles la mang, ‘A hirua i tol a toltol ning.’ Pa la dekeni mang, ‘U mang sur milar han, pa milar gat arop sen la?’ <sup>29</sup> I sairasa la mang, ‘Gong kaba, sakana mulor gat taum seni ana witla. <sup>30</sup> Noren seni, diar gomo taum tuk ana kalang a sol. Ana taem ning, ar atongi tana tena solla mang: Mulor kibas nigon sen a karapala, mulor dot taum tar a butanala sur dir tun sen la ting na iah. Pa lamur mulor los taum maleng a witla uting na nuk a rumai a gongon.’”

*A warwara larlar ana pata mastad pa a is*

*(Mk 4:30-32; Lk 13:18-21)*

<sup>31</sup> E Iesu i atong ning a warwara larlar otleng tanla mang, “A matanitu misaot na langit i arlar ana pat a mastad, ning takai a barsan i kibas pasi, pa i oman tari ting na nuna barim. <sup>32</sup> I natarna kol tana pat a rakaila rop, ika ning i gomo, i itna kol tana rakai a

hanganla rop. Pa a manila la sira tol pios saot na rakrakana.”

<sup>33</sup> E Iesu i atong ning a warwara larlar otleng tanla mang, “A matanitu misaot na langit i arlar ana is, ning a hane i kibas pasi, pa i tol taumi ana tnan palawa, pa a palawa rop i bubus onoi.”

<sup>34</sup> E Iesu i asaer a kunum a tarai ana ututnala rop ne ana warwara larlarla. Pa bel i warwara tetek la ana ta maskan a warwara, a warwara larlarla rop ka. <sup>35</sup> I atongi larning sur dir toltos pas a warwara anuna propet mang, “Ar warwara ana warwara larlarla, ar atong a ututnala ning i kes kumna, turpasi nating ot, ning e God i akes a rakrakan hanua.” *Buk Song 78:2*

*E Iesu i pak a kamkama a warwara larlar ana wit pa a karapa*

<sup>36</sup> Lamur e Iesu i han kusun a kunum a tarai, pa i kas ting na rumai. Anuna kakak a asaerla la kas teteki pa la atai i mang, “Ur pak a kamkama a warwara larlar ne ta mila ana karapa ning i goming ting na tinine barim.” <sup>37</sup> I keles la mang, “Esaning i sapran a pata witla i a Nat a Barsan. <sup>38</sup> A barim, i a rakrakan hanua, pa a wakak a pata witla, la a tarai tagun a matanitu misaot na langit, pa a karapala, la na natnat a laulau a barsan, <sup>39</sup> pa a hirua ning i sapran la, i e Satan. A kalang a sol, i a ararop ana rakrakan hanua, pa na tena sol, a angelola. <sup>40</sup> Na tena sol la los taum a karapala pa la tun sen la ting na iah. Ir mang ka otleng larning dir toli ana ararop a pukakiar. <sup>41</sup> A Nat a Barsan ir sune sen anuna angelola, pa lar kibas arop sen a ututnala ning i ben rongon a tarai, pa la otleng ning la sira tol a toltol laulau. <sup>42</sup> Pa lar minggen la uting na tnan iah. Lar tangtangis pa lar arngingit nge-senla tingia. <sup>43</sup> Pa na tena tostos

lar sasai arlar ana kamis ting na matanitu anun e Tamanla. Esining a talngana kaning, i wakak ning ir longor ono.

*A warwara larlar ana naur a utna ning a matana i abit kol pa di pastek pasi*

<sup>44</sup> “A matanitu misaot na langit i arlar ana utna ning a matana i abit kol, ning di bunur tari ting na barim. Ning a barsan i pastek pasi pa i bunur ulak tari. Pa i han ana gasgas, pa i siuran arop sen anuna ututnala, pa i lou pas a barim ning ono.

<sup>45</sup> “A matanitu misaot na langit i arlar otleng ana ning a tena siu-siurai, i tai sur a wakak a hatatla kol ning i sira kes ting na tinine kabolkabol. <sup>46</sup> Ning i pastek pas ning a hat a matana i abit kol, i siuran arop sen anuna ututnala, pa i lou pas a hat ning ono.

*A warwara larlar ana uben*

<sup>47</sup> “A matanitu misaot na langit i arlar otleng ana uben, ning di minggen tari sakas latasi, pa a urmatana ngas a sis la hirua tar ono. <sup>48</sup> Ning a uben i bukus, na tena minggen uben la dat masmasa tari ting na hang. La kes pa la timlan sen a wakak a sista uting na ratla, pa a laulaunala la minggen sen la. <sup>49</sup> Ana ararop a pukakiar dir toli ot larne: A angelola lar hanot pa lar asalar sen a tena laulaula kusun a tena tostosla. <sup>50</sup> Pa lar minggen sen a tena laulaula uting na tnan laplapang a iah. Lar tangtangis pa lar arngingit ngesenla tingia.”

<sup>51</sup> E Iesu i deken la mang, “I mangmangasa, mulo ka tastasmai ana kankama a ututnala rop ne, o bel?” Anuna kakak a asaerla la kelesi mang, “Ma! Mila ka tasmani.” <sup>52</sup> Pa e Iesu i atai la mang, “Na tena asaerla rop tagun a warkurai, ning la ka asaer pas ana matanitu misaot na langit, la arlar ana barsan ning i gon a wakak a ututnala ting na nuna

rumai. Pa i apurum a wakak a ututnala ning, kusun anuna rumai sur ir titol onoi, dingla na utna, na tona, pa dingla otleng, na turaina.”

*A propet ning bel di hanrawai i (Mk 6:1-6; Lk 4:16-30)*

<sup>53</sup> Ning e Iesu ka atong rop tar a warwara larlarla ning, i han mitingia, <sup>54</sup> pa i hanot ting na nuna hanua, tumo e Nasaret. I tur pasi sur ir asaer a tarai tingia ana nunla a rumai lotu, pa la kulkulan kol pa la atongi mang, “A barsan ne i kibas a tastasmala ne taha ia? Pa mitaha otleng a rakrakai ning i tol a ututnala na kulkulan ne onoi?” <sup>55</sup> E Tamana a tena tol rumai ka, pa e tana e Maria. A tastasnala otleng, e Jems, Josep, Saimon pa e Judas <sup>56</sup> pa na tastasna hane otleng kanet dala laun taum te. Pa mitahaia a rakrakai ning a barsan ne i tol a ututnala ne onoi?” <sup>57</sup> Pa bel la gas ono. Ika e Iesu i atai la mang, “Di sira hanrawai a propet ting na hanua masik, ika la ot ting na hanua ngasna pa ting na rumai ngasna bel la hanrawai i.” <sup>58</sup> Pa bel i tong a galis a utna na kulkulan tingia, anasa bel la tortorot ono.

## 14

*E Herot i nuki mang e Iesu i e Jon a Tena Baptais*

*(Mk 6:14-29; Lk 9:7-9)*

<sup>1</sup> Ana rau ning, e Herot a ning-nigo tagun a matanitu i longor a warwara o e Iesu, <sup>2</sup> pa i atai anuna tena titol mang, “A barsan ning, e Jon a Tena Baptais, ka laun ulak kusun a minat. I maining i tol a ututnala na kulkulan.”

<sup>3-4</sup> Lanigo e Herot i sune sen anuna tena harumla sur lar tong pas e Jon. La doti, pa la akasi ting na rumai a dodot. E Herot i toli larne, anasa e Jon ka usur tari ono mang, “Bel i tostos ning u taulai e Herodias, e harimlik.” I atongi larne, anasa e Herot ka dat pas e Herodias, a hane ane Pilip, e

tasnalik, pa i taulai i. <sup>5</sup> Pa e Herot i mang sur dir umkol e Jon, ika i matatan a tarai, anasa la tasmani mang e Jon a propet.

<sup>6</sup> Ana pukakiar ning di aslang pas a agon ane Herot, e nat na hane Herodias, i tortor napirinla. E Herot i gas kol onoi, <sup>7</sup> pa i lele rakrakai tar o e nat e Herodias mang, "Asa ka ma ning ur nunungi tak ar sarani ka." <sup>8</sup> Pa i atai i mang, "Ur suah a pukul e Jon a Tena Baptais ting na ta pelet pa ur sarani tak." I atongi larne anasa e tana ka atai tari onoi.

<sup>9</sup> A king i bal maris kol. Ika i sune a tena harumla sur lar longor ana nunung ana basbas ning, anasa ka lele tar mang asa kama ning ir nunung suri ir sarani ka, pa a tarai ning la kes taum onoi ana utna na hangan, la ka longor tar a warwara. <sup>10</sup> Na tena harum la han utumo na rumai a dodot pa la umsem ana pukul e Jon. <sup>11</sup> La suah a pukulna ting na pelet pa la sarani tana basbas, pa i losi tetek e tana.

<sup>12</sup> Pa kakak a asaerla ane Jon la hanot pa la los pas a minatna, pa la pori. Lamur la han tetek e Iesu pa la atai i ono.

*E Iesu i tabar dilima na rip a tarai*

(Mk 6:30-44; Lk 9:10-17; Jn 6:1-14)

<sup>13</sup> Ning e Iesu i longori mang e Jon ka mat, i kas ana mon pa i han mitingia sur uting na hanua bel, sur i sot ka ir kes. Ning a tarai la longori, a kunum a tarai miting na hananuala la muri ting na ngas sur uting na pukna ning. <sup>14</sup> Ning i sot, i oroi a tnan kunum a tarai. I maris kol la, pa i alangolango pas a tinsamanla.

<sup>15</sup> Ning ka rah, anuna kakak a asaerla la han teteki, pa la atai i mang, "A pukna ne i bakbak kusun a hananuala, pa ka rah otleng. Ur sune sen a kunum a tarai sur lar han uting na hananuala, sur lar

lou pas anla al utna na hangan."

<sup>16</sup> E Iesu i keles la mang, "Lar han sur asa? Mulo ot mulor tabar la."

<sup>17</sup> La atai i mang, "Dilima na bret ka, pa naur a sis kane mila losi."

<sup>18</sup> I atai la mang, "Mulor losi ute tak."

<sup>19</sup> Pa i arsune sur a kunum a tarai lar kes ting na ulai. I kibas pas dilima na bret pa naur a sis, i tadai usaot na langit, i atong wakak tetek e God onoi, i kibik dilima na bret, pa i sarani tana nuna kakak a asaerla. Pa la asalar a kunum a tarai ono. <sup>20</sup> La rop la hangan pa la masur. Pa la song bukus pas ning a bonot pa pisir naur a rat ana mah a utna na hangan. <sup>21</sup> A wawas ana tarai ka i arlar ana dilima na rip, ika a gurarala pa kakakla otleng la hangan taum onla.

*E Iesu i han saot na palai a tasi*  
(Mk 6:45-52; Jn 6:15-21)

<sup>22</sup> Ono otning, e Iesu i sune sen anuna kakak a asaerla, sur lar kas ana mon, pa lar nigo utumo na ning a ris a puka tasi. Pa i, i kes ot sur ir sune sen a tarai. <sup>23</sup> Ning ka sune rop sen la, i sot kama i han kas usaot na mangir sur ir nunung. Ning ka rah morom i kama kaning i kes. <sup>24</sup> A mon ka han potot pa i turangin amon ana top, anasa a wuwu i harum misa lanigo. <sup>25</sup> Ana lar, e Iesu i han saot na palai a puka tasi tetek la. <sup>26</sup> Ning anun na kakak a asaerla la oroi pasi ning i han saot na palai a puka tasi, la matmataut kol pa la atongi mang, "A ingun ka ning!" Pa la woiwoi ana matmataut. <sup>27</sup> Ono otning e Iesu i atai la mang, "Mulor kosom, iau ka ne. Gong mulo matmataut."

<sup>28</sup> E Pita i atai e Iesu mang, "Leklek, ning u ot ning, ur atai iau sur iau otleng ar han saot na palai a tasi tetek u." <sup>29</sup> E Iesu i atai i mang, "Ur han ute." Pa e Pita i sirok kusun a mon, pa i han

saot na tasi tetek e Iesu. <sup>30</sup> Ika, ning i oroi a rakrakai a wuwu, i matmataut. Pa i tur pas a murung, i arkabah mang, "Leklek, ur alaun iau." <sup>31</sup> Ono otning, e Iesu i kodos a kuna teteki, i dat kasi, pa i atai mang, "Anum a tortorot i natarna kol. I mangasa ning u urmatana nuknuk?" <sup>32</sup> Ning dia kas uting na mon, a wuwu i rop kakat. <sup>33</sup> La ning la kes ting na mon la lotu tetek e Iesu, pa la atongi mang, "I momol ot, u a Nat e God."

*E Iesu i alangolango pas a tinsamanla tumo na papar Genesaret (Mk 6:53-56)*

<sup>34</sup> Ning la ka han lakai tumo na ning a ris a puka tasi, la sot tumo na papar Genesaret. <sup>35</sup> Ning a tarai mitingia la oroi lalan pas e Iesu, la saran warwara uting na hananuala rop ting na papar ning. Lamur la ben arop pas a tinsamanla teteki. <sup>36</sup> Pa la nunungi sur a tinsamanla lar tuk tar ka a tuka kaen anunai. Pa la rop ning la tuk tari, la langolango kakat.

## 15

*A tarai la anatarna pas a warwara ane God (Mk 7:1-13)*

<sup>1</sup> Dingla na Parisaio pa tena asaerla tagun a warkurai la han misaot e Jerusalem tetek e Iesu, pa la dekeni mang, <sup>2</sup> "I mangasa sur anuma kakak a asaerla bel la sira mur a asaerla ana nundala a tarai tagun nating? Bel la gos nigon pas a kunla ning la hangan." <sup>3</sup> Pa i keles la mang, "Sur asa ning bel mulo mur a warkurai ane God? Mulo mur ka a asaerla ana numulo a tarai tagun nating." <sup>4</sup> Anasa e God i atongi mang, 'Ur hanrawai e tamam pa e tnam,' *Kisim Bek 20:12* pa i atongi otleng mang, 'Esining ir warwara laulau o e tamana pa e tana, dir umkoli.' *Kisim Bek 21:17*

<sup>5</sup> Ika mulo, mulo asaer a tarai mang, i wakak ka ning tik ir atongi ta e tamana pa e tana mang, 'Asaning ar nangan mu ono, ia ka saran tari tetek e God.' <sup>6</sup> Ika ning bel i nangan e tamana, bel i hanrawai i. Ning mulo toli larning, mulo anatarna pas a warwara ane God sur mulor mur ka a asaerla ana numulo na tarai tagun nating. <sup>7</sup> Mulo na tena asasongo. A warwara ane Aisaia i momol ot, ning i warwara na propet nigo tar o mulo mang,

<sup>8</sup> 'A tarai ne la hanrawai iau ka ana pahanla,

ika a balanla i bakbak kol kusun iau.

<sup>9</sup> La lotu oros ka tetek iau,

anasa la asaer ka ana warkuraila anuna tarai.' " *Ais 29:13*

*A ututnala ning ir adur a tarai namatana e God (Mk 7:14-23)*

<sup>10</sup> E Iesu i kabah a kunum a tarai teteki, pa i atongi mang, "Mulor longor iau pa mulor talapor ana nuk a warwara. <sup>11</sup> Asaning ir kas uting na pahana barsan, bel ir aduri namatana e God. Ika, asaning i atongi ana pahana, i ning ir aduri namatana e God."

<sup>12</sup> Lamur anuna kakak a asaerla la han teteki pa la dekeni mang, "U ka tasmani mang a Parisaiola la bal mamahat ana num a warwara?" <sup>13</sup> I keles la mang, "A rakaila ning e Tata, ning i kes saot na langit, bel i oman la, dir gat arop sen la. <sup>14</sup> Mulor noren sen a Parisaiola. La a ningnigola, la arlar ka ana kutla. Ning ta kut ir ben ta kut, dia rop diar punga lorong ting na tung."

<sup>15</sup> Pa e Pita i atai i mang, "Ur pak a warwara larlar ne tetek mila." <sup>16</sup> Pa e Iesu i kelesi mang, "I mangasa mulo otleng belot mulo talapor?" <sup>17</sup> I mangasa bel mulo tasmani mang, a ututnala rop ning i kas ting na pahana tik, i kas

ting na balana pa i apurum ulak seni? <sup>18</sup> Ika a warwarala rop ning i atongi ana pahana, i purum miting na nuknukna, i ning ir aduri. <sup>19</sup> Ine a ututnala ning i sira purum miting na nuknukna: a nuknuk laulau, umkol a mainla, a toltol laulau ana ta hane anuna tik o ta barsan anuna tik, na toltol a pamuk, a kinkinau, a artitui asasong, pa di anan saksakan tik. <sup>20</sup> A ututnala ne la adur a tarai. Ika ning la hangan pa bel la gos nigon pas a kunla, bel ir adur la namatana e God.”

*A tortorot ana hane ning belsur a hane Israel*  
(Mk 7:24-30)

<sup>21</sup> E Iesu i han mitingia, pa i hanot milau a hanua Tair pa e Saidon. <sup>22</sup> Ning a hane Kenan miting na papar ning, i hanot pa i kabah e Iesu mang, “Leklek, a Nat e Dewit ur maris iau. A natuk hane, a mot kaning ono, pa i sira alaulau i.” <sup>23</sup> Ika e Iesu bel i kelesi. Anun kakak a asaerla la han teteki, pa la atai rakrakai i mang, “Ur sune seni, anasa i woiwoi tumo lamur tandala.”

<sup>24</sup> E Iesu i keles la mang, “E God i sune sen iau ute sur a tarai Israel ka, ning la rongo lar a sip-sipla.” <sup>25</sup> Ika a hane ning i han tetek e Iesu, i kes ana bokona hana salanigo tana pa i atongi tana mang, “Leklek, ur nangan iau.” <sup>26</sup> Pa e Iesu i kelesi mang, “Bel i tostos sur dir los a utna na hangan ana kakakla, pa dir minggeni tana papla.” <sup>27</sup> A hane ning i kelesi mang, “Leklek, a momolna ot ning. Ika, a papla otleng la sira ien a mumut a utna na hangan ning i sira punga miting na logo na hangan anuna tamtamanla.” <sup>28</sup> Pa e Iesu i kelesi mang, “Lak, i itna kol anuma tortorot! A utna ning u mang suri, ar toli ot tetek u.” Pa ana puka kamis ot ning, e natnalik i langolango.

*E Iesu i alangolango a tinsamanla*

<sup>29</sup> E Iesu i han mitingia, pa i asal amon tumo na hang ting na puka tasi Galili. Lamur i han kas usaot na mangir pa i kes. <sup>30</sup> Pa a tnan kunum a tarai la han teteki. La ben la ning a hanla i mat, pa na kut, na pio, na ngat, pa a galis a tinsaman otleng teteki. Pa la aborbor tar la napirna, pa i alangolango pas la. <sup>31</sup> A kunum a tarai la oroi na ngat la warwara, pa na pio la langolango, pa la ning a hanla i mat la han tostos, pa a kutla otleng la tai. La kulkulan kol pa la rakan aleklek pas e God anuna tarai Israel.

*E Iesu i tabar diat a rip a tarai*  
(Mk 8:1-10)

<sup>32</sup> E Iesu i kabah pas anuna kakak a asaerla teteki pa i atongi tanla mang, “A maris kol a taraila ne, anasa la ka kes taum hok te natol a pukakiar, pa belal utna sur lar ieni. Bel a mang sur ar sune oros sen la taum ana munurak, sakana lar suah mat ting na ngas.” <sup>33</sup> Anuna kakak a asaer la atai i mang, “A pukna ne, belal tarai ono. Mitaha ma al utna na hangan sur dalar tabar a kunum a tarai ne ono?” <sup>34</sup> E Iesu i deken la mang, “Naisa a bret kaning mulo losi?” La kelesi mang, “A mais a bret pa a siklik nanatar a sis.”

<sup>35</sup> Pa i atai a kunum a tarai sur lar kes ting na piu. <sup>36</sup> I kibas pas mais a bret pa naisa na sis ning, i atong wakak pas onoi tetek e God, pa i tibiki pa i sarani tetek a kakak a asaerla sur lar tabar a taraila ono. <sup>37</sup> A tarai rop la hangan pa la masur. Lamur a kakak a asaerla la song bukus pas mais a rat ana mah a utna na hangan. <sup>38</sup> A wawas ana tarai ka i arlar ana diat a rip, ika a gurarala pa kakakla otleng la hangan taum onla.

<sup>39</sup> Lamur e Iesu i sune sen a kunum a tarai, i kas uting na mon,

pa i han utumo na papar Magadan.

## 16

*La nunung e Iesu sur ir tol ta akinalang*

(Mk 8:11-13; Lk 12:54-56)

<sup>1</sup> A Parisaiola pa a Sadusila la han tetek e Iesu pa la tohi. La nunung sur ir tol ta akinalang namatanla, sur ir asangani mang i misaot na langit. <sup>2</sup> Pa i keles la mang, “Ning ka rah, mulo sira atongi mang, ‘Latu bel ir kiar, anasa a bakut ka kubar rop.’ <sup>3</sup> Pa ana kobot mulo sira atongi otleng mang, ‘Onone ir kiar, anasa a bakut ka kubar, pa ka bagubagu rop.’ Mulo tastasman sur mulor pak a tatatai misaot na bakut, ika bel mulo tastasmai sur mulor pak a kamkama akinalangla, ning ia ka tol tari ana pukakiarla ne.\* <sup>4</sup> A tarai tagun anone, a laulau a tarai, anunla a lalaun i bakbak kusun e God. La mang sur lar oroi ta akinalang, ika bel dir tol tar tik tetek la. Dir tol ka a akinalang arlar larning di tol tari o e Jona.” Lamur e Iesu i han kusun la.

*A atumarang ana is anuna Parisaiola pa a Sadusila*

(Mk 8:14-21)

<sup>5</sup> E Iesu taum ana anuna kakak a asaerla la han lakai a puka tasi, pa kakak a asaerla la dumani sur lar los al bret. <sup>6</sup> E Iesu i atai la mang, “Mulor tumarang ana is anuna Parisaiola pa a Sadusila.” <sup>7</sup> Pa la warwara artalai tetek la ana kamkama warwara ane Iesu, pa la atongi mang, “I atongi larne anasa bel dala los al bret.” <sup>8</sup> E Iesu i tasman anunla na warwara pa i atai la mang, “I natarna kol anumulo a tortorot. Sur asa ning mulo warwara artalai o mulo ning bel mulo los al bret? <sup>9</sup> I mangasa,

belot mulo tastasmai? Bel mulo nuk pas dilima na bret ning a tibiki tetek dilima na rip a barsan? Pa bel mulo nuk pas otleng naisa na rat ning mulo song bukus tari? <sup>10</sup> Bel mulo nuk pas mais a bret ning a tibiki tetek diat a rip a tarai? Pa bel mulo nuk pas otleng naisa na rat ning mulo song bukus tari? <sup>11</sup> I mangasa ning bel mulo tastasmai? Bel a warwara ana bret. Mulor tumarang mulo ana is anuna Parisaiola pa a Sadusila.” <sup>12</sup> Pa la tasmani bot mang bel i sairas la kusun a is ning i kes ana bret, ika i atongi larne, sur lar tumarang la ana asaer anuna Parisaiola pa a Sadusila.

*E Pita i warwara talapor o e Iesu mang i a Karisito*

(Mk 8:27-30; Lk 9:18-21)

<sup>13</sup> E Iesu i hanot tumo na papar Sisaria Pilipai. Pa i deken anuna kakak a asaerla mang, “A tarai la atong a Nat a Barsan o esi?” <sup>14</sup> La kelesi mang, “Dingla na tarai la atong u e Jon a Tena Baptais. Dingla la atong u, e Elaija, dingla la atong u, e Jeremaia, pa dingla otleng la atong u, ning a hal a propetla.” <sup>15</sup> I deken la mang, “Pa mulo, mulo atong iau o esi?” <sup>16</sup> Pa e Saimon Pita i kelesi mang, “U a Karisito, a Nat e God ning i laun.”

<sup>17</sup> Pa e Iesu i atongi tana mang, “Saimon, a nat e Jona, u ka angis, anasa bel tik i atai u ana warwara ning. E Tata ot ning i kes saot na langit i anuknuk tar u onoi. <sup>18</sup> Pa a atongi tam mang, u e Pita,† a hat kes. Ar atur anuka tarai a lotu ana hat ne. A rakrakai ana minat bel ir tolsot pas anuka tarai a lotu. <sup>19</sup> Ar saran a kila tagun a matanitu misaot na langit tetek u, pa asaning u kubusi te na rakrakan hanua, dir kubusi otleng saot na langit, pa asaning u paki te na

\* **16:3:** Dingla na tena tastasman ana Buk Tabu la nuki mang e Matiu bel i tumus naur a dihna 2 pa 3. La nuki mang tik masuk i tumus tari lamur. † **16:18:** A rising “Pita” a kamkamna mang a hat.

rakrakan hanua, dir paki otleng saot na langit.”<sup>20</sup> Pa e Iesu i sairas anuna kakak a asaerla mang gong la atai tar tik mang i a Karisito.

*E Iesu i atatai nigo ana nuna minat*

*(Mk 8:31—9:1; Lk 9:22-27)*

<sup>21</sup> Turpasi ana pukakiar ning, e Iesu i atalapor anuna kakak a asaerla mang, ir han ot usaot e Jerusalem. Pa ir kilang a galis a mamahat miting na kun a ning-nigola, a leklek a tena artabarla tetek e God, pa a tena asaerla tagun a warkurai, pa dir umkoli. Ning natol a pukakiar ir rop ir laun ulak.<sup>22</sup> Pa e Pita i ben masak pas e Iesu pa i warwara rakrakai tana mang, “Gong Leklek! Gong ot di tol tar a utna ne hom.”<sup>23</sup> E Iesu i talingir tetek e Pita pa i atongi tana mang, “Satan, ur han utumo lamur tak! U alar iau, anasa u mur ka a nuknuk a tarai, pa bel u mur a nuknuk e God.”

<sup>24</sup> Pa e Iesu i atai anuna kakak a asaerla mang, “Ning tik i mang sur ir mur iau, gong i mur a nuknukna. Ir pamar anuna rakai kutus pa ir mur iau.”<sup>25</sup> Esining i mangan alar anuna lalaun, ir hirua, ika esining i noren sen anuna lalaun sur iau, ir laun.<sup>26</sup> Ning tik ir tong akes a ututnala rop mite na rakrakan hanua, pa anuna lalaun ir hirua, ir wakak mangmangasa teteki? Ir lou keles anuna lalaun ana sa?<sup>27</sup> Anasa a Nat a Barsan ir hanot taum ana matatar anun e Tamana, la taum ana nuna angelola, pa ir saran arlou tetek a tarai taktakai arlar ana nuna titol.<sup>28</sup> A atong momoli ta mulo, dingla o mulo ning mulo tur te, belot mulor mat, pa mulor oroi a Nat a Barsan ir hanot taum ana nuna matanitu.”

## 17

*A palaona e Iesu i ries*  
*(Mk 9:2-13; Lk 9:28-36)*

<sup>1</sup> Lamur tana diono na pukakiar, e Iesu i ben pas e Pita, Jems pa e Jon, a tas e Jems, pa i ben maskan pas ditol usaot na mangir ning i tur kas.<sup>2</sup> Tisaotia, ditol oroi a palaona e Iesu i ries. A patarna i sasai arlar ana kamis, pa anuna kaenla otleng i kokok kol arlar ana talapor.<sup>3</sup> Ono otning, e Moses pa e Elaija dia hanot na matanditol pa ditol warwara taum o e Iesu.<sup>4</sup> E Pita i atai e Iesu mang, “Leklek, i wakak ning dalar kes kama te. Ning u mang, ar tol ir natol a turturup, takai anumi, takai ane Moses, pa takai ane Elaija.”

<sup>5</sup> Ning kaning ot i warwara, a laukap ning i talapor kol i poroi alar pas la. Pa a elngen takai misaot na laukap, i atongi mang, “Ine a Natuklik, a katnan koli, a gas kol onoi. Mulor longor tana.”<sup>6</sup> Ning natol a kaklik a asaer ditol longori, ditol matmataut kol, pa ditol punga purum ana matanditol ting na piu.<sup>7</sup> Ika e Iesu i han tetek ditol, pa i tong pas ditol pa i atongi mang, “Mutol kamtur, gong mutol matmataut.”<sup>8</sup> Ning ditol tadai, bel ditol oroi ulak tik, e Iesu kama kaning i tur.

<sup>9</sup> Ning la han purum amon misaot na mangir, e Iesu i sairas ditol mang, “Gong mutol atai tar tik ana sa ning mutol ka oroi tari, tuk ning a Nat a Barsan ir kamtur ulak kusun a minat.”

<sup>10</sup> Pa natol a kaklik a asaer ditol dekeni mang, “Asa kamkamna ning a tena asaerla tagun a warkurai la atongi mang e Elaija ir hanot nigo?”<sup>11</sup> I keles ditol mang, “A momolna ot, e Elaija ir hanot pa ir atostos ulak a ututnala rop.”<sup>12</sup> Ika onone ar atai mutol mang, e Elaija ka hanot pas, pa bel la tasman lalani, la tol a toltol laulaula onoi, arlar ot ana nuknukinla. Larka otleng ning lar akadik a Nat a Barsan.”<sup>13</sup> Pa natol a kaklik a asaer ditol tasmani bot mang, i



warwara tetek ditol o e Jon a Tena Baptais.

*E Iesu i kepsen a mot kusun ning a kaklik*

(Mk 9:14-29; Lk 9:37-43)

<sup>14</sup> E Iesu pa natol a kaklik asaer la hanot tetek a kunum a tarai, pa ning a barsan i han tetek e Iesu, i kes ana bokona hana salanigo tana, <sup>15</sup> pa i atongi mang, "Leklek, ur maris a natuk barsan, i sira suah mat, pa i sira kibas hirua. A galis a pukakiar i sira punga ting na iah pa ting na malum. <sup>16</sup> Ia ka ben tari kaba tetek anuma kakak a asaerla, ika bel la tolsot sur lar alangolango i."

<sup>17</sup> E Iesu i kelesi mang, "Mulo na tarai tagun onone, bel mulo tortorot pa mulo na tena laulau. Ia ka kes bongnan iau te napirim mulo. Nangse mulor tortorot? Mulor ben a kaklik ning ute tetek iau." <sup>18</sup> E Iesu i warwara rakrakai tetek a mot, pa i purum kusun a kaklik. Pa ono otning i langolango.

<sup>19</sup> Lamur a kakak a asaerla la han tetek e Iesu, pa la deken kumnani mang, "Sur asa ning bel mila tolsot sur milar kepsen a mot kusuni?" <sup>20-21</sup> Pa i keles la mang, "Anasa anumulo a tortorot i natarna kol. A atong momoli ta mulo, ning anumulo a tortorot i natarna arlar ana pata mastad, mulor tolsot pasi sur mulor atongi tana mangir ne mang, 'Ur susur mite utumo,' pa ir susur ka. Bel ta utna ir ngangaten tetek mulo."\*

*E Iesu i warwara ulak ana nuna minat pa a kamkamtur ulak*

(Mk 9:30-32; Lk 9:43-45)

<sup>22</sup> Ning e Iesu pa anuna kakak a asaerla la han taum tumo na papar Galili, i atai la mang, "Dir saran tar a Nat a Barsan uting na kuna tarai <sup>23</sup> pa lar umkoli. Lamur tana natol a pukakiar e God ir

akamtur ulaki." Ning a kakak a asaerla la longori, la bal maris kol ono.

*A totokom ana rumai a artabar*

<sup>24</sup> E Iesu pa anun a kakak a asaerla la hanot tumo e Kapernaum, pa la ning la sira los totokom ana rumai a artabar, la han tetek e Pita pa la dekeni mang, "Anumulo a tena asaer i sira saran a totokom ana rumai a artabar o bel?" <sup>25</sup> Pa i kelesi mang, "Ma."

Ning e Pita i kas ting na rumai, e Iesu i warwara nigo, pa i dekeni mang, "Saimon, asa u nuki, a kingla mite lapiu la sira los a totokom pa arlou ta esi? Tan a natnatunla o tana tarai masik?" <sup>26</sup> Pa i kelesi mang, "Tan a tarai masik." E Iesu i atai i mang, "Manglarning, na natnatunla, la langolango, bel lar lou a totokom. <sup>27</sup> Ika, gong da akutkut balanla, ur han usa latasi pa ur boko. A ningnigo na sis ning ur dati, ur sapang a pahana, pa ur pastek a mani. Ur los pasi pa ur los tari tetek la sur a totokom anundau rop."

## 18

*Esi ning i leklek kol?*

(Mk 9:33-37, 42-48; Lk 9:46-48; 17:1-2)

<sup>1</sup> Ana taem ning, a kakak a asaerla la han tetek e Iesu, pa la dekeni mang, "Esi ning i leklek kol ana matanitu misaot na langit?" <sup>2</sup> I kabah pas ning a kaklik teteki, i atur potor tari tanla, <sup>3</sup> pa i atongi mang, "A atong momoli ta mulo, ning bel mulor lingir a nuknukimulo sur mulor arlar ana kakakla, bel mulor tolsot pasi sur mulor kas ana matanitu misaot na langit. <sup>4</sup> Esi ning i anatarna pasi, arlar ana kaklik ne, i leklek kol ana matanitu misaot na langit.

<sup>5</sup> "Esining ir gas pas ta kaklik larne ana risak, i gas pas iau. <sup>6</sup> Ika,

\* **17:20-21:** Dingla na tena tastasmai ana Buk Tabu la nuki mang dingla na warwara otleng i kes ana dihna ne. I larne: *Ika, a ngas a mot larning ir purum ka ana nunung pa a tamai, belsur ana ta utna otleng.*

ning tik ir ben rongon ta halin a kakakla ne, ning i tortorot hok, ir laulau kol a warkurai teteki tana tik ning dir dot tar ta tnan hat ting na ruana, pa dir minggen murungi sa na laman.

<sup>7</sup> “Ir laulau tetek a tarai mite na rakrakan hanua, anasa a ututnala ning i dat a tarai sur lar punga ana laulau. A ututnala ning ir hanot ot, ika ir laulau kol tetek esining i tol otnan pasi. <sup>8</sup> Ning a kum, o a ham ir ben rongon u, kutus seni pa ur minggen seni. Ir wakak ning ur kas ting na lalaun tikin u a takumut ka, sur gong di minggen u taum ana naur a kum, pa naur a ham, uting na tnan iah ning bel i sira rop. <sup>9</sup> Ning a matam i ben rongon u, liok seni pa ur minggen seni. Ir wakak ning ur kas ana lalaun tikin ana takai a matam ka, sakana dir minggen u taum ana naur a matam rop uting na tnan iah ning bel i sira mat.

*A warwara larlal ana takai a sipsip ning i rongo*  
(Lk 15:3-7)

<sup>10-11</sup> “Gong mulo oroi purpulum pas ta halin kakakla ne. A atai mulo, anunla na angelola saot na langit la sira oroi a patar e Tata ning i kes saot na langit.\*

<sup>12</sup> “Asa a nuknukimulo? Ning ta barsan anuna ta mar a sipsip, pa ta halinla i rongo. I mangasa, bel ir han pas kusun a siuk a bonot pa siuk tingia na mangirla, pa ir tai sur takai ning i rongo? <sup>13</sup> A atong momoli ta mulo, ning kar pastek pasi, a gasgas anunai ono, ir itna bolos a gasgas anunai ana siuk a bonot pa siuk ning bel la rongo. <sup>14</sup> Larka otleng ning, a Tamamulo ning i kes saot na langit, bel i mang sur ta halin kakakla ne ir hirua.

\* **18:10-11:** Dingla na tena tastasmai ana Buk Tabu la nuki mang dingla na warwara otleng i kes ana dihna ne. I larne: *A Nat a Barsan i hanot sur ir alaun la ning la ka rongo.* † **18:15:** Dingla na tena tastasmai ana Buk Tabu la nuki mang e Matiu bel i tumus a warwara ‘tetek u’. La nuki mang tik masuk i tumus tari lamur.

*Asa ning ur toli tetek e tasimlik ning i tol a toltol laulau tetek u*

<sup>15</sup> “Ning e tasimlik i tol a toltol laulau tetek u,† ur han teteki, pa mu ka mur kes. Pa ur apuasa anuna rongo teteki. Ning ir longor u, u ka amoro ulak pasi. <sup>16</sup> Ning bel ir longor u, ur ben ulak pas tik o ir naur sur diar nangan u. Anasa a Buk Tabu i atongi lerne, ‘Ning ir naur o ir natol anunditol a warwara i momol.’ <sup>17</sup> Ning bel ir longor diau, ur apuasa i tetek a tarai a lotu. Ning bel ir longor otleng a tarai a lotu, i wakak sur ur oroi i arlar o esaning bel a tena tortorot, o arlar ana tena los totokom.

<sup>18</sup> “A atong momoli ta mulo, asaning mulo kubusi te na rakrakan hanua, dir kubusi otleng saot na langit, pa asaning mulo paki te na rakrakan hanua, dir paki otleng saot na langit. <sup>19</sup> A atongi otleng ta mulo, ning ir naur o mulo te na rakrakan hanua dia malmaling ana ta utna ning dia nunung suri, e Tata ning i kes saot na langit ir tolsoti ot tetek diau. <sup>20</sup> Ning ir naur o ir natol ditol kes taum ana risak, iau ar kes taum on ditol.”

*A warwara larlal ana tena titol oros ning bel i marmaris*

<sup>21</sup> E Pita i han tetek e Iesu, pa i dekeni mang, “Leklek, ar munaisa na nuk duman sen a toltol laulau ning a tasiklik i toli tetek iau? Mais a taem?” <sup>22</sup> E Iesu i kelesi mang, “Belsur a atongi tam mang mais a taem ka. A atongi mang mais a bonot pa mais a taem.

<sup>23</sup> “Oroi i, a matanitu misaot na langit i arlar ana king, ning i mang sur anuna tena titol orosla lar atostos a mani ning la dinau pasi tana. <sup>24</sup> Ning i turpas a deke,

di ben otnan takai a tena titol oros teteki. A tena titol ning i dinau pas ning a bonot a rip a mani, <sup>25</sup> ika bel ta mani sur ir kelesi ono. Pa anuna leklek i arsune sur dir siuran a barsan ning, taum o e nuna hane, pa na natnatna, pa nuna ututnala rop, sur dir keles a mani ning ono. <sup>26</sup> Pa a tena titol ning, i kes ana bokona hana na matan anuna leklek, pa i nunungi mang, 'Ur noren sen iau kaba, lamur ar keles rop anum na mani.' <sup>27</sup> Pa a leklek anuna tena titol ning i marisi, pa i atai i mang, 'Ur han. Gong kama u kelesi.'

<sup>28</sup> "Ning a tena titol oros i purum utumo lapiu, i han barat a tena titol oros, ning nating i dinau pas ka ning a bonot a mani tana. I tong akes pasi, i bing a pogolna, pa i atai i mang, 'Ur keles anuka mani ning u dinau pasi.' <sup>29</sup> A halna ning i kes ana bokona hana namatana pa i nunungi mang, 'Ur noren sen iau kaba, lamur ar keles anuma mani.' <sup>30</sup> Ika bel i longor pasi. I beni pa i akas tari ting na rumai a dodot, tuk ning ir keles a mani ning i dinau pasi. <sup>31</sup> Dingla na tena titol oros la oroi a toltol ning, pa la kilang laulau i. La han tetek anunla a leklek, pa la atai i ana ututnala ning a tena titol oros ka tol tari.

<sup>32</sup> "Anuna leklek i kabah pasi, pa i atai i mang, 'U a laulau a tena titol oros. A noren sen u sur gong ma u keles a mani ning u dinau pasi tak, anasa u nunung iau. <sup>33</sup> I mangasa ning bel u maris a halim arlar hok ning a maris u?' <sup>34</sup> Anuna leklek i balakut teteki, pa i saran tari tetek na tena tai alar ting na rumai a dodot sur lar akadik laulau i tuk ning ir keles a manila rop ning i dinau pasi.

<sup>35</sup> "E Tata ning i kes saot na langit ir toli otlang larning tetek mulo taktakai, ning bel mulo nuk duman momol sen a toltol laulau

ning na tastasimulo la tol tari tetek mulo."

## 19

### *Gong tik i kutus a tinaulai* (Mk 10:1-12)

<sup>1</sup> Ning e Iesu ka atong rop tar a warwarala ne, i han mitumo e Galili, utumo na papar Judia, ting na ning a ris a malum Jordan. <sup>2</sup> Pa a tnan kunum a tarai la muri, pa i alangolango pas a tinsamanla tingia. <sup>3</sup> Dingla na Parisaio la han teteki sur lar tohi. La dekeni mang, "I tostos arlar ana nundala a Warkuraila sur a barsan ir kepsen anuna hane na palai ta utna oros ka, o bel?" <sup>4</sup> I keles la mang, "I mangasa, belot mulo was a warwara ting na Buk Tabu? I atongi larne: Ana kamkama a akakes, a Tena Akakes 'i akes a tarai, sur lar barsan pa lar hane,' *Stat 1:27*

<sup>5</sup> pa i atongi mang, 'Ine a kamna ning a barsan ir han kusun e tamana pa e tana, pa ir kes taum o e anuna hane, sur diar hanot takai ka.' *Stat 2:24*  
<sup>6</sup> Pa bel ma dia naur, dia takai ka. Asa ning e God ka kubus taum tari, gong ulak ma tik i kutusi."

<sup>7</sup> La deken ulaki mang, "Sur asa ning e Moses i saran a warkurai sur a barsan ir tumus a paka buk na kutus tinaulai pa ir sarani tetek anuna hane, sur dir kutus a keskes na tinaulai?" <sup>8</sup> I keles la mang, "E Moses i malmaling sen mulo sur mulor kepsen anumulo a gurarala, anasa a balamulo i rakrakai kol. Ika ana kamkama akakes bel i manglarne. <sup>9</sup> A atongi ta mulo, ning tik ir kepsen anuna hane ning bel i tol ta toltol laulau taum ana ta barsan masuk, pa a barsan ning i taulai ulak ta hane, a barsan ning i tol a toltol laulau."

<sup>10</sup> Pa anuna kakak a asaerla la atongi tana mang, "Ning i manglarning tetek ta barsan pa anuna hane, i wakak sur gong tik

i taulai.”<sup>11</sup> I keles la mang, “Bel-sur a tarai rop lar tolsoti sur lar kibas a warwara ne. La ka ning e God ka saran tar a rakrakai tanla.<sup>12</sup> Urmatana kamkamna ning a tarai bel lar taulai. Dingla na tarai di agon la lar otning. Dingla na tarai, a tarai alaulau la, pa dingla na tarai otleng, bel lar taulai anasa la molot ana titol ana matanitu misaot na langit. Esi ning i tol asoti, ir mur a warwara ning.”

*E Iesu i suah naur a kuna saot on kakakla*

*(Mk 10:13-16; Lk 18:15-17)*

<sup>13</sup> Di ben kakakla tetek e Iesu sur ir suah naur a kuna saot onla pa ir nunung onla. Ika anuna kakak a asaerla la kepsen la.<sup>14</sup> E Iesu i atongi mang, “Mulor noren sen kakakla sur lar han tetek iau. Gong mulo sairas la, anasa a matanitu misaot na langit anunla ning la manglarne.”<sup>15</sup> Ning ka suah tar naur a kuna saot onla, i han mitingia.

*A tena gongon a barman*

*(Mk 10:17-31; Lk 18:18-30)*

<sup>16</sup> Ning a barman i han tetek e Iesu, pa i dekeni mang, “Tena Asaer, esi na wakak a utna ning ar toli sur ar kibas a lalaun tikin?”<sup>17</sup> E Iesu i kelesi mang, “Sur asa ning u deken iau ana sa ning i wakak? Takai sot ka i wakak. Ning u mang sur ur kibas a lalaun tikin, ur longor ana warkuraila.”<sup>18</sup> Pa i dekeni mang, “Esi na warkuraila?” E Iesu i kelesi mang, “‘Gong u umkol tik, gong u tol a toltol laulau ana ta hane anuna tik o ta barsan anuna tik, gong u kinkinau, gong u artituu asasongo,<sup>19</sup> ur hanrawai e tamam pa e tnam,’ *Kisim Bek 20:12-16*

pa ‘ur mang sur a halim larning u mang sur u ot.’” *Liwai 19:18*

<sup>20</sup> A barman ning i atai i mang, “A warkuraila rop ning ia ka mur sot pasi. Asa ulak ma ar toli?”<sup>21</sup> E Iesu i kelesi mang, “Ning u mang

sur ur tostos momol, ur han pa ur siuran sen anuma gongonla rop, pa a mani taguni, ur tabar a kapan a tarai ono. Ning ur toli larning, anuma wakak a gongon kanisaot na langit. Lamur ur han ute pa ur mur iau.”<sup>22</sup> Ning a barman i longor a warwara ne, i han ana bal maris, anasa anuna gongon i galis kol.

<sup>23</sup> Pa e Iesu i atongi tana nuna kakak a asaerla mang, “A atong momoli ta mulo, i ngangaten kol tetek a tena gongon sur ir kas ting na matanitu misaot na langit.”<sup>24</sup> A atongi otleng ta mulo mang, ir ngangaten sur a kamel ir kas ana mosol a sur na susuk, ika, i ngangaten kol sur a tena gongon ir kas ana matanitu ane God.”<sup>25</sup> Ning anuna kakak a asaerla la longori, la kulkulan kol pa la atongi mang, “Ning i manglarning, esi ma ning dir alauni?”<sup>26</sup> E Iesu i tai tetek la pa i atongi mang, “A tarai bel lar tolsot pasi, ika e God sot ka ir tolsot pas a ututnala rop.”

<sup>27</sup> E Pita i kelesi mang, “Oroi i, mila ka han kusun anumila na ututnala rop, pa mila mur u. Asa ning milar kibasi lamur?”<sup>28</sup> E Iesu i atongi tanla mang, “A atong momoli ta mulo, ning dir atona a ututnala rop, a Nat a Barsan ir kes na king ana nuna keskes na matatar. Pa mulo ning mulo ka mur iau, mulor kes ana ning a bonot pa pisir naur a keskes a king, pa mulor warkurai ning a bonot pa pisir naur a mangis a tarai Israel.”<sup>29</sup> Pa la rop ning la ka han kusun anunla na rumai, o kusun a tastasinla, taraila pa gurarala, o kusun na tamtamanla, o na kabatnanla, o na natnatunla, o kusun anunla na piu, anasa la anuki, dir saran a marmar a utna larne tanla, pa lar kibas otleng a lalaun tikin.”<sup>30</sup> Ika a galis ning la nigo anone, lar mur, pa la ning la mur anone, lar nigo.”

## 20

*A warwara larlar ana tena titolla ting na barim a wain*

<sup>1</sup> “A matanitu misaot na langit i arlar ana tamana barim a wain, i purum ana kobot ning ot sur ir deke sur al tena titol sur lar titol ting na nuna barim a wain. <sup>2</sup> La kubus warwara taum pas taum ana tena titolla sur lar los arlou tagun takai a pukakiar a titol, pa i sune la uting na nuna barim a wain. <sup>3</sup> Ana siuk a puka kamis, i han ulak pa i oroi pas dingla na tarai maleng la tur ororos ka ting na pukna na tinan taum. <sup>4</sup> Pa i atai la mang, ‘Mulo otleng, mulor han, pa mulor titol ting na nuk a barim a wain, par tokom mulo ana sa ning i tostos.’ <sup>5</sup> Pa la han.

“Ana tnan kamis i han pa i deke ulak sur al tena titol, pa ana natol a puka kamis ana rah i han ulak sur al tarai. <sup>6</sup> Ana dilima na puka kamis ana rah i han ulak, pa i oroi pas dingla na tarai maleng la tur ororos ka. Pa i atai la mang, ‘Sur asa ning mulo tur ororos ka a kidol a pukakiar ne?’ <sup>7</sup> La kelesi mang, ‘Bel tik i ben mila sur ta titol.’ I atai la mang, ‘Mulo otleng mulor han pa mulor titol ting na nuk a barim a wain.’

<sup>8</sup> “Ning ka rah morom, a tamana barim a wain, i atongi tana ningnigo tagun anuna tena titolla mang, ‘Kabah pas a tena titolla ute, pa ur tokom la. Ur turpasi sur tokom nigon la ning la hanot murmur pa ir han tuk onla ning la hanot nigo.’

<sup>9</sup> Na tena titol ning di ben pas la ana dilima na puka kamis la hanot, pa di tokom la taktakai ana arlou tagun takai a pukakiar a titol. <sup>10</sup> La ning di ben nigon pas la, la hanot. La nuki mang lar kibas a tnan arlou. Ika, bel! La otleng di tokom la taktakai ana arlou tagun takai a pukakiar a titol ka. <sup>11</sup> Ning la ka lolos pas, la ururai tetek a

tamana a barim a wain, <sup>12</sup> la atongi mang, ‘La ning la hanot murmur bel la titol bongnan la, ika mila, mila tol a rakrakai a titol pa a kamis i rang mila, pa u tokom la otleng arlar omila.’ <sup>13</sup> Pa i keles ning a halinla mang, ‘Halik, bel a alaulau u. I mangasa, bel da kubus warwara pas sur a arlou tagun takai a pukakiar a titol?’ <sup>14</sup> Ur kibas pas anuma mani, pa ur han. A mang sur ar tokom la ning la hanot murmur arlar hom ning u nigo. <sup>15</sup> I mangasa, bel i sot sur ar tol asaning a mang suri ana nuk a mani? I mangasa, u nuknuk laulau hok, anasa a asangan a wakak a toltol tetek a tarai ne?’ <sup>16</sup> Larne, la ning anone la mur, lar nigo, pa la ning anone la nigo, lar mur.”

*E Iesu i warwara munatol ana nuna minat*

*(Mk 10:32-34; Lk 18:31-34)*

<sup>17</sup> Ning e Iesu i han amon us-aot e Jerusalem, i ben masik pas anuna ning a bonot pa pisir naur a kakak a asaer, pa i atai la mang, <sup>18</sup> “Oroi i, ine dala han amon us-aot e Jerusalem. Dir saran a Nat a Barsan tetek a leklek a tena artabarla tetek e God pa a tena asaerla tagun a warkurai. Lar warkurai i sur ir mat, <sup>19</sup> pa lar saran tari tetek la, ning belsur a tarai Juda sur lar morot laulau ono, lar mirasi, pa lar sai ahati saot na rakai kutus. Natol a pukakiar ir rop pa ir laun ulak.”

*E tana e Jon pa e Jems i nunung e Iesu*

*(Mk 10:35-45)*

<sup>20</sup> Lamur e kabatnan naur a nat e Sebedi i han tetek e Iesu taum ana naur a natnalik. I kes ana bokona hana namatana pa i nunungi sur ta utna. <sup>21</sup> Pa e Iesu i dekeni mang, “Asa ning u mang suri?” Pa i kelesi mang, “Ur malmaling sur naur a natuklik ne, diar kes taum hom ting na num a

matanitu, takai ana sot a kum, pa takai a halindiau ana kair.”<sup>22</sup> E Iesu i kelesi mang, “Bel mutol tasman asaning mutol nunung suri. I mangasa, mur tolsoti sur mur gang ana kap a mamahat ning ar gang ono?” Dia kelesi mang, “Miar tolsot pasi ka.”<sup>23</sup> I atai diau mang, “A momolna ot, a kap a mamahat ning ar gang ono, mu otleng mur gang ono. Ika a keskes ana sot a kuk pa a kair, bel anuka titol sur ar sarani. E Tata ir sarani tetek la ning ka sang tari sur la.”

<sup>24</sup> Ning a bonot a kakak a asaer la longori, la balakut tetek ditas ning.<sup>25</sup> E Iesu i kabah taum pas la, pa i atongi mang, “Mulo tasmani mang a tena warkuraila anuna tarai ning belsur a tarai Juda, la warkurai a tarai pa la oroi purpurum la. Pa anunla na ningnigo la saran a rakrakai a warkuraila tetek anunla na tarai.”<sup>26</sup> Ika tetek mulo bel ir manglarne. Esi ning i mang sur ir lekkek ta mulo, ir anatarna pasi sur ir tena titol anu-mulo.<sup>27</sup> Pa esining i mang sur ir ningnigo ta mulo, ir tena titol oros tetek mulo.<sup>28</sup> Larka otleng ning a Nat a Barsan bel i hanot sur dir titol teteki. I hanot sur i ot ir titol tetek a tarai, pa ir saran tar anuna lalaun, a arlou, sur ir lou langolango pas a galis a tarai.”

*E Iesu i apalpalas pas naur a kut  
(Mk 10:46-52; Lk 18:35-43)*

<sup>29</sup> Ning e Iesu pa nuna kakak a asaerla la han mitumo e Jeriko, a tnan kunum a tarai la mur la.<sup>30</sup> Naur a barsan naur a kut dia kes tar ting na ris a ngas. Ning dia longori mang e Iesu ka han milau, dia arkabah rakrakai mang, “Lekkek, a Nat e Dewit, ur maris miau.”<sup>31</sup> Pa a kunum a tarai la sairasa diau sur diar kes wowowon. Ika dia arkabah rakrakai ot usaot, “Lekkek, a Nat e Dewit, ur maris miau.”<sup>32</sup> E Iesu i tur suai, pa i kabah pas diau, pa i deken diau mang, “Asa ning mu mang sur ar

toli o mu?”<sup>33</sup> Dia kelesi mang, “Lekkek, mia mang sur miar tai.”<sup>34</sup> E Iesu i maris kol diau, pa i tong naur a matan diau. Ono otning dia tai, pa dia muri.

## 21

*E Iesu i han usaot e Jerusalem arlar ana king*

*(Mk 11:1-11; Lk 19:28-40; Jn 12:12-19)*

<sup>1</sup> Ning la han milau e Jerusalem, la hanot tingia e Betpage na Mangir Oliw, e Iesu i sune naur a kaklik a asaer.<sup>2</sup> I atai diau mang, “Mur han sur a hanua kaning lanigo tamu. Ning mur hanot mur oroi ning a dongki kaning di dot akes tari, taum ana natnalik. Mur pak pas diau, pa mur ben diau ute tetek iau.”<sup>3</sup> Ning tik ir deken mu on diau, mur atongi mang, ‘A Lekkek i mang sur diau,’ pa ono otning ir noren sen diau tetek mu.”<sup>4</sup> Di tol a utna ne sur dir tolsot pas a warwara ane God ning a propet ka atong tari nating mang,

<sup>5</sup> “Mulor atai a tarai Saion mang,  
‘Oroi i, anumulo a king anone  
i hanot tetek mulo,  
i anatarna pasi, pa i kas ana  
dongki,  
a barman a dongki.’” *Sekaraia  
9:9*

<sup>6</sup> Naur a kaklik a asaer dia han, pa dia toli arlar ana warwara ning e Iesu ka atong tari tandiau.<sup>7</sup> Dia ben pas a dongki taum ana natalik, dia kepsen a nundiau naur a saket, pa dia suah tari saot na palai naur a dongki, pa e Iesu i kes on diau.<sup>8</sup> A tnan kunum a tarai otleng la kepsen anunla na saket, pa la sageni ting na ngas. Pa dingla na tarai otleng la ting pas a rakarakaila pa la suahi ting na ngas.<sup>9</sup> A kunum a tarai ning la nigo tana, pa la otleng ning la mur, la kukukuk mange,  
“Hosana tetek a Nat e Dewit!

Esaning i hanot ana risan a Leklek i angis.’” *Buk Song 118:25-26*

“Hosana usaot kol!”

<sup>10</sup> Ning e Iesu i hanot saot e Jerusalem, a tarai Jerusalem rop la aregaia pa la deke mang, “Esi ning?” <sup>11</sup> Pa a kunum a tarai ning la han taum onoi la atongi mang, “A barsan ne e Iesu, a propet mitumo e Nasaret ana papar Galili.”

*E Iesu i kas ting na rumai a artabar*

(*Mk 11:15-19; Lk 19:45-48; Jn 2:13-22*)

<sup>12</sup> E Iesu i kas tingui na woroh a rumai a artabar, pa i lu purum sen la rop ning la siusiurai, pa la otleng ning la lolou tingia. I minggen lingir sen a logola anuna tena keles manila\*, pa a keskesla anunla ning la siuran a tabunla. <sup>13</sup> Pa i atai la mang, “Di ka tumus tari ting na Buk Tabu mang, ‘Dir atong anuka rumai ana rumai a nunung.’” *Ais 56:7*

Ika mulo ka keles pasi sur ir arlar ana ‘pukna na mumun ana tena kinkinaula.’” *Jer 7:11*

<sup>14</sup> A kutla pa la ning a hanla i mat la han teteki ting na rumai a artabar pa i alangolango pas la. <sup>15</sup> Ika, ning a leklek na tena artabarla tetek e God pa na tena asaer tagun a warkurai la oroi a wakak a utnala kol ning i toli, pa la longori otleng kakakla la kukukuk ting na woroh a rumai a artabar mang, “Hosana tetek a Nat e Dewit,” la balakut kol. <sup>16</sup> Pa la deken e Iesu mang, “U ka longor tar a warwarala ne anuna kakakla?” E Iesu i keles la mang, “Ma! I mangasa, belot mulo was a warwara miting na Buk Tabu? I atongi mang, ‘U ka asaer tar kakakla sur lar rakan aleklek pas u.’” *Buk Song 8:2*

<sup>17</sup> Pa i han kusun la tingia, pa i han utumo e Betani pa i borbor pas ning a puka morom tumo.

*E Iesu i bor a rakai a fig*

(*Mk 11:12-14, 20-24*)

<sup>18</sup> Ana kobot ning ot, ning e Iesu i ulak usaot e Jerusalem i murak. <sup>19</sup> I oroi pas a rakai a fig i tur tar ting na ris a ngas. I han milau i, ika bel i oroi al wana, a pakana rop ka. Pa i atongi tana rakai ning mang, “Turpasi anone pa lamur, bel ur wai ulak ma.” Ono otning, a rakai i marang.

<sup>20</sup> Ning a kakak a asaerla la oroi i, la kulkulan, pa la dekeni mang, “A rakai a fig ne, i marang kapit mangasa?” <sup>21</sup> E Iesu i keles la mang, “A atong momoli ta mulo, ning mulo tortorot, pa bel mulor urmatana nuknuk, mulor tol a titol ne a toli ana rakai a fig. Belsur i ka ine ning mulor toli. Ning mulor atongi otleng tetek a mangir ne mang, ‘Ur takakan pa ur sirok parung usa latasi,’ ir toli ka. <sup>22</sup> Ning mulo tortorot, a ututnala rop ning mulo nunung suri, mulor kibasi.”

*La kabah ana rakakai ning e Iesu i sira titol ono*

(*Mk 11:27-33; Lk 20:1-8*)

<sup>23</sup> E Iesu i kas tingui na woroh a rumai a artabar, pa i asaer a tarai. A leklek a tena artabarla tetek e God pa a ningnigola anuna tarai la han teteki. Pa la dekeni mang, “Esi na ngas a rakakai ning u tol a ututnala ne ono? Esi i saran a rakakai ne tetek u?” <sup>24</sup> Pa e Iesu i keles la mang, “Iau otleng ar deken mulo ana ning a kabah. Ning mulor kelesi, ar atai mulo ana rakakai ning a sira tol a ututnala ne ono. <sup>25</sup> Mitaha a baptais ning e Jon i baptais a tarai onoi? Ta e God, o tan a tarai ka?”

Pa la warwara artalai tanla mang, “Ning dalar atongi mang,

\* **21:12:** Ning la sira kas uting na rumai a artabar, la sira los a mani anuna matanitu Rom. Pa la sira kelesi sur lar saran a totokom ana rumai a artabar.

‘Ta e God,’ ir keles dala mang, ‘Sur asa ning bel mulo tortorot onoi?’<sup>26</sup> Ika ning dalar atongi mang, ‘Tan a tarai,’ dalar matatan a tarai, sakana lar balakut tetek dala, anasa la rop la tortorot o e Jon mang, i a propet.”<sup>27</sup> Pa la keles e Iesu mang, “Bel mila tasmani.” Lamur e Iesu i atai la mang, “Iau otleng, bel ar atai mulo ana rakrakai ning a sira tol a ututnala ne ono.”

*A warwara larlar ana naur a nat a barsan*

<sup>28</sup> E Iesu i atai la mang, “Asa mulo nuki? Ning a barsan naur a natnalik, naur a kaklik barsan. I han tetek a ningnigona, pa i atai i mang, ‘Natuklik, anone ur han uting na barim a wain pa ur titol.’<sup>29</sup> Pa i kelesi mang, ‘Bel ar han,’ ika lamur i lingir a nuknukna, pa i han.<sup>30</sup> Pa e tamana i han maleng tetek ning a halindiau, pa i atai i otleng larning, pa e natnalik i kelesi mang, ‘I wakak ka tata, ar han ot,’ ika bel i han.<sup>31</sup> Esi na halindiau ning i longor ta e tamandiau?” La kelesi mang, “A ningnigona.”

E Iesu i atai la mang, “A atong momoli ta mulo, na tena los totokom pa a pamuk a gurarala, kanging la kas ting na matanitu ane God lanigo ta mulo.<sup>32</sup> Anasa e Jon i hanot pa i asaer mulo ana tostos a toltol, pa bel mulo tortorot ono, ika na tena los totokom pa na pamuk a gurara la tortorot ono. Mulo oroi tar la ot, ika bel mulo lingir a nuknukimulo pa bel mulo tortorot onoi.”

*A warwara larlar ana tena titolla ting na barim a wain*  
(Mk 12:1-12; Lk 20:9-19)

<sup>33</sup> “Mulor longor ning a warwara larlar maleng ne: Ning a barsan i oman tar a barim a wain, pa i tol alar tari ana woroh. Tingui na tinine barim, i kel tar a tung sur dir pas miren a wain ono sur

a polona ir hanot. Pa i tol tar a natar a rumai i tur kas sur ana tena tai alar. Lamur i saran tar kaba a barim tetek dingla na tena titol sur lar tai alari, pa i han uting na ning a hanua masik.<sup>34</sup> Ning ka milau a kalang sur dir git taum a wana wain, i sune sen anuna na tena titol oros tetek a tarai a titol, sur lar los pas anuna al wana wain.<sup>35</sup> A tarai a titol ning, la tong akes pas anuna na tena titol oros. La um ning na halinla, takai la umkoli pa takai otleng la wolot koli ana hatatla.<sup>36</sup> I sune ulak anuna dingla na tena titol oros, la galis tanla ning i sune nigon tar la. Ika a tarai a titol la tol ulaki ka larning tetek la.<sup>37</sup> Lamur i sune sen e natnalik tetek la, anasa i atongi mang, ‘Lar hanrawai i.’<sup>38</sup> Ika, ning a tarai a titol la oroi pas e natnalik la warwara artalai tanla mang, ‘Esaning ir keles e tamana, i ma ine ot. Mulo lamut, dalar umkoli, sur anundalai ma a barim a wain.’<sup>39</sup> Pa la tong akes pasi, la minggen purum seni miting na barim, pa la umkoli.”

<sup>40</sup> “Ning a tamana barim a wain ir hanot, asaning ir toli tetek a tarai a titol?”<sup>41</sup> La kelesi mang, “Ir umkol arop sen a laulau a tarai ning, pa ir saran tar anuna barim a wain tetek al tarai a titol masik, sur lar tai alari. A tarai a titol ning, lar bot saran tar anunal wana wain ana kalang a sol.”

<sup>42</sup> E Iesu i atai la mang, “I man-gasa, belot mulo was a warwara ne ting na Buk Tabu? I atongi mang,

‘A hat ning na tena tol rumai la kepseni,

i ot ning, a wakak a hat kes, ning di tol a rumai saot ono.

A utna ne, a Leklek ot ka tol tari, pa i wakak kol ana numila a tatatai.’ *Buk Song 118:22-23*

<sup>43</sup> I maining a atongi ta mulo mang, dir rakan sen a matanitu ane God kusun mulo, pa dir saran



tari tan al tarai ning lar suah a wakak a wanala ning i sot.”<sup>44</sup> Esi ning ir punga tar ana hat ne, ir tagingini, ika esining a hat ne ir punga tar ono, ir tamire arlar ana kubus.<sup>†</sup>

<sup>45</sup> Ning a lekkek tena artabar tetek e God pa a Parisaiola la longor a warwarala larlar ane Iesu, la tasmani ot mang i warwara ka onla. <sup>46</sup> Pa la tai sur ta ngas sur lar tong akesi ono, ika la matatan a kunum a tarai, anasa a tarai la tortorot ono mang i a propet.

## 22

*A warwara larlar ana ngasa na taulai*

*(Lk 14:15-24)*

<sup>1</sup> E Iesu i warwara ulak tetek la ana warwara larlar mang, <sup>2</sup> “A matanitu misaot na langit i arlar ana king ning i sang tar a ngasa na taulai sur e natna barsan. <sup>3</sup> Pa i sune sen anuna na tena titol oros tetek la, ning di ka atai nigon tar la, sur lar ben pas la sur a ngasa. Ika la ngongoio rop ka. <sup>4</sup> I sune seni maleng anuna dingla na tena titol oros masak ana warwara mang, ‘Mulor atai la ning di ka atai nigon tar la mang, “Ia ka sang rop tar a utna na hangan. Ia ka umkol tar na bulumakau pa na barman a butbut a bulumakau, a ututnala ka sang rop. Mulor han ute na ngasa na taulai.”’

<sup>5</sup> “Ika bel la longor, la han masak ka. Takai i han uting na nuna barim, takai otleng sur anuna rumai a siusiurai. <sup>6</sup> Pa dingla na tarai otleng ning di han sur la, la tong akesi pasi ka na tena titol oros, pa la alaulau la pa la umkol la. <sup>7</sup> A king ning, a balana i kut kol, i sune sen anuna tarai a harum, pa la umkol sen na tena umumkol a

taraila ning, pa la tun sen anunla a hanua.

<sup>8</sup> “I atongi tana anuna na tena titol oros mang, ‘Di ka sang tar a ngasa na taulai, ika la ning ia ka atai nigon tar la, bel la tostos sur lar kes ana ngasa. <sup>9</sup> Mulo han ana ngasla, pa esining mulor pasteki, mulor atai i mang ir han ute sur a ngasa.’ <sup>10</sup> Pa na tena titol oros la han uting na ngasla, pa la ben taum la rop ning la pastek la, na laulau a tarai pa wakak a taraila otleng, pa a ngasa na taulai i bukus ana wasirala.

<sup>11</sup> “Ika ning a king i kas sur ir oroi a tarai, i oroi tetek pas ning a barsan ning bel i mermer ana ta kaen a ngasa na taulai. <sup>12</sup> Pa i dekeni mang, ‘Lak, u kas mang-mangasa tar ute? Bel a num ta kaen na ngasa na taulai.’ A barsan ning bel i kelesi. <sup>13</sup> Lamur a king i atai anuna na tena titol mang, ‘Mulor dot pas naur a hana pa naur a kuna pa mulor minggen purum seni utumo lapiu na mormorom. Di tangtangis pa di arngingit ngesendi tingia.’

<sup>14</sup> “Di ka kabah pas a galis, ika di aslang pas siklik tarai kama.”

*A deke ana totokom*

*(Mk 12:13-17; Lk 20:20-26)*

<sup>15</sup> Lamur a Parisaiola la han taum tar, pa la warwara taum pas mang lar toh e Iesu sur ta warwara anunai, ning lar tiwi ono. <sup>16</sup> La sune sen anunla kakak a asaerla taum ana halalna e Herot tetek e Iesu, pa la atongi mang, “Tena Asaer, mila tasmani mang u a tostos a barsan, pa u asaer a tarai ana ngas ane God ana momol. Bel u nuknuk kol ana sa ning a tarai la atongi hom, anasa a ginim i arlar ka tetek a tarai rop. <sup>17</sup> Ur atai mila, asa a nuknukim? I tostos sur dir

<sup>†</sup> **21:44:** Dingla na tena tastasmai ana Buk Tabu la nuki mang e Matiu bel i tumus a dihna 44. La nuki mang tik masak i tumus tari lamur. \* **22:17:** A Sisar i a tnan ningnigo ana matanitu Rom, pa a tarai Israel otleng la kes nahai a nuna warkurai.

saran a totokom tetek a Sisar\* o bel?”

<sup>18</sup> Ika, e Iesu i tasmani mang, a nuknukinla i laulau, pa i atai la mang, “Mulo na tena asasongo, sur asa ning mulo mang sur mulor toho iau? <sup>19</sup> Mulor asangan iau ana ta mani na totokom.” Pa la saran tar a mani tana. <sup>20</sup> Pa i deken la mang, “A patar esi ne, pa a tumtumus ne ono anun esi?” <sup>21</sup> La kelesi mang, “Anun a Sisar.” Pa i atai la mang, “Asa ning anuna Sisar, mulor sarani tetek a Sisar. Pa sa ning ane God, mulor sarani tetek e God.” <sup>22</sup> Ning la longori, la kulkulan kol pa la han kusuni.

*A kabah ana lalaun ulak kusun a minat*

*(Mk 12:18-27; Lk 20:27-40)*

<sup>23</sup> Ana pukakiar ot ning a Sadiusila, ning la sira puai ka mang bel ta lalaun ulak kusun a minat, la han tetek e Iesu, pa la dekeni mang, <sup>24</sup> “Tena Asaer, e Moses i atongi mang, ning ta barsan ir mat pas kusun anuna hane, pa bel ta natundiau, e tasnalik ir ben pasi pa ir taulai ono, sur ir aitna tar al kakakla ana risana e tasnalik ning ka mat. <sup>25-26</sup> Ning a kabaitas mais a barsan la, la kes na arpotor tamila. A ningnigona i taulai, pa i mat pas kusun anuna hane, pa bel ta natundiau. Pa a murmur tana maleng i taulai tana hane ning, pa i maleng i mat pas kusuni. Lamur a munatol a tasnalik maleng. Pa i larning tetek mais, la rop la taulai onoi, ika bel ta natun ta halinla. <sup>27</sup> Pa lamur a hane maleng i mat.

<sup>28</sup> “Ana lalaun ulak kusun a minat, a hane ning, anun esi na halinla ma? Anasa la rop la ka taulai tari.”

<sup>29</sup> E Iesu i keles la mang, “Mulo rongo kol, anasa bel mulo tasman a Buk Tabu pa a rakrakai e God otleng. <sup>30</sup> Ana lalaun ulak kusun a minat, bel ma lar taulai, lar

arlar kama ana angelola saot na langit. <sup>31</sup> Ika ning mulo puai mang a minatla bel lar laun ulak kusun a minat, mangmangasa, belot mulo was a warwara ning e God ka atong tari ta mulo? I atongi mang, <sup>32</sup> ‘Tau a God ane Abaram, a God ane Aisak pa a God ane Jekop.’ *Kisim Bek 3:6*  
E God belsur a God ana minatla, i a God anunla ning la laun.” <sup>33</sup> Ning a kunum a tarai la longori, la kulkulan kol ana nuna asaer.

*A warkurai ning i itna kol*

*(Mk 12:28-34; Lk 10:25-28)*

<sup>34</sup> Ning a Parisaiola la longori mang, e Iesu ka wolot sot pas a Sadiusila, la han taum teteki. <sup>35</sup> Pa ning a halinla, a tena tastasmai ana warkurai, i tohi ana kabah mang, <sup>36</sup> “Tena Asaer, esi na warkurai ning i itna kol tanla rop?” <sup>37</sup> Pa i kelesi mang, “Ur mang sur anuma God a Leklek ana balam rop, a ingum rop, pa a nuknukim rop.’ *Lo 6:5*

<sup>38</sup> A warkurai ne i itna kol tanla rop, pa i a ningnigo na warkurai. <sup>39</sup> Pa ine a munaur a warkurai, ning i arlar otleng larning, ‘Ur mang sur a halim larning u mang sur u ot.’ *Liwai 19:18*

<sup>40</sup> Naur a warkurai ne, diau a kamkama warkurai rop ane Moses pa a asaerla anuna propetla.”

*A Karisito i a Leklek ane Dewit*

*(Mk 12:35-37; Lk 20:41-44)*

<sup>41</sup> Ning a Parisaiola la kes taum, e Iesu i deken la mang, <sup>42</sup> “Asa ning mulo nuki ana Karisito? I a nat esi?” La kelesi mang, “A nat e Dewit.” <sup>43</sup> E Iesu i atai la mang, “Manglarning, i mangasa a Tangan Tabu i nigon e Dewit pa i atong e Karisito mang ‘anuka Leklek’? Anasa e Dewit i atongi mang,

<sup>44</sup> ‘A Leklek i atongi tetek anuka Leklek†,

† 22:44: “A Leklek” i warwara o e God, pa “anuka Leklek” i warwara on a Karisito.

“Ur kes te na sot a kuk,  
tuk ning ar tolsot pas anuma hiru-  
ala  
sur lar kes nahaim.” \* *Buk  
Song 110:1*

<sup>45</sup> Ning e Dewit i atong a Karisito mang i anuna Leklek, ditamana mangmangasa?” <sup>46</sup> Pa bel tik i nuk pas ta warwara ulak sur ir kelesi ono. Turpasi ana pukakiar ning, bel tik ulak ma i han teteki ana ta kabah, anasa la matmataut.

## 23

*A ginin a Parisaiola pa tena asaerla tagun a warkurai*

*(Mk 12:38-39; Lk 11:43, 46; 20:45-46)*

<sup>1</sup> Lamur e Iesu i atongi tana kunum a tarai pa nuna kakak a asaerla mang, <sup>2</sup> “Na tena asaer tagun a warkurai pa a Parisaiola la asaer a tarai ana warkuraila arlar onoi ning e Moses i toli. <sup>3</sup> I ma ining, a ututnala rop ning la asaer mulo ono, mulor longor ono, pa mulor toli. Ika, gong mulo mur anunla a toltol, anasa bel la tol asaning la sira atongi. <sup>4</sup> La saran tar a mamahat a utnala sur a tarai lar losi\*, ika la ot, bel la harnangai ono. <sup>5</sup> Anunla na titol rop, la toli ka, sur a tarai lar oroi la. Mulo sira akas tar a dingla na warwara na Buk Tabu ting na nanatar a boksla, pa mulo doti ting na patarimulola. Ika a Parisaiola, anunla na nanatar a boksla i palar kol. Pa mulo sira dot a kulola ting na sinir ana numulo a kaen a nunung. Ika a Parisaiola, anunla a kulola i barah kol. <sup>6</sup> La mang sur a keskes a lekkek sa lanigo na ngasala, pa a keskes otleng sa lanigo na rumai lotula. <sup>7</sup> Pa la mang sur a tarai lar saran a tnan hanrawai tetek la ting

\* **23:4:** A Parisaiola la tol a galis a warkurai, sur a tarai lar mur e God, ika bel la tolsot pasi sur lar muri. † **23:13-14:** Dingla na tena tastasmai ana Buk Tabu la nuki mang dingla na warwara otleng i kes ana dihna ne. I mang: *Ir laulau kol tetek mulo a tena asaerla tagun a warkurai pa a Parisaiola, mulo na tena asasongo. Mulo arop a gongonla ana laola, pa mulo tol abarah a nunung sur a tarai lar oroi mulo. Ir itna kol a warkurai a arkeles ane God tetek mulo.*

na puknala na tinan taum, pa lar atong la otleng a tena asaerla.

<sup>8</sup> “Ika, gong di atong mulo a tena asaerla, anasa takai a Tena Asaer sot ka anumulo. Pa mulo tas. <sup>9</sup> Pa gong mulo atong tik mite lapiu a tamamulo, anasa takai a Tamamulo sot ka, ning i kes saot na langit. <sup>10</sup> Pa gong di atong mulo otleng a ningnigola, anasa takai sot ka anumulo a ningnigo, a Karisito ka. <sup>11</sup> Pa esining i lek-lek ta mulo, ir tena titol anumulo. <sup>12</sup> Anasa esining i aleklek pasi, e God ir anatarna i. Pa esining i anatarna pasi, e God ir alekleki.”

*E Iesu i warwara ana toltolla ana Parisaiola pa a tena asaerla tagun a warkurai*

*(Mk 12:40; Lk 11:39-42, 44, 47-52; 20:47)*

<sup>13-14</sup> E Iesu i atongi mang, “Ir laulau kol tetek mulo a tena asaerla tagun a warkurai pa a Parisaiola, mulo na tena asasongo. Mulo tagar alar a tarai sur gong la kas ana matanitu misaot na langit. Pa mulo ot, bel mulo kas ono, pa a tarai ning la mang sur lar kas, bel mulo noren la sur lar kas.†

<sup>15</sup> “Ir laulau kol tetek mulo a tena asaerla tagun a warkurai pa a Parisaiola, mulo na tena asasongo. Mulo han taltal tisa latasi pa sa na bual, sur mulor dat lingir tik, sur ir hanot a kaklik a asaer anumulo. Pa ning ka longor, mulo tarai tar ono, sur ir han uting na tnan iah, pa anuna toltol laulau ir itna tana numulo a toltol laulau.

<sup>16</sup> “Ir laulau kol tetek mulo a ningnigola, mulo arlar ka ana kutla, anasa mulo atongi mang, ‘Esi ning i lele ana rumai a artabar, bel i mamahat, ika ning tik i lele

ana gol ana rumai a artabar, esaning i momol.’<sup>17</sup> Mulo na longlong a kut! Asa ning i itna tandiau? A gol, o a rumai a artabar ning i atalapor a gol sur ir talapor namatana e God? <sup>18</sup> Mulo atongi otleng mang, ‘Esi ning i lele ana logo na tun artabar, bel i mamahat, ika ning tik i lele ana artabar ning di suahi ono, esaning i momol.’<sup>19</sup> Mulo na kut! Asa ning i itna tandiau? A artabar, o a logo na tun artabar ning i atalapor a artabar sur ir talapor namatana e God? <sup>20</sup> Esi ning i lele ana logo na tun artabar, i lele otleng ana ututnala rop ning kaning ono. <sup>21</sup> Esi ning i lele ana rumai a artabar, i lele otleng o e God ning i kes tingia. <sup>22</sup> Esi ning i lele ana langit, i lele ot ana keskes a king ane God, pa i lele otleng o esaning i kes ono.

<sup>23</sup> “Ir laulau kol tetek mulo a tena asaerla tagun a warkurai pa a Parisaiola, mulo na tena asasongo. Mulo nuknuk kol ona nanatar a warkurai, larne mulo saran taktakai rakai miting na ning a bonot a nanatar a rakai ning i tomtoboh wakak, ika bel mulo nuk pas na tatatnan utna na warkuraila. La ne: a tostos a warkurai, a marmaris tetek a tarai, pa a momol a toltol. I wakak sur mulor tol a ututnala ne, pa gong otleng mulo duman sen taktakai miting na ning a bonot, sur mulor sarani tetek e God. <sup>24</sup> Mulo a ningnigola, mulo arlar ka ana kutla. Ning mulo gang, mulo kepsen a sinip kusun a kap, ika, a kamel ning kaning na kap, mulo gangi ka!

<sup>25</sup> “Ir laulau kol tetek mulo a tena asaerla tagun a warkurai pa a Parisaiola, mulo na tena asasongo. Mulo gos ka a kabal a kap pa a pelet, ika a balandiau i bukus ana toltol a angongos pas a utna ana tik, pa a toltol ning tik i nuk pasi ot. <sup>26</sup> U a kut a Parisaio! Ur dur nigon pas a balan a kap pa a pelet, sur ir

talapor otleng a kabalindiau.

<sup>27</sup> “Ir laulau kol tetek mulo a tena asaerla tagun a warkurai pa a Parisaiola, mulo na tena asasongo. Mulo arlar ana kulam a minatla ning di pen tar la. Ning di oroi la tumo lapiu la wakak, ika ting na balanla i bukus ana sur a minatla pa a ututnala rop ning i dur. <sup>28</sup> Larka otleng ning, a tarai la oroi a palaomulo mang, mulo na tena tostos, ika tingui o mulo i bukus ana asasongo, pa a toltol laulaula.

<sup>29</sup> “Ir laulau kol tetek mulo a tena asaerla tagun a warkurai pa a Parisaiola, mulo na tena asasongo. Mulo sira awakak a kulam a minatla anuna propetla, pa mulo sira amermer a tung a minatla anuna tena tostosla. <sup>30</sup> Pa mulo atongi mang, ‘Ngandek ning milar laun taum na tumtubumila nating, bel milar nangan la ning la umkol a propetla.’ <sup>31</sup> Ika anone mulo apuasa mulo ot mang, mulo na tumtubunla ning la umkol a propetla. <sup>32</sup> Mulo ma, mulor arop a toltol laulaula ning na tumtubumulo la ka akamtur tari nating.

<sup>33</sup> “Mulo na soila! Mulo na natnat a laulau a soila! Mulor liu kumna mangmangasa kusun a warkurai a arkeles ana tnan iah? <sup>34</sup> I maining, ar sune sen a propetla, na tena tastasmai, pa na tena asaer tetek mulo. Al tarai tagun la, mulor umkol la, pa al tarai, mulor sai ahat la saot na rakai kutusla, pa al tarai otleng, mulor miras la ting na numulo na rumai lotu, pa mulor lu sen la kusun anumulo na hananuala, pa lar liu uting na hananua masak.

<sup>35</sup> Dir saran a warkurai a arkeles tetek mulo, miting na suluk a tena tostosla rop, ning di ka umkol tar la. Turpasi ning di umkol e Abel, a tena tostos, pa i han tuk o e Sekaria, a nat e Berekia, esaning mulo umkoli na arpotor a logo na tun artabar pa a pukna ning i Tabu, tingui na rumai a artabar. <sup>36</sup> A atong momoli ta mulo, dir

saran a warkurai a arkeles tetek a tarai tagun anone ana ututnala rop ne.

*E Iesu i maris e Jerusalem  
(Lk 13:34-35)*

<sup>37</sup> “Jerusalem, Jerusalem, u ning u sira umkol a propetla, pa la ning di sune sen la tetek u, u sira wolot kol la ana hatatla. A galis a pukakiar a mang sur ar kibas taum na natnatum tetek iau, arlar ana kakaruk ning i pol alar na natnatna nahai naur a dehelna, ika bel mulo mang. <sup>38</sup> Oro i! E God ka han kusun anumulo a hanua. <sup>39</sup> Anasa a atai mulo mang, bel mulor oroi ulak iau tuk ning mulor atongi mang, ‘Esaning i hanot ana risan a Leklek i angis.’ ” *Buk Song 118:26*

## 24

*A akinalangla ana ararop a pukakiarla*

*(Mk 13:1-13; Lk 21:5-19)*

<sup>1</sup> E Iesu i purum kusun a rumai a artabar. Ning i han amon, anuna kakak a asaerla la han teteki, pa la atai i sur ir oroi na rumai ting napir a rumai a artabar, ning la tai wakak. <sup>2</sup> Pa i atai la mang, “Mulo oroi i ot na rumai ne, gepi? A atong momoli ta mulo, bel ta hat ir borbor saot on ta hat, dir minggen purum la rop.”

<sup>3</sup> Ning e Iesu i kes saot na Mangir Oliw, a kakak a asaerla ka la hanot teteki, pa la atongi tana mang, “Ur atai mila, nangse a ututnala ne ir hanot? Pa asi na akinalang ana num a tinan ot ulak pa a ararop a rakrakan hanua?” <sup>4</sup> E Iesu i keles la mang, “Mulor tumarang, sakana tik ir asongo pas mulo. <sup>5</sup> Anasa a galis lar hanot ana risak, pa lar iaunan la mang, ‘Iau e Karisito,’ pa lar asongo al galis a tarai. <sup>6</sup> Mulor longor a harumla pa a arkaltai ana harum, ika gong

mulo mangasa tar. A ututnala larne lar hanot, ika a ararop a rakrakan hanua kaning ot. <sup>7</sup> Ning a hanua ir tur na harum tetek ning a hanua, pa ning a matanitu ir tur na harum tetek ning a matanitu. A tatatnan munurak, pa a mamaisla ir hanot ting na hananuala. <sup>8</sup> A ututnala rop ne, i arlar ana ningnigo na kankanla, ning i sira hanot ana hane ning i mang sur ir agon.

<sup>9</sup> “Kaning lamur, dir saran tar mulo sur dir alaulau mulo, pa dir umkol mulo, pa na tarai miting na matanitu rop lar nget mulo, anasa mulo anuki. <sup>10</sup> Ana pukakiarla ning, a galis lar han kusun a tortorot. Lar saran artalai la tetek a hiruala, pa lar nget artalai la. <sup>11</sup> A galis a asasongo na propet otleng lar hanot, pa lar asongo pas a galis a tarai. <sup>12</sup> A marmaris anuna galis ir rop, anasa na toltol laulaula ir itna kas amon. <sup>13</sup> Ika esining ir tur rakrakai tuk ana araropna, e God ir alauni. <sup>14</sup> Dir warawai ana Wakak a Warwara ana matanitu ane God tetek a tarai mite na rakrakan hanua rop, sur a warwara talapor ir han tetek na tarai miting na matanitu rop, lamur bot a rakrakan hanua ir rop.

*A atumarang ana utna ning ir hanot*

*(Mk 13:14-23; Lk 21:20-24)*

<sup>15</sup> “Mulor oroi ning a laulau a utna kol ir hanot, ir tur ting na rumai ane God pa ir adur a rumai ning. A utna ning, e Daniel a propet ka warwara nigo tar ono nating ot. Esi ning ir was a warwarala ne, i wakak sur ir tastamai ono. <sup>16</sup> Ana pukakiar ning, la ning la kes ting na papar Judia, lar liu kumna usaot na mangir. <sup>17</sup> Ning tik ir kes saot na nuna rumai\*, gong i purum sur ir los pas ta utna misau na rumai. <sup>18</sup> Ning tik ir kes

\* **24:17:** A ngas a rumai anuna tarai Israel, saot na pukul a rumai i arlar ka, pa la sira kes otleng ono.

sakas na barim, gong i ulak utumo lahanua sur anuna saket. <sup>19</sup> Ana pukakiarla ning, ir laulau kol tetek a tiananla, pa tetek a gurarala ning kaning ot la asus na natnatunla. <sup>20</sup> Mulor nunung sur gong mulo liu song ana kalangla na kotkoto, o ana Pukakiar Sabat. <sup>21</sup> Anasa ting na pukakiarla ning, ir itna kol a mamahat. Ir itna tan a mamahatla ning i sira hanot te na rakrakan hanua. Turpasi ana kamkama rakrakan hanua tuk anone, pa lamur otleng, bel ta mamahat ir arlar ono. <sup>22</sup> Ngandek ning e God bel ir kutus purum na pukakiar ne, bel tik ir laun. Ika ir kutus purum seni sur la ning ka aslang pas la, lar laun.

<sup>23</sup> “Ana taem ning, ning tik ir atai mulo mang, ‘Oroi i, a Karisito kane i,’ o ‘Kanumo i,’ gong mulo tortorot ono. <sup>24</sup> Anasa al asasongo na Karisito, pa al asasongo na propet lar hanot. Lar tol al tatatnan akinalang pa al ututna na kulkulan sur lar asongo pas a tarai ning e God ka aslang pas la, ning ot lar tolsot pasi. <sup>25</sup> Oroi i, ia ka atai nigon tar mulo ono.

<sup>26</sup> “Ning lar atai mulo mang, ‘A Karisito kaning na hanua bel,’ gong mulo han suri, pa ning lar atongi otleng mang, ‘Kaning ui na rumai,’ gong mulo tortorot ono. <sup>27</sup> Anasa a tinan ot anuna Nat a Barsan, ir arlar ana pil, ning i pil mitumo namatana tobar, pa di oroi tuk ting namatana labur. <sup>28</sup> A pukna ning a minat i borbor ono, a kotkotla lar han taum tingia.

*A tinan ot ana Nat a Barsan  
(Mk 13:24-27; Lk 21:25-28)*

<sup>29</sup> “Ning ka rop a mamahatla ana pukakiarla ning, ono otning ‘a kamis ir mormorom, a kalang bel ir talapor, a nangnangla lar punga purum misaot na bakut, pa a ututnala saot na bakut lar maler.’ *Ais 13:10; 34:4*

<sup>30</sup> “Ana taem ning, a akinalang ana Nat a Barsan ir hanot ana bakut. Pa na tarai miting na matanitu rop te na rakrakan hanua lar domos. Pa lar oroi a Nat a Barsan ir hanot ting na didia bakutla, taum ana rakrakai pa a tnan matatar. <sup>31</sup> A tawuru ir tangis kol pa a Nat a Barsan ir sune purum anuna angelola, sur lar ben taum anuna tarai ning ka aslang pas la. Lar ben taum la tagun diat a matana wuwu, miting na ning a ris a rakrakan hanua tuk tumo na ning a ris.

*A asaer tagun a rakai a fig  
(Mk 13:28-31; Lk 21:29-33)*

<sup>32</sup> “Mulor asaer tagun a rakai a fig. Ning a rakrakanala ir sibul ot ulak, pa a pakana ir tapalas, mulo tasmani mang a kalangla na laplapang ka milau. <sup>33</sup> Larka otleng, ning mulo oroi a ututnala rop ning a warwara tar ono ir hanot, mulor tasmani mang, ka milau. <sup>34</sup> A atong momoli ta mulo, a tarai tagun anone belot lar mat pa a ututnala rop ne ir hanot. <sup>35</sup> A langit pa a rakrakan hanua diar rop, ika anuka warwarala bel ir rop.

*Bel tik i tasman a pukakiar o a puka kamis ning a Nat a Barsan ir hanot*

*(Mk 13:32-37; Lk 17:26-30, 34-36)*

<sup>36</sup> “Bel tik i tasman a pukakiar o a puka kamis ning a ututnala ne ir hanot. A angelola saot na langit bel la tasmani, pa e Natnalik otleng bel i tasmani, e Tamana sot ka i tasmani. <sup>37</sup> A tinan ot ulak anuna Nat a Barsan, ir arlar ana pukakiarla ane Noa. <sup>38</sup> Ana pukakiarla ning a lomom belot i hanot, la hangan, la gang, pa la ataulai la, tuk ana pukakiar ning e Noa i kas ana sip. <sup>39</sup> Pa bel la tasman asaning ir hanot, tuk ning a lomom i hanot, pa i los arop sen la. Ir arlar ka otleng ana tinan ot

ana Nat a Barsan. <sup>40</sup> Ana pukakiar ning, ning ir naur a barsan diar titol tisa na barim, dir kibas pas ta halindiau, pa ning a halindiau bel. <sup>41</sup> Ning ir naur a hane otleng diar gini a wit, dir kibas pas ta halindiau, pa ning a halindiau bel.

<sup>42</sup> “Mulor tumarang mulo, anasa bel mulo tasman a pukakiar ning anumulo a Leklek ir hanot ono. <sup>43</sup> Mulor tasmani mang: Ning a tamana rumai ir tasman a puka morom ning a tena kinkinau ir hanot ono, ir kes pa ir tai alar anuna rumai. Bel ir noren seni sur dir kinau i. <sup>44</sup> Mulo otleng, mulor sang, anasa a Nat a Barsan ir hanot ana puka kamis ning bel mulo nuki ir hanot ono.

*A momol a tena titol oros pa a tena titol oros ning bel i momol*  
(Lk 12:41-48)

<sup>45</sup> “A tena titol oros ning i momol ana nuna titol pa i tasman otleng, anuna lekkek ir akes tari sur ir tena warkurai ting na nuna rumai, pa ir tabar a tena titol orosla otleng, ana anla a utna na hangan ana taem na hangan. <sup>46</sup> A tena titol oros ning, ir angis ning anuna lekkek ir hanot pa ir oroi i ning i tolsot pas anuna titol. <sup>47</sup> A atong momoli ta mulo, anuna lekkek ir suah tari sur ir tena warkurai ana nuna ututnala rop. <sup>48</sup> Ika ning a tena titol oros ning, i a laulau a tena titol oros, pa i nuki mang, anuna lekkek bel ir hanot kapit, <sup>49</sup> ir turpasi sur ir um a tena titol orosla ning la titol taum onoi, pa ir hangan pa ir gang taum ana tena gangla. <sup>50</sup> Anun a lekkek ir hanot on ta pukakiar ning a tena titol oros bel i tasmani, pa ta puka kamis ning bel i nuki mang ir hanot ono. <sup>51</sup> Pa a lekkek ir ting kutkutusi, pa ir saran tar a warkurai a arkeles teteki, sur ir kes taum ana tena asangola, ting na pukna ning di tangtangis pa di arngingit ngesendi ia.

## 25

*A warwara larlar ana ning a bonot a basbas*

<sup>1</sup> “Ana pukakiarla ning, a matanitu misaot na langit ir arlar ana ning a bonot a basbas, ning la kibas pas anunla na lam, pa la han sur lar barat a tona tinaulai. <sup>2</sup> Dilima onla, la tastasmai, pa dilima, bel la tastasmai. <sup>3</sup> La ning bel la tastasmai la los anunla na lam, ika bel la los al koto na wel otleng taum onla. <sup>4</sup> Ika, la ning la tastasmai la los anunla na lam pa la los otleng na koto na wel taum onla. <sup>5</sup> A tona tinaulai bel i hanot kapit, pa a matanla i sulam, pa la borbor duman rop.

<sup>6</sup> “Ana tnan morom di arkabah mang, ‘Wo, a tona tinaulai ma! Mulo iap, mulor barati.’ <sup>7</sup> A basbasla rop la mata, pa la sang anunla na lam. <sup>8</sup> La ning bel la tastasmai, la nunung la ning la tastasmai mang, ‘Mulor tabar mila anal siklik wel, anasa anumila na lam la ka mang sur lar mat.’ <sup>9</sup> La keles la mang, ‘Bel, sakana bel ir arlar ondala rop. Mulor han tetek la ning la siuran wel pa mulor lolou pas anumulo.’ <sup>10</sup> Ika ning la han sur lar lolou, a tona tinaulai i hanot. Dilima ning la ka sang tar, la han taum onoi sur a ngasa na ataulai, pa di tagar alar a taman.

<sup>11</sup> “Lamur dilima otleng la hanot, pa la arkabah mang, ‘Lekkek, lekkek, ur sapang pas mila.’ <sup>12</sup> I keles la mang, ‘A atong momoli ta mulo, bel a tasman mulo.’

<sup>13</sup> “Larning, mulor tumarang mulo, anasa bel mulo tasman a pukakiar o a puka kamis ning a Lekkek ir hanot ono.

*A warwara larlar ana natol a tena titol oros ning di saran a mani tanditol*

(Lk 19:11-27)

<sup>14</sup> “A matanitu misaot na langit i arlar otleng ana ning a barsan ning i sang sur ir han ana tinan

bakbak. I kabah pas anuna natol a tena titol oros, pa i saran tar anuna na ululeng tanditol sur ditol ir titol ono. <sup>15</sup> I saran tar dilima na rip a mani tana ning, pa naur a rip tana ning, pa ning a rip otleng tetek ning. I saran tari tetek ditol taktakai arlar ot ana nunditol a tastamai. Pa lamur i han ana nuna tinan. <sup>16</sup> Esaning di saran tar dilima na rip tana, ono otning i han pa i titol ono, pa i agomo ulak pas dilima na rip a mani taguni. <sup>17</sup> Larka otleng tetek esaning di saran tar naur a rip tana, i agomo ulak pas naur a rip a mani taguni. <sup>18</sup> Ika, esaning di saran tar ning a rip tana, i han, i kel pas a tung, pa i por kumnan tar a mani anuna leklek.

<sup>19</sup> “Ning ka bongnani, a leklek anuna natol a tena titol oros, i hanot pa i kabah pas ditol sur ditol ir atai talapori ana nuna mani. <sup>20</sup> Esaning di saran tar dilima na rip a mani tana i han teteki ana dilima na rip ulak, pa i atongi tana mang, ‘Leklek, u saran tar dilima na rip a mani tak. Oroi i, ia ka agomo otnan pas dilima na rip taguni.’ <sup>21</sup> Anun a leklek i kelesi mang, ‘Wakak kol, u a wakak a tena titol oros, u momol ana num a titol. Ar suah tar u sur ur warkurai on al galis a utna, anasa u momol ana natar a utna ne. Lamut pa dar gas taum.’

<sup>22</sup> “Eсанing di saran tar naur a rip a mani tana i han teteki, pa i atongi mang, ‘Leklek u saran tar naur a rip a mani tak. Oroi i, ia ka agomo otnan pas naur a rip taguni.’ <sup>23</sup> Anun a leklek i kelesi mang, ‘Wakak kol, u a wakak a tena titol oros, u momol ana num a titol. Ar suah tar u sur ur warkurai on al galis a utna, anasa u momol ana natar a utna ne. Lamut pa dar gas taum.’

<sup>24</sup> “Lamur esaning di saran tar ning a rip a mani tana i han teteki,

pa i atongi mang, ‘Leklek, a tasmani mang u a tena ngalngalia. U sol pas a utna ning bel u oman tari, pa u git pas a wana utna ning bel u sapran tari. <sup>25</sup> A matatan u, pa a han a por kumnan tar anuma mani. Oroi i, anuma mani i ulak mane.’ <sup>26</sup> Anun a leklek i kelesi mang, ‘U a laulau a tena titol oros, a tabun a titol u. U ka tasmani mang, a sol a utna ning bel a oman tari, pa a git pas a wana utna ning bel u sapran tari. <sup>27</sup> Sur asa ning bel u suah tar anuka mani ting na beng, sur ar kibas pas anuka mani pa ta tuk otleng saot ono, ana pukakiar ning ar hanot? <sup>28</sup> Mulor los sen a mani kusuni, pa mulor sarani tetek esaning anuna ning a bonot a rip a mani. <sup>29</sup> Anasa esining anuna al ututna, dir tabar ulaki sur anuna ututnala ir galis kol, pa esining bel anuna al utna, dir kepsen otleng siklik ning kanning tana. <sup>30</sup> Pa a tena titol oros ne, ning bel i tolsot pas ta utna, mulor minggen purum seni uting na mormorom, a pukna ning di tangtangis pa di arngingit ngesendi ia.’

*A Nat a Barsan ir asalar a tarai ana pukakiar a warkurai*

<sup>31</sup> “A Nat a Barsan ir hanot ana nuna matatar, taum ana nuna angelola, pa ir kes ana nuna keskes a king. A keskes ning a tnan matatarna. <sup>32</sup> A taraila miting na matanitu rop lar han taum namatana, pa ir asalar la, arlar ana tena tai alar anuna sipsipla i asalar a sipsipla kusun a memela. <sup>33</sup> Ir suna a sipsipla uting na sot a kuna, pa a memela uting na kair. <sup>34</sup> A king ir atai la ning kanning na sot a kuna mang, ‘Mulo han ute, mulo ning e Tata ka angis tar mulo. Mulor kibas pas a matanitu ning ka sang tari sur anumulo, tagun nating ot na kamkama rakrakan hanua. <sup>35</sup> Anasa a murak pa mulo tabar iau, a mos pa mulo agang iau, a wasira pa mulo ben kas iau



uting na rumai. <sup>36</sup> Bel ta kaen anuki pa mulo saran a kaen tak, a sasam pa mulo tai alar iau, pa a kes ting na rumai a dodot pa mulo geren iau.'

<sup>37</sup> "Na tena tostos lar dekeni mang, 'Leklek, nangse mila oroi u ning u murak pa mila tabar u, pa u mos pa mila agang u?' <sup>38</sup> Nangse mila oroi u ning u wasira pa mila ben kas u uting na rumai, pa bel ta kaen anumi pa mila saran a kaen tam? <sup>39</sup> Nangse mila oroi u ning u sasam, o u kes ting na rumai a dodot, pa mila geren u?"

<sup>40</sup> "A king ir keles la mang, 'A atong momoli ta mulo, asaning mulo toli tetek ta barsan oros ka tagun a tastasikla ne, mulo toli hok.'

<sup>41</sup> "Lamur ir atai la otleng ning na kair a kuna mang, 'Mulor han masik kusun iau. A rakrakai a warkurai a arkeles ka kes o mulo. Mulor han uting na tnan iah ning bel i sira mat, ning di ka sang tari sur e Satan pa nuna angelola. <sup>42</sup> Anasa a murak pa bel mulo tabar iau, a mos pa bel mulo agang iau. <sup>43</sup> A wasira pa bel mulo ben kas iau uting na rumai, bel ta kaen anuki pa bel mulo saran ta kaen tak, a sasam pa a kes ting na rumai a dodot pa bel mulo geren iau.'

<sup>44</sup> "La maleng lar dekeni mang, 'Leklek, nangse mila oroi u ning u murak, u mos, u wasira, bel ta kaen anumi, u sasam, pa u kes ting na rumai a dodot, pa bel mila nangan u?"

<sup>45</sup> "Ir keles la mang, 'A atong momoli ta mulo, asaning bel mulo tol tari tetek ta barsan oros ka, bel mulo toli hok.' <sup>46</sup> Lamur lar han sur a akadik tikin. Ika a tena tostosla lar han sur a lalaun tikin."

## 26

*La warwara taum pas sur lar umkol e Iesu*

(Mk 14:1-2; Lk 22:1-2; Jn 11:45-53)

<sup>1</sup> Ning e Iesu ka atong arop tar a warwarala ne, i atai anuna kakak a asaerla mang, <sup>2</sup> "Mulo ka tasmani ning naur a pukakiar ir rop, dir turpas a tnan pukakiar a lotu na Hanlakai, pa dir saran tar a Nat a Barsan sur dir sai ahati saot na rakai kutus."

<sup>3</sup> Ana tuka kamis ot ning a leklek na tena artabarla tetek e God pa na ningnigo anuna tarai, la kes taum ting na tnan rumai ane Kaiapas, a ningnigo na tena artabar. <sup>4</sup> La warwara taum pas sur lar tong kumnan e Iesu, pa lar umkoli. <sup>5</sup> La atongi mang, "Gong dala toli ana tnan pukakiar a lotu, sakana a taraila lar akamtur ta harum."

*Ning a hane i pek a polo tomtoboh saot na pukul e Iesu*  
(Mk 14:3-9; Jn 12:1-8)

<sup>6</sup> E Iesu i kes tumo e Betani, ting na rumai ane Saimon, esaning nating i sasam ana lepra. <sup>7</sup> Ning a hane i han tetek e Iesu ana polo na tomtoboh, a matana i abit kol, kaning na koto ning di toli ana hat. I peki saot na pukul e Iesu, ning kaning ot e Iesu i hangan. <sup>8</sup> Ning a kakak a asaerla la oroi i, la balakut kol ono, pa la atongi mang, "Sur asa ning i pek orosan a polo na tomtoboh ne? <sup>9</sup> Sur asa ning bel di siuran pasi sur al galis a mani sur dir tabar na kapan a tarai ono?"

<sup>10</sup> E Iesu ka tasman asaning la warwara ono, pa i atai la mang, "Sur asa ning mulo saran a mama-hat tetek a hane ne? I ka tol tar a wakak a titol hok. <sup>11</sup> A kapan a taraila lar laun bolbolos taum ot o mulo. Ika iau, bel ar kes bolbolos napirimulo. <sup>12</sup> I pek tar a polo na tomtoboh ne te na palaok sur ir sang iau sur a pukakiar ning ar mat pa dir akas a minatik ting na kulam a minat. <sup>13</sup> A atong momoli ta mulo, ana hananuala te na rakrakan hanua, ning dir warawai ana Wakak a Warwara tingia, dir patuai otleng ana sa ning a hane

ne ka tol tari, sur dir nuk akes pasi.”

*E Judas i malmaling sur lamur ir saran tar e Iesu tetek a ningnigola anuna tarai Juda*

(Mk 14:10-11; Lk 22:3-6)

<sup>14</sup> E Judas Iskariot, a halin ning a bonot pa pisir naur a kakak a asaer, i han tetek a leklek na tena artabarla tetek e God. <sup>15</sup> Pa i deken la mang, “Ning ar saran tar e Iesu tetek mulo, asa mulor tokom iau ono?” Pa la saran tar natol a bonot a silwa tana. <sup>16</sup> Turpasi ana pukakiar ning i nuknuk sur ta wakak a pukakiar ning ir saran tar e Iesu tetek la.

*E Iesu taum ana nuna kakak a asaerla la ien a utna na Hanlakai*  
(Mk 14:12-21; Lk 22:7-14, 21-23; Jn 13:21-30)

<sup>17</sup> Ana ningnigo na pukakiar ana tatatnan pukakiar a lotu na bret ning belal is ono, na kakak a asaer la han tetek e Iesu, pa la dekeni mang, “U mang sur milar sang andala a utna sur a tnan pukakiar a lotu na Hanlakai tahaia?” <sup>18</sup> Pa i keles la mang, “Mur han kas usaot e Jerusalem, mur barat ning a barsan, pa mur atai i mang, ‘A Tena Asaer i atongi mang: Anuk a pukakiar ka milau. Mila taum ana nuk a kakak a asaerla milar asilang a tnan pukakiar a lotu na Hanlakai ting na num a rumai.’” <sup>19</sup> Naur a kakak a asaer dia tol ot asaning e Iesu ka atong tari tandia, pa dia sang a utna na Hanlakai.

<sup>20</sup> Ning ka rah, e Iesu taum ana nuna ning a bonot pa pisir naur a kakak a asaer la kes ana utna na hangan. <sup>21</sup> La hangan pa i atongi mang, “A atong momoli ta mulo, takai o mulo ir saran tar iau na kun a hiruala.” <sup>22</sup> La bal maris kol pa la rop taktakai la tur pas a deke teteki mang, “Leklek, belsur iau gepi?” <sup>23</sup> E Iesu i keles la mang, “Esaning mia amurung taum amiau naur a dia bret te na

besen, i ning ir saran tar iau na kun a hiruala. <sup>24</sup> A Nat a Barsan ir hirua arlar larot ning di ka tumus tari ting na Buk Tabu. Ika ir laulau kol tetek a barsan ning ir saran tari tetek a hiruala. Ir wakak teteki ning bel dir agoni.” <sup>25</sup> E Judas, esaning ir saran tari tetek a hiruala, i dekeni mang, “Tena Asaer, belsur iau gepi?” I kelesi mang, “U ka.”

*A ararop a utna na hangan anuna Leklek*

(Mk 14:22-26; Lk 22:14-20; 1Kor 11:23-25)

<sup>26</sup> Ning kaning ot la hangan, e Iesu i kibas pas a bret, i atong wakak pas ono, i tibiki, pa i tabar anuna kakak a asaerla ono, pa i atongi mang, “Mulor kibasi pa mulor ieni. Ine a palaok.” <sup>27</sup> Lamur i kibas a kap, i atong wakak pas ono pa i sarani tanla. I atongi mang, “Mulo rop mulor gang ono. <sup>28</sup> Ine a sulukik, ning i amomol tar a kunubus ning i dat taum tar e God pa a tarai. A sulukik ne, i tapek sur ir kepsen na toltol laulau anuna galis a tarai. <sup>29</sup> A atongi ta mulo mang, bel ar gang ulak al wain, tuk ning dalar gang a tona wain saot na matanitu ane Tata.”

<sup>30</sup> Ning la ka saken tar a saksak a lotu, la han usaot na Mangir Oliw.

*E Iesu i warwara nigo tar o e Pita mang ir puain seni*

(Mk 14:27-31; Lk 22:31-34; Jn 13:36-38)

<sup>31</sup> E Iesu i atongi tanla mang, “Mese na morom, mulo rop mulor han kusun iau. Anasa di ka tumus tari ting na Buk Tabu mang, E God i atongi mang, ‘Ar um a tena tai alar ana sipsipla, pa na sipsip lar liu sarara.’

*Sekaraia 13:7*

<sup>32</sup> Ika ning ia ka kamtur ulak kusun a minat, ar nigo utumo e Galili.” <sup>33</sup> E Pita i atai i mang, “Ning la rop lar han kusun u, ika iau bel.” <sup>34</sup> E Iesu i kelesi

mang, “A atong momoli tam, mese na morom, ning a kakaruk belot ir kurkurakuk, ur puai munatol mang bel u tasman iau.” <sup>35</sup> E Pita i atai i mang, “Belar puain sen u. Ning iau otleng ar hirua taum hom, i wakak ka.” Pa kakak a asaerla rop la atongi otleng larning.

*E Iesu i nunung tumo e Getsemani*

*(Mk 14:32-42; Lk 22:39-46)*

<sup>36</sup> E Iesu taum ana nuna kakak a asaerla la hanot ting na pukna a risana e Getsemani, pa i atai la mang, “Mulor kes ka te, pa iau ar han utumo, sur ar nunung.” <sup>37</sup> I ben pas e Pita taum ana naur a nat e Sebedi. I turpas a bal maris pa i mamahat kol a nuknukna. <sup>38</sup> I atai ditol mang, “Anuk a lalaun i mamahat kol ana bal maris, milau ar mat ono. Mutol ir kes ka te, pa mutol ir koikoi tar taum hok.” <sup>39</sup> I han siklik tar usa lanigo, i punga tuntudu tar ting na piu, pa i nunung mang, “Tata, ngandek ning ir sot, ur kibas sen a kap a mamahat ne kusun iau. Ika gong u mur a nuknukik, ur mur ot a nuknukim.”

<sup>40</sup> I ulak tetek natol a kaklik a asaer, pa i oroi ditol, ditol ka borbor duman. I deken e Pita mang, “I mangasa, bel mutol tolsot sur mutol ir koikoi taum hok on ta tuka Kamis lik ka? <sup>41</sup> Mutol ir koikoi, pa mutol ir nunung, sur gong mutol punga ana alam. A ingumutol i mang sur ir longor, ika a palaomutol i ngoro.”

<sup>42</sup> Munaur a tinan ulak i han kusun ditol, pa i nunung mang, “Tata, ning bel i sot sur ur kibas sen a kap a mamahat ne kusun iau, i wakak ka sur ar kilangi. Ar muri ot a nuknukim.” <sup>43</sup> Ning i ulak, i oroi ditol, ditol ka borbor duman ulak, anasa a matanditol ka sulam kol. <sup>44</sup> Pa i han ulak kusun ditol, i munatol ana nunung, pa i paliu

ulak a nunung ning ka atong tari kaba.

<sup>45</sup> Lamur i ulak tetek natol a kaklik a asaer, i atai ditol mang, “Mutol ir borbor liklik kama pa mutol ir manah? Oroi i, a tuka Kamis ka milau, ning dir saran tar a Nat a Barsan uting na kun a tena laulaula. <sup>46</sup> Mutol kamtur, dala kar han! Oroi, a barsan ning ir saran tar iau uting na kun a hiruala, ka hanot.”

*Di dat pas e Iesu*

*(Mk 14:43-50; Lk 22:47-53; Jn 18:3-12)*

<sup>47</sup> Ning e Iesu kaning ot i warwara, e Judas, a hala ning a bonot pa pisir naur a kakak a asaer, i hanot, la taum ana kunum a tarai. La los na liwan a harum pa na nalnal. A lekkek a tena artabarla tetek e God pa na ningnigo anuna tarai, la sune sen la. <sup>48</sup> Esaning ir saran tar e Iesu uting na kun a hiruala ka atai nigon tar a kunum a tarai ana akinalang ning ir toli larne, “Esaning ar goro a ris a pahana, i ning. Mulor tong akesi.”

<sup>49</sup> Ono otning e Judas i han tetek e Iesu pa i atongi mang, “Wakak a morom, Tena Asaer!” Pa i goro i. <sup>50</sup> E Iesu i kelesi mang, “Halik, ur tol ka asaning u han ute suri.” Pa a taraila ning, la han tetek e Iesu, la tong akes pasi pa la dati.

<sup>51</sup> Takai onla ning la han taum o e Iesu, i dat pas anuna liwan a harum, pa i ting kutus sen a talngan a tena titol oros anuna ningnigo na tena artabar tetek e God. <sup>52</sup> E Iesu i atai i mang, “Akas ulak anuma liwan ting na ngasna, anasa la rop ning la arting taum ana liwanla na harum, lar hirua taum ana liwanla na harum. <sup>53</sup> I mangasa, u nuki mang, bel ar tolsot sur ar nunung e Tata sur al galis a rip a angelo, pa ono otne ir sune sen la tetek iau? <sup>54</sup> Ika, ning ar toli larne, bel dir tolsot pas a

warwarala ting na Buk Tabu ana ututnala ning i sot sur dir toli hok.”

<sup>55</sup> Ana taem ning, e Iesu i atai a kunum a tarai mang, “I mangasa, ngandek iau a tena harum pa a tena kinkinau, sur i ma ne mulo hanot taum ana liwanla na harum pa na nalnal sur mulor tong akes iau? Ana pukakiarla rop a sira kes tingui na woroh na rumai a artabar, a sira asaer a taraila, pa bel mulo tong akes iau. <sup>56</sup> Ika a ututnala rop ne i hanot sur dir tolsot pas na tumtumus anuna propetla.” Lamur anuna kakak a asaerla rop la liu sarara pas kusuni.

*E Iesu i tur ana warkurai na matan a tarai a kiwung*

(Mk 14:53-65; Lk 22:54-55, 63-71; Jn 18:13-14, 19-24)

<sup>57</sup> La ning la ka tong akes pas e Iesu, la beni uting na rumai ane Kaiapas a ningnigo na tena artabar tetek e God. Na tena asaer tagun a warkurai pa a ningnigola kaning la kes taum. <sup>58</sup> E Pita i mur amon e Iesu, ika i bakbak ot kusuni, sur uting na pukna anuna ningnigo na tena artabar tetek e God. I kas uting na pukna ning, pa i kes taum ana tena tai alar sur ir oroi asaning dir toli o e Iesu.

<sup>59</sup> A lekkek a tena artabarla tetek e God, taum ana tarai a kiwung rop, la tai sur ta asasongo na warwara ana ta laulau a utna ning e Iesu ka tol tari, sur lar tiwi ono, pa lar umkoli. <sup>60</sup> A galis a tena asasongo la hanot, ika bel la pastek ta utna ning lar tiwi ono. Naur ning dia hanot murmur, <sup>61</sup> dia atongi mang, “A barsan ne i atongi mang, ‘Ar regen sen a rumai a artabar ane God, par tol ulak pasi ana natol a pukakiar ka.’”

<sup>62</sup> A ningnigo na tena artabar tetek e God i tur, pa i deken e Iesu mang, “I mangasa, bel ur keles la? Asa ning ur keles a warwarala na artitui ne ono?” <sup>63</sup> Ika e Iesu bel

i warwara. A tena artabar ning, i atongi tana mang, “Ana risana e God, a lalaun na, ur atai mila ning u a Karisito a Nat e God, o bel.”

<sup>64</sup> E Iesu i kelesi mang, “I ot ning u atongi. Pa atai mulo mang, turpasi anone, mulor oroi a Nat a Barsan ir kes ana sot a kuna e God, esaning i rakrakai kol, pa lamur mulor oroi i ning ir hanot ana didia bakutla misaot na langit.” <sup>65</sup> A ningnigo na tena artabar i balakut pa i silir anuna kaen pa i atongi mang, “Onone ka atong laulau e God. Dala mang ulak sur al warwara na artitui sur asa? Mulo ka longor tar anuna warwara laulaula o e God. <sup>66</sup> Asa mulo nuki?” Pa la kelesi mang, “I wakak sur ir hirua.”

<sup>67</sup> Pa la namis a patarna, pa la tubuli, pa dingla na tarai la pasari, <sup>68</sup> pa la atai i mang, “Karisito, u a propet, ur atai mila, esining i tubul u.”

*E Pita i puain sen e Iesu*

(Mk 14:66-72; Lk 22:56-62; Jn 18:15-18, 25-27)

<sup>69</sup> Ning e Pita kaning i kes tar tumo lapiu ting na rumai ning, ning a hane, a tena titol i han teteki pa i atai i mang, “U otleng taum o e Iesu a te Galili.” <sup>70</sup> Ika i puai na matan la rop, i atongi mang, “Bel a tasman asaning u warwara ono.” <sup>71</sup> Lamur i han utumo napir a taman a woroh, ning a hane maleng i oroi pasi, pa i atai a taraila tingia mang, “A barsan ne, dia ma e Iesu a te Nasaret.” <sup>72</sup> Pa i puai ulak, i lele mang, “A momolna, bel a tasman a barsan ning.”

<sup>73</sup> Lamur siklik, la ning la tur tingia la han tetek e Pita, la atai i mang, “A momolna, u otleng ning a halinla. Anasa mila longor lalan u ka ana num a liu a warwara.” <sup>74</sup> Pa i lele tetek la, i atongi mang, “E God ir warkurai laulau iau ning ar asongo. Bel a tasman a barsan ning.” Pa ono otning a kakaruk i

kurkurakuk. <sup>75</sup> Pa e Pita i nuk pas a warwara ning e Iesu ka atong tari tana mang, “Ning a kakaruk belot ir kurkurakuk, ur puai munatol mang, bel u tasman iau.” Pa i purum kusun a pukna ning, pa i tangis koli.

## 27

*Di saran tar e Iesu tetek e Pailat*  
(Mk 15:1; Lk 23:1-2; Jn 18:28-32)

<sup>1</sup> Ana kobot ning ot, a leklek a tena artabarla rop tetek e God pa na ningnigo anuna tarai, la warwara taum o e Iesu sur dir umkoli. <sup>2</sup> La dot pas naur a kuna, la beni pa la saran tari tetek e Pailat, a tnan ningnigo ana matanitu.

*E Judas i popos*  
(Ap 1:18-19)

<sup>3</sup> E Judas, esaning i saran tar e Iesu uting na kun a hiruala, ning ka tasmani mang di ka warkurai tar e Iesu sur ir mat, a tnan bal maris i kibasi. I ulak ana natol a bonot a silwa tetek a leklek a tena artabarla tetek e God pa a ningnigola. <sup>4</sup> Pa i atongi mang, “Ia ka tol tar a toltol laulau, anasa ia ka asobor tar esaning bel i tol ta laulau.” Pa la kelesi mang, “Mila, mila mangasa? U ot!” <sup>5</sup> I minggen sen natol a bonot a silwa ting na rumai a artabar, pa i han pa i popos.

<sup>6</sup> A leklek a tena artabarla tetek e God la kibas pas a silwala, pa la atongi mang, “Bel i tostos ana warkurai sur dalar suah a mani ne ting na gongon a mani, anasa a mani ne arlou tagun a barsan ning di umkoli.” <sup>7</sup> Pa la warwara taum pas ono, pa la lou pas a puka piu kusun a tena tol kuro ana piopap, sur dir por a minat a wasirala tingia. <sup>8</sup> I ma ning di atong a pukna ning “A piu a suluk,” pa a tarai la atongi larning tuk anone. <sup>9</sup> Larne di tolsot pas a warwara ning e Jeremaia a propet ka atong tari nating mang, “La kibas pas natol

a bonot a silwa, a matana ning a tarai Israel la suah tari ana barsan ning. <sup>10</sup> Pa di lou pas a puka piu anuna tena tol kuro ana piopap, ana silwala, arlar ana Leklek i atong tari tak.”

*E Pailat i deken e Iesu*

(Mk 15:2-5; Lk 23:3-5; Jn 18:33-38)

<sup>11</sup> E Iesu i tur namatana e Pailat, a ningnigo tagun a matanitu, pa a ningnigo i dekeni mang, “U a king anuna tarai Juda?” Pa e Iesu i kelesi mang, “I ot ning u atongi.” <sup>12</sup> Ning a leklek a tena artabarla tetek e God pa na ningnigo la tiwi, bel i keles la. <sup>13</sup> Pa e Pailat i dekeni mang, “Bel u longor a warwara ne la tiu u ono?” <sup>14</sup> Bel i keles la ana ta artituu ning la tiwi ono. Pa a ningnigo tagun a matanitu i kulkulan kol ono.

*Di saran a warkurai sur e Iesu ir mat*

(Mk 15:6-15; Lk 23:13-25; Jn 18:39—19:16)

<sup>15</sup> Ana raula rop ting na tatatnan pukakiar a lotu na Hanlakai, a ningnigo tagun a matanitu i sira pak sen takai a barsan ning i kes ting na rumai a dodot, ning a tarai la mang suri. <sup>16</sup> Ana rau ning, ning a barsan a risana e Barabas i kes ting na rumai a dodot ana nuna tatatnan toltol laulau, pa a taraila rop la tasman a magirana. <sup>17</sup> Ning a kunum a tarai la hanot taum tetek e Pailat, i deken la mang, “Esi ning mulo mang sur ar pak seni tetek mulo? E Barabas o e Iesu, esaning di atongi ana Karisito?” <sup>18</sup> I atongi larne, anasa ka tasmani mang, a Parisaiola la saran tar e Iesu teteki ana laulau a nuknukinla. <sup>19</sup> Ning e Pailat kaning ot i tol a warkurai, anuna hane i saran sen a warwara teteki mang, “Gong u tol ta utna ana tena tostos ning, bel ta rongo anunai. Anasa nangana morom, a reresa,

pa a ututnala a oroi i ana barsan ning, i alaulau anuka lalaun.”

<sup>20</sup> Ika a leklek a tena artabarla tetek e God pa a ningnigola la akamtur a balan a kunum a tarai sur lar nunung sur e Barabas, pa dir umkol e Iesu. <sup>21</sup> A ningnigo tagun a matanitu i deken la mang, “Esi na halindiau ning mulo mang sur ar pak seni tetek mulo?” La kelesi mang, “E Barabas.” <sup>22</sup> E Pailat i deken la mang, “Asa ning ar toli o e Iesu, esaning di atongi ana Karisito?” La rop la kelesi mang, “Sai ahati saot na rakai kutus!” <sup>23</sup> Pa i deken la mang, “Sur asa? Esi na laulau a utna ning ka tol tari?” Ika la kukukuk rakrakai mang, “Sai ahati saot na rakai kutus!”

<sup>24</sup> Ning e Pailat i oroi i mang, bel i tolsot pas ta utna, pa a tnan purpuruon milau ir hanot, i kibas pas a malum, i gos pas naur a kuna na matan a kunum a tarai, pa i atongi mang, “A langolango kusun a suluk a tena tostos ne. Mulo ot dir warkurai mulo ono.” <sup>25</sup> A tarai rop la kelesi mang, “I wakak ka, a warkurai a arkeles ona sulukna ir kes omila pa na natnatumila otleng.” <sup>26</sup> E Pailat i pak sen e Barabas tetek la. Ning di ka miras tar e Iesu, i saran tari tana tena harumla sur lar sai ahati saot na rakai kutus.

*Na tena harum la morot laulau o e Iesu*

(Mk 15:16-20; Jn 19:2-3)

<sup>27</sup> Na tena harum anuna ningnigo tagun a matanitu la dat kas e Iesu uting na tnan rumai ana nunla a ningnigo. Pa la ben taum na tena harum rop teteki. <sup>28</sup> La pak sen anuna kaenla, pa la amermer tari ana kubar a kaen. <sup>29</sup> Pa la iris pas a inau a suksukna pa la suah tari ting na pukulna arlar ana kukuh anuna king. La atongtong tari ana bulse ting na sot a

kuna\* pa la kes ana bokona hanla namatana, pa la morot laulau ono mang, “U a king anuna tarai Juda!”

<sup>30</sup> Pa la namisi, la kibas pas a bulse ning kusuni, pa la dapdapis a pukulna ono. <sup>31</sup> Ning la ka morot laulau tar ono, la pak sen a kubar a kaen kusuni. La amermer tari ulak ana nuna kaenla, pa la ben purumi sur dir sai ahati saot na rakai kutus.

*Di sai ahat e Iesu saot na rakai kutus*

(Mk 15:21-32; Lk 23:26-43; Jn 19:17-27)

<sup>32</sup> Ning la purum la barat pas ning a te Sairini, a risana e Saimon, pa la angongosi sur ir los a rakai kutus ane Iesu. <sup>33</sup> La hanot ting na pukna di atongi o e Golgota, a kamkam a warwara ning mang a “Pukna na lasa na pukul.”

<sup>34</sup> La saran tar a wain ta e Iesu, ning di ka tol taman tari ana utna ning i mapak. Ika, ning i toho i, bel i mang sur ir gangi. <sup>35</sup> Ning la ka sai ahat tari saot na rakai kutus, la pilai laki sur lar asalar anuna kaenla tetek la taktakai. <sup>36</sup> Lamur la kes pa la tai alar e Iesu. <sup>37</sup> Saot na pukul e Iesu ting na rakai kutus, la suah tar a warwara na artitiu ono, di tumus tari mang,

“INE E IESU, A KING ANUN A TARAI JUDA.”

<sup>38</sup> Pa di sai ahati otleng naur a tena kinkinau taum ono saot na naur a rakai kutus, takai ting na sot, pa takai ting na kair. <sup>39</sup> La ning la hanan bolos e Iesu, la atong laulau i pa la alalen pukulunla teteki. <sup>40</sup> Pa la atongi mang, “U ma ning u atongi mang ur regen sen a rumai a artabar pa ur tol ulak pasi ana natol a pukakiar ka, anone ur alaun pas u ot. Ning u a Nat e God, ur purum kusun a rakai kutus.” <sup>41</sup> Arlar ka otleng tetek a leklek a tena artabarla tetek e God pa tena asaerla tagun a warkurai

\* 27:29: A kubar a kaen, a kukuh pa a bulse ditol tatatai arlar ana mermer anuna king.

pa a ningnigola, la morot laulau o e Iesu, la atongi mang, <sup>42</sup> “I alaun pas a tarai masik, ika bel ir tolsot sur ir alaun pasi. Ning i a King anuna tarai Israel, ono othe ir purum kusun a rakai kutus pa dalar tortorot ono. <sup>43</sup> I tortorot o e God. Ning e God i mang, ono othe ir alaun pasi, anasa i ot ka atong tari mang, ‘Iau a Nat e God.’ ” <sup>44</sup> Naur a tena kinkinau otleng ning dia kulam taum ono, dia otleng dia atong laulau i.

*E Iesu i mat*

(Mk 15:33-41; Lk 23:44-49; Jn 19:28-30)

<sup>45</sup> Tur pasi ana iah Kamis, tuk ana natol a puka Kamis ana rah, a hanua rop i mormorom. <sup>46</sup> Ning i natol a puka Kamis, e Iesu i kukukuk rakrakai mang, “Eloi, Eloi, lema sabakatani?” A kamkama warwara ning i manglarne, “Anuk a God, anuka God, sur asa ning u han kusun iau?”

*Buk Song 22:1*

<sup>47</sup> Ning dingla na tarai onla ning la tur milau la longori, la atongi mang, “I arkabah sur e Elaija.”

<sup>48</sup> Ono otning, ning a halinla i dun, pa i kibas pas a utna ning i sira dop a polo. I amurung pasi ting na wain ning i mititir, i suahi ting na rakai pa i tulsu kasi usaot sur e Iesu ir gangi. <sup>49</sup> Dingla na tarai otleng onla, la atongi mang, “Te, dalar noreni kaba. Dalar oroi ning e Elaija ir han purum sur ir alaun pasi, o bel.” <sup>50</sup> E Iesu i kukuk rakrakai ulak, pa i suah sen a malwasna.

<sup>51</sup> Ono otning a kaen na alalar kutus tingui na rumai a artabar i taksilir potot, turpasi saot utumo lain. A mamais i hanot, pa na hatat la tapagal. <sup>52</sup> Na kulam a minatla la sapang, pa a galis a tarai ane God ning la ka mat, la kamtur ulak. <sup>53</sup> La purum kusun na kulam a minatla. Pa lamur tana kamkamtur ulak ane Iesu, la

hanot saot e Jerusalem, a hanua anun e God, pa la tur ot tetek a galis a tarai. <sup>54</sup> A ningnigo anuna tena harumla, pa la otleng ning la tur taum onoi sur lar tai alar e Iesu, la kilang a mamais, pa la oroi a ututnala ning i hanot, pa la matmataut kol. La atongi mang, “I momol, a barsan ne a Nat e God.”

<sup>55</sup> A galis a gurarala otleng ning la mur e Iesu mitumo e Galili sur lar nangani, la tur bakkak tar ot pa la oroi a ututnala ne. <sup>56</sup> Ting na arpotot tanla, natol a hane otleng ne, e Maria Magdalen, pa e Maria e tana e Jems pa e Josep, pa a kabatnan naur a nat e Sebedi.

*Di aborbor e Iesu ting na kulam a minat*

(Mk 15:42-47; Lk 23:50-56; Jn 19:38-42)

<sup>57</sup> Ning ka rah, ning a tena gongon, a te Arimatia, a risana e Josep, i otleng ning a kaklik a asaer ane Iesu, <sup>58</sup> i han tetek e Pailat pa i nunungi sur a minat e Iesu. Pa e Pailat i arsune sur dir saran tari tana. <sup>59</sup> E Josep i kibas pas a minatna, pa i irisi ana wakak a tona kaen, <sup>60</sup> pa i aborbor tari ting na nuna tona kulam a minat, ning ka kel tari ting na ris a hat. I lakir alar tar a taman a kulam a minat ana tnan hat, pa i han kusuni. <sup>61</sup> E Maria Magdalen pa ning a halindia maurana otleng, dia kes tar salanigo na kulam a minat.

*La tai alar a kulam a minat*

<sup>62</sup> Ana pukakiar lamur, a Pukakiar Sabat, a leklek a tena artabarla tetek e God pa a Parisaiola la han tetek e Pailat. <sup>63</sup> La atai i mang, “Leklek, mila nuk pas a warwara anuna tena asasongo ne. Ning kaning ot i laun, i atongi mang, ning natol a pukakiar ir rop, ir kamtur ulak. <sup>64</sup> Ur sune sen al tarai sur lar tai alar wakak a kulam a minat, arlar ana natol a pukakiar, sakana anuna tarai a asaer lar hanot pa

lar kinau pas a minatna, pa lar atai a tarai mang ka kamtur ulak kusun a minat. Pa a asasongo ne, ir laulau kol tana asasongo ning nating e Iesu ka atong tari.”<sup>65</sup> E Pailat i atai la mang, “Mulor ben pas na tena tai alar pa mulor han. Mulor tai alar wakak a kulam a minat arlar ot ana numulo a tastamai.”<sup>66</sup> Pa la han, pa la arakrakai alar tar a kulam a minat. La suah a ngas a asilang sur lar tasmani ning tik ka sapang tari. Pa la atur tar na tena tai alar sur lar tai alari.

## 28

*E Iesu i kamtur ulak kusun a minat*

(Mk 16:1-10; Lk 24:1-12; Jn 20:1-10)

<sup>1</sup> Lamur tana Pukakiar Sabat, ana kobot ning ot ana ningnigo na pukakiar ana wik, e Maria Magdalen, pa ning a halindia maurana otleng dia han sur diar oroi a kulam a minat.<sup>2</sup> Pa a tnan mamais i hanot, anasa ning a angelo anuna Leklek i han purum misaot na langit sur a kulam a minat, pa i lakir sen a hat, pa i kes saot ono.<sup>3</sup> A patarna i talapor arlar ana pil, pa anuna kaen i kokok arlar ana busa na top.<sup>4</sup> Na tena tai alar la matatan koli, la koloron, pa la arlar kama ana minatla.

<sup>5</sup> A angelo i atai naur a hane ning mang, “Gong mu matmataut. A tasmani mang, mu tai sur e Iesu, ning di sai ahat tari saot na rakai kutus.<sup>6</sup> Bel i ma te. I ka kamtur ulak arlar ana nuna warwara. Mu han ute, mu oroi a pukna ning i borbor tar ono.<sup>7</sup> Lamur mur han kapit, pa mur atai anuna kakak a asaerla mang, ‘I ka kamtur ulak kusun a minat. Onone ir nigo utumo e Galili. Mulor oroi i tumo.’ Oroï, ia ka atai mu onoi.”

<sup>8</sup> Dia han kapit kusun a kulam a minat. Dia matmataut, ika a tnan gasgas otleng i kibas diau. Dia dun sur diar atai anuna kakak a

asaerla.<sup>9</sup> Ono otning e Iesu i hanot kulkulan tetek diau. Pa i atai diau mang, “Wakak a kobot tamu.” Dia han teteki, dia tong naur a hana pa dia lotu teteki.<sup>10</sup> Pa e Iesu i atai diau mang, “Gong mu matmataut. Mur han pa mur atai a tastakla, sur lar han utumo e Galili, pa lar oroi iau tumo.”

*A warwara anuna tena taialarla*

<sup>11</sup> Ning naur a hane dia han amon, dingla na tena harum ning la tai alar a kulam a minat, la han usaot e Jerusalem. Pa la atai a leklek a tena artabarla tetek e God ana ututnala rop ning i hanot tumo na kulam a minat.<sup>12</sup> Ning a leklek a tena artabarla pa a ningnigola la kes taum, la warwara taum sur ta ngas ning lar muri. Pa la saran tar a galis a mani tetek na tena harum,<sup>13</sup> pa la atai la mang, “Mulor atongi ka larne, ‘Ana morom ning mila borbor duman, anuna kakak a asaerla la hanot, pa la kinau pas a minatna.’<sup>14</sup> Ning a ningnigo tagun a matanitu ir longor a warwara ana utna ne, pa ir deke ono, milar nangan mulo, pa milar pak sen mulo kusun a warkurai.”<sup>15</sup> Pa na tena harum la kibas pas a mani, pa la toli arlar onoi ning di ka atai tar la ono. Pa a warwara ne i han sarara tetek a tarai Juda tuk anone.

*E Iesu i hanot tetek anuna kakak a asaerla*

(Mk 16:14-18; Lk 24:36-49; Jn 20:19-23; Ap 1:6-8)

<sup>16</sup> Ning a bonot pa pisir takai a kakak a asaer ane Iesu la han utumo e Galili ting na mangir ning e Iesu ka atai tar la sur lar han tingia.<sup>17</sup> Ning la oroi e Iesu, la lotu teteki, ika dingla onla, la urmatana nuknuk.<sup>18</sup> E Iesu i han milau tetek la, pa i atongi tanla mang, “E God ka saran arop tar a rakrakai tak, sur ar warkurai a ututnala rop saot na langit pa te otleng lapiu.<sup>19</sup> Pa ning mulor han, mulor asaer a taraila miting na



matanitu rop, sur la otleng anuk  
na kakak a asaer. Mulor baptais  
la ana risana e Tata, pa e Natnalik,  
pa a Talngan Tabu. <sup>20</sup> Pa mulor  
asaer la sur lar mur a warwarala  
rop ning ia ka atong tari ta mulo.  
Pa oroi, iau ar kes taum o mulo tuk  
ana araropna.”

## A Wakak a Warwara o e Iesu Karisito Mak i tumusi

### *A warwara talapor nigo*

E Mak, ning a risana otleng e Jon, i tumus a buk ne. I a ningnigo na barsan ning i tumtumus ana Wakak a Warwara. E Mak bel tagun a ning a bonot pa pisir naur a kakak a asaer anune Iesu. A tarai la nuki mang e Mak i los a warwara o e Iesu ta e Pita pa lamur i tumusi. E Mak i itna ot tisaot e Jerusalem, pa i otleng i oroi a ututnala ning e Iesu i toli. Ning dala was e Mak 14:51-52 ngandek i warwara onoi ot.

Lamur i hanot a tena harnangai ane Pol pa e Barnabas ana nun diau a titol (Ap 12:25).

E Mak i tumtumus tetek a tarai Rom sur lar tasman a Wakak a Warwara o e Iesu. Ana buk ne i atai la mang, e Iesu ka ning a rakrakaina i itna pa i tong akes a warkurai. I mang sur a tarai Rom pa dala otleng dalar tasmani mang i momol ot mang e Iesu a Natna e God.

E Mak i tumus a galis a utna na kulkulan ning e Iesu i toli, taum ana mamahatla ning i kilangi, ika bel i tumus akes dingla na asasaer ane Iesu. Ning a utna otleng ning e Mak i tumusi i mange, mang e Iesu a rakrakaina i itna kol o e Satan, pa i a Tena Alaun anundala.

A tumtumus ane Mak i tuk tar ka o e Mak 16:8. Pa e Mak 16:9-20 ning a barsan masik ot i tumusi.

### **A tinan ana buk Mak:**

E Iesu i turpas anuna titol (1:1-13)

E Iesu i titol tumo e Galili (1:14-9:50)

E Iesu i han usaot e Jerusalem (10:1-52)

A ararop na wik pa a minat ane Iesu (11:1-15:47)

A kamkamtur ulak ane Iesu kusun a minat (16:1-20)

*E Jon a Tena Baptais i warawai (Mt 3:1-12; Lk 3:1-18; Jn 1:19-28)*

<sup>1</sup> Ine a kamkamna ana Wakak a Warwara o e Iesu Karisito, a Nat e God. <sup>2</sup> A warwara ane God ning di ka tumus tari ana buk anuna propet Aisaia i atongi mange, “Oroi, ar sune anuka tena los warwara sur ir nigon u, pa ir atalapor anuma ngas.

<sup>3</sup> A elngena mainla i arkabah ting na hanua bel mang,

‘Mulor sang a ngas anuna Leklek,

mulor atostos anuna ngasla.’”

<sup>4</sup> Io, e Jon a Tena Baptais i hanot ting na hanua bel, pa i sira baptais pa i warawai sur a tarai lar lingir a nuknukinla pa dir baptais la, pa e God ir kepsen anunla na toltol laulaula. <sup>5</sup> A taraila rop misaot e Jerusalem pa miting na hananuala rop tumo na papar Judia rop, la han teteki. La patuai talapor ana nunla na toltol laulaula, pa i baptais la ting na malum Jodan. <sup>6</sup> E Jon i mermer ana kaen di toli ana hih a kamel, pa i dot ahati ana let di toli ana palaona bulumakau. I sira ien a mumla pa polona tatos. <sup>7</sup> I warwara talapor mange, “Esaning i mur tak i leklek tak. Pa bel a tolsot pasi sur ar paksen a inau ana anuna su. A natarna kol tana. <sup>8</sup> Iau ar baptais mulo ana malum, pa i ir baptais mulo ana Talngan Tabu.”

*E Jon i baptais e Iesu pa e Satan i lari*

(Mt 3:13—4:11; Lk 3:21-22; 4:1-13)

<sup>9</sup> Ana pukakiarla ning e Jon i baptais a taraila, e Iesu i hanot mitisa na hanua Nasaret ana papar Galili. Pa e Jon i baptaisi ting na malum Jodan. <sup>10</sup> Ning e Iesu i saur miting la malum, i oroi a langit i sapang, pa a Talngan Tabu i han purum teteki arlar ana tabun.

<sup>11</sup> Pa a elngena mainla misaot na langit i atongi mang, “U a Natuklik, a katnan u, a gas kol hom.”

<sup>12</sup> Pa ono otning a Talngan Tabu i sune sen e Iesu uting na hanua bel. <sup>13</sup> I kes tingia diat a bonot a pukakiar pa e Satan i lari. I kes taum ona rokoiola pa a angelola la nangani.

*E Iesu i kabah pas diat a tena migei uben*

(Mt 4:12-22; Lk 4:14-15; 5:1-11)

<sup>14</sup> Ning di ka akas tar e Jon uting na rumai a dodot, e Iesu i hanot utumo na papar Galili, pa i warwara talapor ana Wakak a Warwara ane God, <sup>15</sup> i atongi mange, “A pukakiar ka hanot, pa a matanitu ane God ka milau. Mulor lingir a nuknukimulo pa mulor tortorot ana Wakak a Warwara.” <sup>16</sup> Ning i asal ana hang ana puka tasi Galili, i oroi tetek naur a tas, e Saimon pa e Endru kaning dia minggen a uben tisa latasi, anasa diau naur a tena minggen uben. <sup>17</sup> I atai diau mang, “Mu lamut, mu mur iau, sur mu naur a tena ben tarai.” <sup>18</sup> Ono otning dia kamtur pas kusun a ubenla pa dia muri. <sup>19</sup> Ning i asal siklik kale, i oroi pas maleng naur a tas e Jems pa e Jon, naur a nat e Sebedi, dia kes tingui na mon pa dia suk anundia na ubenla. <sup>20</sup> Ono otning e Iesu i kabah pas diau, pa dia han kusun e tamandiau taum ana tarai a titol ting na mon, pa dia muri.

*E Iesu i kepsen a mot kusun ning a barsan*

(Lk 4:31-37)

<sup>21</sup> Pa la han utumo e Kaper-naum, pa ana Pukakiar Sabat, e Iesu i kas uting na rumai lotu, pa i asaer la. <sup>22</sup> La kulkulan ana nuna asasaer, anasa i asaer la, arlar o esaning a warkurai kaning tana. Bel i asaer la arlar ana anunla na tena asaer tagun a warkurai la sira toli. <sup>23</sup> Ning a barsan, a mot i solongi i kes ting na rumai lotu,

ono otning i kukuk mange, <sup>24</sup> “U e Iesu a te Nasaret. Ur tol asa omila? U hanot sur ur alaulau mila? A tasman u ot, u a Tena Totoh ane God.” <sup>25</sup> E Iesu i sairasi mange, “Gong u warwara! Purum kusun a barsan ning!”

<sup>26</sup> A mot i gulen rakrakai tari, pa i kukuk, pa i purum kusuni. <sup>27</sup> A tarai rop la kulkulan kol, pa la deke artalai la mang, “Asa ine? A tona asasaer. A barsan ne i tong a warkurai pa ana nuna warwara i kepsen sen a motla, pa la longor tana.” <sup>28</sup> Pa a warwara o e Iesu i han sarara ana hananuala rop ting na papar Galili.

*E Iesu i alangolango a galis a tinsaman*

(Mt 8:14-17; Lk 4:38-41)

<sup>29</sup> Ning e Iesu taum ana kakak a asaer la purum miting na rumai lotu, la han taum ma e Jems pa e Jon, sur uting na rumai ane Saimon pa e Endru. <sup>30</sup> E anmuna e Saimon, a hane i sasam, pa i borbor taum ana laplapang, pa la atai e Iesu ono. <sup>31</sup> Pa e Iesu i han teteki, i tong pas a kuna, pa i dat atur pasi, pa a laplapang i rop kusuni. Pa a hane ning i tabar la ana utna na hangan.

<sup>32</sup> Ning a kamis ka sup tar, a tarai la ben pas a tinsamanla rop pa la otleng ning a motla kaning onla tetek e Iesu. <sup>33</sup> A tarai rop miting na hanua ning, la bukus ting na taman. <sup>34</sup> Pa i alangolango pas a galis a tarai ning la sasam ana urmatana tinsaman, pa i kepsen a galis a mot kusun la. Pa i sairasa a motla sur gong la warwara, anasa la tasman ot e Iesu.

*E Iesu i warawai ting na papar Galili*

(Lk 4:42-44)

<sup>35</sup> Ana lar, e Iesu i mata pa i purum. I han uting ana hanua bel pa i nunung tetek e God. <sup>36</sup> Pa e Saimon taum onla ning la han taum, la seren e Iesu. <sup>37</sup> Pa ning

la pasteteki, la atai i mange, “A tarai rop la seren u.”<sup>38</sup> Pa e Iesu i atai la mange, “Dalar han uting anal hanua milau, sur ar warawai otleng tetek la. Ine a kamkamna ning a hanot suri.”

<sup>39</sup> Pa i han taltal ting na papar Galili rop. I warawai ting na rumai lotu anunla, pa i kepsen a motla kusun a taraila.

*E Iesu i alangolango pas a lepra  
(Mt 8:1-4; Lk 5:12-16)*

<sup>40</sup> Ning a barsan, a lepra, i han tetek e Iesu, i kes ana bokona hana, pa i nunung rakrakai i mang, “Ning u mang, ur tolsot sur ur alangolango pas iau.”<sup>41</sup> Pa e Iesu i marisi, pa i tuslan a kuna, i tong a palaona, pa i atai i mang, “A mang ot, ur langolango.”<sup>42</sup> Ono otning a lepra i rop kusuni, pa i langolango ulak.<sup>43</sup> Pa e Iesu i sune seni taum ana rakrakai a warwara mang,<sup>44</sup> “Gong u atai tar tik ono. Ur han pa ur asangan u tetek a tena artabar tetek e God, pa ur saran a artabar tetek e God larning e Moses ka atong tari. Ning ur toli larne ir talapor tetek a taraila mang a palaom ka wakak ulak.”<sup>45</sup> Ika ning i purum, i warwara taltal onoi tetek a taraila. Ana toltol ning, i asanan tar e Iesu, pa bel ma i tolsot sur ir hanot talapor ting na ta hanua. I taltal kama ting na hanua bel, maika a taraila miting na hanhanua la han ot teteki.

## 2

*E Iesu i alangolango pas a barsan ning a palaona i mat  
(Mt 9:1-8; Lk 5:17-26)*

<sup>1</sup> Dingla na pukakiar i rop, e Iesu i han ulak utumo e Kaper-naum. A tarai la longori mang ika hanot tar ting na rumai,<sup>2</sup> pa galis onla, la hanot teteki, pa belal pukna tingui na rumai, pa tumo lapiu na taman otleng. Pa e Iesu i warawai ana warwara ane God tetek la.<sup>3</sup> Dingla na tarai la hanot

taum ana ning a barsan a palaona i mat. Diat a barsan la losi tetek e Iesu.<sup>4</sup> Ika a galis a tarai la ka tur alar pasi pa bel la tolsot sur lar kas anoi. La abit taum onoi usaot na rumai, pa la regen pas ning a ris a pukul a rumai tostos ana pukna ning e Iesu i kes ia. Pa la alorong purum a barsan ning a palaona i mat taum ana logo ngasna.<sup>5</sup> Ning e Iesu i oroi anunla tortorot, i atai a barsan ning a palaona i mat mange, “Natuklik, di ka kepsen tar anum na toltol laulau.”<sup>6</sup> Dingla na tena asaer tagun a warkurai la kes tingia. La nuknuk mange,<sup>7</sup> “Sur asa a barsan ne i atongi larne? I atong saksakan e God anasa i arlari ono. Esi ir kepsen a toltol laulaula? E God ka.”<sup>8</sup> Aiap ka e Iesu ka tasman tar a nuknukinla, pa i deken la mange, “Sur asa mulo nuknuk larne?”<sup>9</sup> Esi na ngas a warwara ning bel i ngangaten sur ar atongi tana barsan ne? Ar atongi mange, ‘Di ka kepsen tar anum na toltol laulaula,’ o ar atongi mange, ‘Ur kamtur, los pas a logo ngasim pa ur han?’<sup>10</sup> Ar atongi larne sur mulor tasmani mang e God ka saran tar a warkurai tetek a Nat a Barsan sur ir kepsen a toltol laulaula te lapiu.” Pa, i atai a barsan ning a palaona i mat mange,<sup>11</sup> “A atai u, ur kamtur, ur kibas a logo ngasim, pa ur han uting na rumai ngasim.”<sup>12</sup> I kamtur, i kibas a logo ngasna, pa i purum na matanla rop. La rop la kulkulan pa la rakan aleklek pas e God mange, “Bel mila sira oroi ta utna manglarne. Onobot ne mila oroi i.”

*E Iesu i kabah pas e Liwai  
(Mt 9:9-13; Lk 5:27-32)*

<sup>13</sup> E Iesu i han purum ulak utumo na ris a puka tasi Galili, pa a tnan kunum a tarai la hanot teteki, pa i turpas a asaer la ana warwara ane God.<sup>14</sup> Ning i han amon, i oroi tetek e Liwai, a nat e Alpius,

i kes ting na rumai a los totokom, pa e Iesu i atongi tana mang, “Ur mur iau.” Pa e Liwai i kamtur pa i muri. <sup>15</sup> Lamur, ning e Iesu i kes ana utna na hangan ting na rumai ane Liwai, a galis a tena los totokom taum ana tena laulaula, la hangan taum o e Iesu pa kakak a asaerla anunai. Anasa galis a tarai la mur e Iesu. <sup>16</sup> Dingla na tena asaer tagun a warkurai, ning a Parisaiola, la oroi e Iesu ning i hangan pa a tarai laulaula pa a tena kibas totokomla. La deken anuna kakak a asaerla mang, “Sur asa ning i hangan taum ana tena los totokomla pa a tena laulaula?” <sup>17</sup> Ning e Iesu i longori, i atai la, “A dokta bel i hanot sur la ning la langolango. I hanot sur la ka ning la sasam. Bel a hanot sur a tena tostosla. A hanot sur ar kabah pas a tena laulaula.”

*A kabah ana tamai*  
(Mt 9:14-17; Lk 5:33-39)

<sup>18</sup> A kakak a asaerla ane Jon taum ana Parisaiola la tamai. Dingla na tarai la han tetek e Iesu, pa la dekeni mang, “I mangasa ning a kakak a asaerla ane Jon taum ana kakak a asaer anuna Parisaiola, la tamai, ika anum na kakak a asaerla bel?” <sup>19</sup> E Iesu i keles la mange, “Ning ta barsan ir taulai totoh, na halalna lar tamai mangmangasa ning a barsan ning kaning ot i kes taum onla? Ning kaning ot i kes taum onla, bel lar tamai. <sup>20</sup> Ika ta pukakiar ir hanot ning dir ben maskan pas a barsan ning kusun la, pa ana pukakiar ning lar bot tamai.

<sup>21</sup> “Bel tik ir raprap ta tona dia kaen ana ta muarna. Ning ir toli larning, a tona ning dir raprap ono, ir silir sen aulak a muar a kaen, pa ir taksilir kol. <sup>22</sup> Pa bel tik ir tere a tona wain uting na turai a koto na wain ning di toli ana palaona inagoi. Ning ir toli larning a turai a koto na wain ir pusa, pa a wain ir tapek, pa a koto na wain

otleng ir laulau. Dir pek ot a tona wain uting na tona koto na wain.”

*E Iesu ot a Leklek ana Pukakiar Sabat*

(Mt 12:1-8; Lk 6:1-5)

<sup>23</sup> Ana ning a Pukakiar Sabat, e Iesu i han pотор ting na barim a wit. Ning la han amon, anuna kakak a asaerla la turpas a kumut kutus a witla. <sup>24</sup> A Parisaiola la deken e Iesu mang, “Oroi! Sur asa ning la tol a utna ning, pa bel la mur a warkurai tagun a Pukakiar Sabat?” <sup>25</sup> E Iesu i keles la mange, “I mangasa belot mulo was asaning e King Dewit i toli ning i taum ana taraila ning la armuri la murak, pa belal utna anlai? <sup>26</sup> Ning e Abiatar i ningnigo na tena artabar tetek e God, e Dewit i kas uting na rumai ane God pa i ien a bret ning di ka tabar tar e God ono. Pa i tabar la otleng ning la armuri. A bret ning di sairasi kusun a tarai oros. I arlar ana Warkuraila sur a tena artabarla ka tetek e God lar ieni.”

<sup>27</sup> Pa e Iesu i atai la mange, “Di tol tar a Pukakiar Sabat sur ir nangan a taraila, bel sur a tarai lar nangan a Pukakiar Sabat. <sup>28</sup> I maining a Nat a Barsan ot a Leklek tagun a Pukakiar Sabat.”

### 3

*E Iesu i alangolango pas a barsan a kuna del*

(Mt 12:9-14; Lk 6:6-11)

<sup>1</sup> E Iesu i kas ulak uting na rumai lotu, pa ning a barsan kanninga a kuna i del. <sup>2</sup> Pa a tarai la tai sur ta ngas ning lar arup e Iesu ono, pa la ngoson murmuri mang ir alangolango a tinsaman ana Pukakiar Sabat, o bel. <sup>3</sup> Pa i atai a barsan ning a kuna i del mang, “Ur tur te lanigo tanla rop.” <sup>4</sup> Pa e Iesu i deken la mange, “Asa ning a Warkuraila i atongi sur dir toli ana Pukakiar Sabat? Dir tol a wakakna o dir tol a laulauna, dir alangolango tik o dir saikol tik?”

Ika bel la kelesi. <sup>5</sup> E Iesu i tai taltal ana balakut tetek la. I nukmaris la anasa la tagar a nuknukinla. Pa i atai a barsan ning mang, “Ur kodos a kum.” I kodosi, pa a kuna i tostos ulak. <sup>6</sup> Ning a Parisaiola la purum, la han tetek a taraila ane Herot, pa la warwara taum pas sur ta ngas ning lar umkol e Iesu ono.

*Atnan kunum a tarai la han tek-tek e Iesu*

<sup>7</sup> E Iesu taum ana nuna kakak a asaer la han utumo purum na puka tasi, pa a tnan kunum a tarai mitisa ana papar Galili la muri. <sup>8</sup> Pa a galis a tarai otleng la muri misaot na papar Judia pa e Jerusalem, pa miting na papar Idumea, pa mitimo na ning a ris a malum Jodan pa mitimo e Tair pa e Saidon otleng. A tnan kunum la hanot, anasa la ka longor tar a tatatnan utna ning e Iesu ka tol tari. <sup>9-10</sup> I ka alangolango pas a galis a tinsaman, pa la ning la kurah la sur sauran pas la, sur lar susur milau e Iesu pa lar tuki. Pa i atai anuna kakak a asaerla sur lar dulan parung a mon, sur ning a tnan kunum a tarai la kar atalilis pasi, pa ir kas onoi. <sup>11</sup> La ning a mot i solsolong la, ning la oroi e Iesu lar punga purum namatana. Pa a motla lar kukuk mange, “U a Nat e God.” <sup>12</sup> Ika i atumarang la sur gong la atai tar tik mang, i esi.

*E Iesu i aslang pas ning a bonot pa pisir naur a aposel*

*(Mt 10:1-4; Lk 6:12-16)*

<sup>13</sup> Lamur e Iesu i han usaot na mangir, pa i kabah pas la ning i mang sur la, pa la han teteki. <sup>14</sup> I aslang pas ka ning a bonot pa pisir naur, pa i atong la a aposella. I kabah pas la sur lar han taum, pa ir sune sen la sur lar warawai ana warwara ane God. <sup>15</sup> I saran tar a rakrakai tanla sur lar kepsen a motla kusun a taraila. <sup>16</sup> Ine ning

a bonot pa pisir naur ning i aslang pas la. E Saimon ning e Iesu i saran tar ning a risana otleng e Pita. <sup>17</sup> E Jems ditas ma e Jon naur a nat e Sebedi, ning e Iesu i saran ulak a risan diau mang e Boarn-erges, a kamkamna mang naur a tena warwara, <sup>18</sup> Endru, Pilip, Batolomiu, Matiu, Tomas, Jems a nat e Alpius, pa e Tadius, pa e Saimon ning tagun a kunum Silot\*, <sup>19</sup> pa e Judas Iskariot, esaning i asobor tar e Iesu.

*E Iesu pa e Belsebul*

*(Mt 12:22-32; Lk 11:14-23; 12:10)*

<sup>20</sup> Lamur e Iesu i kas ting na rumai pa a tnan kunum a tarai kale la han teteki, pa e Iesu taum ana nuna kakak a asaerla bel la tolsot sur lar hangan. <sup>21</sup> Ning anuna mangis a tarai la longor a utna ne, la han sur lar ben pasi, anasa a tarai la mang bel ma i tostos a nuknukna. <sup>22</sup> A tena asaerla tagun a warkurai mitisa e Jerusalem, la atongi mange, “Belsebul, a lek-lek anuna motla, kaning ma o e Iesu, pa i sira kepsen a motla ana rakrakai e Belsebul.” <sup>23</sup> Pa, e Iesu i kabah la teteki, pa i warwara larlar mange, “E Satan bel ir tolsot sur ir kepsen e Satan. <sup>24</sup> Ning ta matanitu ir sarara, a matanitu ning ir tur rakrakai mangman-gasa? <sup>25</sup> Pa ning ta kabaitamana lar harum artalai tanla ot, bel ma lar kes taum. <sup>26</sup> Ning e Satan ir harum taum ana nuna tena titolla, anuna matanitu bel ir tur rakrakai, ir rarop ka.

<sup>27</sup> “Bel tik ir tol sot pas sur ir kas uting na rumai anuna ta rakrakai a barsan, pa ir los pas a ututnala mitisau na rumai, ning bel ir dot akes nigon tari. Ning ot ir dot nigon tari, ir bot los a ututnala anuna barsan ning. <sup>28</sup> A atong momoli ta mulo: E God ir kepsen

\* **3:18:** Silot i a rising ning di atong a kunum a tarai ning la harum taum ana matanitu Rom sur lar langolango.

a toltol laulau anuna taraila, pa nunla na warwara laulau o e God.<sup>29</sup> Ika ning tik ir atong laulau a Talngan Tabu, bel tik ulak ma ir kepsen pasi. A toltol laulau ning ir tur tikin.”<sup>30</sup> E Iesu i atongi manglarne anasa la atongi ono mang, “A mot kaning ono.”

*Tana e Iesu taum ana tastasnala*  
(Mt 12:46-50; Lk 8:19-21)

<sup>31</sup> E tana e Iesu pa na tastasna la hanot, la tur tumo lapiu pa la arsune suri. <sup>32</sup> A kunum a tarai la kes talilis pasi pa la atai i mang, “E tnam pa na tastasim la ne lapiu. La tai sur u.” <sup>33</sup> Pa i deken la mang, “Esi e nang, pa esi la na tastasik?” <sup>34</sup> Pa i tai tetek la rop ning la kes talilis pasi. Pa i atongi larne, “Oroi, la ne, e nang pa na tastasik. <sup>35</sup> Anasa esining i sira mur a nuknuk e God, i ka ning a tasik barsan, pa a tasik hane pa e nang.”

## 4

*A warwara larlar ana tena omomai*  
(Mt 13:1-9; Lk 8:4-8)

<sup>1</sup> E Iesu i tur ulak pas a asasaer tumokorot na puka tasi. Pa a tnan kunum a tarai la tur talilis pasi. Pa i kas uting na mon pa i kes sa na puka tasi. A tnan kunum a tarai rop la tur tumo korot na hang. <sup>2</sup> Pa i asaer la ana galis a utna ana warwara larlar. I asaer la mange, <sup>3</sup> “Longor! A tena omomai i han sur ir sapran a pat a witla. <sup>4</sup> Ning i sapran amon la, dingla la punga ting na ngas pa a manila la rowoi ot pa la ien sen la. <sup>5</sup> Dingla otleng la punga ting na pukna ning i hatat, pa belal galis a piu ono, pa la gomo kapit, anasa a piu bel i but. <sup>6</sup> Ika ning a Kamis i sasai ot, la main pa la marang rop, anasa belal wakirinla. <sup>7</sup> Dingla na patna otleng la punga tar ting na tinine rosrosla, pa a rosrosla la gomo ot pa la rau alar pas la, pa

bel la wai. <sup>8</sup> Pa dingla na patna otleng la punga ting na wakak a piu. La gomo pa la itna amon pa la wai, dingla natol a bonot a wanala, dingla diono na bonot, pa dingla takai a mar.” <sup>9</sup> Lamur e Iesu i mang, “Esining a talngana kaning, i wakak ning ir longor ono.”

*E Iesu i asaer ana warwara larlar tetek a tarai rop*  
(Mt 13:10-17; Lk 8:9-10)

<sup>10</sup> Ning e Iesu kama taum ana ning a bonot pa pisir naur a kakak a asaer pa dingla na tarai la kes, la dekeni ana warwara larlarla. <sup>11</sup> Pa i atai la mang, “E God ka saran tar a tastasim ta mulo sur mulor talapor ana ututnala ana nuna matanitu, ning nating i kes kumna. Ika tetek a tarai masuk, dir asaer la ona utnala rop ana warwara larlar, <sup>12</sup> sur, ‘lar oroi pa lar oroi, ika bel lar oroi lalani, lar longori pa lar longori, ika bel lar longor lalani, pa bel lar tastasmai ono. Ngandek ning lar oroi lalani pa lar mananos, pa, lar ulak tetek e God, pa ir kepsen a toltol laulau anunla.’”

*E Iesu i pak a kamkama warwara larlar ana tena omomai*  
(Mt 13:18-23; Lk 8:11-15)

<sup>13</sup> Pa e Iesu i deken la mange, “Bel mulo talapor ana kamkama warwara larlar ne? Mulor tasman mangamangasa a kamkama ana dingla na warwara larlar otleng? <sup>14</sup> A tena omomai i arlar ana tena warawai ning i asaer ana warwara ane God. <sup>15</sup> A pat a witla ning la punga ting na ngas, la arlar ana tarai ning la longor a warwara, pa e Satan i hanot, pa i kepsen a warwara miting na balanla. <sup>16</sup> Dingla na tarai otleng la arlar ana pat a witla ning la punga ting na pukna ning i hatat. Ning la longor a

warwara la tong akesi ana gas-gas. <sup>17</sup> Ika a warwara bel i kes rakrakai ting na balanla, bel lar tur rakrakai arlar ana witla ning belal wakirinla. Ning a mama-hatla ir hanot, pa dir alaulau la ana warwara ning la tortorot ano, lar punga kapit. <sup>18</sup> Dingla na tarai la arlar ona pat a witla ning la punga tar ting na tinine rosrosla. La longor a warwara, <sup>19</sup> ika a nuknukinla sur a wakak a keskes te lapiu, pa nuknuk otleng sur anunla na gongon ning i asongo a nuknukinla, pa a nuknuk sur a ututnala masik, la rau alar a warwara ane God, pa bel i wai. <sup>20</sup> Dingla na tarai la arlar ana pat a witla ning la punga ting na wakak a piu. La longor a warwara pa la muri, pa la wai, dingla na tarai natol a bonot, dingla na tarai diono na bonot, pa dingla na tarai otleng takai a mar.”

*A warwara larlar ana lam  
(Lk 8:16-18)*

<sup>21</sup> Pa e Iesu i atai la mange, “Bel tik ir los pas ta lam pa ir aroh alari ana paket, pa bel ir suah i otleng ting nahai a logo. Ir suah i ot saot na turtur ngasna. <sup>22</sup> A ututnala rop ning i kes kumna, lamur ir kes puasa. Pa a ututnala rop ning di bunuri, lamur ir hanot talapor. <sup>23</sup> Esining a talngana kaning, i wakak ning ir longor ono.” <sup>24</sup> E Iesu i atai la mange, “Mulor nuknuk wakak ana sa ning mulo longori. Ning mulor longor wakak, dir saran a wakak a tas-tasman ta mulo. Pa mulor kibasi ir itna kol. <sup>25</sup> Esining i tong akes anuka asasaerla, dir tabar ulaki ana wakak a nuknuk, pa tik ning bel i tong akes anuka asasaerla, dir kepsen otleng anuna siklik wakak a nuknuk kusuni.”

*A warwara larlar ana pat a witla ning la gomo*

<sup>26</sup> E Iesu i atongi otleng mange, “A matanitu ane God i arlar ana

barsan ning i sapran tar a pat a witla ting na kabalapiu. <sup>27</sup> Ning i borbor ana moromla pa i sira mata ana kabakiarla, a pat a wit la pusa ot pa la gomo, pa a barsan bel i tasmani mang la pusa ot pa la gomo mangmangasa. <sup>28</sup> A piu ot i agomo a rakai a wit larne: a pakana i pusa nigo, pa lamur a sarna i gomo ot, pa a patna i mur ot. <sup>29</sup> Ning a patnala ka makos pa a kalang a sol ka hanot, a barsan ir pirat pas la.”

*A warwara larlar ana pat a mastad*

*(Mt 13:31-32, 34; Lk 13:18-19)*

<sup>30</sup> E Iesu i atai la mange, “Ar larlar a matanitu ane God ana sa? Pa esi na warwara larlar ar papak ono? <sup>31</sup> I arlar ana pat a mastad. I natarna kol tana pat a rakai rop, ning di omani ting na kabalapiu. <sup>32</sup> Ning di ka oman tari, pa i gomo, i itna kol tana rakai a hanganla rop pa i suah sarara a tatatnan rakrakana, pa a manila la sira tol pios saot na rakrakana ning i mol-mol.”

<sup>33</sup> E Iesu i warwara tetek la ana galis a warwara larlar ning i arlar ana nunla na mananos, <sup>34</sup> pa bel i warwara tetek la ana ta maskan a warwara, a warwara larlar rop ka. Pa ning la kama taum ana nuna kakak a asaer lar kes, ir papak bot ana kankama warwara larlarla.

*E Iesu i sairas a top pa a wuwu  
(Mt 8:23-27; Lk 8:22-25)*

<sup>35</sup> Ning a rah ma ana pukakiar ning, e Iesu i atai anuna kakak a asaerla mang, “Dalar han lakai utumo na ris a puka tasi.” <sup>36</sup> La kas tetek e Iesu ting na mon, pa la han kusun a kunum a taraila. Pa dingla na mon otleng la han taum onla. <sup>37</sup> Pa a rakrakai a wuwu i hanot, pa a top i song a mon pa siklik ir murung. <sup>38</sup> E Iesu i borbor tumo lamur ana mon pa i ululnge ana pilo. A kakak a asaer la amata i, pa la atai i mange, “Tena Asaer,



dala kar hirua! Mangmangasa, bel u ngara ondala?”<sup>39</sup> Pa i kamtur, i sairas a wuwu, pa i atai a top, “Ur manah! Ur mililo.” Pa a wuwu i manah pa a tasi i mililo rop.<sup>40</sup> E Iesu i atai la mange, “Sur asa ning mulo matmataut? I mangasa, belot mulo tortorot?”<sup>41</sup> La matmataut kol, pa la deken artalai la mange, “Esi na ngas a barsan ne, sur a wuwu pa a top diar longor tana?”

## 5

*E Iesu i kepsen a motla kusun ning a barsan*

(Mt 8:28-34; Lk 8:26-39)

<sup>1</sup> E Iesu taum ana nuna kakak a asaerla la sot ting na ris a puka tasi Galili, ting na papar anuna tarai Gerasa. <sup>2</sup> Ning i purum kusun a mon, ning a barsan miting na kulam a minatla, ning a mot i solong tari, i han barati. <sup>3</sup> A barsan ning i laun ka ting na kulam a minatla. Bel tik i tolsot sur ir dot akes pasi, a sen otleng bel i toh pasi. <sup>4</sup> Di sira dot naur a kuna pa a naur a hana ana senla, ika i sira dat kutus ka a sen kusun naur a kuna, pa i sira sai siksiklik a sen miting na naur a hana. Pa bel tik ir amolmol pasi. <sup>5</sup> Pa i sira kukuk mokos ana hiakamisla pa ana moromla ting na kulam a minatla, pa ting na mangirla otleng, pa i kotkot a palaonala ana hatatla. <sup>6</sup> Ning i oroi bakbak pas e Iesu, i dun teteki pa i kes ana naur a bokon na hana salanigo tana. <sup>7</sup> A barsan ning i kukuk kol mange, “Iesu, a Nat e God a Leklek Kol, asaning ur toli hok? A nunung u ana risana e God sur gong u akadik iau.” <sup>8</sup> I atongi larne, anasa e Iesu ka atai tari mang, “U a mot, purum kusun a barsan ne!” <sup>9</sup> Pa e Iesu i dekeni mange, “Esi na risam?” I kelesi mang, “A risak a liur a mot, anasa mila galis kol.” <sup>10</sup> Pa i nunung

rakrakai e Iesu sur gong i sune sen la kusun a pukna ning.

<sup>11</sup> A tnan liur a boroi la hangan ting na mangir ning i milau. <sup>12</sup> A motla la nunung rakrakai e Iesu mang, “Ur sune mila tetek a boroila sur milar kas uting onla.” <sup>13</sup> E Iesu i malmaling sen la. La purum kusun a barsan ning, pa la kas tar ana boroila. A boroila la liu purum uting na palis sur utumo na puka tasi, pa la dom rop. A boroila rop i arlar ana naur a rip.

<sup>14</sup> La ning la tai alar a boroila, la dun ulak, pa la atatai ana utna ne ting na hanua anunlai pa dingla na hananuala otleng. Pa a tarai la han sur lar oroi asaning i hanot. <sup>15</sup> Ning la hanot tetek e Iesu, la oroi a barsan ning a kabaliur a motla la ka purum tar kusuni. Kaning i kes, ka pipis pas pa ka mananos ulak. Pa la matmataut. <sup>16</sup> La oroi asaning e Iesu i toli, pa la atai a tarai ana utna ning i hanot ana barsan ning a motla la solong tari, pa ana boroila otleng. <sup>17</sup> Lamur la nunung ongongos e Iesu sur ir han kusun anunla papar.

<sup>18</sup> Ning e Iesu i kas ana mon, a barsan ning a motla la solong tari, i nunung e Iesu sur diar armuri. <sup>19</sup> Ika e Iesu bel i malmaling, i atai i ka mange, “Ur han uting na num a rumai tetek a maimla, pa ur atai la ana tnan utna ning a Leklek ka tol tari hom, pa ana nuna marmaris tetek u.” <sup>20</sup> Pa i han, pa i warwara amon utumo na papar Dekapolis\* ana tnan utna ning e Iesu ka tol tari onoi. Pa a tarai rop la kulkulan.

*E Iesu i alangolango pas ning a hane pa i alaun pas a nat e Jairus*

(Mt 9:18-26; Lk 8:40-56)

<sup>21</sup> E Iesu i kas ana mon pa i ulak uto na ris a puka tasi. Ning i kes tumokorot, a tnan kunum a tarai

\* 5:20: Dekapolis a kamkamna mang ning a bonot a tatatnan hanua.

la atalilis pasi. <sup>22</sup> Ning a ning-nigo tagun a rumai lotu a risana e Jairus, i hanot. Ning i oroi e Iesu, i punga na hanrawai salanigo tana. <sup>23</sup> Pa i nunung kol mange, “A natuk hane, milau ir mat. Lamut, dar han pa ur suah naur a kum saot ono, sur ir langolango ulak pa ir laun.”

<sup>24</sup> Ning dia han taum, a kunum a tarai la mur e Iesu, pa la tur alar pasi.

<sup>25</sup> Ning a hane tingia i sasam ana tinsaman a suluk. Ka sasam pas ning a bonot pa pisir naur a rau.

<sup>26</sup> Ka han pas tetek a galis a doktala sur lar nangani, ika la saran a tnan kankan teteki pa la amus pas anuna mani. I rakrakai kol ma a tinsaman ning ono. <sup>27-28</sup> Ning

i longor a warwara o e Iesu, i nuki mang, “Ning ar tuk ka anuna kaen ar langolango ulak.” Pa i han tumo lamur tana na tinine kunum a tarai, pa i tuk anuna saket. <sup>29</sup> Pa a suluk i suah kakat, pa a hane ning i kilang a palaona mang a tinsaman ka rop. <sup>30</sup> Ning e Iesu

i kilangi mang a rakrakai i han kusuni, i talingir na tinine kunum a tarai, pa i deke mange, “Esining i tuk anuka kaen?” <sup>31</sup> Anuna kakak a asaer la atai i mang, “U oroi ot a kunum a tarai ne la tur talilis pas u, sur asa ning u kabah mang, ‘Esining i tuk iau?’ ” <sup>32</sup> Ika e Iesu i tatatai taltal sur esining i tuk tari. <sup>33</sup> A hane ning i matmataut, pa i koloron, anasa i tasman a utna ning i hanot ono. I han tetek e Iesu, i punga salanigo tana, pa i atong puasa a utna ning ka tol tari. <sup>34</sup> Pa e Iesu i atai i mange, “Natuklik, anuma tortorot ka alangolango pas u. Ur han taum ana bal molmol, anuma tinsaman ka rop.”

<sup>35</sup> Kaning ot e Iesu i warwara, dingla na tarai la hanot miting na rumai ane Jairus, pa la atai i mang, “Sur asa ning u amolot a Tena Asaer? E natum hane ka mat.”

<sup>36</sup> E Iesu i longor warwara ning, i atai ka e Jairus mang, “Gong u matmataut. Ur tortorot ka.” <sup>37</sup> Bel i malmaling pas tik sur ir muri, ika i ben pas e Pita, e Jems ditas ma e Jon. <sup>38</sup> Pa ning la hanot ting na rumai ane Jairus, e Iesu i longor a totbor, pa aregaia na domos. <sup>39</sup> I kas pa i atai la mange, “A totbor pa tintinangis na sa ining? A kaklik ning bel i mat, kaning i borbor duman ka.” <sup>40</sup> La malani ka. I sune purum sen la rop, i ben pas a tamana kaklik pa e tana, pa ditol otleng ning ditol han taum ono, pa la kas tetek a kaklik. <sup>41</sup> E Iesu i tong pas a kuna kaklik hane ning, pa i atai i mange, “Talita koum!” A kamkama warwara ne, “Hanelik, a atai u, ur kamtur.” <sup>42</sup> Aiapka i kamtur pa i han taltal. A hanelik ning ka takai a bonot pa pisir naur a rau anunai. Pa la kulkulan kol. <sup>43</sup> E Iesu i sairas rakrakai tar la sur gong la warwara ana utna ne. Pa i atai la sur lar tabar a hanelik ning.

## 6

*A tarai Nasaret bel la tortorot o e Iesu*

*(Mt 13:53-58; Lk 4:16-30)*

<sup>1</sup> E Iesu taum ana nuna kakak a asaer la han mitingia pa la hanot ting na hanua ane Iesu. <sup>2</sup> Ana Pukakiar Sabat i asaer a tarai la ting na rumai lotu, pa a galis a tarai ning la longori la kulkulan kol, pa la kabah mang, “A barsan ne i kibas a tastasmala ne taha ia? Esi na ngas a tastasman ning di ka saran tari tana sur ir tol a tatatnan utna na kulkulan?” <sup>3</sup> I a tena tol rumai ka, a nat e Maria. Na tastasna otleng, e Jems, Josep, Judas pa e Saimon, pa na tastasna hane kanet ka dala laun taum.” Pa bel la gas ono. <sup>4</sup> E Iesu i atai la mang, “Di sira hanrawai a propet ting na hanua masik, ika la ot ting na hanua ngasna, na mainala pa la ot ting na rumai ngasna bel la hanrawai i.” <sup>5</sup> E Iesu bel i tolsot pas al galis a utna na kulkulan tingia,

ika i suah naur a kuna ana dingla na tinsaman, pa i alangolango pas la. <sup>6</sup> Pa e Iesu i kulkulan mang bel la tortorot ono.

*E Iesu i sune sen ning a bonot pa pisir naur a kakak a asaerla*

(Mt 10:5-15; Lk 9:1-6)

Lamur e Iesu i han ting na hanhanuala pa i asaer a taraila. <sup>7</sup> I kabah pas ning a bonot pa pisir naur a kakak a asaerla, pa i sune naunaur onla, pa i saran tar a rakrakai tanla sur lar kepsen a motla. <sup>8</sup> I atai la mang, "Gong mulo los tar al utna ting na numulo a tinan, mulo los ka a bulse. Gong mulo los al utna na hangan, gong ta bek pa gong mulo los tar al mani ting na bak. <sup>9</sup> Mulo han ka ana su ting na ham mulo, pa gong mulo los al kelkeles." <sup>10</sup> I atai la otleng mange, "Ning mulor kes ting na ta rumai, mulor kes ot tingia tuk ana pukakiar ning mulor han kusun a hanua ning. <sup>11</sup> Ning ta hanua bel lar gasgas pas mulo, pa bel lar longor anumulo na warwarala, ning mulor han kusun a hanua ning, mulor tang sen a kubus kusun a hamulo, sur a asilang na tumarang tetek la."

<sup>12</sup> Pa la han pa la warawai tetek a taraila sur lar lingir a nuknukinla. <sup>13</sup> La kepsen a galis a mot, la sabar a galis a tinsaman ana wel, pa la alangolango pas la.

*E Herot i nuki mang e Iesu i ka e Jon*

(Mt 14:1-2; Lk 9:7-9)

<sup>14</sup> E King Herot i longor a warwara o e Iesu, anasa a tarai la rop la ka tasman e Iesu. Dingla la atongi ono mang, "A barsan ne e Jon a Tena Baptais, ka laun ulak kusun a minat. I maining i tol a ututnala na kulkulan." <sup>15</sup> Dingla la mang, "Ai e Elaija." Dingla otleng la atongi ono mang, "E Iesu i ning a propet arlar ana propetla tagun nating." <sup>16</sup> Ika ning e Herot

i longor a ututnala ne o e Iesu, i atongi mange, "Ia ka umsem tar ana ruana e Jon, pa ne ka laun ulak kusun a minat!"

*E Herot i umsem a pukul e Jon a Tena Baptais*

(Mt 14:3-12)

<sup>17-18</sup> Lanigo e Herot i sune sen anuna tena harumla pa la tong pas e Jon, la doti pa la akasi ting na rumai a dodot. E Herot i toli larne anasa e Jon ka usur tari ono mang, "Bel i tostos ning u taulai e Herodias, e harimlik."

E Jon i atongi larne anasa e Herot ka dat pas e Herodias, a hane ane Pilip e tasnalik, pa i taulai i. <sup>19</sup> E Herodias i nget e Jon pa i mang sur ir umkoli anasa i warwara on diau ana nundiau a tinaulai. Bel i tolsot pasi sur ir umkoli, <sup>20</sup> anasa e Herot i matatan e Jon, pa i tasmani mang i a wakak a barsan pa a tena tostos. Pa e Herot i tai alar e Jon. I gas sur ir longor anuna na warwara, maika i loklokron a nuknukna ono.

<sup>21</sup> E Herot i nuk pas a pukakiar ning di agoni ono, pa i tol a tnan ngasa. Io, e Herodias i nuk pas ning a ngas sur dir umkol e Jon. E Herot i tol a tnan ngasa sur a ningnigola tagun anuna matanitu, pa a ningnigola anuna tena harumla, pa ningnigola mitisa e Galili. <sup>22</sup> Ning la kes ana ngasa, e nat na hane Herodias i kas pa i tortor tanla. E Herot pa a taraila ning la hangan taum ano, la gas kol ono. Pa i atai a basbas ning mange, "Ar tabar u ana ta utna ning ur mang suri tak." <sup>23</sup> Pa i lele rakrakai tana mange, "Asa kama ning ur nunung iau suri ar sarani ka. Ning ur nunung iau sur ta tuk a matanitu ar sarani ka." <sup>24</sup> Pa i han tetek e tana pa i dekeni mang, "Asa ning ar nunung suri?" E tana i kelesi mang, "Ur nunungi sur a pukul e Jon a Tena Baptais." <sup>25</sup> Aiapa ka a basbas ning i kas tektek e King

Herot, pa i atai i mange, “Ano otna e mang sur ur suah a pukul e Jon a Tena Baptais ting na ta pelet pa ur sarani tak.”

<sup>26</sup> A king i bal maris kol. Ika bel ma i tolsot sur ir ngongoio, anasa ka lele tar mang asa kama ning ir nunung suri, ir sarani ka, pa a tarai ning la kes taum ano ana ngasa, la ka longor tar anuna warwara. <sup>27</sup> I sune kapit ning a tena harum sur ir los tar a pukul e Jon teteki. A tena harum i kas uting na rumai a dodot, pa i umsem ana pukul e Jon. <sup>28</sup> I suahi ting na pelet pa i sarani tana basbas, pa i sarani ta e tana. <sup>29</sup> Pa ning a kakak a asaerla ane Jon la longori, la hanot pa la los pas a minatna pa la akasi ting na kulam a minat.

*E Iesu i tabar dilima na rip a tarai*

(Mt 14:13-21; Lk 9:10-17; Jn 6:1-14)

<sup>30</sup> Pa a aposella, la atalilis pas e Iesu, pa la atai i ana ututna rop ning la ka tol tari, pa la ka asaer tar a taraila ono. <sup>31</sup> Pa e Iesu i atai la, “Mulo lamut, dalar han sur a hanua bel, sur mulor manah pas.” I atongi larne anasa a galis a tarai la hananot, pa bel ta pukakiar sur e Iesu pa nuna aposella lar hangan ono. <sup>32</sup> Pa la kas ana mon pa la han uting na hanua bel. <sup>33</sup> A galis a tarai ning la oroi pas a mon, la oroi lalan pas e Iesu taum ana nuna kakak a asaerla. La dun kusun a hananuala, pa la nigo ot uting na pukna ning lar sot ono. <sup>34</sup> Ning e Iesu i sot tingia, i oroi a tnan kunum a tarai. I maris kol la, anasa la arlar ana sipsipla ning bel ta tena tai alar anunlai. Pa i turpasi sur ir asaer la ana galis a ututnala. <sup>35</sup> Ning ka rah anuna kakak a asaerla la han teteki, pa la atai i mange, “A hanua bel ka ine, pa ka rah otleng. <sup>36</sup> Ur sune sen a taraila ne sur lar han uting anal hananua milau, pa tatatnan

hanua otleng sur lar lou pas al utna na hangan sur lar ieni.”

<sup>37</sup> E Iesu i keles la mange, “Mulo ot mulor tabar la.” La atai i mang, “Ning milar tabar la, ir arlar ana arlou tagun a siwal a kalang. Man-gasa, milar sai a tnan mani ne?” <sup>38</sup> E Iesu i deken la mang, “Naisa bret kaning mulo losi? Mulor han pa mulor tai.” Ning la ka talapor pas, la atai e Iesu mang, “Dilima na bret pa naur a sis.”

<sup>39</sup> Pa e Iesu i sune anuna kakak a asaerla sur lar atai a taraila, sur lar kes ana taktakai kunum ting na ulai. <sup>40</sup> Pa la kes ana taktakai kunum, dingla na kunum taktakai a mar, pa dingla dildilima na bonot. <sup>41</sup> Pa e Iesu i kibas pas dilima na bret pa naur a sis, i tadai usaot na langit, i atong wakak tetek e God onoi. I kibik dilima na bret, pa i sarani tana nuna kakak a asaerla sur lar asalar a taraila ono. I tabar la otleng ana naur a sis. <sup>42</sup> La rop la hangan pa la masur. <sup>43</sup> Pa la song bukus pas ning a bonot pa pisir naur a rat ana mah na bret pa sis. <sup>44</sup> A wawas ana tarai ka i arlar ana dilima na rip, ika a gurarala pa kakakla otleng la hangan taum onla.

*E Iesu i han saot na palai a tasi*  
(Mt 14:22-23; Jn 6:15-21)

<sup>45</sup> Aiapiap ka e Iesu i sune sen anuna kakak a asaerla sur lar kas ana mon pa lar nigo utumo e Bet-saida tumo na ris a puka tasi. Pa i, i kes ot sur ir sune sen a tarai. <sup>46</sup> Ning a tarai la ka han sarara, e Iesu i han usaot na mangir sur ir nunung. <sup>47</sup> Ning ka rah morom, a mon i han poter a puka tasi, pa e Iesu kama kaning i kes tumo korot latasi. <sup>48</sup> E Iesu i oroi la mang ka tekes la ana ulusu, anasa a wuwu i harum misa lanigo. Ana lar, e Iesu i han saot na palai a puka tasi tetek la. Pa siklik ir han bolos la. <sup>49</sup> Ning la oroi pasi ning i han saot na palai a puka tasi, la nuki mang

a ingun, pa la kukukuk, <sup>50</sup> anasa la rop la oroi, pa la matmataut kol. Pa e Iesu i warwara kapit tetek la mang, “Mulor kosom, iau ka ne. Gong mulo matmataut.” <sup>51</sup> Ning e Iesu ka kas tetek la uting na mon, a wuwu i rop kakat. Pa la kulkulan kol, <sup>52</sup> anasa bel la tastasman wakak ana utna na kulkulan ning e Iesu ka tol tari ana dilima na bret pa naur a sis. Anasa bel la mang sur lar kibasi.

*E Iesu i alangolango a tinsamanla tumo e Genesaret (Mt 14:34-36)*

<sup>53</sup> Ning la ka han lakai tumo na ning a ris a puka tasi, la sot tumo na papar Genesaret pa la dot akes tar a mon. <sup>54</sup> Ning la purum kusun a mon, a tarai la oroi lalan kapit pas e Iesu. <sup>55</sup> La dun sur a tinsamanla ting na hananuala rop ting na papar ning. Pa ning la longori mang e Iesu kaning i kes ting na ta hanua, la los a tinsamanla ana logola sur a hanua ning. <sup>56</sup> Ana nanatar a hanhanua pa tatatnan hanhanua ning e Iesu i han ia, la aborbor a tinsamanla ting na arpotor a hanua. Pa tinsamanla la nunung e Iesu sur lar tuk tar ka a tuka kaen anunai. La rop ning la tuk tari la langolango.

## 7

*A tarai la atarna sen a warwara ane God (Mt 15:1-9)*

<sup>1</sup> A Parisaiola pa tena asaerla tagun a warkurai misaot e Jerusalem, la han taum tetek e Iesu, <sup>2</sup> pa la oroi dingla na kakak a asaer ane Iesu, la hangan ka ana dur a kunla, bel la gos nigon pas a kunla. <sup>3</sup> A Parisaiola pa a tarai Juda rop bel lar hangan ning bel la gos kunla, anasa la sira mur a asaerla ana anundala a tarai tagun nating. <sup>4</sup> Ning la ulak miting na pukna na sisiurai, lar gos nigon pas ot a kunla, lamur

lar hangan. Galis a utna otleng lar toli, lar gos a kapla, a kurola pa a ketella. <sup>5</sup> A Parisaiola pa tena asaerla tagun a warkurai la deken e Iesu mang, “Sur asa ning anuma kakak a asaerla bel la mur a asaerla ana nundala a tarai tagun nating? La hangan ka ana dur a kunla.” <sup>6</sup> Pa e Iesu i keles la mange, “A warwara ane Aisaia i momol ot, ning i warwara na propet nigo tar o mulo a tena asasongola mang,

‘A tarai ne la hanrawai iau ka ana pahanla, ika a balanla i bakbak kol kusun iau.

<sup>7</sup> La lotu oros ka tetek iau, anasa la asaer a taraila ana warkuraila anuna taraila ka.’

<sup>8</sup> Mulo ka han kusun tar a Warkuraila ane God, pa mulo mur kama asasaer anuna taraila.”

<sup>9</sup> Pa e Iesu i atai la mange, “A momolna ot, mulo longor orsan a warkurai ane God, sur mulor mur a asaerla ana numulo a tarai tagun nating. <sup>10</sup> E Moses i atongi mange, ‘Ur hanrawai e tamam pa e tnam.’ *Kisim Bek 20:12*

Pa i atongi otleng mang, ‘Esining ir warwara laulau o e tamana pa e tana dir umkoli.’ *Kisim Bek 21:17*

<sup>11</sup> Ika mulo, mulo asaer a taraila mang, i wakak ka ning tik ir atai e tamana pa e tana mang, ‘Asaning ar nangan mu ono, ia ka saran tari tetek e God.’ <sup>12</sup> Ana asaer ning, mulo sairasi sur gong i nangan e tamana pa e tana. <sup>13</sup> Ning mulo toli larning, mulo anatarna pas a warwara ane God, pa mulo mur ot a asaerla ning mulo kibasi tana numulo na tarai tagun nating. Pa a galis a ututna otleng larne ning bel i tostos mulo toli.”

*A ututna ning ir adur tik namatana e God (Mt 15:10-20)*

<sup>14</sup> E Iesu i kabah ulak a kunum a tarai teteki, pa i atongi mang,

“Mulo rop mulor longor iau, pa mulor talapor ana nuka warwara. 15-16 Asaning tik ir ien pasi pa i kas ting na balana, bel ir aduri namatana e God. Ika asaning i purum kusun a nuknukna, i ning ir aduri namatana e God”.\*

17 Ning e Iesu i han kusun a kunum a taraila, pa i kas uting ui na rumai, anuna kakak a asaer la dekeni ana warwara larlar ne. 18 Pa i atai la mange, “I mangasa bel mulo talapor? I mangasa bel mulo tasmani mang a ututnala rop ning i kas ting na balan tik, bel ir aduri namatana e God? 19 Anasa bel i kas uting na nuknukna, i kas ka uting na balana pa ir kepseni.”

Ning i atong a warwara ne, i atong talapori mang a utna na hangan rop i wakak. 20 I atongi otleng mange, “A utna ning i purum pas miting na nuknukin tik, i ning ir aduri. 21 Ine a ututnala ning i sira purum miting na nuknuk a taraila: A nuknuk laulau, na toltol a pamuk, a kinkinau, umkol a mainla, a toltol laulau ana ta hane anuna tik o ta barsan anuna tik, 22 a toltol a muk, a laulau a ginina, a asasongo, toltol na tintaulai pa bel ta meme ono, ram sur a ututnala, di anan saksakan tik, a toltol na aitna pa dat abarah a pukulundi pa a longlong a toltol. 23 A ututna laulaula rop ne la purum miting na nuknuk a taraila, pa ir adur la namatana e God.”

*A tortorot ana hane ning bel a hane Juda*

(Mt 15:21-28)

24 E Iesu i han mitingia, pa i hanot milau a hanua Tair. I kas uting na ning a rumai. Bel i mang sur tik ir tasmani, ika bel i tolsot sur ir mumun. 25 Ning a hane,

a natna hane a mot kaning ono. Ning i longor a warwara o e Iesu, aiapka i han pa i punga tuntudu salanigo ta e Iesu. 26 A hane ning, i a hane Ponisia miting na papar Siria, belsur a hane Juda. I nunung e Iesu sur ir kepsen a mot kusun e natnalik.

27 Pa e Iesu i atai i mang, “Dir tabar masur nigon a kakakla. Bel i tostos sur dir los pas a utna na hangan ana kakakla pa dir minggeni tana papla.” 28 Pa a hane i kelesi mang, “Leklek, a momolna ot ning. Ika a papla otleng ting nahai logo, la sira ien a mumut a utna na hangan ana kakakla.”† 29 Pa e Iesu i atai i mange, “Ananum a wakak a arkeles, ur hanka, a mot ka purum tar kusun e natumlik.” 30 Ning a hane i ulak, i oroi e natnalik, kaning i borbor tar ting na logo ngasna. A mot ka purum kusuni.

*E Iesu i alangolango pas a talnganakutkut pa a ngatlau*

31 E Iesu i han kusun a hanua Tair pa i han potor e Saidon sur a puka tasi Galili, pa i hanot ting na papar Dekapolis.‡ 32 A taraila ben pas ning a barsan a talnganakutkut tetek e Iesu, pa la nunungi sur ir suah a kuna ono. 33 E Iesu i ben masik pasi kusun a kunum a tarai, pa i suah naur a pitlai kuna ting na naur a talngana barsan ning. Lamur i namis pas, pa i tong a laigerem a barsan ning. 34 I tadai usaot na langit, i los wuwu pas, pa i atai i mang, “Epata!” A kamkamna mange: “Ur Sapang!” 35 Pa a talngana i talapor, a laigeremna i tapalas pa i warwara talapor kakat. 36 Pa e Iesu i sairas rakrakai a taraila sur gong

\* 7:15-16: Dingla na tena mananos ana Buk Tabu la nuki mang dingla na warwara otleng i kes te na ves ne, i manglarne: ‘Esining a talngana kaning, i wakak sur ir longor ono.’ † 7:28: A kakakla i warwara larlar ana tarai Juda. Pa a papla i warwara larlar ana taraila ning bel a Judala. A utna na hangan i warwara larlar ana sa ning e Iesu i toli tetek a tarai Juda. ‡ 7:31: Dekapolis a kamkamna mang ning a bonot a tatatnan hanua.

la atai tar tik ono. Ika ning i sairasa la, bel la longor pasi, a warwara ono i han sarara ka. <sup>37</sup> La ning la longor a utna ne, la kulkulan kol ono, pa la atongi larne, “E Iesu i tol wakak pas a ututnala rop. I awakak pas a talngana kutkutla sur lar longor, pa a ngatlaula sur lar warwara!”

## 8

*E Iesu i tabar diat a rip a tarai*  
(Mt 15:32-39)

<sup>1</sup> Na tinine pukakiarla ning, a tnan kunum a tarai la hanot taum, pa belal utna na hangan sur lar ieni. E Iesu i kabah pas anuna kakak a asaerla teteki pa i atai la mang, <sup>2</sup> “A maris kol a taraila ne, anasa la ka kes taum hok te natol a pukakiar, pa belal utna sur lar ieni. <sup>3</sup> Ning ar sune sen la sur anunla na hanhanua taum ana munurak, lar suah mat ting na ngas, anasa dingla onla, la hanot miting na bakbak.”

<sup>4</sup> Anuna kakak a asaer la dekeni mang, “Mitaha al utna na hangan sur dalar tabar la ono? Anasa a hanua bel ka ine.” <sup>5</sup> E Iesu i deken la mang, “Naisa bret ning mulo losi?” La kelesi mange, “Dionomahis ka.”

<sup>6</sup> E Iesu i atai a kunum a tarai sur lar kes ting na piu. I kibas pas mais a bret, i atong wakak pas onoi tetek e God, i tibiki pa i sarani tana anuna kakak a asaerla, sur lar tabar a taraila ono. Pa la tol soti. <sup>7</sup> La los pas naisa na nanatara sis otleng, pa i atong wakak pas ono, pa i sarani sur lar asaurani tana taraila. <sup>8</sup> A tarai la hangan pa la masur. Lamur a kakak a asaer la song bukus pas mais a rat ana mah a utna na hangan. <sup>9</sup> A wawas ana tarai ka i arlar ana diat a rip, ika a gurarala pa kakakla otleng la hangan taum onla. Pa lamur e Iesu i sune sen la. <sup>10</sup> E Iesu taum ana nuna kakak a asaer la

kas uting na mon, pa la han utumo na papar Dalmanuta.

*A Parisaiola la nunung e Iesu sur ir tol ta utna na kulkulan*  
(Mt 16:1-4)

<sup>11</sup> A Parisaiola la hanot tetek e Iesu pa la arlak na warwara tataum ono. La mang sur lar tohi. La nunungi sur ir tol ta akinalang sur ir asangani mang i misaot na langit. <sup>12</sup> E Iesu i ngoro pa i mang, “Sur asa a tarai tagun anone la nunung sur ar tol ta akinalang? A atong momoli ta mulo, bel dir tol ta akinalang ta mulo.” <sup>13</sup> Pa i kas ulak ana mon, pa la han kusun la utumo na ris a puka tasi.

*A tumarang ana is anuna Parisaiola pa e Herot*  
(Mt 16:5-12)

<sup>14</sup> A kakak a asaer la dumani sur lar los al bret, takai sot ning la losi ting na mon. <sup>15</sup> Pa e Iesu i warwara na tumarang tetek la mang, “Mulor tumarang ana is anuna Parisaiola pa e Herot.” <sup>16</sup> Pa la warwara taum ana kamkama warwara ane Iesu, pa la atongi mang, “I atongi larning, anasa belal bret andalai.” <sup>17</sup> E Iesu i tasman anunla warwara pa i atai la mang, “I mangasa ning mulo atongi manga belal bret? Bel mulo tasmani, pa belot mulo talapor? I mangmangasa ning mulo tagar a nuknukimulo sur gong mulo kibas anuk na asasaerla? <sup>18</sup> A matamulo i kes, ika bel mulo tai ono. A talngamulo kaning ika bel mulo longor ono. Mulor nuk pasi: <sup>19</sup> Ning a kibik dilima na bret tetek dilima na rip a barsan, naisa rat ning mulo song tari ana mah a utna na hangan?” La kelesi mange, “Ning a bonot pa pisir naur.”

<sup>20</sup> Pa e Iesu i deken la mange, “Ning a tibik mais a bret tetek diat a rip a tarai, naisa na rat ning mulo song tari ana mah a utna na hangan?” La kelesi mange, “Mais a

rat.”<sup>21</sup> Pa i deken la mang, “Belot mulo talapor?”

*E Iesu i atalapor a matana kut tisa e Betsaida*

<sup>22</sup> E Iesu taum ana kakak a asaerla anunai la hanot tisa e Betsaida, pa a tarai la ben pas ning a matanakut teteki, pa la nunungi sur ir suah a kuna saot ono sur ir tai. <sup>23</sup> I tong pas a kuna kut, pa i ben maskani kusun a hanua. Ning ka namis tar naur a matana pa ka suah tar naur a kuna ono, i dekeni mang, “U ka oroi ta utna?” <sup>24</sup> Pa a barsan ning i tai tostos, pa i atongi mang, “A oroi a tarai lar a rakaila ning la han.” <sup>25</sup> E Iesu i suah ulak naur a kuna ona matanakut, pa a matana i bot talapor wakak, pa i oroi a utnala rop. <sup>26</sup> E Iesu i sune sen a barsan ning, pa i atai i mang, “Ur han tostos sur anuma rumai. Gong u han ting na tinine hanua.”

*E Pita i warwara talapor o e Iesu (Mt 16:13-20; Lk 9:18-21)*

<sup>27</sup> E Iesu taum ana nuna kakak a asaer la han uting na hananua milau Sisaria Pilipai. Ning la han amon, i deken la mang, “A tarai la atongi mang iau esi?”

<sup>28</sup> La kelesi mang, “Dingla la atongi mang u e Jon a Tena Baptais. Dingla la atong u, e Elaija, pa dingla otleng la atong u, ning a hal a propetla.” <sup>29</sup> Pa i deken la mang, “Pa mulo, mulo atong iau o esi?” Pa e Pita i kelesi mang, “U a Mesaia.” <sup>30</sup> Pa i sairas la mang gong la atai tar tik onoi.

*E Iesu i warwara talapor nigo ana minat anunai (Mt 16:21-28; Lk 9:22-27)*

<sup>31</sup> E Iesu i turpasi sur ir asaer anuna kakak a asaerla mange, “A Nat a Barsan ir kilang a galis a mamahat, pa a ningnigola, pa a leklek a tena artabarla tetek e God, pa a tena asaerla tagun a warkurai lar gilam ris kusuni pa dir umkoli. Ning natol a pukakiar ir

rop ir laun ulak.” <sup>32</sup> A warwara ne ane Iesu i talapor kol. Pa e Pita i ben masuk pasi pa i warwara rakrakai tana. <sup>33</sup> E Iesu i talingir pa i tai tetek anuna kakak a asaerla, pa i warwara rakrakai tetek e Pita mange, “Satan, ur han utumo lamur tak! Anasa u mur ka a nuknuk a tarai, pa bel u mur a nuknuk e God.” <sup>34</sup> E Iesu i kabah pas a kunum a taraila taum ana kakak a asaerla teteki, pa i atai la mang, “Ning tik i mang sur ir mur iau, gong i mur a nuknukna. Ir pamar anuna rakai kutus pa ir mur iau. <sup>35</sup> Esining i mangan alar anuna lalaun ir hirua, ika esining i noren sen anuna lalaun sur iau pa ana Wakak a Warwara otleng ir laun. <sup>36</sup> Ning tik ir tong akes a ututnala rop mite na rakrakan hanua, pa anuna lalaun ir hirua, ir wakak mangmangasa teteki? <sup>37</sup> Ir lou keles anuna lalaun ana sa? <sup>38</sup> Pa tik ning ir meme hok pa anuk na warwara namatana taun taraila ning anunla lalaun i bakbak kusun e God pa la sira tol a toltol laulau, a Nat a Barsan otleng ir meme ono ning ir hanot taum ana nuna angelola pa a matatar anune Tamana.

## 9

<sup>1</sup> Pa i atai la mang, “A atong momoli ta mulo, dingla o mulo ning mulo tur te, belot mulor mat, pa mulor oroi a matanitu ane God ir hanot taum ana rakrakai.”

*A palaona e Iesu i ries (Mt 17:1-13; Lk 9:28-36)*

<sup>2</sup> Lamur tana diono na pukakiar, e Iesu i ben pas e Pita, Jems pa e Jon, pa i ben maskan pas ditol usaot na mangir ning i tur kas. Tisaotia ditol oroi a palaona e Iesu i ries. <sup>3</sup> Anuna kaenla i pil pa i kokok rakrakai kol, pa bel tik mite lapui ir gos totoh pas ta kaen manglarning. <sup>4</sup> Pa natola kakak a asaer ditol oroi pas e Elaija pa e Moses dia hanot pa ditol warwara



taum o e Iesu. <sup>5-6</sup> Pa natola kakak a asaerla ditol matmataut kol pa e Pita bel i tasman asa ir atongi, pa i atai kama e Iesu mang, “Tena Asaer, i wakak ning dalar kes kama te. Mitol ar tol ir natol a turturup, takai anumi, takai ane Moses, pa takai ane Elaija.” <sup>7</sup> Lamur a laukap i poroi alar pas la. Pa a elngen takai misaot na laukap i atongi mang, “Ine a Natuklik, a katnan koli. Mulor longor tana.” <sup>8</sup> Aiapiap ka ditol gilam taltal, ika bel ditol oroi ulak tik, e Iesu kama kaning i tur taum on ditol.

<sup>9</sup> Ning la han purum amon misaot na mangir, e Iesu i sairas ditol sur gong ditol atai tar tik ana sa ning ditol ka oroi tari, tuk ning a Nat a Barsan ir kamtur ulak kusun a minat. <sup>10</sup> Ditol mur a warwara ning, pa ditol deken artalai ditol mang, “Asa momol a kamkamtur ulak kusun a minat?”

<sup>11</sup> Pa ditol deken e Iesu mang, “Asa kamkamna ning a tena asaerla tagun a warkurai la atongi mang e Elaija ir hanot nigo?” <sup>12</sup> I keles ditol mang, “A momolna ot, e Elaija ir hanot nigo pa ir atostos ulak a ututnala rop. Pa asa kamkamna ning di ka tumus tari ting na Buk Tabu mang a Nat a Barsan ir kilang a galis a kankan pa bel dir mang suri?” <sup>13</sup> Ika onone ar atai mutol mang e Elaija ka hanot pas, pa la tol a toltol laulaula onoi, arlar ot ana nuknukinla, lar otning di ka tumus tari onoi ting na Buk Tabu.”

*E Iesu i kepsen a mot kusun a kaklik*

(Mt 17:14-21; Lk 9:37-43)

<sup>14</sup> Ning e Iesu taum ana natol a kaklik a asaer la han purum tetek a kakak a asaerla, la oroi a tnan kunum a taraila kaning la tur talilis pas la, pa a tena asaerla tagun a warkurai kaning la arlak ana warwara taum ana kakak a asaerla. <sup>15</sup> Ning a tarai la oroi pas e Iesu, la kulkulan kol, pa la dun

barati pa la gasgas pasi. <sup>16</sup> Pa e Iesu i deken anuna kakak a asaerla mang, “Asa ning mulo arlak na warwara onoi?” <sup>17</sup> Ning a barsan miting na kunum i kelesi mang, “Tena Asaer, a ben a natuk barsan tetek u, ning a mot i kas tar onoi pa bel i tolsot sur ir warwara. <sup>18</sup> Ning a mot ne i sira umi, i sira minggen purumi ting lapiu, pa a busa na pahana i sira purum, i arngingit pa a palaona i rakrakai. A nunung anum na kakak a asaerla sur lar kepsen a mot kusuni, ika bel la tolsot pasi.”

<sup>19</sup> E Iesu i keles la mange, “Mulo na tarai tagun onone, bel mulo tortorot! Ia ka kes bongnan iau te napirim mulo. Nangse mulor tortorot? Mulor ben a kaklik ning tetek iau.” <sup>20</sup> Pa la ben pasi tetek e Iesu. Ning a mot i oroi pas e Iesu, aiapiapka i minggen purum tar a kaklik ning ting lapiu, pa i pele, pa i busa a pahana.

<sup>21</sup> Pa e Iesu i deken a taman a kaklik mang, “Nangse i turpasi?” Pa i kelesi mang, “I turpasi onoi ning ot i kaklik. <sup>22</sup> Galis a pukakiar a mot i sira minggen tari uting na iah pa uting na malum otleng sur ir umkoli. Ning ur tolsot sur ur kepsen a mot kusuni, ur maris miau, pa ur nangan miau.”

<sup>23</sup> E Iesu i atongi tana mang, “U ot! Esining i tortorot i tolsot pas a ututnala rop.” <sup>24</sup> Pa a taman a kaklik i kukuk kapit mange, “A tortorot! Nangan iau ana nuk siklik tortorot.”

<sup>25</sup> Ning e Iesu i oroi a kunum a taraila ning la dun taum, i warwara rakrakai tetek a mot mang, “U a mot, a ngat pa talnganakutkut, a atai u ur purum kusun a kaklik, pa gong ulak ma u kas onoi.” <sup>26</sup> A mot i kukuk pas, i gulen rakrakai tar a kaklik ning, pa i purum pas kusuni. A kaklik ning i arlar kama lara minat, pa galis la atongi mang ka mat. <sup>27</sup> Ika

e Iesu i tong pas a kuna kaklik, pa i dat atur pasi.

<sup>28</sup> Pa la kas uting na ning a rumai, pa anuna kakak a asaer la deken kumnani mang, “Sur asa ning bel mila tolsot sur milar kepsen a mot kusuni?” <sup>29</sup> E Iesu i keles la mang, “A ngas a mot larne ir purum ka ana nunung, bel ana ta utna otleng.”

*E Iesu i warwara ulak ana nuna minat*

(Mt 17:22-23; Lk 9:43-45)

<sup>30-31</sup> La han misaot, pa la han bolos utumo ana papar Galili. E Iesu bel i mang sur tik ir tasman a pukna ning lar kes ano, anasa i mang sur ir asaer anuna kakak a asaerla. Pa i atongi mang, “Dir saran tar a Nat a Barsan uting na kuna taraila pa lar umkoli. Pa lamur tana natol a pukakiar ir laun ulak.” <sup>32</sup> Bel la talapor ana kamkama warwara ne, pa la matmataut sur lar dekeni.

*Esining i leklek kol*

(Mt 18:1-5; Lk 9:46-48)

<sup>33</sup> La hanot utumo Kapernaum. Pa ning la kas ana rumai, e Iesu i deken la mange, “Asa ning mulo arlak na warwara ono ting na ngas?” <sup>34</sup> Ika bel la kelesi, anasa la arlak na warwara mang esi na halinla i leklek kol. <sup>35</sup> Pa e Iesu i kes pa i kabah pas anuna ning a bonot pa pisir naur a kakak a asaerla, pa i atai la mange, “Ning tik i mang sur ir leklek kol, i wakak sur ir anatarana pasi, ir tena titol ka tetek a tarai rop.”

<sup>36</sup> I ben pas ning a kaklik, pa i atur potor tari tanla. Lamur i rawan pasi, pa i atai la mang, <sup>37</sup> “Esining ir gas pas ta kaklik manglarne ana risak, i gas pas iau. Pa esining ir gas pas iau, bel i gas pas iau ka, i gas pas esaning i sune iau ute.”

*Esining bel i sairasi dala, i nangan dala ka*

(Lk 9:49-50)

<sup>38</sup> E Jon i atai e Iesu mange, “Tena Asaer, mila oroi ning a barsan i kepsen a motla ana risam, pa mila sairasi, anasa i bel a halindala.” <sup>39</sup> E Iesu i kelesi mange, “Gong mulo sairasi. Ning tik ir tol ta utna na kulkulan ana risak, bel ir atong kapit ta laulau a warwara hok. <sup>40</sup> Anasa esining bel i sairasi dala, i nangan dala ka. <sup>41</sup> A atong momoli ta mulo, ning tik ir tabar mulo ana ta kap a malum, anasa mulo ane Karisito, ir kibas ot anuna arlou.

*A utna ning i ben rongon a taraila sur a toltol laulau*

(Mt 18:6-9; Lk 17:1-2)

<sup>42</sup> “Ning tik ir ben rongon ta halin a kakakla ne ning i tortorot hok, ir laulau kol a warkurai teteki tana tik ning dir dot tar ta tnan hat ting na ruana, pa dir minggen murungi sa latasi. <sup>43-44</sup> Ning a kum ir ben rongon u, ur kutus seni. Ir wakak ning ur kas ting na lalaun tikin u a takumut ka, sur gong di minggen u taum ana naur a kum ting na tnan iah ning bel i sira mat. <sup>45-46</sup> Ning a ham ir ben rongon u, ur kutus seni. Ir wakak ning ur kas ting na lalaun tikin a takumut ka, sur gong di minggen u taum ana naur a ham uting na tnan iah.\* <sup>47</sup> Ning a matam ir ben rongon u, ur liok seni. Ir wakak ning ur kas ana matanitu ane God taum ana takai a matam ka, sakana dir minggen u taum ana naur a matam rop uting na tnan iah. <sup>48</sup> Tingia

‘a soisoila bel lar mat, pa a iah otleng bel ir mat.’ Ais

66:24

<sup>49</sup> Dir atotoh a taraila rop ana iah arlar ana artabar tetek e God ning di atotohi ana sol. <sup>50</sup> A sol i wakak,

\* **9:45-46:** Dingla na tena mananos ana Buk Tabu la nuki mang a ves 48 ir kes otleng ana ves 44 pa 46.

ika ning ka rop a makmakana, mulor amakmakan ulak mangman-gasa pasi? Belal! I wakak sur a sol ir kes o mulo, pa mulor kes na bal molmol taum.”

## 10

*Gong tik i kutus a tinaulai*  
(Mt 19:1-12; Lk 16:18)

<sup>1</sup> E Iesu i han misaot utumo ana papar Judia, pa i kotop a malum Jodan. A kunum a tarai la han teteki, pa i asaer ulak la lar otning i sira toli. <sup>2</sup> Dingla na Parisaiola la han teteki sur lar toho i. La dekeni mange, “I tostos ot arlar taum ana nundala na Warkuraila, sur a barsan ir kepsen sen anuna hane, o bel?” <sup>3</sup> Pa e Iesu i deken la mange, “Esi na warkurai ning e Moses i saran tari ta mulo?” <sup>4</sup> Pa la kelesi mange, “E Moses i malmaling tari ka sur a barsan ir tumus tar a paka buk na kutus tinaulai, sur dir kutus a keskes na tinaulai.” <sup>5</sup> E Iesu i atai la mange, “E Moses i tumus a warkurai ning sur mulo, anasa a balamulo i rakrakai kol. <sup>6</sup> Ika ana turpas a akakes, e God ‘i akes a taraila, sur la a barsan pa hane.’ *Stat 1:27* <sup>7</sup> ‘Ine a kamkamna ning a barsan ir han kusun e tamana pa e tana, pa ir kes taum ana nuna hane, <sup>8</sup> sur diau takai kama.’ *Stat 2:24* Pa bel diau arenaur ma, diau takai kama. <sup>9</sup> Asa ning e God ka dot taum tari, gong ulak ma tik i kutusi.”

<sup>10</sup> Lamur, ning la kes ting narumai, a kakak a asaer la deken ulak e Iesu ana utna ne. <sup>11</sup> Pa i atai la mang, “Ning tik ir kepsen anuna hane, pa ir taulai ta hane ulak, a barsan ning i tol a toltol laulau tetek anuna ningnigo na hane. <sup>12</sup> Pa ning ta hane i han kusun anuna barsan, pa i taulai ulak ana tik masuk, a hane otleng ning i tol a toltol laulau.”

*E Iesu i angisngis a kakakla*  
(Mt 19:13-15; Lk 18:15-17)

<sup>13</sup> A tarai la ben a kakakla tetek e Iesu sur ir suah naur a kuna saot onla. Ika a kakak a asaer la sairas la. <sup>14</sup> Ning e Iesu i oroi, i balakut pa i atai la mange, “Mulor noren a kakakla sur lar han tetek iau. Gong mulo sairas la, anasa a matanitu ane God anunla ning la manglarne. <sup>15</sup> A atong momoli ta mulo, ning tik bel ir kibas a matanitu ane God arlar ana kaklik, bel ir tol sot sur ir kas tingia.” <sup>16</sup> Pa i los pas a kakakla, pa i suah kuna saot onla, pa i angisngis la.

*A tena gongon*

(Mt 19:16-30; Lk 18:18-30)

<sup>17</sup> Ning e Iesu i han amon ulak, ning a barsan i dun teteki, i kes ana bokona hana namatana, pa i dekeni mange, “Wakak a Tena Asaer, asaning ar toli sur ar kibas a lalaun tikin?” <sup>18</sup> E Iesu i kelesi mang, “Sur asa ning u atong iau mang iau a wakak? Bel tik i wakak, e God ka. <sup>19</sup> U tasman a Warkuraila: ‘Gong u umkol tik, gong u tol a toltol laulau ana ta hane anuna tik o ta barsan anuna tik, gong u kinkinau, gong u artituu asasongo, gong u asongo pas ta utna nuna tik pa u los pasi, ur hanrawai e tamam pa e tnam.’” *Kisim Bek 20:12-16*

<sup>20</sup> A barsan ning i kelesi mange, “Tena Asaer, turpasi ning a kaklik ot tuk ne, a sira mur a Warkuraila rop ne.” <sup>21</sup> E Iesu i tai teteki, i marisi pa i atai mang, “U kapan ot sur ning a utna. Ur han pa ur siuran sen anuma ututnala rop, pa a mani taguni ur tabar a kapan na taraila ono. Ning ur toli manglarning, anuma wakak a gongon saot na langit. Lamur ur lamut ute pa ur mur iau.” <sup>22</sup> Ning i longor a warwara ne, i tai tumtumen, pa i han pa i nuk lingir koli, anasa i galis kol anuna gongon.

<sup>23</sup> E Iesu i gilam taltal tetek anuna kakak a asaerla pa i atai la mang, “I ngangitin kol tetek a tena gongonla sur lar kas uting na

matanitu ane God.”<sup>24</sup> A kakak a asaer la kulkulan kol ana warwara ne. E Iesu i atai ulak la mang, “A natnatukla, i ngangitin kol tetek a taraila sur lar kas ana matanitu ane God.

<sup>25</sup> “I ngangitin tetek a kamel sur ir kas ana mosol a sur a susuk, ika i ngangitin kol tetek a tena gongon sur ir kas ana matanitu ane God.”

<sup>26</sup> A kakak a asaer la kulkulan kol, pa la deken artalai aulak la mang, “Ning i manglarning, esi ma ning dir alauni?”<sup>27</sup> E Iesu i tai tetek la pa i atongi mang, “A taraila bel lar tolsot pasi, ika e God ir tolsot ana ututnala rop.”

<sup>28</sup> E Pita i atai e Iesu mange, “Oroi, mila ka han kusun anumila na ututnala rop, pa mila mur u.”

<sup>29</sup> E Iesu i atongi mang, “A atong momoli ta mulo: Ning tik ir han kusun anuna rumai, o kusun a tastasna barsan pa gurarala, o kusun e tana, o e tamana, o na natnatnala, o kusun anuna kabalapiu, kamkamna hok pa ana Wakak a Warwara,<sup>30</sup> ana lalaun ne, dir saran tar takai a mar a rumai tana, takai a mar a tastasna barsanla, takai a mar na tastasna hanela, takai a mar na tana, takai a mar na natnatna, pa takai a mar a kabalapiu, pa dir alaulau i otleng. Pa ana lalaun lamur dir tabari ana lalaun tikin.<sup>31</sup> Ika a galis a taraila ning la nigo ne, lamur lar mur, pa la ning la mur ne, lamur lar nigo.”

*A munatol a warwara ane Iesu ana nuna minat*

(Mt 20:17-19; Lk 18:31-34)

<sup>32</sup> Ning e Iesu taum ana nuna kakak a asaer la han usaot e Jerusalem, e Iesu i nigon la, pa anuna kakak a asaer la nuknuk kol, pa a taraila otleng ning la muri la matmataut. Pa e Iesu i ben maskan pas anuna ning a bonot pa pisir naur a kakak a asaerla, pa i atai la ana ututnala ning ir hanot teteki manglarne,<sup>33</sup> “Oroi, ne dala

han usaot e Jerusalem. Dir saran tar a Nat a Barsan tetek a leklek a tena artabarla tetek e God taum ana tena asaerla tagun a warkurai. Lar warkurai i sur ir hirua, pa lar saran tari tetek la ning bel a tarai Juda.<sup>34</sup> Lar morot onoi, lar namsani, lar dapisi pa lar umkoli. Pa ning natola pukakiar ir rop ir laun ulak.”

*A nunung ane Jems pa e Jon*  
(Mt 20:20-28)

<sup>35</sup> Naura nat e Sebedi, e Jems pa e Jon, dia han tetek e Iesu pa dia atongi tana mange, “Tena Asaer, mia nunung u sur ur tol asa ne mia mang suri tam.”<sup>36</sup> Pa i deken diau mange, “Asa ning mu mang suri tak?”<sup>37</sup> Dia kelesi mange, “Ur akes tar miau ana num a matatar, pa datol ar warkurai taum, ning a halim miau ana ris a sot a kum pa ning ana kair.”

<sup>38</sup> E Iesu i atai diau mange, “Bel mu tasman asaning mu nunung suri. Mangmangasa, ir toh pas mu sur mu otleng mur gang ana kap ning ar gang ono? Ir toh pas mu otleng sur dir baptais mu ana baptais ning dir baptais iau ono\*?”

<sup>39</sup> Pa dia kelesi mange, “Miar tolsot pasi ka.” E Iesu i atai diau mange, “A kap ning ar gang ono, mu otleng mur gang ono, pa a baptais ning dir baptais iau ono, dir baptais mu otleng ono.<sup>40</sup> Ika ana keskes ana ris a sot a kuk pa ana kair, bel a warkurai sur ar sarani. E God ir sarani tetek la ning ka sang tari sur la.”

<sup>41</sup> Ning a bonot a kakak a asaer la longori, la balakut e Jems pa e Jon.<sup>42</sup> E Iesu i kabah taum pas la, pa i atongi mange, “Mulo tasmani mang la ning di atong la a tena warkuraila anuna taraila ning bel a tarai Juda, la nigon laulau a taraila. Pa anunla na

\* **10:38:** A kap ning e Iesu ir gang ono i warwara larlar ana mamahatla ning ir kilangi. Pa anuna baptais i warwara larlar ana nuna minat.

ningnigo otleng la saran a ngan-  
gitiin a warkuraila tetek a taraila  
anunlai. <sup>43</sup> Ika tetek mulo bel ir  
manglarning. Ning tik i mang sur  
ir leklek ta mulo, ir anatarina pasi  
sur ir tena titol anumuloi. <sup>44</sup> Pa  
esining i mang sur ir ningnigo o  
mulo, ir tena titol oros ka anuna  
taraila rop. <sup>45</sup> Anasa a Nat a  
Barsan otleng bel i hanot sur dir  
titol teteki. I hanot sur i ot ir  
titol tetek a taraila pa ir saran tar  
anuna lalaun, a arlou, sur ir lou  
alanyolango pas a galis a tarai.”

*E Iesu i apalpalas pas a matana  
e Batimaio a kut*  
(Mt 20:29-34; Lk 18:35-43)

<sup>46</sup> La hanot tumo e Jeriko. Ning  
e Iesu taum ana nuna kakak a  
asaerla pa a kunum a tarai otleng  
la han mitingia, ning a barsan, a  
matanakut, a risana e Batimaio (a  
kamkamna mang a nat e Timaiio),  
i kes ting na ris a ngas, pa i sira  
nunung utna. <sup>47</sup> I longori mang  
e Iesu a te Nasaret ka han milau,  
i arkabah rakrakai mange, “Iesu,  
Nat e Dewit, ur maris iau.”

<sup>48</sup> Pa a galis a tarai la sairasi  
mang gong i aregaia. Ika i arkabah  
rakraikai kale mange, “Nat e Dewit,  
ur maris iau.”

<sup>49</sup> E Iesu i tur pa i atai la mang,  
“Mulo kabah pasi.” La kabah pas  
a matanakut, pa la atai i mange,  
“Ur gas! Tur! E Iesu i kabah u.”  
<sup>50</sup> E Batimaio i kepsen anuna kaen  
ning i polpol alar anuna mermer  
ono, i kamtur, pa i han tetek e  
Iesu. <sup>51</sup> Pa e Iesu i dekeni mange,  
“Asa ning u mang sur ar toli hom?”  
A matanakut i kelesi mang, “Tena  
Asaer, a mang sur ar tai.” <sup>52</sup> E Iesu i  
atongi tana mang, “Ur han, anuma  
tortorot ka alanyolango pas u.”  
Ono otning i tai, pa i mur e Iesu  
ana ngas.

## 11

*E Iesu i han usaot e Jerusalem  
lar a king*

(Mt 21:1-11; Lk 19:28-40; Jn  
12:12-19)

<sup>1</sup> Ning la han milau e Jerusalem,  
pa la hanot ting e Betpage pa e  
Betani ting na Mangir Oliw, e Iesu  
i sune sen naur a kaklik kusun,  
anuna kakak a asaerla. <sup>2</sup> Pa i atai  
diau mang, “Mur han sur a hanua  
kaning lanigo ta mu. Ning mur  
han kas, mur han tar ana ning a  
nat a dongki kaning di dot akes  
tari, pa belot tik i kes pas ono.  
Mur pak sen pasi pa mur beni  
ute. <sup>3</sup> Ning tik ir deken mu mang,  
“Sur asa ning mu toli manglarn-  
ing?” mur atai i mange, “A Leklek i  
mang kabah suri, pa ir aulak kapiti  
kale.”

<sup>4</sup> Ning dia han, dia oroi tetek a  
nat a dongki ning di dot akes tari  
tumolapiu na ris a taman ana ru-  
mai, milau a ngas, pa dia pakseni.  
<sup>5</sup> Dingla na tarai ning la tur tingia  
la deken diau mang, “Ai, mu pak  
sen a nat a dongki ning sur asa?”  
<sup>6</sup> Dia keles la ana warwara ning  
e Iesu ka atong tari, pa la noreni  
ka tan diau. <sup>7</sup> Dia ben tar a nat a  
dongki tetek e Iesu, pa dia kepsen  
naur a saket, pa dia suah tari saot  
onoi, pa e Iesu i kes ono. <sup>8</sup> Pa a galis  
a tarai otleng la kepsen anunla na  
saket, pa la sagen tari ting na ngas.  
Pa dingla na tarai otleng la kuben  
pas a lai a rakai miting na bual, pa  
la suah tari ting na ngas. <sup>9</sup> La ning  
la nigo pa la ning la mur, la kukuk  
mange,

“Hosana! Esaning i hanot ana  
risan a Leklek i angis.” *Buk  
Song 118:25-26*

<sup>10</sup> “A matanitu ane tamandala e  
Dewit ning ir hanot i angis!

Hosana usaot kol!”

<sup>11</sup> Ning e Iesu i hanot saot e  
Jerusalem, i kas uting na rumai  
a artabar. Ning ka oroi tar a  
ututnala rop, i ulak utumo e Betani

taum ana nuna ning a bonot pa pisir naur a kakak a asaerla, anasa ka rahmorom.

*E Iesu i warwara tetek a rakai a fig*

(Mt 21:18-19)

<sup>12</sup> A pukakiar lamur, ning la han mitimo e Betani, e Iesu i murak. <sup>13</sup> I oroi a rakai a fig miting bakbak, i gomgomo wakak. Pa i han sur ir oroi, sur ta wana. Ning i hanot tingia, bel i oroi ta wana ono, a pakpakana oros ka, anasa belot i taun fig. <sup>14</sup> Pa i atai a rakai a fig mange, "Turpasi ne pa lamur, bel tik ulak ma ir ien pas ta waim." Pa anuna kakak a asaer la longor akes pas a warwara ning.

*E Iesu i kas uting na rumai a artabar*

(Mt 21:12-17; Lk 19:45-48; Jn 2:13-22)

<sup>15</sup> Ning la hanot saot e Jerusalem, e Iesu i kas ana ning a pukna miting na rumai a artabar, pa i kepsen purum la ning la sisiurai, pa la otleng ning la lolou tingia. I minggen lingir a logola anuna tena keles mani pa a keskes anunla ning la siuran a tabunla. <sup>16</sup> Pa bel i noren tar a taraila sur lar los anunla ututnala na sisiurai ting na arpotor ana rumai a artabar. <sup>17</sup> I asaer la mang, "Di ka tumus tari ting na Buk Tabu manglarne, 'Dir atong anuka rumai mang a rumai a nunung sur a taraila miting na matanitu rop.' Ais

56:7

Ika mulo ka tol lingir pasi sur ir arlar kama lar a 'rumai anuna tena kinkinula.' "

*Jer 7:11*

<sup>18</sup> A leklek a tena artabarla tetek e God taum ana tena asaerla tagun a warkurai otleng la longori, pa la nuknuk sur ta ngas sur lar umkol e Iesu ono, anasa la matatani, anasa

a tarai rop la kulkulan ana nuna asasaer.

<sup>19</sup> Ning a rah ma, e Iesu taum ana nuna kakak a asaer la han kusun a hanua Jerusalem.

*A asasaer tagun a rakai a fig*

(Mt 21:20-22)

<sup>20</sup> Ana kobot ning ot, ning la ulak usaot e Jerusalem, la oroi mang a rakai a fig ka marang mitimo ot na wakwakirna usaot. <sup>21</sup> Pa e Pita i nuk pas a warwara ane Iesu, pa i atai i mange, "Tena Asaer, oroi! A rakai a fig ning u warwara rakrakai tar teteki, ka marang rop."

<sup>22</sup> E Iesu i kelesi mange, "Mulor tortoro o e God. <sup>23</sup> A atong momoli ta mulo, ning tik ir atai a mangir ne mange, 'Ur takakan, pa ur sirok parung usa latasi,' pa bel i urmatana nuknuk, i tortoro mang dir tol asaning ka atong tari, dir toli ot. <sup>24</sup> Manglarning a atongi ta mulo a ututnala rop ning mulo nunung suri, mulor tortoro ka mang di ka saran tari ta mulo, pa dir saran tari ot.

<sup>25-26</sup> "Ning mulo nunung, pa mulo nuk pas ta utna ning tik i tol laulau tari o mulo, mulor nuk duman seni, sur e Tamamulo saot ana langit ir kepsen anumulo na toltol laulaula otleng."\*

*La kabah e Iesu mang esi i saran a rakrakai tana*

(Mt 21:23-27; Lk 20:1-8)

<sup>27</sup> La hanot ulak saot e Jerusalem. Ning e Iesu i taltal ana rumai a artabar, a leklek a tena artabarla tetek e God, taum ana tena asaerla tagun a warkurai pa a ningnigola la han teteki. <sup>28</sup> La dekeni mange, "Esi na ngas a rakrakai ning u tol a ututnala ne ono? Esi i saran tar a rakrakai tam sur ur tol a ututnala ne?"

<sup>29</sup> E Iesu i keles la mange, "Iau

\* **11:25-26:** Dingla na tena mananos ana Buk Tabu la nuki mang dingla na warwara otleng i kes te na ves ne. I manglarne: Ning bel mulo nuk duman seni, e Tamamulo otleng saot ana langit bel ir nuk duman sen anumulo na toltol laulaula.

otleng ar deken mulo ana ning a kabah. Pa ning mulor keles iau, io, ar atai mulo ana rakrakai ning a sira tol a ututnala ne ono. <sup>30</sup> Mitahaia a baptais ning e Jon i baptais a taraila ono? Mitisaot ana langit, o tana taraila ka? Mulor atai iau.” <sup>31</sup> Pa la warwara kumna pas mange, “Ning dalar atongi mang, ‘Mitisaot ana langit,’ ir keles dala ka mange, ‘I mangasa ning bel mulo tortorot onoi?’” <sup>32</sup> Ika ning dalar atongi mange, “Tana taraila,’ a tarai lar balakut dala.” La matatan a taraila, anasa la rop la tortorot o e Jon mang i a propet. <sup>33</sup> Pa la keles e Iesu mange, “Bel mila tasmani.” Pa e Iesu i atai la mang, “Iau otleng bel ar atai mulo ana rakrakai ning a sira tol a ututnala ne ono.”

## 12

*A warwara larlar ana tarai a titol ana barim a wain*  
(Mt 21:33-46; Lk 20:9-19)

<sup>1</sup> E Iesu i asaer la ana ning a warwara larlar, mange, “Ning a barsan i oman tar a barim a wain, pa i tol alar tari. Tingui ana barim a wain ning, i kel tar a tung sur dir pas mirmiren tar a wana wain onoi, sur a polona ir hanot. Pa i tol a natar a rumai ning i tur usaot sur a tena tai alar. Lamur i saran tar kabah a barim a wain tana dingla na tarai a titol sur lar tai alari, pa i han ana ning a tinan. <sup>2</sup> Ning a kalang ka sot sur dir git taum a wana wain, i sune sen ning a tena titol oros tetek a tarai a titol, sur ta wai ana nuna barim sur anunai otleng. <sup>3</sup> Ika a tarai a titol la tong akes pasi, la umi, pa la sune ulak oros seni. <sup>4</sup> Pa i sune sen ulak ning a tena titol oros tetek la, la um laulau tar a pukulna, pa la ame tari. <sup>5</sup> A taman na barim i sune sen ulak ning a tena titol oros, la um amat seni ka. Lamur i sune sen ulak a galis, la um dingla na tarai,

pa dingla la um amat la. <sup>6</sup> Ning kama i kes teteki, a natnalik ot, i mang kol suri. I sune seni tetek la, pa i nuki mang lar hanrawai e natnalik. <sup>7</sup> Ika a tarai a titol la warwara taum pas mange, ‘I ma ning ir keles e tamana, imaine i han ute. Mulo lamut, dalar um amati, sur anundalai ma a barim a wain.’ <sup>8</sup> Pa la tong akes pasi, la um amati, pa la minggaen purum seni kusun a barim.

<sup>9</sup> “Asa ning a taman na barim ir toli? Ir hanot pa ir um amat sen a tarai a titol, pa ir saran tar kabah a barim tetek dingla masik.

<sup>10</sup> Mangmangasa, bel mulo was a warwara ne ting na Buk Tabu? I atongi mange,

‘A hat ning a tena tol rumaila la kepesni,

i ot ning a wakak a hat kes, ning di tol a rumai saot ono.

<sup>11</sup> A utna ne a Leklek ot ka tol tari, pa i wakak kol ana numila a tatatai.’” *Buk Song*  
118:22-23

<sup>12</sup> A ningnigola anuna tarai Juda la tai sur ta ngas sur lar tong akes pas e Iesu ono, anasa la tasmani mang i atong ka a warwara larlar ne onla. Ika la matatan a kunum a tarai. Pa la tur pas kusuni, pa la han.

*A kabah ana totokom*  
(Mt 22:15-22; Lk 20:20-26)

<sup>13</sup> La sune sen a Parisaiola, taum ana halalna e Herot tetek e Iesu sur lar alamlamu sur anuna ta warwara lar tiu i ono. <sup>14</sup> Ning la hanot teteki, la atai i mange, “Tena Asaer, mila tasmani mang u a tostos a barsan. Bel u matmataut ana sa ning a tarai la atongi hom, anasa a ginim i arlar rop ka tetek a tarai rop, pa u asaer momol la ana ngas ane God ana momolna. Mangman-gasa, i tostos sur dir saran a to-tokom tetek a Sisar\* o bel? <sup>15</sup> Dalar sarani, o gong?” I tasman lalan

\* **12:14:** Sisar i a tnan ningnigo ana matanitu Rom pa i nigon otleng a tarai Israel.

anunla na asasongo, pa i deken la mange, "I mangasa ning mulo mang sur mulor toho iau? Ta mani ute ar oroi."

<sup>16</sup> Pa la saran tar ning a mani tana. Pa i deken la mange, "A manar pa a tumtumus ne ono anesi?" La kelesi mange, "Anuna Sisar."<sup>17</sup> E Iesu i atai la, "Asa ning anuna Sisar mulor sarani tetek a Sisar, pa asaning ane God mulor sarani otleng tetek e God." Ning la longori, la kulkulan kol ono.

*A kabah ana lalaun ulak kusun a minat*

(Mt 22:23-33; Lk 20:27-40)

<sup>18</sup> A Sadusila ning la sira puai ka mang bel ta lalaun ulak kusun a minat, la han tetek e Iesu, pa la dekeni mange, <sup>19</sup> "Tena Asaer, e Moses i tumus tari tan dala mange, ning ta barsan ir mat pas kusun anuna hane, pa bel ta natundiau, io, e tasnalik ir ben pasi pa ir taulai i, sur ir aitna tar al kakakla ana risana e tasnalik ning ka mat."<sup>20</sup> Ning a kabaitas, mais a barsan rop ka. A ningnigona i taulai, pa i mat kusun anuna hane, pa bel ta natundiau. <sup>21</sup> Pa a areur a tasnalik kale i taulai a hane ning, i le i mat ka kusuni, pa bel ta natundiau. Mang otleng larning tetek a natolna. <sup>22</sup> La rop dionomahisla, la taulai i, ika a hane ning bel i agon tar ta kaklik onla. Pa a hane i mat murmur tanla rop. <sup>23</sup> Ana lalaun ulak kusun a minat, anesi momolma a hane ning? Anasa mais la rop la ka taulai tari."

<sup>24</sup> E Iesu i keles la mange, "Mulo rongo kol, anasa bel mulo tasman a Buk Tabu pa a rakrakai e God otleng. <sup>25</sup> Ning a tarai lar laun ulak kusun a minat, bel lar taulai ulak, lar arlar kama ana angelola saot na langit. <sup>26</sup> Ning mulo puai mang a minatla bel lar laun ulak kusun a minat, mangmangasa belot mulo was a Buk ane Moses ning i warwara ana rakai ning i sot? E God i

atongi tetek e Moses mange, 'Iau a God ane Abaram, a God ane Aisak pa a God ane Jekop.' *Kisim Bek 3:6*<sup>27</sup> Mulo rongo kol. E God bel a God anuna minatla, a God anuna lalauna ot."

*A warkurai ning i ngangaten kol*  
(Mt 22:34-40; Lk 10:25-28)

<sup>28</sup> Ning a hala tena asaerla tagun a warkurai i hanot, pa i longor e Iesu taum ana Sadusila la warwara. I longori mang e Iesu i keles wakak la, pa i dekeni mange, "Esi na warkurai i ngangaten tanla rop?"<sup>29</sup> E Iesu i kelesi mange, "Ine a ngangaten a warkurai momol, 'A tarai Israella mulor longori, a Leklek anundala God i takai sot ka. <sup>30</sup> Mulor mang sur a Leklek anumulo a God ana balamulo rop, a ingumulo rop, a nuknukimulo rop, pa a rakrakaimulo rop.' *Lo 6:4-5*

<sup>31</sup> Ine a munaur a warkurai, 'Ur mang sur a halim larning u mang sur u ot.' *Liwai 19:18* Bel ta warkurai i itna ana naur a warkurai ne."

<sup>32</sup> A tena asaer tagun a warkurai i atai e Iesu mange, "I momol ot, Tena Asaer. I tostos anuma warwara, mang e God i takai sot ka, pa bel tik ulak ma. <sup>33</sup> Dalar mang sur e God ana balandala rop, a nuknukindala rop, pa ana rakrakaindala rop, pa dalar maris a halalindala larning dala maris dala ot. Ning dalar mur naur a warkurai ne, i ngangaten kol ana artabarla ning dala sarani tetek e God, pa a artabarla ning di tun seni."

<sup>34</sup> Ning e Iesu i oroi mang i warwara na tastasman, i atai i mange, "Bel u bakbak kusun a matanitu ane God." Pa bel ma tik i han teteki ana ta kabah, anasa la matmataut.

*A Karisito i a Leklek ane Dewit*  
(Mt 22:41-46; Lk 20:41-44)

<sup>35</sup> E Iesu i asaer la ting na rumai a artabar, i atongi mange, "I mangasa ning a tena asaerla tagun a



warkurai la atongi mang a Karisito a nat e Dewit? <sup>36</sup> A Talngan Tabu i nigon e Dewit pa i atongi mange, 'A Leklek i atongi tetek anuka Leklek†,

"Ur kes te na sot a kuk, tuk ning ar tolsot pas anum na hiruala sur lar kes nahaim." ' Buk Song 110:1

<sup>37</sup> E Dewit ot i atong a Karisito mang anuna Leklek. Ning i manglarning, io, di tamana mang-mangasa?"

*E Iesu i warwara na tumarang tetek a taraila ana ginina tena asaerla tagun a warkurai*  
(Mt 23:1-36; Lk 20:45-47)

A tnan kunum a tarai la gas kol ning la longor a warwara ane Iesu.

<sup>38</sup> Ning i asaer la, i atongi mange, "Mulor tumarang ana tena asaerla tagun a warkurai. La mang sur lar taltal taum ana wakak a kaenla, pa la mang sur a tarai lar hanrawai la ting na pukna na han taum. <sup>39</sup> Pa la mang sur a keskesla salanigo na rumai lotula, pa a keskesla salanigo ana ngasa. <sup>40</sup> La sira amus a gongon anuna laola, pa la sira laes na tol a barbara a nunungla. Ir itna kol a warkurai ane God tetek la."

*A artabar anuna lao*  
(Lk 21:1-4)

<sup>41</sup> E Iesu i kes milau tar a pukna na susua mani ting na rumai a artabar, pa i oroi a taraila ning la suah anunla mani onoi. Galis a tena gongon la suah a tnan mani ana pukna na susua mani. <sup>42</sup> Ika ning a kapan na lao, i suah tar ka naur a toia ana pukna na susua mani. <sup>43</sup> Pa e Iesu i kabah pas anuna kakak a asaerla teteki, pa i atai la mange, "A atong momoli ta mulo, a kapan na lao ne, ka saran tar a tnan mani tanla rop ne. <sup>44</sup> La saran tukna tar ka ana

gongon anunlai, ika a lao ne, i kapan, i saran arap sen asaning ir toh pas anuna keskes."

## 13

*A akinalangla ana ararop ana pukakiarla*

(Mt 24:1-14; Lk 21:5-19)

<sup>1</sup> Ning e Iesu i purum kusun a rumai a artabar, ning tagun a nuna kakak a asaerla i atai i mange, "Oroi, Tena Asaer! A wakak a rumaila ne, di toli ana tatatnan hatat!" <sup>2</sup> Pa e Iesu i atai i mange, "U oroi a tatatnan rumaila ne? Kaning lamur bel ir naur a hat diar pala taun, dir regen siksiklik sen la."

<sup>3</sup> Ning e Iesu i kes tisaot ana Mangir Oliw ning dir tai solsol sur a rumai a artabar, e Pita, Jems, Jon pa e Endru la deken kumnani mange, <sup>4</sup> "Ur atai mila, nangse a ututnala ne ir hanot? Pa asa akinalang ana ututnala ning i milau sur lar hanot?" <sup>5</sup> E Iesu i atai la mange, "Mulor tai alar mulo, sakana tik ir asongo pas mulo. <sup>6</sup> A galis lar hanot ana risak, lar atongi mange, 'Iau a Karisito,' pa lar asongo pas al galis. <sup>7</sup> Ning mulor longor a harumla pa a arkaltai ana harumla, gong mulo mangasa tar, anasa a ututnala ne lar hanot nigo, ika a ararop ana rakrakan hanua belot. <sup>8</sup> Ning a mangis a tarai ir tur na harum tetek ning a mangis, pa ning a matanitu ir tur na harum tetek ning a matanitu. Pa a mamaisla pa a tnan munurak ir hanot ting na hanhanuala. A ututnala ne i arlar ana turpas a kilkilang na kankan ana hane sur ir agon.

<sup>9</sup> "Mulor tai alar mulo, A tarai lar saran tar mulo tetek a tena warkuraila, pa lar dapis mulo ting na rumai lotula. Mulor tur ana warkurai lanigo tana tatatnan ningnigola pa a kingla, anasa mulo

† 12:36: "A Leklek" i warwara o e God, pa "anuka Leklek" i warwara ona Karisito.

anuki. Pa mulor warwara talapor hok tanla. <sup>10</sup> Dir warawai nigo ana Wakak a Warwara tetek a taraila miting na matanitu rop. <sup>11</sup> Ning lar dat pas mulo sur a warkurai, gong mulo nuknuk nigo sur asa ning mulor atongi. Ana taem ning mulor atong ka a warwara ning di anuknuk tari ta mulo, anasa bel mulo ning mulor warwara, a Talngan Tabu ot.

<sup>12</sup> “Tik ir saran sen e tasnalik sur dir umkoli, pa ta barsan ir saran sen e natnalik sur dir umkoli. Pa kakakla lar tur na harum tetek e tamanla pa kabatnanla, pa lar saran sen diau sur dir umkol diau. <sup>13</sup> Pa taraila rop lar nget mulo anasa mulo anuki, ika esining ir tur rakrakai tuk anuna lalaun ir rop, e God ir alauni.

*A tumarang ana laulau a utna ning ir hanot*

(Mt 24:15-28; Lk 21:20-24)

<sup>14</sup> “Mulor oroi ning a laulau a utna kol ir hanot, ir kes ana pukna ning bel i toh pasi sur ir kes ano, pa ir alaulau a pukna ning. (Esining ir was a warwara ne, i wakak sur ir talapor ono.) Ono ot ning, la ning la kes ana papar Judia, lar liu usaot ana mangirla. <sup>15</sup> Pa ning tik ir kes saot ana nuna rumai\*, ning ir purum, gong i kas sur ir los pas ta utna saui. <sup>16</sup> Pa ning tik ir kes ting na barim, gong ma i han ulak utumo lahanua sur anuna ta kaen. <sup>17</sup> Ana pukakiarla ning, ir laulau kol tetek a tiananla, pa la otleng ning la aresus. <sup>18</sup> Mulor nunung sur gong a utna ne ir hanot ana kalang na kotkoto. <sup>19</sup> Anasa ana pukakiarla ning, ir itna kol a mamahatla. Ir itna kol ana mamahatla ning i sira hanot ana rakrakan hanua, tur-pasi ning e God i akes a rakrakan hanua tuk ne, pa lamur otleng bel ta mamahat ir arlar ono. <sup>20</sup> Nadek ning a Leklek bel ir kutus purum

a pukakiarla ning, bel tik kakat ir laun. Ika ka kutus purum seni sur la ning ka aslang pas la, lar laun.

<sup>21</sup> “Ana pukakiarla ning, ning tik ir atongi ta mulo mange, ‘Oroi, a Karisito ine!’ pa ir atongi mange, ‘Oroi, numo ia!’ gong mulo tortorot onoi. <sup>22</sup> Anasa al tena asasongo na Karisito, pa tena asasongo na propetla lar hanot, lar tol al akinalang pa al utnala na kulkulan sur lar asongo a taraila ning e God i aslang pas la, ngandek lar tolsot onla. <sup>23</sup> Mulor tumarang! Ne ia ka atai nigon tar mulo ana ututnala rop ning ir hanot!

*A Nat a Barsan ir hanot*

(Mt 24:29-31; Lk 21:25-28)

<sup>24</sup> “A mamahatla ning ir rarop, pa ana pukakiarla ning,

‘a kamis ir mormorom,  
a kalang bel ir sasai,

<sup>25</sup> a nangnangla lar punga purum misaot na langit,

pa a ututnala tisaot na langit  
lar gulgule.’ *Ais 13:10; 34:4*

<sup>26</sup> “Ana taem ning, a tarai lar oroi a Nat a Barsan ir hanot ana laukap taum ana tnan rakrakaina pa a matatar. <sup>27</sup> Pa ir sune anuna na angelola sur lar ben taum a taraila ning i aslang pas la miting na diat a matana wuwu, miting na ris a rakrakan hanua tuk utumo otleng ana ning a ris a rakrakan hanua.

*A warwara larlar ana rakai a fig*

(Mt 24:32-35; Lk 21:29-33)

<sup>28</sup> “Mulor asasaer ana rakai a fig. Ning a rakrakanala ir gomo pa a pakpakana ir tapalas, mulor tasmani mang a kalang na laplapang ka milau. <sup>29</sup> Mang otleng larning, ning mulor oroi a ututnala ning ia ka warwara tar ono ir hanot, mulor tasmani mang a pukakiar ka milau. <sup>30</sup> A atong momoli ta mulo, a taun taraila ne kanet la laun pa a ututnala rop ne ir hanot.

\* **13:15:** A ngas a rumai anuna tarai Israel, saot na pukul a rumai i arlar ka, pa la sira kes otleng ono.

<sup>31</sup> A langit pa a rakrakan hanua diar rarop, ika anuka warwarala bel ir rarop.

*Bel tik i tasman a pukakiar pa a tuka mais a kamis*  
(Mt 24:36-44)

<sup>32</sup> “Bel tik ir tasman a pukakiar pa a tuka mais a kamis a ututnala ning ir hanot. A angelola saot na langit bel la tasmani, pa e Natnalik otleng bel i tasmani, e Tamana ka i tasmani. <sup>33</sup> Mulor tumarang, pa mulor tai alar mulo, anasa bel mulo tasmani nangse a ututnala ne ir hanot.

<sup>34</sup> “I arlar ana ning a barsan i sang sur ir han ana ning a tinan. I saran tar anuna rumai tetek anuna tena titol orosla, sur lar tai alari. I saran taktakai a titol tanla rop, pa i atai a barsan ning na taman sur ir tai alar, pa i han.

<sup>35</sup> “Ika mulor tumarang, anasa bel mulo tasmani nangse a tamana rumai ir hanot, ana rah, o ana tnan morom, o ana lar ning a kok i kurkurirakuk, o ana kobot. <sup>36</sup> Sakana ir hanot kulkulan, pa ir pastetek mulo kaning mulo borbor duman. <sup>37</sup> Asa ning a atai mulo ono, ar atai a taraila otleng mang: Mulor tai alar mulo!”

## 14

*La warwara taum sur lar umkol e Iesu*  
(Mt 26:1-5; Lk 22:1-2; Jn 11:45-53)

<sup>1</sup> Naura pukakiar lanigo ana lotu na Han Lakai, pa ana lotu na bret ning belal is ono, a lekkek a tena artabarla tetek e God taum ana tena asaerla tagun a warkurai la nuknuk sur ta ngas sur lar tong kumnan pas e Iesu pa lar umkoli. <sup>2</sup> La atongi mange, “Gong dala toli ana lotu, sakana a tarai lar arkakai.”

*Ning a hane i pek a tomtobo ana pukul e Iesu*  
(Mt 26:6-13; Jn 12:1-8)

<sup>3</sup> E Iesu kaning ot e Betani, ana rumai ane Saimon, esaning lanigo i kurah ana lepra. Kaning ot i hangan, ning a hane i hanot teteki taum ana koto na tomtobo ning di atongi mang a nad. I ngangaten, pa kaning ana koto di toli ana hat. I pagal sen a matana koto, pa i peki ana pukul e Iesu. <sup>4</sup> Dingla na tarai ning la kes tingia, la balakut pa la awara artalai mange, “Sur asa ning di amus oros ka a tomtobo ne? <sup>5</sup> I toh pasi sur dir siurani, pa dir kibas a mani i arlar lar a arlou ana ning a rau ning di titol pasi, sur dir tabar a kapan a taraila ono.” Pa la balakut a hane ning.

<sup>6</sup> E Iesu i atai la mange, “Mulo noreni. Sur asa mulo abal marisi? I ka tol tar a wakak a toltol hok. <sup>7</sup> A kapan na tarai la laun taum ot o mulo. Ning mulo mang sur mulor awakak la, mulor toli ka. Ika iau bel ar kes tikin taum o mulo. <sup>8</sup> I ka tolsot pas a utna ning i toh pasi sur ir toli. I pek tar a tomtobo ana palaok sur ir sang nigon iau sur anuka pukakiar na minat. <sup>9</sup> A atong momoli ta mulo, ting na rakrakan hanua rop, ning dir warawai ana Wakak a Warwara, dir warwara otleng ana utna ne a hane ka tol tari hok, sur a tarai lar nuk akes a hane ne.”

*E Judas i malmaling sur ir tuam tar e Iesu*  
(Mt 26:14-16; Lk 22:3-6)

<sup>10</sup> E Judas Iskariot, takai tagun a ning a bonot pa pisir naur a kakak a asaerla, i han tetek a lekkek a tena artabarla tetek e God, sur ir tuam tar e Iesu tetek la. <sup>11</sup> Ning la longori, la gas, pa la lele sur lar lowi. Pa e Judas i nuknuk sur ta ngas ning ir tuam tar e Iesu onoi.

*E Iesu taum ana nuna kakak a asaer la kes ana utna na hangan ana lotu na Han Lakai*  
(Mt 26:17-25; Lk 22:7-14, 21-23; Jn 13:21-30)

<sup>12</sup> Ana ningnigo na pukakiar ana lotu na bret ning bel ta is ono, ning di sira umkol a nat a sipsip onoi sur a lotu na Han Lakai, a kakak a asaerla ane Iesu la dekeni, “U mang sur milar han utaha, sur milar sang pas a utna na hangan sur u ana lotu na Han Lakai?” <sup>13</sup> I sune sen naur tagun anuna kakak a asaerla, pa i atai diau mange, “Mur kas usaot e Jerusalem. Pa ning a barsan i los a tnan koto na malum, ir songo mu, pa mur muri. <sup>14</sup> Ning ir kas ana ta rumai, mur atai a tamana rumai mange, ‘A Tena Asaer i atongi mang: Kanaha a tuka rumai ning mila taum ana nuk a kakak a asaerla, milar ien a utna na hangan na Han Lakai ano?’ <sup>15</sup> Pa ir asangan tar mu ana tnan tuka rumai tisaot, ning di ka sang tari, pa mur sang a utna na hangan ano.” <sup>16</sup> Naura kaklik asasaer dia han usaot e Jerusalem, pa dia pastetek rop ot a ututnala ning e Iesu i atong tari tan diau. Pa dia sang a utna na hangan na Han Lakai.

<sup>17</sup> Ning a rah ma, e Iesu taum ana nuna ning a bonot pa pisir naur a kakak a asaer la hanot. <sup>18</sup> Kaning ot la hangan, i atongi mange, “A atong momoli ta mulo, ning a halim mulo ir tuam tar iau, takai ot tagun mulo ne dala hangan taum.”

<sup>19</sup> La balmamahat, pa la rop tak-takai la dekeni mange, “Belsur iau ngandek?” <sup>20</sup> Pa e Iesu i keles la mange, “Takai tagun mulo ot ning a bonot pa pisir naur, ning mia amurung amia naur a bret taum ana besen. <sup>21</sup> A Nat a Barsan ir hirua larning di ka tumus tari ting na Buk Tabu. Ika ir laulau kol tetek a barsan ning ir tuam tari. Ir wakak kol ning bel di agon tari sur gong i kilang a kankan ana warkurai.”

*A utna na hangan ana Leklek*  
(Mt 26:26-30; Lk 22:14-20; 1Kor

11:23-25)

<sup>22</sup> Kaning ot la hangan, e Iesu i los pas a bret, i atong wakak pas onoi, i kibiki, pa i tabar anuna kakak a asaerla ono. I atongi mang, “Mulor kibasi, ine a palaok.” <sup>23</sup> Lamur i los pas a kap, i atong wakak pas onoi, i sarani tanla, pa la rop la gang onoi. <sup>24</sup> I atai la, “Ine a sulukik, a kunubus ning i dat taum tar e God pa taraila. A sulukik ne i tapek sur a galis. <sup>25</sup> A atong momoli ta mulo mang, bel ar gang ulak ta wain, tuk ning ar gang a tona wain ting na matanitu ane God.”

<sup>26</sup> Pa la saken pas ning a saksak a lotu, pa la purum usaot ana Mangir Oliw.

*E Iesu i warwara nigo ana arpuai ane Pita*

(Mt 26:31-35; Lk 22:31-34; Jn 13:36-38)

<sup>27</sup> E Iesu i atai la mange, “Mulo rop mulor han pas kusun iau, larning di ka tumus tari ting na Buk Tabu mang,

E God i atongi mange, ‘Ar umkol a tena tai alar a sipsip, pa a sipsipla lar liu sarara.’

*Sekaraia 13:7*

<sup>28</sup> Ika ning a ka kamtur ulak kusun a minat, ar nigo utumo e Galili.”

<sup>29</sup> E Pita i atai i mange, “Ning la rop lar han kusun u, iau bel.”

<sup>30</sup> E Iesu i atai i mange, “A atong momoli tam, onone ana morom, ning a kok belot ir areur a kurkurirakuk, ur munatol na puai mang bel u tasman iau.” <sup>31</sup> Ika e Pita i warwara rakrakai teteki mange, “Bel ar puai sen u. Madeki ar mat taum hom.” A kakak a asaerla rop otleng la atongi manglarning.

*E Iesu i nunung ting e Getsemani*

(Mt 26:36-46; Lk 22:39-46)

<sup>32</sup> E Iesu taum ana nuna kakak a asaer la hanot ting na ning a pukna di atongi e Getsemani, pa i atai la mange, “Mulor kes te, pa iau ar nunung pas.” <sup>33</sup> Pa i ben e

Pita, e Jems pa e Jon. Ana mais a pukakiar ning i kilang a tnan balmamahat pa i nuknuk kol. <sup>34</sup> I atai ditol mange, “A balmamahat ting na inguk i laulau kol, pa milau ar mat ono. Mutol ar kes ot te, pa mutol ar tai alar.”

<sup>35</sup> I han siklik utisa, i punga tun-tudu ting lapiu, pa i nunung sur a mais a pukakiar na mamahat ir han lakai, ngandek ning ir wakak manglarning. <sup>36</sup> I nunung mange, “Tata, Tata, a ututnala rop i toh pas u sur ur toli, ur kepsen a mamahat a kap ne kusun iau. Ika gong u mur a nuknukik, ur mur ot a nuknukim.”

<sup>37</sup> Ning i ulak, i oroi ditol ka borbor duman. I deken e Pita mange, “Saimon, kaning ot u borbor duman? Bel ur tolsot sur ur tai alar ana tik ta mais a pukakiar ka? <sup>38</sup> Mutol ar tai alar, pa mutol ar nunung, sur gong mutol punga ana larlarla. A ingumutol i mang sur ir longor, ika a palaomutol i ngol.”

<sup>39</sup> Pa i han, pa i nunung ulak ana nunung ning ka atong tari kabah. <sup>40</sup> Ning i ulak, i oroi ditol ka borbor duman kale, anasa a matanditol i sulam kol. Bel ditol tasman asaning ditol ar kelesi ono. <sup>41</sup> Ning i aretol a tinan anunai tetek ditol, i atongi mange, “Mutol ar borbor liklik kama? I sot ka! A tuka pukakiar ka hanot. Oroi, di ka tuam tar a Nat a Barsan ting na kuna tena laulaula. <sup>42</sup> Mutol tur, dalar han! Oroi, a barsan ning ir tuam iau imaine.”

*Di tong pas e Iesu*

(Mt 26:47-56; Lk 22:47-53; Jn 18:3-12)

<sup>43</sup> Kaning ot e Iesu i warwara, e Judas, ning tagun a ning a bonot pa pisir naur a kakak a asaerla, i hanot taum ana kunum a taraila. La los a liwanla na harum taum ana puka buturla. A leklek a tena artabarla tetek e God, taum ana tena asaerla tagun a warkurai pa a

ningnigola la sune la. <sup>44</sup> Esaning ir tuam tar e Iesu ka atai nigon tar a kunum a tarai ana akinalang ning ir toli o e Iesu mange, “Esining ar goro i, i ot ning. Mulor tong akes pasi, mulor ben maskan pasi pa mulor tai alar wakaki.”

<sup>45</sup> Pa e Judas i han kapit tetek e Iesu, pa i atai i mange, “Tena Asaer!” Pa i goro i. <sup>46</sup> A tarai la dat pas e Iesu pa la tong akesi.

<sup>47</sup> A halinla ning i tur milau, i lasur pas anuna liwan na harum, pa i umsem a talngana tena titol oros anuna ningnigo na tena artabar tetek e God. <sup>48</sup> Pa e Iesu i atai la mang, “Mangmangasa, ngandek iau a tnan tena harum pa kinkinau, pa ne mulo hanot taum ana liwanla na harum pa a puka buturla sur mulor tong akes iau?

<sup>49</sup> Ana pukakiarla rop dala kes taum ana rumai a artabar, a sira asaer a taraila, pa bel mulo tong akes iau. Ika di toli larne sur dir tolsot pas a warwara ting na Buk Tabu.” <sup>50</sup> Pa a kakak a asaerla rop la liu pas kusuni.

<sup>51</sup> Ning a barman, i mermer pas ka ana kaen, i mur e Iesu. La tong akes pasi, <sup>52</sup> i minggen sen anuna kaen, pa i liu mengere kama.

*E Iesu i tur ana warkurai namatana tarai a kiwung*

(Mt 26:57-68; Lk 22:54-55, 63-71; Jn 18:13-14, 19-24)

<sup>53</sup> La ben pas e Iesu tetek a ningnigo na tena artabar tetek e God. Pa a leklek a tena artabarla rop tetek e God, a ningnigola, taum ana tena asaerla tagun a warkurai la hanot taum tingia. <sup>54</sup> E Pita i mur amon e Iesu, ika i bakbak ot, pa i kas ting na pukna anuna ningnigo na tena artabar tetek e God. Pa i marnan a iah taum ana tena tai alarla.

<sup>55</sup> A leklek a tena artabarla tetek e God, taum ana tarai a kiwung rop la tai sur ta rongo ning e Iesu ka tol tari, sur lar arupi ono,

pa lar umkoli, ika bel la tai pas ta utna. <sup>56</sup> A galis la atong a asasongo na warwara o e Iesu, ika anunla na warwara bel i han taum. <sup>57</sup> Dingla na tarai la tur pa la atong a asasongo na warwara o e Iesu mange, <sup>58</sup> “Mila longori i atongi mange, ‘Ar regen sen a rumai a artabar ne ning a tarai la toli, pa ana natol a pukakiar ka ar tol pas tik ning bel a tarai la toli.’ ” <sup>59</sup> Ika anunla na warwara otleng bel i han taum.

<sup>60</sup> A ningnigo na tena artabar tetek e God i tur salanigo tanla, pa i deken e Iesu mange, “I mangasa, bel ur keles a warwarala na ararup ne tetek u?” <sup>61</sup> Ika e Iesu bel i warwara. A tena artabar ne i deken ulaki mange, “U a Karisito, a Nat e God, ning i ngis, o bel?” <sup>62</sup> E Iesu i kelesi mange, “Iau ot ning, pa lamur mulor oroi a Nat a Barsan ir kes ana ris a sot a kuna e God, ning i rakrakai kol, pa ir hanot ana laukap misaot na langit.”

<sup>63</sup> A ningnigo na tena artabar i dat silir anuna kaen ot, pa i atongi mange, “Dala mang ulak sur ta warwara na ararup sur asa? <sup>64</sup> Mulo ka longor tur anuna na warwara laulau o e God. Asa mulo nuki?” Pa la rop la malmaling sur dir umkol e Iesu. <sup>65</sup> Dingla na tarai tagun la, la namsan e Iesu, la poroi alar tar a matana, la tubuli pa la atai i mange, “U a propet, atai mila, esining i tubul u!” A tena tai alarla la ben pasi pa la umi.

*E Pita i puain sen e Iesu*

(Mt 26:69-75; Lk 22:56-62; Jn 18:15-18, 25-27)

<sup>66</sup> Ning e Pita kanumot lapiu ana rumai, ning a hane, a tena titol anuna ningnigo na tena artabar tetek e God i hanot. <sup>67</sup> Ning i oroi e Pita kaning i marmarim, i ngoson rakrakai i, pa i atai i mange, “U otleng u keskes taum o e Iesu a te Nasaret.” <sup>68</sup> Ika i puai mange, “Bel

a tasman asaning u warwara ono, pa bel a talapor ono.” Pa i purum utumo ana taman na woroh. Pa a kok i kurkurirakuk kakat. <sup>69</sup> A hane ning i oroi ulak pasi, pa i atai la ning la tur tingia mange, “A barsan ne i otleng takai tagun la.” <sup>70</sup> E Pita i puai ulak.

Lamur siklik, la ning la tur milau e Pita, la atai i mange, “A momolna ot, u otleng takai tagun la, anasa u a te Galili.” <sup>71</sup> Pa i lele tetek la, i atongi mange, “E God ir warkurai laulau iau ning ar asongo. Bel a tasman a barsan ning mulo warwara ono.” <sup>72</sup> Pa a kok i munaur na kurkurirakuk kakat. Pa e Pita i nuk pas a warwara ning e Iesu ka atong tari tana mange, “Ning a kok belot ir areur a kurkurirakuk, ur munatol na puai mang bel u tasman iau.” I nuk pasi pa i tangis kol.

## 15

*E Iesu i tur namatana e Pailat*

(Mt 27:1-2, 11-14; Lk 23:1-5; Jn 18:28-32)

<sup>1</sup> Kabakiar kobot ning ot, a leklek a tena artabarla tetek e God, a ningnigola, pa a tena asaerla tagun a warkurai taum ana tarai a kiwung rop, la warwara taum. La dot pas naur a kuna e Iesu, la ben pasi pa la saran tari ta e Pailat. <sup>2</sup> E Pailat i dekeni mange, “U a King anuna tarai Juda?” Pa e Iesu i kelesi mange, “Lar ot ning u ka atongi.” <sup>3</sup> A leklek a tena artabarla tetek e God la arup e Iesu ana galis a utna. <sup>4</sup> E Pailat i deken ulaki mange, “Bel anum ta warwara na arkeles? Oroi, a galis a utna kol la arup u ono.” <sup>5</sup> Ika e Iesu bel i kelesi ana ta warwara, pa e Pailat i kulkulan.

*La warkurai e Iesu sur ir mat*

(Mt 27:15-26; Lk 23:13-25; Jn 18:39—19:16)

<sup>6</sup> Ana lotula rop na Han Lakai, e Pailat i sira pak sen ta mainla ning

i dodot ning a tarai la nunung suri.  
<sup>7</sup> Ning a barsan a risana e Barabas i kes ana rumai a dodot. A halinla ning la harum taum ana matanitu, pa la umkol a taraila ana arsakai.  
<sup>8</sup> Ning a kunum a tarai la hanot tetek e Pailat, la nunungi mang ir pak sen ulak ta mainla ning i dodot. <sup>9</sup> Pa e Pailat i deken la mange, “Mulo mang sur ar pak sen a ‘king anuna tarai Juda’ tetek mulo?” <sup>10</sup> I atongi manglarne anasa ka tasmani mang a leklek a tena artabarla tetek e God la saran tar e Iesu teteki ana nuknuk laulau. <sup>11</sup> Ika a leklek a tena artabarla tetek e God la angongos a kunum a tarai sur lar nunung e Pailat sur ir pak sen tar e Barabas tetek la. <sup>12</sup> E Pailat i deken ulak la mange, “Asa ning ar toli o esane ning mulo atongi mang a king anuna tarai Juda?” <sup>13</sup> Pa la kukuk rakrakai mange, “Sai ahati saot na rakai kutus!” <sup>14</sup> E Pailat i deke mang, “Sur asa? Esi na rongo ning ka tol tari?” Ika la kukuk rakrakai ka mange, “Sai ahati saot na rakai kutus!” <sup>15</sup> E Pailat i mang sur ir agasgas a taraila, pa i pak sen e Barabas tetek la. Ning di ka dapis tar e Iesu, e Pailat i saran seni sur lar sai ahati saot na rakai kutus.

*A tarai a harum la morot o e Iesu*

(Mt 27:27-31; Jn 19:2-3)

<sup>16</sup> A tarai a harum la ben e Iesu utisau ana woroh ana tnan rumai anuna ningnigo, pa la kabah arop pas a kunum a tarai a harum. <sup>17</sup> La apipis tari ana kubar a kaen, la gono pas a inau ning a suksukna pa la suah tari ana pukulna arlar ana kukuh anuna king.\* <sup>18</sup> Pa la turpas a arkabah teteki mange, “U a king anuna tarai Juda!” <sup>19</sup> La dapis a pukulna ana rakai, la nam-sani, la kes ana bokona hanla pa

la saran a hanrawai teteki. <sup>20</sup> Ning la ka morot pas onoi, la paksen a kubar a kaen kusuni. La apipis ulaki taum ana nuna kaenla, pa la ben purumi sur dir sai ahati saot na rakai kutus.

*Di sai ahat e Iesu saot na rakai kutus*

(Mt 27:32-44; Lk 23:26-43; Jn 19:17-27)

<sup>21</sup> Ting na ngas a tena harumla la pastetek pas ning a barsan a risana e Saimon, a te Sairini, e tamana e Aleksander pa e Rupus, i han kusun ning a hanua sur ir han usaot e Jerusalem. La angongosi sur ir los a rakai kutus ane Iesu.

<sup>22</sup> La ben e Iesu sur a pukna ning di atongi e Golgata, a kamkamna “Pukna na Lasa na Pukulna.” <sup>23</sup> La saran a wain tana, ning di suah taumi ana mira, ika bel i gangi. <sup>24</sup> La sai ahat tari saot na rakai kutus. La asauran pas anuna na kaenla ana pilai laki, sur esi onla ir los ta kaen.

<sup>25</sup> La sai ahati saot na rakai kutus ana sihuk a mais a kamis ana kobot. <sup>26</sup> La tumus a warwara na ararup onoi saot na rakai kutus manglarne,

“A KING ANA TARAI JUDALA.”

<sup>27-28</sup> La sai ahat otleng naur a tena kinkinau taum ono ana naur a rakai kutus, takai ana sot a kuna, pa takai ana kair.†

<sup>29</sup> Pa la ning la han bolos e Iesu, la hanani pa la halalen pukulunla teteki. Pa la atongi mange, “U ma ning u atongi mang ur regen sen a rumai a artabar, pa ur tol ulak pasi ana natol a pukakiar, <sup>30</sup> purum kusun a rakai kutus pa ur alaun u.” <sup>31</sup> A leklek a tena artabarla tetek e God taum ana tena asaerla tagun a warkurai la otleng la morot o e Iesu. La awara artalai tanla mange, “I alaun pas a taraila masak, ika i ot bel ir alaun

\* **15:17:** A kukuh pa kubar a kaen dia tai arlar ana mermer anuna king. † **15:27-28:** Dingla na tena mananos ana Buk Tabu la nuki mang dingla na warwarala otleng i kes te na ves ne. I manglarne: *Di toli lerne sur dir tolsot pas a warwara onoi ting na Buk Tabu mange, “Di was taumi ana tena laulaula.”*

lar pasi. <sup>32</sup> Ning i a Karisito, a King anuna tarai Israel, ono othe ir purum kusun a rakai kutus, sur dalar oroi, pa dalar tortorot onoi." Pa diau otleng, ning di sai ahat tar diau ana naur a rakai kutus ting na pirna, dia hanani.

*E Iesu i mat*

(Mt 27:45-56; Lk 23:44-49; Jn 19:28-30)

<sup>33</sup> Ana mais a kamis tostos, a hanhanua rop i mormorom tuk ana natola mais a kamis ana rah. <sup>34</sup> Ana natola matanakamis ana rah ning, e Iesu i kukuk rakrakai mange, "Eloi, Eloi, lema sabakatani?" A kamkam a warwara ne i manglarne, "Anuk a God, anuka God, i mangasa ning u han kusun iau?" *Buk Song 22:1*

<sup>35</sup> Dingla na tarai ning la tur milau, la longori pa la atongi mange, "Longori, i arkabah sur e Elaija."

<sup>36</sup> Ning a barsan i dun pa i los pas ning a utna i sira dop akes a malum. I amurung pasi ana wain ning i nginngin, i suah i ana rakai pa i tuslani usaot sur e Iesu ir gang. Pa i atai la mange, "Nanani, dalar oroi, sur ning e Elaija ir hanot sur ir los purum pasi kusun a rakai kutus, o bel." <sup>37</sup> E Iesu i kukuk rakrakai pas, pa i suah sen a malwasna.

<sup>38</sup> A kaen na alalar kutus tingui na rumai a artabar i taksilir potot, turpasi misaot tuk tumot lahin.

<sup>39</sup> A ningnigo anuna tena harumla i tur salanigo ta e Iesu, i longor e Iesu i kukuk, pa i oroi a ngas a minat anunai, pa i atongi mange, "I momol ot, a barsan ne a Nat e God."

<sup>40</sup> Dingla na gurarala otleng la ororoi miting na bakbak. Ting na arpotor inla, e Maria Magdalen, pa e Salome pa e Maria otleng tana e Josep pa e Jems a barman. <sup>41</sup> Ditol ne ditol murmur e Iesu ning i kes Galili, pa pa ditol sira nangani. Pa a galis a gurarala otleng, ning la

han taum onoi usaot e Jerusalem, la kes tingia.

*Di akas e Iesu ana kulam a minat*

(Mt 27:57-61; Lk 23:50-56; Jn 19:38-42)

<sup>42-43</sup> Ning a barsan a risana e Josep, a te Arimatea, takai tagun a tarai a kiwung, a tnan barsan ning a tarai la hanrawai i, i harnanai sur a matanitu ane God. Ning a rah ma ana pukakiar asang, a pukakiar lanigo ana Pukakiar Sabat, i han tetek e Pailat, bel i matmataut, pa i nunung sur a minat e Iesu. <sup>44</sup> E Pailat i kulkulan ning i longori mang e Iesu ka mat. I kabah pas a ningnigo anuna tena harumla, i dekeni mange, "E Iesu ka mat?" <sup>45</sup> Ning ka mananos pas tana ningnigo ne, i malmaling sen a minat e Iesu tetek e Josep. <sup>46</sup> E Josep i lou pas a wakak a kaen, i los purum pas e Iesu, pa i poroi pasi ana kaen ning. Lamur i akas tari ting na kulam a minat, ning di ka kot tari ting na ris a hat, pa i lingir alar a taman na kulam a minat ana tnan hat. <sup>47</sup> E Maria Magdalen pa e Maria, tana e Josep, dia oroi a pukna ning di aborbor e Iesu ono.

## 16

*A kamkamtur ane Iesu kusun a minat*

(Mt 28:1-8; Lk 24:1-10; Jn 20:1-10)

<sup>1</sup> Ning a Pukakiar Sabat ka rop, e Maria Magdalen, pa e Maria tana e Jems, pa e Salome ditol lou pas a ututnala ning i tomtobo sur ditol ar atomtobo a minat e Iesu ono.

<sup>2</sup> Ana kobot ning ot ana ningnigo na pukakiar ana wik, ditol han sur a kulam a minat. <sup>3</sup> Ning ditol han amon ditol deken artalai ditol, "Esi ma ir nangan datol sur ir lakir sen a hat numo kusun a taman ana kulam a minat?" <sup>4</sup> Ning ditol tai tostos utumo, ditol oroi mang di ka lingir sen a tnan hat ning. <sup>5</sup> Ning ditol kas uting na kulam a minat,



ditol oroi ning a barman, i kes tar ana sot a kunditol, i mermer taum ana kokok a kaen. Pa ditol matmataut.

<sup>6</sup> I atai ditol mange, “Gong mutol matmataut. A tasmani mang mutol tai sur e Iesu a te Nasaret, esining di sai ahat tari saot na rakai kutus. Bel i ma te, ka laun ulak. Mutol oroi a pukna ne di aborbor tari ano. <sup>7</sup> Mutol han, mutol ar atai anuna na kakak a asaerla pa e Pita otleng mange, ‘E Iesu ir nigo utumo e Galili. Mulor oroi tumo, lar ot ning ka atai nigon tar mulo.’”

<sup>8</sup> Pa ditol purum pa la dun kusun a kulam a minat taum ana nuknuk kol pa ditol koloron. Bel ditol atai tik ana ta warwara anasa ditol matmataut kol.\*

*E Iesu i hanot tetek e Maria Magdalen*

(Mt 28:9-10; Jn 20:11-18)

<sup>9</sup> [Ning e Iesu ka laun ot ulak ana kobot ning ot ana ningnigo na pukakiar ana wik, i hanot tetek e Maria Magdalen, esining i kepsen mais a mot kusuni. <sup>10</sup> E Maria Magdalen i han pa i atai la ning la sira mur e Iesu, ning la balmamahat pa la tangis suri. <sup>11</sup> Ning la longori mang e Iesu ka laun ulak pa e Maria ka oroi tari, bel la tortorot ono.

*E Iesu i hanot tetek naur a kaklik asasaer*

(Lk 24:13-35)

<sup>12</sup> Lamur e Iesu i hanot tetek naur a kaklik asasaer ning dia han amon ana ngas. A palaona e Iesu i ries. <sup>13</sup> Dia ulak, pa dia atai a kakak a asaerla, ika bel la tortorot otleng on diau.

*E Iesu i hanot tetek ning a bonot pa pisir takai a kakak a asaerla*

(Mt 28:16-20; Lk 24:36-49; Jn 20:19-23; Ap 1:6-8)

<sup>14</sup> Lamur i hanot pas tetek ning a bonot pa pisir takai a kakak a

asaerla kaning la hangan. Pa i warwara rakrakai onla, anasa bel la tortorot, pa a balanla i rakrakai, pa bel la tortorot onla ning la ka oroi tari ning ka laun ulak. <sup>15</sup> I atai la mange, “Mulor han uting na rakrakan hanua rop, pa mulor warawai ana Wakak a Warwara tetek a taraila rop. <sup>16</sup> Esining i tortorot pa di baptaisi dir alauni. Ika esining bel i tortorot, God ir saran a rakrakai a warkurai teteki sur ir mat. <sup>17</sup> A tena tortorotla lar tol a ututnala na kulkulan larne: Lar kepsen a motla ana risak, lar warwara ana urmatana tona warwara, <sup>18</sup> lar tong a soila, pa ning lar gang a malum laulau, bel ir alaulau la, pa lar suah a kunla ana tinsamanla, pa lar langolango.”

*E Iesu i han kas usaot na langit (Lk 24:50-53; Ap 1:9-11)*

<sup>19</sup> Ning a Leklek e Iesu ka warwara tar tanla, e God i rakan pasi usaot na langit, pa i kes ana sot a kuna. <sup>20</sup> Anuna kakak a asaer la han, pa la warawai ana hanhanua rop. Pa a Leklek i nangan la, pa i amomol tar anuna na warwara ana ututnala na kulkulan ning i han taum ono.]

\* **16:8:** Dingla na tena mananos ana Buk Tabu la nuki mang e Mak i manah ka te. La nuki mang tik masuk i tumus tar a ves 9-20.

## A Wakak a Warwara o e Iesu Karisito e Luk i tumusi

### *A warwara talapor nigo*

E Luk i tumus a buk ne. Bel sur i ning a halin na ning a bonot pa pisir naur a kakak a asaerla ane Iesu. Pa bel otleng i a te Juda, i a te Grik. Anuna hanua ngandek e Antiok ana papar Siria. E Luk bel i oroi tar a ututnala ning e Iesu i toli. I kibas tastasman ka tanla ning la atatai o e Iesu.

Nating anuna titol a dokta, pa i tasman wakak a warwara Grik.

A buk ne a ningnigo na buk ning e Luk i tumusi, pa i tumus otleng a buk Aposel. I tumus a buk ne sur a tarai Grik lar tasman wakak a warwara o e Iesu pa lar tortorot onoi. Lar tasmani mang e Iesu i hanot purum ute sur ir alaun a taraila rop. E Luk i tumtumus otleng o e Iesu mang i hanot a barsan momol, pa i asangan anuna marmaris tetek a kapan na taraila pa tetek dala rop taktakai.

I tumtumus otleng ana ututnala ne: A atong leklek tetek e God, a rakrakai ana Talngan Tabu, a nunung, pa a lalaun anuna kapan na taraila pa a gongon a tarai.

### **A tinan ana buk Luk:**

A kamkama buk ne (1:1-4)

A agon ane Iesu pa e Jon a Tena Baptais (1:5-2:52)

A titol ane Jon a Tena Baptais (3:1-20)

Di baptais e Iesu pa lamur e Satan i lami (3:21-4:13)

E Iesu i titol to e Galili (4:14-9:50)

E Iesu i han usaot e Jerusalem (9:51-19:27)

A ararop na wik pa a minat ane Iesu (19:28-23:56)

A kamkamtur ulak ane Iesu kusun a minat, pa anuna tinan kas (24:1-53)

<sup>1</sup> Tetek e Tiopilus,

A galis la tohoi pa la ka tolsot pas a tumtumus ana ututnala ning i hanot arpotor i mila. <sup>2</sup> La ning la ka oroi nigon tar a ututnala ne, pa la asaer a tarai ana Wakak a Warwara, la atai mila ana ututnala ne. <sup>3</sup> Pa iau otleng, ia ka tikin otnan pas a ututnala ne ana turturkamna, larning a nuki mang i wakak sur ar tumus tari tetek u, e Tiopilus a leklek. Ar tumus a ututnala ne arlar ana armuri ot anunla, <sup>4</sup> sur ur tasmani mang a ututnala di ka asaer tar u onoi, i momol.

### *A warwara talapor nigo mang dir agon e Jon a Tena Baptais*

<sup>5</sup> Ana rau ning e Herot i king ana papar Judia, ning a tena artabar tetek e God a risana e Sekaria, tagun a kunum na tena artabarla o e Abia. E Sekaria, anuna hane a risana e Elisabet, i otleng a mangis a tarai ane Aron. <sup>6</sup> Dia naur a tena tostos namatana e God, dia mur wakak a Warkuraila rop anuna Leklek. <sup>7</sup> Ika bel ta natundiau, anasa e Elisabet i pombo, pa dia ka lapun otleng.

<sup>8</sup> Ning a pukakiar, ana pukakiarla na artabar anuna kunum ane Sekaria, e Sekaria i tol anuna titol na artabar namatana e God. <sup>9</sup> Arlar ana toltol a aslang\* ning a tena artabarla tetek e God la sira muri, la aslang e Sekaria sur i ot ir kas ting na rumai a artabar anuna Leklek, pa ir tun a utna ning i toboh wakak. <sup>10</sup> Ning i tun a utna ning i toboh wakak, a tarai a lotu ning la tur tumolapiu la nunung.

<sup>11</sup> A angelo anuna Leklek i hanot tetek e Sekaria, pa i tur ana ris a sot ana logo na tun artabar, ning

\* **1:9:** La tol ning a titol sur ir asangan la mang esining ir tol a titol na artabar. Dingla na tarai la nuki mang i arlar lar la ning la tumus a risanla taktakai ting na hatatla, pa esining a risana i hanot ir los a titol ning.

di tun a utna ning i toboh wakak onoi. <sup>12</sup> Ning e Sekaria i oroi i, a palaona i suren, pa i matmataut kol onoi. <sup>13</sup> Ika a angelo i atai i mange, “Sekaria, gong u matmataut, e God ka longor anuma nunung, pa anuma hane e Elisabet ir agon pas a natumlik a barsan, pa ur pasar a risana e Jon. <sup>14</sup> Ur gas kol onoi, pa galis otleng lar gas ana nuna agon, <sup>15</sup> anasa ir itna na matan a Leklek. Bel ir gang a wain, pa a gang laulaula, pa ning belot dir agoni, ka bukus ana Talngan Tabu. <sup>16</sup> Pa ir ben ulak a galis a tarai Israel tetek a Leklek a God anunla. <sup>17</sup> Ir rakraikai arlar ana propet Elias, pa a magirana otleng ir arlar onoi. Ir nigo tana Leklek, sur ir ben taum na tamtamana kakakla tetek na natnatunla sur lar aremoro ulak, pa ir ben a tarai a tabun longor sur a wakak a nuknuk anuna tostos a tarai, sur ir sang a tarai anuna Leklek sur anuna tinan ot.”

<sup>18</sup> E Sekaria i deken a angelo mange, “Ar tasman mangmangasa i mang a utna ne ir hanot? Anasamia ka lapun.” <sup>19</sup> Pa a angelo i kelesi mange, “Iau e Gebriel, a sira tur namatana e God. I ot i sune iau sur ar atai u, pa ar los a wakak a warwara ne tetek u. <sup>20</sup> Oroj, onone bel ur warwara lar pas tuk ana pukakiar ning a utna ne ir hanot. Bel ur warwara, anasa bel u tortorot ana nuka warwara, ning ir hanot tostos ana pukakiarna.”

<sup>21</sup> A tarai la nanan e Sekaria, pa la nuknuk kol mang sur asa ning ka bongnani ting na rumai a artabar. <sup>22</sup> Ning i purum, bel i warwara lar pasi tetek la. Pa la tasmani mang e Sekaria ka oroi tar ta tatatai ana rumai a artabar, anasa i akinalang kama tetek la ana naur a kuna.

<sup>23</sup> Ning ka rop anuna pukakiarla na titol, i ulak sur anuna hanua. <sup>24</sup> Pa lamur, e Elisabet anuna hane i tianan, pa dilima na kalang bel

i han masik pas kusun a rumai. <sup>25</sup> Pa i atongi mang, “Onone bot a Leklek i nangan iau pa i kepsen a utna ning a meme onoi tan a tarai.”

*Di atai e Maria mang ir agon e Iesu*

<sup>26</sup> Ning ka diono na kalang ane Elisabet, e God i sune a angelo Gebriel utumo e Galili ana ning a hanua a risana e Nasaret. <sup>27</sup> I han tetek a basbas a risana e Maria, ning di ka suah alar tari sur ane Josep, i ning tagun a mangis a tarai ane king Dewit. <sup>28</sup> A angelo i han tetek e Maria pa i atai i mange, “Ur gas, u angis kol! A Leklek i kes taum hom.” <sup>29</sup> Pa e Maria i nuknuk loklokron kol ana warwara ne, mang asa a kamkamna. <sup>30</sup> Pa a angelo i atai i mange, “Maria, gong u matmataut, e God i gas kol hom. <sup>31</sup> Longori! Ur tianan, ur agon pas a kaklik barsan, pa ur pasar a risana e Iesu. <sup>32</sup> Pa a risana ir rarang, pa dir atongi mang a Nat e God i Leklek Kol. Pa a Leklek e God, ir akesi ana keskes a king ane tubuna e Dewit, <sup>33</sup> pa ir king tikin ana mangis a tarai ane Jekop, pa anuna matanitu bel ir rarop.” <sup>34</sup> E Maria i deken a angelo mang, “Ir mangmangasa? Anasa bel a lasan taum ana ta barsan.” <sup>35</sup> A angelo i kelesi mang, “A Talngan Tabu ir kes hom, pa a rakraikai e God ir poroi alar u. Larning a Tena Totoh ning ur agon pasi, dir atongi mang a Nat e God. <sup>36</sup> Oroj, a maim e Elisabet ka lapun, pa di atongi mang a pombo, ika anone ka tianan, pa ka diono na kalang anunai. <sup>37</sup> Anasa bel ta utna i ngangaten tetek e God.” <sup>38</sup> Pa e Maria i atongi mang, “Iau a tena titol oros anuna Leklek, i wakak ka ning dir toli hok arlar ana numa warwara.” Lamur a angelo i han kusuni.

*E Maria i han tetek e Elisabet*

<sup>39</sup> Lamur e Maria i sang pas, pa i han kas kapit sur a hanua ning i kes saot na mangir ana papar Judia. <sup>40</sup> I kas ana rumai ane Sekaria, pa i kabah na gasgas pas e Elisabet. <sup>41</sup> Ning e Elisabet i longor a arkabah na gasgas ane Maria teteki, a kaklik i pele ting na balana, pa e Elisabet i bukus ana Talngan Tabu. <sup>42</sup> Pa i warwara ana tnan elngena mang, “U angis tan a gurarala rop, pa a kaklik otleng ning ur agoni i angis. <sup>43</sup> Iau esi na ngas a hane ne ning e tana Leklek anuki ir han tetek iau? <sup>44</sup> Ning a longor anuma arkabah na gasgas tetek iau, a kaklik i gas, pa i pele te na balak. <sup>45</sup> U angis anasa u tortorot mang a warwara anuna Leklek tetek u ir hanot momol.”

*E Maria i aleklek pas e God*

<sup>46</sup> E Maria i atongi mang,  
 “A inguk i aleklek pas a Leklek,  
<sup>47</sup> pa a balak i gas o e God,  
 anuka Tena Alaun,  
<sup>48</sup> anasa i maris iau anuna tena titol oros, ning iau a hane oros ka.  
 Turpasi anone a mangis a taraila rop lar atongi hok mang a angis,  
<sup>49</sup> anasa Esi ning i Leklek Kol, ka tol tar a tatatnan utnala hok,  
 a risana i totoh.  
<sup>50</sup> Anuna marmaris i kes tetek la ning la hanrawai i,  
 i kes tetek a tarai tagun onone,  
 pa tagun lamur.  
<sup>51</sup> I tol a rarakai a titol ana kuna, pa ana rarakaina i minggen sarara la ning la rakan aleklek la ana nuknukinla.  
<sup>52</sup> I minggen purum a kingla kusun anunla keskes a leklek,  
 pa i aleklek pas la ning di nuki mang a tarai oros ka.  
<sup>53</sup> I tabar a kapan a tarai ana wakak a ututnala  
 pa i sune sen a leklekla ana wah a kunla.

<sup>54</sup> I nangan anuna tena titolla, a tarai Israel,  
 pa i nuk pas anuna marmaris  
<sup>55</sup> tetek e Abaram pa anuna mangis a tarai tikin,  
 larning ka atong tari tetek anundala mangis a tarai tagun nating.”

<sup>56</sup> Pa e Maria i kes napirna e Elisabet arlar ana natol a kalang, pa lamur i ulak sur anuna hanua.

*Elisabet i agon pas e Jon a Tena Baptais*

<sup>57</sup> Ning a pukakiar ane Elisabet i sot sur ir agon onoi, i agon pas a kaklik barsan. <sup>58</sup> A halalna pa na mainala la longori mang a Leklek i maris kol e Elisabet, pa la gas taum onoi.

<sup>59</sup> Ning ka siwal a pukakiar anuna kaklik, la sang sur dir kot talilisi, pa la mang sur lar pasar a risana e tamana e Sekaria onoi. <sup>60</sup> Ika e tana i atongi mange, “Gong! A risana ot e Jon.” <sup>61</sup> La atongi tana mang, “Bel ta maim i kibas a rising ning.” <sup>62</sup> Lamur la tol a asilang ana kunla tetek e tamana, sur lar dekeni mang esi na rising ning i mang sur dir pasar a kaklik ono. <sup>63</sup> Pa i akinalang sur ta utna ning ir tumtumus onoi, pa i tumusi mang, “A risana e Jon.” La rop la kulkulan. <sup>64</sup> Ono otne a pahana e Sekaria i sapang, pa a laigeremna i tapalas, pa i warwara kakat, i atong leklek pas e God. <sup>65</sup> Pa na halalindiau rop, la matmataut kol. A warwarala ana ututnala ne, i han sarara ana hananuala ning la kes saot na mangir ana papar Judia. <sup>66</sup> La rop ning la longori, la nuknuk kol onoi, pa la atongi mang, “A kaklik ne ir hanot esi na ngas a barsan?” Anasa la oroi mang a rarakai ana Leklek i kes onoi.

*E Sekaria i warwara na propet*

<sup>67</sup> E Sekaria e tamana e Jon, i bukus ana Talngan Tabu, pa i warwara na propet mange,

<sup>68</sup> “Dalar aleklek pas a Leklek, a God anuna tarai Israel, anasa ka hanot tetek anuna tarai, pa ka alangolango pas la.

<sup>69</sup> Ka saran tar a rakrakai na Tena Alaun tetek dala, tagun a mangis a tarai ane Dewit, anuna tena titol,

<sup>70</sup> larning ka atong tari nating ot ana pahana nuna totoh a propetla.

<sup>71</sup> Ka saran tari sur ir alaun pas dala kusun anundala hiruala, pa kusun a kunla rop ning la nget dala,

<sup>72</sup> pa sur ir maris anundala mangis a tarai tagun nating pa ir tolsot pas anuna totoh na kunubus.

<sup>73</sup> I lele tar tetek a tubundala e Abaram,

<sup>74</sup> mang ir alaun dala kusun a kuna nundala hiruala, sur dalar titol teteki pa bel dalar matmataut.

<sup>75</sup> Dalar titol teteki ana toltol ning i totoh pa i tostos namatana, ana nundala pukakiarla na lalaun rop.

<sup>76</sup> Pa u a natuklik, dir atong u, a propet ane God i Leklek Kol, anasa ur han nigo tana Leklek, sur ur tol nigon anuna ngas,

<sup>77</sup> sur ur atalapor anuna tarai mang dir alaun pas la mangmangasa.

Dir kepsen tar anunla na toltol laulaula,

<sup>78</sup> anasa ana tnan marmaris anuna God anundala.

Pa ana nuna marmaris a talapor misaot ir sasai ot tetek dala.

<sup>79</sup> Ir sasai onla ning la kes ana mormorom, pa ana mormorom na minat,

sur ir nigon dala ana ngas a bal molmol.”

<sup>80</sup> Pa a kaklik i itna amon, pa i rakrakai ana inguna. Pa i kes ana hanua bel tuk ning i tur ot tetek a tarai Israel.

## 2

### *E Maria i agon e Iesu (Mt 1:18-25)*

<sup>1</sup> Ting na rau ning, e Sisar Augustus i warkurai i sur dir tumus a risana tarai ana hananuala rop ning la kes nahai a matanitu ane Rom. <sup>2</sup> Ine a ningnigo na pukakiar ning di tumus a risandi ning e Kwirinius i a ningnigo tumo na papar Siria. <sup>3</sup> Pa a taraila rop la han sur anunla na hananuala momol sur dir tumus a risanla.

<sup>4</sup> E Josep otleng i han kusun a hanua Nasaret ana papar Galili sur e Betlehem ana papar Judia, anasa i tagun a mangis a tarai ane Dewit. E Betlehem, a hanua ning di agon e Dewit ono. <sup>5</sup> I han sur dir tumus a risana, taum ana risana e Maria ning di ka suah alar tari sur anunai. Ning dia han e Maria ka tianan. <sup>6</sup> Pa ning dia kes to e Betlehem, a pukakiar i sot sur e Maria ir agon, <sup>7</sup> pa i agon pas a ningnigo na natnalik, a kaklik barsan. Pa i poroi i ana kaenla na kakakla, pa i aborbori ana bok ning a inagoila la sira hangan onoi, anasa a rumai a wasira ka bukus pas kusun ditol.

*A warwara ana agon ane Iesu tetek a tena tatatai alarla ana sip-sipla*

<sup>8</sup> Dingla na tena tai alar ana sip-sipla, la tai alar anunla na liur a sipsip ana morom saot milau ana hanua ning. <sup>9</sup> Pa angelo anuna Leklek i hanot tetek la, pa a matatar anuna Leklek i talapor talilis la, pa la matmataut kol. <sup>10</sup> A angelo i atai la mange, “Gong mulo matmataut. Mulo oroi, a hanot tetek mulo ana wakak a

warwara ning ir agasgas a taraila rop. <sup>11</sup> Onone, ana hanua ane Dewit, di ka agon tar anumulo a Tena Alaun, esaning a Karisito\*, a Leklek. <sup>12</sup> Pa mulor tai sur a asilang mang: A kaklik di poroi tari ana kaenla na kakakla, pa di aborbor tari ana bok na hangan ana inagoila.”

<sup>13</sup> Bel i bongnani pa a tnan kunum a angelo misaot na langit la hanot tetek a angelo ning, pa la atong lekkek pas e God mange,

<sup>14</sup> “Dalar atong lekkek a risana e God tisaot kol, pa bal molmol ana rakrakan hanua rop tetek la ning i gas onla.”

<sup>15</sup> Ning a angelola la ka han kusun la usaot na langit, a tena tatataialarla ana sipsipla, la warwara artalai la mang, “Ano otne dalar han utumo e Betlehem, dalar oroi a utna ne ka hanot, ning a Leklek ka atai tar dala onoi.”

<sup>16</sup> Pa la han kapit, pa la pastetek pas e Maria pa e Josep pa a kaklik betbete ning i borbor tar ana bok na hangan ana inagoila. <sup>17</sup> Ning la ka oroi tar a kaklik, la patuai talapor ana warwara ning a angelo ka atai tar la onoi ana kaklik ning. <sup>18</sup> Pa la rop ning la longor a warwara anuna tena tatataialarla ana sipsipla, la kulkulan onoi. <sup>19</sup> Ning e Maria i longor a warwara ne, i tong akesi ana balana pa i nuknuk kol onoi. <sup>20</sup> A tena tatataialarla ana sipsipla la ulak, la aleklek pas e God pa la atong lekkek ana utna ning la longori pa la ka oroi tari, arlar ana warwara anuna angelo tetek la.

*Di pasar a risana e Iesu*

<sup>21</sup> Ning ka siwal a pukakiar anuna kaklik, pa ka sot sur dir kot talilis a palaona, di pasar a risana mang e Iesu. A rising ning,

a angelo ot ka atong tari nating, ning e Maria belot i tianan.

*Di saran tar e Iesu tetek a Leklek*

<sup>22-24</sup> E Josep pa e Maria dia tolsot pas a pukakiarla na atotoh, arlar ana warkurai ane Moses. Pa ning ka rop, dia han usaot e Jerusalem sur diar artabar ana “naur a tabun o naur a barman a balus,” *Liwai 12:8*

arlar ana warwara na warkurai anuna Leklek. Pa dia los e Iesu otleng usaot e Jerusalem, sur diar saran tari tetek a Leklek, larning di ka tumus tari ana warkurai anuna Leklek mang, “A ningnigo na kakak barsanla rop pa a ningnigo na barsan a inagoila, dir saran la tetek a Leklek.” *Kisim Bek 13:2, 12*

<sup>25</sup> Ning a barsan i kes saot e Jerusalem a risana e Simion, a tena tostos pa a tena hanrawai tetek e God. I harnanai sur e God ir alaun a tarai Israel, pa a Talngan Tabu i kes onoi. <sup>26</sup> A Talngan Tabu ka atalapor tari teteki mang bel ir mat tuk ning ir oroi tar ot a Karisito anuna Leklek. <sup>27</sup> A Talngan Tabu i nigon kasi uting na rumai a artabar. Ning i oroi pas disuana dia hanot ana kaklik e Iesu sur diar tol a artabar larning di ka tumus tari ana warkurai, <sup>28</sup> e Simion i kibas pas e Iesu ana naur a kuna. Pa i atong lekkek e God mange,

<sup>29</sup> “Leklek, onone ur alangolango iau, anuma tena titol oros, sur ar han ana bal molmol, arlar ana num a lele.

<sup>30</sup> Anasa ia ka oroi tar anuma arlaun ana matak,

<sup>31</sup> a arlaun, ning u ka sang tari namatana mangis a taraila rop.

<sup>32</sup> A talapor ning ir atalapor anuma ngas tetek la ning bel a tarai Israel,

\* **2:11:** A Karisito i a barsan ning e God i aslangi pa i sune purumi sur ir alaun a tarai rop. A Karisito a warwara Grik, pa ana warwara Hibru di atongi mang a Mesaia.

a talapor sur a matatar tetek anuma tarai Israel.”

<sup>33</sup> E Tamana pa e tana dia kulkan kol ana warwara ne Simion i atongi o e Iesu. <sup>34</sup> E Simion i angangis ditol, pa i atai e Maria, tana e Iesu, mang, “A kaklik ne, e God i aslang pasi sur a galis a tarai Israel lar hirua onoi pa a galis otleng lar laun onoi, pa i a akinalang ning a galis a tarai lar bilbilori. <sup>35</sup> Ning lar bilbilori dir atalapor a nuknuk tagun a balana a galis a tarai. Pa u, a bal mamahat ning ur kilangir arlar ana liwan na harum ning ir so anuma lalaun.”

<sup>36-38</sup> Pa ning a hane, a propet, a risana e Ana, ano otning i hanot tetek ditol. A hane ne a nat e Panuel, tagun a mangis a tarai e Aser. Ka wan laulau, ka siwal a bonot pa pisir diat a rau anunai pa ka lao. Dia taulai pas ka mais a rau pa lamur anuna barsan i mat. A hane ne bel i han kusun a rumai a artabar, i lotlotu ana kamkamis pa ana morom, i sira tamai pa i sira nunung. Ning i hanot tetek ditol i atong wakak tetek e God, pa i warwara ana kaklik tetek la rop ning la harnanai sur e God ir alaun pas a tarai Jerusalem.

#### *Ditol ulak utumo e Nasaret*

<sup>39</sup> Ning e Josep pa e Maria dia ka tolsot pas a ututnala rop arlar ana warkurai anuna Leklek, ditol ulak utumo e Galili sur anunla hanua Nasaret. <sup>40</sup> Pa a kaklik i itna amon pa i rakrakai, pa i bukus ana tastasman, pa a marmaris ane God i kes onoi.

#### *E Iesu i kes tingui na rumai a artabar*

<sup>41</sup> Ana raula rop, e tamana e Iesu pa e tana dia sira han usaot e Jerusalem ana lotu na Han Lakai. <sup>42</sup> Ning ka ning a bonot pa pisir naur a rau ane Iesu, ditol han usaot e Jerusalem sur a lotu na Han Lakai, lar otning la sira toli. <sup>43</sup> Ning a lotu ka rop pa la ulak amon, e Iesu i kes suai

saot e Jerusalem, ika e tamana pa e tana bel dia tasmani. <sup>44</sup> Dia nuki mang e Iesu i han taum ana taraila. Ning ka takai a pukakiar ana nunla tinan ulak, dia turpasi sur diar tai sur e Iesu ting na potorna mainditol, pa a halalinditol.

<sup>45</sup> Ning dia tai panai tar suri, dia ulak usaot e Jerusalem, sur diar tai suri tisaot. <sup>46</sup> Ning dia ka tai pas natol a pukakiar, dia pastetek pas e Iesu tingui na woroh na rumai a artabar. I kes taum ana tena asaerla tagun a warkurai, i longor la, pa i deken la ana kabahla. <sup>47</sup> Pa la rop ning la longori, la kulkulan ana nuna fastasman, pa ana nuna arkeles tetek la. <sup>48</sup> Ning dia oroi pasi, dia kulkulan, pa e tana i atai i mange, “Natuklik, sur asa ning u toli larne o miau? Mia ma e tamam mia ka seren panan tar u, pa mia matmataut kol hom.” <sup>49</sup> Pa i deken diau mange, “Asa ning mu seren iau suri? Bel mu tasmani mang i tostos sur ar kes te na rumai ane Tamang?” <sup>50</sup> Ika bel dia talapor ana nuna warwara.

<sup>51</sup> Lamur ditol ulak utumo e Nasaret, pa i sira longlongor kol tan diau, pa e tana i nuk akes a ututnala rop ning. <sup>52</sup> E Iesu i itna amon a palaona pa nuna tastasman, pa i itna a gasgas ane God pa a tarai onoi.

## 3

#### *E Jon a Tena Baptais i warawai (Mt 3:1-12; Mk 1:1-8; Jn 1:19-28)*

<sup>1</sup> Ka takai a bonot pa dilima na rau ana matanitu ane Sisir Tiberius, e Pontius Pailat i a tran ningnigo ana papar Judia, pa e Herot i a ningnigo ana papar Galili, pa e tasnalik e Pilip i a ningnigo ana naur a papar Ituria pa e Trakonitis, pa e Lisantias i a ningnigo ana papar Abilene <sup>2</sup> pa e Anas pa e Kaiapas dia kibas a titol na ningnigo na tena artabar tetek e God. Ana rau ning, a warwara ane God i hanot tetek e

Jon, a nat e Sekaria, ning i kes saot na hanua bel. <sup>3</sup> Pa i han uting na puknala rop milau ana malum Jodan, i warawai sur a tarai lar lingir a nuknukinla pa dir baptais la, pa e God ir kepsen anunla na toltol laulaula. <sup>4</sup> Larning di ka tumus tari ana buk anuna propet Aisaia mang,

“A elngena mainla i arkabah ting na hanua bel mang,

‘Mulor sang a ngas anuna Leklek, mulor atostos anuna ngasla.

<sup>5</sup> A palisla rop dir por la pa a pukaleklekla rop pa a mangirla dir kel tostos la.

A ngasla rop ning la ngokngok dir atostos la, pa a puknala ning la tungtung, dir por tostos la.

<sup>6</sup> Pa a taraila rop lar oroi a titol ane God ning i alaun a tarai ono.’”

*Ais 40:3-5*

<sup>7</sup> A kunum a tarai la hanot tetek e Jon sur ir baptais la. Pa i atai la mang, “Ai, mulo na natnat a soila! Esining i atumarang mulo sur mulor liu kumna kusun a warkurai na arkeles ane God ning ir hanot? <sup>8</sup> Mulor tol a ututnala ning ir apuasa i mang mulo ka lingir a nuknukimulo. Pa gong mulo nuki mang e God bel ir warkurai mulo anasa mulo a mangis a tarai ane Abaram\*. A atai mulo, e God i tolsot pasi sur ir tol otnan a mangis a tarai ane Abaram tagun a hatatlane. <sup>9</sup> Di ka suah tar a hek ting na kama rakaila, pa rakaila rop ning bel la suah al wakak a wanala, dir ting sen la, pa dir minggen la uting na iah.”

<sup>10</sup> A kunum a tarai la dekeni mang, “Asa ning milar toli?” <sup>11</sup> I keles la mang, “Esining anuna ir naur a kaen a mermer, ir saran tik tana tik ning bel anuna ta kaen a mermer, mang otleng larning ana utna na hangan.” <sup>12</sup> Pa dingla na tena los totokom la hanot sur ir

baptais la. Pa la dekeni mange, “Tena asaer, asaning milar toli?” <sup>13</sup> Pa i keles la mange, “Gong mulo kibas totokom i itna tana potopoto ning di ka suah tari.” <sup>14</sup> Pa dingla na tena harum la dekeni mang, “Pa mila, asaning milar toli?” Pa i keles la mang, “Gong mulo angongos pas a mani kusun a tarai, pa gong mulo artitui اساسongo, mulor gasgas ka ana numulo na arlou.”

<sup>15</sup> A tarai la harnanai sur e Karisito. Ning la longor e Jon, la nuki mang ngandek i a Karisito. <sup>16</sup> Pa e Jon i atai la rop mang, “A baptais mulo ana malum, ika esaning a rakrakaina i itna tana rakrakaik ir hanot. Pa bel a tolsot pasi sur ar paksen a inau ana anuna su. A natarna kol tana. I ir baptais mulo ana Talngan Tabu pa iah. <sup>17</sup> I tong pas anuna saol ana naur a kuna sur ir minggen sarara a palpala witla kusun a patnala. Ning ka timlan rop tari, ir suah taum anuna wit ting na rumai a wit, pa ir tun sen a palpala ning na iah ning bel i sira mat.” <sup>18</sup> Ning e Jon i warawai tetek la ana Wakak a Warwara i arakakai la ana galis a warwara sur lar lingir anunla na toltol.

<sup>19</sup> Pa e Jon i warwara rakrakai tetek e Herot a ningnigo tagun a matanitu, anasa i taulai ulak e Herodias, a hane ane tasnalik, pa i tol otleng a laulau a ututnala. <sup>20</sup> Pa e Herot i tol ulak a toltol laulau ning i akas e Jon ting na rumai a dodot.

*E Jon i baptais e Iesu  
(Mt 3:13-17; Mk 1:9-11)*

<sup>21</sup> Ning e Jon i baptais amon a taraila rop, i baptais otleng e Iesu. Pa ning i nunung, a langit i sapang, <sup>22</sup> pa a Talngan Tabu i han purum, i suah a palaona lar a tabun, pa i kes saot o e Iesu. Pa a elngena mainla misaot na langit i atongi

\* **3:8:** A tarai Israel la nuki mang e God bel ir warkurai la anasa la a mangis a tarai ane Abaram.



mang, “U a Natuklik, a katnan u, a gas kol hom.”

*A wawas ana mangis a tarai ane Iesu*

*(Mt 1:1-17)*

<sup>23</sup> E Iesu i turpas anuna titol ning ngandek i natol a bonot a rau a lalaun anunai. A tarai la nuki mang i a nat e Josep.

E Josep a nat e Heli,

<sup>24</sup> e Heli a nat e Matat,

e Matat a nat e Liwai,

e Liwai a nat e Melki,

e Melki a nat e Janai,

e Janai a nat e Josep,

<sup>25</sup> e Josep a nat e Matatias,

e Matatias a nat e Amos,

e Amos a nat e Nahum,

e Nahum a nat e Esli,

e Esli a nat e Nagai,

<sup>26</sup> e Nagai a nat e Mat,

e Mat a nat e Matatias,

e Matatias a nat e Semen,

e Semen a nat e Josek,

e Josek a nat e Joda,

<sup>27</sup> e Joda a nat e Joanan,

e Joanan a nat e Resa,

e Resa a nat e Serubabel,

e Serubabel a nat e Salatiel,

e Salatiel a nat e Neri,

<sup>28</sup> e Neri a nat e Melki,

e Melki a nat e Adi,

e Adi a nat e Kosam,

e Kosam a nat e Elmadam,

e Elmadam a nat e Er,

<sup>29</sup> e Er a nat e Josua,

e Josua a nat e Elieser,

e Elieser a nat e Jorim,

e Jorim a nat e Matat,

e Matat a nat e Liwai,

<sup>30</sup> e Liwai a nat e Simion,

e Simion a nat e Juda,

e Juda a nat e Josep,

e Josep a nat e Jonam,

e Jonam a nat e Eliakim,

<sup>31</sup> e Eliakim a nat e Melea,

e Melea a nat e Mena,

e Mena a nat e Matata,

e Matata a nat e Natan,

e Natan a nat e Dewit,

<sup>32</sup> e Dewit a nat e Jesi,

e Jesi a nat e Obet,

e Obet a nat e Boas,

e Boas a nat e Salmon,

e Salmon a nat e Nason,

<sup>33</sup> e Nason a nat e Aminadap,

e Aminadap a nat e Atmin,

e Atmin a nat e Arni,

e Arni a nat e Hesron,

e Hesron a nat e Peres,

e Peres a nat e Juda,

<sup>34</sup> e Juda a nat e Jekop,

e Jekop a nat e Aisak,

e Aisak a nat e Abaram,

e Abaram a nat e Tera,

e Tera a nat e Nahor,

<sup>35</sup> e Nahor a nat e Seruk,

e Seruk a nat e Reu,

e Reu a nat e Pelek,

e Pelek a nat e Eber,

e Eber a nat e Sela,

<sup>36</sup> e Sela a nat e Kainan,

e Kainan a nat e Arpaksat,

e Arpaksat a nat e Sem,

e Sem a nat e Noa,

e Noa a nat e Lamek,

<sup>37</sup> e Lamek a nat e Metusela,

e Metusela a nat e Enok,

e Enok a nat e Jaret,

e Jaret a nat e Mahalalel,

e Mahalalel a nat e Kainan,

<sup>38</sup> e Kainan a nat e Enos,

e Enos a nat e Set,

e Set a nat e Adam,

e Adam a nat e God.

## 4

*E Satan i lam e Iesu*

*(Mt 4:1-11; Mk 1:12-13)*

<sup>1</sup> E Iesu i bukus ana Talngan Tabu. Ning i han mito na malum Jodan, a Talngan Tabu i nigoni uting na hanua bel. <sup>2</sup> I kes tingia diat a bonot a pukakiar pa bel i hangan, pa e Satan i lari. Ning ka rop a pukakiarla ning, i murak. <sup>3</sup> Pa e Satan i atai i mange, “Ning u a Nat e God, ur atai a hat ne sur ir hanot a bret.” <sup>4</sup> E Iesu i kelesi mang, “Di ka tumus tari ting na Buk Tabu mange, ‘A tarai bel la laun ka ana utna na hangan.’” *Lo 8:3*

<sup>5</sup> E Satan i ben pasi ana ning a pukna tisaot, pa ana tuka kamis

ka, i asangan tar a hananuala rop ana rakrakan hanua tana. <sup>6</sup> Pa i atongi tana mang, “Ar tabar u ana matatar inla rop pa ana rakrakai sur ur ningnigo anunala rop, anasa di ka saran tari tak, pa ar sarani tetek tik ning a mang suri. <sup>7</sup> Ning ur lotu tetek iau, a ututnala rop ne anumi ka.” <sup>8</sup> E Iesu i atongi tana mang, “Di ka tumus tari ting na Buk Tabu mange, ‘Ur lotu tetek a Leklek anuma God, pa ur longor ka tana.’” *Lo 6:13*

<sup>9</sup> Pa e Satan i ben pasi usaot e Jerusalem, pa i atur tari sot ot na pukul a rumai a artabar. Pa i atongi tana mang, “Ning u a Nat e God, ur sirok purum mite, <sup>10</sup> anasa di ka tumus tari ting na Buk Tabu mang,

‘Ir warwara tetek anuna angelola sur lar tai alar wakak u. <sup>11</sup> Lar tong pas u ana kunla, sur gong u buh a ham ana ta hat.’” *Buk Song 91:11-12*

<sup>12</sup> E Iesu i kelesi mang, “Di ka atong tari ting na Buk Tabu mang, ‘Gong u lar a Leklek anuma God.’” *Lo 6:16*

<sup>13</sup> Ning e Satan ka lam tari, i han pas kaba kusuni.

*E Iesu i turpas anuna titol tumo e Galili*

*(Mt 4:12-17; Mk 1:14-15)*

<sup>14</sup> E Iesu i ulak utumo na papar Galili ana rakrakai ana Talngan Tabu, pa a warwara onoi i han sarara ana papar rop ning. <sup>15</sup> Pa e Iesu i asaer a tarai ana nunla na rumai a lotula, pa la rop la atong leklek pasi.

*Di lu sen e Iesu mi to e Nasaret*  
*(Mt 13:53-58; Mk 6:1-6)*

<sup>16</sup> Ning e Iesu i hanot to e Nasaret, a hanua ning i itna tar ono, i kas uting na rumai lotu ana Pukakiar Sabat, arlar ot ana nuna toltol, pa i tur sur ir wawas. <sup>17</sup> Pa di saran tar a buk anuna propet Aisaia teteki. I sapang a buk ning di ka in tari, pa i pastek pas a

pukna ning di ka tumus tari onoi mange,

<sup>18</sup> “A inguna Leklek i kes hok, anasa ka aslang pas iau sur ar warawai ana wakak a warwara tana kapan a tarai.

I sune iau sur ar warawai mange, dir paksen la ning di dot akes tar la, dir apalpalas ulak la ning a matanla i kut,

pa dir alangolango la ning la kilang a mamahatla ning di tol tari onla,

<sup>19</sup> pa ar warwara ana rau a marmaris anuna Leklek, ning onone ka hanot.” *Ais 61:1-2*

<sup>20</sup> I in ulak a buk ning, i sarani tetek a tena titol, pa i kes. A taraila rop tingui na rumai lotu la ngoson rakrakai i, <sup>21</sup> pa i atai la mange, “A warwara ne mulo longori, di ka tolsot pasi anone.”

<sup>22</sup> La gas pasi, pa la kulkulan ana nuna wakak a warwara. Pa la atongi onoi mang, “A barsan ne a nat e Josep ka, gepi?” <sup>23</sup> Pa i atai la mang, “Sakana mulor atong a ngas a warwarala ne hok: ‘Dokta, ur alangolango pas u ot! A ututnala ning mila longori mang u ka tol tari to e Kapernaum, i wakak ning ur toli otleng te na num a hanua.’”

<sup>24</sup> Pa e Iesu i atai la mang, “A atong momoli ta mulo, bel ta propet di sira gas pasi ting na hanua ngasna.

<sup>25</sup> A momolna ot mang a galis a lao la kes tumo e Israel ana rau ane Elaija, ning natol a rau pa diona na kalang belal kiar, pa a tnan munurak i kibas a hananuala rop.

<sup>26</sup> Ika e God bel i sune e Elaija tetek ta te Israel, tetek a lao ka ana hanua Sarefat tumo na papar Saidon. Esaning bel a hane Israel.

<sup>27</sup> Pa a galis a lepra la kes tumo e Israel ana rau anuna propet Elisa, ika e God bel i alangolango tik tagun la, e Naman ka a barsan misaot e Siria, ning bel a te Israel.”

<sup>28</sup> A taraila rop ning la kes ting na rumai lotu, la bukus ana balakut\*, ning la longor a warwaralane. <sup>29</sup> La kamtur, pa la lu sen e Iesu kusun a nunla hanua. La ben pasi saot na mangir ning la tol anunla hanua onoi, sur lar minggen purumi ting na ris a hat. <sup>30</sup> Ika i han potor ana kunum a tarai, pa i han ana nuna tinan.

*E Iesu i kepsen sen a mot kusun a barsan*

*(Mk 1:21-28)*

<sup>31</sup> Lamur e Iesu i han utumo e Kapernaum, ana papar Galili, pa i asaer la ana Pukakiar Sabat. <sup>32</sup> La kulkulan ana nuna asasaer, anasa i asaer la lar arlar o esaning a warkurai kaning tana. <sup>33</sup> Tingui na rumai lotu, ning a barsan kaning, a mot i solongi, i kukuk rakrakai mange, <sup>34</sup> "Ai! U e Iesu a te Nasaret. Ur tol asa omila? U hanot sur ur alaulau mila? A tasman u ot, u a Tena Totoh ane God." <sup>35</sup> E Iesu i sairasi mange, "Gong u warwara! Purum kusun a barsan ning!" A mot i minggen purum tari namatanla rop, i purum kusuni, pa bel ta puka palaona i laulau.

<sup>36</sup> A tarai rop la kulkulan kol, pa la deke artalai la mang, "Esi na ngas a warwara ine? I tong a warkurai pa a rakrakai pa ana nuna warwara i kepsen sen a motla, pa la purum kakat."

<sup>37</sup> Pa a warwara o e Iesu i han sarara ana hananuala rop ting na papar ning.

*E Iesu i alangolango pas a galis a tinsaman*

*(Mt 8:14-17; Mk 1:29-39)*

<sup>38</sup> E Iesu i purum kusun a rumai lotu, pa i han sur uting na rumai ane Saimon. Pa e anmuna e Saimon, a hane, i sasam ana laplapang, pa la nunung e Iesu sur ir nangani. <sup>39</sup> Pa e Iesu i tur ting na ngasna, pa i kepsen a laplapang kusuni, pa a hane ning i

langolango. Ano otning i kamtur, pa i tabar la ana utna na hangan.

<sup>40</sup> Ning ka rahmorom, a tarai la ben pas la ning la sasam ana urmatana tinsaman tetek e Iesu. Pa i suah naur a kuna onla taktakai, pa la langolango. <sup>41</sup> Pa a motla otleng la purum kusun a galis, pa la kukuk mang, "U a Nat e God." Ika e Iesu i sairasi la, sur gong la warwara, anasa la tasmani ot mang i e Karisito.

<sup>42</sup> Ning ka kabakiar, e Iesu i han sur uting na hanua bel. A kunum a tarai la sereni. Ning la pasteteki, la tohi sur lar sairasi sur gong i han kusun la. <sup>43</sup> Ika i keles la mang, "Ar warawai ana Wakak a Warwara ana matanitu ane God ana dingla na hananua masik otleng. Anasa ine a kamkamna ning i sune iau ute." <sup>44</sup> Pa i warawai amon ting na rumai lotula ana papar Judia.

## 5

*A ningnigo na kakak a asaerla ane Iesu*

*(Mt 4:18-22; Mk 1:16-20)*

<sup>1</sup> Ning a pukakiar, ning e Iesu i tur tumo latasi ana puka tasi Genesaret, a tarai la tur talilis pasi, sur lar longor a warwara ane God. <sup>2</sup> Pa i oroi pas naur a mon ting latasi, ning dingla na tena minggen uben la ka han kusun diau, kaning la gos anunla na uben. <sup>3</sup> Pa e Iesu i kas ana ning halindiau, a mon ning ane Saimon, pa i atai i mang ir sugut siklik tar a mon usa latasi. Pa e Iesu i kes onoi, pa i asaer a kunum a tarai.

<sup>4</sup> Ning ka rop anuna warwara, i atai e Saimon mang, "Mulor han usa na laman, pa mulor minggen anumulo na uben sur al sis." <sup>5</sup> E Saimon i atai i mang, "Tena Asaer, mila tol panai kol ana kidol a morom, pa bel mila dat pas al sis. Ika, ar minggen ulak tar na

\* **4:28:** La balakut anasa la nuki mang, e God i mang kol sur la tanla ning belsur a tarai Israel.

uben, anasa u arsune.”<sup>6</sup> Ning la minggen tar la, la dat pas a galis a sis, pa nunla na uben milau lar taksilir.<sup>7</sup> La kali pas na halalinla kusun areur a mon sur lar nangan la. Pa la han tetek la, pa la abukus naur a mon rop, pa milau diar murung.<sup>8</sup> Ning e Saimon Pita i oroi a utna ne, i punga purum tingia na hana e Iesu pa i atai i mang, “Leklek, han kusun iau, iau a tena laulau.”<sup>9</sup> Anasa e Saimon pa la ning la armuri la kulkulan ana sista ning la dat pasi,<sup>10</sup> mang otleng larning tetek naur a halalna, e Jems pa e Jon, naur a nat e Sebedi.

E Iesu i kelesi mang, “Gong u matmataut. Turpasi onone, ur dat a taraila.”<sup>11</sup> Ning la ka dat tar naur a mon, la han kusun anunla ututnala rop, pa la mur e Iesu.

*E Iesu i alangolango pas a lepra*  
(Mt 8:1-4; Mk 1:40-45)

<sup>12</sup> E Iesu i kes ana ning a hanua, pa ning a barsan a palaona rop i laulau ana lepra i kes tingia. Ning i oroi pas e Iesu, i punga tuntudu tar ting lapiau pa i nunung rakrakai i mang, “Leklek, ning u mang, ur tolsot sur ur alangolango pas iau.”

<sup>13</sup> Pa e Iesu i tuslan a kuna, i tong a palaona pa i atai i mang, “A mang ot, ur langolango.” Ono otning a lepra i rop kusuni.<sup>14</sup> Lamur e Iesu i warwara rakrakai teteki mang, “Gong u atai tar tik ono. Ur han pa ur asangan u tetek a tena artabar tetek e God, pa ur saran a artabar tetek e God larning e Moses ka atong tari. Ning ur toli larne ir talapor tetek a taraila mang a palaom ka wakak ulak.”

<sup>15</sup> Ika a warwara o e Iesu i han sarara kol tar, pa a galis a tarai la han taum sur lar longori, pa sur ir alangolango pas la kusun a nunla na tinsaman.<sup>16</sup> Ika a galis a pukakiar e Iesu i sira han masuk utumo na hanua bel sur ir nunung.

*E Iesu i alangolango pas a barsan ning a palaona i mat*  
(Mt 9:1-8; Mk 2:1-12)

<sup>17</sup> Ning a pukakiar ning e Iesu i asaer a tarai, dingla na Parisaio pa dingla na tena asaerla tagun a warkurai, la kes tingia. La hanot tagun a hananuala rop ting na papar Galili pa papar Judia pa misaot e Jerusalem otleng. Pa a rakrakai ana Leklek i kes o e Iesu sur ir alangolango na tinsaman.<sup>18</sup> Dingla na barsan la los a barsan ana logo ngasna. A barsan ning a palaona i mat. La tohoi sur lar kas onoi, sur lar aborbori sa lanigo ta e Iesu.<sup>19</sup> Ika bel la kas lar pas onoi, anasa a tnan kunum a tarai. La abit taum onoi usaot na rumai, la kepsen pas ning a pukna tisaot, pa la alorong purum amoni ana logo ngasna na arpotor a kunum a tarai, tostos ting lanigo ta e Iesu.<sup>20</sup> Ning e Iesu i oroi anunla tortorot, i atai i mang, “Halik, di ka kepsen tar anum na toltol laulau.”

<sup>21</sup> A tena asaerla tagun a warkurai pa a Parisaio, la nuknuk ana nuknukinla mang, “Esi na ngas a barsan ne? Ning i warwara larning, i atong saksakan e God anasa i arlari ono. Esi ir kepsen a toltol laulaula? E God ka.”<sup>22</sup> Ika e Iesu ka tasman tar a nuknukinla, pa i deken la mange, “Sur asa mulo nuknuk larne?”<sup>23</sup> Esi na ngas a warwara ning bel i ngangaten sur ar atongi? Ar atongi mange, ‘Di ka kepsen tar anum na toltol laulaula,’ o, ‘Ur kamtur, pa ur han?’<sup>24</sup> Ar atongi larne sur mulor tasmani mang e God ka saran tar a warkurai tetek a Nat a Barsan sur ir kepsen a toltol laulaula te lapiau.” Pa i atai a barsan ning a palaona i mat mange, “A atai u, ur kamtur, ur kibas logo ngasim, pa ur han uting na rumai ngasim.”<sup>25</sup> Ano otning i tur sa lanigo tanla rop, i kibas a logo ngasna, pa i han uting na rumai ngasna. Ning i han amon

i atong lekkek pas e God. <sup>26</sup> Pa la rop la kulkulan, la rakan alekkek pas e God, a palaonla i suren, pa la atongi mang, “Onone, dala oroi a maskan a utna i totoh ana ororo i anundala.”

*E Iesu i kabah pas e Liwai*  
(Mt 9:9-13; Mk 2:13-17)

<sup>27</sup> Ning ka rop a ututnala ne, e Iesu i han pa i oroi pas a tena los totokom, a risana e Liwai, i kes ting na rumai a los totokom, pa e Iesu i atai i mange, “Ur mur iau.” <sup>28</sup> Pa e Liwai i kamtur pa i han kusun anuna ututnala rop, pa i muri.

<sup>29</sup> Lamur e Liwai i tol a tnan utna na hangan o e Iesu ting na nuna rumai. A galis a tena los totokom pa dingla na tarai otleng la kes taum o e Iesu ana utna na hangan ne. <sup>30</sup> Dingla na Parisaio pa anunla na tena asaerla tagun a warkurai, la lingir anuna na kakak a asaerla mange, “Sur asa ning mulo hangan pa mulo gang taum ana tena los totokomla pa a tena laulaula?” <sup>31</sup> E Iesu i keles la mange, “A dokta bel i hanot sur la ning la langolango. I hanot sur la ka ning la sasam. <sup>32</sup> Bel a hanot sur a tena tostosla. A hanot sur ar kabah pas a tena laulaula sur lar lingir a nuknukinla.”

*A kabah ana tamai*  
(Mt 9:14-15; Mk 2:18-20)

<sup>33</sup> Dingla na tarai la atai e Iesu mange, “A kakak a asaerla ane Jon la sira tamai pa la nunung, mangotleng lar a kakak a asaerla anuna Parisaiola. Ika anum na kakak a asaerla la hangan pa la gang.” <sup>34</sup> E Iesu i keles la mange, “Ning ta barsan ir taulai totoh, na halalna lar tamai mangmangasa ning a barsan ning kaning ot i kes taum onla? <sup>35</sup> Ika ta pukakiar ir hanot, ning dir ben maskan pas a barsan ning kusun la, pa ana pukakiar ning lar bot tamai.”

*A warwara larlar ana kaen pa a wain*

(Mt 9:16-17; Mk 2:21-22)

<sup>36</sup> E Iesu i warwara larlar otleng tetek la mange, “Bel tik ir silir pas ta dia kaen tagun a tona kaen, sur ir suk ahati ana muar a kaen. Ning ir toli larning, ir silir laulau a tona kaen, pa tona dia kaen bel ir arlar taum ana dia muarna. <sup>37</sup> Pa bel tik ir tere a tona wain uting na turai a koto na wain ning di toli ana palaona inagoi. Ning ir toli larning, a tona wain ir bubus pa ir pusa a turai a koto, pa a wain ir tapek, pa koto na wain otleng ir laulau. <sup>38</sup> Dir pek ot a tona wain uting na tona koto na wain. <sup>39</sup> Bel tik ning ka gang pas a muar a wain, ir mang ulak sur a tona wain, ir atongi ka mang, ‘A muarna ot i wakak.’”

## 6

*E Iesu a Lekkek tagun a Pukakiar Sabat*

(Mt 12:1-8; Mk 2:23-28)

<sup>1</sup> Ana ning a Pukakiar Sabat, e Iesu i han potot ting na barim a wit, pa anuna kakak a asaerla la turpas a kumut kutus a witla, la gisgisi ana kunla pa la ieni. <sup>2</sup> Dingla na Parisaio la deken e Iesu mange, “Sur asa ning mulo tol a utna ning pa bel mulo mur a warkurai tagun a Pukakiar Sabat?” <sup>3</sup> Pa e Iesu i keles la mange, “I mangasa, belot mulo was asaning e King Dewit i toli ning i taum ana taraila ning la armuri la murak? <sup>4</sup> I kas uting na rumai ane God, i kibas pas a bret ning di tabar tar e God ono, i ieni, pa i tabar la otleng ning la armuri. A bret ning di sairasi kusun a tarai oros. I arlar ana Warkuraila sur a tena artabarla ka tetek e God lar ieni.” <sup>5</sup> Pa e Iesu i atai la mange, “A Nat a Barsan ot a Lekkek tagun a Pukakiar Sabat.”

*E Iesu i alangolango pas a barsan ning a kuna del*

(Mt 12:9-14; Mk 3:1-6)

<sup>6</sup> Ana ning a Pukakiar Sabat ulak, e Iesu i kas uting na rumai lotu, pa i asaer a taraila. Pa ning a barsan kaningia, a sot a kuna i del. <sup>7</sup> A Parisaiola pa a tena asaerla ana Warkuraila la tai sur ta ngas ning lar arup e Iesu ono, pa la ngoson murmuri mang ir alangolango a tinsaman ana Pukakiar Sabat, o bel. <sup>8</sup> Ika e Iesu i tasman a nuknukinla pa i atai a barsan ning a kuna i del mang, “Kam-tur! Pa ur tur ting lanigo tanla rop.” I kamtur, pa i tur sa lanigo tanla. <sup>9</sup> Lamur e Iesu i atai la mange, “Ar deken mulo: Asa ning a Warkuraila i atongi sur dir toli ana Pukakiar Sabat? Dir tol a wakakna o dir tol a laulauna, dir alaun tik o dir alaulau tik?” <sup>10</sup> Pa i tai taltal tetek la rop, pa i atai a barsan mang, “Ur kodos a kum.” Pa i kodosi, pa a kuna i tostos ulak. <sup>11</sup> Pa a balanla i bukus ana balakut, pa la warwara artalai tanla sur ta utna lar toli o e Iesu.

*E Iesu i aslang pas ning a bonot pa pisir naur a aposella*

(Mt 10:1-4; Mk 3:13-19)

<sup>12</sup> Ning a pukakiar, e Iesu i han usaot na mangir sur ir nunung. A kidol a morom ning, i nunung tetek e God. <sup>13</sup> Ning i kabakiar, i kabah pas anuna tarai a asasaer teteki, pa i aslang pas ning a bonot pa pisir naur tagun la, pa i atong la a aposella\*. <sup>14</sup> Ne a risanla: E Saimon ning e Iesu i saran tar ning a risana otleng e Pita, ditas ma e Endru, Jems, Jon, Pilip, Batolomiu, <sup>15</sup> Matiu, Tomas, e Jems a nat e Alpius, e Saimon ning tagun a kunum Silot,† <sup>16</sup> e Judas a nat e Jems, pa e maurana otleng e Judas Iskariot esaning i asobor tar e Iesu.

*E Iesu i asaer a tarai pa i alangolango la*

(Mt 4:23-25)

<sup>17</sup> E Iesu pa anuna tarai a asasaer la han purum misaot na mangir, pa i tur ting na puka tostosna, taum ana nuna kunum a tarai a asasaer. A galis a tarai misaot na papar Judia pa e Jerusalem pa tagun a hananuala tumo latasi milau e Tair pa e Saidon otleng, <sup>18</sup> la hanot sur lar longori, pa ir alangolango pas la kusun anunla na tinsamanla. Pa i kepsen a motla kusun la rop ning a motla la alaulau la. <sup>19</sup> Pa a taraila rop, la mang sur lar tuk a palaona e Iesu, anasa a rakrakai i purum taguni, pa i alangolango la rop.

*A gasgas pa a bal maris*

(Mt 5:1-12)

<sup>20</sup> E Iesu i ngoson anuna tarai a asasaer pa i atongi mang, “Mulo ning mulo kapan, mulo angis, anasa a matanitu ane God anumuloi.

<sup>21</sup> Mulo ning mulo murak onone, mulo angis, anasa lamur mulor masur. Mulo ning mulo domos onone, mulo angis, anasa lamur mulor lagar.

<sup>22</sup> Mulo angis ning a tarai la nget mulo, pa ning la kepsen mulo pa la atong laulau mulo, pa ning la atong laulau a risamulo, anasa mulo na halal a Nat a Barsan.

<sup>23</sup> “Ana pukakiar ning dir tol a ututnala ning tetek mulo, mulor gas, mulor sirok ana gasgas, anasa anumulo arlou saot na langit i itna kol. Pa a toltolla ning, anunla mangis a tarai tagun nating la ka tol tari tetek a propetla.

\* **6:13:** A kamkama warwara “aposel”, “di sune tik.” E Iesu i sune la sur lar warawai ona Wakak a Warwara o e Iesu. † **6:15:** Silot i a rising ning di atong a kunum a tarai ning la harum taum ana matanitu Rom sur lar langolango.

- 24 Ika ir laulau tetek mulo ning anumulo na ututnala i galis, anasa mulo ka kibas pas anumulo a wakakna.
- 25 Ir laulau tetek mulo ning mulo masur onone, anasa lamur mulor murak.
- Ir laulau tetek mulo ning mulo langlagar onone, anasa lamur mulor bal maris pa mulor domos.
- 26 Ir laulau tetek mulo ning a taraila rop la atong lekkek pas mulo, anasa a toltol ning, anunla mangis a tarai tagun nating la ka tol tari tetek a propet asasongola.

*A titol na marmaris tetek a hirualala*  
(Mt 5:38-48)

27 "A atai mulo ning mulo longor iau, mulor mang sur anumulo na hirua, pa mulor tol a wakakna tetek la ning la nget mulo. 28 Mulor angisgis la ning la nunung sur e God ir alaulau mulo, pa mulor nunung sur la ning la alaulau mulo. 29 Ning tik ir pasar a ris a paham, ur saran otleng ning a ris tana. Ning tik ir ras pas anuma kaen na polpol alar anuma mermer, ur noren tar otleng anuma siot tana. 30 Ur tabar la rop ning la nunung u. Pa ning tik ir kibas pas ta utna anumi, gong u nunung ulak suri. 31 Mulor tol al ngas a utna tetek a tarai ning mulo mang sur lar toli tetek mulo.

32 "Ning mulo mang sur la ka ning la mang sur mulo, dir alekkek mangmangasa pas mulo? Anasa a tena laulaula otleng la mang sur la ning la mang sur la. 33 Ning mulor tol a wakakna tetek la ning la wakak tetek mulo, dir alekkek mangmangasa pas mulo? Anasa a tena laulaula otleng la toli larning. 34 Ning a tarai lar mang sur lar kibas pas ta utna kaba ta mulo, pa mulo sarani ka tetek la ning mulo

tasmani mang lar kelesi ot tetek mulo, dir alekkek mangmangasa pas mulo? Anasa a tena laulaula otleng la saran a ututnala tana tena laulaula, pa la nuki mang lar kelesi. 35 Ika mulor mang sur anumulo na hirua, pa mulor tol a wakakna tetek la. Pa ning a tarai lar mang sur lar kibas pas ta utna kaba ta mulo, mulor sarani ka tanla, pa gong mulo mang sur lar kelesi. Ning mulor toli larning, anumulo a arlou ir itna kol, pa mulo a natnat e God i Lekkek Kol, anasa i mang sur la ning bel la sira atong wakak teteki, pa a tena laulaula otleng. 36 Mulor asangan a marmaris, arlar ana Tamamulo a tena marmaris.

*Gong mulo warkurai tik*  
(Mt 7:1-5)

37 "Gong mulo warkurai a toltol ana tik, pa bel otleng dir warkurai a toltol anumulo. Gong mulo arup tik, pa bel dir arup mulo. Mulor nuk duman sen a toltol laulaula ning a tarai la toli tetek mulo, pa dir kepsen anumulo na toltol laulau. 38 Mulor artabar, pa e God ir tabar mulo. A artabar ane God tetek mulo ir bukus, pa dir gulen purumi, pa ir bukus ulak, pa ir taptapek. Pa esi na ngas a artabar ning mulo sarani, i itna o i natarna, mangotleng larning e God ir sarani ta mulo."

39 E Iesu i atong otleng a warwara larlar tetek la mange, "A kut bel ir ben lar pas ta kut, sakana dia rop diar punga lorong ting na tung. 40 A kaklik a asaer bel i itna tana nuna tena asaer. Ika esining ka arop pas anuna asasaer, ir arlar ana nuna tena asaer.

41 "Sur asa ning u oroi pas ka a beren kaning namatana e tasimlik, pa bel u nuk pas a puka rakai kaning na matam? 42 Ning a puka rakai kaning na matam, ur atong mangmangasa i tetek e tasimlik mang, "Tasimlik, ar kepsen

a beren kusun a matam'? U a tena asasongo, ur kepsen nigon a puka rakai kusun a matam, pa ur tai wakak sur ur kepsen a beren kusun a matana e tasimlik.

*Naur a ngas a wana rakai  
(Mt 7:16-20; 12:33-35)*

<sup>43</sup> "A wakak a rakai bel i sira suah ta laulau a wana, pa a laulau a rakai otleng bel i sira suah ta wakak a wana. <sup>44</sup> Dir oroi lalan a rakai ana wana. Bel tik ir git pas ta wana fig miting na kadas, pa ta wana wain miting na rosros. <sup>45</sup> A wakak a barsan i asangan anuna wakak a toltol ning kaning na balana, pa a laulau a barsan otleng i asangan anuna toltol laulau ning kaning na balana. Anasa a pahana tarai i atong puasa a toltol ning i bukus ting na balanla.

*Naur a tena tol rumai  
(Mt 7:24-27)*

<sup>46</sup> "Sur asa mulo atong iau mang 'Leklek, Leklek,' pa bel mulo tol a asala ning a atongi ta mulo? <sup>47</sup> Esining i han tetek iau pa i longgor anak na warwarala, pa i muri, i arlar ana barsan ning ar atai mulo onoi. <sup>48</sup> I arlar ana barsan ning i tol a rumai. I kel tungen pas a tung, pa i atur tar a pos ana rumai saot na hat. Ning a lomom i hanot, pa i saler uting na rumai ning, bel i gulen lar pasi, anasa di ka tol wakak tari. <sup>49</sup> Ika tik ning ir longgor anuka warwarala pa bel i muri, i arlar ana barsan ning i atur anuna rumai saot na kabalapiu pa bel i tol nigon tar a kama rumai. Ning a lomom i saler tar ono, i punga, pa i tarege laulau!"

## 7

*A tortorot anuna ningnigo anuna tena harumla mito e Rom  
(Mt 8:5-13)*

<sup>1</sup> Ning e Iesu ka atong arop tar a warwara ning tetek a tarai, i han utumo e Kapernaum. <sup>2</sup> Ning a ningnigo anuna tena harumla

mito e Rom i kes tingia. Ning a halinla anuna tena titol oros i sasam, milau ir mat. A tena titol oros ning, anuna ningnigo i mang kol suri. <sup>3</sup> Ning a ningnigo anuna tena harumla i longor a warwara o e Iesu, i sune dingla na ningnigola anuna tarai Juda sur lar nunungi sur ir han teteki, pa ir alangolango pas anuna tena titol oros. <sup>4</sup> Ning la hanot tetek e Iesu, la nunung rakrakai mange, "A barsan ning a wakak a barsan, i wakak ning ur longor tana, <sup>5</sup> anasa i mang kol sur anundala a tarai, pa i lou tar anumila rumai lotu." <sup>6</sup> Pa e Iesu i mur la.

Ning la ka milau a rumai, a ningnigo anuna tena harumla i sune dingla na halalna tetek e Iesu ana warwara mange, "Leklek, gong a angoro u, anasa bel a tostos sur ur kas ting na nuk a rumai. <sup>7</sup> Bel a nuki otleng mang a tostos sur ar han tetek u. Ur atong ta warwara ka, pa anuka tena titol oros ir langolango. <sup>8</sup> Anasa iau a barsan ning a sira longor ana warkurai anunla ning la leklek tak, pa di saran tar a warkurai otleng tak sur ar nigon a tarai a harum. Ning ar atongi tana tik mang, 'Ur han,' ir han ka. Pa tetek tik otleng larne, 'Ur han ute,' ir han ka ute. Pa tetek anuka tena titol oros mang, 'Ur tol a utna ne,' ir toli ka."

<sup>9</sup> Ning e Iesu i longor a warwara ne, i kulkulan kol onoi, pa i talingir tetek a tarai ning la muri, pa i atongi mang, "A atongi ta mulo mang, bel a oroi tik ta te Israel, ning anuna tortorot i itna arlar ana barsan ning." <sup>10</sup> Pa la ning di sune tar la, la ulak uting na rumai, la oroi mang a tena titol oros ning ka langolango.

*E Iesu i alaun pas a nat a lao*

<sup>11</sup> Bel i bongnani, pa e Iesu i han uting na hanua di atongi e Nain, pa anuna kakak a asaerla pa a tnan kunum a tarai otleng la



han taum onoi. <sup>12</sup> Ning ka hanot milau ting na kaskas ana hanua, a tarai la los purum ning a minat mito na hanua. A minat ning, a barman, i takai sot ka a natna ning a lao. A galis a tarai mito na hanua la armuri taum onoi. <sup>13</sup> Ning a Leklek i oroi a hane ning, i marisi pa i atai i mang, "Gong u domos." <sup>14</sup> I han milau, pa i tong a logo ning di los a minat onoi, pa a tarai ning la los a minat la tur suai. E Iesu i atongi mang, "Barman, a atai u mang ur kamtur." <sup>15</sup> A minat i kes pa i tur pas a warwara. Pa e Iesu i saran ulak tari tetek e tana.

<sup>16</sup> A taraila rop ning la matmataut, pa la aleklek pas e God pa la atongi mang, "A tnan propet ka hanot na arpotor indala. E God ka hanot sur ir nangan dala, anuna tarai." <sup>17</sup> Pa warwara ona utna ning e Iesu ka tol tari, i han sarara to na papar Judia rop, pa a hananuala milau otleng.

*E Iesu pa e Jon a Tena Baptais  
(Mt 11:2-19)*

<sup>18</sup> A kakak a asaerla ane Jon a Tena Baptais la atai i ana ututnala rop ne o e Iesu. E Jon i kabah pas naur tagun la, <sup>19</sup> pa i sune diau tetek a Leklek sur diar dekeni mang, "U ma, ning di warwara nigo tar hom mang ur hanot, o milar harnanai ot sur tik\*?"

<sup>20</sup> Ning dia hanot tetek e Iesu, dia atongi mang, "E Jon, a Tena Baptais i sune miau tetek u, sur miar deken u mang, 'U ma, ning di warwara nigo tar hom mang ur hanot, o milar harnanai ot sur tik?'"

<sup>21</sup> Ano otning, e Iesu i alan-golango pas a galis kusun anunla na kankan pa nunla na tinsamanla, pa i kepsen a motla kusun la, pa i apalpalas pas a galis a kut. <sup>22</sup> Pa i keles diau mange, "Mur ulak, pa mur atai e Jon ana ututnala ne mu ka oroi tari, pa mu

ka longor tari: A kutla la ka tai, la ning a hanla i mat la ka han tostos, a leprala la ka langolango, na talngana kutkut la ka longor, a minatla la ka kamtur, pa di warawai ana Wakak a Warwara tetek a kapan a tarai. <sup>23</sup> Esining i oroi a ututnala ne a toli pa anuna tortorot bel i punga, ka angis."

<sup>24</sup> Ning naur a kaklik a asaer ane Jon dia ka han, e Iesu i turpas a warwara tetek a kunum a tarai o e Jon mang, "Lanigo ning mulo han uting na hanua bel tetek e Jon, asaning mulo tai suri? A kunai ngandek ning i maler ana wuwu? Belal. <sup>25</sup> Asa ning mulo han sur mulor oroi i? A barsan ning i mermer ana wakak a kaenla? Bel. Oroi, la ning la sira mermer ana ngangaten a kaenla, pa la angis ana wakak a ututnala, la sira kes ting na rumai ana kingla. <sup>26</sup> Asa ning mulo han sur mulor oroi i? A propet? Momol, a atai mulo, e Jon i lekkek kol tana propetla. <sup>27</sup> Di ka tumtumus tar onoi ting na Buk Tabu mange,

'Oroi, ar sune anuka tena los warwara sur ir nigon u.

Ir nigon u pa ir atalapor anuma ngas.'

*Mal 3:1*

<sup>28</sup> A atai mulo, e Jon i lekkek kol tanla rop ning di agon la, ika esining i natarna kol ana matanitu ane God, i lekkek tana."

<sup>29</sup> Ning la longori, a taraila rop pa na tena los totokom otleng, la oroi lalani mang a ngas ane God i tostos, anasa la ka kibas tar a baptais ta e Jon. <sup>30</sup> Ika a Parisaiola pa a tena asaerla tagun a warkurai bel la mang sur a ngas ning e God i sarani sur la, anasa bel la kibas a baptais ning ta e Jon.

<sup>31</sup> Pa e Iesu i atong ulaki mang, "Esi na warwara larlar ning ar atongi ana tarai tagun onone? La arlar ana sa? <sup>32</sup> La arlar ana kakakla ning la kes ting na tinine

\* 7:19: E Karisito esaning di harnanai suri.

hanua pa la arkabah tetek na halinla mange,

‘Mila pasar kudu,

ika bel mulo tortor ono,

pa mila saken a saksak a bal maris, ika bel mulo tangis ono.’

<sup>33</sup> E Jon a Tena Baptais i hanot, bel i ien ta wakak a utna pa bel i gang a wain, pa mulo atongi onoi mang, ‘A mot kaning onoi.’ <sup>34</sup> A Nat a Barsan i hanot, i hangan pa i gang, pa mulo atongi onoi mang, ‘Oroi, a barsan ne a tena hangan pa tena gang, a hal a tena los totokomla pa tena laulaula.’ <sup>35</sup> Ika a taraila rop ning la mur a wakak a nuknuk ane God, la asangani mang a wakak a nuknukna i tostos.”

*Ning a hane i pek a polo na tomtobo ting na naur a hana e Iesu*

<sup>36</sup> Ning a Parisaio i ben pas e Iesu sur diar hangan taum. E Iesu i kas ting na rumai ana Parisaio ning, pa i kes sur ir hangan. <sup>37</sup> Pa ning a hane miting na hanua ning, a laulauna. Ning i tasmani mang e Iesu kaning i hangan ting na rumai ana Parisaio, i kas taum ana polo na tomtobo kaning na koto ning di toli ana hat. <sup>38</sup> Pa i tur tumo lamur ta e Iesu, ting napir naur a hana. Pa i domos, a luru matana i punga tar saot na naur a hana e Iesu, pa i sah diau ana hihna, i goro diau, pa i pek a polo na tomtobo on diau.

<sup>39</sup> Ning a Parisaio, esaning i ben tar e Iesu, i oroi a utna ne, i nuki mang, “Ning a barsan ne a propet, ir tasman a hane ne i tong naur a hana, pa ir tasman otleng a ginina, mang i a laulau a hane.” <sup>40</sup> E Iesu i atai i mang, “Saimon a mang sur ar atai tar u ana ning a utna.” Pa i kelesi mang, “Tena Asaer, ur atai iau ka.”

<sup>41</sup> E Iesu i atai i mang, “Naur a barsan dia dinau mani pas tana ning a barsan. Ning a halin diau i dinau pas dilima na mar a kina,

pa ning a halin diau otleng dilima na bonot a kina. <sup>42</sup> Naur a barsan ning bel dia tolsot sur diar keles a dinau. Pa barsan ning i atai diau mang, ‘Gong kama mu keles anumu na dinau.’ Esi na halin diau anuna marmaris ir itna kol?” <sup>43</sup> E Saimon i kelesi mang, “Ngandek esaning i dinau pas a tnan mani kol tana.” E Iesu i atai e Saimon mang, “I tostos anuma arkeles.”

<sup>44</sup> E Iesu i gilam tetek a hane, pa i atai e Saimon mang, “Oroi a hane ne. Ning a kas te na num a rumai bel u saran al malum sur dir gos naur a hak onoi. Ika, a hane ne, i gos naur a hak ana luru matana, pa i sah diau ana hihna. <sup>45</sup> Bel u asangan anuma gasgas tetek iau ana argoro, ika a hane ne i goro naur a hak turpasi ot ning a hanot te. <sup>46</sup> Bel u sabar a pukuluk ana wel, ika a hane ne i pek a polo na tomtobo te na naur a hak. <sup>47</sup> A atai u mang, anuna tnan marmaris tetek iau i asangani mang e God ka kepsen tar anuna galis a toltolla. Ika esining di kepsen ka anuna siklik toltol laulau, anuna marmaris bel ir itna.”

<sup>48</sup> Pa e Iesu i atai a hane ning mang, “Di ka kepsen tar anuma toltol laulaula.” <sup>49</sup> A tarai ning la kes ana utna na hangan, la warwara artalai arpotor inla mang, “Esi na ngas a barsan ne i kepsen a toltol laulaula?” <sup>50</sup> E Iesu i atai a hane ning mang, “Ana num a tortorot ot, di ka alaun pas u. Ur han ana bal molmol.”

## 8

*A gurarala la armuri taum o e Iesu*

<sup>1</sup> Lamur e Iesu i han taltal ana tatatnan hanua pa na nanatar a hananuala otleng, pa i warawai ana Wakak a Warwara ana matanitu ane God tetek la. La armuri taum ana nuna ning a bonot pa pisir naur a kakak a asaerla, <sup>2</sup> pa a gurarala otleng ning ka

kepsen tar a motla kusun la, pa ka alangolango pas la kusun a tinsamanla. Ine a risanla: E Maria, ning a risana otleng e Magdalene, esaning mais a motla la purum kusuni, <sup>3</sup> pa e Joana a hane ane Kusa, i a ningnigo ana rumai ane Herot, pa e Susana, pa a galis otleng. A gurarala ne la nangan e Iesu pa anuna kakak a asaerla ana nunla na gongon ot.

*A warwara larlar ana tena omomai*

(Mt 13:1-17; Mk 4:1-12)

<sup>4</sup> Ning a tnan kunum a tarai tagun a hananuala la hanot tetek e Iesu, i atong a warwara larlar tetek la mange, <sup>5</sup> “Ning a tena omomai i han sur ir sapran a pat a witla. Ning i sapran amon la, dingla la punga ting na ngas, pa tarai la papas saot onla, pa manila otleng la ien sen la. <sup>6</sup> Dingla otleng la punga ting na pukna ning i hatat, pa ning la gomo ot, la main, anasa a piu i sengenge kol. <sup>7</sup> Dingla na patna otleng la punga tar ting na tinine rosrosla, pa a rosrosla la gomo taum onla, pa la rau alar pas la. <sup>8</sup> Dingla na patna otleng la punga tar ting na wakak a piu, la gomo pa la wai. Taktakai a rakai i suah takai a mar a wanala.”

Ning ka atong tar a warwara ne tetek la, i atongi mang, “Esining a talngana kaning, i wakak ning ir longor ono.”

<sup>9</sup> Anuna kakak a asaerla la dekeni sur ir papak talapor ana warwara larlar ning ka atong tari. <sup>10</sup> Pa i atai la mange, “E God ka saran tar a tastasim ta mulo sur mulor talapor ana ututnala ana nuna matanitu, ning nating i kes kumna. Ika tetek a tarai masuk a asaer la ana warwara larlarla, sur ‘lar oroi i pa bel lar oroi lalani,

lar longori pa bel lar talapor onoi.”

Ais 6:9

*E Iesu i pak a warwara larlar ana tena omomai*

(Mt 13:18-23; Mk 4:13-20)

<sup>11</sup> “A kamkama warwara larlar ne i mange, a pat a wit i arlar ana warwara ane God. <sup>12</sup> A pat a witla ning la punga ting na ngas, la arlar ana tarai ning la longor a warwara, pa e Satan i hanot, pa i kepsen a warwara miting na balanla, sur gong la tortorot, pa gong di alaun la. <sup>13</sup> Pa a patnala ning la punga ting na pukna ning i hatat, la arlar ana tarai ning la longor a warwara, pa la tong akesi ana gasgas. Ika, belal wakirinla, anunla tortorot bel i tur bongnani, pa ning a larlar ir hanot tetek la, lar punga ka. <sup>14</sup> Pa a patnala ning la punga tar ting na tinine rosrosla, la arlar ana tarai ning la longor a warwara, ika ana nunla lalaun, a nuknuk kol, a gongonla, pa a gasgas tagun a lalaun anone, la rau alar a warwara, pa bel la wai. <sup>15</sup> Ika patnala ning la punga ting na wakak a piu, la arlar ana tarai ning a balanla i wakak pa i tostos. La longor a warwara, la tong rakrakai i, pa la tur rakrakai, tuk ning lar wai.

*A warwara larlar ana lam*

(Mk 4:21-25)

<sup>16</sup> “Bel tik ir asot tar ta lam pa ir aroh alari ana paket, pa bel ir suah i otleng ting nahai a logo. Ir suah i ot saot na turtur ngasna, sur la ning lar kas, lar oroi a talaporna. <sup>17</sup> Pa ututnala rop ning i kes kumna, ir hanot talapor. Pa ututnala rop ning i kes mumun, lamur ir hanot talapor. <sup>18</sup> Mulor nuknuk wakak ana warwara ning mulo longori. Esining i tastasman ana warwara ane God, dir tabar ulaki ana galis. Ika, esining bel ta tastasman kaning tana, dir kepsen otleng siklik tastasman ning kanning tana.”

*E tana e Iesu pa na tastasna*

(Mt 12:46-50; Mk 3:31-35)

<sup>19</sup> E tana e Iesu pa na tastasna la hanot sur lar oroi i, ika bel la tolsot sur lar han milau i, anasa a kunum a tarai la tur alar pasi. <sup>20</sup> Pa di atai e Iesu mang, "E tnam pa na tastasim, kanumo la tur tumo lapiu. La mang sur lar oroi u." <sup>21</sup> Pa i atai la mang, "La ning la longor a warwara ane God pa la muri, la ning e nang pa na tastasikla."

*E Iesu i sairas a wuwu pa top*

(Mt 8:23-27; Mk 4:35-41)

<sup>22</sup> Ning a pukakiar e Iesu i atai anuna kakak a asaerla mang, "Dalar han lakai utumo na ris a puka tasi." La kas uting na mon, pa la han. <sup>23</sup> Ning la dun amon ana sel, e Iesu i borbor duman. A rakrakai a wuwu i ragati tanla ting na tasi, pa a mon i songsongi, pa milau lar hirua. <sup>24</sup> A kakak a asaerla la han teteki, la amata i, pa la atai i mange, "Tena Asaer, Tena Asaer, dala kar hirua!" I kamtur, i sairas a wuwu pa a tatatnan top sur diar mamah. Dia manah, pa tasi i mililo rop. <sup>25</sup> Pa i atongi tana kakak a asaerla mang, "Kana-haia numulona tortorot?" La matmataut, pa la kulkulan, la deken artalai la mang, "Esi na ngas a barsan ne? I warkurai a wuwu pa top pa dia longor tana."

*E Iesu i kepsen a motla kusun ning a barsan*

(Mt 8:28-34; Mk 5:1-20)

<sup>26</sup> E Iesu taum ana nuna kakak a asaerla la sot ting na papar anuna tarai Gerasa, ning i kes to na ris a puka tasi tumo na papar Galili. <sup>27</sup> Ning e Iesu i purum kusun a mon, ning a barsan miting na hanua ning, a motla la solongi, i han barati. Ka bongnani, bel i pipis ta kaen, pa bel i kes otleng ana ta rumai, i keskes ka ting na kulamla ngasa minatla. <sup>28</sup> Ning i oroi pas e Iesu, i kukuk, pa i punga

purum tar ting na naur a hana, pa i kukuk kol mange, "Iesu, a Nat e God a Leklek Kol, asaning ur toli hok? A nunung u, gong u akadik iau." <sup>29</sup> I atongi larne, anasa e Iesu ka warwara rakrakai pas tetek a mot sur ir purum kusun a barsan ne. A galis a taem a mot i sol-solongi. A tarai la sira tai alar a barsan ne, la sira dot naur a kuna pa naur a hana ana sen, ika i sira dat kutus la ka, pa mot i sira angongosi usaot na hanua bel.

<sup>30</sup> E Iesu i dekeni mange, "Esi na risam?" Pa i kelesi mange, "A risak a liur a mot," anasa a galis a mot la solongi. <sup>31</sup> Pa la nunung rakrakai e Iesu sur gong i sune kas la ana tnan tung ning bel ta araropna.

<sup>32</sup> A tnan liur a boroi la hangan ting na mangir, pa a motla la nunung rakrakai e Iesu sur lar kas ana boroi. Pa i malmaling sen la. <sup>33</sup> A motla la purum kusun a barsan ning, pa la kas tar ana boroila. Pa boroila la liu purum uting na palis sur utumo na puka tasi, pa la dom rop.

<sup>34</sup> La ning la tai alar a boroila, la oroi a utna ne, la dun ulak. La atatai ana utna ne ting na hanua anunlai, pa dingla na hananuala otleng. <sup>35</sup> Pa tarai la han sur lar oroi asaning i hanot. Ning la hanot tetek e Iesu, la oroi a barsan ning a motla la ka purum tar kusuni, i kes milau tar naur a hana e Iesu, ka pipis pas pa ka mananos ulak. Pa la matmataut. <sup>36</sup> La ning la oroi asaning e Iesu i toli, la atai a tarai mang e Iesu ka kepsen tar a motla kusun a barsan ning. <sup>37</sup> Pa taraila rop tagun a papar anuna Gerasala la nunung e Iesu sur ir han kusun la, anasa la matmataut kol. Lamur e Iesu i kas ulak ana mon pa i han.

<sup>38</sup> A barsan ning a motla la purum kusuni, i nunung e Iesu sur diar armuri. Ika e Iesu i sune seni ka mang, <sup>39</sup> "Ur han uting na num a rumai, pa ur warwara ana tnan

utna ning e God ka tol tari hom.” Pa i han, i warwara ting na hanua ning ana tnan utna ning e Iesu ka tol tari onoi.

*E Iesu i alaun pas a nat e Jairus pa i alangolango pas ning a hane*  
(Mt 9:18-26; Mk 5:21-43)

<sup>40</sup> Ning e Iesu i ulak, a kunum a tarai la gasgas pasi, anasa la rop la harnanai ka suri. <sup>41</sup> Ning a barsan, a risana e Jairus, a ningnigo tagun a rumai lotu, i hanot pa i punga tar ting na ris a hana e Iesu. I nunungi sur ir han usa na rumai ngasna, <sup>42</sup> anasa takai ka natna hane, ning anuna rau i ning a bonot pa pisir naur, milau ir mat.

Pa ning e Iesu i han, a tnan kunum a tarai la arsugut alar pasi. <sup>43</sup> Ning a hane tingia i sasam ana tinsaman a suluk. Ka sasam pas ning a bonot pa pisir naur a rau, \* ika bel tik i alangolango lar pasi. <sup>44</sup> I han tumo lamur ta e Iesu, pa i tuk a ris a tuka saket anunai, pa a suluk i manah kakat. <sup>45</sup> Pa e Iesu i deke mange, “Esining i tuk iau?” La rop la puai, e Pita i atongi mang, “Tena Asaer, a tnan kunum a tarai ne la tur talilis u pa la arsugut alar pas u.” <sup>46</sup> E Iesu i atongi mange, “Ning a halinla ka tuk tar iau, a kilangi mang a rakrakai i purum kusun iau.” <sup>47</sup> Lamur a hane i tasmani mang di ka pastetek pasi, pa i koloron ot, pa i punga salanigo ta e Iesu. Namatana taraila rop, i atai e Iesu ana kamkamna ning i tuk tari, pa i atai i otleng ning i langolango kakat. <sup>48</sup> Pa e Iesu i atai i mange, “Natuklik, anuma tortorot ka alangolango pas u. Ur han taum ana bal molmol.”

<sup>49</sup> Ning e Iesu kaning ot i warwara, takai i hanot mito na rumai ane Jairus, a ningnigo tagun a rumai lotu, pa i atai i mange, “Gong u amolot a Tena Asaer. E

natum hane ka mat.” <sup>50</sup> Ning e Iesu i longor a warwara ning, i atai e Jairus mange, “Gong u matmataut, ur tortorot ka, pa dir alaun ulak pasi.”

<sup>51</sup> Ning i hanot ting na rumai, bel i malmaling pas tik sur ir kas taum onoi. I malmaling pas ka e Pita, e Jon pa e Jems, pa e taman a kaklik pa e tana otleng. <sup>52</sup> A taraila rop la kunkun pogol ana domos, pa e Iesu i atai la mang, “Gong mulo domos. A kaklik ning bel i mat, kaning i borbor duman ka.” <sup>53</sup> Pa la malani ka, anasa la tasmani mang ka mat. <sup>54</sup> Ika e Iesu i tong pas a kuna kaklik hane, pa i atai i mang, “Natuklik, ur tur.” <sup>55</sup> Pa inguna i ulak teteki, pa i kamtur kakat. Pa e Iesu i arsune sur ta utna ana hane lik ning sur ir ieni. <sup>56</sup> Tamana pa e tana dia kulkulan kol, pa e Iesu i sairas diau sur gong dia atai tik ana sa ning i hanot.

## 9

*E Iesu i sune ning a bonot pa pisir naur a kakak a asaerla*  
(Mt 10:5-15; Mk 6:7-13)

<sup>1</sup> Ning e Iesu i kabah taum pas ning a bonot pa pisir naur a kakak a asaerla, i saran tar a rakrakai pa a warkuraila tetek la sur lar kepsen a motla rop, pa lar alangolango otleng a taraila kusun a tinsamanla. <sup>2</sup> Pa i sune la sur lar warawai ana matanitu ane God, pa lar alangolango a tinsamanla. <sup>3</sup> Pa i atai la mange, “Gong mulo los tar al utna ting na numulo a tinan, gong ta bulse, gong ta bek, pa gong ta utna na hangan, gong al mani pa gong al kelkeles. <sup>4</sup> Ning mulor kes ting na ta rumai, mulor kes ot tingia tuk ana pukakiar ning mulor han kusun a hanua ning. <sup>5</sup> Ning al tarai bel lar gasgas pas mulo, ning mulo han kusun a nunla hanua,

\* **8:43:** Dingla na tena tastasmai ana Buk Tabu la nuki mang dingla na warwara otleng i kes te na ves ne. I mange: *ka arop tar anuna mani ana doktala.*

mulor tang sen a kubus kusun a hamulo, sur a asilang na tumarang tetek la.”

<sup>6</sup> A kakak a asaerla la han tal-ting na hananuala, la warawai ana Wakak a Warwara, pa la alan-golango a tarai ting na hananuala rop.

*A nuknukna e Herot i talara o e Iesu*  
(Mt 14:1-2; Mk 6:14-16)

<sup>7</sup> E Herot, a ningnigo tagun a matanitu, i longor a ututnala ning i hanot. A nuknukna i talar onoi, anasa dingla na tarai la atongi mang e Jon ka laun ulak kusun a minat. <sup>8</sup> Pa dingla na tarai otleng la atongi mang e Elaija ka hanot. Dingla na tarai otleng la atongi mang ning tagun a propetla tagun nating ka laun ulak. <sup>9</sup> Ika e Herot i atongi mang, “Ia ka umsem tar ana ruana e Jon. Pa esi na barsan ulak ning, a longor a ututnala ne onoi?” Pa i tohoi sur ir oroi e Iesu.

*E Iesu i tabar dilima na rip a tarai*  
(Mt 14:13-21; Mk 6:30-44; Jn 6:1-14)

<sup>10</sup> Ning a aposella la ulak, la atai e Iesu ana ututnala ning la ka tol tari. I ben pas la, pa la han masuk uting na hanua a risana e Betsaida. <sup>11</sup> A kunum a tarai la longori, pa la muri. I gas pas la, pa i warwara tetek la ana matanitu ane God, pa i alangolango pas la ning la sasam.

<sup>12</sup> Ning ka rah, ning a bonot pa pisir naur a kakak a asaerla la han tetek e Iesu, pa la atai i mange, “Ur sune sen a kunum a tarai sur lar han uting anal hananua, pa na nanatar a hanuala milau, sur lar hangan pa lar borbor tingia, anasa a hanua bel ka ine.” <sup>13</sup> E Iesu i atai la mang, “Mulo ot mulor tabar la.” Pa la kelesi mange, “Dilima na bret ka pa naur a sis kane mila losi. Ngandek u mang sur milar lou pas al utna sur ir arlar ana kunum a tarai rop ne?” <sup>14</sup> A wawas ana tarai ka i arlar ana dilima na rip,

ika a gurarala pa kakakla otleng la hangan taum onla.

I atongi tetek anuna kakak a asaerla mang, “Mulor sune la sur lar tapagal sur dildilima na bonot la, pa lar kes.” <sup>15</sup> Pa kakak a asaerla la toli larning, pa taraila rop la kes. <sup>16</sup> E Iesu i kibas pas dilima na bret pa naur a sis, i tadai usaot na langit, i atong wakak pas tetek e God onoi, i kibiki pa i sarani tana kakak a asaerla, sur lar asalar a taraila ono. <sup>17</sup> La rop la hangan pa la masur. Pa la song bukus pas ning a bonot pa pisir naur a rat ana mah a utna na hangan.

*E Pita i warwara talapor mang e Iesu a Mesaia*  
(Mt 16:13-19; Mk 8:27-29)

<sup>18</sup> Ning a pukakiar, e Iesu ka i kes pa i nunung, a kakak a asaerla la han teteki, pa i deken la mange, “A tarai la atongi mang iau esi?” <sup>19</sup> Pa la kelesi mange, “Dingla la atong u, e Jon a Tena Baptais. Dingla otleng la atong u, e Elaija, pa dingla otleng la atong u, ning a hal a propetla tagun nating, ning ka laun ulak.” <sup>20</sup> Pa e Iesu i deken la mange, “Pa mulo, mulo atong iau o esi?” E Pita i kelesi mang, “U a Mesaia ning e God i sune sen u ute.” <sup>21</sup> Pa i sairas la mang gong la atai tar tik ono.

*E Iesu i warwara nigo ana nuna minat*  
(Mt 16:20-28; Mk 8:30—9:1)

<sup>22</sup> E Iesu i atongi tanla mange, “A Nat a Barsan ir kilang a galis a mamahat, pa a ningnigola, a lek-lek a tena artabarla tetek e God, pa a tena asaerla tagun a Warkurai lar gilam ris kusuni pa dir umkoli. Pa ning natol a pukakiar ir rop, ir laun ulak.”

<sup>23</sup> Pa i atai la rop mange, “Ning tik i mang sur ir mur iau, gong i mur a nuknukna. Ir pamar anuna rakai kutus ana pukakiarla rop pa ir mur iau. <sup>24</sup> Esining i mangan alar anuna lalaun ir

hirua, ika esining i noren sen anuna lalaun sur iau, ir laun.  
<sup>25</sup> Ning tik ir tong akes a ututnala rop mite na rakrakan hanua, pa ir alaulau anuna lalaun ono pa ir hirua, ir wakak mangmangasa teteki? <sup>26</sup> Ning tik ir meme hok pa ana nuka warwarala, a Nat a Barsan otleng ir meme onoi, ning ir hanot ana nuna matatar, pa a matatar otleng ane Tamana pa anuna angelola. <sup>27</sup> A atong momoli ta mulo, dingla o mulo ning mulo tur te, belot mulor mat, pa mulor oroi a matanitu ane God.”

*A palaona e Iesu i ries*  
 (Mt 17:1-8; Mk 9:2-8)

<sup>28</sup> Ngandek ka siwal a pukakiar alar tar a warwara ning, e Iesu i ben pas e Pita, Jon pa e Jems, pa la han usaot na mangir sur lar nunung. <sup>29</sup> Ning kaning i nunung, a patarna i ries, pa anuna kaenla i kokok pa i pil. <sup>30</sup> Naur a barsan, e Moses pa e Elaija <sup>31</sup> dia hanot ana matatar, pa ditol warwara taum ma e Iesu. Ditol warwara ana minat ane Iesu, ning ir songo i saot e Jerusalem, sur ir tolsot pas a nuknuk e God. <sup>32</sup> E Pita ditol, ditol borbor duman. Ning ditol mata ot, ditol oroi a matatar ane Iesu, pa naur a barsan otleng kaning ditol tur taum tar. <sup>33</sup> Ning naur a barsan dia mang sur diar han kusun e Iesu, pa e Pita i atai i mange, “Tena Asaer, i wakak ning dalar kes kama te. Mitol ar tol ir natol a turturup, takai anumi, takai ane Moses, pa takai ane Elaija”. Ika e Pita bel i tasman asaning i atongi.

<sup>34</sup> Ning kaning ot i warwara, a laukap i hanot pa i poroi alar pas la, pa ditol matmataut ning ditol kas tingui na laukap. <sup>35</sup> Pa a elngen takai misaot na laukap i atongi mange, “Ine a Natuklik, ning ia ka aslang pasi. Mulor longor tana.” <sup>36</sup> Ning ka warwara rop, e Iesu kama kaning i tur. Pa

bel ditol warwara onoi. Pa ana pukakiarla ning, bel ditol atai tar tik ana sa ning ditol ka oroi tari.

*E Iesu i kepsen a mot kusun ning a kaklik*

(Mt 17:14-18; Mk 9:14-27)

<sup>37</sup> Ana pukakiar lamur, ning e Iesu pa natol a kaklik a asasaerla la ka han purum misaot na mangir, a tnan kunum a tarai la han tetek e Iesu. <sup>38</sup> Pa ning a barsan miting na kunum i arkabah mange, “Tena Asaer, a nunung u sur ur oroi a natuk barsan, takai sot ka kaklik. <sup>39</sup> A mot i sira solongi, pa i sira kukuk kakat. A mot i sira akoloroni, pa a pahana kaklik ning i busa. A mot bel i sira han kusuni, pa i sira akankan kol a palaona. <sup>40</sup> A nunung kaba anum na kakak a asaerla sur lar kepsen a mot kusuni, ika bel la tolsot pasi.”

<sup>41</sup> E Iesu i atongi mang, “Mulo na tarai tagun onone, bel mulo tortorot, pa mulo na tena laulau. Ia ka kes bongnan iau te napirim mulo. Nangse mulor tortorot? Ur ben e natumlik ute.”

<sup>42</sup> Ning a kaklik i han tetek e Iesu, a mot i minggen purumi utumo lapiu pa i akoloroni. Ika e Iesu i warwara rakrakai tetek a mot pa i kepseni, pa a kaklik ning i langolango ulak. I saran ulaki tetek e tamana. <sup>43</sup> Pa la rop la kulkulan ana tnan rakrakai ane God.

*E Iesu i warwara ulak ana nuna minat*

(Mt 17:22-23; Mk 9:30-32)

La rop la kulkulan ana utna ning e Iesu ka tol tari, pa i atai anuna kakak a asaerla mange, <sup>44</sup> “Mulor longor wakak a warwara ne: Dir saran tar a Nat a Barsan uting na kuna taraila.” <sup>45</sup> Ika a kakak a asaerla bel la talapor ana kamkama warwara ne. Di bunuri ka tanla, sur gong la tasman lalani. Pa la matmataut sur lar deken e Iesu onoi.

*Esining i leklek kol?*

*(Mt 18:1-5; Mk 9:33-37)*

<sup>46</sup> A kakak a asaerla la arlak na arpotor inla mang esi na halinla ir leklek kol. <sup>47</sup> E Iesu ka tasman tar a nuknukinla, i ben pas ning a kaklik pa i aturi ting napirna. <sup>48</sup> Pa i atai la mang, “Esining ir gas pas a kaklik ne ana risak, i gas pas iau otleng. Pa esining ir gas pas iau, i gas pas esaning i sune iau ute. Anasa esining i natarna ta mulo rop, i ning i leklek kol.”

*Esining bel i sairas mulo i nangan mulo*

*(Mk 9:38-40)*

<sup>49</sup> E Jon i atai e Iesu mange, “Tena Asaer, mila oroi ning a barsan i kepsen a motla ana risam, pa mila toho i sur milar sairasi, anasa i bel a halindala.” <sup>50</sup> E Iesu i kelesi mange, “Gong mulo sairasi, anasa esining bel i sairas mulo, i nangan mulo.”

*A tarai Samaria bel la gasgas pas e Iesu*

<sup>51</sup> Ning ka milau a pukakiar sur dir los e Iesu usaot na langit, a nuknukna i rakrakai sur ir han usaot e Jerusalem, pa i turpas a tinan. <sup>52</sup> I sune dingla na tena titol, sur lar nigo tana. La hanot ana ning a hanua ting na papar Samaria, sur lar sang sur e Iesu. <sup>53</sup> Ika a te Samariala bel la gasgas pasi tingia, anasa i han sur usaot e Jerusalem\*. <sup>54</sup> Ning naur a kaklik asasaer anunai, e Jems pa e Jon dia oroi a toltol ning, dia dekeni mang, “Leklek, u mang sur miar nunung e God sur ir sune purum a iah sur ir tun arop la?” <sup>55</sup> Ika e Iesu i talingir, pa i sairas diau. <sup>56</sup> Pa e Iesu pa anuna kakak a asaerla la han sur uting na ning a hanua masuk.

*La ning la mang sur lar mur e Iesu*

*(Mt 8:19-22)*

<sup>57</sup> Ning e Iesu pa anuna kakak a asaerla la han amon ting na ngas, ning a barsan i atai i mang, “Ar mur u uting na hananuala rop ning ur han ia.” <sup>58</sup> E Iesu i kelesi mange, “A rokoio na papla anunla na tungla ot, pa a manila otleng anunla na pios ot, ika a Nat a Barsan bel anuna ta rumai sur ir borbor onoi.” <sup>59</sup> I atai ning a barsan otleng mang, “Ur mur iau.” Ika i kelesi mange, “Leklek, ur noren iau kaba sur ar han, sur ar por sen tar e tata.” <sup>60</sup> E Iesu i atai i mange, “Ur noren sen a minatla lar por anunla na minatla. Ur han pa ur warawai ana matanitu ane God.” <sup>61</sup> Ning ulak, i atai e Iesu mange, “Leklek, ar mur u, ika ur noren tar iau kaba sur ar han, pa milar tai taum pas onla ting na nuka rumai.” <sup>62</sup> E Iesu i atai i mang, “Ning tik ir turpas a oma, pa i gilam utumo lamur, bel i topas a titol ana matanitu ane God.”

## 10

*E Iesu i sune mais a bonot pa pisir naur a tarai*

<sup>1</sup> Lamur a Leklek i aslang pas mais a bonot pa pisir naur a tarai otleng, pa i sune naunaur onla sur lar nigoni uting na tatatan hanua, pa ting na nanatar a hanua, ning i otleng ir han ia. <sup>2</sup> Pa i atai la mange, “A barim ka makos, pa i galis kol, ika bel al galis a tena sol. Mulor nunung a Leklek, esaning a tamana barim, sur ir sune a tena solla uting na nuna barim. <sup>3</sup> Mulor han! Onone a sune sen mulo arlar ana nat a sipisipla ting na arpotor tana ngalngaliah a papla. <sup>4</sup> Gong mulo los ta paus na suah mani, gong ta rat, pa gong ta

\* **9:53:** A te Samariala bel la gas anasa e Iesu i nuki mang bel i tostos sur dir lotu tetek e God ting na rumai a artabar anunlai ting na Mangir Gerasim, pa i han usaot e Jerusalem sur ir lotu.



su. Gong otleng mulo awara tar tik ning mulor arpastek ting na ngas.

<sup>5</sup> “Ning mulor kas ting na ta rumai, mulor atong nigoni mange, ‘A bal molmol tetek mulo.’ <sup>6</sup> Ning ta tena bal molmol i kes tingia, anumulo a bal molmol ir kes onoi. Ning bel, a bal molmol ir ulak tetek mulo. <sup>7</sup> Pa mulor kes ot tingia ana rumai ning, mulor hangan pa mulor gang a utna ning di tabar mulo onoi, anasa i tostos sur a tena titol ir kibas ot anuna arlou. Gong mulo borbor anal rumai masuk.

<sup>8</sup> Ning mulor hanot ting na ta hanua, pa di ben kas mulo, mulor ien a ututnala ning di tabar mulo onoi. <sup>9</sup> Mulor alangolango a tinsamanla, pa mulor atai a taraila mang, ‘A matanitu ane God ka milau tetek mulo!’ <sup>10</sup> Ning mulor hanot ting na ta hanua, pa bel dir ben kas mulo, mulor tur ka ting na ngas pa mulor atongi mange, <sup>11</sup> ‘A kubus miting na numulo a hanua kane na hamila, milar sah seni sur a tumarang tetek mulo. Ika mulor tasmani mang a matanitu ane God ka milau.’ <sup>12</sup> A atongi ta mulo, ana pukakiar a warkurai, a warkurai tetek a hanua ning ir rakrakai kol tana warkurai tetek e Sodom.”

*A warkurai tetek la ning bel la lingir a nuknukinla*

*(Mt 11:20-24)*

<sup>13</sup> “Ir laulau tetek mulo a tarai Korasin, pa ir laulau otleng tetek mulo a tarai Betsaida. Ngandek ning di kar tol tar a ututnala na kulkulan ne tetek a tarai Tair pa tarai Saidon, arlar larning di ka tol tari tetek mulo, a tarai Tair pa tarai Saidon la kar lingir kapit a nuknukinla pa lar tobo, lar mermer ana kaenla na bal maris pa lar sabar a palaonla ana kubus a iah. Ika mulo, bel mulo lingir a nuknukim mulo. <sup>14</sup> A warkurai tetek mulo a tarai Korasin pa tarai Betsaida ir rakrakai kol tana warkurai tetek a tarai Tair pa tarai

Saidon. <sup>15</sup> Pa mulo otleng a tarai Kapernaum, mangmangasa, mulo nuki mang dir aleklek pas mulo usaot? Bel! Dir minggen purum mulo uting na tnan iah.”

<sup>16</sup> E Iesu i atai anuna kakak a asaerla mang, “Ning tik i longor mulo, i longor iau. Pa tik ning i puain sen mulo, i puain sen iau otleng. Pa tik ning i puain sen iau, i puain sen otleng esaning i sune iau ute.”

*Mais a bonot pa pisir naurla la ulak*

<sup>17</sup> Pa mais a bonot pa pisir naurla, la ulak ana gasgas pa la atongi mang, “Leklek, ning mila kepsen a motla ana risam, la longor ot.” <sup>18</sup> Pa e Iesu i atai la mang, “A oroi e Satan i punga misaot na langit arlar ana pil. <sup>19</sup> Ia ka saran tar a rakrakai ta mulo sur mulor pas gorgoron a soila pa a radamla otleng, pa mulor tolsot pas a rakrakai ana hirua, pa bel ta utna ir alaulau mulo. <sup>20</sup> Ika, gong mulo gas anasa a motla la longor ta mulo. Mulor gas, anasa di ka tumus tar a risamulo saot na langit.”

*E Iesu i gas*

*(Mt 11:25-27; 13:16-17)*

<sup>21</sup> Ana taem ning, e Iesu i bukus ana gasgas ana Talngan Tabu pa i atongi mang, “Tata, u a Leklek misaot na langit pa rakrakan hanua rop. Ar rakan aleklek pas u, anasa u bunur a ututnala ne kusun a tena tastasmala pa la ning la tastaman, pa u apuasa i tetek la ning la arlar ana kakakla. A momolna, Tata, u mang ot sur ir manglarning.

<sup>22</sup> “E Tata ka saran tar a ututnala rop tak. Bel tik i tasman e Natnalik, e Tamana ka, pa bel tik otleng i tasman e Tamana, e Natnalik ka, pa la otleng ning e Natnalik i mang sur ir apuasa e Tamana tetek la.”

23 Ning e Iesu taum ana anuna kakak a asaerla kama la kes, i talingir tetek la pa i atongi mang, “Mulo angis ning mulo oroi a ututnala ne! 24 A atai mulo, a galis a propet pa galis a king la mang sur lar oroi a ututnala ning a toli namatamulo, ika bel la oroi i. Pa la mang sur lar longor a ututnala ne mulo longori, ika bel la longori.”

*A warwara larlar ana wakak a te Samaria*

25 Ning a tena tastasmai ana Warkuraila i tur pa i toho e Iesu mang, “Tena Asaer, asaning ar toli sur ar kibas a lalaun tikin?” 26 Pa e Iesu i kelesi mang, “Asa ning di tumus tari ana Warkuraila? Pa asaning u nuki onoi?” 27 A barsan ning i kelesi mang, “Ur mang sur a Leklek anuma God ana balam rop, a ingum rop, a rakrakaim rop, pa a nuknukim rop.’ *Lo 6:5* Pa ‘Ur mang sur a halim larning u mang sur u ot.’” *Liwai 19:18*

28 E Iesu i atai i mang, “I tostos ot anuma warwara, ur toli larning, pa ur laun.” 29 Ika i mang sur ir atostos pasi namatana e Iesu, pa i dekeni mang, “Esi ning a halik?”

30 E Iesu i kelesi ana warwara larlar mange, “Ning a barsan i han misaot e Jerusalem utumo e Jeriko. Ning i han amon, a tena kinkin-aula la han alar pasi. La kepsen anuna na kaenla, la um laulau tari, pa la han kusuni pa milau ir mat. 31 Pa ning a tena artabar tetek e God i han ting na ngas, pa ning i oroi a barsan ning, i han liliesi ting na ris. 32 Ning a barsan kale ana mangis a tarai ane Liwai, i han tar ana barsan ning, i han liliesi ting na ris a ngas.

33 “Ika ning a te Samaria i han amon, i han tar ana barsan ning, pa ning i oroi, i maris koli. 34 I han teteki, i pek tar a wel pa a wain ana mangmangrasla ting na palaona

pa i poroi alar tar la. I akas pasi ana nuna dongki, pa i asirok tari ting na rumai a wasira, pa i tai alari. 35 Ana pukakiar lamur tana, i los pas naur a denaria, \* pa i saran tari tetek a tamana rumai, pa i atai i mang, ‘Ur tai alari. Pa ning ur tabari otleng anal utna, ning ar ulak, ar keles ulaki tetek u.’

36 “Esi na halin na natol a barsan a halna a barsan ning a tena kinkin-aula la umi?” 37 Pa a tena asaer ana Warkuraila i kelesi mang, “Esaning i marisi.” Pa e Iesu i atai i mang, “Ur han pa ur toli larning.”

*E Iesu i kes ting na rumai ane Maria pa e Mata*

38 Ning e Iesu pa anuna kakak a asaerla la han amon, la hanot ting na ning a hanua, pa ning a hane, a risana e Mata, i ben pas e Iesu uting na nuna rumai. 39 Pa e tasna hane a risana e Maria, i kes milau ting na naur a hana Leklek, pa i longor anuna na warwara. 40 Ika e Mata i kilangi mang i rakrakai teteki ana titol ning i toli, i han tetek e Iesu pa i atai i mang, “Leklek, bel u nuk pas iau? Oro, tasikhane bel i nangan iau. Iau kama a tol a titol. Atai i sur ir nangan iau.” 41 A Leklek i kelesi mang, “Mata, Mata, u nuknuk kol ana galis a utna! 42 Takai a utna ka, ning ur nuknuk kol suri. E Maria ka aslang pas a wakak a utna, pa bel tik ir kepseni kusuni.”

## 11

*A asaer ane Iesu ana nunung (Mt 6:9-13; 7:7-11)*

1 Ning a pukakiar e Iesu i nunung ting na ning a pukna. Ning ka nunung rop, ning a halin a nuna kakak a asaerla i atai i mang, “Leklek, ur asaer mila ana nunung, larning e Jon i asaer anuna kakak a asaerla.” 2 Pa e Iesu

\* **10:35:** Takai a denaria i arlar ana arlou anun tik a barsan ana ning a pukakiar a titol.

i atai la mang, “Ning mulo nunung,  
mulor atongi mange,  
‘Tamamila,  
i wakak ning dir hanrawai a  
risam.  
I wakak ning anuma matanitu ir  
hanot.  
3 Ana pukakiar rop ur tabar mila  
ana utna na hangan amilai.  
4 Ur kepsen anumila na toltol  
laulaula,  
larning mila otleng milar nuk  
duman sen anunla na toltol  
laulaula tetek mila.  
Gong u ben mila uting na arlam.’”

5 E Iesu i atai anuna kakak a  
asaerla mang, “Ning tik o mulo ir  
han tetek a halna ana tnan mo-  
rom, pa ir nunungi mang, ‘Halik,  
a mang sur ir natol a bret. 6 Anasa  
a halik i hanot tetek iau ana nuna  
tinan, pa belal utna sur ar tabari  
ono.’ 7 Pa a halna ning ui ir atai i  
mang, ‘Gong u amolot iau! Mila ka  
tagar, pa mila taum ana natnatuk  
mila ka borbor. Bel ma ar purum  
sur ar los tar ta utna tetek u.’ 8 Ir  
purum pa ir saran tar a bret tana,  
bel a kamkamna mang a halna,  
i kamkamna ka ning i nunung  
ngongosi.

9 “Onone a atai mulo, mulor  
nunung pa dir tabar mulo, mulor  
sereni pa mulor pasteteki, mulor  
pinpidir pa dir sapang pas mulo.  
10 Anasa la rop ning la nunung  
dir tabar la, pa esining i sereni ir  
pasteteki, pa esining i pinpidir, dir  
sapang pasi. 11 Esi na halimulo,  
ning e natnalik ir nunungi sur ta  
sis, ir tabari ka ana soi? 12 Pa ning  
i nunungi sur ta kiau, ir tabari  
ka ana radam? 13 Mulo na laulau  
a tarai, mulo tasman ot a wakak  
a artabarla sur mulor tabar na  
natnatumulola ono. Ning mulo  
sira toli larne, i momol kol mang,  
e Tamamulo ning i kes saot na  
langit, ir saran a Talngan Tabu  
tetek la ning la nunungi.”

*E Iesu pa e Belsebul*  
(Mt 12:22-30; Mk 3:20-27)

14 E Iesu i kepsen a mot ning i  
ngat kusun ning a barsan. Ning  
a mot i purum kusuni, a barsan  
ning i bot warwara. Pa kunum a  
tarai la kulkulan. 15 Ika dingla na  
tarai tagun la, la atongi ka mang, “I  
sira kepsen a motla ana rakrakai e  
Belsebul, a leklek anuna motla.”

16 Dingla otleng la tohi, la  
nunungi sur ir tol ta akinalang  
sur ir asangani mang i titol ana  
rakraikai ane God. 17 Ika e Iesu  
ka tasman tar a nuknukinla, pa i  
atai la mang, “Ning ta matanitu  
lar harum artalai tanla ot, a  
matanitu ning ir rarop. Pa ning  
ta kabaitamana lar harum artalai  
tanla ot, bel ma lar kes taum.  
18 Ning e Satan ir harum taum ana  
nuna tena titolla, anuna matanitu  
ir tur rakrakai mangmangasa? A  
atongi larne anasa mulo atongi  
hok mang a kepsen ka a mot ana  
rakraikai e Belsebul. 19 Ning iau  
a kepsen a motla ana rakrakai  
e Belsebul, anumulo na tarai la  
sira kepsen la ana rakrakai esi?  
Mulo tasmani mang la kepsen a  
motla ana rakrakai e God, pa ine i  
asangani mang anumulo a ararup  
hok i rongo. 20 Ika ning a kepsen  
a motla ana rakrakai e God, mulor  
tasmani mang a matanitu ane God  
ka hanot tetek mulo.

21 “Ning ta rakrakai a barsan ka  
mermer pas ana nuna ututnala na  
harum, pa i tai alar anuna rumai,  
anuna ututnala lar kes wakak.  
22 Ika, ning tik i rakrakai tana ir  
hanot teteki pa ir tolsot pasi, ir  
rasen anuna na utnala na harum  
ning i tortorot onoi, pa ir kibas pas  
a ututnala rop anuna barsan ning  
pa ir sarani tan al tarai.

23 “Esining bel i nangan iau, i  
sairas iau ka. Pa esining bel i  
nangan iau ona ben a tarai, i lu  
sarara la ka.

*A mot i ulak tetek a barsan*  
(Mt 12:43-45)

24 “Ning ta mot ir purum kusun  
ta barsan, ir han uting na puknala

ning belal malum ia, sur ir manah, ika bel ir pastek ta pukna ning ir manah ia. Pa ir atongi mange, 'Ar ulak sur anuka rumai, ning a purum tar kusuni.' <sup>25</sup> Ning ir hanot, ir oroi mang di ka surupu tar, pa di ka atostos tari. <sup>26</sup> Lamur ir han pa ir ben ulak pas mais a mot, ning la laulau kol tana, pa lar kas rop ting na rumai ning, pa lar kes tingia. Pa a lalaun anuna barsan ning, ir laulau kol tana nuna lalaun nating."

*La ning la angis*

<sup>27</sup> Ning e Iesu kaning ot i warwara, ning a hane miting na kunum a tarai, i kukuk mange, "A hane ning i agon u pa i asus u, i angis." <sup>28</sup> Ika e Iesu i kelesi mang, "La ning la longor a warwara ane God pa la muri, la angis."

*A tarai la mang sur ta akinalang*  
(Mt 12:38-42)

<sup>29</sup> Ning a kunum a tarai la rurnga taum tetek e Iesu, i atai la mang, "A tarai tagun anone, a laulau a tarai. La mang sur ta akinalang, ika bel dir tol tar tik tetek la. Dir tol ka a akinalang arlar larning di tol tari o e Jona. <sup>30</sup> Anasa e Jona i akinalang tar tetek a tarai Niniwe, mang otleng larning a Nat a Barsan ir akinalang tar tetek a tarai tagun onone. <sup>31</sup> Ana pukakiar a warkurai, a kwin mitumo namatana tobar ir tur pa ir arup rakrakai a tarai tagun anone, anasa i hanot miting bakbak sur ir longor a mananos ana King Solomon, pa anone, esaning i leklek ta e Solomon kanet. <sup>32</sup> Ana pukakiar a warkurai, a tarai Niniwe lar tur pa lar arup rakrakai a tarai tagun anone, anasa la lingir a nuknukinla ana warawai ane Jona, ika anone esaning i leklek ta e Jona kanet.

*A talapor ana palaondala*  
(Mt 5:15; 6:22-23)

<sup>33</sup> "Bel tik ir asot ta lam pa ir bunuri, pa ir aroh alari ana paket. Ir suah i ot saot na turtur ngasna, sur la ning lar kas lar oroi a talaporna. <sup>34</sup> Naur a matam dia arlar ana lam ana palaom. Ning naur a matam dia wakak, a palaom rop ir bukus ana talapor. Ika ning dia laulau, a palaom rop ir bukus ana mormorom. <sup>35</sup> Ir wakak ning ur bukus ana talapor, pa ur tai alar u sur gong a talapor i hanot a mormorom. <sup>36</sup> Ning a palaom rop ir bukus ana talapor, pa bel ta mormorom onoi, ir talapor kol, arlar ana lam ning a talaporna i irnga tetek u."

*E Iesu i tiu a Parisaiola pa a tena asaerla tagun a warkurai*

(Mt 23:1-36; Mk 12:38-40; Lk 20:45-47)

<sup>37</sup> Ning e Iesu ka warwara rop, ning a Parisaio i ben pasi sur ir hangan taum onoi. E Iesu i kas pa i kes sur diar hangan. <sup>38</sup> A Parisaio i kulkulan, anasa i oroi mang e Iesu bel i gos nigon pas a kuna. <sup>39</sup> A Leklek i atai i mang, "Mulo a Parisaiola mulo gos pas ka a risris a kap pa a pelet, ika a balamulo i bukus ana kinkinau pa a toltol laulaula. <sup>40</sup> Mulo na longlongla, bel mulo tasmani mang esaning i tol a risris a ututnala i tol otleng a balanla? <sup>41</sup> Ika, mulor tabar a kapan a tarai ana utna kaning na kap pa a pelet, sur a ututnala rop ir totoh tetek mulo.

<sup>42</sup> "Ir laulau kol tetek mulo a Parisaiola. Mulo nuknuk kol ana nanatar a warkurai mange, mulo saran taktakai a rakai tagun a ning a bonot a nanatar a rakai miting na barim, ning i toboh wakak, ika bel mulo tol a tostos a warkurai tetek a tarai pa bel mulo mang sur e God. I wakak ning mulor tol a tostos a warkurai tetek a tarai pa mulor mang sur e God, pa gong otleng mulo duman taktakai tagun a ning a bonot, sur mulor

sarani tetek e God. <sup>43</sup> Ir laulau kol tetek mulo a Parisaiola, anasa mulo mang sur a keskes salanigo na rumai lotu, pa mulo mang sur a tarai lar saran a tnan hanrawai tetek mulo ting na pukna na han taum. <sup>44</sup> Ir laulau kol tetek mulo, ning mulo arlar ana tungtung a minat ning bel ta akinalang onla, pa a tarai la han saot onla anasa bel la tasmani.”

<sup>45</sup> Ning tagun a tena asaerla tagun a warkurai i keles e Iesu mang, “Tena Asaer, ning u atongi lerne, u atong laulau mila otleng.” <sup>46</sup> Pa e Iesu i kelesi mang, “Ir laulau kol otleng tetek mulo a tena asaerla tagun a warkurai, anasa mulo saran a mamahat a warkuraila sur a tarai lar muri, ika mulo ot bel mulo nangan la. <sup>47</sup> Ir laulau kol tetek mulo, anasa anumulo na mangis a tarai ot tagun nating la umkol tar a propetla, pa mulo amermer pas a kulam a minatla anunla. <sup>48</sup> Onone mulo asangani mang mulo malmaling taum ana numulo na mangis a tarai tagun nating ana nunla titol, anasa la umkol a propetla, pa mulo, mulo amermer pas a kulam a minatla anunla. <sup>49</sup> I ma ining, e God, esaning i tastasman kol, i atongi mang, ‘Ar sune a propetla pa a aposella tetek a tarai, pa a tarai lar umkol halala tagun la, pa al tarai otleng lar akadik la.’ <sup>50</sup> Pa mulo, a tarai tagun onone, dir saran a warkurai na arkeles tetek mulo sur a suluk a propetla rop, ning di umkol tar la, turpasi ana kamkama rakrakan hanua. <sup>51</sup> Turpasi ning di umkol e Abel tuk ning di umkol e Sekaria, esaning i hirua na arpotor ana logo na tun artabar pa a rumai a artabar. Momol, a atai mulo, dir saran a warkurai na arkeles tetek a tarai tagun onone ana ututnala rop ne. <sup>52</sup> Ir laulau kol tetek mulo a tena asaerla tagun a warkurai, anasa mulo kepsen sen a ki na taman a tastasman. Mulo ot bel

mulo kas tingui, pa mulo sairasa la ning la mang sur lar kas tingui.”

<sup>53</sup> Ning e Iesu i purum utumo lapiu, a tena asaerla tagun a warkurai pa a Parisaiola la balakut pa la lingir anuna warwara, pa la deken ngalngaliah i anal galis a kabah. <sup>54</sup> Pa la kes nanan e Iesu sur ta ngas a warwara sur lar tiu i onoi.

## 12

*E Iesu i atumarang la kusun a asasongo*

*(Mt 10:26-27)*

<sup>1</sup> Ning a riprip a tarai la ka hanot taum, pa la sugut artalai la, e Iesu i atai nigon anuna kakak a asaerla mang, “Mulor tai alar mulo kusun a is anuna Parisaiola. A warwara ana nunla na toltol a asasongo. <sup>2</sup> A ututnala rop ning di polpol alar tar la, lamur lar kes puasa, pa a ututnala ning la kes kumna, lamur dir tasmani. <sup>3</sup> Asaning mulo ka atong tari ana mormorom, lamur dir longori ana kabakiar, pa asaning mulo wasisik ka onoi tingui taum tik, lamur dir tur saot ana rumai, pa dir apuasa i tetek a tarai.

*Mulor matmataut ka sur e God*  
*(Mt 10:28-31)*

<sup>4</sup> “A atai mulo na halalik: Gong mulo matmataut sur la ning la umkol ka a palaondi. Ning la ka tol tari larning, bel lar tolsot pasi sur lar tol ulak ta utna. <sup>5</sup> Ika ar atai talapor mulo o esaning mulor matmataut suri: Mulor matmataut sur esaning a rakrakaina i itna sur ir umkol mulo pa lamur ir mingga a ingumulo ting na tnan iah otleng. Momol, a atai mulo, e God ka ning mulor matmataut suri. <sup>6</sup> Di sira lou dilima na tek ana naur a toia ka, gepi? Ika e God bel i duman ta halinla. <sup>7</sup> I momol kol, e God ka tasman naisa a hih a pukulumulo. Gong mulo matmataut, mulo itna kol namatana e God tana galis a tekla.

*Esining i atong puasa e Iesu pa esining i puain seni*

(Mt 10:32-33; 12:32; 10:19-20)

<sup>8</sup> “A atai mulo mang, esining ir atong puasa i mang i anuki namatana tarai, a Nat a Barsan otleng ir atong puasai na matan a angelola ane God. <sup>9</sup> Ika esining ir puain sen iau na matan a tarai, a Nat a Barsan otleng ir puain seni na matan a angelola ane God. <sup>10</sup> Esining ir atong tar ta laulau a warwara ana Nat a Barsan, e God ir kepsen anuna toltol laulau ning, ika esining ir atong laulau a Talngan Tabu, e God bel ir kepsen lar pas anuna toltol laulau ning. <sup>11</sup> Ning la dat pas mulo sur a warkurai ting na rumai lotula, pa na matan a tena warkuraila pa a ningnigola, gong mulo matmataut sur asa mulor warwara alar mulo onoi pa asa mulor atongi. <sup>12</sup> Anasa ana pukakiar ning, a Talngan Tabu ot ir asaer mulo ana sa ning mulor atongi.”

*A warwara larlar ana barsan ning i gongon*

<sup>13</sup> Ning tagun a kunum a tarai i atai e Iesu mang, “Tena Asaer, ur atai a tasiklik sur ir asauran a gongonla o miau, ning e tamamiau i mat kusun tari.” <sup>14</sup> Pa e Iesu i kelesi mang, “Lak, esi i suah tar iau sur ar tena warkurai sur ar asauran anumu na gongon o mu?” <sup>15</sup> Pa i atai la, “Mulor nuk pasi, pa mulor tai alar mulo kusun a nuknuk ana galis a gongon, anasa a lalaun anuna tik bel i kamkamna ana nuna galis a gongon.”

<sup>16</sup> Pa i atai la ana ning a warwara larlar mange, “A barim anuna ning a leklek a barsan i wai pa i suah a galis a wanala. <sup>17</sup> Pa i nuki mang, ‘Asa ar toli? Anasa bel ta rumai ning ar suah a utna na hangan ting ia.’ <sup>18</sup> Pa i atongi mang, ‘Ar toli mange, ar regen anak na rumaila ning a sira suah taum a ututnala ono, pa ar tol al

tatatnan, sur ar suah a utna na hangan pa anak na gongon ting ia. <sup>19</sup> Pa ar atai a inguk mange, “Inguk, anuma gongon i galis kol sur al galis a rau. Ur manah, ur hangan, ur gang pa ur gas.” <sup>20</sup> Ika e God i atai i mange, ‘U a longlong! Onone na morom, ur mat! Esi ir kibas a gongon ning u suah taumi sur u?’ <sup>21</sup> Ir manglarning tetek la ning la gongon tetek la ot, ika bel la leklek namatana e God.”

*Tortorot tetek e God*

(Mt 6:25-34)

<sup>22</sup> E Iesu i atai anuna kakak a asaerla mang, “I maining a atongi ta mulo mang, gong mulo nuknuk kol ana numulo a lalaun mang asaning mulor ieni, pa ana palao-mulo otleng mang asa mulor mermer ono. <sup>23</sup> Anasa a lalaun i itna tana utna na hangan, pa a palao-mulo otleng i itna tana kaenla. <sup>24</sup> Mulor oroi a kotkotla. Bel la oman tar ta utna, pa bel la sol tar al utna, belal rumai a gongon anunlai, ika e God i tabar la. Pa mulo, mulo itna kol tana manila. <sup>25</sup> Esi ta mulo ning i nuknuk kol ana nuna lalaun, ir tolsot sur ir tugus barah siklik anuna lalaun? Belal. <sup>26</sup> Ning bel mulo tolsot pas a siklik utna ne, sur asa ning mulo nuknuk kol sur al ututnala otleng?”

<sup>27</sup> “Mulor oroi a wakak a purpurla misa na bual, mang la gomo mangmangasa. Bel la sira titol pa bel la sira tol kaen. Ika a atai mulo, e King Solomon ot ning anuna mermer rop i tai wakak, ika bel i tai wakak arlar ana purpurla ning. <sup>28</sup> E God i amermer a ulai sakas na bual ana wakak a purpurinla, ning anone i tapalas, pa latu dir tun seni ting na iah. Ning i toli larning ana ulai, i momol kol mang ir amermer mulo otleng. Anumulo a tortorot i natarna kol. <sup>29</sup> Gong mulo tai sur asaning mulor ieni, pa asaning mulor gangi, pa gong mulo nuknuk kol onoi. <sup>30</sup> Anasa a taraila mite na rakrakan hanua ning bel

la tasman e God, la rakrakai sur a ututnala rop ning, ika e Tamamulo i tasmani mang mulo kapan sur a ututnala. <sup>31</sup> Mulor tai sur anuna matanitu, pa ir tabar mulo ana ututnala ne.

*A ututnala saot na langit*  
(Mt 6:19-21)

<sup>32</sup> “A natara liur a sipsip, gong mulo matmataut, anasa e Tamamulo i gas sur ir saran a matanitu tetek mulo. <sup>33</sup> Mulor siuran sen anumulo na gongonla sur ta mani, pa mulor tabar a kapan a taraila onoi. Mulor sang pas al paus anumlo ning bel ir marot, a ngan-gaten a utna saot na langit ning bel ir rarop, pa bel ta tena kinkinau ir han milau i, pa a koropos bel ir alaulau i. <sup>34</sup> Anasa ting na hanua ning anumulo a gongonla kaning ia, anumulo a lalaun otleng kaning ia.

*A tena titolla ning la sang*

<sup>35</sup> “Mulor mermer pa mulor asot anumulo na lamla, pa mulor kes na sang kama. <sup>36</sup> Pa mulor arlar ana tena titolla ning la harnanai sur anunla leklek ning ir ulak kusun a ngasa ana tona tintaulai. Ning ir hanot pa ir pinpidir, dir sapang kapit pasi. <sup>37</sup> Ning a leklek ir hanot, pa anuna tena titolla la sang, lar angis. A momolna ot ne a atongi ta mulo, ir pas sen anuna kot pa ir akes la ting na logo na hangan pa ir tabar la. <sup>38</sup> Ning ir hanot ana tnan morom, o ana lar, pa ir pastetek la ning la sang suri, a tena titolla ning lar angis. <sup>39</sup> Mulor tastasman tar ana utna ne: Ning a tamana rumai ir tasmani nangse a tena kinkinau ir hanot onoi, bel ir noren anuna rumai sur dir kinau i. <sup>40</sup> Mulo otleng, mulor sang, anasa a Nat a Barsan ir hanot nangse ning bel mulo nuki mang ir hanot.”

*A momol a tena titol pa a tena titol ning bel i momol*  
(Mt 24:45-51)

<sup>41</sup> E Pita i deken e Iesu mang, “Leklek, u warwara larlar omila ka o ana taraila rop?” <sup>42</sup> A Leklek i kelesi mange, “Esi na tena titol ning i momol ana nuna titol pa i tastasman otleng? A tena titol ning, anuna leklek ir akes tari sur ir ningnigo ting na nuna rumai, sur ir tamtabar a tena titolla ana utna na hangan anlai ana taem a hangan. <sup>43</sup> A tena titol ning, ir angis ning anuna leklek ir hanot pa ir oroi mang i tolsot anuna titolla. <sup>44</sup> A atong momoli ta mulo, anuna leklek ir suah i sur ir hanot a ningnigo ana ututnala rop anunai.

<sup>45</sup> “Ika ning a tena titol i nuki mang anuna leklek bel ir hanot kapit, pa i turpasi sur ir um a tena titol a barsanla pa a tena titol a gurarala, pa ir hangan, pa ir gang pa ir sipak. <sup>46</sup> Anuna leklek ir hanot nangse ning a tena titol ning bel i tasmani pa bel i nuki mang ir hanot. Pa a leklek ir ting kutkutusi, pa ir suah i sur ir kes taum onla ning bel la tortorot.

<sup>47</sup> “A tena titol ning ka tasman tar a nuknuk a leklek anunai, ika bel i sang, pa bel i titol arlar ana nuknuk a leklek anunai, dir miras koli. <sup>48</sup> Ika a tena titol ning bel i tasman a nuknuk a leklek anunai, pa i tol a utna ning bel i tostos, dir miras sikliki ka. Pa tetek esining di saran a tnan tana, dir mang sur al galis ot miting ma i, pa esining di saran a galisna tana, dir dekeni ot sur al galisna.

*A keskes sarara*  
(Mt 10:34-36)

<sup>49</sup> “A hanot sur ar atna tar a iah te na rakrakan hanua, pa a mang kol suri ning ka sot. <sup>50</sup> A baptais ona minatik kaning ot ning dir baptais iau onoi, pa onone a los a tnan mamahat tuk ning dir tolsot pasi. <sup>51</sup> Mangasa, mulo nuki mang a hanot sur ar saran a bal molmol te na rakrakan hanua? Bel! A

hanot sur a taraila lar taptapagal sarara. <sup>52</sup> Turpasi onone, dilima onla ting na ning a rumai lar tapagal, natol kusun naur, pa naur kusun natol. <sup>53</sup> Lar tapagal sarara, a barsan kusun e nat na barsan, pa a kaklik barsan kusun e tamana. A hane kusun e nat na hane, pa a kaklik hane kusun e tana, pa ning naur a tubuna diar balakut artalai tetek diau.”

*A tarai bel la tastasman ana ututnala ning i hanot onone*  
(Mt 16:2-3)

<sup>54</sup> E Iesu i atai a kunum a taraila mang, “Ning mulo oroi a bual i aturi toui namatana labur, mulo atong kapiti mang, ‘Milau sur a kiar ir punga,’ pa i momol ot. <sup>55</sup> Ning a tobar i wuwut, mulo atongi mang, ‘A kamis ir rakrakai,’ pa i momol ot. <sup>56</sup> Mulo na tena asasongo! Mulo tastasman sur mulor pak a tatatai te na rakrakan hanua pa misaot na bakut. Mangmangasa ning bel mulo tastasman sur mulor pak a kamkama ututnala ning i hanot ana pukakiarla ne?”

*Ur bal taum ana numa hirua*  
(Mt 5:25-26)

<sup>57</sup> “I mangasa ning mulo ot bel mulo nuknuk wakak sur asa ning i tostos? <sup>58</sup> Ning tik ir suah tar u ana warkurai, ur rakrakai sur mur bal taum ting na numu a tinan, sakana ir dat pas u tetek a tena warkurai, pa a tena warkurai ir saran tar u tetek a polis, pa a polis ir akas u uting na rumai a dodot. <sup>59</sup> A atai u, bel ur purum lar pas tuk ot ning ur saran a ararop a toia ana num a arlou.”

## 13

*Hinirua ana toltol laulau*

<sup>1</sup> Ana pukakiar ning, dingla na tarai la atai e Iesu ana dingla na tarai Galili ning e Pailat i umkol la, ning kaning ot la tun artabar tetek e God. <sup>2</sup> E Iesu i keles

mang, “Mangmangasa, mulo nuki mang la laulau tana tarai Galili rop, anasa la hirua manglarne? <sup>3</sup> Bel! Ika a atai mulo, ning bel mulo lingir a nuknukim mulo kusun anumulo na toltol laulaula, mulo otleng mulor hirua rop.

<sup>4</sup> “Pa asaning mulo nuki ana ning a bonot pa siwal a tarai saot e Jerusalem ning a rumai leklek ting na pukna Siloam i taroh pa i umkol arop la? Mangmangasa, la laulau tanla ning la kes saot e Jerusalem rop? <sup>5</sup> Bel! Ika a atai mulo, ning bel mulo lingir a nuknukim mulo kusun anumulo na toltol laulaula, mulo otleng mulor hirua.”

*A warwara larlar ana rakai a fig ning bel ta wana*

<sup>6</sup> Lamur e Iesu i atong a warwara larlar ne tetek la, “Ning a barsan anuna rakai a fig i tur potoring na barim a wain anunai. I han pa i tai sur ta wana, ika bel i pastetek tik. <sup>7</sup> Lamur i atai a tena tai alar ana barim, ‘Ana natol a rau ne a tol panai sur ta wan a rakai a fig ne. Ting seni! Anasa i tur alalar.’ <sup>8</sup> Ika a tena tai alar i kelesi mang, ‘Leklek, ur noreni ning a rau kale ne, sur ar tol talapori, pa ar kel pori. <sup>9</sup> Ning ir wai ana rau ning lamur, ir wakak. Ning bel, ur ting seni.’”

*E Iesu i alangolango pas ning a hane ana Pukakiar Sabat*

<sup>10</sup> Ana ning a Pukakiar Sabat e Iesu i asaer a taraila ting na ning a rumai lotu. <sup>11</sup> Ning a hane i kes tingia, a mot kaning onoi. A intauruna i talugun ning a bonot pa siwal a rau, pa bel i tur tostos lar pas. <sup>12</sup> Ning e Iesu i oroi, i atongi mang, “Lak, u ka langolango kusun a numa tinsaman.” <sup>13</sup> Pa e Iesu i suah naur a kuna saot onoi, aiap ka a hane ning i tur tostos, pa i aleklek pas e God.



<sup>14</sup> A ningnigo tagun a rumai lotu i balakut, anasa e Iesu i alangolango pas a hane ana Pukakiar Sabat. Pa i atai a taraila mang, “Diono na pukakiar kaning sur dir titol. Mulor hanot onoi, sur dir alangolango mulo, ika a Pukakiar Sabat gong.” <sup>15</sup> A Leklek i kelesi mang, “Mulo na tena asasongo! Mulo rop taktakai, mulo sira paksen anumulo na bulumakau o a dongki kusun anuna rumai, pa mulo ben purumi ana Pukakiar Sabat sur ir gang.” <sup>16</sup> A hane ne tagun a mangis a tarai ane Abaram, e Satan i dot tari ning a bonot pa siwal a rau. Asa kamkamna ning bel dir paksen a inau ne kusuni ana Pukakiar Sabat?” <sup>17</sup> Ning i atong tari larne, la rop ning la lingir a titol ane Iesu, la meme, ika a kunum a tarai la gas ana wakak a ututnala ning e Iesu i toli.

*A warwara larlar ana pat a mastad pa a is*

*(Mt 13:31-33; Mk 4:30-32)*

<sup>18</sup> E Iesu i deke mang, “A matanitu ane God i arlar an asa? Asa ar atong larlari onoi?” <sup>19</sup> I arlar ana pat a mastad, ning takai a barsan i kibas pasi, pa i oman tari ting na nuna barim. I gomo, pa i hanot a rakai, pa a manila la sira tol pios saot na rarakana.”

<sup>20</sup> E Iesu i deke ulak mang, “Asa otleng ar atong larlar a matanitu ane God onoi?” <sup>21</sup> I arlar ana is ning a hane i kibas pasi pa i tol taumi ana tnan palawa, pa a palawa rop i bubus onoi.”

*A natar a taman lik*  
*(Mt 7:13-14, 21-23)*

<sup>22</sup> Ning e Iesu i han amon usaot e Jerusalem, i asaer a taraila ting na tatatnan hanua pa na nanatar a hanua. <sup>23</sup> Pa takai i deken e Iesu mang, “Leklek, mangmangasa, al siklik tarai ka dir alaun pas la?” Pa i atai la mang, <sup>24</sup> “Mulor rarakai kol sur mulor kas ana natar a

taman lik, anasa a galis a tarai lar tohoi sur lar kas onoi ika bel lar tolsot pasi. <sup>25</sup> A tamana rumai ir tur pa ir tagar alar a taman, pa mulor tur tumolapiu, mulor pinpidir ana taman pa mulor atongi mang, ‘Leklek, ur sapang pas mila.’ Ir atai mulo mang, ‘Bel a tasmani mang mulo mitaha.’ <sup>26</sup> Lamur mulor atai i mang, ‘Mila hangan pa mila gang taum hom, pa u sira asaer ting na numila na hananuala.’ <sup>27</sup> Ika ir keles mulo mang, ‘Bel a tasmani mang mulo mitaha. Mulo na tena laulau, mulor han masik kusun iau.’ <sup>28</sup> Dir kepsen purum mulo, pa ning mulor oroi e Abaram, Aisak pa e Jekop pa a propetla ana matanitu ane God, mulor tangtangis, pa mulor arngingit ngesemulola tingia. <sup>29</sup> Pa a taraila lar han miting namatana tobar pa matana labur, lar kes ana ngasa ting na matanitu ane God. <sup>30</sup> Oroi, dingla na tarai ning la mur, lamur lar nigo, pa dingla ning la nigo, lamur lar mur.”

*E Iesu i maris e Jerusalem*  
*(Mt 23:37-39)*

<sup>31</sup> Ana pukakiar ning, dingla na Parisaio la hanot tetek e Iesu, pa la atai i mang, “Ur han mite sur ta hanua masik, anasa e Herot i mang sur ir umkol u.” <sup>32</sup> E Iesu i keles la mang, “Mulor han pa mulor atai a pap rokoio ning mange, onone pa latu ar kepsen a motla pa ar alangolango a taraila, pa ana pukakiar lanigo ar arop anuka titol ono. <sup>33</sup> Ar han onone pa latu pa ana pukakiar lamur tana pukakiar latu, anasa bel ta propet ir hirua ting na ta pukna masik, ir hirua ka saot e Jerusalem.

<sup>34</sup> “Jerusalem, Jerusalem, u ning u umkol a propetla, pa la ning di sune la tetek u, u wolot amat la ka ana hathatla. A galis a pukakiar a mang sur ar kibas taum pas na natnatum arlar ana kakaruk

ning i roroh alar na natnatna nahai naur a dehelna, ika bel mulo mang.<sup>35</sup> Oro! E God ir han kusun anumulo a hanua. A atai mulo, bel mulor oroi ulak iau tuk ana pukakiar ning mulor atongi mang, 'Esaning i hanot ana risan a Leklek i angis.'” *Buk Song 118:26*

## 14

*E Iesu i alangolango pas ning a barsan*

<sup>1</sup> Ana ning a Pukakiar Sabat, e Iesu i kas sur ir hangan ting na rumai ana ning a ningnigo anuna Parisaiola, pa taraila la oroi sursuri sur ta utna ning ir toli. <sup>2</sup> Pa ning a barsan i sasam, i sursurung a palaona i kes tar salanigo ta e Iesu. <sup>3</sup> E Iesu i deken a tena asaerla ana Warkuraila pa a Parisaiola mange, “Mangmangasa, i tostos ana warkurai sur dir alangolango a taraila ana Pukakiar Sabat o bel?” <sup>4</sup> Ika bel la kelesi. E Iesu i tong pas a barsan ning, i alangolango pasi, pa i sune seni. <sup>5</sup> Pa e Iesu i deken la mang, “Esi na halimulo ning e natnalik o anuna ta bulumakau ir punga tar ting na tung a malum ana Pukakiar Sabat bel ir dat kas kapit pasi?” <sup>6</sup> Pa bel la keles sot pas anuna kabah.

*Ur anatarna pas u, pa ur maris a kapan a taraila*

<sup>7</sup> Ning e Iesu i kes ana utna na hangan ne, i oroi a taraila ning la hanot, la aslang pas ot a keskes salanigo. Pa i atong ning a warwara larlar tetek la mange,<sup>8</sup> “Ning tik ir ben pas u uting na ngasa ana tona tintaulai, gong u kes ana ngasa salanigo, sakana ir ben pas tik ning i leklek hom. <sup>9</sup> Pa esaning i arbebe ana ngasa ir hanot pa ir atai u mang, ‘Ur kes pisir kusun a barsan ne.’ Pa ur han ana meme sur a keskes tumo lamur. <sup>10</sup> Ning di ben pas u, ur han pa ur kes ana keskes tumo lamur, sur esaning i arbebe ir hanot tetek u, pa ir

atai u mang, ‘Halik, ur tur pa ur han ute lanigo.’ Pa dir aleklek pas u namatanla ning mulo kes taum ana utna na hangan. <sup>11</sup> Anasa esining i aleklek pas i ot, dir atarna pasi, pa esining i atarna pas i ot, dir aleklek pasi.”

<sup>12</sup> Lamur e Iesu i atai a Parisaio ning i ben pasi sur a utna na hangan mange, “Ning u mang sur ur sang a utna na hangan, gong u ben pas na halalim, na tastasimla, na maimla, pa a leklekla ning la kes milau u. Anasa la ne lar ben pas u pa lar kelesi tetek u. <sup>13</sup> Ika, ning u sang a utna na hangan, ur ben ka a kapan a taraila, la ning a palaonla i mat, la ning la kaukawar ka, pa a kutla. <sup>14</sup> Ning ur toli larne ur angis. Anasa belal utna na hangan anlai sur lar kelesi tetek u, e God ir kelesi tetek u ana pukakiar ning a tena tostosla lar laun ulak.”

*A warwara larlar ana tnan ngasa*

*(Mt 22:1-10)*

<sup>15</sup> Ning a halinla ning la hangan taum o e Iesu i longor a warwarala ne, i atai i mang, “La ning lar hangan ana ngasa ting na matanitu ane God, la angis.” <sup>16</sup> Pa e Iesu i atai i mang, “Ning a barsan i sang a tnan ngasa, pa i nunung a galis a tarai sur lar hanot. <sup>17</sup> Ning a taem ana ngasa i hanot, i sune sen anuna tena titol tetek la ning di ka nunung nigon tar la ana warwara mange, ‘Mulor han ute, anasa a ututnala ka sang rop.’ <sup>18</sup> Ika la rop la warwara alalar la ka. A ningnigona i atongi ka tana mang, ‘Ia ka lou pas a puka kabalapiu. Ar han pa ar oroi. A nunung u sur dir noren iau kama.’ <sup>19</sup> Pa ning otleng i atongi mang, ‘Ia ka lou tar ning a bonot a karabau, ar han sur ar toho la. A nunung u sur dir noren iau kama.’ <sup>20</sup> Pa ning otleng i atongi mange, ‘Onone ia

ka taulai, pa bel ar tolsot sur ar han.'

<sup>21</sup> "Pa a tena titol i ulak pa i atai anuna leklek ana warwarala ning. A leklek ning i balakut, pa i atai anuna tena titol mang, 'Ur han kapit uting na tatatnan ngas pa uting na nanatar a ngas ting na hanua, pa ur ben pas a kapan a taraila, la ning a palaonla i mat, a kutla, pa la ning la kaukawar ka.'

<sup>22</sup> Lamur a tena titol i atongi mang, 'Leklek, ia ka tol tar a ututnala rop ning u sune iau sur ar toli, ika dingla na pukna kaning ot na rumai.' <sup>23</sup> A leklek i atai a tena titol mang, 'Ur han sur a tatatnan ngas pa a nanatar a ngas ting na bual, pa ur angongos pas a taraila sur lar kas, sur anuka rumai ir bukus. <sup>24</sup> A atai mulo, bel tik ta halinla, ning di nunung nigon tar la, ir hangan ana nuka ngasa.' "

*A warwarala larlar o esining i mang sur ir mur e Iesu*

(Mt 10:37-38)

<sup>25</sup> A tnan kunum a tarai la armuri taum o e Iesu. I talingir tetek la pa i atai la mang, <sup>26</sup> "Ning tik i mang sur ir mur iau, ika i katnan e tamana, pa e tana, anuna hane pa na natnatna, na tastasna pa anuana lalaun otleng, pa bel i katnan kol iau, ai bel anuka kaklik a asaer. <sup>27</sup> Esining bel i pamar pas anuna rakai kutus pa i mur iau, bel i sot sur ir hanot anuka kaklik a asaer.

<sup>28</sup> "Ning tik ta halimulo i mang sur ir tol ta tnan rumai, ir kes kaba pa ir tol otnan nigon a matana rumai rop, sur ir tasmani mang ir tolsot pasi o bel. <sup>29</sup> Sakana ir tol tar ka a kama rumai, pa bel ir arop lar pasi. Pa a taraila rop ning la oroi, lar morot onoi <sup>30</sup> mang, 'A barsan ne i tol tar ka a kama rumai, ika bel i tolsot sur ir aropi.'

<sup>31</sup> "Ning ta king, ning a bonot a rip a tarai a harum ir han ana harum sur ning a king otleng naur a bonot a rip a tarai harum anunai,

i wakak sur a king ning anuna ning a bonot a rip ir kes pa ir nuknuk nigo larne, la to pas naur a bonot a rip o bel. <sup>32</sup> Ning bel ir tolsot, ir sune anuna tena titolla, sur lar atostos warwara taum ana king, ning kaning ot bakbak, sur a bal molmol ir kes. <sup>33</sup> Mang otleng larning, ning tik ta halimulo bel i noren sen tar anuna ututnala rop, ai bel anuka kaklik a asaer.

*A sol ning bel i to pas ta utna*

(Mt 5:13; Mk 9:50)

<sup>34</sup> "A sol i wakak, ika ning ka rop a makmakana, dir amakmakan ulak mangmangasa pasi? <sup>35</sup> Bel i to pas ta titol ting na barim pa bel i awakak otleng a kabalapiu, dir minggeni kama. Esining a talngana kaning, i wakak ning ir longor ono."

## 15

*A warwara larlar ana sipsip ning i rongo*

(Mt 18:12-14)

<sup>1</sup> Ning a pukakiar a tena los totokomla pa a tena tol a toltol laulaula la hanot tetek e Iesu sur lar longori. <sup>2</sup> Ika a Parisaiola pa a tena asaerla ana warkurai la warwara kumkumna o e Iesu mang, "A barsan ne i lasan ka taum ana tena tol a toltol laulaula, pa i hangan taum onla."

<sup>3</sup> Pa e Iesu i atong a warwara larlar tetek la mange: <sup>4</sup> "Ning tik ta halimulo anuna ta mar a sipsip, pa takai tagun la i rongo, mangmangasa, bel ir han kusun siuk a bonot pa pisir siuk tingia ana pukna ning la hangan ia, pa ir tai sur takai ning i rongo, tuk ning ir pasteteki? <sup>5</sup> Ning ka pastetek pasi, ir pamar pasi, pa ir gas. <sup>6</sup> Ning ir ulak onoi, ir kabah taum na halana pa la ning la kes milau, pa ir atai la mang, 'Dalar gas, anasa ia ka pastetek ulak pas anuka sipsip ning i rongo.' <sup>7</sup> A atai mulo, i mang otleng larning saot na langit

a gasgas ana ning a tena tol a toltol laulau ning ka lingir a nuknukna. Momol, di sira gas ana siuk a bonot pa pisir suikla ning la ka tostos tar, pa bel la kapan sur lar lingir a nuknukinla. Ika, ning ta tena tol a toltol laulau ka lingir a nuknukna, a gasgas ning, ir itna kol tana gasgas ana siuk a bonot pa pisir suikla.

*A warwara larlar ana mani ning i rongo*

<sup>8</sup> “Ning ta hane anuna ir takai a bonot a mani, pa i arongon takai. Mangmangasa, bel ir asot pas a lam, pa ir surupu a rumai, pa ir tai wakak suri, tuk ning ir pasteteki? <sup>9</sup> Ning ka pastetek pasi, ir kabah taum pas na halalna pa la ning la kes milau, pa ir atai la mang, ‘Dalar gas, anasa ia ka pastetek ulak pas takai a mani ning a arongon tari.’ <sup>10</sup> A atai mulo, mang otleng larning a gasgas na arpotor ana angelola ane God anasa ning a tena tol a toltol laulau i lingir a nuknukna.”

*A warwara larlar ana kaklik ning i han kusun e tamana*

<sup>11</sup> E Iesu i atongi mange, “Ning a barsan naur a natna barsan. <sup>12</sup> Pa a murmur i atai e tamana mang, ‘Tata, ur kepsen anuka tiniba tagun a num a gongon.’ Pa e tamandiau i asauran anuna gongon tetek diau. <sup>13</sup> Naisa na pukakiar alar tari, a murmur i suah taum pas anuna gongon rop, pa i han sur a hanua ting bakbak, pa i arop tar anuna gongon ana ngas a lalaun ning bel i wakak. <sup>14</sup> Ning ka arop sen tari, a tnan munurak i hanot ting na hanua ning, pa i murak. <sup>15</sup> Pa i han, pa i titol tetek ning a barsan ting na hanua ning. Pa a barsan ning i sune i sur anuna woroh na boroi sur ir tabar la. <sup>16</sup> I mang sur ir masur ana palpal a utna ning a boroi la ienieni, ika bel tik i tabari.

<sup>17</sup> “Ning a wakak a nuknuk i hanot teteki, i atongi mang, ‘A tena titolla ane tata, la sira hangan pa la sira masmasur pas ka kusun a ututnala, ika iau, kane a mat murak! <sup>18</sup> Onone ar kamtur pa ar han ulak tetek e tata. Ar atai i mange, ‘Tata, ia ka tol tar a toltol laulau tetek e God pa tetek u otleng. <sup>19</sup> Bel a wakak sur ur atong iau e natumlik. Ur suah iau kama sur ar arlar ana num a tena titol.’” <sup>20</sup> Pa i kamtur pa i ulak tetek e tamana.

“Kaning ot bakbak, e tamana i oroi pasi, pa i bukus ana marmaris. I dun teteki, i pos pasi pa i goro i. <sup>21</sup> Pa e natnalik i atai i mang, ‘Tata, ia ka tol tar a toltol laulau tetek e God pa tetek u otleng. Bel a wakak sur ur atong iau e natumlik.’ <sup>22</sup> Ika e tamana i atai anuna tena titolla mang, ‘Aiap! Mulor kibas kapit pas ta kaen ning i wakak kol ute, pa mulor apipisi ono. Mulor suah a ring ting na kuna, pa naur a su ting na naur a hana otleng. <sup>23</sup> Mulor han, mulor dat pas ta nat a bulumakau ning i but ute, mulor umkoli, pa dalar hangan pa dalar gasgas taum. <sup>24</sup> Anasa a natuklik ne ka mat, pa onone ka laun ulak, i rongo tar pa ne ka hanot.’ Pa a ngasa i turpasi.

<sup>25</sup> “Ika e natnalik, ning a ningnigo, kanisot na barim. Ning i hanot utumo lahanua milau a rumai, i longor a tinangis a goto pa a saksak a tortor, <sup>26</sup> pa i kabah pas ning a tena titol, pa i dekeni ana sa ning i hanot. <sup>27</sup> Pa i kelesi mang, ‘E tasimlik ka hanot, pa e tamam i umkol pas a nat a bulumakau ning i but sur lar tol a ngasa onoi, anasa dia tai taum ulak ana wakak a lalaun.’ <sup>28</sup> Pa a ningnigo na tasnalik i balakut, i ngongoio, bel i mang sur ir kas. Pa e tamana i purum teteki, pa i amoro pasi. <sup>29</sup> Ika i atai e tamana mang, ‘Oroi! A galis a rau a titol tetek u arlar ana tena

titol, bel a tabun longor ana numa warkuraila. Ika bel u tabar iau ana ta natar a me, sur mila taum ana halalikla milar gasgas taum ono. <sup>30</sup> Ika ning e natumlik ne i hanot, esaning i alaulau anuma ututnala ana laulau a gurarala, u umkol pas ot a nat a bulumakau ning i but sur ir ieni.' <sup>31</sup> E Tamana i kelesi mange, 'Natuklik, u kanet u kes napirik, pa anuk na gongon rop, anumi ka. <sup>32</sup> I wakak sur dalar gasgas pa dalar hangan, anasa e tasimlik ne ka mat pa onone ka laun ulak, i rongo pas, pa onone ka hanot ulak.' "

## 16

*A warwara larlar ana tena tai alar ning i tastasman*

<sup>1</sup> E Iesu i atai anuna kakak a asaerla mang, "Ning a tena gongon, anuna ning a tena titol i tai alar anuna ututnala, pa di tiu i mang i tol oros ka ana ututnala ana ningnigo anunai. <sup>2</sup> A tena gongon i kabah pasi, pa i dekeni mang, 'Asa ne a longori hom? Ur tumus a warwara talapor ana numa titol na tai alar pa ur sarani tak, anasa bel ur tena tai alar ulak ma anuki.' <sup>3</sup> Pa a tena tai alar ning i nuki mang, 'Asa ning ar toli, ning anuka leklek ir kepsen tar iau kusun a titol ne? A palaok bel i rakrakai sur a kekel, pa ar meme otleng sur ar nunung utna. <sup>4</sup> I maining, a nuk pas ning a utna sur ar toli, sur a tarai lar gasgas pas iau ot ana nunla na rumaila, ning dir kepsen iau kusun a titol ne.' <sup>5</sup> Pa i arsune sur la rop ning la ka dinau pas tana nuna leklek. Pa i deken a ningnigo na barsan mang, 'Naisa ning u dinau pasi tana nuka leklek?' <sup>6</sup> Pa i kelesi mange, 'Takai a mar a tatatnan koto na wel a oliw.' Pa a tena titol i atai mang, 'Ur los pas anuma paka buk a dinau. Ur kes pa ur tumus kapit tar dilima na bonot ka onoi.'

<sup>7</sup> Pa i deken ulak takai, 'Naisa ning u dinau pasi?' Pa i kelesi mange, 'Takai a mar a bek a wit.' Pa i atai i, 'Ur los pas anuma paka buk a dinau. Ur tumus tar siwal a bonot ka onoi.'

<sup>8</sup> "Anuna ningnigo i tasmani mang a laulau a tena titol ne bel i momol ana nuna titol, ika i aleklek pasi anasa i tastasman kol sur ir alah kusun a mamahat. Anasa a taraila mite na rakrakan hanua, la tastasman kol ana urmatana ngas ana nunla na titol, ika a taraila miting na talapor bel la tastasman kol onoi. <sup>9</sup> A atai mulo, mulor amoro pas al halalimulo ana gongon mite na rakrakan hanua, sur ning ka rop, e God ir gasgas pas mulo ana rumaila ning lar tur tikin pa bel lar rarop.

<sup>10</sup> "Esining i momol ana natar a utna ka, ir momol otleng ana tnan utna, pa esining bel i momol ana natar a utna, bel ir momol otleng ana tnan utna. <sup>11</sup> Ning bel mulo momol sur mulor tai alar wakak a ututnala mite lapiu, esi ir tortorot o mulo sur mulor tai alar a ututnala misaot? <sup>12</sup> Ning bel mulo momol ana ta utna anun tik, esi ir saran ulak anumulo na ututna tetek mulo? <sup>13</sup> Bel ta tena titol ir titol lar pas tetek ir naur a ningnigo. Ir nget ning a halindiau, pa ir mang sur ning a halindiau, ir katnan ning pa takai ir saran a kaba hina kusuni. Bel mulor titol lar pas tetek e God pa tetek a mani otleng."

*A Warkuraila ane God bel ir rarop*

(Mt 5:31-32; 19:9; Mk 10:11-12)

<sup>14</sup> A Parisaiola la longor a warwarala ne, pa la morot o e Iesu, anasa la mang sur a mani. <sup>15</sup> Pa e Iesu i atai la, "Mulo, mulo atostos pas mulo namatana taraila. Ika e God i tasman a balamulo. Anasa a utna ning i ngangaten namatana taraila i bilbilor namatana e God.

<sup>16</sup> "A Warkuraila pa a asasaerla anuna propetla i tuk tar o e Jon.

Turpasi ana pukakiarla ning, mila warawai ana Wakak a Warwara ana matanitu ane God pa a taraila rop la ngongos sur lar kas tingia. <sup>17</sup> A langit pa a rakrakan hanua bel i ngangaten sur diar rarop, ika bel ta dia warwara ir rarop kusun a Warkuraila.

<sup>18</sup> “Ning tik ir kepsen anuna hane pa ir taulai ta hane ulak, a barsan ning i tol a toltol laulau. Pa esining i taulai ta hane ning anuna barsan i kepsen seni, i otleng i tol a toltol laulau.

*E Lasarus pa a gongon a barsan*

<sup>19</sup> “Ning a gongon a barsan, i mermer ana wakak a kaenla, pa i sira tol a ngasa ana pukakiarla rop. <sup>20</sup> Di aborbor tar takai a barsan a tena nunung utna ting na taman tana, a risana e Lasarus, a palaona i masmasik. <sup>21</sup> I mang sur ir ien a mumut a utna na hangan ning i punga miting na logo na hangan anuna leklek. Pa a papla la damdam otleng a masmasikla ting na palaona.

<sup>22</sup> “Lamur a tena nunung utna i mat, pa a angelola la los pasi pa la akesi ting na ris e Abaram. Pa a gongon a barsan kale i mat, pa di por seni. <sup>23</sup> Pa i kes ana tnan iah. I kankan kol a palaona pa i tandai usaot, i oroi e Abaram i bakbak kol, pa e Lasarus otleng ting na risna. <sup>24</sup> Pa i arkabah mange, ‘Tata Abaram, ur maris iau, ur sune e Lasarus sur ir tuk pas al siklik malum ana pitlai a kuna sur ir akotkoto tar a laigerek onoi, anasa a kilang a tnan kankan kol te na iah.’

<sup>25</sup> “E Abaram i kelesi mang, ‘Natuklik, ur nuk pasi, ning kaning ot u laun, u kibas anuma wakak a ututnala, pa mang otleng larning tetek e Lasarus, i kibas a laulau a ututnala. Ika onone, i kibas a gasgas, pa u, u kilang a tnan kankan kol. <sup>26</sup> Ning a utna otleng, a tnan lawa kane na arpotor in

dala. Bel tik mite ir tolsot pasi sur ir han uting tetek mulo, pa bel tik otleng miting ir tolsot pasi sur ir han ute tetek mila.’

<sup>27</sup> “Pa a tena gongon ning i atongi mange, ‘Tata, a nunung u sur ur sune e Lasarus uting na rumai ane tata. <sup>28</sup> Anasa dilima na tastasik barsan la kaning ia, pa ir atumarang tar la, sakana la otleng lar han ute na hanua na kankan ne.’ <sup>29</sup> Pa e Abaram i kelesi mange, ‘A warwara ane Moses pa a propetla kaning i kes taum onla. I wakak sur lar longori.’ <sup>30</sup> A tena gongon ning i atai i mang, ‘Bel, Tata Abaram, ning tik ot tagun a minat ir hanot tetek la, lar lingir a nuknukinla.’ <sup>31</sup> Pa e Abaram i kelesi mang, ‘Ning bel la longor e Moses pa a propetla, bel tik otleng, ning ir kamtur kusun a minat ir atur lar pas anunla tortorot.’ ”

## 17

*A toltol laulau*

(Mt 18:6-7, 21-22; Mk 9:42)

<sup>1</sup> E Iesu i atai anuna kakak a asaerla mange, “A ututnala ir hanot ot, ning ir apungan a taraila ana toltol laulau, ika ir laulau kol tetek esining i tol otnan a ututnala ne pa i ben rongon tik ta halinla. <sup>2</sup> A warkurai tetek tik ning ir toli larné, ir laulau kol tana tik ning dir dot tar ta tnan hat ting na ruana, pa dir minggen murungi sa latasi.

<sup>3</sup> “Mulor tai alar mulo! Ning e tasimlik ir tol ta toltol laulau, ur warwara rakrakai teteki, pa ning ka lingir a nuknukna, ur nuk duman sen anuna rongo. <sup>4</sup> Ning i tol a toltol laulau tetek u mais a taem ana ning a pukakiar, pa i han tetek u mais a taem pa i atai u mang, ‘Ia ka tol tar a toltol laulau tetek u. Onone a lingir a nuknukik.’ Ur nuk duman sen anuna rongo.”

*A tortorot*

<sup>5</sup> A aposella la atongi tana Leklek, “Ur aйна anumila tortorot.” <sup>6</sup> Pa a Leklek i atongi mang, “Ning

anumulo a tortorot i natarna arlar ana pata mastad, mulor tolsot pasi sur mulor atai a rakai ne mang, 'Ur takakan, pa ur tur tisa latasi!' pa ir longor ka.

*A titol anuna tena titol*

<sup>7</sup> "Ning tik ta halimulo anuna tena titol i bair pas, o i tai alar a sipsipla, ning ir ulak kusun a barim, mangmangasa, ur atai i kakat mang, 'Ur han ute, ur kes pa ur hangan?' Bel. <sup>8</sup> Ur atai i mange, 'Ur sang angaka utna na hangan, pa ur sang sur ur malngan iau, ning ar hangan pa ar gang. Pa lamur u kale ur hangan pa ur gang.' <sup>9</sup> Bel ir atong wakak tetek a tena titol, anasa i tolsot pas ka anuna titol. <sup>10</sup> Mang otleng larning tetek mulo, ning mulo tolsot pas a ututnala ning di saran tari ta mulo, mulor atongi mang, 'Bel mila tostos sur dir aleklek pas mila. Mila na tena titol oros ka, mila tolsot pas ka anumila na titol.'"

*E Iesu i alangolango pas ning a bonot a lepra*

<sup>11</sup> Ning e Iesu i han amon usaot e Jerusalem, i han ting na arpo-tor naur a papar, Samaria pa e Galili. <sup>12</sup> Ning i hanot ting na ning a hanua, la arsongo ana ning a bonot a barsan ning la lepra. La tur bakbak tar ot, <sup>13</sup> pa la kukuk rakrakai mange, "Iesu, Leklek, ur maris mila." <sup>14</sup> Ning e Iesu i oroi la, i atai la mang, "Mulor han, mulor asangan mulo tetek a tena artabarla tetek e God." Ning la han amon, la langolango kakat. <sup>15</sup> Ning tagun la ning i oroi mang ka langolango, i ulak, pa i aleklek pas e God ana tnan elngena. <sup>16</sup> Pa i tur ana bokona hana milau naur a hana e Iesu pa i atong wakak teteki. A barsan ne a te Samaria. <sup>17</sup> E Iesu i dekeni mang, "Bel di alangolango pas ning a bonot o

mulo rop? Siuk otleng la kana-hama? <sup>18</sup> I mangasa ning bel tik i ulak sur ir aleklek pas e God? A wasira lik ka ne i ulak." <sup>19</sup> Pa i atai i mang, "Ur kamtur, pa ur han. Anum a tortorot ka alangolango pas u."

*A tinan ot ana matanitu ane God (Mt 24:23-28, 37-41)*

<sup>20</sup> Dingla na Parisaio la deken e Iesu mang, "Nangse a matanitu ane God ir hanot?", pa i keles la mang, "A matanitu ane God bel ir hanot taum ona akinalangla ning dir oroi. <sup>21</sup> Pa bel dir atongi mang, 'I ma ine!' o, 'I ma i ning!' Anasa a matanitu ane God kaning ot o mulo."

<sup>22</sup> E Iesu i atai anuna kakak a asaerla, "A pukakiar ir hanot ning mulor mang sur mulor oroi ta pukakiar ana pukakiarla anuna Nat a Barsan, ika bel mulor oroi. <sup>23</sup> Al tarai lar atai mulo mange, 'I ot no!' o, 'I ka ine!' Gong mulo mur la. <sup>24</sup> Anasa ana pukakiar a tinan ot anuna Nat a Barsan, a taraila rop lar oroi. Ir arlar ana pil, ning i ienieni mito na ris a puka solsolna, tuk ting na ning a ris otleng. <sup>25</sup> Ika a Nat a Barsan ir kilang nigon a galis a mamahat, pa a taraila tagun onone lar pilak seni.

<sup>26</sup> "A pukakiarla anuna Nat a Barsan ir arlar ana pukakiarla ane Noa. <sup>27</sup> A taraila la hangan, la gang, pa la ataulai la, tuk ana pukakiar ning e Noa i kas ana sip, pa a kiar i punga pa lomom i hanot pa la hirua rop. <sup>28</sup> Mang otleng larning ana pukakiarla ane Lot. A taraila la hangan, pa la gang, la lolou, pa la sisiurai, la oman utna, pa la tol rumai. <sup>29</sup> Ika ana pukakiar ning e Lot i han kusun a hanua Sodom, a iah pa a salfa i punga misaot na langit arlar ana kiar, pa la rop la hirua onoi.

<sup>30</sup> "Ir mang otleng larning ana pukakiar ning a Nat a Barsan ir hanot talapor onoi. <sup>31</sup> Ana

pukakiar ning, ning tik i kes saot ana nuna rumai, gong i han purum sur ir los pas anuna ututnala tingui narumai. Mang otleng larning, ning tik i kes ting na barim, gong i ulak utumo lahanua sur ta utna. <sup>32</sup> Mulor nuk pas a hane ane Lot. <sup>33</sup> Esining i mang kol sur ir mangan alar anuna lalaun, ir hirua. Ika esining i noren sen anuna lalaun, ir laun. <sup>34</sup> A atai mulo, ana morom ning ir naur diar borbor ana ning a mat, dir los pas ka ta halindiau, pa ning a halindiau bel. <sup>35-36</sup> Ning ir naur a hane otleng dia miren a wit, dir los pas ka ta halindiau, pa ning a halindiau bel.\* <sup>37</sup> Pa a kakak a asaerla la dekeni mang, "Leklek, a ututnala ne ir hanot tahaia?" Pa i keles la mang, "A pukna ning a minat i borbor ono, a kotkotla lar han taum tingia."

## 18

*A warwara larlar ana lao pa a tena warkurai*

<sup>1</sup> E Iesu i warwara ana warwara larlar tetek anuna kakak a asaerla sur ir asaer la sur lar nunung bolbolos pa gong la ngoro. <sup>2</sup> I atongi mang, "Ning a tena warkurai i kes ting na ning a hanua, bel i matmataut sur e God, pa bel i nuk pas a taraila. <sup>3</sup> Ning a lao miting na hanua ning, i han liklik ka teteki, pa i sira nunungi mang, 'Ur atostos tar iau kusun a nuka hirua.' <sup>4</sup> Ka bongnani pa bel i longor tana, pa lamur i nuki mang, 'Bel a matmataut sur e God, pa bel a sira nuk pas a taraila, <sup>5</sup> ika, ar atostos a lao ne, anasa i atakidis kol iau, sakana ir angoro iau ana nuna tinan ot ute.' "

<sup>6</sup> A Leklek i atongi tanla, "Mulor longor a warwara ne anuna tena warkurai ning bel i tostos. <sup>7</sup> I mangasa, e God bel ir atostos anuna

tarai a aslang, ning la tangis teteki ana kamis pa a morom otleng? I mangasa, ir molmolot pa bel ir atostos kapit la? <sup>8</sup> A atongi ta mulo, ir atostos kapit la. Ika, ning a Nat a Barsan ir hanot, i mangmangasa ir pastek pas ot al tarai ning la tortorot ono te lapiu?"

*A warwara larlar ana Parisaio pa a tena los totokom*

<sup>9</sup> E Iesu i atong a warwara larlar ne tetek la ning la tortorot pas ot onla, mang la na tena tostos, pa la nuk natarna pas a tarai rop. <sup>10</sup> "Naur a barsan dia han usaot ana rumai a artabar sur diar nunung. Ning a halindiau a Parisaio, pa ning a halindiau otleng a tena los totokom. <sup>11</sup> A Parisaio i tur pa i nunung ot mange, 'God, a atong wakak tetek u anasa bel a arlar ana taraila rop, a tena kinkinaula, a tena tol orosla, pa taraila ning la tol a toltol laulau ana gurarala, pa bel a arlar otleng ana tena los totokom ne. <sup>12</sup> A sira tamai naur a pukakiar ana ning a wik, pa sira saran taktakai miting na ning a bonot ana ututnala ning a sira tol otnan pasi.' <sup>13</sup> Ika a tena los totokom i tur masik tar, bel i tadai usaot na langit, anasa i meme. I dapis ka a malwasna ana bal maris, pa i atongi mang, 'God, ur maris iau, iau a tena tol a toltol laulau.' <sup>14</sup> A atongi ta mulo, a barsan ne, ning i ulak sur anuna rumai, i ka tostos namatana e God, pa ning a halindiau bel. Anasa esining i aitna pasi dir anatarna pasi, pa esining i anatarna pasi, dir aitna pasi."

*La sairas kakakla kusun e Iesu (Mt 19:13-15; Mk 10:13-16)*

<sup>15</sup> A tarai la los a betbetela tetek e Iesu sur ir suah naur a kuna saot onla. Ning anuna kakak a asaerla la oroi larning, la sairas la.

\* **17:35-36:** Dingla na tena tastamai ana Buk Tabu la nuki mang dingla na warwara otleng i kes te na ves ne. I mange: *Ning ir naur a barsan dia titol ting na barim, dir los pas ka ta halindiau, pa ning a halindiau bel.*



16 Ika e Iesu i kabah pas kakakla teteki, pa i atongi mange, “Mulor noren sen kakakla sur lar han tetek iau. Gong mulo sairas la, anasa a matanitu ane God anunla ning la manglarne. 17 A atong momoli ta mulo, ning tik bel ir kibas a matanitu ane God arlar ana kaklik, bel ir tol sot sur ir kas tingia.”

*A gongon a barsan*

(Mt 19:16-30; Mk 10:17-31)

18 Ning a ningnigo i deken e Iesu mang, “Wakak a Tena Asaer, asaning ar toli sur ar kibas a lalaun tikin?” 19 E Iesu i kelesi mang, “Sur asa ning u atong iau mang a wakak? Bel tik i wakak, e God ka. 20 U tasman a warkuraila: ‘Gong u tol a toltol laulau ana ta hane anuna tik o ta barsan anuna tik, gong u umkol tik, gong u kinkinau, gong u artituu asasongo, ur han-rawai e tamam pa e tnam.’” *Kisim Bek 20:12-16*

21 A barsan ning i kelesi mang, “Turpasi ning a kaklik ot tuk tar onone, a sira longor ana warkuraila rop ne.” 22 Ning e Iesu i longori, i atongi tana, “Ning a utna ot u kapan suri. Ur siuran sen anuma ututnala rop, pa a mani onoi ur tabar a kapan a taraila ono. Ning ur toli larning, anuma wakak a ululeng saot na langit. Lamur ur han ute pa ur mur iau.”

23 Ning i longor a warwara ne i bal maris kol, anasa anuna ututnala i galis kol. 24 E Iesu i tai teteki pa i atongi mang, “I ngangaten kol tetek a gongon a tarai sur lar kas ana matanitu ane God! 25 I ngangaten tetek a kamel sur ir kas ana mosol a sur a susuk, ika i ngangaten kol tetek a gongon a barsan sur ir kas ana matanitu ane God. Momolna, bel ir tolsot pasi.”

26 Ning la longor a warwara ne, la deke mang, “Manglarning, esi ma ning dir alauni?” 27 E Iesu

i keles la mang, “A utna ning a tarai bel lar tolsot pasi, e God ir tol asoti.”

28 E Pita i atongi tana mang, “Oroi, mila ka han kusun anumila na ututnala rop, pa mila mur u.”

29 E Iesu i atongi tanla mang, “A atong momoli ta mulo, ning tik ir han kusun anuna rumai, o kusun anuna hane, o na tastasnala, o kusun e tana, o e tamana, o na natnatnala, kamkamna ana matanitu ane God, 30 ana lalaun onone ir kibas a galis kol ana tarai pa utna i ka han pas kusuni. Pa ana lalaun lamur dir tabari ana lalaun tikin.”

*A munatol a warwara ane Iesu ana nuna minat*

(Mt 20:17-19; Mk 10:32-34)

31 E Iesu i ben maskan pas anuna ning a bonot pa naur a kakak a asaer, pa i atongi tanla mang, “Oroi, onone dalar han usaot e Jerusalem, pa dir tolsot pas a ututnala rop ning a propetla la ka tumus tari ana Nat a Barsan. 32 Anasa dir saran tari tetek la ning belsur a tarai Juda. Lar morot laulau onoi, lar atong laulau i, lar namisi, lar mirasi, pa lar umkoli. 33 Pa ana atol a pukakiar ir laun ot ulak.” 34 A kakak a asaerla bel la talapor ana ututnala rop ne. A kamkamna i kes mumun kusun la, pa bel la tasman asaning i warwara ono.

*E Iesu i apalpalas pas a kut*

(Mt 20:29-34; Mk 10:46-52)

35 Ning e Iesu i han milau e Jeriko, ning a barsan a kut i keskesting na ris a ngas, i nununung utna. 36 Ning i longor a kunum a tarai la han milau amon, i deke mang, “Asa ning?” 37 Pa la atai i mang, “E Iesu a te Nasaret ne i han bolos dala.” 38 Pa i kukuk mang, “Iesu, a Nat e Dewit\*, ur maris iau.” 39 Pa la ning la nigo la sairasi sur gong i agaia. Ika i arkabah rakrakai ot mang, “Nat e

\* 18:38: A tarai Juda la atong a Mesaia mang a Nat e Dewit.

Dewit, ur maris iau.”<sup>40</sup> E Iesu i tur, pa i arsune sur dir ben pasi teteki. Ning i ka han milau teteki, i dekeni mang,<sup>41</sup> “Asa ning u mang sur ar toli hom?” I kelesi mang, “Leklek, a mang sur ar tai.”<sup>42</sup> Pa e Iesu i atai i mang, “Ur palpalas matam! Anum a tortorot ka alan-golango pas u.”<sup>43</sup> Aiap ka i palpalas matana, pa i mur e Iesu, pa i atong aitna pas e God. Pa tarai rop otleng ning la oroi, la rakan aleklek e God.

## 19

### *E Sakias pa e Iesu*

<sup>1</sup> E Iesu i kas tumo e Jeriko, pa i han bolos sur usaot e Jerusalem.  
<sup>2</sup> Ning a barsan i kes ting ia, a risana e Sakias, a ningnigo anuna tena los totokomla, pa i gongon kol.  
<sup>3</sup> I mang kol sur ir oroi e Iesu, ika e Sakias a potpot a barsan ka, pa bel i tolsot pasi sur ir oroi i, anasa a kunum a tarai la tur alar pasi.  
<sup>4</sup> Pa i dun usa lanigo, pa i abit kas ana rakai, sur ir oroi e Iesu, anasa ir han bolos ting na ngas ning.

<sup>5</sup> Ning e Iesu i hanot ting ia, i tadai usaot na rakai, pa i atongi tana mang, “Sakias, ur purum kapit ute. Anone ar kes taum hom ting na num a rumai.”  
<sup>6</sup> Pa i purum kapit, pa i ben pas e Iesu uting na nuna rumai taum ana gasgas.  
<sup>7</sup> Ning a tarai rop la oroi, la anani mang, “A barsan ne i han sur ir kes taum ana tena laulau ting na nuna rumai.”

<sup>8</sup> E Sakias i tur pa i atongi tana Leklek mang, “Oroi, Leklek, ning a tuk ana nuk a ululeng, ar tabar a kapan a taraila ono, pa ning ia kar asongo pas ta utna tana tik, ar mundiat na kelesi teteki.”  
<sup>9</sup> Pa e Iesu i atongi ta e Sakias mang, “Ono ot ne, a arlaun i ka kes tetek la ning la kes te na rumai ne, anasa e Sakias otleng miting ia na mangis a tarai ane Abaram.

<sup>10</sup> Anasa a Nat a Barsan i hanot sur ir tai sur la ning la rongo pa ir alaun pas la.”

*A warwara lalar ana tena titol orosla ning di saran tar a mani tetek la*

(Mt 25:14-30)

<sup>11</sup> A tarai la longor a warwaralane, pa la nuki mang a matanitu ane God ir hanot kapit, anasa e Iesu i ka milau e Jerusalem. Pa i atong otleng ning a warwara lalar<sup>12</sup> mang, “Ning a ningnigo i sang sur ir han sur ning a hanua i kes bakbak, sur dir malmaling tari sur ir king, pa lamur ir ulak.  
<sup>13</sup> Lanigo ana nuna tinan, i kabah pas anuna ning a bonot a tena titol oros teteki pa i saran tar taktakai tuk a mani tanla, pa i atongi mang, ‘Mulor aitna i, tuk ning ar ulak.’  
<sup>14</sup> Ika a taraila miting na nuna hanua la ngeti, pa la sune sen dingla na tarai sur lar muri, pa la atongi mang, ‘Bel mila mang sur a barsan ne ir king anumila i.’

<sup>15</sup> “Ning di ka akes tari sur ir king, i ulak. I arsune sur anuna tena titol orosla ning i saran tar a mani tanla, sur ir tasman asaning ka hanot ana anunla a titol ana mani.  
<sup>16</sup> Pa a ningnigona i han teteki pa i atongi mang, ‘Leklek, anuma mani ia ka tol tar ning a bonot saot onoi.’  
<sup>17</sup> A leklek i atongi tana mang, ‘Wakak kol, u a wakak a tena titol oros! Ar suah tar u sur ur tai alar ning a bonot a tatatnan hanua, anasa a momol ana natar a utna.’  
<sup>18</sup> Pa a munaurna i han teteki pa i atongi mang, ‘Leklek, anuma mani ia ka tol tar dilima saot onoi.’  
<sup>19</sup> Pa a leklek i atongi tana mang, ‘U otleng ur tai alar dilima na tatatnan hanua.’  
<sup>20</sup> Ning a tena titol oros ulak i han teteki pa i atongi tana mang, ‘Leklek, anuma mani kane ulak ma, a poroi tari ana kaen pa suah wakak tari,  
<sup>21</sup> anasa a matatan u, anasa u a rakrakai a barsan. U los a utna ning belsur anumi, pa u sol a utna

ning bel u oman tari.’<sup>22</sup> A leklek i atongi tana mang, ‘U a laulau a tena titol oros, ar warkurai u arlar ana num a warwara ot. U ka tasmani mang iau a rakrakai a barsan. A los a utna ning belsur anuki, pa sol a utna ning bel a oman tari.’<sup>23</sup> Sur asa ning bel u suah tar anuka mani ting na rumai a gongon sur ning ar hanot, ar los pas anuka mani pa ta tukna otleng saot onoi?’

<sup>24</sup> “Lamur i atongi tanla ning la tur tingia mang, ‘Mulor los sen a mani kusuni, pa mulor saran tari tetek esaning anuna ning a bonot.’<sup>25</sup> Pa la atongi tana mang, ‘Leklek, anuna ning a bonot a mani kaning ma.’<sup>26</sup> I keles la mang, ‘A atongi ta mulo, esining i tong akes a galis, dir tabar ulaki ana galis. Ika esining bel i tong akes ta utna, dir kepsen otleng anuna siklik utna kusuni.

<sup>27</sup> “‘Ika mulor ben pas anuka hiruala ning bel la mang sur ar king anunla, pa mulor umkol la ot te na matak.’”

*E Iesu i han usaot e Jerusalem arlar ana king*

(Mt 21:1-11; Mk 11:1-11; Jn 12:12-19)

<sup>28</sup> Ning e Iesu ka atong sen tar a warwara larlar ne, i ningon ulak la usaot e Jerusalem.<sup>29</sup> Ning i hanot tumo e Betpage pa e Betani ting na mangir di atongi ana Mangir Oliw, i sune sen naur miting na kakak a asaerla, ana warwara mang,<sup>30</sup> “Mur han sur a hanua kaning lanigo ta mu. Ning mur han kas, mur han tar ana ning a barman a dongki kaning di dot akes tari, belot tik i kes tar ono. Mur pak pasi pa mur beni ute.<sup>31</sup> Ning tik ir deken mu mang, ‘Asa ning mu paki suri?’ mur atongi mang, ‘A Leklek i mang suri.’”

<sup>32</sup> Dia han pa dia pastek pas a ututnala rop ning e Iesu ka atong tari tandiau.<sup>33</sup> Ning dia pak a

barman a dongki la ning anunla, la deken diau mang, “Asa ning mu pak a barman a dongki ning suri?”

<sup>34</sup> Dia keles la mang, “A Leklek i mang suri.”<sup>35</sup> Pa dia ben tar a barman a dongki tetek e Iesu, pa dia los sen naur a saket, pa dia suah i saot na palai a dongki pa dia akes tar e Iesu saot onoi.<sup>36</sup> Ning i han amon, dingla na tarai la los sen anunla na saket pa la sagen tari ting na ngas.<sup>37</sup> Ning i ka milau ana tinan purum ana Mangir Oliw, a tnan gasgas i los a tarai a asasaerla rop pa la rakan aleklek pas e God ana tnan elngenla ana ututnala na kulkulan ning la ka oroi pa la kukuk mang,

<sup>38</sup> “A king ning i hanot ana risan a Leklek i angis! *Buk Song 118:26*

A bal molmol usaot na langit, pa a matatar usaot tetek e God!”

<sup>39</sup> Dingla na Parisaio ting na kunum a tarai la atongi mang, “Tene Asaer, ur sairas anuma tarai a asasaer.”<sup>40</sup> Pa e Iesu i keles la mang, “A atongi ta mulo, ning a taraila ne bel lar rakan aleklek, a hatatla ot lar kukuk.”

*E Iesu i tangis sur e Jerusalem*

<sup>41</sup> Ning e Iesu i milau e Jerusalem pa i oroi i, i tangis ono, pa i atongi,<sup>42</sup> “A mang sur mulo ka tasman a ngas ning ir topas a bal molmol onone. Ika i mumun kusun mulo!”<sup>43</sup> Ta pukakiar ir hanot, pa anumulo na hirua lar tur talilis anumulo a hanua, lar atur a woroh talilis alar mulo, lar tur alar anumulo na ngas a kaskas pa purpuro, pa lar um mulo kusun a risrisnala.<sup>44</sup> Pa lar regen sarara sen a rumrumai, pa lar umkol mulo taum ana natnatumulo otleng ning mulo kes ting ia. Pa bel lar noren sen tar naur a hat sur diar borbor taum, anasa bel mulo tasman lalan a taem ning e God i hanot tetek mulo.”

*E Iesu i kas uting na rumai a artabar*

(Mt 21:12-17; Mk 11:15-19; Jn 2:13-22)

<sup>45</sup> E Iesu i kas uting na rumai a artabar, pa i lu purum sen la ning la siusiurai. <sup>46</sup> Pa i atongi tanla mang, “Di ka tumus tari ting na Buk Tabu mang, ‘Dir atong anuka rumai ana rumai a nunung.’ Ais 56:7

Ika mulo ka tol lingir pasi sur ir arlar kama ana ‘rumai anuna tena kinkinaula.’ ” *Jer 7:11*

<sup>47</sup> E Iesu i asaer a tarai ting na rumai a artabar a pukakiarla rop. Ika a leklek a tena artabarla tetek e God, pa tena asaerla tagun a Warkuraila pa a ningnigo anuna taraila, la nuknuk sur ta ngas ning lar umkoli ono. <sup>48</sup> Ika la nuknuk panai tar sur ta utna ning lar toli, anasa a taraila rop la mang kol sur a warwarala ane Iesu.

## 20

*A kabah ana rarakai ning e Iesu i sira titol ono*

(Mt 21:23-27; Mk 11:27-33)

<sup>1</sup> Ning a pukakiar, ning e Iesu i asaer a tarai ting na rumai a artabar, pa i warawai ana Wakak a Warwara, a leklek a tena artabarla tetek e God, pa tena asaerla tagun a warkurai, pa ningnigola la han teteki. <sup>2</sup> Pa la atongi tana mang, “Ur atai mila, esi na ngas a rarakai ning u tol a ututnala ono? Esining i saran tar a rarakai ne tetek u?” <sup>3</sup> E Iesu i keles la mang, “Iau otleng ar deken mulo ana ning a kabah. Mulor atai iau. <sup>4</sup> Mitaha a rarakai ning e Jon i baptais ono? Misaot na langit, o tan a taraila ka?” <sup>5</sup> Pa la warwara artalai tanla mang, “Ning dalar atongi mang, ‘Misaot na langit,’ ir keles dala ka mang, ‘I mangasa ning bel mulo tortorot ono?’ <sup>6</sup> Ika ning dalar atongi mang, ‘Tan a taraila,’ a taraila rop lar wolot kol dala, anasa la tortorot o e Jon

mang i a propet.” <sup>7</sup> La kelesi ka mang, “Bel mila tasman i ning mitaha.” <sup>8</sup> Pa e Iesu i atongi tanla mang, “Iau otleng bel ar atai mulo ana rarakai ning a sira tol a ututnala ne ono.”

*A warwara larlar ana tarai a titolla ting na barim a wain*

(Mt 21:33-46; Mk 12:1-12)

<sup>9</sup> E Iesu i atong a warwara larlar ne tetek a tarai, “Ning a barsan i oman tar a barim a wain, pa lamur i saran tari tetek dingla na tarai a titol sur lar tai alari kaba, pa i han sur ning a hanua, pa i kes bongnan pasi ting ia. <sup>10</sup> Ning a kalang i ka sot sur dir git taum a wana wain, i sune sen ning a tena titol oros tetek a tarai a titolla, sur lar saran al wana barim sur anunai otleng. Ika a tarai a titolla la umi, pa la sune ulak oros seni ka. <sup>11</sup> I sune ulak ning a tena titol oros tetek la, pa la umi otleng, la ame sen tari, pa la sune oros ulak seni ka. <sup>12</sup> Lamur i sune sen a munatol a tena titol oros, la um laulau tari, pa la kepsen seni. <sup>13</sup> Pa a taman a barim a wain i atongi mang, ‘Asa ma ning ar toli? Ar sune sen a natuklik, ning a katnani, ngandek lar hanrawai i.’ <sup>14</sup> Ika ning a tarai a titolla la oroi pasi, la warwara taum mang, ‘I ma ning ir keles e tamana. Dalar umkoli, sur anundalai ma a barim a wain.’ <sup>15</sup> Pa la minging purum seni kusun a barim, pa la um amat seni.

“Asa ma a taman a barim a wain ir toli onla? <sup>16</sup> Ir hanot pa ir umkol sen a tarai a titolla, pa ir saran tar a barim tetek al tarai masik.” Ning la longor a warwara ne, la atongi mang, “Gong i hanot larne!” <sup>17</sup> Pa e Iesu i oroi la, pa i atongi mang, “Ning mulo nuki larne, asa kamkama warwara ne di ka tumus tari ting na Buk Tabu? ‘A hat ning a tena tol rumaila la kepseni,

i ot ning a wakak a hat kes,  
ning di tol a rumai saot ono,  
i wakak tana hatatla rop.’

*Buk Song 118:22*

<sup>18</sup> La rop ning la punga tar ana hat ne, lar tamire, ika tik ning a hat ne ir punga ahati, ir tamire arlar ana kubus.”

<sup>19</sup> A tena asaerla tagun a warkurai pa a leklek a tena artabarla tetek e God la tai sur ta ngas ning lar tong akes kapit pas e Iesu, anasa la tasmani mang i atong ka a warwara larlar ne onla. Ika la matatan a taraila.

*A kabah ana totokom*

*(Mt 22:15-22; Mk 12:13-17)*

<sup>20</sup> A tena asaerla tagun a warkurai pa leklek a tena artabarla tetek e God la ngoson rakrakai i, pa la sune sen dingla na tarai sur lar batnani pa lar asongo mang la a momol a taraila. Pa la kes longoroi sur ta warwara ning ir atongi sur lar tiu i ono pa lar saran tari nahai a warkurai pa rakrakai anuna ningnigo tagun a matanitu Rom. <sup>21</sup> Pa la atongi mang, “Tene Asaer, mila tasmani mang i tostos anuma warwara pa anuma asasaer. I arlar rop ka tetek a tarai rop, pa u asasaer la ana ngas ane God ana momol. <sup>22</sup> I mangasa, i tostos sur dir lou a totokom tetek a Sisar\* o bel?” <sup>23</sup> E Iesu ka tasman sen anunla a asasongo, pa i atongi tanla mang, <sup>24</sup> “Mulor asangan iau ana ta mani. A manar pa tumtumus ne onoi an esi?” Pa la kelesi mang, “Anun a Sisar.” <sup>25</sup> Pa i atongi tanla, “A utna ning anuna Sisar mulor sarani tetek a Sisar, pa utna ning ane God mulor sarani otleng tetek e God.” <sup>26</sup> Pa bel la asobor lar pasi ana matana tarai ana nuna warwarala. La kulkulan ana nuna warwara na arkeles, pa la kes wowowon tar kama.

*A kabah ana lalaun ulak kusun a minat*

*(Mt 22:23-33; Mk 12:18-27)*

<sup>27</sup> Dingla na Sadusi, ning la puai ka mang belal lalaun ulak kusun a minat, la han tetek e Iesu, pa la dekeni mang, <sup>28</sup> “Tene Asaer, e Moses i tumus tari tetek dala mang, ning ta barsan ir mat pas kusun a nuna hane, pa bel ta natun diau, e tasnalik ir ben pasi pa ir taulai ono, sur ir aйна tar al kakakla ana risana e tasnalik ning ka mat. <sup>29</sup> Ning ta kabaitas, diono mais a barsan rop ka. A ningnigona i taulai, pa i mat kusun anuna hane, pa bel ta natun diau. <sup>30</sup> Pa murmur a tasnalik male i taulai ana hane ning, pa i male i mat ka kusun a hane ning. <sup>31</sup> Lamur a munatolna kale. Manglarning a diono mais la rop, la taulai pas ono, pa la mat rop ka, ika a hane ning bel i agon tar ta kaklik tanla. <sup>32</sup> Pa hane i mat lamur tanla rop. <sup>33</sup> Ana lalaun ulak kusun a minat, a hane ning anun esi na halinla? Anasa diono mais la rop la ka taulai pas onoi.”

<sup>34</sup> E Iesu i atongi tanla mang, “A tarai tagun a raula ne la tautaulai, <sup>35</sup> ika a tarai ning la tostos sur lar kamtur ulak kusun a minat, pa lar laun ana lalaun lamur, bel lar taulai ulak. <sup>36</sup> Pa bel lar mat ulak, anasa la arlar kama ana angelola. La na natnat e God, anasa la ka laun ot kusun a minat. <sup>37</sup> Ning a Buk Tabu i warwara ana rakai ning i irirnga, e Moses i asangan mang a minatla lar laun ulak, anasa i atong a Leklek mang, ‘A God ane Abaram, a God ane Aisak pa God ane Jekop.’ *Kisim Bek 3:6*

<sup>38</sup> E God belsur a God ana minatla, a God anuna lalaunla ot, anasa la rop lar laun namatana.” <sup>39</sup> Pa dingla na tena asaerla tagun a warkurai la atongi mang, “Tene Asaer, anuma warwara i wakak

\* **20:22:** Sisar i a tnan ningnigo ana matanitu Rom pa i tai alar otleng a tarai Israel.

kol.”<sup>40</sup> Pa bel la han ulak ma teteki ana ta kabah, anasa la matmataut.

*A Karisito a Leklek ane Dewit  
(Mt 22:41-46; Mk 12:35-37)*

<sup>41</sup> E Iesu i atongi tanla, “Sur asa ning di atongi mang a Karisito ir hanot miting na mangis a tarai ane Dewit?”<sup>42</sup> Anasa e Dewit ot i atongi ana Saksakla ting na Buk Tabu mang,

‘A Leklek i atongi tetek anuka Leklek†,

“Ur kes te na sot a kuk,

<sup>43</sup> tuk ning ar tolsot pas anuma hiruala sur lar kes nahaim.”’ *Buk Song 110:1*

<sup>44</sup> E Dewit i atong a Karisito mang anuna Leklek. Ning larning, dita-manar mangasa?”

*E Iesu i atumarang a tarai ana toltol anuna tena asaerla tagun a warkurai*

*(Mt 23:1-36; Mk 12:38-40; Lk 11:37-54)*

<sup>45</sup> Ning a taraila rop la longor e Iesu, i atongi tana nuna kakak a asaerla mang,<sup>46</sup> “Mulor tai alar mulo kusun a tena asaerla tagun a warkurai. La mang sur lar han ana wakak a kaenla kol, pa la mang sur a tarai lar saran a tnan hanrawai tetek la ana hananuala na tinan taum. Pa la mang sur a keskes salanigo na rumai lotula, pa keskes a leklek salanigo na ngasala.<sup>47</sup> La arop a gongon ana laola, pa la tol a barah a nunungla sur a tarai lar oroi la. Ir itna kol a warkurai a arkeles ane God tetek la.”

## 21

*A artabar ana lao  
(Mk 12:41-44)*

<sup>1</sup> Ning e Iesu i kes ting na rumai a artabar, i tai tostos, pa i oroi a leklekla la minggen tar anunla a artabar ting na pukna na suah mani.<sup>2</sup> Pa i oroi pas otleng ning

a lao, ning i kapan, i minggen tar ka naur a toia.<sup>3</sup> Pa e Iesu i atongi mang, “A atong momoli ta mulo, a lao ne i saran tar a tnan mani tanla rop ning la minggen tar anunla a mani ting na pukna na suah mani.

<sup>4</sup> La saran tar ka a tuk miting na nunla manila, pa a lao ne, i kapan, ika, i ka saran rop sen asaning ir topas anuna keskes.”

*A akinalangla ana ararop a pukakiarla*

*(Mt 24:1-14; Mk 13:1-13)*

<sup>5</sup> Dingla na kakak asasaer la warwara ona rumai a artabar mang di ka mermer tari ana wakak a hatatla pa artabarla ning di saran tari tetek e God. Ika e Iesu i atongi mang,<sup>6</sup> “A ututnala ne ning mulo oroi la, a pukakiar ir hanot lamur ning bel ir naur a hat ma diar borbor taum, dir regen sarara rop sen la.”

<sup>7</sup> La deken e Iesu mang, “Tena Asaer, nangse ning a ututnala ne ir hanot? Pa asa a akinalang ana ututnala ne ning ka milau sur lar hanot?”<sup>8</sup> I keles la mang, “Mulor tai alar mulo, sakana dir asongo pas mulo. Anasa a galis lar hanot ana risak, lar atongi mang, ‘Tau ma a Karisito,’ o, ‘A pukakiar ka milau.’ Gong mulo mur la.<sup>9</sup> Ning mulor longor a harumla pa tatatnan mamahatla, gong mulo matmataut, anasa a ututnala ne lar hanot nigo, ika a ararop a pukakiar belot ir hanot.”

<sup>10</sup> Lamur e Iesu i atongi tanla mang, “Ning a mangis a tarai ir tur na harum sur ning a mangis pa ning a matanitu ir tur na harum sur ning a matanitu.<sup>11</sup> A tatatnan mamais, pa munurak pa a urmatana rakrakai a tinsaman ting na hananuala, pa a urmatana ututnala misaot na bakut, ning ir amatmataut a tarai, pa tatatnan

† 20:42: “A Leklek” i warwara o e God, pa “anuka Leklek” i warwara ona Karisito.

akinalangla misaot na bakut, lar hanot.

<sup>12</sup> “Lanigo ning a ututnala ne belot la hanot, dir dat pas mulo, dir akadik mulo, pa dir dat mulo uting na rumai lotula sur dir warkurai mulo, pa dir akas mulo uting na rumai dodotla. Pa mulor tur na warkurai namatan a kingla, pa tatatnan ningnigola, anasa mulo anuki. <sup>13</sup> A ututnala ne ir sapang a ngas sur mulor warwara talapor hok tetek la. <sup>14</sup> Ika lanigo tana, gong mulo matmataut sur asaning mulor warwara alar mulo ono. <sup>15</sup> Anasa iau ot, ar anuknuk tar a warwara pa tastasmai otleng ting na nuknukimulo, pa anumulo a hiruala rop bel lar keles sot pasi, pa bel lar puain seni. <sup>16</sup> A tamtamamulola pa na kaba tnamulola, a tastasumulola, a maimulola, pa na halalimulola, lar saran sen mulo sur dir umkol al tarai o mulo. <sup>17</sup> A taraila rop lar nget mulo anasa mulo anuki. <sup>18</sup> Ika e God ir tai alar mulo. <sup>19</sup> Ning mulor tur rakrakai mulor kibas a lalaun.

*E Iesu i atongi mang dir kamar sen e Jerusalem*

*(Mt 24:15-21; Mk 13:14-19)*

<sup>20</sup> “Ning mulor oroi a kunum a tarai a harum lar tur talilis pas e Jerusalem, mulor tasmani mang i milau sur dir kamar seni. <sup>21</sup> La ning la kes ting na papar Judia, lar liuliu usaot na mangirla, pa la ning la kes ana hanua Jerusalem lar purum, pa la ning la kes sa na bual gong ulak ma la kas. <sup>22</sup> Anasa a pukakiarla ning, a pukakiarla na arkeles sur e God ir tolsot pas a ututnala rop ning di ka tumus tari ting na Buk Tabu. <sup>23</sup> Ana pukakiarla ning, ir laulau kol tetek a tiananla, pa tetek la otleng ning la asus a kakala. A tnan kankan ir hanot ana hanua Israel, pa balakut ane God ir han tar ana tarai ne. <sup>24</sup> Al tarai dir umkol la ana liwan a harum, pa al tarai dir ben pas la

sur lar kes ana dodot ana hananuala rop. Pa la ning belsur a tarai Juda lar pas ahat e Jerusalem pa ir tuk tar ot ana pukakiar ning e God i asilang tari sur anunla keskes a ningnigo ir rop ono.

*A Nat a Barsan ir hanot*  
*(Mt 24:29-31; Mk 13:24-27)*

<sup>25</sup> “A akinalangla saot ana matana Kamis, pa ana kalang, pa ana nangnangla ir hanot. Pa te lapiu a tarai miting na matanitula lar laulau ana matmataut pa nuknukinla ir talar ana top ning ir harum pa tinangisna. <sup>26</sup> A tarai lar mat palpal ana matmataut ana ututnala ning ir um a rakrakan hanua, anasa a ututnala saot na bakut lar maler. <sup>27</sup> Ana pukakiar ning, lar oroi a Nat a Barsan ir hanot ana dia bakut, ana rakrakai pa tnan matatar. <sup>28</sup> Ning a ututnala ne ir turpasi sur ir hanot, mulor tur, pa mulor tadai, anasa a pukakiar ning e God ir alaun pas mulo ono i ka milau.”

*A warwara larlar ana rakai a fig*  
*(Mt 24:32-35; Mk 13:28-31)*

<sup>29</sup> E Iesu i atong a warwara larlar ne tanla mang, “Mulo tasman ot a rakai a fig pa rakaila rop. <sup>30</sup> Ning mulo oroi a pakanla ir gomo ot, mulo tasmani mang a kalang a laplapang i ka milau. <sup>31</sup> Lar otleng ning, ning mulor oroi a ututnala ning a warwara tar ono ir hanot, mulor tasmani mang a matanitu ane God i ka milau. <sup>32</sup> A atong momoli ta mulo, a ututnala rop ne ir hanot ning a tarai onone kanet la laun. <sup>33</sup> A langit pa rakrakan hanua diar rarop, ika anuka warwarala bel ir rarop.

*Mulor tai alar mulo*

<sup>34</sup> “Mulor tai alar mulo, sakana mulor molot ana tol ngasa pa sipak, pa nuknuk kol ana ututnala ana lalaun te lapiu, pa pukakiar ning ir hanot tetek mulo arlar ana kun ning ir akulkulan mulo.

<sup>35</sup> Anasa ir hanot tetek a taraila rop te na rakrakan hanua. <sup>36</sup> Mulor tai alar mulo ana pukakiarla rop, mulor nunung sur mulor rakrakai sur mulor alah kusun a ututnala ne, ning milau lar hanot, pa mulor nunung otleng sur mulor tolsot pasi sur mulor tur ana matana Nat a Barsan.”

<sup>37</sup> Pa e Iesu i asasaer a tarai tingui na rumai a artabar ana pukakiarla rop, pa ana pukakiarla ana morom i purum, pa i kes ting na mangir, a risana Oliw. <sup>38</sup> Pa ana pukakiarla ana kobot ning ot, a taraila rop la han teteki ting na rumai a artabar sur lar longori.

## 22

*E Judas i malmaling sur ir saran tar e Iesu*

(Mt 26:1-5, 14-16; Mk 14:1-2, 10-11; Jn 11:45-53)

<sup>1</sup> I ka milau a lotu na bret ning belal is ono, di atongi ana lotu na Han Lakai. <sup>2</sup> Pa leklek a tena artabarla tetek e God, pa tena asaerla tagun a warkurai, la nuknuk sur ta ngas sur lar um kumnan e Iesu ono, anasa la matatan a tarai.

<sup>3</sup> Pa e Satan i kas tar o e Judas, ning a risana otleng e Iskariot, i ning a halin ning a bonot pa naur a kakak a asaer. <sup>4</sup> I han tetek a leklek a tena artabarla tetek e God, pa ningnigola ana tena tatatai alarla ting na rumai a artabar, pa la warwara taum onoi sur ir asobor mangangasa tar e Iesu tetek la. <sup>5</sup> La gas, pa la atongi mang lar lou i ana mani. <sup>6</sup> E Judas i malmaling, pa i nuknuk sur ta wakak a pukakiar ning belal galis a tarai, sur ir saran tar e Iesu uting na kunla.

*Naur a kaklik a asaer dia sang a utnala sur a lotu a Han Lakai*

(Mt 26:17-25; Mk 14:12-21; Jn 13:21-30)

<sup>7</sup> A pukakiar a lotu a bret ning belal is ono i hanot, ning di sira umkol a barman a sipsipla sur lar ieni ana lotu na Han Lakai.

<sup>8</sup> Pa e Iesu i sune sen e Pita pa e Jon pa i atongi tandiau mang, “Mur han pa mur sang andala a utna na hangan sur a lotu na Han Lakai.” <sup>9</sup> Pa dia dekeni mang, “U mang sur miar sangi taha?”

<sup>10</sup> I keles diau mang, “Ning mur hanot saot e Jerusalem, mutol ir arpastek ana ning a barsan i los a tnan koto na malum, pa mur muri uting na rumai ning ir kas ting ia.

<sup>11</sup> Pa mur atongi tetek a tamana rumai mang, ‘A Tene Asaer i atongi mang: Kanaha a tuk a rumai ning ar ien a utna na Han Lakai taum ana nuk a kakak a asaerla?’ <sup>12</sup> Pa ir asangan tar mu ana tnan tuk a rumai saot, ning di ka sang tari, pa mur sang a ututnala ting ia.” <sup>13</sup> Dia han, pa dia pastek rop pas ot a ututnala ning e Iesu i atong tari tandiau. Pa dia sang a utnala na Han Lakai.

*A ararop a utna na hangan ana Leklek*

(Mt 26:26-30; Mk 14:22-26; 1Kor 11:23-25)

<sup>14</sup> Ning a pukakiar ka sot, e Iesu pa aposella la kes ana utna na hangan. <sup>15</sup> Pa e Iesu i atongi tanla mang, “A mang kol sur ar ien a utna na Han Lakai taum o mulo ning belot a kilang a kankan, <sup>16</sup> anasa a atongi ta mulo mang, bel ar ien ulak ta utna na Han Lakai tuk ana pukakiar ning dir tolsot pasi ana matanitu ane God\*.”

<sup>17</sup> E Iesu i los pas a kap pa i atong wakak pas ono, pa i atongi tanla, “Mulor los pas a kap ne, pa mulor gang sauran pasi. <sup>18</sup> Anasa a atongi ta mulo mang, bel ar gang ulak al wain, tuk ot ana pukakiar ning a matanitu ane God ir hanot ono.”

\* **22:16:** E Iesu warwara ona pukakiar ning ir hangan taum onla saot na langit.



19 Pa i los pas a bret, i atong wakak pas ono, i kibik pasi, pa i tabar la ono. I atongi mang, "Ine a palaok, a saran tari na alaun mulo. Mulor toli manglarne, sur mulor nuk pas iau ulak." 20 Lar otleng ning, ning ka rop a utna na hangan, i los pas a kap pa i atongi mang, "A kap ne, a tona kunubus, ana sulukik ning ir tapek o mulo." † 21 Ika a kuna esaning ir asobor tar iau, kane mia lolos taum ana logo na utna na hangan. 22 A Nat a Barsan ir mat arlar larning e God ka warkurai tari, ika ir laulau kol tetek a barsan ning ir asobori." 23 Pa la deken artalai la mang, "Esi na halindala ir tol a utna ne?"

### *Esining i leklek kol?*

24 La arlak mang esi na halinla dir atongi mang i leklek kol. 25 Pa e Iesu i atongi tanla mang, "A kingla anunla ning belsur a tarai Judala, la warkurai rakrakai l. Pa anunla ningnigola ot ulak la atong la a wakak a tena arnangaila. 26 Ika mulo, gong mulo manglarning. Esaning i leklek ta mulo ir arlar ka o esaning i natarna, pa esaning i ningnigo ir arlar ka o esaning i sira longor mut. 27 Esining i leklek ta diau? I ning i kes ana utna na hangan, o i ning i longor mut? I ot ning i kes ana utna na hangan, gepi? Ika iau, a kes ting na arpotor imulo arlar o esaning i sira longor mut.

28 "Ika mulo, mulo tur taum hok ana mamahatla ning i hanot tetek iau. 29 Pa ar saran tar a keskes na king ta mulo, arlar o e Tata i saran tari tak, 30 sur dalar hangan pa dalar gang ana nuk a logo ana nuk a matanitu. Pa mulor kes ana keskesla na king, pa mulor warkurai ning a bonot pa naur a mangis a tarai Israel."

*E Iesu i warwara nigo ana puai ane Pita*  
(Mt 26:31-35; Mk 14:27-31; Jn 13:36-38)

31 E Iesu i atongi mang, "Saimon, Saimon, oroi i, e Satan ka nunung pas sur ir lar mulo, arlar ana tena omomai ning i tang sauran a wit kusun a palpalna. 32 Ika ia ka nunung hom, Saimon, sur gong anuma tortorot i punga kol. Ning u ka nuklingir ulak, ur arakrakai na tastasimla." 33 E Pita i atongi tana mang, "Leklek, bel a matmataut ning ar mur u uting na rumai a dodot pa ana minat." 34 Pa e Iesu i kelesi mange, "Pita, a atongi tam, onone ning a kok belot ir kurkuri-rakuk ur puai munatol mang bel u tasman iau."

*Lar los a paus a suah mani, a rat pa a liwan a harum*

35 Lamur e Iesu i deken anuna kakak a asaerla mang, "Ning a sune sen mulo, pa bel anumulo ta paus a suah mani o ta rat o ta su, i mangasa, mulo kapan ot sur ta utna?" Pa la kelesi mang, "Bel." 36 Pa e Iesu i atongi tanla, "Ika onone, esining anuna ta paus a suah mani, i wakak ning ir losi ot, pa a rat otleng. Pa esaning bel ta liwan a harum, i wakak ning ir siuran sen anuna ta kaen pa ir lou pas tik. 37 A atongi ta mulo, dir tolsot pas a tumtumus ne hok, 'Di atong taum la ana tena laulaula.' Ais 53:12

Anasa a ututnala ne di ka tumus tari hok, milau dir tolsot pasi." 38 Pa kakak a asaerla la atongi mang, "Oroi i, Leklek, naur a liwan a harum kanet." Pa e Iesu i keles la mang, "I sot ka."

*E Iesu i nunung*  
(Mt 26:36-46; Mk 14:32-42)

39 E Iesu i purum kusun a hanua, pa i han usaot na Mangir Oliw,

† 22:20: Dingla na tena tastasmai ana Buk Tabu la nuki mang e Luk bel i tumus a warwarala ning i kes potor ana naur a akinalang [ ]. La nuki mang tik masak i tumus tari lamur.

arlar ot larning i sira toli. Pa a kakak a asaerla la muri. <sup>40</sup> Ning la hanot ting na pukna ning, i atongi tanla mang, “Mulor nunung, sur gong mulo punta ana arlam.” <sup>41</sup> I han siklik tar kusun la, i tur ana bokona hana, pa i nunung mang, <sup>42</sup> “Tata, ning u mang, ur los sen a kap a kankan kusun iau. Ika gong di mur a nuknukik, dir mur ot a nuknukim.” <sup>43</sup> Ning a angelo misaot na langit i hanot teteki pa i arakrakai i. <sup>44</sup> I nunung rakrakai kol, anasa i kilang a rakrakai a bal maris kol, pa a maragusna i arlar ana tutu na suluk i punta purum ting lapiu.†

<sup>45</sup> I ararop ana nunung, i kamtur pa i han ulak tetek a kakak a asaerla, pa i oroi la ning la ka borbor duman, anasa a palaonla i ngol ana bal maris. <sup>46</sup> Pa i atongi tanla mang, “Sur asa ning mulo borbor duman ka? Mulor kamtur, pa mulor nunung sur gong mulo punta ana arlamla.”

*Di tong pas e Iesu*

(Mt 26:47-56; Mk 14:43-50; Jn 18:3-11)

<sup>47</sup> Ning e Iesu kaning ot i warwara, a tnan kunum a tarai la hanot. Pa e Judas, ning tagun a ning a bonot pa naur a kakak a asaerla, i nigon pas la. I han tetek e Iesu sur ir goro a ris a pahana. <sup>48</sup> Ika e Iesu i dekeni mang, “Judas, i mangasa, u kar asobor tar a Nat a Barsan ana argoro?”

<sup>49</sup> Ning la ning la han taum o e Iesu la oroi a ututnala ne ir hanot, la dekeni mang, “Leklek, u mang sur milar harum ana liwan a harumla?” <sup>50</sup> Pa ning a halinla i ting a tena arsune anuna ningnigo na tena artabar tetek e God, i ting sen a sot a talngana.

<sup>51</sup> Ika e Iesu i sairasi mang, “Gong!” Pa i tong a talngana a

tena arsune, pa i awakak ulak pasi. <sup>52</sup> E Iesu i warwara tetek a leklek a tena artabarla tetek e God, pa a ningnigola anuna tena tatatai alarla miting na rumai a artabar, pa a ningnigola ana taraila ning la hanot suri. I atongi mange, “I mangasa, ngandek iau a tena tol purpuruon, ning mulo hanot ana liwanla na harum pa a nalnalla sur iau? <sup>53</sup> Ana pukakiarla rop dala kes ting na rumai a artabar pa bel mulo tong akes iau. Ika ine anumulo a pukakiar, ning a rakrakai a mormorom i nigon mulo.”

*E Pita i puain sen e Iesu*

(Mt 26:57-58, 69-75; Mk 14:53-54, 66-72; Jn 18:12-18, 25-27)

<sup>54</sup> La tong akes pas e Iesu, pa la ben maskan seni. La beni uting na rumai anuna ningnigo na tena artabar tetek e God. Pa e Pita i mur amon e Iesu, ika i bakbak ot. <sup>55</sup> Ning la ka hatna tar a iah tumo lapiu, pa la kes taum, e Pita otleng i kes taum ot onla. <sup>56</sup> Ning a basbas, a tena titol oros, i oroi pasi ning i kes tar milau a irnga na iah, pa i ngoson rakrakai i, pa i atongi mang, “A barsan ne dia sira armuri taum otleng o e Iesu.” <sup>57</sup> Ika e Pita i puai mang, “Lak, bel a tasman e Iesu.” <sup>58</sup> Lamur kale, ning a barsan male i oroi pas e Pita pa i atongi mang, “U otleng mulo.” Ika e Pita i kelesi mang, “Barsan, iau bel.”

<sup>59</sup> Lamur, ning ulak i warwara rakrakai, i atongi mang, “I momol ot, a barsan ne dia sira armuri taum ot o e Iesu, anasa i a te Galili.” <sup>60</sup> E Pita i kelesi mang, “Barsan, bel a tasman asaning u warwara ono.” Ning kaning ot i warwara, a kok i kurkurirakuk. <sup>61</sup> A Leklek i talingir, i tai tostos tetek e Pita, pa e Pita i nuk pas a warwara anuna Leklek ning ka atong tari tana

† 22:44: Dingla na tena tastamai ana Buk Tabu la nuki mang e Luk bel i tumus naur a dihna 43 pa 44. La nuki mang tik masuk i tumus tari lamur.

mang, “Onone, ning a kok belot ir kurkurirakuk ur puai munatol mang bel u tasman iau.” <sup>62</sup> Pa i purum kusun a pukna ning, pa i tangis rakrakai kol.

*Di morot laulau o e Iesu pa di mirasi*

(Mt 26:67-68; Mk 14:65)

<sup>63</sup> La ning la tai alar e Iesu, la morot laulau ono, pa la mirasi.

<sup>64</sup> La poroi alar tar a matana, pa la atongi tana mang, “U a propet, ur atai mila, esining i dapis u!”

<sup>65</sup> Pa la atong saksakani ana galis a warwara otleng.

*E Iesu i tur namatana tarai a kiwung*

(Mt 26:59-66; Mk 14:55-64; Jn 18:19-24)

<sup>66</sup> Ana kabakiar kobot, a ningnigola anuna tarai, a leklek a tena artabarla tetek e God pa a tena asaerla tagun a warkurai la han taum. Pa la ben pas e Iesu tetek a tarai a kiwung ning, <sup>67</sup> pa la atongi tana mang, “Ning u a Karisito, ur atai mila.” Pa e Iesu i keles la mang, “Ning ar atai mulo, bel mulor tortorot ana nuk a warwara. <sup>68</sup> Pa ning ar deken mulo ana ta deke, bel mulor kelesi. <sup>69</sup> Ika, tur pasi onone, a Nat a Barsan ir kes ana ris a sot a kuna e God, ning i rakrakai kol.” <sup>70</sup> Pa la rop la deken e Iesu mang, “U a Nat e God gepi?” Pa i keles la mang, “Mulo ka atong sot pasi, iau ot ne.” <sup>71</sup> Lamur la atongi mang, “Sur asa ning dalar mang ulak sur ta warwara na artitui? Anasa dala ka longor tar anuna warwarala ne, ning dalar tiu i ono.”

## 23

*E Iesu i tur ana warkurai sa lanigo ta e Pailat*

(Mt 27:1-2, 11-14; Mk 15:1-5; Jn 18:28-38)

<sup>1</sup> Lamur a tarai a kiwung rop la tur, pa la ben pas e Iesu tetek

e Pailat. <sup>2</sup> Pa la turpasi sur lar tiu i mang, “Mila oroi a barsan ne i ben rongo anumila na tarai, i sairas mila sur gong mila saran a totokomla tetek a Sisar, pa i atongi otleng mang i a Karisito, a king.”

<sup>3</sup> E Pailat i dekeni mang, “U a King anuna tarai Judala?” Pa e Iesu i kelesi mang, “I ot ning u ka atongi.”

<sup>4</sup> E Pailat i atongi tana leklek a tena artabarla tetek e God pa a kunum a tarai mang, “Bel a deken tetek ta toltol ning a barsan ne i rongo ono.” <sup>5</sup> Ika la ngongos ka mang, “I akamtur a balan a tarai sur lar kutus a warkurai anuna matanitu, ana nuna asasaer ting na papar Judia rop. I turpasi saot e Galili pa i tuk te.”

*E Iesu i tur ana warkurai sa lanigo ta e Herot*

<sup>6</sup> Ning e Pailat i longori, i deken la o e Iesu mang, “I a te Galili?”

<sup>7</sup> Ning i ka tasmani mang e Iesu mitisa ana papar Galili ning e Herot i ningnigo ting ia, i sune seni teteki. Ana pukakiar ning e Herot otleng i kes tisaot e Jerusalem.

<sup>8</sup> Ning e Herot i oroi pas e Iesu, i gas kol, anasa tagun lanigo ot i mang sur ir oroi i, anasa ka longor tar a warwara ono, pa i mang sur ir oroi ta utna na kulkulan ning ir toli. <sup>9</sup> E Herot i deken e Iesu ana galis a kabah, ika e Iesu bel i kelesi. <sup>10</sup> A leklek a tena artabarla tetek e God pa a tena asaerla tagun a warkurai kanning la tur ting ia, la tiu rakrakai e Iesu. <sup>11</sup> E Herot pa anuna tarai a harum la morot laulau ono, pa la malani, la mer tari ana wakak a kaen kol, pa la sune sen ulaki tetek e Pailat. <sup>12</sup> Lanigo e Herot pa e Pailat bel dia armoro taum, ika ana pukakiar ning dia bot armoro.

*E Pailat i warkurai e Iesu sur ir mat*

(Mt 27:15-26; Mk 15:6-15; Jn 18:39—19:16)

13 E Pailat i kabah taum pas a leklek a tena artabarla tetek e God, pa a tarai, 14 pa i atongi tanla mang, “Mulo ka ben tar a barsan ne tetek iau, arlar o esaning i ben rongon a taraila. Pa ia ka deken tari namatamulo, pa bel a deke tetek pas ta toltol ning a barsan ne i rongono. 15 E Herot otleng bel i pastek pas ta toltol ono, pa i sune sen ulaki ka tetek dala. Oro i, bel i tol tar ta utna ning ir hirua ono. 16-17 Ar dapis tari ka, pa ar pak seni.\*

18 Pa taraila rop la kukuk ana tnan elngenla mang, “A barsan ne ir hirua, pa ur pak sen tar e Barabas tetek mila.” 19 E Barabas i ning a barsan ning di akas tari ana rumai a dodot anasa i harum ana matanitu saot na hanua Jerusalem, pa i sira umkol a taraila otleng. 20 E Pailat i deken ulak la, anasa i mang sur ir pak sen e Iesu. 21 Ika la kukuk rakrakai ka mang, “Sai ahati saot na rakai kutus! Sai ahati saot na rakai kutus!” 22 Pa i munatol na deken la mang, “Sur asa? Esi na laulau a utna ning ka tol tari? Bel a deke tetek pas ta toltol laulau ning ir hirua ono. Ar dapis tari ka, pa ar pak seni.” 23 Ika la kukuk ngongos ana tnan elngenla sur dir sai ahati kama saot na rakai kutus. Pa la tolsot pasi ot. 24 Pa e Pailat i malmaling kama sur dir mur a nuknukinla. 25 Lamur i pak sen e Barabas ning i kes ana rumai a dodot anasa i harum ana matanitu pa i umkol a taraila, i ning la nunung suri. I saran tar e Iesu tetek a tena harumla arlar ana nuknuk a taraila.

*Di sai ahati e Iesu saot na rakai kutus*

(Mt 27:32-44; Mk 15:21-32; Jn 19:17-27)

26 Ning la ben pas e Iesu sur lar sai ahati saot na rakai kutus, la dat pas ning a te Sairini, a risana e Saimon, ning i han miting na hanua sur ir han usaot e Jerusalem. Pa la los tar a rakai kutus usaot na palaina, sur ir los murmur e Iesu ono.

27 A tnan kunum a taraila la mur e Iesu. Arpotor inla, a gurarala otleng, ning la bal maris pa la tangsani. 28 E Iesu i talingir pa i atongi tanla mang, “A gurara Jerusalem, gong mulo tangsan iau, mulor tangsan mulo ot taum ana natnatumulola. 29 Anasa a pukakiarla ana kankan ir hanot tetek mulo pa mulor atongi mang, ‘A pombo na gurarala, ning bel la agon pa bel la asus al kakakla, la angis.’ 30 Lamur

‘lar atongi tetek a mangirla, “Mulor punga tar omila!”

pa tetek na puka leklek, “Mulor pol alar mila!†” ’ Hosea 10:8

31 Ning lar tol a ututnala ne ning a rakai kaning ot i laun, asa lar toli ning a rakai ka marang?”

32 Pa naur otleng, naur a laulau a barsan, di ben taum diau o e Iesu sur ditol ir hirua taum.

33 Ning la hanot ting na pukna di atongi ana “A Lasa na pukulna,” la sai ahati e Iesu saot na rakai kutus ting ia, pa naur a laulau a barsan otleng, ning a halindiau ana ris a sot, pa ning ana kair. 34 E Iesu i atongi i mang, “Tata, kepsen sen anunla na toltol laulaula, anasa bel la tasman asa ne la toli.” Pa la pilai laki sur lar los pas taktakai kaen miting na nuna kaenla.

35 A taraila la tur pa la oroi i, pa a ningnigola la morot laulau o e Iesu, la atongi mang, “I alaun pas a tarai masik. Ning i a Karisito ane God, anuna kaklik a asilang, i wakak ning ir alaun pasi ot.” 36 Pa

\* **23:16-17:** Dingla na tena tastamai ana Buk Tabu la nuki mang dingla na warwara otleng i kes ana dihna ne. I manglarne: *Ana taktakai lotu na Han Lakai, e Pailat i sira pak sen takai a barsan miting na rumai a dodot tetek a tarai.* † **23:30:** La mang sur a mangirla lar punga saot onla anasa la mang sur lar alah kusun a kankan.

a tena harumla otleng la morot laulau onoi. La han teteki, la saran tar a wain ning i mititir tana, <sup>37</sup> pa la atongi, “Ning u a king anuna tarai Juda, onone ur alaun pas u ot.” <sup>38</sup> Di tumus tar otleng a tum-tumus saot na palai a rakai kutus mang,

“INE A KING ANUN A TARAI  
JUDA.”

<sup>39</sup> Ning tagun naur a barsan laulau ning di akulum taum tar ditol, i atong oros a warwara ka ta e Iesu mang, “Ning u a Karisito, ur alaun pas u pa miau!” <sup>40</sup> Pa ning a halindiau i balakut teteki pa i atongi mang, “I mangasa, u bel u matmataut sur e God? Anasa u otleng datol rop datol kilang ning a ngas a kankan ka. <sup>41</sup> I tostos ot on dau, anasa di keles anundau a toltol laulau. Ika a barsan ne bel i tol ta toltol laulau.” <sup>42</sup> Lamur i atongi ta e Iesu, “Iesu, nuk pas iau, ning ur kas ana num a matanitu.” <sup>43</sup> Pa i kelesi mang, “A atong momoli tam, onot ot ne ur kes taum hok saot na Paradais.”

*E Iesu i mat*

(Mt 27:45-56; Mk 15:33-41; Jn 19:28-30)

<sup>44</sup> Ning ka ning a bonot pa pisir naur a matana kamis ana kamis, a bual i mormorom rop tuk ana atol a matana kamis ana rah, <sup>45</sup> anasa a kamis bel i sasai. Pa kaen na alalar kutus tingui na rumai a artabar i taksilir potor sur naur a dihna. <sup>46</sup> E Iesu i kukuk rakrakai mang, “Tata a saran tar a inguk uting na naur a kum.” Ning ka atong tari larning, i suah sen anuna lalaun. <sup>47</sup> Ning a ningnigo anuna tena harumla i oroi asaning i hanot, i atong aitna pas e God mang, “I momol kol, a barsan ne a tena tostos.” <sup>48</sup> A kunum a taraila ning kaning la tur taum sur lar oroi a utna ne, ning la oroi i, la dapdapis a malwasinla ana bal maris pa la han ulak. <sup>49</sup> Ika na halalna e Iesu, pa a gurarala ning la muri mitumo e Galili, la tur

bakbak tar ot, pa la oroi a ututnala ne.

*Di aborbor e Iesu ting na kulam a minat*

(Mt 27:57-61; Mk 15:42-47; Jn 19:38-42)

<sup>50-51</sup> Ning a barsan, a risana e Josep, mitimo e Arimatia, ting na papar Judia. I ning a wakak a barsan, pa a tena tostos, ning i harnanai sur a matanitu ane God. I ning tagun a tarai a kiwung, ika bel i malmaling taum onla ana anunla a warkurai pa a utna ning la toli. <sup>52</sup> I han tetek e Pailat pa i nunung pas a minat e Iesu tana. <sup>53</sup> I los purum pasi, i poroi pasi ana wakak a kaen, pa i aborbor tari ting na kulam a minat ning di ka kel tari ting na ris a hat, ning belot di aborbor tar ta minat ono. <sup>54</sup> A pukakiar ning, a pukakiar a sang, pa milau a Pukakiar a Sabat ir turpasi.

<sup>55</sup> Pa a gurarala ning la han taum o e Iesu mitumo e Galili, la mur e Josep, pa la oroi tar a kulam a minat pa a ngas a aborbor ning di toli ana minat o e Iesu. <sup>56</sup> Ning la ulak, la sang pas a ututnala ning i tomtoboh wakak pa a wel ning i tomtoboh otleng. Pa ana Pukakiar a Sabat, la manah arlar ot ana warkurai.

## 24

*E Iesu i kamtur ulak kusun a minat*

(Mt 28:1-10; Mk 16:1-8; Jn 20:1-10)

<sup>1</sup> Ana kobot ning ot, ana ningnigo na pukakiar ana wik, a gurarala la han uting na kulam a minat, pa la los a ututnala ning i tomtoboh ning la ka sang pasi. <sup>2</sup> Pa la oroi i ning di ka lakir sen tar a hat kusun a matana kulam a minat. <sup>3</sup> La kas, ika bel ma la oroi a minat a Leklek e Iesu. <sup>4</sup> Ning a nuknukinla i loklokron onoi, naur a barsan, anundiau naur a kaen i pil kol, dia hanot kulkulan tetek

la. <sup>5</sup> La matmataut pa la kes tudu, la suah purum a matanla ting na piu. Dia atongi tanla, "Sur asa ning mulo tai sur a lalauna te napir a minatla?" <sup>6</sup> Bel ma kane, ka laun ulak. Mulor nuk pas a warwara ning ka atong tari ta mulo, ning i kes ot tumo e Galili. <sup>7</sup> I atong tari mang, 'Dir saran tar a Nat a Barsan tetek a kuna laulau a taraila, pa dir sai ahati saot na rakai kutus, pa ana atol a pukakiar lamur ir laun ulak.' <sup>8</sup> Pa gurara ning, la nuk pas a warwara ane Iesu.

<sup>9</sup> Ning la ulak kusun a kulam a minat, la atatai ana ututnala rop ne tetek ning a bonot pa takai a kakak a asaerla pa tetek la rop otleng ning la sira mur e Iesu. <sup>10</sup> A gurarala ning la atai a aposella ana ututnala ne, la ne: E Maria Magdalen, e Joana, pa e Maria e tana e Jems, pa dingla na gurara otleng ning la han taum on ditol. <sup>11</sup> Ika a aposella la longor a warwara ana gurarala arlar ana warwara oros ka, pa bel la tortorot onla. <sup>12</sup> Ika e Pita i tur, i dun sur a kulam a minat. I roh purum, pa i sidok pa i oroi a kaenla kama, la borbor masik tar. Pa i ulak, pa i nuknuk kol ana utna ne i hanot.

*A tinan usa e Imaus  
(Mk 16:12-13)*

<sup>13</sup> Ana pukakiar ot ning, naur onla ning la sira mur e Iesu, dia han uting na hanua a risana e Imaus. A barah ana ngas ning i arlar ana ning a bonot pa takai a kilomita misaot e Jerusalem. <sup>14</sup> Ning dia han amon dia warwara ana ututnala rop ne ka hanot. <sup>15</sup> Ning dia warwara, pa dia deken artalai diau, e Iesu ot i hanot tetek diau, pa ditol han taum. <sup>16</sup> Ika ning a utna i poroi alar pas a matandiau pa bel dia oroi lalan pasi.

<sup>17</sup> E Iesu i deken diau mang, "Asa ning mu warwara amon ono ting na numu a tinan?" Dia tur tar ka pa dia tatatai na bal maris.

<sup>18</sup> Pa ning a halindiau a risana e Kliopas, i dekeni mang, "Ngandedek u ka esaning u kes saot e Jerusalem, pa bel u tasman a ututnala di toli saot ana pukakiarla ne?" <sup>19</sup> Pa i deken diau, "A ututnala na sa?" Pa dia kelesi mang, "A ututnala o e Iesu a te Nasaret, a propet, ning i asangani mang i rakrakai ana nuna titolla pa anuna warwarala otleng, ana matana e God pa a taraila rop. <sup>20</sup> A leklek a tena artabarla tetek e God pa anundala ningnigola la saran tari ana warkurai sur ir mat, pa di sai ahati saot na rakai kutus. <sup>21</sup> Mila tortorot ono mang i ning ir alan-golango e Israel. Pa onone otleng, ka natol a pukakiar alar a ututnala ning la toli. <sup>22</sup> Ine otleng, dingla na gurara omila, la akulkulan mila. Ning la han kobot uting na kulam a minat, <sup>23</sup> la tatatai panai tar sur a minatna. Ning la ulak la atongi mang la oroi tar naur a angelo ana tatatai, pa dia atai la mang ka laun ulak. <sup>24</sup> Lamur dingla na tarai otleng omila, la han pas uting na kulam a minat, pa la oroi tar a utna manglarning a gurarala la atatai ono, ika bel la oroi e Iesu."

<sup>25</sup> Pa e Iesu i atongi tandiau, "Mu longlong ka, bel mu tortorot kapit ana warwarala rop ning a propetla ka atong tari. <sup>26</sup> La atongi mang a Karisito ir kilang a kankanla ne, pa lamur ir kas ana nuna matatar." <sup>27</sup> Turpasi ana bukla ane Moses pa a propetla, e Iesu i papak tetek diau ana ututnala rop di ka tumus tari onoi ot ting na Buk Tabu. <sup>28</sup> Ning ditol han milau a hanua ning dia han sur uting ia, e Iesu i tohi sur ir han bolos ka. <sup>29</sup> Pa dia sairasi, dia atongi mang, "Ur kes taum o miau, anasa ka rah, a kamis kamang ir sup ne." I kas pa i kes taum on diau.

<sup>30</sup> Ning ditol kes sur ditol ar hangan, e Iesu i los pas a bret, i

atong wakak pas ono, i kibik pasi, pa i tabar diau ono. <sup>31</sup> Lamur, a matandiau i tapalas, pa dia bot oroi lalan pasi, pa i rorom pas kusun diau. <sup>32</sup> Pa dia warwara artalai tetek diau mang, "I momol ot, a balandau i pirok ana gasgas ning i warwara tetek dau ning datol han ting na ngas, pa i pak tar a warwara na Buk Tabu tetek dau."

<sup>33</sup> Ana pukakiar ot ning, dia kamtur pa dia ulak usaot e Jerusalem, pa dia han tetek ning a bonot pa takai a kakak a asaerla pa dingla na tarai otleng ning la kes taum. <sup>34</sup> La atongi mang, "I momol ot! A Leklek ka laun ulak, pa ka hanot pas tetek e Saimon." <sup>35</sup> Lamur dia atatai ana sa ning i hanot tetek diau ting na ngas, pa ana nundiau a ororoi lalan ono ning i kibik a bret.

*E Iesu i hanot tetek anuna kakak a asaerla*

*(Mt 28:16-20; Mk 16:14-18; Jn 20:19-23; Ap 1:6-8)*

<sup>36</sup> Ning kaning ot dia warwara ana ututnala ne, e Iesu ot i tur potor tanla, pa i atongi mang, "A bal malmol tetek mulo!" <sup>37</sup> La matmataut kol pa palaonla i suren ono, la nuki mang a inguna ka ning la oroi i. <sup>38</sup> Pa i atongi tanla mang, "Sur asa ning mulo matmataut pa mulo urmatana nuknuk?" <sup>39</sup> Mulo oroi naur a kuk pa naur a hak. Iau momol ot ne. Mulor tuk iau, pa mulor oroi iau. A ingun belal palpalna, pa belal sursurna otleng. Ika mulo oroi i mang iau a palaok ot pa a sursurik otleng." <sup>40</sup> Ning ka atong tari lerne, i asangan tar naur a kuna pa naur a hana tanla. <sup>41</sup> La gas pa la kulkulan, ika belot la tortorot. Pa i deken la mang, "Bel ta utna kane sur ar ieni?" <sup>42</sup> Pa la tabari ana dia sis ning di ka tun tari. <sup>43</sup> Pa i los pasi, pa i ieni namatanla.

<sup>44</sup> Pa i atongi tanla, "Ning a kes ot taum mulo, ia ka atong tar a

warwara ne tetek mulo mang: A ututnala rop ning di ka tumus tari hok, ana warkuraila ane Moses, ana warwara anuna propetla pa ana Saksakla dir tolsot pasi." <sup>45</sup> Pa e Iesu i atalapor a nuknukinla sur lar tastasmai ana Buk Tabu. <sup>46</sup> I atongi tanla mang, "Di ka tumus tari mang, a Karisito ir hirua, pa ana natol a pukakiar lamur ir laun ulak kusun a minat, <sup>47</sup> pa dir warawai ana risana tetek a taraila miting na matanitu rop, turpasi saot e Jerusalem. Dir warawai tetek la mang lar lingir a nuknukinla pa e God ir kepsen anunla na toltol laulau. <sup>48</sup> Mulo a tena warwarala ana ututnala ne mulo ka oroi tari. <sup>49</sup> Oro i, ar sune sen esaning e Tata ka lele tar ono. Mulor kes ot te na hanua ne, tuk ning dir mermer tar mulo ana rakrakai misaot."

*E Iesu i han kas usaot na langit (Mk 16:19-20; Ap 1:9-11)*

<sup>50</sup> Lamur i ben purum pas la kusun a hanua Jerusalem, pa la hanot ting na ning a pukna milau e Betani, pa i tuslan tostos naur a kuna, pa i atong angis la. <sup>51</sup> Ning kaning ot i atong angis la, i han kusun la, pa e God i los kas pasi usaot na langit. <sup>52</sup> La lotu teteki, pa la ulak usaot e Jerusalem ana tnan gasgas. <sup>53</sup> Pa la keskes tingui na rumai a artabar, la atong aleklek pas e God.

## A Wakak a Warwara o e Iesu Karisito Jon i tumusi

### *A warwara talapor nigo*

E Jon i ning a halin a ning a bonot pa pisir naur a kakak a asaer ane Iesu (oroï e Mt 4:21). I oroï a ututnala ning e Iesu i toli pa i longor anuna na asasaerla. I tumus a buk ne lamur tana natola buk ning e Matiu, Mak pa e Luk ditol tumusi. I tumus a buk ne anasa i mang sur dalar tasman e Iesu pa dalar tortorot onoi, pa dalar tasman lalani mang o e Iesu ka dalar laun tikin, oroï e Jon 20:31.

Ning a tnan utna ning e Jon i mang sur ir atai dala onoi mange: E Iesu i e God pa i a Nat e God. Ana kamkama buk ne i warwara talapor o e Iesu mang i e God pa natnating ot i kes taum o e God. I atai dala otleng ana ututnala na kulkulan ning e Iesu i toli, pa e Jon i atong la mang a akinalangla, anasa la amomoli mang e Iesu i e God. E Jon i atai dala otleng mang a galis a tarai bel la tortorot o e Iesu, a ningnigola anuna tarai Juda otleng bel la tortorot.

### *A tinan ana Buk Jon:*

A Warwara i hanot a barsan (1:1-18)

E Jon a Tena Baptais pa a ningnigo na kakak a asaerla ane Iesu (1:19-51)

A titol ane Iesu tetek a tarai (2:1-12:50)

A ararop na wik pa a minat ane Iesu (13:1-19:42)

A kamkamtur ulak ane Iesu kusun a minat (20:1-31)

E Iesu i hanot tetek a kakak a asaerla to e Galili (21:1-25)

### *E Iesu ot a Warwara ane God*

<sup>1</sup> Natnating ot ning belot di akes a rakrakan hanua, a Warwara ka kes nigo. A Warwara i kes taum

o e God, pa a Warwara i ot e God.

<sup>2</sup> Natnating ot i kes taum o e God.

<sup>3</sup> Ana Warwara ot, e God i akes a ututnala rop, bel ta utna ning e God i akesi bel i akesi taum ana Warwara. <sup>4</sup> A lalaun i kes onoi, pa a lalaun ning, i a talapor anuna taraila rop. <sup>5</sup> A talapor i atalapor ana mormorom, pa a mormorom bel i tolsot pasi.

<sup>6</sup> E God i sune sen ning a barsan, a risana e Jon. <sup>7</sup> I hanot sur ir warwara talapor ana talapor, sur a taraila rop lar tortorot onoi. <sup>8</sup> I ot bel a talapor, i hanot ka sur ir warwara talapor ana talapor. <sup>9</sup> Anasa a talapor momol ning ir atalapor a taraila rop, ir hanot ute na rakrakan hanua.

<sup>10</sup> A Warwara i kes ana rakrakan hanua. Pa ana Warwara e God i akes a rakrakan hanua, ika a taraila ana rakrakan hanua bel la oroï lalani. <sup>11</sup> I hanot sur anuna taraila, ika anuna taraila ot bel la malmaling pasi. <sup>12</sup> Ika, la rop ning la maling pasi, pa la tortorot ana risana, i malmaling pas la, sur la na natnat e God. <sup>13</sup> Bel di atong la mang a natnat e God ana agon ana mangis a tarai, o ana nemnem ana ta barsan mite lapiu. E God ot e tamanla.

<sup>14</sup> A Warwara i hanot a barsan momol, pa i kes na arpotor ta mila. Mila ka oroï tar anuna matatar, a matatar ane Natnalik takai sot ka, ning i han kusun e Tamana, i bukus ana marmaris pa a momolna. <sup>15</sup> E Jon i warwara talapor onoi, pa i warwara ana tnan elngena mange, "I ot ne, ning a warwara nigo ono mang, 'Esining ir mur tak, i lelek kol hok, anasa i ot i laun nigo tak.'" <sup>16</sup> I bukus ana marmaris, pa ana nuna tnan marmaris, i sira angisngis dala taum ana galis a wakak a utna.

<sup>17</sup> Ta e Moses, e God i saran tar a warkurai tan dala, ika o e Iesu Karisito i saran tar a marmaris pa a momolna tetek dala. <sup>18</sup> Bel tik i oroï tar e God tuk onone. Ika



e Natnalik ka, takai sot ka, i kes taum o e Tamana, i asangan e God tetek dala. Pa i ot e God.

*E Jon a Tena Baptais i warwara onoi ot*

(Mt 3:1-12; Mk 1:1-8; Lk 3:1-18)

<sup>19</sup> A ningnigola ana tarai Juda la mitisa e Jerusalem, la sune sen a tena artabarla, pa dingla na tarai tagun a mangis a tarai Liwai,\* tetek e Jon sur lar dekeni mang, “U esi?” <sup>20</sup> E Jon bel i warwara alari, i warwara talapor ot onoi mang, “Bel sur iau e Karisito.” <sup>21</sup> La deken ulaki mang, “U esi? U e Elaija?” Pa i keles la mange, “Belal, iau bel e Elaija.” La deken ulaki mange, “U a propet ning di atongi mang ir hanot?” I keles la mang, “Belal.” <sup>22</sup> Lamur la atai i mange, “U esi? Ur atai mila sur milar atai la ning la sune mila ute. Asa ning ur atongi hom?” <sup>23</sup> E Jon i keles la mange, “Iau a barsan ning a propet Aisaia i warwara nigo ono mang, ‘A elngena mainla i arkabah ting na hanua bel mang: Mulor atostos a ngas anuna Leklek.’” Ais 40:3

<sup>24</sup> A Parisaiola ning di sune la tetek e Jon, <sup>25</sup> la dekeni mange, “U atongi mang, u bel e Karisito, pa bel otleng u e Elaija, pa bel u a propet, ning di atongi mang ir hanot. Ning i manglarning, sur asa u baptais a taraila?” <sup>26</sup> E Jon i keles la mange, “A baptais mulo ana malum, ika takai kane i tur na arpotor ta mulo ning bel mulo tasman lalani. <sup>27</sup> Esaning ir mur tak, i leklek tak. Pa bel a tolsot pasi sur ar paksen a inau ana anuna su. A natarna kol tana.”

<sup>28</sup> A ututnala ne, la hanot tumo e Betani ana ris a malum Jodan ning e Jon i baptais a taraila ano.

*E Iesu a Nat a Sipsip ning ir mat ana laulau a ginina taraila*

<sup>29</sup> Ning a pukakiar lamur, e Jon i oroi pas e Iesu i han amon teteki, pa i atongi mange, “Mulo oroi i, a Nat a Sipsip ane God, ning ir kepsen a laulau a ginina rakrakan hanua. <sup>30</sup> A barsan kane, ning a warwara nigo ono mange, ‘A barsan ning ir mur tak, i leklek kol hok, anasa i laun nigo tak.’ <sup>31</sup> Lanigo iau otleng bel a tasmani. Ika a baptais ana malum sur ar asangan a barsan ne tetek a tarai Israel.”

<sup>32-33</sup> Pa e Jon i warwara talapor mange, “Bel a tasmani esi e Karisito. Ika e God, ning i sune iau sur ar baptais ana malum, i atai iau mang, ‘Ur oroi a Talngan Tabu ir han purum pa ir kes ana ning a barsan. A barsan ning, ir baptais ana Talngan Tabu.’ Pa a oroi a Talngan Tabu i han purum misaot na langit, i arlar ana tabun pa i kes saot o e Iesu. <sup>34</sup> Ia ka oroi tar a utna ning i hanot, pa a warwara talapor onoi mang, i a Nat e God.”

*A ningnigo na kakak a asaerla ane Iesu*

<sup>35</sup> Ning a pukakiar lamur, e Jon taum ana naur a kaklik tagun a kakak a asaerla anunai, ditol kanning ia ulak. <sup>36</sup> Ning i oroi e Iesu i bolos ditol, i atongi ono mange, “Oroi, a Nat a Sipsip ane God.”

<sup>37</sup> Ning naur a kaklik a asaer dia longor a warwara ning, dia muri ot ma e Iesu. <sup>38</sup> Ning e Iesu i talingir, i oroi diau ning dia muri, pa i deken diau mange, “Asa ning mu mang suri?” Dia kelesi mange, “Rabi” (a kamkamna mang Tena Asaer), “u kes taha?” <sup>39</sup> E Iesu i keles diau mange, “Mur han ute sur mur oroi.” Pa dia muri, pa dia oroi a pukna ning e Iesu i kes ano. Ning ditol hanot, ka diat a mais a Kamis pas, pa ditol kes a rah kidol ning tingia.

\* 1:19: A taraila ana mangis Liwai la sira titol ana rumai a artabar.

40 Ning a halindiau ning dia longor a warwara ane Jon pa dia mur e Iesu, a risana e Endru, a tas e Saimon Pita. 41 A ningnigo na utna ning e Endru i toli, i seren pas e tasnalik e Saimon, pa i atai i mange, “Mila ka pastetek pas a Mesaia!” (a kamkamna mang e Karisito†).

42 E Endru i ben e Saimon tetek e Iesu. Ning e Iesu i oroi i, i atai i mange, “U e Saimon, a nat e Jon, † dir atong a risam mang e Kepas.” (Ana warwara Grik di atongi mang e Pita, a kamkamna a hat.)

*E Iesu i kabah pas e Pilip pa e Natanael*

43 Ning a pukakiar ulak, e Iesu i mang sur ir han utumo e Galili. I pastetek pas e Pilip, pa i atai i mange, “Ur mur iau.” 44 E Pilip i mitimo e Betsaida, a hanua ane Endru pa e Pita. 45 E Pilip i pastetek pas e Natanael, pa i atai i mange, “Mila ka pastetek pas a Karisito ning e Moses i warwara nigo tar ono ana Buk a warkurai, pa propetla otleng la ka warwara nigo tar ono ana nunla na tumtumus, i e Iesu a te Nasaret, a nat e Josep.” 46 Ika e Natanael i kelesi mange, “Nasaret! Mangmangasa, ta wakak a utna ot ir hanot mitingia?” E Pilip i kelesi mange, “Ur han ute pa dar han sur ur oroi.”

47 Ning e Iesu i oroi pas e Natanael i hanot teteki, i atongi ono mange, “A te Israel momol, bel i tasman a asasongo.” 48 E Natanael i deken e Iesu mange, “U tasman mangmangasa iau?” I kelesi mange, “Ning belot e Pilip i ben u ute, ia ka oroi nigon tar u, ning u kes ting nahai a rakai a fig.” 49 E Natanael i atai i mange, “Tena asasaer, u a Nat e God, u a King

anuna tarai Israel.” 50 E Iesu i atai i mange, “Mangmangasa, u tortorot hok, anasa a atai u mang u kes tar nahai a rakai a fig? Lamur ur oroi a tatatnan utna kol ir hanot, ir itna ana utna ne.” 51 Lamur e Iesu i atai i mange, “A atong momoli ta mulu, mulor oroi a langit ir sapang, pa a angelola ane God lar hanan kas pa lar hanan purum tetek a Nat a Barsan.”

## 2

*A ngasa ana tona tintaulai tumo e Kana*

1 Lamur tana naur a pukakiar di tol a ngasa ana tona tintaulai tumo e Kana, ana papar Galili. Tana e Iesu i han ot. 2 Di nunung e Iesu taum ana nuna kakak a asaerla sur lar han ana ngasa ana tona tintaulai. 3 Bel ma al wain, e tana e Iesu i atai e Iesu mange, “A wain ka rop.” 4 E Iesu i kelesi mange, “Nang, i mangasa sur u atai iau ono? A taem ning ar titol ono belot i sot.” 5 Tana e Iesu i atai a tarai a titol mange, “Mulor tol asaning ir atai mulu sur mulor toli.”

6 Diono na tatatnan koto na hat la tur tingia sur na gosgos kundi, i arlar ot ana titol ana lotu anuna tarai Juda ning la sira toli sur lar toh ana matana e God. Taktakai a koto ne, di sira abukusi ana naur a bonot o natol a bonot a galan na malum. 7 E Iesu i atai a tarai a titol mange, “Mulor tere bukus a kotola ana malum.” Pa la tere abukus la. 8 Lamur, e Iesu i atai la mange, “Mulor ituh pas al malum miting na kotola, pa mulor losi tetek esaning i ningnigo ana ngasa.” Pa la toli larning. 9 Pa a ningnigo ana ngasa i gang tumusnan a malum ning ka wain rop. Bel i tasmani mang a wain ne i han mitaha, a tarai a titol ka la tasmani. I kabah

† 1:41: A Karisito esaning di pek a wel ono. A tarai Israel la sira pek a wel o esaning la aslangi. Ana warwara Hibrui di atongi mang a Mesaia, pa ana warwara Grik di atongi mang a Karisito. E Iesu a Karisito, esaning e God i aslang pasi sur ir alaun a tarai. A propetla tagun nating la warwara na propet ono mang ir hanot, pa a tarai Juda la harnanai suri. † 1:42: E Jon e tamana e Pita, bel e Jon a Tena Baptais.

maskan pas a barsan ning i taulai ana pukakiar ning, <sup>10</sup> pa i atai i mange, “A taraila rop la sira tabar nigon a taraila ana wakak a wain. Ning la ka gang kol, io, la tabar kama a taraila ana wain ning bel i wakak kol. Ika u, u bot artabar ana wain ning i wakak kol.”

<sup>11</sup> Ine a ningnigo na akinalang ning e Iesu i toli. I toli tumo e Kana ana papar Galili. A akinalang ne i asangan ot anuna matatar, pa anuna kakak a asaer la tortorot ono.

<sup>12</sup> Lamur ana ngasa, i han utumo e Kapernaum taum o e tana pa na tastasnala pa anuna kakak a asaerla. La kes pas dingla na pukakiar ot tingia.

*E Iesu i kepsen a tena sisiuraila kusun a rumai a artabar*

(Mt 21:12-13; Mk 11:15-17; Lk 19:45-46)

<sup>13</sup> Ning a lotu na Han Lakai anuna tarai Juda i milau, e Iesu i han usaot e Jerusalem. <sup>14</sup> Ning i kas uting ana ning a pukna ting na rumai a artabar, i oroi a tarai la siuran a bulumakaula, a sipsipla, pa tabunla, pa i oroi otleng a tena keles manila, la kes ana nunla na logola. <sup>15</sup> I iris pas a inaula sur a inau na harum, pa i kepsen purum la rop ono. I kepsen purum a bulumakaula pa sipsipla, pa i minggen sarara a mani anuna tena keles manila, pa i minggen lingir anunla na logola. <sup>16</sup> Pa i atai la ning la siuran a tabun la mange, “Mulor los purum la mite! Pa gong mulo keles pas a rumai ane Tata sur a rumai a sisiurai!” <sup>17</sup> Anuna kakak a asaer la nuk pas a warwara ting na Buk Tabu mange, “A tnan nuknukik sur anuma rumai i arlar ana iah ning i ien iau.” *Buk Song 69:9*

<sup>18</sup> A tarai Juda la hanot ulak tetek e Iesu pa la dekeni mange, “Esi na akinalang ur asangan mila ono, sur milar tasmani mang e

God i sune u sur ur tol a ututnala ne?” <sup>19</sup> E Iesu i keles la mange, “Mulor regen sen a rumai ne ane God pa ar atur ulak pasi ana natol a pukakiar ka.” <sup>20</sup> La keles e Iesu mange, “Di tol tar a rumai ne ana diat a bonot pa pisir diono na rau, pa u, ur tol ulak pasi ana natol a pukakiar ka?”

<sup>21</sup> Ning e Iesu i warwara ana rumai ane God, i warwara larlar ot ana palaona. <sup>22</sup> Lamur ning e Iesu ka laun ulak kusun a minat, anuna kakak a asaerla la nuk pas a warwara ne. Pa la bot tortorot ana Buk Tabu, pa ana warwara ning e Iesu ka atong tari.

<sup>23</sup> Ning e Iesu i kes saot e Jerusalem ana lotu na Han Lakai, a galis a tarai la oroi a akinalangla ning i toli, pa la tortorot ana risana. <sup>24</sup> Ika e Iesu bel i tortorot ana tik, anasa i tasman a taraila rop. <sup>25</sup> Bel i kapan sur tik ir atai i ana toltol anuna taraila, anasa i ot i tasman asaning kaning na balanla.

### 3

*E Iesu diau ma e Nikadimos*

<sup>1</sup> Ning a barsan tagun a Parisaiola, a risana e Nikadimos, a ningnigo anuna tarai Juda. <sup>2</sup> I han tetek e Iesu ana ning a morom pa i atai i mange, “Tena asasaer, mila tasman u mang u a tena asaer ning e God i sune u. Bel ta barsan ir tolsot pas a akinalangla ning u sira toli, ning e God bel ir kes taum onoi.” <sup>3</sup> E Iesu i kelesi mange, “A atong momoli tam, ning tik bel di agon tona pasi, bel ir tol sot sur ir oroi a matanitu ane God.” <sup>4</sup> E Nikadimos i dekeni mange, “Dir agon tona mangmangasa pas tik ning ka bun? Mangmangasa, ir kas ulak ana balana e tana sur ir agon ulaki?”

<sup>5</sup> E Iesu i kelesi mange, “A atong momoli tam, esining bel di agon tona pasi ana malum pa ana Talingan Tabu, bel ir tol sot sur ir

kas ting na matanitu ane God. <sup>6</sup> Esining di agoni ana palaona, ir laun ana palaona ka, pa esining di agoni ana Talngan Tabu, ir laun ana inguna. <sup>7</sup> Gong u kulkulan ning a atai u mang dir agon tona pas mulo. <sup>8</sup> A wuwu i han taltal ana nuna nemnem, u longor a malwasna, ika bel u tasmani mang i han mitaha, pa ir han utaha. Mang otleng larning tetek la rop ning a Talngan Tabu i agon tona la.”

<sup>9</sup> E Nikadimos i dekeni mange, “A utna ne, dir tol mangmangasa i?” <sup>10</sup> E Iesu i kelesi mange, “U a tena asaer anuna tarai Israel. Mangmangasa ning bel u tasman a ututnala ne? <sup>11</sup> A atong momoli tam, mila warwara ana sa ning mila tasmani, pa mila warwara talapor ana sa ning mila ka oroi tari, ika bel mulo tortorot ana numila na warwara talapor. <sup>12</sup> A atai mulo ana ututnala mite lapiu pa bel mulo tortorot onoi. Mulor tortorot mangmangasa ning ar atai mulo ana ututnala misaot ana langit? <sup>13</sup> Bel tik i han pas usaot ana langit, a Nat a Barsan sot ka ning i han purum misaot na langit. <sup>14</sup> Nating e Moses i akulam a soi ana rakai ting na hanua bel. Mang otleng larning dir akulam a Nat a Barsan usaot, <sup>15</sup> sur la rop ning la tortorot onoi lar laun tikin.

<sup>16</sup> “E God i maris a rakrakan hanua, pa i saran tar e Natnalik takai sot ka, sur esining ir tortorot onoi, ir laun tikin, pa bel ir hirua. <sup>17</sup> E God bel i sune e Natnalik ute ana rakrakan hanua sur ir warkurai a ginina taraila sur lar mat. I sune i sur ir alaun la. <sup>18</sup> Esining i tortorot onoi, bel dir warkurai i sur ir mat. Ika, esining bel i tortorot, di ka warkurai tari sur ir mat, anasa bel i tortorot o e Nat e God takai sot ka. <sup>19</sup> Ine a kamkama warkurai ning e God i sarani: A talapor ka hanot ana rakrakan hanua, ika a tarai la

mang ka sur a mormorom pa a talapor bel, anasa anunla toltol i laulau kol. <sup>20</sup> La rop ning la sira tol a toltol laulaula, la nget ka a talapor, pa bel la han tetek a talapor, sakana dir oroi puasa pas anunla na toltol laulaula. <sup>21</sup> Ika, esining i sira mur a momolna, i hanot ana talapor, sur dir oroi puasa i mang anuna titolla i kamkamna ot ta e God.”

*E Jon a Tena Baptais i warwara talapor o e Iesu*

<sup>22</sup> Lamur, e Iesu taum ana anuna kakak a asaer la han misaot e Jerusalem sur ning a natar a hanua kaning ot ana papar Judia, pa la kes pas tingia, pa i baptais a taraila. <sup>23</sup> Pa e Jon otleng i baptais tumo e Aionon milau e Salim, anasa a galis a malumla tingia. A tarai la hanot amon teteki sur ir baptais la. <sup>24</sup> A titol ne i hanot ning belot di akas e Jon ana rumai a dodot.

<sup>25</sup> Dingla na kakak a asaerla ane Jon la arlak na warwara taum ana ning a te Juda ona munmun ning a tarai juda la sira toli sur lar toh ana matana e God. <sup>26</sup> La han tetek e Jon pa la atai i mange, “Tena Asaer, a barsan ning mu kes taum pas tumo na ris a malum Jordan, pa u warwara talapor tar ono, kanumo ma i baptais, pa a taraila rop la han teteki.”

<sup>27</sup> E Jon i atai la mange, “Ning e God saot na langit bel i saran tar ta utna tetek tik, bel ir kibasi. <sup>28</sup> Mulo ot mulo ka longor tari ning a atongi manglarne, ‘Iau bel e Karisito. E God i sune iau sur ar nigo tana, pa i ir mur.’ <sup>29</sup> A barsan ning i taulai ta hane, anunai ot a hane ning. A halin a barsan ning, ir harnanai pa ir longlongor suri. Ning ir longor a elngena barsan ning i taulai, ir gas kol. Onone anuka gasgas i arlar ana gasgas anuna halin a barsan ning i taulai, pa anuka gasgas i bot sot. <sup>30</sup> I ot

ir leklek amon pa iau ar natarna amon.

*Esining i han misaot na langit*

<sup>31</sup> “Esining i han misaot na langit, i leklek kol tana taraila rop. A barsan ning mite lapiu, mitet lapiu, pa i warwara ka ana ututnala mite lapiu. Esining i han misaot na langit, i leklek kol tana taraila rop. <sup>32</sup> Pa i warwara talapor ana sa ning i oroi i pa i longori, ika bel tik i tortorot ana nuna warwara talapor. <sup>33</sup> Ika esining i tortorot ana nuna warwara talapor, i amomoli mang e God a momolna. <sup>34</sup> Esaning e God i sune i, i warwara ana warwara ane God, anasa e God i saran arop tar a Talngan Tabu teteki. <sup>35</sup> E Tamana i mang kol sur e Natnalik, pa i saran arop tar a ututnala uting nakuna. <sup>36</sup> Esining i tortorot ona Nat e God i kibas a lalaun tikin. Ika esining i pilak sen e Natnalik, bel ir kibas a lalaun, anasa a balanakut ane God ka kes tar onoi.”

## 4

*E Iesu i warwara taum ana hane Samaria*

<sup>1</sup> A Parisaiola la longori mang a galis a tarai a asasaer la mur e Iesu, pa i baptais la. La galis tana tarai a asasaer ane Jon. <sup>2</sup> Ika e Iesu ot bel i baptais tik, anuna kakak a asaer ka, la baptais. <sup>3</sup> Ning e Iesu ka tasmani mang a Parisaiola la ka longori, i kamtur misaot na papar Judia pa i ulak utumo ana papar Galili. <sup>4</sup> Ana nuna tinan i mur a ngas ning i han potora a papar Samaria.

<sup>5</sup> Tumo e Samaria, i hanot ana hanua Sikar, milau a puka kabalapiu, nating ot e Jekop i tabar tar e natnalik e Josep onoi. <sup>6</sup> A tius ning e Jekop i kel tari kaning ia. A palaona e Iesu i ngol ana tinan barbara, pa i kes ting napir a tius ning, ana mais a kamis tostos.

<sup>7</sup> Ning a hane Samaria i hanot sur ir ituh, pa Iesu i atai i mange, “Ur tabar iau anal malum.”

<sup>8</sup> Anuna kakak a asaer, la ka han uting na hanua, sur lar lou utna na hangan. <sup>9</sup> A hane Samaria i keles e Iesu mange, “U a te Juda, pa iau a hane Samaria. Sur asa ning u nunung iau sur al malum?” Anasa a Judala bel la bal taum ana Samariala. <sup>10</sup> Ika e Iesu i kelesi mange, “Ning u tasman a artabar ane God, pa u tasman otleng esaning i nunung u sur al malum, ur nunungi, pa ir tabar u ana malum a lalaun.” <sup>11</sup> A hane i atai i mange, “Leklek, bel ta itituh anumi, sur ur ituh al malum ono, pa a tius otleng i kes purumkol. Mitaha a malum a lalaun ning? <sup>12</sup> U nuki mang u leklek ta e tubundala e Jekop ning i tabar mila ana tius ne? I, taum ana natnatnala pa anuna na inagoila otleng, la rop la gang onoi.”

<sup>13</sup> E Iesu i kelesi mange, “La rop ning la gang a malum ne, lar mos ulak ka. <sup>14</sup> Ika esining ir gang a malum ning ar tabari ono, bel ir mos ulak. A malum ning ar tabari ono, i arlar ana matatana malum ana nuna lalaun, ning ir burburak ot, pa ir tabari ana lalaun tikin.” <sup>15</sup> A hane i atai i mange, “Leklek, tabar iau ana malum ning, sur gong ma a mos ulak, pa gong ma a han ute sur ar ituh.”

<sup>16</sup> E Iesu i atai i mange, “Ur han, ben pas anuma barsan pa mur ulak ute.” <sup>17</sup> A hane i kelesi mange, “Bel anak ta barsan.” E Iesu i atai i mange, “I tostos ot ning u atongi mang, bel anum ta barsan. <sup>18</sup> U ka taulai tar dilima na barsan, pa i ning u kes taum ono onone, bel anuma barsan. A momolna ot ning u atongi tak.” <sup>19</sup> A hane i kelesi mange, “Leklek, a tasmani mang u a propet. <sup>20</sup> A tumtubumila nating la lotu tetek e God ana mangir ne, ika mulo a

tarai Juda mulo atongi mang dir lotu tetek e God saot e Jerusalem.”

<sup>21</sup> E Iesu i kelesi mange, “Oroi, a momolna ne a atongi tam, a taem ir hanot, ning bel ma mulor lotu tetek e Tata ana mangir ne, pa saot otleng e Jerusalem. <sup>22</sup> Mulo a Samariala bel mulo tasman esining mulo lotu teteki. Ika mila a tarai Juda, mila tasman ot esining mila lotu teteki, anasa mila tasman a ngas ning e God i alaun a taraila ono. <sup>23</sup> A taem ir hanot pa ka hanot, ning a tena lotu momol lar lotu tetek e Tata ana ingunla pa ana momolna. A ngas a tena lotula manglarning e Tata i mang kol sur la. <sup>24</sup> E God a spirit, pa la ning lar lotu teteki, lar lotu ot ana ingunla pa ana momolna.”

<sup>25</sup> A hane i atai i mange, “A tasmani mang a Mesaia ning di atongi mang e Karisito, ir hanot, pa ir papak ana ututnala rop tetek dala.” <sup>26</sup> E Iesu i kelesi mange, “Tau ne, a warwara tam.”

<sup>27</sup> Ano otning, anuna na kakak a asaer la ulak, la kulkulan kol ning la oroi e Iesu i warwara taum ana hane. Ika, bel tik onla i dekeni mange, “U mang sur asa?” pa, “Asa kamkamna ning u warwara taum ono?” <sup>28</sup> A hane ning i han kusun anuna koto, pa i ulak sur a hanua pa i atai a taraila mange, <sup>29</sup> “Mulo lamut, mulor oroi ning a barsan i atai iau ana ututnala rop ning ia ka tol tari nating. Ngandek a Mesaia ma?” <sup>30</sup> Pa a taraila ning la han kusun a hanua tetek e Iesu.

<sup>31</sup> Ning a hane ka han, a kakak a asaer la nunung kol teteki mange, “Tena asasaer, ur hangan pas.” <sup>32</sup> Ika e Iesu i keles la mange, “Aka utna na hangan kanet, ning bel mulo tasmani.” <sup>33</sup> A kakak a asaer la deken artalai la mange, “Ngandek tik ka tabar tari anal utna na hangan?” <sup>34</sup> E Iesu i atai la mange, “Aka utna na hangan ine, ar mur a nemnem ane si ning i sune iau ute,

pa ar tol arop anuna titol. <sup>35</sup> Mulo sira atongi mange, ‘Dihat a kalang kaning ot sur dir sol.’ Ika a atai mulo mange: Mulor tai usalanigo, pa mulor oroi a barimla, la ka makos rop, pa ka sang sur dir sol. <sup>36</sup> A tena sol ning i sol a utna na hangan, i los arlou ono. Pa utna ning i sol pasi, i a tarai ning la kibas a lalaun tikin. Pa a tena omomai pa a tena sol, diar gas taum. <sup>37</sup> I momol ot, a warwara ning a tarai la sira atongi mange, ‘Ning i omomai, pa ning i sol.’ <sup>38</sup> Pa a sune mulo sur mulor sol ana barim ning mulo ot bel mulo oman tari. Dingla na tarai masik ot la tol tari, pa mulo ka los pas a arlou ana nunla na titol.”

#### *A Samariala la tortorot*

<sup>39</sup> A galis a Samaria ana hanua ning, la tortorot o e Iesu, anasa a hane ning i warwara talapor mange, “I atai iau ana ututnala rop ning a tol tari nating.”

<sup>40</sup> A tarai Samaria la han tetek e Iesu pa la nunung ngongosi sur ir kes taum onla, pa i kes pas naur a pukakiar tingia. <sup>41</sup> Pa galis ulak la tortorot, anasa ana nuna warwarala. <sup>42</sup> La atai a hane mange, “Onone mila ka tortorot, bel ana warwara ning u atongi o e Iesu. Mila ot mila ka longori, pa mila ka tasman momoli mang i a Tena Alaun sur a rakrakan hanua.”

#### *E Iesu i alangolango pas a nat a ningnigo*

<sup>43</sup> Lamur tana naur a pukakiar, e Iesu i han utumo e Galili. <sup>44</sup> E Iesu ot ka atong tari mange, “A taraila bel la hanrawai a propet ting na hanua ngasna.” <sup>45</sup> A taraila mitimo e Galili la ka han pas ana lotu na Han Lakai saot e Jerusalem, pa la ka oroi tar a ututnala ning e Iesu i toli ana lotu. Pa ning e Iesu i hanot tumo e Galili, a tarai la gas pasi.

<sup>46</sup> E Iesu i ulak utumo e Kana ana papar Galili, a hanua ning i

keles tar a malum sur ir wain. Ning a ningnigo anuna matanitu, e natna barsan i sasam tumo e Kapernaum. <sup>47</sup> Ning i longori mang e Iesu i han misaot na papar Judia utumo e Galili, i han teteki pa i nunungi sur ir han utumo e Kapernaum sur ir alangolango e natna barsan ning milau ir mat. <sup>48</sup> E Iesu i atai i mange, “Ning bel mulo oroi al ututna na kulkulan pa al akinalang, bel mulor tortorot.” <sup>49</sup> A ningnigo anuna matanitu i atai i mange, “Leklek, dar han kapit sakana natuklik ir mat!” <sup>50</sup> E Iesu i kelesi mange, “Ur han ka, e natumlik ir laun.” A barsan ning i tortorot ana warwara ane Iesu, pa i ulak.

<sup>51</sup> Ning belot i hanot, anuna tena titol orosla la han barati pa la atai i mang, e natumlik ka laun. <sup>52</sup> I deken la mange, “Esi na taem momol ning a natuklik i laun ulak ono?” La kelesi mange, “Nabong, ana takai a mais a Kamis, a laplapang i rop kusuni.” <sup>53</sup> Tamana kaklik i nuk ulak pas a taem ning e Iesu i atai i mange, “E natumlik ir laun.” Pa i oroi lalani mang a taem ot ning e Iesu i atai ono, a laplapang i rop kusun e natnalik. Pa latamana rop la tortorot o e Iesu. <sup>54</sup> A utna ne, a munaur a akinalang, e Iesu i toli tumo e Galili, ning i han misaot e Judia.

## 5

*E Iesu i alangolango pas ning a barsan ting na tnan kabapolo Betesda*

<sup>1</sup> Lamur, e Iesu i han usaot e Jerusalem sur a tnan lotu anuna tarai Juda. <sup>2</sup> Ning a tnan kabapolo, di atongi ana warwara Hibru mang e Betesda, kanisaot e Jerusalem, milau a tnan taman

ning di atongi mang “Taman ngas a sipsip”. Pa dilima na parada la tur talilis a kabapolo ning. <sup>3-4</sup> A galis a tarai ning la kurah ana urmatana tinsaman, la sira borbor tingia, a matanakutla, la ning bel la han, pa la ning a palaonla i mat.\*

<sup>5</sup> Pa ning a barsan i kes tingia ka kurah pas natol a bonot pa pisir siwal a rau. <sup>6</sup> E Iesu i oroi i ning i borbor tar tingia. Pa ning i talapor teteki mang a barsan ning ka bongnani ana tinsaman, i dekeni mange, “Mangmangasa, u mang sur ur langolango?” <sup>7</sup> A barsan ning i kelesi mange, “Leklek, bel tik ir nangan iau sur ir los tar iau ning a kabapolo i tonton. Ning a mang ar han sur ar munmun, tik masuk ka ir dun nigo alar pas iau.” <sup>8</sup> E Iesu i atai i mange, “Ur kamtur, ur kibas a logo ngasim, pa ur han.” <sup>9</sup> Ano otning a barsan ning i langolango, i kamtur, i kibas a logo ngasna, pa i han.

A utna ning i hanot ana Pukakiar Sabat. <sup>10</sup> Dingla na Judala la atai a barsan ning e Iesu i alangolango pasi mange, “A Sabat ne! A warkurai i mang, gong di los a mat ono.” <sup>11</sup> Pa i keles la mange, “A barsan ning i alangolango pas iau, i atai iau mang, ar los pas anuka mat par han.” <sup>12</sup> La dekeni mange, “Esi na barsan ning i atai u mang ur los pas anuma mat pa ur han?” <sup>13</sup> Ika a barsan ning bel i tasman esining i alangolango pasi, anasa e Iesu i han potora a kunum a taraila ning.

<sup>14</sup> Lamur ot, e Iesu i pastetek pas a barsan ning ting na rumai a artabar. I atai i mange, “Oroi, u ka langolango ne. Gong ulak u tol a laulauna, sakana ta laulauna a utna kol ir kibas u lamur.” <sup>15</sup> A

\* **5:3-4:** Dingla na tena tastamai ana Buk Tabu la nuki mang dingla na warwarala otleng i kes ana laen ne. I manglarni: *La harnanai sur a kabapolo ning ir tonton. Dingla na pukakiar a angelo anuna Leklek ir han purum utingia na kabapolo, pa ir atontoni. Tik ka ning ir munmun nigo ana kabapolo ning i tonton, ir langolango kusun anuna tinsaman.*

barsan ning i han pa i atai a Judala mange, “E Iesu ot i alangolango pas iau.”<sup>16</sup> Ono otning, a tarai Juda la turpas a tol a gininla tetek e Iesu, anasa i tol a ututnala ne ana Pukakiar Sabat.<sup>17</sup> E Iesu i atai la mange, “E Tata bel i manah ana titol, manglarning iau otleng bel ar manah.”<sup>18</sup> Ine a kamkamna ning a Judala la mang kol sur lar umkol e Iesu. La balakut ana i, bel ning i titol ana Pukakiar Sabat ka, i kamkamna otleng ning i ot i atong e God mang e Tamana, pa ana warwara ne i suah taum diau ma e God.

*E Tamana i saran a warkurai tetek e Natnalik sur ir warkurai ono*

<sup>19</sup> E Iesu i keles la mange, “A atong momoli ta mulo, a Nat e God bel ir tol ta utna ana nuna nemnem ot, i tol ka asaning i oroi e Tamana i toli. Anasa asaning e Tamana i toli, e Natnalik otleng ir toli.<sup>20</sup> E Tamana i mang kol sur e Natnalik, pa i asangani ana ututnala rop ning i sira toli. Pa ir asangani otleng ana tatatnan utna tan dingla ne, pa mulor kulkulan onoi.<sup>21</sup> E Tamana i akamtur a minatla pa i tabar la ana lalaun, mang otleng larning tetek e Natnalik, ir tabar la ning i mang sur ir tabar la ana lalaun.<sup>22</sup> E Tamana bel ir warkurai tik. Ika ka saran tar a warkuraila rop ta e Natnalik, sur ir warkurai ono,<sup>23</sup> sur a taraila rop lar hanrawai e Natnalik larning la hanrawai e Tamana. Esining bel i hanrawai e Natnalik, bel i hanrawai e Tamana otleng, ning i sune i ute.

<sup>24</sup> “A atong momoli ta mulo, esining i longor anuk na warwarala pa i tortorot o esaning i sune iau ute, i ka kibas a lalaun tikin, pa bel ir hirua ana warkurai. I ka han kusun a minat sur a lalaun tikin.<sup>25</sup> A atong momoli ta mulo, a taem ir hanot, pa ka hanot, ning a minatla lar longor a Nat e God, pa la ning la longori lar laun.<sup>26</sup> E

God a kama lalaun pa i sarani otleng tetek e Natnalik, sur i otleng a kama lalaun.<sup>27</sup> E God i saran tar a warkurai tana sur ir warkurai a taraila ono, anasa i a Nat a Barsan.<sup>28</sup> Gong mulo kulkulan ana warwara ne, anasa a taem ir hanot, pa la rop ning la borbor ana kulam a minatla lar longor a elngena.<sup>29</sup> Lar kamtur kusun a tung a minatla. La ning la ka tol tar a wakak a toltol lar tur kusun a minat sur a lalaun tikin. Pa la otleng ning la ka tol tar a toltol laulau, lar tur kusun a minat sur a hinirua tikin.”

*A warwara talapor o e Iesu*

<sup>30</sup> E Iesu i warwara ot tetek a Judala mange, “Bel ar tol ta utna ana nuk a nemnem ot, a warkurai a taraila ana utna ning a longori ta e Tata. Pa anuka warkurai i tostos, anasa bel a mur a nuknukik, a mur ot a nuknukna esaning i sune iau ute.<sup>31</sup> Ning ar warwara talapor ulak ot hok, anuka warwara bel ir mamahat.<sup>32</sup> Tik masik ot i warwara talapor hok, pa a tasmani mang anuna warwara talapor hok i momol kol.

<sup>33</sup> “Mulo sune dingla na tarai tetek e Jon a Tena Baptais, pa i warwara talapor hok, pa anuna warwara talapor i momol.<sup>34</sup> Bel a kapan sur tik ning ir warwara talapor hok, ika a atongi manglarne sur dir alaun mulo.<sup>35</sup> E Jon i arlar ana lam, ning i irnga pa i talapor, pa mulo gas ning mulo tai siklik pas ka ana talaporna.

<sup>36</sup> “Ika ar atongi tetek mulo ana warwara talapor hok ning i itna tana warwara talapor ane Jon. A titolla ning a sira toli, la warwara talapor hok. Anasa a titolla ning e Tata i sarani tak sur ar tol asoti, i asangani mang i sune iau ute.<sup>37</sup> Pa e Tata, ning i sune iau ute, i ot ka warwara talapor tar hok. Bel mulo longor a elngena, pa bel mulo oroi tar a matana otleng.<sup>38</sup> Pa bel mulo nuk akes anuna na warwarala ana



balamulo, anasa bel mulo tortorot o esaning i sune i ute. <sup>39</sup> Mulo sira was wakak a Buk Tabu, anasa mulo nuki mang mulor kibas a lalaun tikin ono. Ika a Buk Tabu otleng i warwara talapor ka hok! <sup>40</sup> Ika bel mulo mang sur mulor han tetek iau, sur mulor kibas a lalaun.

<sup>41</sup> “Bel a mang sur a tarai lar atong aleklek iau. <sup>42</sup> Anasa a tasman mulo ot, mang bel mulo mang sur e God ana balamulo. <sup>43</sup> A hanot ana risana e Tata, pa bel mulo gas pas iau. Ika ning tik masuk ir hanot ana risana ot, io, mulor gas pasi. <sup>44</sup> Mulo mang kol sur a tarai lar atong aleklek pas mulo, pa bel mulo rakrakai sur e God ir atong aleklek mulo, e God i ning takai sot ka. Ning i manglarning, bel mulo tortorot hok. <sup>45</sup> Gong mulo nuki mang iau, ar arup mulo tetek e Tata. E Moses ning mulo tortorot mang ir nangan mulo, i ot ning ir arup mulo. <sup>46</sup> Ning mulo tortorot o e Moses, io mulor tortorot otleng hok, anasa ka tumtumus nigo tar hok. <sup>47</sup> Ika ning bel mulo tortorot ana tumtumusla ane Moses, mulor tortorot mangmangasa ana nuk a warwarala?”

## 6

*E Iesu i tabar dilima na rip a tarai*

(Mt 14:13-21; Mk 6:30-44; Lk 9:10-17)

<sup>1</sup> Lamur e Iesu i han lakai a puka tasi Galili, ning di atongi otleng mang a puka tasi Tiberias. <sup>2</sup> A tnan kunum a tarai la muri, anasa la ka oroi tar a akinalangla e Iesu i toli, ning i alangolango la ning la kurah. <sup>3</sup> E Iesu i han kas usaot ana mangir, pa i kes taum ana nuna kakak a asaerla. <sup>4</sup> A lotu na Han Lakai anuna tarai Juda ka milau.

<sup>5</sup> Ning e Iesu i tai tar, i oroi pas a tnan kunum a tarai la han teteki. I atai e Pilip mange, “Dalar lou al utna na hangan taha, sur dalar

tabar a taraila ne ono?” <sup>6</sup> E Iesu i atongi larne sur ir toho e Pilip. I ot ka tasman asaning ir toli. <sup>7</sup> E Pilip i kelesi mange, “A arlou tagun a siwal a kalang ning dir lou pas a utna na hangan ono, bel ir arlar onla.” <sup>8</sup> Ning a hala nuna kakak a asaerla, a risana e Endru, a tas e Saimon Pita, i atai e Iesu mange, <sup>9</sup> “Ning a kaklik barsan kane i los dilima na bret ning di toli ana bali, pa naur a natar a sis. Ika ir arlar mangmangasa ona taraila ne?”

<sup>10</sup> A ulai rop ka ting na pukna ning, pa e Iesu i sune anuna kakak a asaerla sur lar akes a taraila tingia. Pa la kes. A wawas ana tarai ka i arlar ana dilima na rip, ika a gurarala pa kakakla otleng la hangan taum onla. <sup>11</sup> E Iesu i kibas pas dilima na bret, i atong wakak pas tetek e God onoi. Pa i asalari tana taraila ning la kes tingia, arlar larning la mang suri. Pa i asalar otleng a sis tanla. <sup>12</sup> Ning la ka masur rop, i atai anuna kakak a asaerla mange, “Mulor suah taum wakak a mah a utna na hanganla, sur gong di alaulau a utna na hangan.” <sup>13</sup> Pa la suah taum a mah a utna na hangan tagun dilima na bret ning, pa la song bukus pas ning a bonot pa pisir naur a rat. <sup>14</sup> Ning a tarai la oroi a akinalang ne i toli, la atongi mange, “I momol ot, a barsan ne, i a Propet ning di atongi mang ir hanot ute na rakrakan hanua.” <sup>15</sup> Ning e Iesu i tasmani mang la mang sur lar han teteki sur lar angongosi sur ir king, io, i han masuk kusun la usaot ana ning a mangir.

*E Iesu i han saot ana puka tasi*  
(Mt 14:22-33; Mk 6:45-52)

<sup>16</sup> Ning ka rahmorom, a kakak a asaerla ane Iesu la han utumo na puka tasi. <sup>17</sup> La kas ana mon, pa la turpas a lakai a puka tasi sur e Kapernaum. Ka morom, pa e Iesu belot i hanot tetek la. <sup>18</sup> A tnan wuwu i ragati pa a tatatnan top i

kamtur. <sup>19</sup> Ning la ka ulusu bakbak, arlar ana dilima na kilomita, la oroi pas e Iesu i han saot na palai a puka tasi tetek la. Pa la matmataut kol. <sup>20</sup> Ika e Iesu i atai la mange, “Gong mulo matmataut, iau ka ne.” <sup>21</sup> La gasgas pasi pa la akasi ana mon. Pa la sot kakat ana pukna ning la han suri.

*A tarai la tai sur e Iesu*

<sup>22</sup> Ana ning a pukakiar lamur, a kunum a taraila ning la kes tumo na ris a puka tasi, la tasmani mang ning a mon ka i kes tingia. Pa la tasmani mang a kakak a asaerla ka la han, e Iesu bel i kas taum onla. <sup>23</sup> Lamur dingla na mon mitimo e Tiberias la sot milau ana pukna ning a Leklek i atong wakak ana bret pa a kunum a tarai la hangan ano. <sup>24</sup> Ning a kunum a tarai la oroi mang e Iesu taum ana nuna kakak a asaerla bel la kes tingia, la kas ana monla, pa la han utumo e Kapernaum sur lar tai sur e Iesu.

*E Iesu a bret a lalaun*

<sup>25</sup> Pa ning a tarai la pastetek pas e Iesu tumo na ris a puka tasi, la dekeni mange, “Tena Asaer, nangse u han tar ute?” <sup>26</sup> E Iesu i keles la mange, “A atong momoli ta mulo, bel mulo tai sur iau anasa mulo oroi a akinalangla ning a toli, belal. Mulo tai ka sur iau anasa mulo ien a bret pa mulo masur ono. <sup>27</sup> Gong mulo rakrakai ka sur a utna na hangan ning i sira marase. Mulor rakrakai sur a utna ning ir kes sur a lalaun tikin, ning a Nat a Barsan ir tabar mulo ono. Anasa e God e Tata ka saran tar a rakrakai tak sur ar toli larne.” <sup>28</sup> La dekeni mange, “Asa ning milar toli sur milar tol a titolla ning e God i mang suri?” <sup>29</sup> E Iesu i keles la mange, “A titolla ne, ning e God i mang suri, mulor tortorot o esaning i sune i ute.” <sup>30</sup> Pa la dekeni mange, “Ur tol esi na akinalang sur milar oroi pa milar tortorot hom onoi? Asa ning

ur toli? <sup>31</sup> A tumtubumila la ien a mana ana hanua bel, larotning di ka tumus tari ting na Buk Tabu mange, ‘I tabar la ana bret misaot na langit pa la ieni.’” *Buk Song 78:24*

<sup>32</sup> E Iesu i atai la mange, “A atong momoli ta mulo, bel e Moses ning i tabar la ana bret misaot na langit, e Tata i tabar la. Pa ine i tabar mulo ana bret momol misaot na langit. <sup>33</sup> Esaning i han purum misaot na langit, i ot a bret ane God, ning i saran a lalaun tetek a taraila rop te na rakrakan hanua.”

<sup>34</sup> La atai i mange, “Leklek, ur tabar mila ana bret ning, ana pukakiarla rop.” <sup>35</sup> E Iesu i atai la mange, “Iau a bret na lalaun. Esila ning lar han tetek iau, bel lar murak, pa esila ning lar tortorot hok, bel lar mos ulak. <sup>36</sup> Ia ka atai tar mulo mang mulo ka oroi tar iau, ika bel mulo tortorot. <sup>37</sup> La rop ning e Tata i saran tar la tak, lar han tetek iau, pa esining ir han tetek iau, bel ar kepseni, belal. <sup>38</sup> Anasa a han purum misaot na langit, bel sur ar mur a nuknukik, ika sur ar mur ot a nuknukna esaning i sune iau ute. <sup>39</sup> A nuknukna esaning i sune iau ute ine, gong tik ta halinla ning i saran tar la tak ir hirua. Ar akamtur ulak la rop kusun a minat ana ararop a pukakiar. <sup>40</sup> A nuknuk ane Tata i mange, la rop ning la tai tetek e Natnalik pa la tortorot onoi, lar laun tikin, pa iau ar akamtur la kusun a minat ana ararop a pukakiar.”

<sup>41</sup> Dingla na Juda la ururai o e Iesu, anasa i atongi mange, “Iau a bret ning i han purum misaot na langit.” <sup>42</sup> Pa la atongi mange, “E Iesu a nat e Josep ka. Dala tasman ot e tamana pa e tana. Pa sur asa ning i atongi mang i han purum misaot na langit?” <sup>43</sup> E Iesu i keles la mange, “Gong mulo abereng wara. <sup>44</sup> Bel tik ir han lar pasi tetek iau. Ika e Tata ot ning

i sune iau, ir ben tari tetek iau, pa ar akamturi kusun a minat ana ararop a pukakiar. <sup>45</sup> A propetla la ka tumus tari mange, 'E God ir asaer la rop.' *Ais 54:13*

Pa la rop ning la longor e Tata pa la asaer tana, lar han tetek iau. <sup>46</sup> Bel tik i oroi e Tata. Esan kaning i han pas tagun e God, i oroi tar e Tamana. <sup>47</sup> A atong momoli ta mulo, esining i tortorot hok, ka kibas a lalaun tikin.

<sup>48</sup> "Iau a bret a lalaun. <sup>49</sup> Nating a tumtubumulo la ien a mana ting na hanua bel, ika la ka mat. <sup>50</sup> Ika a bret ne i han misaot na langit, ning tik ir ieni, bel ir mat. <sup>51</sup> Iau a bret a lalauna, ning i han purum misaot na langit. Tik ning ir hangan tagun a bret ne, ir laun tikin. A bret ning ar artabar ono, a palaok. A sarani sur a taraila ana rakrakan hanua lar kibas lalaun onoi."

<sup>52</sup> Dingla na Juda, la arlak artalaila, pa la atongi mange, "A barsan ne ir tabar mangmangasa dala ana palaona sur dalar ieni?"

<sup>53</sup> Pa e Iesu i atai la mange, "A atong momoli ta mulo, ning bel mulor ien a palaona Nat a Barsan pa bel mulor gang a sulukna, belal lalaun momol ir kes o mulo. <sup>54</sup> Esining ir ien a palaok pa ir gang a sulukik, ka kibas a lalaun tikin, pa iau ar akamturi kusun a minat ana ararop a pukakiar. <sup>55</sup> Anasa a palaok a utna na hangan momol, pa a sulukik a malum a gang momol. <sup>56</sup> Esining ir ien a palaok pa ir gang a sulukik, ir laun hok, pa iau ar laun onoi. <sup>57</sup> E Tata ning a lalauna i sune iau, pa a laun anasa o e Tata. Mangotleng larning tetek esining ir ien a palaok, ir laun anasa hok. <sup>58</sup> A bret ning i han misaot na langit ine. Bel i arlar ana mana ning a tumtubumulola nating la ieni, pa la ka mat. Ika esining ir hangan tagun a bret ne, ir laun tikin." <sup>59</sup> E Iesu i atong a warwarala ne, ning i asaer a

taraila ting na rumai lotu tumo e Kapernaum.

### *A warwarala na lalaun tikin*

<sup>60</sup> A galis tagun anuna tarai a asasaerla ning la longor a warwarala ne la atongi mange, "A asasaer ne i ngangaten kol, esi ir malmalting pasi?" <sup>61</sup> E Iesu i tasmani mang anuna na tarai a asasaer la ururai onoi. I deken la mange, "Mangmangasa, a warwara ne i alaulau mulo? <sup>62</sup> Ir mangmangasa tetek mulo ning mulor oroi a Nat a Barsan ir ulak usaot sur a hanua ning nating ka kes pas ano? <sup>63</sup> A Talngan Tabu i saran a lalaun. A rakrakai ana palaona tik bel i to pas ta utna. A warwarala ning a atongi ta mulo, i hanot tagun a Talngan Tabu, pa i saran a lalaun. <sup>64</sup> Ika dingla o mulo bel la tortorot."

Ning ot e Iesu ka tasman la ning bel lar tortorot onoi, pa i otleng ning ir tuami. <sup>65</sup> Pa i atongi otleng mange, "Ine a kamkamna ning a atai mulo mang bel tik ir han lar pasi tetek iau. Ika, ning ot e Tata ir sarani tetek iau, io, ir han tetek iau."

<sup>66</sup> Pa a galis tagun anuna tarai a asasaer la ulak kusuni, pa bel ma la muri. <sup>67</sup> E Iesu i deken ning a bonot pa pisir naur a kakak a asaer anunai mange, "Mangmangasa, mulo otleng, mulo mang sur mulor ulak kusun iau?" <sup>68</sup> E Saimon Pita i kelesi mange, "Leklek, milar han tetek esi? Anasa a warwarala na lalaun tikin anumi ka. <sup>69</sup> Mila ka tortorot pa mila tasmani mang u a Tena Totoh ane God." <sup>70</sup> E Iesu i atai la mange, "Ia ka aslang pas mulo ning a bonot pa pisir naur a kakak a asaerla, gepi? Ika takai o mulo a mot ka!" <sup>71</sup> I warwara o e Judas, a nat e Saimon Iskariot, i takai tagun ning a bonot pa pisir naur a kakak a asaerla, ning ir tuam e Iesu.

## 7

*Na tastas e Iesu bel la tortorot onoi*

<sup>1</sup> Lamur e Iesu i taltal ana hanhauala tumo e Galili. Bel i mang sur ir taltal saot ana papar Judia, anasa dingla na Juda la sang sur lar umkoli. <sup>2</sup> Ning a Lotu na Palturturup anuna tarai Judala ka milau, <sup>3</sup> na tastasna e Iesu la atai i mange, “I wakak sur ur kamtur mite pa ur han usaot e Judia sur anuma kakak a asaer lar oroi a ututna na kulkulan ning ur toli. <sup>4</sup> Ning tik i mang sur a tarai lar tasmani, bel i sira tol kumnan a ututnala. Ning u sira tol a ututnala ne, i wakak ning ur tol talapori sur a taraila ana rakrakan hanua rop lar tasman u!” <sup>5</sup> Na tastasna la warwara larne, anasa la otleng bel la tortorot onoi.

<sup>6</sup> E Iesu i atai la mange, “Anuk a taem belot i sot sur ar han, ika tetek mulo, a pukakiarla i langolango ka sur mulor han. <sup>7</sup> A taraila ana rakrakan hanua bel lar nget mulo, ika la nget iau, anasa a atai la ana nunla na toltol laulaula. <sup>8</sup> Mulo, mulor han usaot ana Lotu na Palturturup. Iau bel ar han kapit, anasa anuka taem belot i sot.” <sup>9</sup> Ning ka warwara tar, i kes suai tumo e Galili.

*E Iesu i han sur a Lotu na Palturturup*

<sup>10</sup> Ning na tastasna e Iesu la ka han sur a Lotu na Palturturup, e Iesu i mur la, ika bel i asangan talapori tetek a taraila. I han kumna ka. <sup>11</sup> Dingla na Juda la tai sur e Iesu tingia na lotu, la deke mang, “A barsan ne kanahaia?”

<sup>12</sup> A galis a tarai la wasisik o e Iesu. Dingla na tarai la atongi mang, “I a wakak a barsan,” pa dingla otleng la atongi mang, “Belal, i sira asongo a taraila ka.” <sup>13</sup> Pa bel tik i warwara talapor onoi, anasa la matatan dingla na tarai Juda.

*E Iesu i asaer a taraila ning la hanot ana Lotu na Palturturup*

<sup>14</sup> Ning la ka kes poter ana pukakiarla na Lotu na Palturturup, e Iesu i kas uting ui ana rumai a artabar, pa i turpas a asaer a taraila. <sup>15</sup> Dingla na Juda la kulkulan kol pa la deke mange, “A barsan ne bel i asasaer pas. I tasman mangmangasa a tastasmanla ne?” <sup>16</sup> E Iesu i keles la mange, “A asasaerla ne a asaer ono, bel anuki, anun esaning i sune iau ute. <sup>17</sup> Ning tik i mang sur ir mur a nuknukna e God, ir tasman lalani, mang anuka asasaer ne ta e God, o tagun a nuknukik ka. <sup>18</sup> Esining i warwara ka ana nuknukna, i mang ka sur dir aleklek pasi. Ika esining i mang sur dir aleklek pas e God ning i sune i ute, i atong a momolna, pa bel ta asasongo tingia. <sup>19</sup> E Moses ka saran tar a Warkuraila ta mulo, ika bel tik ta halimulo i muri. Sur asa ning mulo mang sur mulor umkol iau?”

<sup>20</sup> A kunum a tarai la kelesi mange, “A mot ka solong tar u. Esi i mang sur ir umkol u?” <sup>21</sup> E Iesu i keles la mange, “A tol ning a utna na kulkulan, pa mulo kulkulan rop onoi. <sup>22</sup> E Moses i saran tar a warkurai ta mulo sur mulor kot a palaona kakak barsanla. Ika a warkurai ne, bel ane Moses, a taraila ot nating la turpasi. Pa dingla na Pukakiar Sabat otleng mulo kot a palaona kakak barsanla. <sup>23</sup> Mulo sira kot a palaona kakak barsanla ana Pukakiar Sabat, sur gong di lakai a warkurai ane Moses. Ning mulo toli larne, sur asa mulo balakut tetek iau ning a alangolango pas a barsan ana Pukakiar Sabat? <sup>24</sup> Gong mulo warkurai ana numulo na tatatai ka, mulor warkurai ana warkurai ning i tostos.”

*Dingla na tarai bel la tortorot mang e Iesu i a Karisito*

<sup>25</sup> Dingla na tarai misaot e Jerusalem la deke mange, “I ka a barsan ning la mang sur lar umkoli, gepi? <sup>26</sup> Oroi, onone i tur pa i warwara namatana taraila, pa bel la kelesi. Ngandek a ningnigo la ka tasmani mang i a Karisito? <sup>27</sup> Ning a Karisito ir hanot, bel tik ir tasmani mang ir hanot mitaha. Ika a barsan ne dala tasman a hanua ngasna ka.”

<sup>28</sup> Kaning ot e Iesu i asasaer ana rumai a artabar, i warwara kol mange, “Mangmangasa mulo tasman momol iau ot, pa a hanua otleng ning a han kusuni? Bel a hanot ute ana nuknukik. Esaning i sune iau i atong a momolna. Pa mulo, bel mulo tasman esaning i sune iau. <sup>29</sup> Ika iau, a tasmani, anasa a han miting tana pa i ot i sune iau.”

<sup>30</sup> Pa Judala la mang sur lar tong akes pasi, ika bel tik i toli, anasa anuna taem belot i sot. <sup>31</sup> A galis tagun a kunum a tarai la tortorot o e Iesu pa la atongi mange, “A barsan ne i tol tar a galis a aki-nalangla. Ngandek e Karisito ot ne?”

<sup>32</sup> Ning a Parisaiola la longor a kunum a tarai la wasisik larne o e Iesu, io, a lek-lek a tena artabarla pa a Parisaiola, la sune sen a tena tai alarla tagun a rumai a artabar, sur lar tong akes pasi. <sup>33</sup> Pa e Iesu i atai la mange, “Bel ar kes bongnan iau napirimulo, ar han ulak tetek esaning i sune iau ute. <sup>34</sup> Mulor tai sur iau, ika bel mulor oroi tetek iau, pa bel otleng mulor han ana hanua ning ar kes ia.” <sup>35</sup> Dingla na Juda la deke artalai la mange, “A barsan ne ir han ma utaha, ning bel dalar oroi teteki? Ir han sur a hanhanuala anuna tarai Grik, ning anundala na tarai la kes ia? Ngandek ir asaer a tarai Grik? <sup>36</sup> I atongi mang dalar tai suri pa bel dalar oroi teteki, pa bel dalar han otleng ana hanua ning ir kes ia. Asa kamkamna warwara ne?”

### *A warwara larlar ana Talngan Tabu*

<sup>37</sup> Ana ararop a pukakiar tagun a Lotu na Palturturup, a pukakiar ning i ngangaten, e Iesu i tur pa i warwara kol mange, “Ning tik ir mos, i wakak sur ir han tetek iau pa ar agangi. <sup>38</sup> Esining ir tortorot hok, ‘a malum na lalaun lar dun ot tagun anuna lalaun,’ larning di ka tumus tari ting na Buk Tabu.” <sup>39</sup> E Iesu i warwara ana Talngan Tabu, ning dir tabar la ono ning la tortorot onoi. Belot di saran a Talngan Tabu, anasa e Iesu belot i kibas anuna matatar.

### *A tarai la taptapagal anasa o e Iesu*

<sup>40</sup> Dingla na taraila tagun a kunum ning la longor a warwara ne, la atongi mange, “A momolna ot, a barsan ne a propet ning e God i sune i ute.” <sup>41</sup> Dingla na tarai otleng la atongi mange, “Ai a Karisito.” Pa dingla otleng la atongi mange, “A Karisito bel ir hanot mitimo e Galili. <sup>42</sup> A Buk Tabu i atongi mange, Karisito ir hanot ana mangis a tarai ane Dewit. Ir hanot tumo e Betlihem, a hanua ning nating e Dewit i kes ia.” <sup>43</sup> Pa la taptapagal anasa o e Iesu. <sup>44</sup> Dingla na tarai la mang sur lar tong akesi, ika bel ta halinla i tol asoti.

### *A ningnigola bel la tortorot*

<sup>45</sup> Ning na tena tai alar tagun a rumai a artabar la ulak, a lek-lek a tena artabarla tetek e God pa Parisaiola la deken la mange, “Sur asa ning bel mulo dat pas e Iesu ute?” <sup>46</sup> A tena tai alarla tagun a rumai a artabar la keles la mange, “Bel tik i sira warwara lar a barsan ne!” <sup>47</sup> A Parisaiola la deken la mange, “Mangmangasa, mulo otleng i ka ben rongon pas mulo? <sup>48</sup> Mangmangasa mulo nuki mang ta halimila a ningnigola pa a Parisaiola i ka tortorot onoi? Belal! <sup>49</sup> A kunum a taraila ne ning

la tortorot o e Iesu, bel la tasman a Warkuraila ane Moses. A balakut ane God i kes onla.”

<sup>50</sup> Ning a hala Parisaiola, a risana e Nikadimos, esaning nating i hanot pas tetek e Iesu, i atai la mange, <sup>51</sup> “Ana warkurai anundala, bel dalar arup oros ka tik ning belot di longori, sur dir talapor ana sa ning i toli.” <sup>52</sup> La kelesi ka mange, “Ge, u otleng mitimo e Galili? Ur asaer ana Buk Tabu pa ur mananos onoi mang a propet bel i hanot mitimo e Galili.”

*A hane ning i tol a rongo taum ning a barsan*

<sup>53</sup> [Pa a taraila rop la han sarara sur anunla na hanhanua.

## 8

<sup>1</sup> E Iesu i han kas usaot ana Mangir Oliw. <sup>2</sup> Ana kobot ning ot ana pukakiar lamur, e Iesu i ulak sur a rumai a artabar, pa a taraila rop la han taum teteki. I kes pa i asaer la. <sup>3</sup> A tena asaerla tagun a warkurai pa a Parisaiola, la ben kas pas ning a hane tetek e Iesu. A hane ning di pastetek pasi ning i tol a rongo taum ning a barsan. La arakrakai pasi sur ir tur salanigo namatana taraila. <sup>4</sup> La atai e Iesu mange, “Tena Asaer, a hane ne di pastetek pasi ning i tol a rongo taum ning a barsan. <sup>5</sup> Ana warkurai ane Moses, ning ta hane ir toli manglarning, dir wolot koli ana hatatla. Pa u, ur atong asa onoi?” <sup>6</sup> La dekeni larning, anasa la mang sur lar toho e Iesu, sur ta warwara ir atongi, pa lar arupi ono. Ika e Iesu i tudu purum, pa i tumtumus ana pitlai kuna ting na kabalapiu.

<sup>7</sup> Ning la dekeni pa la dekeni larning, i tur pa i atai la mange, “Ning tik ta halimulo bel i tol tar ta rongo, io, ir wolot nigon a hane ne ana ta hat.” <sup>8</sup> E Iesu i tudu purum

ulak, pa i tumtumus ulak ting na kabalapiu. <sup>9</sup> Ning la longor a warwara ne, la rop la purum taktakai. A lapunla la purum nigo, tuk e Iesu kama kaning ia, taum ana hane ning di atur tari napirna. <sup>10</sup> E Iesu i tur, pa i deken a hane ning mange, “Lak, la ning la arup u, la kanaha ma? Bel ta halinla i warkurai u?” <sup>11</sup> A hane i kelesi mange, “Belal.” Pa e Iesu i atai i mange, “Iau otleng bel ar warkurai u. Ur han, pa gong ulak ma u tol tar ta rongo.”]\*

*E Iesu a talapor anuna rakrakan hanua*

<sup>12</sup> E Iesu i warwara ulak tetek a taraila, pa i atongi mange, “Iau a talapor anuna rakrakan hanua. Esining i mur iau, bel ir han ting na mormorom, ika ir kibas a talapor ana lalaun.” <sup>13</sup> A Parisaiola la atai i mange, “Anum a warwara talapor hom bel i mamahat, anasa u ot u warwara.” <sup>14</sup> Pa e Iesu i keles la mange, “Ning iau ot a warwara talapor hok, anuka warwara talapor i momol, anasa iau ot a tasman a hanua ning a han taguni, pa hanua ning ar han suri. Ika mulo, bel mulo tasman a hanua ning a han taguni, pa hanua ning ar han suri. <sup>15</sup> Mulo, mulo warkurai ka ana warkurai anuna taraila, ika iau bel a warkurai tik. <sup>16</sup> Ika ning ar warkurai, anuka warkurai ir tostos, anasa bel iau ka a toli, miau ot ma e Tata, ning i sune iau ute. <sup>17</sup> Di ka tumus tari ana numulo a warkurai mange, ‘Ning a warwara anuna naur i arlar ka ana ta utna, anundiau a warwara i momol.’ <sup>18</sup> Iau ne a warwara talapor hok, pa e Tata ning i sune iau ute, i otleng i warwara talapor hok.”

<sup>19</sup> La dekeni mange, “E tamam kanaha?” E Iesu i keles la mange, “Bel mulo tasman iau, pa bel mulo tasman otleng e Tata. Ning mulor

\* **8:11:** Dingla na tena mananos ana Buk Tabu la nuki mang e Jon bel i tumus a warwara kaning o e 7:53 tuk 8:11. La nuki mang tik masak i tumus murmuri.

tasman iau, io, mulor tasman e Tata otleng.”<sup>20</sup> E Iesu i atong a warwarala ne ting na rumai a artabar, ana pukna ning di sira suah mani na artabar ono. Ika bel tik i tong akesi, anasa anuna taem belot i sot.

*E Iesu i atumarang la ning bel la tortorot*

<sup>21</sup> E Iesu i atai ulak a taraila mange, “Ar han kusun mulo, mulor tai sur iau, pa mulor mat taum ana numulo na toltol laulaula. A hanua ning ar han suri, bel mulor han lar pas tingia.”<sup>22</sup> Dingla na Juda la atongi mange, “Asa kamkamna ning i atongi mang, ‘A hanua ning ar han suri, bel mulor han lar pas tingia?’ Ngandek ir umkol pasi ma?”<sup>23</sup> E Iesu i keles la mange, “Mulo mite lapiu, pa iau, misaot. Mulo mite na rakrakan hanua, iau bel mite na rakrakan hanua.”<sup>24</sup> Ine a kamkamna ning a atai mulo mang mulor mat ana numulo na toltol laulaula. Ning bel mulo tortorot hok mang iau ot ne†, mulor mat taum ana numulo na toltol laulaula.”<sup>25</sup> Pa la dekeni mange, “Esi u?” E Iesu i keles la mange, “Ia ka atai tar mulo turpasi ana nuk a titol, tuk onone.”<sup>26</sup> A galis a utna ar atongi o mulo ning ar warkurai mulo onoi, anasa esaning i sune iau i momol, pa iau, a atai ka a taraila ana rakrakan hanua ana sa ning a longori tana.”

<sup>27</sup> Bel la tasmani mang e Iesu i warwara tetek la o e Tamana.<sup>28</sup> Pa e Iesu i atongi mange, “Ning mulor rakan kas a Nat a Barsan usaot, mulor tasmani mang iau ning, pa mulor tasmani otleng mang bel a tol ta utna ana nuknukik, e Tata i asaer iau ana sa ning a atongi.”<sup>29</sup> Esaning i sune iau i kes taum hok, bel i han kusun iau, anasa a sira tol asaning i gas onoi.”

<sup>30</sup> A galis ning la longor a warwarala ne, la tortorot o e Iesu.

*A momolna ir alangolango mulo*

<sup>31</sup> E Iesu i atai a Judala ning la tortorot onoi mange, “Ning mulor kibas anuka asasaerla, mulo anuk na tarai a asasaer momol.”<sup>32</sup> Pa mulor tasman a momolna, pa a momolna ir alangolango mulo.”<sup>33</sup> La keles e Iesu mange, “Mila na tumtubuna e Abaram, bel mila titol lar a tena titol orosla tana tik tuk onone. Asa kamkamna ning u atongi mang a momolna ir alangolango mila?”

<sup>34</sup> E Iesu i keles la mange, “A atong momoli ta mulo, la rop ning la tol a laulauna, la na tena titol oros ana laulauna.”<sup>35</sup> A tena titol oros tetek ta kabaitamana, bel ir kes tikin tetek la, ika i naur a suana ning ta natundiau, i ning tagun diau momol.”<sup>36</sup> Ning a Nat e God i alangolango mulo, mulor langolango momol.”<sup>37</sup> A tasmani ot mang mulo na tumtubuna e Abaram. Ika ne, mulo sang sur mulor umkol iau, anasa anuka warwara bel i kes o mulo.”<sup>38</sup> A warwara ana sa ning a oroi ta e Tata, pa mulo otleng, mulo tol asaning mulo longori ta e tamamulo.”

<sup>39</sup> La kelesi mange, “E Abaram a tamamila.” E Iesu i keles la mange, “Ning e Abaram a tamamulo momol, mulor tol asaning i toli.”<sup>40</sup> Mulo mang sur mulor umkol iau, anasa a atai mulo ana momolna ning a longori ta e God. E Abaram bel i tol ta utna larne.”<sup>41</sup> Mulo, mulo tol ot a titolla ning a tamamulo i toli.”

La keles e Iesu mange, “Bel di agon oros mila ka ting na ngas, tamamila ot e God.”

<sup>42</sup> E Iesu i atai la mange, “Ning e God a Tamamulo, io, mulor mang sur iau, anasa a hanot tagun e God, pa ne a kes te. Bel a hanot ana nuknukik, i ot i sune iau.”<sup>43</sup> Sur asa ning bel mulo tasman lalan anuka

† 8:24: A warwara ne i arlar ana warwara ning e God i atongi ta e Moses ana rakai ning i irnga. A kamkamna mang e Iesu i atongi mang i ot a Mesaia.

warwara? Anasa bel mulo longor lar pas asaning a atongi. <sup>44</sup> E tamamulo e Satan, pa mulo mang ot sur mulo mur na nuknukna. Tagun nating ot, i a tena umkol a taraila, pa bel i tasman a momolna, anasa bel ta momolna i kes onoi. Ning i asasongo, i warwara ana nuna warwara momol ot, anasa i ot a tena asasongo pa a tamana asasongo. <sup>45</sup> Bel mulo tortorot hok, anasa a atong a momolna. <sup>46</sup> Esi o mulo ir arup sot pas iau ana ta laulauna? Ning a atong a momolna, i mangasa ning bel mulo tortorot hok? <sup>47</sup> Esining ane God i longor a warwarala ane God. Ika mulo, bel mulo longori, anasa bel mulo ane God.”

*E Iesu i leklek ta e Abaram*

<sup>48</sup> Dingla na Juda la atai e Iesu mange, “Mila tasman momoli mang u a te Samaria, pa a mot kaning hom.” <sup>49</sup> Pa e Iesu i keles la mange, “Bel ta mot kane hok. A hanrawai e Tata, ika mulo, bel mulo hanrawai iau. <sup>50</sup> Bel a mang sur a tarai lar aleklek pas iau, ika takai sot ka, a tnan tena warkurai, ir aleklek pas iau. <sup>51</sup> A atong momoli ta mulo, esining ir mur anuka warwara, bel ir mat.”

<sup>52</sup> Dingla na Juda la atai i mange, “Onone mila tasman momoli mang a mot kaning hom! E Abaram ka mat, pa a propetla otleng la ka mat, ika u atongi mang esining ir mur anuma warwara bel ir mat. <sup>53</sup> Mangmangasa, u nuki mang u leklek ta e tamamila e Abaram? E Abaram ka mat, pa a propetla otleng la ka mat. U nuki mang u esi na ngas a barsan?” <sup>54</sup> E Iesu i keles la mange, “Ning ar aleklek pas iau ot, anuka warwara ning bel i to pas ta utna. E Tata ot ir aleklek pas iau, i ning mulo atongi mang anumulo a God. <sup>55</sup> Mulo, bel mulo tasman e God, iau, a tasmani. Ning ar atongi mang bel a tasmani, iau otleng a tena asasongo lar

mulo. A tasman e God, pa a mur anuna warwarala. <sup>56</sup> Tamamulo e Abaram i gas sur ir oroi anuka tinan ot. I oroi, pa i gas kol onoi.”

<sup>57</sup> A Juda la atai i mange, “Belot i dilima na bonot a rau a lalaun anumi. I mangasa ning u atongi mang u ka oroi tar e Abaram?”

<sup>58</sup> E Iesu i keles la mange, “A atong momoli ta mulo, ning belot di agon e Abaram nating, ia ka laun nigo tar.”

<sup>59</sup> Ning e Iesu i atongi larne, la los pas a hatatla sur lar woloti, ika i mumun pa i han kusun a rumai a artabar.

## 9

*E Iesu i apalpalas pas a matanakut*

<sup>1</sup> Ning e Iesu i han amon, i oroi pas ning a barsan, ning e tana i agoni a kut. <sup>2</sup> Anuna kakak a asaer la dekeni mange, “Tena Asaer, asa kamkamna ning di agon pasi ka a matanakut? Esining i tol a laulauna, i ot o e tamana pa e tana?” <sup>3</sup> E Iesu i atongi mange, “A barsan ne bel i tol ta laulauna, e tamana pa e tana otleng bel. I kut ka sur a tarai lar oroi a rakrakai a titol ane God onoi. <sup>4</sup> Ning kanet i kabakiar, i wakak sur dalar tol a titolla anun esaning i sune iau ute. Ning kar morom, bel ma tik ir titol. <sup>5</sup> Ning a kes te na rakrakan hanua, iau a talapor anuna rakrakan hanua.”

<sup>6</sup> Ning e Iesu ka atong tari larne, i namis ting lapiu, i gisgis pas a namisna taum ana kabalapiu, pa i sabari ting na naur a matana.

<sup>7</sup> E Iesu i atai i mange, “Ur han, pa ur gos pas naur a matam ting na kabapolo Siloam.” (Siloam a kamkamna mang di arsune.) Pa i han, i gos pas naur a matana. Ning i ulak, i ka tai.

<sup>8</sup> Na halalna pa a taraila ning la oroi tari nating ning i sira nunung utna, la deke mange, “Ngandek i ka a barsan ning i kes pa i sira



nunung, gepi?"<sup>9</sup> Dingla na tarai la atongi mange, "Ai ot ning." Dingla otleng la atongi mange, "Bel, i tai arlar ka ana barsan ning." Ika, i ot i atongi mang, "Iau ka."<sup>10</sup> La dekeni mange, "Di apalpalas mangmangasa naur a matam?"<sup>11</sup> I keles la mange, "A barsan ning di atongi mang e Iesu, i gisgis pas a namisna taum ana kabalapiu, pa i sabar tar naur a matak ono. Pa i atai iau mange, 'Ur han utumo na kabapolo Siloam sur ur gos pas naur a matam.' Pa a han, a gos pas naur a matak, pa tai kakat."<sup>12</sup> La dekeni mange, "Kanaha ma a barsan ning?" I keles la mange, "Bel a tasmani."

*A Parisaio la tikin a kut*

<sup>13</sup> La ben pas a barsan ning nating i kut tetek a Parisaiola,<sup>14</sup> anasa e Iesu i gisgis pas a namisna taum ana kabalapiu, pa i apalpalas pas naur a matana ana Pukakiar Sabat.<sup>15</sup> A Parisaiola otleng la deken a barsan ning mange, "Di apalpalas mangmangasa pas naur a matam?" I keles la mange, "I sabar tar naur a matak ana kabalapiu ning i gisgis pasi ana namisna, pa a gos pasi, pa tai kakat."<sup>16</sup> Dingla na Parisaio la atongi mange, "A barsan ning i tol a utna ne, i bel tagun e God, anasa i titol ana Pukakiar Sabat." Dingla na taraila otleng la atongi mange, "A barsan ne a wakak a barsan, anasa i tol a akinalangla ne." Pa la taptapagal.<sup>17</sup> Lamur a Parisaio la deken a barsan ning mange, "Ur atong asa ana barsan ning i apalpalas pas naur a matam?" I keles la mange, "I a propet."

<sup>18</sup> Dingla na Juda bel la tortorot mang, a barsan ne lanigo i kut pa di apalpalas a matana. Pa la arsune pas e tamana pa e tana, pa la deken diau mange,<sup>19</sup> "A natumu ine, ning mu atongi mang mu agon pasi ka kut? Asa kamkamna ne i ka tai?"<sup>20</sup> E tamana pa e tana

dia keles la mange, "Mia tasmani mang e natumiau ot ne, pa mia tasmani mang mia agon pasi ka kut."<sup>21</sup> Ika bel mia tasmani mang i tai mangmangasa, bel mia tasmani otleng mang esining i apalpalas pas naur a matana. Ka itna, mulor dekeni, i ot ir warwara talapor onoi."<sup>22</sup> E tamana pa e tana dia warwara larné, anasa dia matatan a Judala, ning la atongi mang, ning tik ir tortorot o e Iesu mang i a Karisito, esaning e God i sune i ute sur ir alaun a tarai, dir sairasi kusun a rumai lotu.<sup>23</sup> Ine a kamkamna ning e tamana pa e tana dia atongi mange, "Ka itna, mulor dekeni."

<sup>24</sup> Munaur ono la ben ulak pas a barsan ning di agon pasi ka kut, pa la atai i mange, "Ur aleklek e God ana sa ning i toli hom! Mila tasmani mang a barsan ning i apalpalas pas naur a matam, a laulauna."<sup>25</sup> I keles la mange, "Bel a tasmani mang a laulauna o bel. Ning a utna ka a tasmani: Nating a kut, pa onone ia ka tai."<sup>26</sup> La dekeni mange, "Asa ning i toli hom? I apalpalas mangmangasa pas naur a matam?"<sup>27</sup> I keles la mange, "Ia ka atong tari ta mulo, pa bel mulo longori. Sur asa ning mulo mang sur mulor longor ulaki? Ngandek mulo otleng mulo mang sur mulo anuna kakak a asaerla?"

<sup>28</sup> La hanani, pa la atongi mange, "U a kaklik asasaer anunai, ika mila a kakak a asaerla ane Moses."<sup>29</sup> Mila tasmani mang e God i warwara tetek e Moses, ika a barsan ning bel mila tasmani mang i han mitaha."<sup>30</sup> A barsan i keles la mange, "Ai, a utna na kulkulan! Bel mulo tasmani mang i han mitaha, ika ka apalpalas pas naur a matak."<sup>31</sup> Dala tasmani mang e God bel ir longor a nunung anuna tena laulaula, ir longor ka esining i hanrawai i pa i sira mur a nuknukna.<sup>32</sup> Nating ot tuk onone,

bel di tasman tar tik ning ir apal-pal pas ta matanakut, ning di agon pasi ka kut. <sup>33</sup> Ning a barsan ne bel tagun e God, bel ir tolsot pas ta utna.” <sup>34</sup> La kelesi mange, “Di agon pas u ana toltol laulau, pa u mang sur ur asaer mila!” Pa la kepseni kusun a rumai lotu.

*Esining bel i tortorot i a kut*

<sup>35</sup> Ning e Iesu i longori mang di ka kepsen a barsan ning, i tai suri. Pa ning i tai pasi, i dekeni mange, “U tortorot ot ona Nat a Barsan?” <sup>36</sup> I kelesi mange, “Leklek, ur atai iau o esining a Nat a Barsan, sur ar tortorot onoi.” <sup>37</sup> E Iesu i atai i mange, “Onone u ka oroi i, iau kane a warwara tam.” <sup>38</sup> A barsan ning i atongi mange, “Leklek, a tortorot!” I kes ana naur a bokona hana pa i lotu teteki.

<sup>39</sup> E Iesu i atongi mange, “A hanot ute na rakrakan hanua sur ar saran a warkurai mange: la ning la kut lar tai, pa la ning la tai lar kut.” <sup>40</sup> Dingla na Parisaio kaning taum ono, la longor a warwara ne, pa la dekeni mange, “U nuki mang mila otleng mila kut?” <sup>41</sup> I keles la mange, “Ning mulor kut bel tik ir arup mulo ana ta laulauna, ika onone mulo atongi mang mulo tai, io, anumulo na toltol laulau kaning ot i kes.”

## 10

*A warwara larlar ana tena tai alar anuna sipsipla*

<sup>1</sup> E Iesu i atongi mange, “A atong momoli ta mulo, esining bel i kas ana taman na woroh na sipsip, pa i abit kas ka usau, i a tena kinkinau pa a tena ras oros a ututnala. <sup>2</sup> Ika a barsan ning i kas tostos ana taman, i ning a tena tai alar momol anuna sipsip. <sup>3</sup> A tena tai alar tagun a taman ir sapang pasi sur ir kas. A sipsipla la longor lalan a elngena. I kabah la ana risanla, pa i ben purum la. <sup>4</sup> Ning ka ben purum rop pas anuna sipsipla, i

ningon la pa la muri, anasa la longor lalan a elngena. <sup>5</sup> Bel lar mur ta wasira, lar liu kusuni ka, anasa bel la longor lalan a elngena.” <sup>6</sup> E Iesu i atong a warwara larlar ne tanla, ika bel la tasman asaning i warwara larlar onoi.

*E Iesu a wakak a tena tai alar anuna sipsipla*

<sup>7</sup> Pa e Iesu i atong ulaki mange, “A atong momoli ta mulo, iau a taman anuna sipsipla. <sup>8</sup> La rop ning la hanot nigo tak, a tena kinkin-aula pa a tena ras oros pas a ututnala, ika a sipsipla bel la longor tanla. <sup>9</sup> Iau a taman. Esining ir han tetek iau pa ir kas te hok dir alauni. Ir kas, pa ir purum pa ir pastetek ana utna na hangan. <sup>10</sup> A tena kinkin-aula i hanot ka sur ir kinkin-aula, pa ir umkol a sipsipla pa ir alaulau la. Ika iau, a hanot sur lar kibas a lalaun, a lalaun ning i bukus ana wakakna.

<sup>11</sup> “Iau a wakak a tena tai alar anuna sipsipla. A saran tar anuka lalaun sur ar mat sur la. <sup>12-13</sup> A barsan ning di lou i ka, bel a tena tai alar momol anuna sipsipla, pa a sipsipla bel anunai. Ning ir oroi pas ta ngalngaliah na pap ir hanot, ir liu ka kusun a sipsipla, anasa i titol ka sur a mani, pa bel i nuknuk sur a sipsipla. Pa a ngalngaliah na pap ir harat la pa ir lu sauran la.

<sup>14</sup> “Iau a wakak a tena tai alar anuna sipsipla. A tasman anuka sipsipla, pa anuka sipsipla otleng la tasman iau, <sup>15</sup> arlar lar e Tata i tasman iau, pa iau a tasmani, pa a saran tar anuka lalaun sur ar mat sur la. <sup>16</sup> Anuk dingla na sipsip otleng, bel la kes ting na woroh na sipsip ne. Ar ben pas la otleng, pa lar longor a elngek, sur la rop lar kes ka ana takai a woroh, pa takai sot ka ir tena tai alar anunla.

<sup>17</sup> “E Tata i mang sur iau, anasa iau ot a saran tar anuka lalaun, sur lamur ar los ulak pasi. <sup>18</sup> Bel tik ir kepsen anuka lalaun, iau ot ar saran tari. Iau ot a warkurai sur

ar saran tari, pa ar los ulak pasi. A titol ne ning e Tata i sune iau sur ar toli.”

<sup>19</sup> A Judala la taptapagal ana warwarala ane Iesu. <sup>20</sup> Galis onla, la atongi mange, “A mot i solongi, pa a nuknukna ka talar. Sur asa ning mulo longor pasi?” <sup>21</sup> Dingla na tarai la atongi mange, “A ngas a warwara ne bel anuna tik ning a mot i kas tar onoi. Mangmangasa, tik ning a mot i kas onoi ir apal-palas lar pas a matana kutla?”

*A Judala bel la tortorot o e Iesu*

<sup>22</sup> Pa la tol a tnan lotu sur lar nuk pas a pukakiar ning la sapang a rumai a artabar onoi. La tol a lotu ne saot e Jerusalem ana kalang na kotkoto. <sup>23</sup> E Iesu i han amon ting na parada ane Solomon ana rumai a artabar. <sup>24</sup> A Juda la tur talilis pasi, pa la dekeni mange, “Nangse ma ur atai momol mila? Ning u a Karisito, ur atai talapor mila.” <sup>25</sup> E Iesu i keles la mange, “Ia ka atong tari ta mulo, ika bel mulo tortorot. A titolla ning a toli ana risana e Tata, la warwara talapor hok. <sup>26</sup> Ika bel mulo tortorot, anasa mulo bel anuka sipsipla. <sup>27</sup> Anuk a sipsipla la longor a elngek, pa tasman la, pa la sira mur iau. <sup>28</sup> A saran a lalaun tikin tanla, pa bel lar hirua. Pa bel tik ir rasen la kusun a kuk. <sup>29</sup> E Tata ning i saran tar la tak, i lekkek tana ututnala rop, pa bel tik ir rasen la kusun a kuna. <sup>30</sup> Miau ma e Tata, miau takai ka.”

<sup>31</sup> A Juda la los ulak pas a hatatla sur lar wolot e Iesu. <sup>32</sup> E Iesu i atai la mange, “Ia ka asangan tar a galis a ututnala na kulkulan namatamulo, ning e Tata i saran tari tak sur ar toli. Esi na utna ana ututnala ne ning mulo mang sur mulor wolot iau onoi?” <sup>33</sup> La kelesi mange, “Mila mang sur milar wolot u, bel ana ta utna na kulkulan ning u toli, anasa u anaterna pas e God! U a barsan ka u, pa u atongi mang u e God.” <sup>34</sup> E Iesu

i atai la mange, “Mulo tasmani ot mang di ka tumus tari ana numulo na Warkuraila mang e God i atongi mang ‘Mulo a godla’. *Buk Song 82:6*

<sup>35</sup> I atong la mang la a godla, la ning di saran tar a warwarala ane God tanla. Bel tik ir kepsen lar pas a warwara na Buk Tabu. <sup>36</sup> Pa iau, e Tata ot i aslang pas iau, pa i sune iau ute na rakrakan hanua. Pa sur asa mulo arup iau mang a warwara laulau o e God, ning a atongi mang iau a Nat e God? <sup>37</sup> Ning bel a tol a titolla ane Tata, io, gong mulo tortorot hok. <sup>38</sup> A tol ot anuna titolla. Ika ning bel mulo tortorot ana nuk a warwara, mulor tortorot hok anasa ana titolla ning a toli, sur mulor tasmani mang e Tata kane hok, pa iau kaning ono.”

<sup>39</sup> Lamur la mang ulak sur lar tong akesi, ika i han ka kusun la.

<sup>40</sup> E Iesu i kotop ulak a malum Jodan sur a pukna ning e Jon i sira baptais nigo ono, pa i kes tingia. <sup>41</sup> A galis a tarai la han tetek e Iesu pa la atongi mange, “E Jon bel i tol al akinalang, ika a warwarala rop ning i atongi ana barsan ne, i momol ot.” <sup>42</sup> Pa a galis a taraila tingia la tortorot o e Iesu.

## 11

*E Lasarus i mat*

<sup>1-2</sup> Ning a barsan mitimo e Betani, a risana e Lasarus, i kurah. Latas ma e Maria pa e Mata. E Maria ning i pek tar a malum na tomtobo ana naur a hana Leklek, pa i sasengsenge diau ana hihna. <sup>3</sup> Ditas hane dia sarai warwara sur e Iesu mange, “Leklek, a halim ning u katnani i kurah.”

<sup>4</sup> Ning e Iesu i longori, i atongi mange, “Lasarus bel ir mat ana tinsaman ne. I kurah ka sur dir oroi a matatar ane God, sur a Nat e God ir kibas a matatar onoi.”

<sup>5</sup> E Iesu i maris e Mata pa tasna hane e Maria pa tasindiau e Lasarus. <sup>6</sup> Ning ka longor tari

mang e Lasarus i kurah, i kes ulak pas naur a pukakiar ana hanua ning i kes ia. <sup>7</sup> Lamur e Iesu i atai a kakak a asaerla mange, “Dalar ulak utumo na papar Judia.” <sup>8</sup> Pa la atai i mange, “Tena Asaer, nating ka a Juda la mang sur lar wolot amat u, pa ne u mang sur ur ulak utumo?” <sup>9</sup> E Iesu i keles la mange, “Ning a pukakiar i arlar ana ning a bonot pa pisir naur a matana kamis, gepi? Ning tik ir taltal ana kamis bel ir buh a hana, anasa i tai ana talapor ana rakrakan hanua. <sup>10</sup> Ika ning tik ir taltal ana morom ir loloko, anasa bel ta talapor.”

<sup>11</sup> Lamur i atongi otleng mange, “A halindala e Lasarus ka borbor duman, pa ar han sur ar amata pasi.” <sup>12</sup> A kakak a asaer la kelesi mange, “Leklek, ning i borbor duman ka, ir langolango ulak ka.” <sup>13</sup> E Iesu i warwara ana minat e Lasarus, ika a kakak a asaer la nuki mang e Lasarus i borbor duman ka. <sup>14</sup> Pa e Iesu i atai talapor la mange, “E Lasarus ka mat. <sup>15</sup> Pa iau, a gas ning bel a kes tumo, sur mulor tortorot. Pa dalar han teteki.” <sup>16</sup> E Tomas, ning di atongi otleng mang a Kasang, i atai a kakak a asaerla mange, “Dalar han taum sur dala otleng dalar mat taum onoi.”

*E Iesu a lalaun ulak, pa a lalaun momol*

<sup>17</sup> Ning e Iesu i hanot, i longori mang di ka akas tar a minat e Lasarus ana kulam a minat, ka diat a pukakiar alari. <sup>18</sup> E Betani i milau ka e Jerusalem, i arlar ka ana natola kilomita, <sup>19</sup> pa galis a Juda la hanot tetek e Mata pa e Maria sur lar kes amahat diau ana tasindiau ning i mat.

<sup>20</sup> Ning e Mata i longori mang e Iesu kaning ma ot, i purum sur ir han barati, ika e Maria i kes ka ting narumai. <sup>21</sup> E Mata i atai e Iesu mange, “Leklek, ngandek ning ur kes ot te, a tasiklik bel ir mat. <sup>22</sup> Ika

a tasmani mang, ning ur nunung e God sur ta utna onone, ir sarani ka tam.” <sup>23</sup> E Iesu i atai i mange, “A tasimlik ir laun ulak ka.” <sup>24</sup> E Mata i kelesi mange, “A tasmani mang ir laun ulak ana ararop a pukakiar.” <sup>25</sup> E Iesu i atai i mange, “Tau a lalaun ulak kusun a minat, pa iau a lalaun momol. Esining i tortorot hok, ning ir mat, ir laun ulak, <sup>26</sup> pa esining i laun pa i tortorot hok, bel ir mat. U tortorot ot ana warwara ne?” <sup>27</sup> E Mata i kelesi mange, “Leklek, i momol. A tortorot mang u a Karisito, a Nat e God, ning i sune u ute na rakrakan hanua.”

<sup>28</sup> Lamur ning e Mata ka atong tari larne, i ulak pa i kabah kumanan pas e tasna hane e Maria, pa i atai i mange, “A Tena Asaer ka hanot pa i deke sur u.” <sup>29</sup> Ning e Maria i longori, i purum kapit pa i han teteki. <sup>30</sup> E Iesu belot i hanot ting na hanua, i kaning ot ana pukna ning e Mata i pastetek tari ia. <sup>31</sup> A Judala ning la kes taum o e Maria ting narumai sur lar kes amahati, la oroi mang i purum kapit kusun la utumo lapiu, pa la muri. Anasa la nuki mang ir han sur a kulam a minat sur ir domos.

<sup>32</sup> Ning e Maria i hanot ana pukna ning e Iesu i kes ia, i oroi teteki, i kes ana bokona hana salanigo tana, pa i atongi mange, “Leklek, ngandek ning ur kes tar ot te, a tasiklik bel ir mat.” <sup>33</sup> Ning e Iesu i oroi e Maria taum ana Judala ning la han taum ono la domos, a tnan puka marmaris i hanot ting na inguna pa i bal maris. <sup>34</sup> E Iesu i deken la mange, “Mulo suah a minatna taha?” La kelesi mange, “Leklek, han ute sur ur oroi i.” <sup>35</sup> Pa e Iesu i domos. <sup>36</sup> A Juda la atongi mange, “Mulo oroi, i katnan koli!” <sup>37</sup> Ika dingla onla, la mang, “I apalpalas pas a matana kutla, pa i mangasa ning bel i alangolango pas a barsan ne, sur gong i mat?”

*E Iesu i alaun pas e Lasarus*

<sup>38</sup> E Iesu i bal maris kol, ning i hanot ting na kulam a minat. A kulam a minat ning di suah alari ana tnan hat. <sup>39</sup> E Iesu i atai la mange, "Mulor lakir sen a hat." Pa e Mata, a tas a barsan ning i mat, i kelesi mange, "Leklek, kar goh, anasa ka diat a pukakiar alari!" <sup>40</sup> E Iesu i atongi mange, "Mangasa, bel a atai nigon tar u mang, ning ur tortorot, ur oroi a matatar ane God?"

<sup>41</sup> Pa la lakir sen a hat. E Iesu i tadai usaot, pa i atongi mange, "Tata, a atong wakak tetek u, anasa u ka longor iau. <sup>42</sup> A tasmani mang u sira longor tak, ika a warwara larné, kamkamna ana taraila ne, sur lar tortorot mang u sune iau."

<sup>43</sup> Ning ka atong tari larné, i arkabah ana tnan elngena mange, "Lasarus, ur purum!" <sup>44</sup> E Lasarus i purum, taum ana kaba iriris a kaen, pa ning a dia kaen otleng di poroi alar tar a patarna ono. E Iesu i atai la mange, "Mulor paksen a kaen na minatla kusuni sur ir han."

*La warwara taum sur lar umkol e Iesu*

(Mt 26:1-5; Mk 14:1-2; Lk 22:1-2)

<sup>45</sup> A galis a Judala ning la kes napire Maria, la oroi a utna ning e Iesu i toli, pa la tortorot onoi. <sup>46</sup> Ika dingla onla, la han tetek a Parisaiola pa la atai la ana utna ning e Iesu i toli. <sup>47</sup> A leklek a tena artabarla tetek e God pa na Parisaio la kabah taum a tarai a kiwung, pa la deken la mange, "Dalar tol asa? A barsan ning i tol a galis a akinalangla. <sup>48</sup> Ning dalar noreni, a taraila rop lar tortorot ono, pa a tarai a harum mitimo e Rom lar hanot pa lar regen sen a rumai a artabar anundala pa lar kepsen otleng anundala matanitu."

<sup>49</sup> Ning a halinla a risana e Kaiapas, a ningnigo na tena artabar tetek e God ana rau

ning, i atongi mange, "Bel mulo tastasman. <sup>50</sup> Bel mulo tasmani mang ir wakak tetek mulo ning tik ir mat alar a tarai, sur gong a tarai Juda rop dalar hirua."

<sup>51</sup> Bel i atong orosi ka. I warwara na propet larning, anasa i a ningnigo na tena artabar tetek e God ana rau ning. I warwara o e Iesu mang ir mat sur a tarai Juda. <sup>52</sup> Pa bel sur la ka, sur a taraila rop otleng ane God ning la kes sararing na hanhanua masuk, sur ir ben taum pas la sur lar takai ka.

<sup>53</sup> Ana pukakiar ot ning, a ningnigola ana tarai Juda la turpas a warwara sur al ngas sur lar umkol e Iesu. <sup>54</sup> Suri ma i ning e Iesu bel ma i taltal namatanla. I kamtur mitingia, sur a hanua Epraim milau a hanua bel, pa la kes tingia taum ana nuna kakak a asaerla.

<sup>55</sup> Ning ka milau a lotu na Han Lakai anuna tarai Juda, a galis a tarai tagun a hanhanuala la nigo usaot e Jerusalem, sur lar atotoh nigon pas la namatana e God lanigo tana lotu, i arlar ana toltol ana nunla lotu. <sup>56</sup> La tatatai sur e Iesu. Ning la tur taum tar ting na rumai a artabar, la deken artalai la mange, "Mulo nuk asa? Ir han ot ute ana lotu, o bel?" <sup>57</sup> A leklek a tena artabarla pa na Parisaio la ka sarai wara tar sur tik ning ka oroi tar e Iesu, ir atatai talapor ono mang i kes taha, sur lar tong akes pasi.

## 12

*E Maria i sang e Iesu sur a pukakiar ning ir mat pa dir akasing ting na kulam a minat*

(Mt 26:6-13; Mk 14:3-9)

<sup>1</sup> Diono na pukakiar kaning ot lanigo tana lotu na Han Lakai, e Iesu i hanot saot e Betani, a hanua ane Lasarus, a barsan ning e Iesu i alaun pasi kusun a minat. <sup>2</sup> Pa la tol a utna na hangan na kes taum o e Iesu tingia. E Mata i susuk

anlai, pa e Lasarus i ning a halinla ning la kes taum o e Iesu ana utna na hangan. <sup>3</sup> E Maria i los pas a koto na tomtoboh ning di atongi ana nad, a matana i abit kol. Pa i peki ana naur a hana e Iesu, pa i sah diau ana hihna. A tobohna i tatah tingui na rumai.

<sup>4</sup> Ning a halin na kakak a asaerla ane Iesu, e Judas Iskariot, ning ir asobor tar e Iesu, i atongi mange, <sup>5</sup> “Sur asa ning bel di siuran a koto na tomtoboh ne sur a ngas a arlou tagun a takai a rau kidol, sur dir tabar a kapan a taraila ono?” <sup>6</sup> Bel i maris a kapan a taraila. I atongi larné, anasa i sira tai alar anunla mani pa i sira kinau kumnani, anasa i a tena kinkinau. <sup>7</sup> Ning e Iesu i longor a warwara ane Judas, i kelesi mange, “Noren a hane ning, i tol a titol ne hok sur a pukakiar ning ar mat pa dir akas iau ting na kulam a minat. <sup>8</sup> A kapan a tarai lar laun mokos taum o mulo, ika iau bel ar kes tikin napirimulo.”

*La wolwol sur lar umkol e Lasarus*

<sup>9</sup> Ning a kunum a tarai tagun a tarai Juda la longori mang e Iesu kano e Betani, la han uto. Bel la han sur lar oroi e Iesu ka, la han otleng sur lar oroi e Lasarus, ning e Iesu i alaun pasi kusun a minat. <sup>10</sup> Pa a leklek a tena artabarla la wolwol sur lar umkol e Lasarus otleng, <sup>11</sup> anasa a galis a Juda la han kusun la pa la tortorot o e Iesu, kamkamna o e Lasarus.

*E Iesu i han usaot e Jerusalem lar a king*

(Mt 21:1-11; Mk 11:1-11; Lk 19:28-40)

<sup>12</sup> Ana pukakiar lamur a tnan kunum a taraila ning la hanot sur a lotu na Han Lakai, la longori mang e Iesu otleng kaneing i han amon usaot e Jerusalem. <sup>13</sup> La los pas a paka baibaila pa la han sur lar barat e Iesu. La kukuk mange,

“Hosana! Esaning i hanot ana risan a Leklek i angis.” *Buk Song 118:25-26*

A King anuna tarai Israel i angis!”

<sup>14</sup> E Iesu i ben pas a dongki, pa i kes saot onoi, larning a Buk Tabu ka atong tari ono mange,

<sup>15</sup> “A tarai Saion, gong mulo mat-mataut.

Oroi, anumulo a king i hanot, i kes ana nat a dongki.”

*Sekaraia 9:9*

<sup>16</sup> A kakak a asaerla ane Iesu bel la tasmani mang a ututnala ning di ka tumus nigon tari ting na Buk Tabu. Ika ning e Iesu ka kes ana nuna matatar, io, la bot nuk lalani mang di ka tumus tar a ututnala ne o e Iesu, pa di ka tol tar a ututnala ne onoi.

<sup>17</sup> A galis a tarai ning la tur taum o e Iesu ning i kabah purum pas e Lasarus kusun a kulam a minat pa i alaun pasi, la ning la warwara talapor onoi. <sup>18</sup> A galis a tarai la han sur lar barat e Iesu, anasa la ka longor tar a warwara ana akinalang ning. <sup>19</sup> A Parisaiola la atai artalai la mange, “Mulo oroi, bel dalar tolsot pas ta utna ning dala mang sur dalar toli. Anasa a tarai tagun a rakrakan hanua rop la ka muri.”

*A tarai Grik la mang sur lar oroi e Iesu*

<sup>20</sup> Dingla na tarai Grik otleng la han usaot e Jerusalem ana lotu na Han Lakai, sur lar lotu. <sup>21</sup> Pa la han tetek e Pilip, a te Betsaida. E Betsaida a hanua ting na papar Galili. Pa la atai i mange, “Lak, mila mang sur milar oroi e Iesu.” <sup>22</sup> E Pilip i han pa i atai e Endru, pa dia han sur diar atai e Iesu. <sup>23</sup> Pa e Iesu i keles diau mange, “A pukakiar ka hanot ning dir mermer a Nat a Barsan. <sup>24</sup> A atong momoli ta mulo, ning a pat a wit bel ir punga ting na kabalapiu pa bel ir mat pas, ir kes ot larning, takai ka. Ika ning ir mat pas, ir wai pa ir suah galis a patna. <sup>25</sup> Esining i mang kol sur

anuna lalaun, ir hirua, pa esining i nget anuna lalaun te na rakrakan hanua, ir suahi sur a lalaun tikin. <sup>26</sup> Esining ir titol tetek iau, i wakak ning ir mur iau, pa i anuka tena titol pa ir kes taum hok ting na pukna ning ar kes ia. Esining ir titol tetek iau, e Tata ir aleklek pasi.

*E Iesu i warwara ana nuna minat*

<sup>27</sup> “Onone anuka lalaun i mamahat kol. Asa ning ar atongi? Mangmangasa, ar atongi larne, “Tata, gong u noren tar a mamahat ne ir hanot tetek iau”? Bel! Bel ar nunung larne, a kamkamna ot ne, ning a hanot suri. <sup>28</sup> Tata, ur aleklek a risam!”

Pa a elngen takai misaot na langit i atongi mange, “Ia ka aleklek tari, pa ar aleklek ulaki.” <sup>29</sup> A kunum a tarai ning la tur tingia la longori. Dingla na tarai la atongi mang a pungpugur, pa dingla otleng la atongi mange, “Ning a angelo i warwara teteki.” <sup>30</sup> Ika e Iesu i atongi mange, “A elngen takai ne bel i warwara sur ir nangan iau, sur ir nangan mulo ot. <sup>31</sup> Onone ka taem sur dir warkurai a rakrakan hanua, pa dir alulu sen e Satan, a ningnigo tagun a rakrakan hanua. <sup>32</sup> Ika iau, ning dir rakan kas iau usaot mite lapiu, ar dat a taraila rop tetek iau.” \* <sup>33</sup> I atongi larne sur ir atalapori mang ir mat mangmangasa.

<sup>34</sup> Pa kunum a tarai la atai i mange, “Mila longori ana Buk na warkurai mange, e Karisito ir kes tikin. Sur asa u atongi mang dir rakan kas a Nat a Barsan usaot? Esining a Nat a Barsan?” <sup>35</sup> E Iesu i atai la mange, “A talapor bel ir kes kol ma napirimulo. Mulor taltal ning a talapor kanet, lamur a mormorom ir poroi alar mulo. Esining ir taltal ana mormorom bel ir tasmani mang ir han utaha.

<sup>36</sup> Ning a talapor kanet, mulor tortorot onoi, sur mulo na natnat a talapor.” Ning e Iesu ka atong arop tar a warwara ne, i kamtur pa i han kumna kusun la.

*Dingla na tarai Juda bel la tortorot o e Iesu*

<sup>37</sup> E Iesu ka tol tar a galis a akinalang namatanla, ika bel la tortorot onoi, <sup>38</sup> sur a warwara ning a propet Aisaia i warwara tar onoi ir hanot momol. I atongi mange,

“Leklek, esining ka tortorot ana warwarala ning mila atongi?

Pa esining di ka asangan tar a rakrakai anuna Leklek tana?” *Ais 53:1*

<sup>39-40</sup> Pa ka atong tari otleng manglarne,

“E God ka bingakut tar a matanla, pa ka sanalar tar a nuknukinla,

sur gong la tai ana matanla, pa gong la tasman lalani ana nuknukinla,

pa bel lar talingir tetek iau, sur ar alaun la.” *Ais 6:10*

A kamkamna ine, ning bel la tortorot. <sup>41</sup> E Aisaia i atongi larne, anasa ka oroi nigon tar a matatar ane Iesu, pa i warwara onoi.

<sup>42</sup> Pa galis a ningnigola otleng tagun a tarai Juda la tortorot o e Iesu, ika bel la warwara talapor onoi, sakana a Parisaiola lar kepsen la kusun a rumai lotula.

<sup>43</sup> Bel la warwara talapor onoi anasa la mang kol sur a tarai lar aleklek la, pa bel la nuk pas a warwara gasgas ane God tetek la.

*A warwarala ane Iesu ir warkurai a taraila*

<sup>44</sup> E Iesu i warwara kol mange, “Esining i tortorot hok, bel i tortorot ka hok, i tortorot otleng o esaning i sune iau ute. <sup>45</sup> Pa esining i oroi iau, ka oroi tar esaning i sune iau ute. <sup>46</sup> A hanot ute

\* **12:32:** E Iesu i warwara larlar ana nuna minat saot na rakai kutus.

na rakrakan hanua lar a talapor, sur esining i tortorot hok, bel ir kes ana mormorom. <sup>47</sup> Ning tik i longor anak na warwarala pa bel i muri, iau, bel ar warkurai i. Anasa bel a hanot sur ar warkurai a rakrakan hanua, a hanot sur ar alauni. <sup>48</sup> Esining bel i mang sur iau pa bel i kibas anak na warwarala, anak na warwarala ot ning lar warkurai i ana ararop a pukakiar. <sup>49</sup> Anasa a warwarala ning ia ka atong tari bel anuki, e Tata ot i sune iau ono ute sur ar atongi pa ar atong mangmangasa i. <sup>50</sup> A tasmani mang anuna warkuraila ir saran a lalaun tikin. A warwarala a atongi, e Tata i sune iau ono sur ar atongi.”

### 13

*E Iesu i gos a hana kakak a asaerla anunai*

<sup>1</sup> Ning ka milau a lotu na Han Lakai, e Iesu ka tasmani mang ka milau sur ir han kusun a rakrakan hanua, pa ir han tetek e Tamana. I maris kol anuna taraila ning la kes te na rakrakan hanua, pa ine i asangan anuna tnan marmaris tetek la, a marmaris ning bel ta araropna.

<sup>2</sup> Ana morom, e Iesu taum ana nuna na kakak a asaer la hangan taum. Lanigo sur lar hangan, e Satan i anuknuk tar e Judas Iskarot, a nat e Saimon, sur ir asobor e Iesu. <sup>3</sup> E Iesu i tasmani mang e Tamana ka saran arop tar a ututnala rop nakuna, pa i tasmani mang i hanot ot tagun e God, pa ir ulak tetek e God. <sup>4</sup> Pa i kamtur kusun a utna na hangan, i kepsen anuna kaen ning i polpol alar anuna mermer onoi, i los pas a taol pa i dot potor pasi onoi. <sup>5</sup> I pek pas a malum ana besen, pa i gos a hana kakak a asaerla anunai, pa i sasengsenge la ana taol ning i dot potor pasi onoi.

<sup>6</sup> I han tetek e Saimon Pita, pa e Pita i dekeni mange, “Leklek, ur gos naur a hak?” <sup>7</sup> E Iesu i kelesi mange, “A utna ne a toli bel u tasmani, ika lamur ur tasmani.” <sup>8</sup> E Pita i atongi mange, “Gong! Gong u gos naur a hak.” E Iesu i kelesi mange, “Ning bel ar gos naur a ham, u bel tagun iau.” <sup>9</sup> E Saimon Pita i kelesi mange, “Leklek, ning ur gos naur a hak, i wakak ning ur gos naur a kuk pa a pukuluk otleng!” <sup>10</sup> E Iesu i kelesi mange, “Esining ka munmun pas, a palaona rop ka toh, dir gos tar kama naur a hana. Mulo, mulo ka toh, ika bel mulo rop.” <sup>11</sup> E Iesu i atongi lerne, “bel mulo rop mulo toh,” anasa ka tasman esaning ir asobori.

<sup>12</sup> Ning ka gos tar na hanla, i suah ulak pas anuna kaen ning i kepsen tari, i kes pa i deken la mange, “Mulo tasman ot a utna ne a toli o mulo?” <sup>13</sup> Mulo atong iau mang ‘Tena Asaer’ pa ‘a Leklek’. I tostos ot anumulo na atatong, a risak ot ning. <sup>14</sup> Iau anumulo a Leklek pa Tena Asaer, ka gos tar a hamulo, i wakak sur mulo otleng mulor gos artalai a hamulola. <sup>15</sup> Ia ka tol tar a toltol ne tetek mulo, i wakak sur mulo otleng mulor toli lerne. <sup>16</sup> A atong momoli ta mulo, a tena titol oros bel i leklek tana nuna ningnigo. Pa esining di sira sune i bel i leklek ta esaning i arsune. <sup>17</sup> Mulo ka tasman a ututnala ne, ning mulor toli, dir angis mulo.

<sup>18</sup> “Bel a warwara o mulo rop, a tasman la ot ning ia ka aslang pas la. Ika dir tolsot pas ot asaning di ka tumus tari ting na Buk Tabu mange, ‘A barsan ning mia hangan taum, ir talingir ulak sur iau, pa ir pas gorgoron iau.’ *Buk Song 41:9* <sup>19</sup> A atai nigon tar mulo ana utna ne ning ir hanot. Pa ning ir hanot, mulor tortorot mang iau a Mesaia. <sup>20</sup> A atong momoli ta mulo, ning



tik ir malmaling pas esining a sune i, i malmaling pas iau. Ning tik ir malmaling pas iau, i malmaling pas esining i sune iau ute.”

*E Iesu i warwara o esaning ir asobori*

(Mt 26:20-25; Mk 14:17-21; Lk 22:21-23)

<sup>21</sup> Ning e Iesu ka atong tari larne, i kilang a tnan mamahat ana inguna, pa i warwara talapor mange, “A atong momoli ta mulo, ning a halimulo ir asobor iau.” <sup>22</sup> A kakak a asaer la ngoson artalai la, ika bel la tasmani mang esi na halinla ning i atong a warwara ne onoi. <sup>23</sup> Ning a kaklik asasaer, ning e Iesu i katnani, i kes milau i. <sup>24</sup> E Saimon Pita i apit kilang pas a kaklik asasaer ning pa i atai i mange, “Ur deken e Iesu mang esi na halindala ning i warwara onoi.” <sup>25</sup> A kaklik asasaer ning, i tan o e Iesu pa i dekeni mange, “Leklek, esining u warwara onoi?” <sup>26</sup> E Iesu i kelesi mange, “Esining ar amurung pas a dia bret ana besen pa ar sarani tana, i ot ning.” Pa i amurung pas a dia bret, pa i sarani ta e Judas Iskariot, a nat e Saimon. <sup>27</sup> Ning e Judas i kibas pas a bret, e Satan i kas kakat ono. E Iesu i atai e Judas mange, “Asa ning u mang sur ur toli, ur tol kapiti.” <sup>28</sup> Ika bel tik ta halinla ning la kes ana utna na hangan i tasman lalan asa kamkamna ning e Iesu i atongi larne tana. <sup>29</sup> E Judas i sira tai alar anunla mani. Pa dingla na kakak a asaer la nuki mang e Iesu i atai i sur ir lou al utna ning la kapan suri ana tnan lotu. Dingla otleng la nuki mang e Iesu i atai i sur ir tabar a kapan a taraila.

<sup>30</sup> Ning e Judas i los pas a dia bret, i purum kakat. Ka morom.

*A tona warkurai*

<sup>31</sup> Ning e Judas ka han, e Iesu i atai la mange, “Onone dir mermer a Nat a Barsan, pa e God otleng

ir kibas a matatar onoi. <sup>32</sup> Ning e God ir kibas a matatar onoi, e God otleng ir saran a matatar tetek a Nat a Barsan. Ono otne e God ir sarani tana.

<sup>33</sup> “A natnatukla, bel ma ar kes kol napirimulo. Mulor tai sur iau. A warwara ia ka atai tar a tarai Juda, ne ar atai mulo otleng mange, ‘A hanua ning ar han suri, bel mulor han lar pas tingia.’ <sup>34</sup> A saran a tona warkurai tetek mulo mange, mulor mang artalai sur mulo. Mulor mang artalai sur mulo larning a mang sur mulo. <sup>35</sup> Ning mulo mang artalai sur mulo, a taraila rop lar tasmani mang mulo anuk na kakak a asaerla.”

*E Iesu i warwara nigo o e Pita ning ir puain seni*

(Mt 26:31-35; Mk 14:27-31; Lk 22:31-34)

<sup>36</sup> E Saimon Pita i dekeni mange, “Leklek, ur han utaha?” E Iesu i kelesi mange, “A hanua ning ar han utingia, onone bel ur han lar pas tingia, ika lamur ur mur iau.” <sup>37</sup> E Pita i dekeni mange, “Leklek, sur asa ning bel ar mur u onone? A sang sur ar saran anuka lalaun sur u.” <sup>38</sup> E Iesu i kelesi mange, “Mangmangasa, momol ot ning ur saran anuma lalaun sur iau? A atong momoli tam, ning a kok belot ir kurkurirakuk, ur puai munatol mang bel u tasman iau.”

## 14

*E Iesu i a ngas*

<sup>1</sup> E Iesu i atai la mange, “Gong mulo nuknuk kol. Mulor tortorot o e God, pa mulor tortorot otleng hok. <sup>2</sup> Ting na rumai ane Tata, a galis a rum. Ning bel, ar atai mulo otleng ono. Ar han sur ar sang tar a pukna sur mulo. <sup>3</sup> Ning ia ka sang tar a pukna sur mulo, ar ulak, pa ar ben pas mulo tetek iau, sur mulo otleng mulor kes ting na hanua ning ar kes ia. <sup>4</sup> Mulo

tasman ot a ngas sur a hanua ning ar han suri.”

<sup>5</sup> E Tomas i atai i mange, “Leklek, bel mila tasman a hanua ning ur han suri, pa milar tasman mang-mangasa a ngas suri?” <sup>6</sup> E Iesu i kelesi mange, “Iau a ngas, pa iau a momolna, pa iau a lalaun. Bel tik ir han tetek e Tata ana ta ngas masak, hok ka. <sup>7</sup> Ning mulo tasman momol iau, mulor tasman e Tata otleng. Pa onone mulo ka tasmani, pa mulo ka oroi.” <sup>8</sup> E Pilip i atai i mange, “Leklek, ur asangan tar e Tamam tetek mila, i ka i ning mila mang suri.” <sup>9</sup> E Iesu i kelesi mange, “Pilip, ia ka kes kol taum o mulo, pa belot u tasman iau? Esining ka oroi iau, ka oroi tar e Tata. Sur asa u atongi mang ar asangan tar e Tata tetek mulo? <sup>10</sup> Bel u tortorot mang iau kaning o e Tata, pa e Tata kane hok? A warwarala ning a atongi ta mulo, bel anuki. E Tata ning kane hok i tol anuna titol. <sup>11</sup> Mulor tortorot hok ning a atongi mang iau kaning e Tata, pa e Tata kane hok. Ning bel mulo tortorot ana nuk a warwara, mulor tortorot ka hok kamkamna ana ututnala ning a toli.

<sup>12</sup> “A atong momoli ta mulo, esining i tortorot hok, ir tol a ututnala larning a sira toli, pa ir tol a tatatnan utna tana ututnala ning ka tol tari, anasa ar han tetek e Tata. <sup>13</sup> Pa ututnala rop ning mulo nunungi ana risak, ar tolsot pasi, sur e Natnalik ir saran a matatar o e Tamana. <sup>14</sup> Ning mulo nunung sur ta utna ana risak, ar tolsot pasi.

*E Iesu i atongi mang ir sune purum a Talngan Tabu*

<sup>15</sup> “Ning mulo mang sur iau, mulor mur anuk na warkuraila. <sup>16</sup> Pa ar nunung e Tata, pa ir sune ning a Tena Arnangai otleng tetek mulo, sur ir kes tikin taum o mulo, <sup>17</sup> a Talngan Tabu na momolna. A taraila tagun a rakrakan hanua

bel la mang suri, anasa bel la oroi lalani pa bel la tasmani. Ika mulo, mulo tasman a Tena Arnangai anasa i kes taum o mulo pa ir kes o mulo. <sup>18</sup> Ning ar han kusun mulo, bel mulor kes na biasui, ar ulak ka tetek mulo.

<sup>19</sup> “Bel ma i bongnani, sur a taraila mite na rakrakan hanua bel lar oroi iau. Ika mulo, mulor oroi iau. Mulor laun anasa a laun. <sup>20</sup> Ana pukakiar ning ar laun ulak kusun a minat, mulor tasmani mang iau kaning o e Tata, pa mulo otleng kane hok, pa iau kaning o mulo. <sup>21</sup> Esining i tong akes anuk na warkuraila pa i muri, i ning i mang sur iau. Pa e Tata ir mang suri, pa iau otleng ar mang suri, pa ar asangan iau tana.”

<sup>22</sup> E Judas (bel e Judas Iskariot) i deken e Iesu mange, “Leklek, sur asa ning ur asangan tar u ta mila ka, pa bel tana taraila ana rakrakan hanua?” <sup>23</sup> E Iesu i kelesi mange, “Ning tik ir mang sur iau, ir longor ana nuk na asasaer. Pa e Tata ir mang suri, pa miar han teteki, pa miar kes taum onoi. <sup>24</sup> Ika esining bel i mang sur iau, bel ir longor ana nuk na asasaer. A warwarala ning mulo longori bel anuki, anun e Tata, ning i sune iau.

<sup>25</sup> “A atong a warwarala ne ta mulo ning kanet a kes napirimulo. <sup>26</sup> A Tena Arnangai, a Talngan Tabu, ning e Tata ir sune i ana risak, ir asaer mulo ana ututnala rop, pa ir anuknuk mulo ana warwarala ning ia ka atai tar mulo ono. <sup>27</sup> A saran a bal molmol tetek mulo, anuka bal molmol ning a tabar mulo ono. Bel a tabar mulo larning a rakrakan hanua i artabar. Gong mulo nuknuk kol, pa gong mulo matmataut.

<sup>28</sup> “Mulo ka longor tar asaning ia ka atong tari mang, ‘Ar han pas pa ar ulak tetek mulo.’ Ning mulo mang sur iau, mulor gas mang ar han tetek e Tata, anasa i leklek tak. <sup>29</sup> Ia ka atai nigon tar mulo ana

ututnala ning lamur ir hanot, pa ning ka hanot, mulor tortorot.

<sup>30</sup> “Bel ma ar awara kol mulo, anasa e Satan, a ningnigo ana rakrakan hanua, milau ir hanot. Belal rakrakaina sur ir tol ta utna hok, <sup>31</sup> ika ar tolsot arop pas a ututnala ning e Tata i sune iau sur ar toli, sur a rakrakan hanua ir tasmani mang a mang sur e Tata.

“Mulor tur pa dalar han.”

## 15

### *E Iesu ot a rakai a wain*

<sup>1</sup> E Iesu i atongi mange, “Tau a rakai a wain momol, pa e Tata a tena tai alar. <sup>2</sup> I ting arop sen a rakrakanala hok ning bel la wai, pa i buri sen la rop ning la wai, sur lar wai kol. <sup>3</sup> Mulo ka toh kamna ana warwara ning ia ka atong tari ta mulo. <sup>4</sup> Mulor patap hok, pa iau ar patap o mulo. Bel mulor wai ning bel mulo patap hok, arlar ana rak a wain, bel ir wai oros ka ning bel i patap ana rakaina.

<sup>5</sup> “Tau ot a rakai a wain, pa mulo a rakrakanala. Esining i patap hok, pa a patap onoi, ir wai kol. Ika ning mulo laun masik kusun iau, bel mulor tolsot pas ta utna. <sup>6</sup> Ning tik bel i patap hok, i arlar ana raka rakai ning di minggen seni pa ir marang. Dir suah taum la, pa dir minggeni ting na iah, sur lar sot rop. <sup>7</sup> Ning mulo patap hok, pa anuka warwara ir laun o mulo, mulor nunung sur ta utna mulo mang suri, pa dir sarani ot ta mulo.

<sup>8</sup> “E Tata ir kibas a matatar ning mulo wai kol, pa a waimulo ir asangani mang mulo anuk na kakak a asaerla. <sup>9</sup> E Tata i mang sur iau, larning iau otleng a mang sur mulo. Mulor laun ana nuk a marmaris. <sup>10</sup> Ning mulo longor ana nuk na warkuraila, mulor laun ana nuk a marmaris, larning a longor ana warkuraila ane Tata, pa a laun ana nuna marmaris.

<sup>11</sup> “A atong a warwarala ne ta mulo, sur anuka gasgas ir kes o mulo, pa anumulo a gasgas ir bukus momol. <sup>12</sup> Anuk a warkurai tetek mulo ne: Mulor mang artalai sur mulo, larning a mang sur mulo. <sup>13</sup> Ning tik i saran anuna lalaun sur ir mat ana halalna, anuna marmaris i itna kol. Belal marmaris anuna tik i arlar ono. <sup>14</sup> Mulo na halalik ning mulo longor ana nuk na warkuraila. <sup>15</sup> Bel a atong ulak mulo mang a tena titol orosla, anasa a tena titol oros bel i tasman a utna ning anuna ningnigo i toli. Ika a atong mulo na halalikla, anasa ia ka atong arop tar a warwarala ta mulo ning a longori ta e Tata. <sup>16</sup> Bel mulo aslang pas iau, iau ot a aslang pas mulo. Pa a saran a titol ta mulo sur mulor han pa mulor wai, pa a waimulo ir kes tikin. Pa e Tata ir tabar mulo ana ututnala rop mulo nunung suri ana risak. <sup>17</sup> Anuk a warkurai ne: Mulor mang artalai sur mulo.

### *A taraila tagun a rakrakan hanua lar nget mulo*

<sup>18</sup> “Ning a taraila tagun a rakrakan hanua lar nget mulo, mulor nuk pasi mang la nget nigon iau. <sup>19</sup> Ning mulo tagun a rakrakan hanua, a rakrakan hanua ir mang sur mulo larning mulo anunai. Ika mulo bel tagun a rakrakan hanua, ia ka aslang pas mulo kusuni. A kamkamna ne, ning i nget mulo. <sup>20</sup> Mulor nuk pas a warwara ning ia ka atong tari ta mulo mange, ‘A tena titol oros bel i leklek tana nuna ningnigo.’ Ning la alaulau iau, lar alaulau mulo otleng. Ning la longor ana nuk na warwara, lar longor otleng ana numulo na warwara. <sup>21</sup> Lar alaulau mulo anasa mulo anuki, anasa bel la tasman esaning i sune iau ute.

<sup>22</sup> “Ngandek ning bel ar hanot pa bel ar warwara tanla, io, bel dir arup la ana nunla na toltol

laulaula, pa lar langolango. Ika onone, belar warwara anunla sur lar alar la onoi kusun anunla na toltol laulau. <sup>23</sup> Esining i nget iau, i nget e Tata otleng. <sup>24</sup> Ia ka tol tar a titolla ning bel tik i tolsot tari. Ngandek ning bel ar tol tar al titol tanla, bel dir arup la ana nunla na toltol laulaula pa lar langolango. Pa ine, la ka oroi tar a titolla a toli, ika la nget mia rop ma e Tata. <sup>25</sup> Di toli larne, sur dir tolsot pas a warwara di ka tumus tari ana Buk na warkurai mange, ‘La nget iau, pa bel ta kamkamna.’ *Buk Song 35:19*

<sup>26</sup> “Ar sune a Tena Arnangai tetek mulo misaot ma e Tata, i a Talngan Tabu na momolna. Ning ir hanot ir warwara talapor hok. <sup>27</sup> Pa mulo otleng mulor warwara talapor hok, anasa mulo kes taum hok ana nuk a kamkama titol tuk onone.

## 16

<sup>1</sup> “A atong a warwarala ne ta mulo sur gong a tortorot anumulo ir punga. <sup>2</sup> Lar sairasa mulo kusun a rumai lotula. Momol, a taem ir hanot lamur, ning a tarai ning lar umkol mulo, lar nuki mang la tol a titol ane God. <sup>3</sup> A tarai lar tol a ututnala ne tetek mulo, anasa bel la tasman miau ma e Tata. <sup>4</sup> A atai tar mulo ana warwarala ne, sur ning a taem ir hanot, mulor tasmani mang ia ka atumarang nigon tar mulo. Ana kamkama nuka titol, bel a atai tar mulo ana warwarala ne, anasa kanet a kes taum o mulo.

### *A titol anuna Talngan Tabu*

<sup>5</sup> “Onone, ar han tetek esaning i sune iau ute. Ika bel tik ta halimulo i deken iau mang, ‘Ur han utaha?’ <sup>6</sup> Mulo bal maris kol anasa a atai mulo ana warwarala ne. <sup>7</sup> A atong momoli ta mulo mang, ir wakak tetek mulo ning

ar han. Ning bel ar han, a Tena Arnangai bel ir hanot tetek mulo. Ika ning ar han, ar sune i ute tetek mulo.

<sup>8</sup> “Ning ir hanot, ir asangan a taraila te na rakrakan hanua ana toltol laulau, pa ana tostosna pa ana warkurai ane God. <sup>9</sup> Ir asangan la ana toltol laulau mang bel la tortorot hok. <sup>10</sup> Pa ir asangan la otleng ana tostosna, anasa ar han tetek e Tata pa bel mulor oroi ulak iau.\* <sup>11</sup> Pa ir asangan la otleng ana warkurai ane God anasa e God ka warkurai tar a ningnigo ana rakrakan hanua.

<sup>12</sup> “A galis a utna ning ar atongi ta mulo, ika onone bel mulor nuk lalani. <sup>13</sup> Ning a Talngan Tabu na momolna ir hanot, ir atalapor mulo ana momolna rop. A warwarala ning ir atongi bel anunai, ir atong ka a warwarala ning i longori, pa ir atai mulo ana ututnala ning ir hanot lamur. <sup>14</sup> Ning ir los pas anuk na warwara pa ir atai mulo onoi, ir saran a matatar tetek iau. <sup>15</sup> A ututnala rop ning ane Tata, anuki. A kamkamna ne, ning a atongi mang a Talngan Tabu ir los pas anuk na warwara pa ir atai mulo onoi.

### *A bal maris pa a gasgas*

<sup>16</sup> “Bel ir bongnani, pa bel mulor oroi iau. Pa bel ir bongnani kale, mulor oroi iau.” <sup>17</sup> Anuna dingla na kakak a asaer la deken artalai la mange, “Esi na kamkamna ana nuna warwara ne, bel ir bongnani pa bel dalar oroi, pa bel ir bongnani kale dalar oroi, pa ning a warwara otleng anunai ne, anasa ir han tetek e Tamana? <sup>18</sup> Esi na kamkamna ana nuna warwara ne ‘bel ir bongnani?’ Bel dala tasman a utna ne i warwara onoi!”

<sup>19</sup> E Iesu i tasmani mang la mang sur lar dekeni, pa i atai la, “A atong tari mange, ‘Bel ir bongnani

\* **16:10:** A tarai la atongi mang e Iesu ir mat anasa i tol a toltol ning bel i tostos. Ika e God i akamtur ulaki kusun a minat pa i ben kas pasi teteki. Ine i asangani mang e Iesu i tol ka a tostosna.

ning bel mulor oroi iau, pa bel ir bongnani kale mulor oroi iau.' A warwara ne ning mulo deken artalai mulo onoi? <sup>20</sup> A atong momoli ta mulo, mulor bal maris pa mulor domos, ika a taraila mite na rakrakan hanua lar gas. Mulor bal maris, ika lamur anumulo a bal maris ir keles sur a gasgas, <sup>21</sup> arlar ana hane ning i milau sur ir agon, i kilang a tnan kankan, ika, ning ka agon sen tar a kaklik, ir duman sen a kankan pa ir gas, anasa ka agon tar a kaklik ute na rakrakan hanua. <sup>22</sup> Mang otleng larning tetek mulo, onone mulo bal maris, ika ar oroi ulak mulo, pa mulor gas. A gasgas ne, bel tik ir kepseni kusun mulo.

<sup>23</sup> "Ana pukakiar ning, bel mulor deken ulak iau ana ta utna. A atong momoli ta mulo, e Tata ir tabar mulo ana ututnala ning mulo nunung suri ana risak. <sup>24</sup> Tuk onone, bel mulo nunung sur ta utna ana risak. Mulor nunung pa dir tabar mulo, sur anumulo a gasgas ir bukus momol.

*E Iesu i tolsot pas a rakrakai ana rakrakan hanua*

<sup>25</sup> "A atong a warwarala ne ta mulo ana warwara larlar, ika a taem ir hanot ning bel ar warwara ulak tetek mulo ana warwara larlar, ar atai talapor mulo o e Tata. <sup>26</sup> Ana pukakiar ning, mulor nunung ana risak. Bel a atongi mang iau ar nunung e Tata sur ir nangan mulo, <sup>27</sup> anasa e Tata ot i mang sur mulo. I mang sur mulo anasa mulo mang sur iau, pa mulo tortorot mang a hanot miting ta e God. <sup>28</sup> Ia ka han pas miting ta e Tata, pa a han ute na rakrakan hanua. Pa ne, ar han ma kusun a rakrakan hanua, ar ulak tetek e Tata."

<sup>29</sup> Anuna kakak a asaer la atai i mange, "Onone bel u warwara ana warwara larlar, u bot warwara talapor. <sup>30</sup> Onone mila ka tasmani

mang u tasman a ututnala rop. Bel u kapan sur tik ir deken u anal deke, anasa u ka tasman arop tar a nuknukimila. Ne mila bot tortorot mang u han miting ta e God." <sup>31</sup> E Iesu i atai la mange, "Mulo bot tortorot? <sup>32</sup> A taem ir hanot, pa ka hanot, sur dir asarara mulo kusun iau, pa mulor han sur anumulo na hanhanuala, pa iau kama ar kes. Ika bel iau ka ar kes, miau ot ma e Tata.

<sup>33</sup> "A atong a warwarala ne ta mulo sur mulor laun hok pa bal molmol ir kes o mulo. Te ana rakrakan hanua, mulor kilang a mamahat. Ika gong mulo matmataut, anasa ia ka tolsot pas a rakrakai ana rakrakan hanua."

## 17

*E Iesu i nunung sur anuna kakak a asaerla*

<sup>1</sup> Ning e Iesu ka atong arop tar a warwarala ne, i tai usaot na langit, pa i atongi mange, "Tata, a taem ka hanot, ur saran a matatar tetek e Natumlik, sur e Natumlik ir saran a matatar tetek u. <sup>2</sup> U saran tar a warkurai tak sur a taraila rop lar kes nahaik, sur ar saran a lalaun tikin tanla rop ning u saran tar la tak. <sup>3</sup> A lalaun tikin i manglarne: A tarai lar tasman u, ning u ka e God momol, pa lar tasman otleng e Iesu Karisito, ning u sune i ute. <sup>4</sup> Ia ka asangan tar a matatarim te na rakrakan hanua, ana titolla ning u sune iau ono pa ia ka tol arop tari. <sup>5</sup> Tata, onone, ning ar kes taum ulak hom, ur saran a matatar tak. A matatar ning nating kane hok pa kaning hom, ning belot di akes a rakrakan hanua.

<sup>6</sup> "La ning u ka aslang pas la kusun a rakrakan hanua, pa u saran tar la tak, ia ka atalapor tar u tetek la. La anumi pa u saran tar la tak, pa la ka mur anum na warwarala. <sup>7</sup> Onone la ka tasmani mang a ututnala rop u saran tari tak, i hanot tagun u. <sup>8</sup> Ia ka atai tar

la ana warwarala ning u saran tari tak, pa la ka kibasi. Pa la tasman momoli mang a hanot tagun u, pa la ka tortorot mang u sune iau ute.

<sup>9</sup>“A nunung sur la. Bel a nunung sur a taraila tagun a rakrakan hanua, ika a nunung sur la ning u saran tar la tak, anasa la anumi. <sup>10</sup>La ning anuki, anumi, pa la ning anumi, anuki. Pa a kibas a matatar onla. <sup>11</sup>Onone ar han tetek u, bel ma ar kes te na rakrakan hanua, ika la, kanet na rakrakan hanua. Tata u ka masik, ur tai alar la ana rakrakai a risam, a risam ning u sarani tak. Ur tai alar la sur lar takai ka, larning u pa iau, dau takai ka. <sup>12</sup>Ning a kes taum onla, a tai alar la ana rakrakai a risam, ning u saran tari tak, pa bel tik ta halinla i hirua. Takai sot ka ir hirua, esaning ir han sur a hinirua tikin. Manglarning, a warwara ning di ka tumus tari ting na Buk Tabu ir hanot momol.

<sup>13</sup>“Onone ar han tetek u, ika a atong a warwarala ne ning kanet a kes te na rakrakan hanua, sur anuka tnan gasgas ir bukus ting na nunla lalaun. <sup>14</sup>Ia ka atong tar anuma warwarala tanla, pa a rakrakan hanua i nget la, anasa bel la mite na rakrakan hanua, larning iau otleng, bel iau mite na rakrakan hanua. <sup>15</sup>Bel a nunung u sur ur kepsen la kusun a rakrakan hanua. Ika a nunung u sur ur tai alar la kusun a Tena Laulau. <sup>16</sup>Bel la mite na rakrakan hanua, larning iau otleng, bel iau mite na rakrakan hanua. <sup>17</sup>Anum a warwara i momol. Ur atotoh la ana num a momolna sur la anumi. <sup>18</sup>A sune la uting na rakrakan hanua larning u sune iau otleng ute na rakrakan hanua. <sup>19</sup>A saran tar iau tam, sur la otleng anuma tarai momol, ana num a momolna.

<sup>20</sup>“Bel a nunung ka sur la. A nunung otleng sur la ning lamur lar tortorot hok, anasa ana warwara talapor anuna tena tortorotla. <sup>21</sup>Tata, a nunung mang

la rop ning la tortorot hok, lar takai ka, larning u kane hok pa iau kaning hom. I wakak sur la kane on dau, sur a taraila te na rakrakan hanua lar tortorot mang u sune iau. <sup>22</sup>A saran tar a matatar tanla, a matatar ning u saran tari tak, sur lar takai ka, larning dau takai ka. <sup>23</sup>Iau kaning onla, pa u kane hok, sur lar takai kama, sur a taraila te na rakrakan hanua lar tasmani mang u sune iau ute, pa u mang sur la larning u mang sur iau.

<sup>24</sup>“Tata, la ning u ka saran tar la tak, a mang sur lar kes taum hok ting na hanua ning ar kes ia, sur lar oroi anuka matatar, ning u saran tari tak, anasa u mang sur iau nating ot ning belot di akes a rakrakan hanua. <sup>25</sup>Tata, u tostos, a taraila te na rakrakan hanua bel la tasman u, ika iau, a tasman u, pa anuk na tarai a asasaer la tasmani mang u sune iau ute. <sup>26</sup>Ia ka atalapor tar u tetek la, pa bel ar manah ana warwara tetek la, sur lar tasman u, pa marmaris ning u mang sur iau onoi, ir kes onla pa iau otleng kaning onla.”

## 18

*E Judas i ben a tarai a harum tetek e Iesu*

(Mt 26:47-56; Mk 14:43-50; Lk 22:47-53)

<sup>1</sup>Ning e Iesu ka nunung pas, i ben pas anuna kakak a asaerla, pa la lakai a natar a malum Kidron. Ting na ning a ris a malum, a barim na rakai oliw kaning ia, pa la han kas tingia. <sup>2</sup>E Judas, ning ir tuam tar e Iesu, i tasman a pukna ning, anasa a galis a pukakiar e Iesu taum ana nuna kakak a asaer la sira han taum tingia. <sup>3</sup>Pa e Judas i nigon pas a tena harumla anuna tarai Rom, taum ana tena tai alarla tagun a rumai a artabar. A leklek a tena artabarla pa a Parisaiola la sune la. La los a ututnala na harum, a lamla pa a ututnala

ning i sot sur lar sulu talapor la ono. Pa la hanot ting na barim.

<sup>4</sup> Ika e Iesu ka tasman a utunala rop ning ir hanot teteki, pa i han tetek la, pa i deken la mange, “Esining mulo tai suri?” <sup>5</sup> La kelesi mange, “E Iesu a te Nasaret.” E Iesu i atongi mange, “Iau ka ne.” Pa e Judas, ning ir tuam e Iesu, kaning ot i tur taum onla. <sup>6</sup> Ning e Iesu i atai la mange, “Iau ka ne,” la suai utumo lamur, pa la punga ting lapiu. <sup>7</sup> E Iesu i deken ulak la mange, “Esining mulo tai suri?” La kelesi mange, “E Iesu a te Nasaret.” <sup>8</sup> E Iesu i keles la mange, “Ia ka atai tar mulo mang, iau ka ne. Ning mulo tai ot sur iau, io, mulor noren sen a kakak a asaerla ne lar han.” <sup>9</sup> E Iesu i atongi larné sur dir tolsot pas a warwara ning ka atong tari mange, “Tata, la rop ning u saran tar la tak, bel tik ta halinla i hirua.”

<sup>10</sup> E Saimon Pita i los ot anuna liwan na harum. I lasur pasi pa i umsem ana sot a talngana e Malkus, ning a tena titol oros anuna ningnigo na tena artabar tetek e God. <sup>11</sup> E Iesu i atai e Pita mange, “Akas ulak anuma liwan ting na ngasna. Mangasa, bel ar gang ana kap a mamahat ning e Tata i saran tari tak?”

#### *La ben e Iesu tetek e Anas*

<sup>12</sup> A tena harumla mitimo e Rom taum ana nunla ningnigo, pa a tena tai alarla tagun a rumai a artabar anuna tarai Juda, la tong akes pas e Iesu, pa la dot akes naur a kuna. <sup>13</sup> Pa la ben nigoni tetek e Anas, ning dia anmuna ma e Kaiapas, a ningnigo na tena artabar tetek e God ana rau ning.\* <sup>14</sup> E Kaiapas, i ning i atai a Judala mang i wakak sur tik ir mat alar a taraila rop.

#### *A ningnigo na puai ane Pita*

(Mt 26:69-70; Mk 14:66-68; Lk 22:55-57)

<sup>15</sup> E Saimon Pita pa ning a kaklik asasaer otleng dia han namur e Iesu. Pa a ningnigo na tena artabar i tasman a kaklik asasaer, ning dia han taum ma e Pita. A kaklik asasaer ning i han taum o e Iesu uting ui ana pukna anuna ningnigo ning. <sup>16</sup> Ika e Pita i hannanai tumolapiu ana taman. Pa a kaklik asasaer ning a ningnigo i tasmani, i ulak, pa i warwara tetek a basbas ning i tai alar a taman, sur ir sapang pas e Pita. <sup>17</sup> A basbas ning i deken e Pita mange, “U otleng tagun a kakak a asaerla anuna barsan ne, gepi?” E Pita i kelesi mange, “Iau bel.”

<sup>18</sup> A morom ning i kotkoto kol. Pa a tena titol orosla taum ana tena tai alarla tagun a rumai a artabar, la sur taum a barangla, la tur talilis pasi pa la marmarim. E Pita otleng i tur taum onla pa i marmarim.

#### *E Iesu i tur namatana e Anas*

(Mt 26:59-66; Mk 14:55-64; Lk 22:66-71)

<sup>19</sup> E Anas, a ningnigo na tena artabar tetek e God i deken e Iesu ana nuna kakak a asaerla, pa ana asasaerla ning i asaer a taraila onoi. <sup>20</sup> E Iesu i kelesi mange, “Ia ka warwara talapor namatana taraila rop, pa a sira asaer la ting na rumai lotula pa ting na rumai a artabar ning a tarai Juda la sira han taum tingia. Bel a atong kunnan tar ta utna. <sup>21</sup> Gong u deken iau. Ur deken a taraila ning la sira longor iau. La tasman a utunala ning a atong tari.”

<sup>22</sup> Ning e Iesu i atongi larning, takai tagun a tena tai alarla i pasar a patarna, pa i atai i mange, “Sur asa ning u keles a warwara anuna ningnigo na tena artabar larning?” <sup>23</sup> E Iesu i kelesi mange, “Ning ia ka atong tar ta utna i rongor, ur atong talapori tetek a

\* **18:13:** E Anas pa e Kaiapas, dia rop di atong diau mang a ningnigo na tena artabar tetek e God.

taraila rop ne. Ika ning a atong a momolna, sur asa u pasar iau?"  
 24 E Anas i sune seni tetek e Kaiapas, ning a ningnigo otleng na tena artabar tetek e God. Ika bel di paksen naur a kuna.

*E Pita i puai ulak sen e Iesu*

(Mt 26:71-75; Mk 14:69-72; Lk 22:58-62)

25 Ning e Pita kaning ot i marmarim, la dekeni mange, "U otleng tagun anuna kakak a asaerla, gepi?" E Pita i puai mange, "Iau bel." 26 Ning a tena titol oros anuna ningnigo na tena artabar, a maina esaning e Pita i unsem a talngana, i atongi mange, "Ngandek u ka, anasa a oroi taum tar mu ma e Iesu saot ana barim na rakai oliw?" 27 E Pita i puai ulak mange, "Belal." Ana mais a kamis ot ning, a kok i kurkurirakuk.

*E Iesu i tur namatana e Pailat*

(Mt 27:1-2, 11-14; Mk 15:1-5; Lk 23:1-5)

28 Ana kobot ning ot, di ben pas e Iesu kusun a rumai ane Kaiapas sur a tnan rumai ane Pailat, ning a ningnigo ana matanitu Rom. A Judala bel la mang sur lar kas ana nuna rumai, anasa la ka atohtoh pas la sur lar hangan ana utna na hangan na Han Lakai. Pa esining ir kas tetek tik, ning bel a te Juda, ir dur namatana e God. 29 E Pailat i purum tetek la pa i deken la mange, "Mulo arup a barsan ne onasa?" 30 Pa la kelesi mange, "A barsan ne, ning bel ir tol ta rongo, bel milar sarani tam sur ur warkurai i." 31 E Pailat i atai la mange, "Mulor ben pasi, pa mulo ot mulor warkurai i ana numulo na warkurai." A tarai Juda la atai i mange, "Ana warkurai i tabu sur milar umkol tik." 32 A utna ne i hanot sur dir tolsot pas a warwara ane Iesu, ning ka atong nigon tari ana nuna ngas a minat.

33 Lamur e Pailat i kas ulak, i kabah pas e Iesu, pa i dekeni mange, "U a king anuna tarai

Juda?" 34 E Iesu i kelesi ka ana kabah mange, "Mangasa, u ot u atong iau larning, o la atai u ka hok?" 35 E Pailat i keles e Iesu mange, "Bel iau a te Juda. Anum a taraila pa a leklek a tena artabarla tetek e God, la ot ning la saran tar u tetek iau sur ar warkurai u. Asa ning u ka tol tari?" 36 E Iesu i kelesi mange, "Anuk a matanitu bel mite na rakrakan hanua. Ngandek ning anuka matanitu mite na rakrakan hanua, anuk na tena titolla lar harum alar iau kusun a warkurai anuna tarai Juda. Ika anuka matanitu bel mite."

37 E Pailat i dekeni mange, "I momol ot, u a king?" E Iesu i kelesi mange, "I momol ot ning u atongi mang iau a king. Di agon iau, pa a hanot te na rakrakan hanua, sur ar warwara talapor ana momolna. La rop ning la mur a momolna, la longor a elngek." 38 Pa e Pailat i dekeni mange, "Asa ning a momolna?"

*Di malmaling sur dir sai ahat e Iesu saot na rakai kutus*

(Mt 27:15-31; Mk 15:6-20; Lk 23:13-25)

Ning e Pailat i deken tari larne, i purum ulak tetek a tarai Juda. I atai la mange, "Bel a pastetek anuna ta rongo. 39 Ika, ning a toltol a sira toli tetek mulo, ana raula rop ana lotu na Han Lakai, a sira paksen ning a barsan ning i dodot, tetek mulo. Mangasa, mulo mang sur ar paksen a 'king anuna tarai Juda' tetek mulo?" 40 La kukuk kelesi mange, "Gong! Gong e Iesu. Paksen e Barabas!" E Barabas i a tnan tena laulau.

## 19

1 E Pailat i arsune sur lar ben masik pas e Iesu pa lar mirasi ana inau a harum. 2 A tarai a harum la gonoi pas a inau ning a suksukna pa la suah i ana pukulna lar a kukuh a king, pa la apipisi



ana kubar a kaen.\* <sup>3</sup> La ululak teteki, pa la atai i mange, “U a king anuna tarai Juda!” Pa la paspasar a patarna.

<sup>4</sup> E Pailat i purum ulak pa i atai la mange, “Mulo oroi, a ben purum tari namatamulo, sur mulor tasmani mang, bel a pastek anuna ta rongo.” <sup>5</sup> Ning e Iesu i purum, di ka suah tar a suksuk a inau ana pukulna, pa di ka apipis tari ana kubar a kaen. E Pailat i atai la mange, “Mulo oroi a barsan ne!” <sup>6</sup> Ning a leklek a tena artabarla tetek e God, pa a tena tai alarla tagun a rumai a artabar la oroi e Iesu, la kukuk mange, “Sai ahati saot na rakai kutus! Sai ahati saot na rakai kutus!” E Pailat i atai ulak la mange, “Mulor ben pasi, sur mulo ot mulor sai ahati saot na rakai kutus. Ika iau, bel a pastetek anuna ta rongo.” <sup>7</sup> A tarai Juda la kelesi mange, “Anumila warkurai i mange, dir umkoli, anasa i iaunani mang i a Nat e God.”

<sup>8</sup> Ning e Pailat i longor a warwara ne, i matmataut kol. <sup>9</sup> I kas ulak utisai, pa i deken e Iesu mange, “U mitaha?” Ika e Iesu bel i kelesi. <sup>10</sup> E Pailat i atai i mange, “Mangasa, bel u mang sur ur keles iau? Bel u tasmani mang a tong akes a warkurai sur ar alangolango sen u, o ar sai ahahat u saot na rakai kutus?” <sup>11</sup> E Iesu i kelesi mange, “U tolsot sur ur warkurai iau, anasa e God i saran tar a rakrakai tam. Ika esining i saran tar iau tetek u sur ur warkurai iau, anuna toltol laulau i laulau kol ana num a toltol laulau.”

<sup>12</sup> Ning e Iesu i atong tari larning, e Pailat i toho i sur ir alangolango seni. Ika a tarai Juda la kukuk mange, “Ning ur pakseni, bel mur bal taum ma e Sisar! Anasa tik ning i iaunani mang i a king, i kutus a warkurai ane Sisar.”† <sup>13</sup> Ning e Pailat i longor a

warwarala ne, i ben purum pas e Iesu utumo lapiu. Lamur e Pailat i kes ana keskes na warkurai ana pukna di atongi ana warwara Hibru mang Gabata, a kamkamna mang di suah alar a kabalapiu ana hatatla. <sup>14</sup> Ning a mais a kamis tostos, e Pailat i atai a tarai Juda mange, “Mulo oroi, anumulo a king ma ne.” A utna ne i hanot nigo ana pukakiar na lotu na Han Lakai. <sup>15</sup> A tarai Juda la kukuk mang, “Sai koli! Sai koli! Sai ahati saot na rakai kutus!” E Pailat i deken la mange, “Mulo mang sur ar sai ahahat anumulo a king saot na rakai kutus?” A leklek a tena artabarla tetek e God la kelesi mange, “E Sisar sot ka anumila king!” <sup>16</sup> Pa e Pailat i saran tar e Iesu tetek a tarai a harum, sur lar sai ahati saot na rakai kutus. Pa la ben pas e Iesu.

*Di sai ahahat e Iesu saot na rakai kutus*

*(Mt 27:32-44; Mk 15:21-32; Lk 23:26-43)*

<sup>17</sup> E Iesu i pamar pas anuna rakai kutus pa i han sur a pukna di atongi mang, “Lasa na Pukulna,” ning ana warwara Hibru di atongi mang Golgota. <sup>18</sup> Tingia, la sai ahahat saot na rakai kutus. La sai ahahat tar otleng naur a barsan taum onoi, ana naur a risna, pa e Iesu i kulam na arpotor in diau.

<sup>19</sup> Pa e Pailat i tumus a warwara sur dir sai ahahat saot na rakai kutus, mange:

**E IESU A TE NASARET, A KING ANUNA TARAI JUDALA.**

<sup>20</sup> A galis a tarai Juda la was a warwara ne, anasa a pukna ning di sai ahahat e Iesu ono, i milau ka e Jerusalem, pa di tumus a warwara ne ana natola ngas a warwara, a warwara Hibru, Latin pa Grik. <sup>21</sup> A leklek a tena artabarla tetek e God la atai e Pailat mange, “Gong u tumusi mang, ‘a King anuna tarai

\* **19:2:** A ngas a kukuh ning, pa a kubar a kaen dia arlar ana mermer ana king. † **19:12:** E Sisar i a king anuna matanitu Rom, e Pailat i titol ka nahai e Sisar.

Juda.' Ur tumusi ka mang, 'A barsan ne i iaunani mang i a king anuna tarai Juda.' ”<sup>22</sup> E Pailat i keles la mange, “A warwara ning ia ka tumus tari, ir mang ot larning.”

<sup>23</sup> Ning a tarai a harum la ka sai ahat tar e Iesu saot na rakai kutus, la los pas anuna na kaenla ning i polpol alar anuna mermer onoi, pa la asauran pasi ana diat a tinibo, ning a tena harum, anuna ning a tinibo. La los pas otleng anuna kaen ning i pipisi. A kaen ning bel ta sunusuk onoi, a kidol a kaen ka. <sup>24</sup> A tarai a harum la awara artalai la mange, “Gong dala siliri, dalar pilai laki, sur esi na halindala ir losi.” La toli manglarning sur dir tolsot pas a warwara ting na Buk Tabu. I atongi mange,

“La asauran anuka kaenla onla, pa la pilai laki suri.” *Buk Song 22:18*

A ututnala ne, ning a tarai a harum la toli.

<sup>25</sup> Tana e Iesu i tur milau a rakai kutus ane Iesu, taum o e tasna hane, pa e Maria otleng a hane anune Kilopas, pa e Maria Magdalen. <sup>26</sup> Ning e Iesu i oroi e tana tingia, dia tur taum ana kaklik asasaer ning e Iesu i katnani, i atai e tana mange, “Nana, i ning a natumlik.” <sup>27</sup> I atai a kaklik asasaer otleng mange, “I ning etnam.” Turpasi ot ana pukakiar ning, a kaklik asasaer ning, i ben pas etana e Iesu, sur ir kes ana nuna rumai.

*E Iesu i mat*  
(*Mt 27:45-56; Mk 15:33-41; Lk 23:44-49*)

<sup>28</sup> E Iesu i tasmani mang ka tol arop tar a titolla, pa i atongi mange, “A mos.” I atongi larning, sur ir tolsot pas a warwara ning di ka tumus tari ting na Buk Tabu. <sup>29</sup> Ning a koto na nginngin a wain kaning ia. La los pas ning a utna i sira dop akes a malum, pa la amurungi ting na koto na wain.

La suah pasi ana rakai, di atongi mang a hisop, pa la tuslani usaot sur a pahana e Iesu. <sup>30</sup> Ning e Iesu ka dop pas a wain, i atongi mang, “Ka rop.” I lugun purum a pukulna, pa i suah sen a malwasna.

*Di so a kabarangragai e Iesu*

<sup>31</sup> A tarai Juda la nunung e Pailat sur ir malmaling sur dir kuben a handitol, sur ditol ar mat kapit, pa dir los purum a palaonditol kusun natola rakai kutus, anasa a pukakiar ning, a pukakiar nigo tana tnan Pukakiar Sabat, pa bel la mang sur a palaonditol ir kulam saot na rakai kutus ana Pukakiar Sabat. <sup>32</sup> Pa a tarai a harum la han pa la kuben naur a hana a ningnigo na barsan, pa lamur ning halindiau kale, ning di sai ahat diau taum o e Iesu ana natola rakai kutus. <sup>33</sup> Ika ning la han tetek e Iesu, la oroi mang ka mat, pa bel ma la kuben naur a hana. <sup>34</sup> Ning a tena harum i so a kabarangragaina ana turai, a suluk taum ana malum i tapek purum kakat kusuni.

<sup>35</sup> A kaklik asasaer ning i oroi a ututnala ne, i warwara talapor onoi sur mulo otleng mulor tortorot. A warwara talapor ne i momol, pa i ot i tasmani mang i momol. <sup>36</sup> Di tol a ututnala ne, sur dir tolsot pas a warwara, ning di ka tumus tari ting na Buk Tabu mange, “Bel dir kuben ta surna.” *Buk Song 34:20*

<sup>37</sup> Di tolsot pas otleng a warwara na Buk Tabu mange, “Lar ngoson esining la so tari.” *Sekaraia 12:10*

*Di aborbor a minat e Iesu tingui na kulam a minat*  
(*Mt 27:57-61; Mk 15:42-47; Lk 23:50-56*)

<sup>38</sup> Lamur, e Josep a te Arimatia i nunung e Pailat sur a minat e Iesu. I otleng, a kaklik asasaer ning i murmur kumnan e Iesu, anasa i matatan a Judala. Pa e Pailat i

malmaling sur ir han pa ir pak purum pas a minat e Iesu. <sup>39</sup> E Nikadimos, ning lanigo i han tetek e Iesu ana ning a minat, i otleng i hanot. I los ning a tomtoboh, ning di toli ana alo pa mira. A mamahat onoi, i arlar ana natola bonot a kilogrem. <sup>40</sup> Dia los pas a minat e Iesu, dia irisi ana wakak a kaenla taum ana tomtoboh, i arlar ana toltol anuna tarai Juda, ning la sira toli ana minatla.

<sup>41</sup> Ning a barim kaning milau a pukna ning di sai ahat e Iesu saot na rakai kutus ono, pa ning a tona kulam a minat kaning ia, ning belot di aborbor ta minat onoi. <sup>42</sup> Pa la aborbor e Iesu tingui na kulam a minat ning, anasa i milau ka. La toli larning, anasa a pukakiar ning a tarai Juda la sang sur a Pukakiar Sabat.

## 20

*A wah a kulam a minat ane Iesu*  
(Mt 28:1-8; Mk 16:1-8; Lk 24:1-12)

<sup>1</sup> Ana kobot ning ot ana ningnigo na pukakiar ana wik, kaning ot i mormorom, e Maria Magdalen i hanot ting na kulam a minat. I oroi mang di ka lakir sen a tnan hat kusun a taman a kulam a minat. <sup>2</sup> I dun tetek e Saimon Pita pa a kaklik asasaer ning e Iesu i katnani, pa i atai diau mange, “Di ka kepsen pas a Leklek kusun a kulam a minat, pa bel mila tasmani mang di aborbori taha.”

<sup>3</sup> E Pita pa a kaklik a asaer ning, dia han sur a kulam a minat. <sup>4</sup> Dia rop dia dun, ika ning a halindiau i dun ot nigo ta e Pita uting na kulam a minat. <sup>5</sup> I roh purum, pa i sidok pa i oroi a kaenla kaning ia, ika bel i kas. <sup>6</sup> Ning e Saimon Pita i hanot murmur tana, i kas uting na kulam a minat, pa i oroi a kaenla kama kaning la borbor tar. <sup>7</sup> Ika a kaen ning di iris tar a pukul e Iesu ono, bel i kes taum on dingla na kaen, di ka in tari pa

di suah masik tari. <sup>8</sup> Pa a kaklik asasaer ning i nigo ot tar uting na kulam a minat, i otleng i kas. I oroi pa i tortorot. <sup>9</sup> Belot dia talapor ana warwara na Buk Tabu mang e Iesu ir kamtur ulak kusun a minat. <sup>10</sup> Pa naur a kaklik asasaer dia ulak sur a hanua.

*E Iesu i hanot tetek e Maria Magdalen*

(Mt 28:9-10; Mk 16:9-11)

<sup>11</sup> E Maria Magdalen i tur tumolapiu ana kulam a minat pa i domos. Ning kaning ot i domos, i roh purum pa i sidok uting na kulam a minat. <sup>12</sup> I oroi pas naur a angelo kaning ia, dia mermer ana kokok a kaenla, pa dia kes ting na pukna ning di aborbor tar a minat e Iesu ono. Ning i kes ting na ululnge, pa ning a halindiau i kes ting na kamkama. <sup>13</sup> Dia dekeni mange, “Wan, u domos sur asa?” I keles diau mange, “La ka los masik pas anuka Leklek, pa bel a tasmani mang di aborbori taha.”

<sup>14</sup> Ning i gilam, i oroi e Iesu kaning i tur tingia, ika bel i oroi lalani mang e Iesu ot ning. <sup>15</sup> E Iesu i dekeni mange, “Wan, u domos sur asa? U tai sur esi?” E Maria i nuki mang a barsan ning i a tena tai alar ana barim, pa i atai i mange, “Lak, ning u los masik pas a minat e Iesu, ur atai iau mang u aborbori taha, sur ar han pa ar los pasi.” <sup>16</sup> E Iesu i kabahi mange, “Maria!” E Maria i gilam teteki pa i kabahi ana warwara Hibru mange, “Raboni!” a kamkamna mang a Tena Asaer.

<sup>17</sup> E Iesu i atai i mange, “Gong u tong a palaok, anasa belot a han kas usaot tetek e Tata. Ika ur han tetek na tastasikla, pa ur atai la mang, ar han usaot tetek e Tata pa e Tamamulo, tetek anuka God pa anumulo a God.” <sup>18</sup> E Maria Magdalen i han pa i atai a kakak a asaerla mange, “Ia ka oroi tar a Leklek.” Pa i atai la otleng ana

warwarala ning e Iesu i atai tari ono.

*E Iesu i turot tetek anuna kakak a asaerla*

(Mt 28:16-20; Mk 16:14-18; Lk 24:36-49)

<sup>19</sup> A rahmorom, ana ningnigo na pukakiar ana wik, a kakak a asaer la kes taum, pa la tagar alar la tingui narumai, anasa la matatan a Judala. Pa e Iesu i turot na arpotor inla, pa i atai la mange, "A bal molmol tetek mulo."

<sup>20</sup> Ning i atong tari larne, i asangan naur a kuna pa a kabarangragaina tanla. A kakak a asaerla, la gas kol ning la oroi a Leklek. <sup>21</sup> E Iesu i atong ulaki tanla mange, "A bal molmol tetek mulo. E Tata i sune iau, mang otleng larning ar sune mulo." <sup>22</sup> Ning ka atong tar a warwara ne, i wus a wuwu na pahana onla, pa i atai la mange, "A Talngan Tabu ne, mulor kibasi ting na lalaun anumuloi. <sup>23</sup> Ning mulor nuk duman sen a toltol laulaula anuna tik, e God otleng ir kepsen seni kusuni. Ning bel mulor nuk duman sen a toltol laulau anuna tik, e God otleng bel ir kepsen seni kusuni."

*E Iesu taum o e Tomas*

<sup>24</sup> E Tomas, ning di atongi otleng mang a Kasang, i ning a halin a bonot pa pisir naur a kakak a asaerla, bel i kes taum onla ning e Iesu i turot tetek la. <sup>25</sup> A kakak a asaer la atai i mange, "Mila ka oroi tar a Leklek!" Ika e Tomas i atai la mange, "Ning bel ar oroi tar a ngena barbar ana naur a kuna pa bel ar subaran tar a pitlai kuk onoi, pa bel ar subaran a kuk ting na kabarangragaina, bel ar tortorot."

<sup>26</sup> Ning a wik alari, a kakak a asaer la kes taum ulak ting narumai, la taum o e Tomas. La tagar alar pas la. Ika e Iesu i turot na arpotor inla, pa i atai la mange, "A bal molmol tetek mulo!" <sup>27</sup> Lamur i atai e Tomas mange, "Subaran

a pitlai kum ute, pa ur oroi naur a kuk. Atostos a kum ute, pa ur subarani ana kabarangragaik. Pa gong ma u urmatana nuknuk, ur tortorot ka." <sup>28</sup> E Tomas i atai i mange, "Nuk a Leklek pa nuk a God!" <sup>29</sup> E Iesu i atai i mange, "U bot tortorot anasa u oroi iau. La ning bel la oroi iau pa la tortorot, la angis."

*A kamkamna ning di tumus a buk ne*

<sup>30</sup> E Iesu i tol a galis a akinalang otleng namatana anuna kakak a asaerla, ning bel di tumusi ana buk ne. <sup>31</sup> Ika di tumus pas ka a ututnala ne, sur mulor tortorot mang e Iesu i a Karisito, a Nat e God. Pa ning mulor tortorot onoi, mulor kibas ot a lalaun ana risana.

## 21

*E Iesu i turot tetek mais a kakak a asaerla*

<sup>1</sup> Lamur e Iesu i turot ulak tetek anuna kakak a asaerla tumo na hang a puka tasi Tiberias. A utna ne i hanot larne: <sup>2</sup> E Saimon Pita pa e Tomas, di atongi otleng mang a Kasang, pa e Natanael a te Kana miting na papar Galili, pa naur a nat e Sebedi, pa ning naur otleng tagun a kakak a asaerla, la kes taum. <sup>3</sup> Pa e Saimon Pita i atai la mange, "Ar han, ar migei uben." La kelesi mange, "Dala taum." La kas ana mon pa la han. Ika ana morom ning, bel la dat pas ta sis.

<sup>4</sup> Ana kobot ning ot, e Iesu i tur tumo korot latasi, ika a kakak a asaerla bel la oroi lalani mang e Iesu. <sup>5</sup> Pa e Iesu i deken la mange, "Kakakla, mulo dat pas ot al sis?" La puai mang, "Belal." <sup>6</sup> E Iesu i atai la mange, "Mulor minggen a uben ana ris a sot a kumulo, sur mulor dat pas al sis." Pa la minggeni larning i atai la. Pa la datdat panan a uben, anasa ka bukus ana sista. <sup>7</sup> A kaklik asasaer ning e Iesu i katnani, i atai e Pita mange, "A Leklek ot numo!" Ning

e Saimon Pita i longori mang a Leklek, i pipis ulak pas a kaen ning i paksen tari, pa i sirok uting latasi.

<sup>8</sup> A kakak a asaer la mur ana mon utumo latasi. Pa la dat purum a uben ning i bukus ana sisle, anasa bel la kes bakbak kusun a hang, i arlar ka ona takai a mar a param.

<sup>9</sup> Ning la sot ana mon, la oroi a barang a iah taum ana sisle kaning onoi, pa la oroi otleng a bretla.

<sup>10</sup> E Iesu i atai la mange, "Mulor los al sis ute miting na sisle ning nokane mulo uben pasi." <sup>11</sup> Pa e Pita i kas ana mon, pa i dat purum a uben utumo latasi. I bukus ana tatatnan sis, a wawas onla i arlar ana takai a mar dilima na bonot pa pisir natol. La galis kol, ika a uben bel i taksilir.

<sup>12</sup> E Iesu i atai la mange, "Mulo han ute pa mulor hangan." Bel tik tagun anuna kakak a asaerla i tolsot sur ir dekeni mang, "U esi?" La ka tasmani mang a Leklek ot ning.

<sup>13</sup> E Iesu i los pas a bret pa i tabar la ono, pa lamur i tabar la kale ana sis.

<sup>14</sup> Ka munatol na tuntunurot ne ane Iesu tetek anuna kakak a asaerla lamur ana kamkamtur anunai kusun a minat.

#### *E Iesu i wunan e Pita*

<sup>15</sup> Ning la ka hangan pas, e Iesu i deken e Saimon Pita mange, "Saimon, nat e Jon, u mang kol sur iau tanla ne?" I kelesi mange, "Momol, Leklek, u tasmani mang a mang sur u." E Iesu i atai i mange, "Ur tabar anuk na tona sipsipla."

<sup>16</sup> E Iesu i deken ulaki mange, "Saimon, nat e Jon, u mang kol sur iau?" I kelesi mange, "Momol, Leklek, u tasmani mang a mang sur u." E Iesu i atai i mange, "Ur tai alar anuk na sipsipla."

<sup>17</sup> Munatol onoi e Iesu i dekeni mange, "Saimon, nat e Jon, u mang sur iau?" E Pita i nuklingiri, anasa e Iesu ka dekeni munatol mang, "U mang sur iau?" I atai i mange, "Leklek, u tasman a ututnala rop.

U tasmani mang a mang sur u." E Iesu i atai i mange, "Ur tabar anuk na sipsipla.

<sup>18</sup> "A atong momoli tam, ning u barman, u ot u amermer pas u, pa u han ana pukna ning u mang sur ur han ia. Ika ning u ka bun, ur atostos naur a kum, pa tik masuk ot ir amermer u, pa ir ben u ana pukna ning bel u mang sur ur han ia." <sup>19</sup> E Iesu i atongi larne, sur ir aslang a ngas a hinirua ning ir kibas e Pita. Ana nuna hinirua ning ir aleklek e God. Lamur i atai i mange, "Ur mur iau."

#### *E Pita i deken e Iesu o e Jon*

<sup>20</sup> E Pita i talingir pa i oroi a kaklik asasaer ning e Iesu i katnani kaning i mur diau. Esaning i tan tar o e Iesu ning la hangan, pa i deken e Iesu mange, "Leklek, esi ma ir tuam tar u?" <sup>21</sup> Ning e Pita i oroi, i deken e Iesu mange, "Leklek, mangmangasa ma a barsan ne?" <sup>22</sup> E Iesu i kelesi mange, "Ning a mang sur ir laun tuk ning ar ulak, bel a utna anumi. Ika u, ur mur iau." <sup>23</sup> A warwara ne, i kamkamna sur ning a warwara otleng i han sarara tetek la ning la tortorot, mang a kaklik asasaer ne bel ir mat. Ika e Iesu bel i atongi mang bel ir mat, i atongi ka mange, "Ning a mang sur ir laun tuk ning ar ulak, bel a utna anumi."

<sup>24</sup> A kaklik asasaer kane, i ning i warwara talapor ana ututnala ne, pa i tumus akesi. Pa dala tasmani mang anuna warwara talapor, i momol kol.

<sup>25</sup> E Iesu ka tol tar a galis a ututnala otleng. Ning dir tumus arop la, a nuki mang a rakrakan hanua bel i itna sur dir suah a bukla rop onoi.

## A titolla anuna Aposella

### *A warwara talapor nigo*

A buk ne, e Luk i tumusi. I han taum ana nuna ningnigo na buk ning i tumusi, a Wakak a Warwara o e Iesu Karisito. Ting na buk Aposel dala oroi mang a Talngan Tabu i arakrakai a kakak a asaerla sur lar warawai ana Wakak a Warwara o e Iesu.

A buk ne i warwara ana lotu ane Karisito, ning i turpasi tumo na papar Judia pa lamur i han sarara uting na pukpuknala rop ting na rakrakan hanua. A ningnigo na te Karisitola, la tagun a tarai Juda ka. La nuki mang a lotu ane Karisito anunla ka, pa bel anuna tarai masuk otleng. Ika lamur e God i asangani mang a lotu anuna taraila rop (Ap 10). A te Karisitola miting tana tarai Juda la mang sur a te Karisitola ning bel a tarai Juda, la otleng lar murmur a warkuraila ana lotu Juda. A kot talilis a palaona kaklik barsan, i ning a warkurai ning la mang sur a tarai masuk otleng lar muri. Ika ning la kes taum ana ta tnan kiwung la warkurai pasi mang dingla na warkuraila ka a te Karisitola ning bel a tarai Juda lar muri (Ap 15).

Dingla na tnan utna ning a buk ne i warwara onoi, a titol anuna Talngan Tabu, a inguna e God. A Talngan Tabu i hanot nigo tetek a tarai a asaer ane Iesu ana pukakiar a Pentikos. A Talngan Tabu ot i nigon a nuknukinla pa i saran a rakrakai tetek la.

Ona dingla na tinan ane Pol e Luk i han taum onoi (Ap 16:10-17; 20:5-21; 27:1-28:16).

### *A tinan ona buk Aposel:*

A ararop a warwara ane Iesu tetek a kakak a asaerla (1:1-26)  
A kakak a asaer la warawai saot e Jerusalem (2:1-8:3)

A kakak a asaer la warawai tumo e Judia pa e Samaria (8:4-12:25)

A ningnigo na tinan ane Pol (13:1-14:28)

A kiwung anuna aposella saot e Jerusalem (15:1-35)

A munaur a tinan ane Pol (15:36-18:22)

A munatol a tinan ane Pol (18:23-21:16)

Di akarabus e Pol saot e Jerusalem (21:17-23:22)

E Pol i kes tumo Kaisaria (23:23-26:52)

E Pol i han utumo e Rom (27:1-28:30)

### <sup>1-3</sup> Tetek e Tiopilus,

Ana nuka ningnigo na buk a tumus a ututnala rop ning e Iesu i tol tari, pa ka asaer tar a taraila onoi, ana turturpas ana nuna titol, tuk ana pukakiar ning e God i los pasi usaot na langit. Lamur tana nuna minat, i hanhanot ulak tetek anuna aposella, pa a ututnala ning i toli i amomol tari mang ka laun ulak kusun a minat. Diat a bonot a pukakiar ning i kes ulak pasi te lapiu, i sira hananot tetek la, pa i warwara ana matanitu ane God. Ka asaer tar anuna aposella ana rakrakai ana Talngan Tabu, a aposella ning i aslang pas la. <sup>4</sup> Ona ning a pukakiar tagun a pukakiarla ning, ning ka kamtur ulak kusun a minat, la hangan taum pa i sairas la mang, “Gong mulo han kusun e Jerusalem, mulor kes nanan a Talngan Tabu ning e Tata i lele tar onoi, ning ia ka atai tar mulo ono. <sup>5</sup> E Jon i baptais ana malum, pa bel i bongnani ning dir baptais mulo ana Talngan Tabu.”

### *E Iesu i han kas usaot na langit*

<sup>6</sup> Ning a aposella la kes taum o e Iesu, la dekeni mang, “Leklek, onone ur saran ulak a matanitu tetek mila, a tarai Israel, sur milar kes langolango kusun a matanitu

Rom?\*" 7 I keles la mange, "Belsur a utna anumuloi sur mulor tasman a pukakiar pa a rau ning e Tata i warkurai tari sur ir sarani ono. 8 Ning a Talngan Tabu ir kes o mulo, mulor kibas a rakrakai, pa a ututnala ning mulo oroi tak mulor warwara talapor ono saot e Jerusalem, pa ting na hananuala rop tumo na naur a papar Judia pa e Samaria, pa ting na rakrakan hanua rop."

9 Ning i arop anuna warwara, e God i los kas pasi usaot na langit namatmatanla. Lamur a laukap i poroi alari kusun la.

10 Kaning ot la tadai murmur e Iesu, ning i han kusun la usaot na langit, naur a barsan dia mermer taum ana kokok a kaenla, dia tur ot kakat ting na risinla. 11 Pa dia atongi mang, "A tarai Galilila, sur asa ning mulo tur pa mulo tandai tikin usaot na langit? E Iesu ning di ka los pasi kusun mulo usaot na langit, ir hanot ulak ute, larotne mulo ka oroi i, ning i han usaot."

*E Matias i keles e Judas Iskariot*

12 Lamur a aposella la ulak usaot e Jerusalem, kusun a mangir di atongi a Mangir Oliw. I milau ka e Jerusalem, i arlar ka ana takai a kilomita. 13 Ning la hanot saot e Jerusalem, la kas usaot na tuka rumai, ning la borborbor pa la keskes ia. La ne, ning la kes taum tingia: E Pita, Jon, Jems, Endru, Pilip, Tomas, Batolomiu, Matiu, Jems a nat e Alpius, e Saimon takai tagun a kunum a Silot, pa e Judas, a nat a maskan na Jems. 14 La taum ma e Maria, etana e Iesu, pa na tastasna e Iesu, pa dingla na gurarala otleng. La rop bel la manah ona nunung ana pukakiarla.

15 Ona ning a pukakiar na arpo-  
tor tana pukakiarla ning, a tena  
tortorotla la kes taum, la rop la

arlar ana takai amar pa pisir naur a bonot. E Pita i tur pa i atongi mang, 16 "Na tastasikla, a warwara anuna Talngan Tabu, ning e Dewit i warwara tar onoi nating ot ting na Buk Tabu, onone di ka tolsot pasi. I warwara o e Judas esaning i nigon la ning la tong pas e Iesu. 17 I ning a halimila, pa i harnangai ana titol ne."

18 E Judas i lou pas ning a puka kabalapiu ana mani tagun anuna toltol laulau. Tingia na nuna kabalapiu i punga purum, pa a balana i tapuros potor, pa a suan balana i purum rop. 19 La rop ning la kes tisa e Jerusalem, la longori, pa la atong a kabalapiu ning ana nunla warwara mang Akeldama, a kamkamna mange, a kabalapiu a suluk.

20 E Pita i atongi mang, "Di ka tumus tari ana Saksakla ane Dewit mang,

'Anuna rumai ir belbel,

pa gong tik i kes tingia.' *Buk Song 69:25*

Pa di tumusi otleng manglarne,

'Tik ir kelesi ana nuna titol.' *Buk Song 109:8*

21-22 I wakak ning dalar aslang pas ta barsan sur i otleng a tena warwara talapor taum ondala o e Iesu, ana nuna kamkamtur ulak kusun a minat. I wakak ning ta halindala, ning dala keskes taum o e Iesu. A barsan ning i kes taum ondala turpasi ning e Jon i baptais tuk ana pukakiar ning di los pas e Iesu kusun dala usaot na langit."

23 Pa la atong otnan pas naur: E Josep, di atongi e Barsabas, pa ning a risana otleng e Jastus, diau ma e Matias. 24 Pa la nunung mang, "Leklek, u tasman a balana taraila rop, ur asangan mila, esi momol tagun diau ne u ka aslang tari, 25 sur ir kibas a titol na aposel, ning e Judas ka mat pas kusuni pa

\* 1:6: Ana raula ning, a tarai Israel la kes nahai a matanitu Rom. La nuki mang e Iesu ir tolsot pas o e Rom pa lar langolango.

ka han uting na hanua ning i arlar taum ana nuna toltol laulau.”<sup>26</sup> Pa la tol a titol na aslang ana naur a hat, pa hat ane Matias i hanot. Pa la was taman e Matias tetek ning a bonot pa pisir takai a aposella.

## 2

*A tinan ot anuna Talngan Tabu ana pukakiar a Pentikos*

<sup>1</sup> Ning a pukakiar na Pentikos i hanot, a tena tortorotla rop la kes taum ona ning a rumai. <sup>2</sup> Pa a rurung misaot ana langit ning i arlar ana rurung ona tnan wuwu, i hanot kulkulan tetek la, pa i abukus pas a rumai ning la kes ono. <sup>3</sup> Pa la oroi a ututnala la arlar ana irnga na iahla, la han sarara pa la kes saot onla taktakai. <sup>4</sup> Pa la rop la bukus taum ana Talngan Tabu, pa la turpas a warwara ana urmatana warwarala, ning a Talngan Tabu i sarani tanla.

<sup>5</sup> Pa galis a te Judala otleng la kes tisaot e Jerusalem, la na tena lotu miting na hananuala rop ting na rakrakan hanua. <sup>6</sup> Ning la longor a rurung ne, la dun ot taum, pa i loklokron a nuknukinla onoi, anasa la taktakai la longor anunla na warwarala, ning a tena tortorotla la warwara ono. <sup>7</sup> Pa la rop la kulkulan pa la nuknuk kol ana utna ne, pa la atongi mange, “Oroi, la ne, ning la warwara, a tarai Galilila rop ka! <sup>8</sup> Asa kampakna ning dala rop taktakai, dala longor lalan anundala na warwarala? <sup>9</sup> Dala na te Partiala, a te Midiala, a te Elamla, pa dala mitimo na paparla ne Mesopotemia, Judia, Kapadosia, Pontus, Esia, <sup>10</sup> Prigia, Pampilia pa e Ijip. Dala mitimo na papar Libia ning i milau e Sairini, pa dingla na tarai mitimo e Rom. Dala na tarai Juda pa dingla ondala ning la kas ana lotu Juda. <sup>11</sup> Pa dala miting e Krit pa a papar Arebia. Dala rop dala longor

la ning la warwara ana tatatnan titolla anun e God ana nundala na warwarala.”<sup>12</sup> Pa la kulkulan, pa i loklokron a nuknukinla, pa la deken artalai la mang, “Dalar tasman mangmangasa a utna ne?”<sup>13</sup> Ika dingla na tarai la morot onla, pa la atongi mang, “La gang a wain pa la laulau ono.”

*A warawai ane Pita*

<sup>14</sup> Lamur e Pita i tur taum ana ning a bonot pa pisir takai aposella, pa i warwara kol tetek a taraila mange, “Mulo a tarai Juda, pa mulo rop ning mulo kes te Jerusalem, ar atalapor a utna ne ta mulo, pa mulor longor wakaki. <sup>15</sup> Mulo atongi mang la sipak. Ika bel, anasa i 9 kilok ot ne ana kobot. <sup>16</sup> A utna ne mulo oroi, a propet Joel ka warwara nigo tar onoi mang,

<sup>17</sup> ‘E God i atongi mange:

Ana ararop a pukakiarla

ar saran purum a Inguk tetek a taraila rop.

A natnatumulola, a taraila pa gurarala, lar warwara na propet.

Anumulo na barmanla lar oroi a tatataila, pa anumulo na bun lar resnan a reresala.

<sup>18</sup> Ana pukakiarla ning, ar saran a Inguk

tetek la otleng anuk na tena titol oros a taraila pa gurarala, pa lar warwara na propet.

<sup>19</sup> Par asangan a ututnala na kulkulan saot na langit, pa akinalangla te lapiu na rakrakan hanua, lar a suluk, a iah, pa a tnan sasawan.

<sup>20</sup> A kamis ir mormorom, pa a kalang ir kubar, lar a suluk, pa lamur a pukakiar ana Leklek i hanot, a tnan pukakiar ning, a pukakiar a matatar.



21 Pa la rop ning la nunung tetek a Leklek, ir alaun la.' *Joel 2:28-32*

22 "A tarai Israel, mulor longor iau. Ar atai mulo o e Iesu, a te Nasaret. Mulo ot mulo tasmani mang ana rakrakai e God, i tol a ututnala na kulkulan, pa rakrakai a titolla pa akinalangla. I toli na arpotor ta mulo, sur e God ir asangan tetek mulo mang i ot i sune seni. 23 Di saran tar e Iesu ta mulo, pa mulo taum ana laulau a taraila mulo sai ahati saot na rakai kutus. E God ka tasman nigon tari mang a ututnala ne ir hanot arlar ana nuknukna. 24 Ika e God i akamtur ulak pasi, pa i kepsen a kankan ona minat kusuni, anasa a minat bel i toh pasi sur ir tong akesi. 25 E Dewit ka atong tari o e Iesu mang, 'A tasmani mang a Leklek i kes tetek iau.

Bel ar koloron,  
anasa i kes te na sot a kuk.

26 A balak i gas kol, pa a warwara taum ana gasgas,  
pa a tortorot mang a palaok bel ir laulau tikin,

27 anasa bel ur noren sen iau ting na kulam a minat,  
pa bel ur saran tar esining anumi, sur ir marase.

28 U ka asangan tar iau ana ngasla sur a lalaun.

Ning ar kes taum hom, ur abukus iau ana gasgas.' *Buk Song 16:8-11*

29 "Na tastasikla, ar warwara talapor tetek mulo o e Dewit, a tubundala tagun nating. I mat pa di akasi ting na kulam a minat, pa anuna kulam a minat kanet tan dala tuk onone. 30 Ika e Dewit i a propet, pa i tasmani mang e God ka lele tar teteki mang i ot ir akes tar tik miting na mangis a tarai anunai, sur ir kelesi ana nuna keskes a king. 31 E Dewit ka tasman nigon tar a utna ning ir hanot, pa i atong a warwara ne ana kamkamtur ulak ane Karisito,

mang bel di noren seni ting na kulam a minat pa a palaona bel i marase. 32 E Iesu ot ning, e God i akamtur pasi kusun a minat, pa mila rop mila oroi pa mila warwara talapor onoi. 33 Di aleklek pasi pa di akesi ting na sot a kuna e God, pa e God e Tamana ka saran tar a Talngan Tabu teteki larning i lele tari, pa onone e Iesu ka saran purum tar a utna ne ning mulo oroi pa mulo longori. 34 E Dewit bel i han usaot na langit, ika i atongi mange,

'A Leklek i atongi tetek anuka Leklek,

"Ur kes te na sot a kuk,

35 tuk ning ar tolsot pas anuma hiruala

sur lar kes nahaim." ' \* *Buk Song 110:1*

36 "Mulo a tarai Israel rop mulor tasman wakaki, mang e Iesu ning mulo sai ahati saot na rakai kutus, e God ka akesi sur ir Leklek pa ir Karisito otleng."

37 Ning la longor a warwara ne, i sot na balanla, pa la deken e Pita taum ana dingla na aposella mang, "Na tastasimila, asaning milar toli?" 38 E Pita i keles la mang, "Mulo rop taktakai mulor lingir a nuknukim mulo, pa dir baptais mulo ana risana e Iesu Karisito, sur dir kepsen anumulo na toltol laulaula, pa mulor kibas a Talngan Tabu. 39 Anasa a artabar ne ning e God ka lele tar ono, ir han tetek mulo, pa tetek na natnatum mulola, pa tetek la otleng ning la kes bakbak. Pa ir han tetek la rop, ning a Leklek anundala a God, ir kabah pas la teteki." 40 Pa i atumarang la ana galis a warwara otleng, pa i nung rakrakai la mang, "Mulor tai alar mulo, pa mulor tur masuk kusun a toltol laulau anuna tarai tagun onone, sur gong e God i saran a warkurai na arkeles tetek mulo." 41 La ning la kibas

\* 2:35: "A Leklek" i warwara o e God, pa "anuka Leklek" i warwara o e Iesu.

a warwara ane Pita dir baptais la. La arlar ona natol a rip, pa di suah taum la ana tena tortorotla. <sup>42</sup> Pa la saran tar la ana asasaer anuna aposella, ana kes taum ana marmaris, pa ana utna na hangan taum, pa ana nunung.

*A tena tortorotla la kes taum*

<sup>43</sup> A aposella la tol a galis a utna na kulkulan, pa galis a akinalang otleng, pa a taraila rop la hanrawai e God. <sup>44</sup> Pa a tena tortorotla rop la kes taum, pa a ututnala rop ning anunla taktakai, anunla rop ka. <sup>45</sup> La siuran anunla na puka kabalapiula, taum ana nunla na ututnala, pa a mani taguni, la salari tetek esining i kapan. <sup>46</sup> La sira kes taum ting na rumai a artabar ana pukakiarla rop. La hangan taum ting na nunla na rumaila ana gasgas taum ana momolna ting na balanla. <sup>47</sup> Pa la rakan aleklek pas e God, pa a taraila rop la gas onla. Pa ana pukakiarla rop a Leklek i alaun a galis a tarai, pa di was taman la ana tena tortorotla.

### 3

*Di alangolango pas a barsan ning bel i sira han*

<sup>1</sup> Ning a pukakiar e Pita pa e Jon dia han usaot na rumai a artabar, sur a lotu na nunung, ona 3 kilok ana rah. <sup>2</sup> A tarai la los pas ning a barsan bel i sira han, di agon pasi mang ot larning. Pa ana pukakiarla rop, la akakesi ting na taman na rumai a artabar, di atongi mang a wakak a taman, sur ir nununung utna tanla ning la kas. <sup>3</sup> Ning i oroi e Pita pa e Jon dia mang sur diar kas, i nunung diau sur al mani. <sup>4</sup> Pa dia tai tostos teteki, pa e Pita i atai mang, "Ur ngoson miau!" <sup>5</sup> I ngoson diau, pa i kes nanan diau sur al utna tan diau.

<sup>6</sup> Pa e Pita i atai mange, "Tau belal mani, ika ar tabar u ana utna

ning anuki. Ana risana e Iesu Karisito, a te Nasaret, ur tur pa ur han!" <sup>7</sup> E Pita i tong pas a sot a kuna, i dat atur pasi, pa ano otning naur a hana dia rakrakai. <sup>8</sup> I tur kapit, pa i bot han. Pa ditol kas uting na rumai a artabar, i hanhan, i sirok pa i rakan aleklek e God. <sup>9</sup> Ning a taraila rop la oroi ning i han, pa i rakan aleklek e God, <sup>10</sup> la oroi lalani mang i ka, esaning i keskes, pa i sira nunung utna ting na wakak a taman, pa la kulkulan kol ana utna ne di toli onoi. <sup>11</sup> Pa a barsan ne i tong akes e Pita pa e Jon, pa a taraila rop la kulkulan kol pa la dun tetek ditol ting na parada na rumai a artabar, ning di atongi mang a Parada ane Solomon.

*E Pita i warawai ting na rumai a artabar*

<sup>12</sup> Ning e Pita i oroi la, i atai la mang, "Mulo a tarai Israel, sur asa ning mulo kulkulan ana utna ne pa mulo ngoson rakrakai miau? Mangasa, mulo nuki mang mia alangolango pas a barsan ne ana rakrakai i miau ot, o anasa mia tol a toltol ning e God i mang suri? Bel! <sup>13</sup> E God ot i toli. A God ane Abaram, Aisak pa e Jekop, e God anuna nundala mangis a tarai tagun nating, i aleklek e Iesu anuna tena titol. Mulo saran tari sur dir sai koli, pa mulo puain seni namatana e Pailat, ning i mang sur ir pak seni. <sup>14</sup> Mulo puain sen a Tena Tostos ane God, pa mulo nunung sur dir pak sen a tena umkol a tarai tetek mulo. <sup>15</sup> Pa mulo umkol e Iesu, ning a kama lalaun, ika e God i akamtur ulak pasi kusun a minat. Pa mila oroi i, pa mila warwara talapor onoi. <sup>16</sup> Ana tortorot ana risana e Iesu, di arakrakai pas naur a hana barsan ning mulo oroi i, pa mulo tasmani. Ana tortorot ana risana e Iesu di alangolango pas a barsan ne namatamulo rop.

17 “Na tastasikla, a tasmani mang mulo taum ana numulo na ningnigo otleng bel mulo tasman asaning mulo toli o e Iesu. 18 Ika ana ututnala ne mulo toli, e God i tolsot pas a ututnala ning ka atong tari nating ana warwara anuna propetla rop mang anuna Karisito ir mat. 19 Mulor lingir a nuknukim mulo, pa mulor han tetek e God, sur ir kepsen anumulo na toltol laulaula. 20 Pa mulor kilang a wakak a lalaun tana Leklek, pa ir sune e Karisito tetek mulo, e Iesu ning e God ka aslang tari. 21 Ir kes saot na langit, tuk ana pukakiar ning e God ir atona ulak a ututnala rop, ning ka lele nigo tar onoi ana warwara ana nuna tostos a propetla. 22 Anasa e Moses i atongi mang, ‘A Leklek anumulo a God, ir sune ta propet i arlar hok tetek mulo, miting na numulo a mangis a tarai. Mulor longor a ututnala rop ning ir atongi ta mulo. 23 Esining bel i longor tana propet ning, dir umsem onoi kusun a taraila ane God.’ *Lo 18:15, 18-19*

24 “A propetla rop ning la warwara ana warwara ane God, turpasi o e Samuel, pa la ning la hanot lamur tana, la warwara nigo ana pukakiarla ne. 25 A warwara anuna propetla anumuloi ka, pa a kunubus otleng ning e God i tol tari tetek anumulo a kaba tarai nating ot, ning i atongi tetek e Abaram mang, ‘O e tubum ar angisngis a kaba tarai rop te na rakrakan hanua.’ *Stat 22:18* 26 Ning e God i sune sen anuna Tena Titol, i sune nigoni tetek mulo, sur ir angisngis mulo, ning ir ben ulak mulo rop kusun anumulo na toltol laulaula.”

#### 4

*E Pita pa e Jon dia tur ana warkurai*

1 Ning e Pita pa e Jon dia warwara tetek a taraila, a tena

artabarla tetek e God, pa ningnigo anuna tena tai alarla miting na rumai a artabar, pa Sadusila, la han tetek diau. 2 La balakut diau, anasa dia asaer a taraila mange, a minatla lar kamtur ulak kusun a minat, arlar lar a kamkamtur ane Iesu. 3 La dat pas diau pa la akas diau ting na rumai a dodot, sur diar kes tuk latu, anasa ka rah. 4 Ika, a galis ning la longor a warwara ane Pita pa e Jon, la tortorot. Pa a wawas ana taraila ka ning la tortorot i arlar ana dilima na rip.

5 Ana pukakiar lamur tana, a ningnigola, pa a tarai a kiwungla taum ana tena asaerla tagun a warkurai, la kes taum saot e Jerusalem. 6 La taum ma e Anas, a ningnigo na tena artabar tetek e God, pa na mainla la ne: E Kaipas, e Jon, e Aleksanda, pa dingla na tarai otleng. 7 La ben pas e Pita pa e Jon pa dia tur namatanla, pa la deken diau mang, “Esi na ngas a rakrakai, pa ana risana esi, ning mu tol a utna ne onoi?”

8 E Pita i bukus ana Talngan Tabu, pa i atai la mang, “Mulo a ningnigola anuna taraila pa a tarai a kiwung otleng, 9 onone mulo deken miau ana wakak a titol ne mia toli ana barsan, ning bel i sira han pa di alangolango mangasa pasi. 10 Mulo taum ana tarai Juda rop, mulor tasmani mang, a barsan ne i tur salanigo ta mulo, di alangolango pasi ana risana e Iesu Karisito a te Nasaret, i ning mulo sai ahat tari saot na rakai kutus, pa e God i akamtur ulak pasi kusun a minat.

11 E Iesu ‘A hat ning mulo na tena tol rumai mulo kepseni,

i ot ning a wakak a hat kes, ning di tol a rumai saot ono, i wakak tana hatatla rop.’

*Buk Song 118:22*

12 Bel tik masuk ir alaun dala, pa bel ta risana tik otleng te na rakrakan hanua, ning e God i

saran tari tetek a taraila sur dir alaun dala onoi.”

<sup>13</sup> La tasmani mang e Pita pa e Jon naur a barsan oros ka, bel dia asasaer pas on ta tnan asasaer. Pa la kulkulan kol on diau ning dia warwara pa bel dia matmataut. Pa la tasmani mang nating ditol ararmuri taum ma e Iesu. <sup>14</sup> Ika ning la oroi a barsan ning di alan-golango pasi, i tur taum on diau, belal warainla ma sur lar keles diau onoi. <sup>15</sup> La sune maskan sen ditol kaba kusun a kiwung, pa la warwara taum pas mange, <sup>16</sup> “Dalar tol asa ana naur a barsan ne? Anasa dia ka tol tar ning a tnan utna na kulkulan, pa ka talapor tetek la rop ning la kes te e Jerusalem. Pa dalar puai mang-mangasa? <sup>17</sup> Dalar sairas rakrakai diau, sur gong ulak ma dia warwara tetek tik ana risana e Iesu, sakana a warwara ne ir han sarara tetek a taraila rop.”

<sup>18</sup> Lamur la kabah ulak pas diau, pa la sairas diau sur gong ma dia warwara pa dia asaer halala ana risana e Iesu. <sup>19</sup> Ika e Pita pa e Jon dia keles la mang, “Mangasa, i tostos ana matana e God ning miar longor tetek mulo, pa tetek e God gong? Mulo ot mulor oroi sursuri. <sup>20</sup> Ika miau, bel miar sairas lar pas miau ana warwara ona ututnala ning mila ka oroi tari, pa mila ka longor tari.”

<sup>21</sup> Ning la ka sairas rakrakai tar diau, la pak sen diau. Bel la pastek ta utna ning lar um diau onoi, anasa a tarai la rakan aleklek pas e God ana utna na kulkulan ning dia ka tol tari. <sup>22</sup> Anasa a barsan ning di tol tar a utna na kulkulan onoi pa i langolango, anuna rau a lalaun i ka bolos tar diat a bonot a rau.

*A tena tortorotla la nunung*

<sup>23</sup> Ning di ka pak sen e Pita pa e Jon, dia ulak tetek na halalindiau, pa dia atai la ana warwarala rop ning a leklek a tena artabarla tetek

e God taum ana ningnigola la ka atong tari tan diau. <sup>24</sup> Ning la longori, la nunung taum tetek e God mange, “Leklek, u akes a langit, a rakrakan hanua, a puka tasi, taum a ututnala rop tingui onditol. <sup>25</sup> Pa ana Talngan Tabu u warwara tetek a tubumila e Dewit anuma tena titol mange,

‘Asa kamkamna ning a taraila ning bel a tarai Israel la balakut kol,

pa la pinpindaiwol na tol a toltol laulau?

Ika anunla pinpindaiwol i utna oros ka.

<sup>26</sup> A kingla miting na rakrakan hanua la tur na harum, pa a ningnigola la han taum, sur lar alaulau a Leklek pa anuna Mesaia, ning i aslang pasi.’ *Buk Song 2:1-2*

<sup>27</sup> A momolna, e Herot pa e Pontius Pailat la han taum ana taraila ning bel a tarai Israel, pa a tarai Israel otleng, te na hanua ne, sur lar alaulau anuma To-toh na Tena Titol e Iesu, ning u ka aslang pasi. <sup>28</sup> Ning la toli manglarning, la tolsot pas a ututnala ning nating u ka sang tari ana rakrakaim pa ana nuknukim sur ir hanot. <sup>29</sup> Onone, Leklek ur nuk pas anunla na rakrakai a warwarala, pa ur arakrakai mila, anuma tena titol orosla, sur gong mila matmataut ning milar warwara talapor ana numa warwara. <sup>30</sup> Pa ur nangan mila ana rakrakaim sur a tinsamanla lar langolango, a ututna na kulkulan pa a akinalang lar hanot ana risana e Iesu anuma Tohtoh a Tena Titol.”

<sup>31</sup> Ning la ka nunung pas, a rumai ning la kes onoi, i gulgule, pa la rop la bukus ana Talngan Tabu, pa la warwara ana warwara ane God, pa bel la matmataut.

*A tena tortorotla la asauran anunla na ututnala*

<sup>32</sup> A tena tortorotla rop, takai ka a nuknukinla pa a balanla, pa bel

tik ta halinla i atong tar ta utna mang anunai ka. La suah taum a ututnala sur anunla rop. <sup>33</sup> A aposella la warwara talapor taum ona tnan rakrakai, ana lalaun ulak ana Leklek e Iesu kusun a minat ning la ka oroi tari. Pa a tnan marmaris ane God i kes onla rop. <sup>34</sup> Bel tik ta halinla i kapan sur ta utna, anasa la ning anunla na puka kaba lapiula pa la otleng ning anunla na rumaila, la siuran la, pa mani ono, <sup>35</sup> la losi tetek a aposella. Pa la salari tetek esining i kapan.

<sup>36</sup> Pa e Josep otleng, a barsan misaot na ailan Saiprus, i miting na mangis a tarai Liwai, ning a aposella la atongi e Barnabas, a kamkamna mang a Tena Wunan a taraila. <sup>37</sup> I siuran pas ning a puka kabalapiu anunai, pa i los a mani onoi tetek a aposella.

## 5

### *E Ananaias pa e Sapaira*

<sup>1</sup> Ning a barsan a risana e Ananaias taum o e nuna hane a risana e Sapaira dia otleng dia siuran ning a puka kabalapiu. <sup>2</sup> Pa dia malmaling taum sur diar tong akes ta tuka mani ning di lou tar a kabalapiu ono, pa ta tuka mani ka e Ananaias i losi tetek a aposella. <sup>3</sup> Pa e Pita i atai i mang, “Ananaias, mangasa ning u malmaling pas e Satan sur ir solong a balam pa u asongo a Talngan Tabu? Sur asa ning u bunur pas a tuka mani ning di lou tar a puka kabalapiu onoi? <sup>4</sup> Ning a kabalapiu kaning ot tam, anumi ot. Pa ning u siuran pasi, u ot u warkurai sur a mani onoi. Asa kamkamna ning u nuk pas a laulau a toltol ne? Bel u asongo a taraila, u asongo ot e God. <sup>5</sup> Ning e Ananaias i longor a warwara ne, i punga purum pa i mat. Pa la rop ning la longor a arkaltai onoi, la matmataut kol. <sup>6</sup> A kakak tarai la hanot, la poroi pas a minatna, la los purumi, pa la pori.

<sup>7</sup> Ning natola awa alar tar a minat e Ananaias, e nuna hane i kas, ika bel i tasman a utna ning i hanot. <sup>8</sup> Pa e Pita i dekeni mang, “Ur atai iau, a matana kabalapiu rop ot ne, ning mu siuran pasi?” Pa i kelesi mang, “Momol, a matana ot ning.” <sup>9</sup> E Pita i atongi tana mang, “Sur asa mu taum ma e num mese mu malmaling pas sur mur lar a Inguna a Leklek? Oro, la ning la por e num mese, la kane na taman, onone lar los purum u otleng.” <sup>10</sup> Ano otning i punga purum ting lanigo ta e Pita, pa i mat. Pa a kakak tarai la kas, la oroi mang ka mat, la los purum a minatna, pa la pori ting napire nuna mese. <sup>11</sup> Pa a tarai a lotula rop la matmataut kol, pa la rop otleng ning la longor a ututnala ne.

### *A akinalangla taum ana ututnala na kulkulan*

<sup>12</sup> A aposella la tol a galis a akinalang pa galis a utna na kulkulan tana taraila. Pa a tena tortorotla rop la sira kes taum ting na parada na rumai a artabar ning di atongi mang a Parada ane Solomon. <sup>13</sup> A taraila masik, la hanrawai kol la, ika la matmataut sur lar kes taum onla. <sup>14</sup> Ika a galis, a taraila pa gurarala kale, la bot tortorot ona Leklek, pa di was taman la ana tarai a lotula. <sup>15</sup> Ning a tarai la oroi a titol anuna aposella, la los la ning la kurah pa di aborbor la ting na ris a ngas ana logo ngasinla pa ting na matla, sur ning e Pita ir bolos la, a manarna ir han saot on hala onla pa lar langolango. <sup>16</sup> Pa galis a taraila mitimo na hananuala milau e Jerusalem, la hanot. La los a tinsamanla pa la ning a motla la alaulau la, pa di alangolango arop la.

### *A aposella la tur ana warkurai*

<sup>17</sup> A nuknuk laulau ona aposella i song a ningnigo na tena artabar tetek e God, taum ana halalnala rop tagun a kunum a Sadusila.

18 Pa la dat pas a aposella, pa la akas la ting na rumai a dodot. 19 Ika ana morom, ning a angelo anuna Leklek i sapang a tamanla ana rumai a dodot, pa i ben purum la pa i atongi mang, 20 “Mulor han, pa mulor tur ting na rumai a artabar, pa mulor atai a taraila ana warwarala rop ana tona lalaun ne.” 21 Pa ana komkobot ning ot, la kas ting na rumai a artabar pa la asaer a taraila, lar ning di ka atai tar la.

Ning a ningnigo na tena artabar tetek e God taum ona halalnala la hanot, la kabah taum a tarai a kiwungla rop, a ningnigola anuna tarai Israel. Pa la arsune utumo na rumai a dodot sur dir ben pas a aposella. 22 Ika ning a tena tai alarla ana rumai a artabar la hanot, bel ma la oroi la ting na rumai a dodot. La ulak, pa la warwara mang, 23 “Ning mila hanot ting na rumai a dodot, mila oroi mang di ka tagar rakrakai tar ot, pa a tena tai alarla kaning ot la tur ana tamanla, ika ning mila sapang a tamanla, bel ma mila oroi la.”

24 Ning a ningnigo anuna tena tai alarla taum ana leklek a tena artabarla tetek e God la longor a warwara ne, i loklokron a nuknukinla onoi, mang asa ma ir hanot. 25 Lamur ning a barsan i hanot, pa i atai la mang, “Oroi, a tarai ning mulo akas tar la te na rumai a dodot, la kanumo ma na rumai a artabar, pa la asaer a taraila.” 26 A tena tai alarla taum ana nunla ningnigo la ben pas a aposella. La ben wakak pas la ka, anasa la matatan a taraila, sakana lar wolot la.

27 Ning la ka ben pas a aposella, la atur la namatana tarai a kiwung. Pa a ningnigo na tena artabar tetek e God i atai la mang, 28 “Mila ka sairas rakrakai tar mulo mang gong mulo asaer a taraila ana risana e Iesu. Ika onone, a hanua Jerusalem ka

bukus ana numulo na asasaer, pa mulo mang sur mulor arup mila ona minat e Iesu.”

29 E Pita taum ana aposella la kelesi mang, “Milar longor ot ta e God, pa bel milar longor tana tik. 30 A God anuna nundala mangis a tarai tagun nating i akamtur ulak e Iesu, esaning mulo ka umkol tari saot na rakai kutus. 31 I ot ning e God i aleklek pasi pa i akesi ting na sot a kuna, sur i a Ningnigo pa a Tena Alaun, pa ir tol a ngas sur a tarai Israel lar lingir a nuknukinla, pa dir kepsen anunla na toltol laulaula. 32 Mila oroi a utunlala ne pa mila warwara talapor onoi, pa a Talngan Tabu i amomol tar anumila na warwara. A Talngan Tabu, i a artabar ane God tetek la ning la longor tana.”

33 Ning la longor a warwara ne, la balakut kol, pa la mang sur lar umkol a aposella. 34 Ika ning a Parisaio, a risana e Gamaliel, a tena asaer ana Warkuraila ane Moses, esaning a taraila rop la hanrawai i, i tur ting na kiwung, pa i atongi mang a aposella lar purum kaba. 35 Pa i atai a tarai a kiwung mang, “Mulo a tarai Israel, mulor nuknuk wakak ana saning mulor toli ona taraila ne. 36 Dingla na rau nating e Teudas i hanot, pa i iaunani mang i itna, pa galis a tarai, ngandek i arlar ana diat a mar, la muri. Ika ning di umkoli, la rop ning la muri la han sarara, pa anuna titol i rop oros ka. 37 Lamur ta e Teudas, ning kale, e Judas, a te Galili, i hanot ana rau na tumus risandi, pa i ben maskan pas dingla na tarai sur lar harum taum ana matanitu. I otleng i hirua, pa la rop ning la muri, la han sarara.

38 “Ika ne a atai mulo mang: Gong mulo tol ta utna onla, mulor pak sen la. Ning a utna ne la toli i kamna ka tana taraila, ir rarop ka. 39 Ika ning i kamna ot o e God, mulor tol panai sur mulor sairas

la. Sakana lamur ir talapor tetek mulo mang mulo harum taum o e God.”

<sup>40</sup> La malmaling ana nuna na warwara, pa la kabah ulak a aposella, la dapis la, pa la sairas la mang gong ma la warwara ana risana e Iesu. Pa lamur la pak sen la. <sup>41</sup> Pa a aposella la purum miting na kiwung, la gas, anasa e God i oroi la mang, la wakak sur lar kilang a meme ana risana e Iesu. <sup>42</sup> Ana pukakiarla rop ting na rumai a artabar, pa ting na nunla na rumaila, bel la manah ana asasaer pa warawai ana Wakak a Warwara mang e Iesu i a Karisito.

## 6

*Di aslang pas mais a barsan sur a titol na artabar*

<sup>1</sup> Ana pukakiarla ning, a tarai a asasaerla la galis amon. Dingla na tarai Juda la warwara ana warwara Grik, pa dingla onla la warwara ana warwara Hibru. La ning la warwara Grik la warwara na ururai onla ning la warwara Hibru, anasa la hanhan lakai a laola anuna Grikla, ning la sira asauran a utna na hangan tana laola ana pukakiarla rop. <sup>2</sup> Pa ning a bonot pa pisir naur a aposel la kabah taum a tarai a asasaerla rop, pa la atai la mang, “Bel i tostos ning milar molot ka ana artabar ana utna na hangan, pa bel milar tol a titol na warwara talapor ana warwara ane God. <sup>3</sup> Na tastasimila, mulor aslang pas ir mais a wakak a barsan tagun mulo, ning la tastasman pa la bukus ana Talngan Tabu, sur milar saran tar a titol na artabar ne tanla. <sup>4</sup> Pa mila, milar molot ka ana nunung pa a titol na warwara talapor ana warwara ane God.”

<sup>5</sup> Pa la rop la gas ana warwara ne. Pa la aslang pas e Stiwen, a barsan ning i bukus ana tortorot pa a Talngan Tabu. Pa la aslang

pas otleng e Pilip, e Prokorus, e Nikano, e Timon, e Pamenas, pa e Nikolas, a barsan mitimo e Antiok ning bel a te Juda, ika i kas ana lotu Juda. <sup>6</sup> La ben la tetek a aposella. Pa la suah a kunla saot onla, pa la nunung.

<sup>7</sup> A warwara ane God i han sarara, pa a tarai a asasaerla la galis amon saot e Jerusalem. Pa galis a tena artabar tetek e God la tortorot pa la longor ana Wakak a Warwara.

*Di arup e Stiwen*

<sup>8</sup> E Stiwen i bukus ana rakrakai taum ana marmaris ane God, pa i tol a tatatnan utna na kulkulanla, taum ana akinalangla na arpotor a taraila. <sup>9</sup> Ika dingla na tarai Juda la arngaras taum o e Stiwen. A taraila ne miting na ning a kunum ning di atongi A Rumai Lotu anuna Langolango na Tarai. La miting na naur a hanua, e Sairini, pa e Aleksandria pa mitimo na naur a papar e Silisia pa e Esia. <sup>10</sup> La tol panai sur lar keles anuna warwara anasa a Talngan Tabu ot i saran a mananos tana.

<sup>11</sup> Pa la arakrakai kumnan pas dingla na taraila, sur lar atongi mang, “Mila longor tari ot ning i warwara laulau o e Moses pa o e God otleng.” <sup>12</sup> Pa la akutkut balana ningnigola, taum ana tena asaer la tagun a warkurai pa a taraila oros otleng. La han tetek e Stiwen, la tong akes pasi, pa la beni sur ir tur salanigo tana tarai a kiwung. <sup>13</sup> Pa la ben pas a taraila, ning lar arupi ana asasongo na warwarala mang, “A barsan ne bel i manah ana warwara laulau ana tostos a rumai a artabar pa ana Warkuraila otleng anun e Moses. <sup>14</sup> Mila longori i atongi mang e Iesu, a te Nasaret, ir regen sen a rumai ne, pa ir keles sen a toltola ning e Moses ka asaer tar dala onoi.”

<sup>15</sup> Pa la rop ning la kes ana kiwung la ngoson rakrakai e Stiwen, pa la oroi mang a matana i arlar taum ana matana angelo.

## 7

### *A warawai anun e Stiwen*

<sup>1</sup> A ningnigo na tena artabar tetek e God i deken e Stiwen mange, "I momol ot a warwar-ala ne?" <sup>2</sup> Pa i kelesi mange, "Na tastasikla, taum ana tatala, mulor longor tak. A God na matatar i hanot tetek e tubundala e Abaram, ning kaning ot i kes ting e Mesopotemia, pa belot i kes tumo e Haran. <sup>3</sup> Pa e God i atongi tana mang, 'Ur han kusun anuma hanua, pa na maimla otleng, pa ur han sur a hanua ning ar asangan u onoi.' *Stat 12:1*

<sup>4</sup> "Pa i han kusun a hanua anuna Kaldiala, pa i kes tumo e Haran. Lamur ana minat ane tamana, e God i sune ulaki sur a hanua ne, onone dala kes ono. <sup>5</sup> Belot i saran ta puka kabalapiu tana sur anunai, o ta natar a pukna kama. Ika, i lele tari mang lamur ir saran tar a kabalapiu ne tana pa tetek na tumtumbunala. Ning e God i lele, e Abaram belot ta natnalik. <sup>6</sup> Pa e God i atai i mang, 'Na tumtubumla lamur tam lar kes na wasira ana ta wasira na hanua, pa lar titol na dodot, pa dir alaulau la ona diat a mar a rau. <sup>7</sup> Ika ar warkurai a taraila ning la dat pas na tumtubumla sur lar titol na dodot. Pa lamur la ning la titol na dodot lar han kusun a hanua ning, pa lar lotu tetek iau ana hanua ne.' *Stat 15:13-14*

<sup>8</sup> E God i saran tar a kunubus ta e Abaram. Pa a aslang ana kunubus ning, a kot talilis a palaona kaklik barsan. E Abaram i aitna e Aisak, pa ning ka siwal a pukakiar anoi, e Abaram i kot talilis a palaona e Aisak. Lamur e Aisak i aitna e Jekop, pa e Jekop i aitna pas ning a bonot pa pisir naur a tumtubundala.

<sup>9</sup> "Pa na tumtubundala tagun nating la nuknuk laulau o e Josep, a tasinla, pa la siurani sur ir titol na dodot tumo e Ijip. Ika e God i kes taum onoi, <sup>10</sup> pa i alauni kusun a mamahatla ning i kilangi. I saran a wakak a mananos tana, pa i nangani sur e Pero, a king mitimo e Ijip, ir gas onoi. E Pero i suahi sur ir ningnigo ting na hanua Ijip pa ir ningnigo otleng ana rumai anun e Pero.

<sup>11</sup> "Pa a tnan munurak i hanot rop tumo e Ijip, pa e Kenan otleng, pa a galis a mamahat i kibas a taraila, pa belal utna na hangan ana tumtubundala. <sup>12</sup> Ning e Jekop i tasmani mang a wit kanumo e Ijip, i sune na natnatnala, a tumtubundala, la han mitimo e Kenan uto e Ijip a ningnigo na tinan. <sup>13</sup> Ning i munaur na tinan anunla, e Josep i atai talapor la mang i a tasinla. Pa e Pero otleng i talapor bot ana tastasna e Josep. <sup>14</sup> Lamur e Josep i arsune sur e tamana, e Jekop, la taum ana mainala. La rop mais a bonot pa pisir dilima. <sup>15</sup> Pa e Jekop taum ana mainala la han pa la kes tumo e Ijip. Lamur e Jekop taum na natnatnala la mat tumo ia. <sup>16</sup> A galis a raula lamur di los pas a sursurinla pa di akas la ting na kulam a minat tumo e Kenan ana hanua Sikem. A kulam a minat ning e Abaram ka lou tari tana natnatna e Hamor.

<sup>17</sup> "Ning i milau amon a taem sur e God ir tolsot pas anuna lele tetek e Abaram, anundala na tarai la ka galis rop tumo e Ijip. <sup>18</sup> Pa ning a tona king i turpasi sur ir warkurai e Ijip, pa bel i talapor ana titol ane Josep nating. <sup>19</sup> Pa i asongo tar anundala na tarai, pa i alaulau la, pa i warkurai tari sur lar kepsen anunla na kakak betbetela sur lar mat.

<sup>20</sup> "Ana rau ning di agon e Moses onoi, pa i a wakak a kaklik kol ana matana e God, pa di taninsun onoi ana natol a kalang ting na rumai



ane tamana. <sup>21</sup> Ning di apurumi tumo lapiu, a nat na hane e Pero i los pasi, pa i lawati suri e natnalik. <sup>22</sup> Pa di asaer e Moses ana ngasa mananosla rop anuna tarai Ijip, pa i ning a rakrakai a barsan ana nuna na warwarala pa nuna na titolla.

<sup>23</sup> “Ning ka diat a bonot a rau a lalaun ane Moses, i nuknuk sur ir han pa ir oroi anuna tarai Israella.

<sup>24</sup> I oroi ning a te Ijip i um laulau ning a te Israel, i dun tetek diau pa i umkol a te Ijip, sur ir balu pas ning a halna. <sup>25</sup> E Moses i nuki mang anuna na tarai lar tasman lalani mang e God i sune i sur ir alaun pas la, ika bel la tasmani.

<sup>26</sup> “Ana pukakiar lamur tana, i oroi naur a te Israel dia harum, pa e Moses i mang sur ir amolmol diau mange, ‘Naur a barsan, mu ka. Mangasa ning mu alaulau atalai mu?’ <sup>27</sup> Pa esaning ning i um laulau tar ning a halna i sugut sen e Moses, pa i atai i mang, ‘Esi i suah tar u sur ur ningnigo pa ur tena warkurai anumila?’ <sup>28</sup> U mang sur ur umkol iau, lar ning u umkol a te Ijip nabong, gepi?’ *Kisim Bek 2:14*

<sup>29</sup> Ning e Moses i longor a warwara ne, i liu kumna utumo na hanua Midian. Ana nuna keskes na wasira tumo, i aitna naur a natna, naur a kaklik barsan.

<sup>30</sup> “Ning ka diat a bonot a rau ana nuna keskes tumo e Midian, ning a angelo i hanot teteki ting na irnga ting na bual ting na hanua bel milau a Mangir Sinai. <sup>31</sup> Ning e Moses i oroi, i kulkulan ono. I han milau sur ir oroi wakaki, pa i longor a elngena Leklek i mang, <sup>32</sup> ‘Iau a God anuna tumtubumla tagun nating, a God ane Abaram, e Aisak pa e Jekop.’ *Kisim Bek 3:6* Pa e Moses i koloron, pa i matmataut sur ir oroi. <sup>33</sup> Pa e Leklek i atai i mange, ‘Ur pak sen naur a su kusun naur a ham, anasa a kabalapiu ne u tur onoi, anuki. <sup>34</sup> Ia ka oroi a mamahatla ning i

kibas anuka tarai ning la kes tumo e Ijip, pa ia ka longor anunla na tinangis. Pa ia ka han purum, sur ar alangolango pas la. Lamut ute, pa ar sune ulak u utumo e Ijip.’ *Kisim Bek 3:5, 7-8, 10*

<sup>35</sup> “A tarai Israella ning la aliu sen e Moses, ana nunla na warwara mang, ‘Esi i suah tar u sur ningnigo pa ur tena warkurai anumila?’ Ika, i ot ning e God i sune i sur ir ningnigo pa ir alangolango a taraila. I sune i ana warwara anuna angelo ning i hanot teteki ting na bual ning i irnga. <sup>36</sup> E Moses i nigon purum la mitimo e Ijip, i tol a ututnala na kulkulan, pa a asilangla tumo e Ijip pa tumo ana Tasi Kubar, pa ting na hanua bel otleng, arlar ona diat a bonot a rau. <sup>37</sup> E Moses ot ning i atai tar a tarai Israella mang, ‘E God ir saran ta propet arlar hok tagun anumulo a mangis a tarai ot.’ *Lo 18:15*

<sup>38</sup> E Moses i kes taum ona maindala tagun nating, a tarai Israella, ting na hanua bel, pa angelo i warwara teteki saot na Mangir Sinai. Pa i kibas a warwara na lalaun pa i tumus akesi sur dala.

<sup>39</sup> “Ika na maindala tagun nating bel la mang sur lar longor ta e Moses. Pa bel la malmaling suri, pa la nuknuk ulak utumo e Ijip. <sup>40</sup> Pa la atai e Aron mang, ‘Ur tol pas anundala al god sur lar nigon dala, anasa e Moses, esaning i nigon purum pas dala mitimo e Ijip, bel ma dala tasman asaning ka hanot onoi.’ *Kisim Bek 32:1* <sup>41</sup> Ana pukakiarla ning, la tol pas a natar a bulumakau ana gol, pa la gas ana ngen kunla pa la artabar teteki. <sup>42</sup> Pa e God i talingir kusun la, pa i noren la, sur lar lotu tetek a komkomaila, larning di ka tumus tari ting na buk anuna propetla mange,

‘Mulo a tarai Israel,  
diat a bonot a rau ning mulo  
kes ting na hanua bel,

bel mulo artabar, pa bel mulo umkol ta inagoi sur mulor artabar onoi tetek iau.

<sup>43</sup> Mulo los a rumai lotu anuna asasongo na god Molek, pa a manar a nangnang anuna numulo a asasongo na god Repan.

A ututnala ning mulo tol la, sur mulor lotu tetek la.

Ar kepsen sen mulo' *Amos 5:25-27* pa mulor han bolos e Babilon pa utumo.

<sup>44</sup> "A rumai sel ning i apuasai mang e God i kes tetek na maindala tagun nating. A rumai sel ning i kes taum onla ting na hanua bel. Di toli muri ot a warwara ane God tetek e Moses arlar ana manar ning i oroi tari. <sup>45</sup> Pa na tumtubundala tagun nating la sarani tetek na natnatunla. Pa la male la los amoni ning e Josua i nigon la, sur lar kibas a hananuala kusun a taraila miting na matanitula ning e God i lu sen la. Pa i kes tingia tuk ana rau ane Dewit, <sup>46</sup> i ning e God i mang kol suri. Pa e Dewit i nunung e God sur ir tol ta rumai, sur a tarai ane Jekop lar lotu ono. <sup>47</sup> A rumai ning, e Solomon i toli. <sup>48</sup> Ika e God ning i Leklek Kol bel i kes ting na rumaila ning a tarai la toli, larning a propet i atongi mange,

<sup>49</sup> 'A Leklek i atongi mange: A langit anuka keskes na king, pa a rakrakan hanua a utna ning a suah naur a hak saot ono.

Pa i mangmangasa, i topas mulo sur mulor tol anak ta rumai?

Kanaha anuka pukna na manah?

<sup>50</sup> Mangasa, bel a ngen kuk ana ututnala rop ne?" *Ais 66:1-2*

<sup>51</sup> Pa e Stiwen i atai a tarai a kiwung mange, "Mulo na tabun longorla, a balamulo i bakbak kusun e God pa a talngamulo i kutkut. Mulo sairas liknan a Talngan Tabu, arlar ana numulo na mangis a tarai tagun nating. <sup>52</sup> Esi

na propet ning anumulo a mangis a tarai tagun nating, bel la alaulau i? La umkol la, ning la warwara nigo ana tinan ot ute anuna Tena Tostos, ning mulo ka tuam tari, pa mulo ka umkol tari, <sup>53</sup> mulo ning mulo ka los a Warkuraila ane God, ning a angelola la sarani tetek mulo, ika bel mulo muri."

*Di wolot amat e Stiwen*

<sup>54</sup> Ning a tarai a kiwungla la longor a warwarala ane Stiwen, la balakut kol, pa la harat pap suri. <sup>55</sup> E Stiwen i bukus taum ana Talngan Tabu, i tandai usaot na langit, pa i oroi a matatar ane God, pa e Iesu ning i tur ana sot a kuna e God. <sup>56</sup> Pa i atongi mang, "Oroi! A oroi a langit i sapang, pa a Nat a Barsan i tur ana sot a kuna e God." <sup>57</sup> Pa la bari ana tnan elngenla, la tong alar a talnganla, pa la dun alari. <sup>58</sup> La rihi kusun a hanua, pa la wololoti. Pa la ning la arup e Stiwen, la pak sen anunla na kaenla ning la polpol alar anunla na minmar ono, pa la suai ting na naur a hana ning a barman a risana e Sol. <sup>59</sup> Ning kaning ot la wololoti, e Stiwen i nunung mange, "Leklek e Iesu, ur los pas a inguk." <sup>60</sup> Pa i kes ana bokona hana, pa i kukuk mang, "Leklek, gong u keles a toltol laulau ne la toli." Ning i atong aropi larne, i mat.

## 8

<sup>1</sup> E Sol i malmaling taum onla sur dir umkol e Stiwen.

*E Sol i alaulau a tarai a lotula*

Ana pukakiar ning, a tarai la turpasi sur lar alaulau a tarai a lotula saot e Jerusalem, pa a tarai a lotula la han sarara ana naur a papar e Juda pa e Samaria. Ika, a aposella bel la han. <sup>2</sup> A momol na tena lotula la por e Stiwen, pa la domos rakrakai suri. <sup>3</sup> Ika e Sol i alaulau a tarai a lotula, i kas ana nunla na rumaila, pa i rih a taraila

pa gurarala, pa i akas la ting na rumai a dodot.

*Di warawai ana Wakak a Warwara tumo ana papar Samaria*

<sup>4</sup> Pa la ning la han sarara misaot e Jerusalem, la warawai ana Wakak a Warwara ting na hananuala ning la han ia. <sup>5</sup> Pa e Pilip i han uting na tnan hanua tumo na papar Samaria, pa i warawai o e Karisito tetek la. <sup>6</sup> Ning a kunum a tarai la longor a warwara ane Pilip, pa la oroi a ututnala na kulkulan ning i toli, la mang kol sur lar longor a warwarala ning i atongi. <sup>7</sup> I kepsen a motla kusun a galis, pa ning a motla la purum, la kukuk rakrakai. Pa i alangolango pas a galis ning a palaonla i mat, pa la ning bel la tolsot pas a tinan. <sup>8</sup> Pa a taraila misaot na hanua ning, la gas kol.

*E Saimon a tena wah*

<sup>9</sup> Ning a barsan mitingia, a risana e Saimon, i sira wah pa i akulkulan a tarai Samaria ana ututnala ning i toli. Pa i iau-nani namatana taraila. <sup>10</sup> Pa a taraila rop, a leklekla taum ana tarai oros ka, la hanranwai i, pa la atongi onoi mang, “A barsan ne i tong akes a rakrakai ane God, a rakrakai ning di atongi mang A Tnan Rakrakai.” <sup>11</sup> Pa la longor wakaki, anasa ka bongnan la la sira kulkulan ana nuna toltol na wahla.

<sup>12</sup> Ika onone, a taraila pa gurarala la tortorot ana Wakak a Warwara ning e Pilip i warawai onoi, ana matanitu ane God, pa ana risana e Iesu Karisito, pa di baptais la. <sup>13</sup> E Saimon otleng i tortorot, pa ning di ka baptais tari, i mur mokos e Pilip. Ning e Saimon i oroi a akinalangla pa a ututna na kulkulan i toli, i kulkulan kol onoi.

<sup>14</sup> A aposella ning la kes saot e Jerusalem, la longori mang a tarai Samariala otleng la ka longor ana warwara ane God, pa la sune e Pita

pa e Jon tetek la. <sup>15</sup> Ning dia hanot, dia nunung sur la, sur lar kibas a Talngan Tabu, <sup>16</sup> anasa belot i kes ona tik ta halinla, di baptais tar la ka ana risan a Leklek e Iesu. <sup>17</sup> Pa e Pita pa e Jon dia suah a kundiau saot onla pa la bot kibas a Talngan Tabu.

<sup>18</sup> Ning e Saimon i oroi mang di tabar la ana Talngan Tabu ning naur a aposel dia suah a kundiau saot onla, i los a mani tetek diau. <sup>19</sup> Pa i atongi mang, “Mur saran a rakrakai ning tak, sur iau otleng ar suah a kuk saot on tik, pa dir tabari ana Talngan Tabu.” <sup>20</sup> Pa e Pita i kelesi mang, “U taum ana numa mani mur hirua, anasa u nuki mang ur lou a artabar ane God ana mani. <sup>21</sup> Bel anum ta tiniba pa ta tukna ana titol ne, anasa a balam bel i tostos namatana e God. <sup>22</sup> Ur lingir a nuknukim kusun a laulau a ginim ne, pa ur nunung tetek a Leklek. Ngandek ir kepsen a laulau a nuknukim. <sup>23</sup> Anasa a oroi u mang u bukus ana laulau a nuknuk, pa a laulau a ginim i dot akes u.” <sup>24</sup> Pa e Saimon i kelesi mang, “Mur nunung tetek a Leklek sur iau, sur gong ta utna ning mu atong tari, ir hanot hok.”

<sup>25</sup> Ning e Pita pa e Jon dia ka warwara talapor tar ana ututnala ning a Leklek i toli, pa dia ka warawai tar ana nuna warwarala, dia ulak usaot e Jerusalem. Ning dia han, dia warawai amon ana Wakak a Warwara ting na galis a hanua ana papar Samaria.

*E Pilip dia arsongo taum ana ning a barsan a te Itiop*

<sup>26</sup> Ning a angelo anuna Leklek i atai e Pilip mang, “Ur tur, pa ur han utumo ana matana tobar sur a ngas misaot e Jerusalem utumo e Gasa, a ngas ning i han potora hanua bel.” <sup>27</sup> Pa e Pilip i kamtur, pa i han. Pa dia arsongo taum ana ning a barsan mitimo e Itiop, a ningnigo na tena tai alar ana

ututna anuna Kandake, a kwin anuna tarai Itiop. A barsan ne i han usaot e Jerusalem pa i lotu tetek e God. <sup>28</sup> Ning i ulak ma sur anuna hanua, i kes ana keskes a tinan, pa i was a buk ane propet Aisaia. <sup>29</sup> Pa a Talngan Tabu i atai e Pilip mang, “Ur han milau a keskes a tinan ning, pa mur armuri.” <sup>30</sup> Pa e Pilip i dun teteki, pa i longor a barsan ning i was a buk ane propet Aisaia, pa i dekeni mang, “I mangmangasa, u talapor ot ana sa ning u wasi?” <sup>31</sup> Pa i kelesi mang, “Ar tasman mangmangasa i, ning bel tik ir atalapor i tetek iau?” Pa i nunung e Pilip sur ir abit teteki pa diar kes taum.

<sup>32</sup> Ine, a warwarala ting na Buk Tabu ning i wasi:

“Di beni arlar ana sipsip,  
sur dir umkoli.

Bel i warwara,  
arlar ana nat a sipsip ning i tur  
longoroi tetek esining ir kot  
a hihna.

<sup>33</sup> Di ame tari, pa bel di atostos a warkurai onoi.

Esi ir warwara ana nuna kakakla?  
Anasa di kepsen anuna lalaun  
mite ana rakrakan hanua.”  
*Ais 53:7-8*

<sup>34</sup> A te Itiop i deken e Pilip mange, “Ur atai iau, a propet i warwara o esi? Ono i ot, o ana tik masik?” <sup>35</sup> Pa e Pilip i turpas a papak teteki. I atai i ana Wakak a Warwara o e Iesu, turpasi ot ana buk ning a te Itiop i wasi.

<sup>36-37</sup> Ning dia han amon ana ngas, dia hanot ana ning a malum, pa a te Itiop i atai e Pilip mange, “Oroi, a malum ne. Asa ir sairas iau sur gong di baptais iau?”\* <sup>38</sup> Pa i sairas a keskes a tinan sur ir tur. Pa dia han purum uting na malum pa e Pilip i baptais. <sup>39</sup> Ning dia saur kusun a malum, a inguna

Leklek i kepsen e Pilip. Pa a te Itiop bel ma i oroi ulaki, pa i han ana nuna tinan taum ana tnan gasgas ting na nuna lalaun. <sup>40</sup> Pa e Pilip i oroi mang i kanumo ma na hanua Asdot. Pa ning i han mitingia, i warawai amon ana Wakak a Warwara ting na hananuala tuk i hanot tumo e Sisaria.

## 9

*E Sol i lingir a nuknukna  
(Ap 22:6-16; 26:12-18)*

<sup>1</sup> Ana pukakiarla ning, e Sol i mang kol sur ir um amat a tarai a asaer anuna Leklek. I han tetek a ningnigo na tena artabar tetek e God, <sup>2</sup> pa i nunungi mang, “Ur tumus al pas sur ar losi utumo na rumai lotula to e Damaskus. Dir tumusi mang, ning ar pastetek al taraila pa al gurarala ning la mur a Ngas anun e Karisito, ar dat pas la usaot e Jerusalem, sur lar dodot.”

<sup>3</sup> Ning i han milau e Damaskus, a tnan talapor misaot na langit i hanot kulkulan pa i sasai talilisi. <sup>4</sup> I punga purum tumo lapiu, pa i longor a elngena mainla i atai i mange, “Sol, Sol, sur asa u alaulau iau\*?” <sup>5</sup> Pa e Sol i dekeni mange, “Leklek, esi u?” Pa i kelesi mange, “Iau e Iesu ning u alaulau iau. <sup>6</sup> Onone ur tur pa ur hanot tumo e Damaskus, pa dir atai u ana sa ning ur toli.”

<sup>7</sup> Pa a taraila ning la armuri, la kulkulan pa la matmataut pa bel la warwara, anasa la longor a elngena mainla, ika bel la oroi. <sup>8</sup> E Sol i kamtur miting lapiu, pa ning i palpalas matana, bel i oroi sot ta utna. Pa la beni ana kuna utumo e Damaskus. <sup>9</sup> Pa i kes tingia natola pukakiar, a matana i kut, bel i hangan pa bel i gang.

\* **8:36-37:** Dingla na tena tastasmai ana Buk Tabu la nuki mang dingla na warwarala otleng i kes te na ves ne. I manglarne: *Pa e Pilip i atai i mange, “Ning u tortorot ana balam rop, i wakak ka sur dir toli.” Pa a te Itiop i kelesi mang, “A tortorot mang e Iesu Karisito a Nat e God’.* \* **9:4:** Ning e Sol i alaulau a tarai anuna Leklek i alaulau ot a Leklek.

<sup>10</sup> Ning a barsan tagun a tarai a asasaerla, a risana e Ananias, i kes tumo e Damaskus. A Leklek i kabah i ana tatatai mange, “Ananias!” Pa e Ananias i kelesi mange, “Leklek, iau ot ne.” <sup>11</sup> Pa a Leklek i atai i mange, “Ur tur, pa ur han sur a rumai ane Judas, ana ngas ning di atongi a Tostos a Ngas. Pa ur kabah sur e Sol, a te Taso, kanumo i nunung. <sup>12</sup> Ana tatatai, e Sol i oroi ning a barsan, a risana e Ananias, i kas teteki, pa i suah naur a kuna saot onoi sur ir tai ulak.” <sup>13</sup> Pa e Ananias i kelesi mang, “Leklek, ia ka longor a galis a warwara ana barsan ning, pa a toltol laulau ning i toli ona anuma tarai saot e Jerusalem. <sup>14</sup> Pa a leklek a tena artabarla tetek e God la malmaling seni sur ir dat la rop ning la lotu ana risam. Pa i hanot te e Damaskus.” <sup>15</sup> Ika a Leklek i atai i mange, “Ur han ka, anasa ia ka aslang tari sur i anuka tena titol, ir warwara talapor ana risak tetek a taraila ning bel a tarai Israel, tetek a kingla, pa tetek a tarai Israel otleng. <sup>16</sup> Pa ar asangani mang ir kilang a galis a kankan ana risak.”

<sup>17</sup> Lamur e Ananias i han, pa i kas ting na rumai ning e Sol i kes ia. I suah naur a kuna saot onoi, pa i atai i mange, “Tasiklik e Sol, a Leklek e Iesu, i ning i tur ot tetek u ting na ngas ning u han ute, i sune iau ute sur ur tai ulak, pa ur bukus ana Talngan Tabu.” <sup>18</sup> Pa ning a utna i arlar ana palakotoi a sis i punga purum kakat kusun naur a kalso matana, pa i tai ulak. I tur pa di baptaisi. <sup>19</sup> Ning i hangan pas, a palaona i rakrakai ulak.

### *E Sol i warawai tumo e Damaskus*

E Sol i kes ulak pas tetek a tarai a asasaerla tumo e Damaskus. <sup>20</sup> Pa i turpas a warawai kakat ana rumai lotula anuna tarai Juda, mang e Iesu a Nat e God. <sup>21</sup> Pa la rop ning la longori, la kulkulan onoi pa la

atongi mang, “A barsan kaning, i umkol la ning la lotu tetek e Iesu saot e Jerusalem. Pa ne i hanot ute sur ir dat pas a tarai a lotu o e Iesu, tetek a leklek a tena artabarla tetek e God.” <sup>22</sup> Ika a warawai ane Sol i rakrakai pa i atong a ututnala ning i amomol pasi mang e Iesu ot a Karisito. Pa a tarai Juda ning la kes tumo e Damaskus la nuknuk kol ana nuna na warwara, pa bel la kelesi.

<sup>23</sup> Ning a galis a pukakiar ka rop, a tarai Juda la warwara taum sur lar umkol e Sol. <sup>24</sup> Ika e Sol ka tasmani mang la warwara taum suri. Ana moromla pa a kabakiarla a matanla i makas sur a tamanla ana hanua sur e Sol, sur lar umkoli. <sup>25</sup> Ika anuna kakak a asaer lar ben pasi ana morom, pa la alorong purumi ana rat ting na ris a woroh ning di tol alar a hanua ono.

### *E Sol i kes saot e Jerusalem*

<sup>26</sup> Ning e Sol i hanot saot e Jerusalem, i tohoi sur ir kes taum ana tarai a asasaerla, ika la rop la matatani, anasa bel la tortorot ono i mang i otleng ning tagun a tarai a asasaer. <sup>27</sup> Ika e Barnabas i ben pasi, pa dia armuri tetek a aposella, pa i atai la mang, “E Sol ka oroi tar a Leklek, pa a Leklek i warwara teteki ana nuna tinan utumo e Damaskus. Pa ning i kes tumo e Damaskus, i warawai ana risana e Iesu pa bel i matmataut.” <sup>28</sup> Pa e Sol i kes taum ana tarai a lotu saot e Jerusalem, i han taltal, pa i warwara ana risana Leklek, pa bel i matmataut. <sup>29</sup> I warwara pa i keles a kabahla anuna Judala ning la warwara Grik, ika la mang sur lar umkoli. <sup>30</sup> Ning na tastanala ana tortorot la longori, la beni utumo e Sisaria, pa lamur la sune seni utumo e Taso.

<sup>31</sup> Lamur a tarai a lotula ting na hananuala rop ana natol a papar Judia, e Galili pa e Samaria, la kes ana bal molmol. Pa a lotu i

rakrakai, pa la kes na hanrawai tetek a Leklek, a Talngan Tabu i wunan la, pa a wawas ana tarai a lotula i han kas.

*E Pita i kes tumo e Lida pa e Jopa*

<sup>32</sup> Ning e Pita i han amon ana hananuala, i geren alar a tarai ane God otleng tumo e Lida. <sup>33</sup> Tingia, i pastetek ning a barsan, a risana e Aineas, a palaona i mat. Ka arlar ana siwal a rau, i borbor ka ting na logo ngasna. <sup>34</sup> Pa e Pita i atai i mange, "Aineas, e Iesu Karisito i alangolango u. Ur tur, pa ur in a logo ngasim." Pa i tur kakat. <sup>35</sup> La rop ning la kes ana hanua e Lida pa e Saron, la oroi a barsan ning, pa la lingir a nuknukinla tetek a Leklek.

<sup>36</sup> Ning a hane tagun a tarai a asasaer i kes tumo e Jopa, a risana e Tabita, ana warwara Grik mang e Dokas. A hane ne, ka tol tar a galis a wakak a titol, pa a tena artabar tetek a kapan na taraila. <sup>37</sup> Ana pukakiarla ning e Pita i titol tumo e Lida, e Dokas i kurah, pa i mat. Ning la ka pukur tari, la aborbor tari ona ning a tuka rumai saot. <sup>38</sup> E Lida i kes milau e Jopa, pa ning a tarai a asasaer miting e Jopa la longori mang e Pita kanumo e Lida, la sune naur a barsan teteki pa dia angongosi mang, "Maris mila, ur lamut kapit tetek mila."

<sup>39</sup> E Pita i han taum on diau. Ning i hanot, la beni usaot ana tuka rumai. Pa a laola rop la tur talilisi pa la domos. Pa la asangan a kolosla taum ana kaenla, ning e Dokas i suk tar la ning kaning ot i laun. <sup>40</sup> E Pita i sune purum la rop miting na tuka rumai ning, pa i kes ana bokona hana, pa i nunung. I talingir tetek a hane ning i mat, i atongi mang, "Tabita, ur tur." Pa e Tabita i palpaldas matana, pa ning i oroi e Pita, i kes kakat. <sup>41</sup> Pa e Pita i tuslan a kuna teteki, pa i dat aturi. Pa i kabah pas a tena tortorotla

pa a laola, pa i saran tar e Tabita tetek la, ka laun. <sup>42</sup> A utna ne i talapor pa la rop la tasmani tumo e Jopa, pa a galis la tortorot ona Leklek. <sup>43</sup> E Pita i kes suai ulak te Jopa taum ning a barsan a risana e Saimon, a tena toltol utna ana palaona inagoila.

## 10

*E Konilius ning bel a te Juda i arsune sur e Pita*

<sup>1</sup> Ning a barsan kanumo e Sis-aria, a risana e Konilius, i ning a ningnigo anuna ning a mar a tarai a harum, la tagun a tnan kunum a tarai a harum mitimo e Itali. <sup>2</sup> E Konilius pa la rop ning la kes ting na nuna rumai la na momol a tena lotula pa na tena hanrawai tetek e God. E Konilius ning a tena artabar tetek a kapan a tarai, pa a pukakiarla rop i nunung tetek e God.

<sup>3</sup> Ning a rah ana natola matana Kamis i oroi ning a tatatai. I oroi talapor a angelo ane God i hanot teteki pa i kabah i mang, "Konilius!" <sup>4</sup> Pa e Konilius i ngoson rakrakai i ana matmataut, pa i dekeni mang, "Leklek, asaning?" Pa a angelo i kelesi mange, "Anum a nunungla taum ana artabarla tetek a kapan a tarai la han usaot tetek e God, pa la tur namatana, pa i gas ana sa ning u toli. <sup>5</sup> Onone ur sune al tarai utumo e Jopa, sur lar ben pas ning a barsan, e Saimon, i ning a risana otleng e Pita. <sup>6</sup> Kaning i kes napire maurana e Saimon, i ning a tena toltol utna ana palaona inagoila. Anuna rumai i tur milau a tasi." <sup>7</sup> A angelo ning i warwara teteki i han, e Konilius i kabah pas naur tagun a anuna tena titolla, pa ning a tena lotu tagun anuna tarai a harum. <sup>8</sup> I atai ditol ana ututnala rop ne, pa i sune ditol utumo e Jopa.

*A tatatai anune Pita*

<sup>9</sup> Ana pukakiar lamur tana, ditol han, pa ana tnan kamis ning ditol han milau sur a hanua Jopa, e Pita i abit kas usaot na pukul a rumai, sur ir nunung. <sup>10</sup> Ning i nunung, i kilang a munurak pa i mang sur ir hangan. Kaning ot di sang a utna na hangan, i oroi a tatatai. <sup>11</sup> I oroi a langit i sapang, pa ning a utna i arlar ana tnan kaen na polpol, di tong pas diat a ris ono pa di alorong purumi teteki. <sup>12</sup> Tingui onoi a urmatana inagoi, pa la ning la kawar, pa manila otleng. <sup>13</sup> A elngen takai i atai e Pita mange, "Pita, ur tur, ur umkol la, pa ur ien la." <sup>14</sup> Pa e Pita i kelesi mange, "Leklek, bel! Bel a ien tar ta utna ning di arsairas ono pa i dur na matam." <sup>15</sup> Pa elngen takai i keles ulaki mange, "A utna ning e God ka atotoh tari, gong u atongi mang a dur a utna." <sup>16</sup> A utna ne di toli munatol, pa di dat kas kakat a kaen usaot na langit.

<sup>17</sup> Kaning ot e Pita i nuknuk kol ana kamkama tatatai ne, natol a barsan, ning e Konilius i sune ditol, ditol ka seren pas a rumai ane Saimon, pa ditol tur ting na taman. <sup>18</sup> Ditol arkabah kas mange, "E Saimon ning a risana otleng e Pita kaning ui?" <sup>19</sup> Kaning ot e Pita i nuknuk ana tatatai, a Talngan Tabu i atai i mange, "Oroi! Natol a barsan kaning ditol tai sur u. <sup>20</sup> Ur tur, pa ur han purum. Gong u nuknuk kol, ur han pa mulor armuri, anasa iau ot a sune ditol ute." <sup>21</sup> E Pita i purum tetek ditol pa i atai la mange, "Iau kane ning mutol tai sur iau. Asa ning mutol tai sur iau suri?" <sup>22</sup> Ditol kelesi mang, "E Konilius, a ningnigo anuna ning a mar a tarai a harum i sune mitol. E Konilius i ning a tena tostos pa a tena hanrawai tetek e God, pa a tarai Juda rop la hanrawai i. A angelo ane God i atai tari mang ir arsune pas u utumo ana nuna rumai, sur ir lon-

gor anum ta warwara." <sup>23</sup> E Pita i ben kas ditol sur ditol ar borbor pas.

*E Pita i hanot ana rumai anune Konilius*

Ning i kabakiar ot, e Pita i tur pa la han, pa dingla na tarai ning la tas ana tortorot misaot e Jopa la armuri. <sup>24</sup> E Konilius i tasmani mang lar hanot, i ben taum pas na mainala, pa na halhalna, pa la kes nanan e Pita. Pa ning ka takai a pukakiar alar tar a tinan anune Pita la, la hanot tumo e Sisaria. <sup>25</sup> Ning e Pita i kas, e Konilius i han barati, pa i punga purum ana hanrawai ting na naur a hana. <sup>26</sup> Ika e Pita i dat atur pasi, pa i atai i mange, "Ur tur, iau otleng a barsan ka."

<sup>27</sup> Ning dia warwara amon, e Pita i kas tar ana kunum a tarai kaning la ka kes taum. <sup>28</sup> Pa i atai la mange, "Mulo tasmani mang di arsairas ting na warkurai mang mila na te Judala, milar lasan taum tik ning bel tagun a tarai Juda, pa milar gereni otleng. Ika e God ka asangan tar iau mang gong a atong tik mang i dur namatana e God, pa gong a nuki mang di arsairas tetek mila ning milar lasan taum onoi. <sup>29</sup> Pa bel a ngongoio ning di arsune sur iau ute. Pa ar deken mulo: Mulo arsune sur iau sura?"

<sup>30</sup> Pa e Konilius i kelesi mange, "Ka diat a pukakiar alar tar anuka nunung ting na nuka rumai ana matana kamis larne, ona natola matana kamis ana rah. A oroi ning a barsan i mermer ana kaen ning i pilpil, i hanot kulkulan pa i tur salanigo tak, <sup>31</sup> pa i mang, 'Konilius, e God ka longor anum na nunung, pa ka tasman anum na artabarla tetek a kapan a taraila. <sup>32</sup> Ur arsune utumo e Jopa, sur e Saimon, ning a risana otleng e Pita. I wasira e Saimon, a tena toltol utna ana palaona inagoila, i kes milau a tasi.'

<sup>33</sup> “Pa a arsune kakat sur u. I wakak kol ning u lamut ute. Onone mila rop mila kes namatana e God, sur milar longor a warwarala rop ning a Leklek ka atai tar u sur ur atai mila ono.”

### *E Pita i warawai*

<sup>34</sup> Lamur e Pita i atongi mange, “A tasman momoli mang, e God bel i tasman a purpurngis. <sup>35</sup> I malmaling pas a urmatana tarai rop, ning la hanrawai i pa la titol ana tostosna. <sup>36</sup> Mulo tasmani mang e God ka saran sen anuna warwara tetek a tarai Israel. A warwara ne, i a Wakak a Warwara ana bal molmol kamna o e Iesu Karisito, i ning a Leklek anuna tarai rop. <sup>37</sup> Mulo ka tasman asaning i hanot ana hananuala tumo e Israel, turpasi tumo e Galili lamur tana baptais ning e Jon i warawai ono. <sup>38</sup> Mulo tasmani mang e God ka saran tar a Talngan Tabu taum ana rakrakai tetek e Iesu, a te Nasaret. Ning i han taltal, i tol a wakak a titolla, pa i alangolango pas la, ning la kes nahai a warkurai ane Satan. E Iesu i tol a ututnala ne, anasa e God i kes taum onoi.

<sup>39</sup> “Pa mila na tena warwara talapor ana ututnala rop ning mila oroi, ning i sira toli ana hananuala anumila a tarai Juda, pa saot e Jerusalem. Di umkoli saot na rakai kutus, <sup>40</sup> ika e God i akamtur ulak pasi kusun a minat ana natola pukakiar, pa i asangani tetek a tarai. <sup>41</sup> Bel tetek a tarai rop, tetek la ning e God ka aslang nigon tar la sur lar oroi pa lar warwara talapor ono, mila ning mila hangan pa mila gang taum onoi, ning i laun ulak kusun a minat. <sup>42</sup> I sune mila, sur milar warawai pa milar warwara talapor tetek a tarai, mang i ot ning e God ka aslang pasi sur ir tena warkurai anunla ning la laun pa la ning la ka mat. <sup>43</sup> A propetla rop la warwara o e Iesu, mang esining i tortorot onoi, dir

kepsen anuna na toltol laulaula ana risana.”

### *A Talngan Tabu i han purum onla ning bel a tarai Juda*

<sup>44</sup> Kaning ot e Pita i warwara ting na rumai ane Konilius, a Talngan Tabu i han purum onla rop, ning la longor a warwara ne. <sup>45</sup> Dingla na tena tortorot tagun a tarai Juda ning la armuri taum o e Pita, la kulkulan, mang e God i artabar otleng ana Talngan Tabu tetek a tarai ning bel a tarai Juda. <sup>46</sup> Anasa la longor la, ning la warwara ana urmatana warwara, pa la atong leklek pas e God. <sup>47</sup> Lamur e Pita i mang, “Bel tik ir sairas lar pas la ne sur gong di baptais la ana malum. Anasa a Talngan Tabu ka kes onla arlar larning i kes ondala.” <sup>48</sup> Pa i arsune sur dir baptais la ana risana e Iesu Karisito. Lamur la nunung e Pita sur ir kes taum onla al pukakiar.

## 11

### *E Pita i warwara talapor ana nuna titol*

<sup>1</sup> A aposella pa la ning la tas ana tortorot ning la kes tumo e Judia, la longori mang a tarai otleng ning bel a tarai Juda la ka tortorot ana warwara ane God. <sup>2</sup> Pa ning e Pita i han usaot e Jerusalem, a taraila ning la mang sur a tena tortorotla rop dir kot talilis a palaonla, la bor i. <sup>3</sup> La atai i mange, “U kas uting na rumai anuna tarai ning bel di kot talilis a palaonla, pa u hangan taum onla.”

<sup>4</sup> E Pita i papak tostos tetek la ana ututnala rop ning i hanot mange, <sup>5</sup> “Ning a kes ana hanua Jopa, a nunung, pa a oroi ning a tatatai. A oroi ning a utna i arlar ana tnan kaen na polpol ning di tong pas diat a ris pa di alorong purumi misaot na langit tetek iau. <sup>6</sup> Ning a tai tingui ono, a oroi a inagoila, la ning di lawat la pa dingla



na rokoiona, pa la ning la kawar, pa manila. <sup>7</sup> Pa a longor a elngen takai i atai iau mange, 'Pita, ur tur, ur umkol la, pa ur ien la.' <sup>8</sup> Pa a kelesi mange, 'Leklek, a momolna ot! Bel a ien tar ta utna ning di arsairas ono pa i dur namatam.' <sup>9</sup> Pa a elngen takai misaot na langit i atong ulaki mange, 'A utna ning e God ka atotoh tari, gong u atongi mang a dur a utna.' <sup>10</sup> A utna ne di toli munatol, pa di dat kas ulaki usaot na langit.

<sup>11</sup> "Ono otning, natola barsan ning di sune ditol mitimo e Sisaria tetek iau, ditol hanot ting na rumai ning a kes ono. <sup>12</sup> Pa a Talngan Tabu i atai iau sur ar han taum on ditol, pa gong a nuknuk kol. Diono na barsan otleng ne, ning mila tas ana tortorot, mila han taum on ditol utumo e Sisaria pa mila kas uting na rumai ane Konilius. <sup>13</sup> Pa i atai mila mang i oroi a angelo i hanot ana nuna rumai pa i atai i mange, 'Ur arsune utumo e Jopa sur e Saimon, ning a risana otleng e Pita. <sup>14</sup> Pa ir atai u on al warwara ning ir alaun u pa la rop ning la kes ting na numa rumai.' <sup>15</sup> Ning a turpas a warwara, a Talngan Tabu i kes onla, larning i toli ondala nating. <sup>16</sup> Pa a nuk pas a warwara anuna Leklek, ning i atongi mange, 'E Jon i baptais ana malum, pa lamur dir baptais mulo ana Talngan Tabu.' <sup>17</sup> E God ka saran tar a artabar tanla, larning ka saran tari tan dala, ning dala tortorot ana Leklek e Iesu Karisito. Pa esi na ngas a barsan iau, ning ar sairas e God?"

<sup>18</sup> Ning la longor a warwara ne, la tuk ana warwara, pa la atong leklek e God mange, "E God ka tol tar a ngas sur la ning bel a tarai Juda lar lingir a nuknukinla pa lar laun."

*A Wakak a Warwara i hanot tumo e Antiok*

<sup>19</sup> A tarai a lotu ning la han sarara misaot e Jerusalem anasa a tarai la alaulau la lamur ona minat e Stiwen, la han bakbak utumo na papar Ponisia, a lolo Saiprus, pa a hanua Antiok. La warwara ka tetek a tarai Juda ana Wakak a Warwara o e Iesu. <sup>20</sup> Ika dingla na tarai tagun a tarai a lotu ning, a tarai Saiprus taum ana tarai Sairini, la hanot tumo e Antiok pa la atai a tarai ning bel a tarai Juda otleng ana Wakak a Warwara ona Leklek e Iesu. <sup>21</sup> A rakrakai ana Leklek i kes onla ning la warwara talapor, pa galis kol la tortorot pa la lingir a nuknukinla tetek a Leklek.

<sup>22</sup> Ning a tarai a lotu saot e Jerusalem la longor a warwara ne, la sune e Barnabas utumo e Antiok. <sup>23-24</sup> E Barnabas i ning a wakak a barsan, i bukus ana Talngan Tabu taum ana tortorot. Ning i hanot pa i oroi a marmaris ane God ning i titol onla, i gas ono, pa i wunan la rop sur lar tur momol ana tortorot ana nunla lalaun tetek a Leklek. Pa galis a tarai la lingir a nuknukinla tetek a Leklek.

<sup>25</sup> Lamur e Barnabas i han utumo e Taso, sur ir tai sur e Sol. <sup>26</sup> Ning i seren pasi, i beni utumo e Antiok. Ning a kidol a rau dia kes taum ana tarai a lotu tumo, pa dia asaer a galis a tarai. Bot ning di atong a tarai a asasaer tumo e Antiok mang a te Karisitola.

<sup>27</sup> Ana haem ning, dingla na propet la han misaot e Jerusalem utumo e Antiok. <sup>28</sup> Ning tagun la, a risana e Agabus, i tur, pa ana rakrakai ana Talngan Tabu i warwara nigo ana tnan munurak ning ir kibas a hananuala rop. A munurak ne i hanot ning e Klodius i warkurai tumo e Rom. <sup>29</sup> Pa a tarai a asasaer la warkurai pas mang la rop taktakai lar artabar arlar ana nunla na gongonla tetek a tarai a lotula ning la kes ana

papar Judia. <sup>30</sup> Pa la saran tari. E Barnabas pa e Sol dia losi tetek a ningnigola ana lotu saot e Jerusalem.

## 12

*Di akas tar e Pita ana rumai a dodot*

<sup>1</sup> Ana pukakiarla ning, king Herot i dat pas dingla na tarai tagun a tarai a lotu sur ir alaulau la. <sup>2</sup> I arsune tar sur e Jems, tas e Jon, pa di umkoli ana liwan na harum. <sup>3</sup> Ning i oroi a tarai Juda la gas ana minat e Jems, i dat pas e Pita otleng ana ning a pukakiar ana lotu ana bret ning belal is ono. <sup>4</sup> Ning ka dat pas e Pita, lamur i akasi uting na rumai a dodot. Pa diat a kunum a tarai a harum la tai alari, la areiat ana ning a kunum. E Herot i mang sur ir beni sur dir warkurai i namatana tarai, lamur ana lotu na Han Lakai. <sup>5</sup> Ning e Pita i kes ting na rumai a dodot, a tarai a lotu rop bel la manah ana nunung tetek e God suri.

*A Leklek i alaun pas e Pita kusun a kuna e Herot*

<sup>6</sup> Ana morom lanigo ona pukakiar ning e Herot ir ben pas e Pita sur a warkurai, e Pita i borbor tar na arpotor tana naur a tena harum. La ka dot tar naur a kuna taum ana naur a sen. Pa dingla na tena harum la tur ting na taman pa la tai alar a rumai a dodot. <sup>7</sup> A angelo anuna Leklek i hanot kulkulan teteki, pa a talapor i sasai tingui na rumai a dodot. I dapis amata e Pita ana risna, pa i atai i mange, "Tur kapit!" Pa sen i tapapak kusun naur a kuna. <sup>8</sup> Pa angelo i atai i mange, "Ur mermer, pa ur suah pas anum naur a su." Pa i toli larning. Pa angelo i atai ulaki mange, "Ur polpol alar u ana numa kaen, pa ur mur iau." <sup>9</sup> E Pita i mur purumi kusun a rumai a dodot. E Pita i nuki mang a utna ne a angelo i toli, bel a momolna,

i nuki mang i oroi a tatatai ka. <sup>10</sup> Dia bolos a ningnigo na tena tai alar, pa a munaur na otleng, lamur dia hanot ting na taman a aen, ning di purpurum onoi utumo a tnan hanua. Ning dia tur tingia, a taman i sapang oros ka, pa dia purum. Ning dia hanot uting na pukna ning a ngas i han sarara, a angelo i rorom kakat kusuni.

<sup>11</sup> Ning a nuknukna e Pita i talapor, i atongi mange, "A tasmam momoli mang a Leklek i sune anuna angelo, pa i alaun pas iau kusun a kuna e Herot, pa a utunala ning a tarai Juda la mang sur lar toli hok."

<sup>12</sup> Ning i tasman lalani mang ka langolango, i han sur a rumai ane Maria, tana e Jon ning a risana otleng e Mak. A galis a tarai la kes taum tingia, pa la nunung. <sup>13</sup> E Pita i pinpindir ting na taman, pa ning a tena titol a basbas, a risana e Roda, i dun sur a taman. <sup>14</sup> Ning i longor lalan pas a elngena e Pita, i gas. Pa ana nuna gasgas, bel i sapang pasi, i dun ulak, pa i atai la mange, "E Pita kanumo na taman i tur." <sup>15</sup> Pa la atai i mang, "U talar." Pa i angongos la mang, "I momol ot, i ot ne lapiu." Pa la atai i mang, "Ngandek anuna angelo ka." <sup>16</sup> Ika e Pita i pinpindir ngongos, pa ning la sapang pa la oroi i, la kulkulan onoi. <sup>17</sup> Pa i sairas la ana kuna, sur lar kes longoroi, pa i atai la mang a Leklek i ben purum mangmangasa pasi kusun a rumai a dodot. Pa i atai la mang, "Mulor atai e Jems pa na tastasindala ana tortorot ana utna ne." Pa i han kusun la sur ning a hanua masak.

<sup>18</sup> Ana kobot a tena harumla la tai sur e Pita pa a nuknukinla i loklokron mang kanaha i ma. <sup>19</sup> Ning e Herot i longori mang bel ma i kes ting na rumai a dodot, i arsune sur lar tai suri. Ika bel la seren pasi. Lamur i warkurai a tena harumla ning la tai alar a rumai a dodot,

pa i arsune onla sur dir umkol la. Lamur e Herot i han miting na papar Judia utumo e Sisaria, sur ir kes tumo.

### *E Herot i mat*

<sup>20</sup> E Herot i balakut tetek a tarai ana naur a hanua Tair pa e Saidon. Pa tarai miting na naur a hanua ning, la han taum sur lar oroi i. Pa lar nunungi sur a bal molmol, anasa anunla naur a hanua la laun ka ana utna na hangan miting na papar anuna king Herot. La bal taum nigo taum o e Blastus, a tnan tena tai alar anuna king, pa i nangan la sur lar oroi a king. <sup>21</sup> Ana pukakiar ning e Herot i kubus tari tanla, i mermer pas ana kaenla anuna king, pa i kes tar ana keskes na king, pa i warwara tetek a tarai. <sup>22</sup> Pa tarai la kukuk na gasgas, pa la atongi mang, "A elngen ning a god ot ne, belsur a barsan i." <sup>23</sup> Ono otning, a angelo anuna Leklek i umi, anasa bel i atong leklek e God, pa a pompobola la ien a palaona, pa i mat.

<sup>24</sup> Ika a warwara ane God i gomo, pa i han sarara uting na hanhanuala.

<sup>25</sup> Ning e Sol pa e Barnabas dia titol rop saot e Jerusalem, dia ulak utumo e Antiok. Dia ben e Jon, ning a risana otleng e Mak, pa ditol han taum.

## 13

*Di aslang pas e Barnabas pa e Sol*

<sup>1</sup> A propetla pa a tena asaerla tagun a tarai a lotu tumo e Antiok a risanla ne: e Barnabas, e Simion ning a risana otleng e Niger, pa e Lusius a te Sairini, e Sol pa e Manain ning di lawat taum diau ma e Herot a ningnigo. <sup>2</sup> Ning la lotu tetek a Leklek pa la tamai, a Talngan Tabu i atongi mang, "Mулor aslang tar e Barnabas pa e Sol sur anuki, sur a titol ning a kabah pas diau suri." <sup>3</sup> Lamur ana tamai

pa nunung, la suah a kunla saot on diau, pa la sune sen diau.

*A titol ane Barnabas pa e Sol tumo e Saiprus*

<sup>4</sup> A Talngan Tabu i sune e Barnabas pa e Sol, pa dia han utumo e Selusia, dia kas ana sip pa dia han utumo na lolo Saiprus. <sup>5</sup> Ning dia hanot tumo e Salamis, dia warawai ana warwara ane God, ting na rumai lotula anuna tarai Juda. Ditol armuri taum ma e Jon, anundiau a tena harnangai.

<sup>6-8</sup> Ditol han taltal ting na kidol a lolo rop ning, tuk tumo e Papos. A ningnigo tagun a lolo ning, a risana ning e Sergius Pol, a tena tastamai, i arsune pas e Barnabas pa e Sol anasa i mang sur ir longor a warwara ane God. Ika ning a hal e Sergius Pol, a risana e Bariesu, i sairas diau. I ning a te Juda, a asasongo na propet, pa di atongi mang e Elimas, a kamkamna mang a tena wah. I mang sur ir sairas a ningnigo sur gong i tortorot. <sup>9</sup> Pa e Sol ning di atongi otleng mang e Pol, i bukus ana Talngan Tabu, i ngoson rakrakai e Elimas, <sup>10</sup> pa i atai i mange, "U a nat e Satan, u a hirua ana tostos a toltol rop. U bukus ana urmatana asasongo pa ana asobor. Nangse ma ur manah kusun anuma toltol ning u lingir kol a tostos a ngas anuna Leklek?

<sup>11</sup> Onone a warkurai anuna Leklek ir hanot tetek u, a matam ir kut bongnani ot, pa bel ur oroi a talapor ana kamis." <sup>12</sup> Ning a ningnigo i hanot teteki, pa i tabah taltal sur tik ning ir tong pas a kuna pa ir beni. <sup>12</sup> Ning a ningnigo i oroi a utna ne i hanot, i tortorot, anasa i kulkulan ana asasaer ana Leklek.

*Tumo e Antiok ana papar Pissidia*

<sup>13</sup> E Pol taum ana naur a halna ning ditol han taum, ditol kas

ana sip miting e Papos, pa ditol han utumo e Perga, ana papapar Pampilia. Pa e Jon i han kusun diau tingia, pa i ulak usaot e Jerusalem. <sup>14</sup> E Pol pa e Barnabas dia han mitimo e Perga sur e Antiok ana papar Pisidia.\* Pa ana Pukakiar Sabat dia kas uting na rumai lotu anuna tarai Juda, pa dia kes. <sup>15</sup> Ning di ka was tar a warwarala ana Buk a warkurai ane Moses pa ana tumtumus ana propetla, a ningnigola ana rumai lotu la arsune tetek diau mang, “Naur a tastasimila, ning ta warwara na arakrakai kaning sur mur atai a taraila ono, mur warwara ka ono.” <sup>16</sup> E Pol i tur, pa i sairasa la taum ana kuña sur lar kes longoroi, pa i atongi mange,

“A tarai Israel, pa mulo a tarai masak otleng ning mulo lotu tetek e God, mulor longor iau. <sup>17</sup> E God anumila a tarai Israel i aslang pas na tumtubumila, pa i abereng pas la ning la kes tumo e Ijip, pa i ben purum pas la mitimo taum ana rakrakaina. <sup>18</sup> Ana diat a bonot a rau ning la kes ana hanua bel, i noren la ana toltolla anunla. <sup>19</sup> Pa ning ka kamar sen tar a taraila miting na mais a matanitu ning la kes tumo e Kenan, lamur i saran tar a kabalapiu Kenan sur anuna tarai Israel. <sup>20</sup> A ututnala rop ne i hanot na arpotor diat a mar pa dilima na bonot a rau.

“Lamur e God i suah tar a tena warkuraila sur lar nigon la, tuk ana propet Samuel. <sup>21</sup> Lamur la nunung sur ta king, pa e God i saran tar e Sol tetek la. E Sol, a nat e Kis, miting na mangis a tarai Benjamin pa i nigon la diat a bonot a rau. <sup>22</sup> Ning e God ka kepsen tar e Sol, i suah tar e Dewit sur ir king anunla. Pa i atongi onoi mang, ‘A oroi e Dewit a nat e Jesi, a barsan ne i arlar ana nuknukik, pa ir tol arop a ututnala ning a mang suri.’

<sup>23</sup> “Pa miting na mangis a tarai ane Dewit, e God i saran a Tena Alaun, e Iesu, tetek a tarai Israel, arlar ana nuna lele. <sup>24</sup> Lanigo ana tinan ot ane Iesu, e Jon a Tena Baptais i warawai tetek a tarai Israel rop ana lingir a nuknukinla pa a baptais. <sup>25</sup> Ning milau ma anuna titol ir rarop, i atai la mang, ‘Mulo nuki mang iau esi? Iau bel sur esining mulo harnanai suri. Ika esaning ir mur tak, bel a tolsot pasi sur ar paksen a inau ana anuna su. A natarna kol tana.’

<sup>26</sup> “Tastasikla, a mangis a tarai ane Abaram, pa mulo a tarai masak otleng ning mulo lotu tetek e God, di ka saran tar a warwara tetek dala mang e God i alaun a tarai. <sup>27</sup> A tarai Jerusalem, taum ana anunla na ningnigola, bel la oroi lalan e Iesu mang i a Tena Alaun ning a propetla la ka tumus tari ono. Ika ning la malmaling tar e Iesu sur ir mat, la tolsot pas a warwara anuna propetla, ning di wasi ana pukakiar Sabatla rop. <sup>28</sup> Bel la pastek pas ta laulau a ginina e Iesu sur ir mat ono, ika la nunung e Pailat sur ir saran tar e Iesu sur dir umkoli. <sup>29</sup> Ning la ka tolsot rop tar a warwarala ning la ka tumus tari onoi, la pak purumi kusun a rakai kutus, pa la aborbori ting na kulam a minat. <sup>30</sup> Ika e God i akamtur ulaki kusun a minat. <sup>31</sup> Pa galis a pukakiar, la ning nating la armuri taum onoi mitimo e Galili usaot e Jerusalem la oroi. Pa onone la warwara talapor onoi tetek a tarai Israel.

<sup>32</sup> “Pa mila atai mulo ana Wakak a Warwara mange: A lele ning e God ka saran tari tetek na tumtubundala tagun nating, <sup>33</sup> onone ka tolsot pasi tetek dala, na tumtubunla, ning i akamtur ulak pas e Iesu. Larning di ka tumus tari ana areur a Saksak mange, ‘U a Natuklik,

\* **13:14:** Naur a hanua a risandiau e Antiok. Takai ana papar Pisidia pa takai otleng ana papar Siria.

onone iau e Tamam.' *Buk Song 2:7*

<sup>34</sup> E God ka akamtur pas e Iesu kusun a minat, pa bel ir marase. Larning e God ka atongi mange, 'A wakak a ututna ning a lele tar onoi tetek e Dewit, ar angisngis mulo onoi.

A ngisngis ne i toh pa ir hanot momol ot.' *Ais 55:3*

<sup>35</sup> Pa ka atong tari otleng ting na ning a Saksak mange,

'Bel ur noren tar anuma Totoh na Barsan sur ir marase.' *Buk Song 16:10*

<sup>36</sup> "E Dewit i tolsot rop pas a nuknuk anune God ana nuna pukakiarla na lalaun. Lamur i mat, pa di pori taum dingla na tumtubunala, pa a palaona i marase. <sup>37</sup> Ika, esaning e God i akamtur pasi kusun a minat bel i marase.

<sup>38</sup> "Manglarning, na tastasikla, mila warawai tetek mulo mange: Mulor tasmani mang e Iesu i hanot sur ir kepsen a laulau a ginimulo.

<sup>39</sup> A Warkuraila ane Moses bel i tolsot pasi sur ir kepsen a laulau a ginimulo, sur dir atong mulo mang a tena tostosla. Ika, la rop ning la tortorot o e Iesu, dir atong la mang a tena tostosla. <sup>40</sup> Mulor tai alar mulo sur gong a ututnala ning a propetla ka warwara tar onoi i sot o mulo. La atongi larne,

<sup>41</sup> 'Oroi, mulo a tena morot laulaula, mulor kulkulan pa mulor hirua,

anasa ar tol ta utna ana numulo na pukakiar a lalaun.

Ning tik ir atai mulo ana utna ning ar toli,

bel mulor tortorot onoi.' " *Hab 1:5*

<sup>42</sup> Ning e Pol pa e Barnabas dia purum miting na rumai lotu, a tarai la nunung diau sur diar warwara ulak ana ututnala ne ana Pukakiar Sabat lamur. <sup>43</sup> Ning a tarai la han sarara kusun a rumai lotu, a galis a te Juda pa dingla na tarai masuk ning la kas ana lotu Juda pa la lotu ana momolna, la

mur e Pol pa e Barnabas. Dia warwara tetek la, pa dia arakrakai la, sur lar tur rakrakai ana marmaris ane God.

<sup>44</sup> Ana Pukakiar Sabat ning la ka kubus tari, milau sur la rop miting na hanua ning la hanot taum, sur lar longor a warwara anuna Leklek. <sup>45</sup> Ning a te Judala la oroi a kunum a tarai, a balanla i laulau tetek e Pol pa e Barnabas, pa la lingir ka a warwarala ning e Pol i warwara ono, pa la atong saksakani. <sup>46</sup> Ika bel dia matmataut pa dia keles la mange, "Wakak mia ka atalapor nigon tar a warwara ane God ta mulo. Ika ning bel mulo kibasi pa mulo san alar pas mulo sur gong mulo los a lalaun tikin, onone, miar han tetek a tarai ning bel a tarai Juda. <sup>47</sup> Anasa a Leklek, i sune miau mange,

'A suah tar u sur u a talapor tetek a tarai ning bel a tarai Juda,

sur ur los a harlaun tetek a taraila ana rakrakan hanua rop.'" *Ais 49:6*

<sup>48</sup> Ning a taraila ning bel a tarai Juda la longor a warwara ne la gas kol, pa la atong leklek pas a warwara anuna Leklek. Pa la ning e God ka aslang pas la sur a lalaun tikin, la tortorot.

<sup>49</sup> A warwara anuna Leklek i han sarara uting na hananuala rop ting na papar ning. <sup>50</sup> Ika a te Judala, la akutkut balana ningnigo na gurarala ning na tena hanrawai tetek e God, pa a ningnigo na tarai otleng tagun a hanua ning. La akutkut balan dingla otleng, sur lar balakut tetek e Pol pa e Barnabas, pa la alulu sen diau kusun anunla papar. <sup>51</sup> Pa dia tang sen a kubus kusun a handiau sur a asilang mang e God ka saran kabaina tanla, pa dia han utumo Ikonion. <sup>52</sup> Pa tarai a asasaer tumo e Antiok la bukus taum ana gasgas, pa Talngan Tabu.

## 14

### *Tumo e Ikonion*

<sup>1</sup> E Pol pa e Barnabas dia kas ut-ning na rumai lotu anuna tarai Juda tumo e Ikonion, lar ot ning dia sira toli ana hananuala. Ning dia warwara, anundia na warwara i talapor, pa a galis a tarai Juda pa dingla na tarai otleng, la tortorot. <sup>2</sup> Ika dingla na tarai Juda ning bel la mang sur lar tortorot, la akamtur a balan dingla na tarai ning bel a tarai Juda, pa la alaulau a nuknukinla sur a nuknukinla ir laulau tetek la ning la tas ana tortorot. <sup>3</sup> E Pol pa e Barnabas dia kes bongnandiau tumo e Ikonion, pa bel dia matmataut, dia rakrakai ana warwara ana risana Leklek. Pa a Leklek i amomol tar anundia na warwara ana nuna tnan marmaris ning i saran a rakrakai tan diau sur diar tol a ututnala na kulkulan, pa akinalangla.

<sup>4</sup> A tarai tagun a hanua ning la taptapagal, dingla la tur taum ana tarai Juda ning bel la tortorot, pa dingla la tur taum ana naur a aposel. <sup>5</sup> Dingla na tarai Juda pa dingla na tarai otleng ning bel a tarai Juda pa anunla na ningnigola, la warwara taum pas sur lar alaulau e Pol pa e Barnabas, pa lar wolot amat diau ana hatatla. <sup>6</sup> Ika, ning e Pol pa e Barnabas dia longori, dia han masik uto na papar Likonia, sur naur a hanua Lистра pa e Derbe, pa dingla na hananua otleng ning la kes milau. <sup>7</sup> Pa dia warawai amon tetek la tingia ana Wakak a Warwara.

### *Tumo e Lистра*

<sup>8</sup> Tumo e Lистра, ning a barsan i kes, naur a hana dia mat. Di agon pasi ot larning, pa bel i tolsot pas a tinan. <sup>9</sup> I longor e Pol i warwara. Pa e Pol i ngosoni, pa i oroi mang a barsan ning i tortorot sur dir alangolango i. <sup>10</sup> Pa e Pol i

warwara kol teteki, “Ur tur tostos ana naur a ham.” A barsan ning i tur kapit pa i han kakat.

<sup>11</sup> Ning a kunum a tarai la oroi asaning e Pol i toli, la warwara kol ana warwara Likonia mange, “Naur a god dia ka han purum arlar ana naur a momolna tetek dala!” <sup>12</sup> La atong e Barnabas a god Sus pa e Pol a god Hermes, anasa i a tena warwara tan diau. <sup>13</sup> A rumai a artabar anuna god Sus i tur tumo lapiu milau a ris a hanua ning, pa a tena artabar tetek a god Sus taum ana kunum a tarai la ben a bulumakaula sur a tnan taman ana hanua, sur lar tuni ana artabar tetek e Pol pa e Barnabas. Pa la los otleng a purpurla ning di ka suk tari sur lar tabar diau ono.

<sup>14</sup> Ika ning naur a aposel ning dia tasman pas a utna ning a tarai la mang sur lar toli, dia nuk lingir diau pa dia silir anundiau na kaenla,\* pa dia dun potora taraila, pa dia kukuk kol mange, <sup>15</sup> “Mulo a taraila, asa kamkamna ning mulo tol a ututnala ne? Mia naur a barsan ka, mia arlar ka o mulo! Mia hanot ka ana Wakak a Warwara tetek mulo, pa mia atai mulo sur mulor talingir kusun a ututna oros ka, ning mulo lotlotu tetek la, sur mulor mur e God ning i laun. Esaning i tol a langit, a rakrakan hanua, pa tasi, pa a ututnala rop tingui onla. <sup>16</sup> Nating i noren tar a taraila miting na matanitula rop sur lar laun arlar ana nunla na nemnem. <sup>17</sup> Ika e God i akes tar a ututnala sur mulor tasmani mang i ot e God. Ana nuna marmaris i tabar mulo ana kiar misaot na langit, a rakaila la wai ana kalang inla ot, i tabar mulo ana galis a utna na hangan, pa i abukus mulo ana gasgas.” <sup>18</sup> Dia atong a warwara ne, ika a tarai la mang ot sur lar lotu tetek diau taum ana artabar ning di tun tari. Pa dia sairasa rakrakai la tuk ning la manah.

\* **14:14:** A tarai Israel la sira silir anunla na kaenla sur lar asangani mang la nuk lingir la ning ta utna i laulau kol.

<sup>19</sup> Lamur dingla na te Judala la hanot mitimo e Antiok pa e Ikonion, la dat lingir pas a nuknuk a kunum a tarai kusun e Pol pa e Barnabas. La wolot e Pol ana hatatla, pa la dat purumi kusun a hanua, pa la nuki mang ka mat. <sup>20</sup> Ika ning a tarai a asasaer la tur talilis pasi, i tur, pa i kas ulak uting na hanua. Ana pukakiar lamur, i han taum o e Barnabas utumo e Derbe.

*Dia han utumo ana naur a papar Pisidia pa e Pampilia*

<sup>21</sup> Ning e Pol pa e Barnabas dia ka warawai pas ana Wakak a Warwara tumo e Derbe pa dia ka asaer tar a galis a tarai sur la a kakak a asaerla, dia ulak utumo e Listra, Ikonion, pa e Antiok. <sup>22</sup> Dia arakrakai a tarai a asasaer tagun a natola hanua ning, pa dia wunan la, sur lar tur rakrakai ana nunla tortorot. Dia atai la mange, “A galis a mamahat ir kibas nigon tar dala, lamur ma dalar kas ana matanitu ane God.” <sup>23</sup> Dia akes tar dingla na tarai sur lar ningnigo anuna tarai a lotu ana taktakai hanua. Dia nunung pa dia tamai, pa dia saran tar la tetek a Leklek, esining la tortorot ono. <sup>24</sup> Ning dia ka han pas ting na hananuala ana papar Pisidia, lamur dia hanot tumo ana papar Pampilia. <sup>25</sup> Ning dia ka warawai pas tumo e Perga, dia han utumo e Atalia.

*Dia ulak utumo e Antiok ana papar Siria*

<sup>26</sup> Dia kas ana sip mitimo e Atalia sur uto e Antiok. E Antiok a hanua ning a tena tortorotla la saran tar diau ana marmaris ane God, sur a titol ne dia ka arop tari. <sup>27</sup> Ning dia hanot, dia kabah taum pas a tarai a lotu, pa dia atai la ana ututnala rop ning dia toli taum ana rakrakai ane God. Dia atai la otleng mang e God ka tol a ngas tagun a tortorot tetek a tarai ning bel a tarai Juda.

<sup>28</sup> Pa dia kes bongnan diau tingia taum ana tarai a asasaerla.

## 15

*A tarai a lotu la kes taum saot e Jerusalem*

<sup>1</sup> Dingla na tarai misaot e Judia la han uto e Antiok, pa la asaer la ning la tas ana tortorot mange, “Ning bel di kot talilis a palaona ta kaklik barsan arlar ana warkurai ane Moses, bel dir alaun mulo.”

<sup>2</sup> E Pol pa e Barnabas dia arlak kol taum onla. Pa a tarai a lotu la aslang tar e Pol pa e Barnabas pa dingla na tarai a tortorot otleng, sur lar han usaot e Jerusalem tetek a aposella pa a ningnigola anuna tarai a lotu, sur lar deken la ana utna ne.

<sup>3</sup> A tarai a lotu la tur tulan la, pa la han potot naur a papar e Ponika pa e Samaria. Ning la han, la warwara amon tetek a tarai a lotu ting na hananuala, mang a tarai ning bel a tarai Juda la lingir a nuknukinla. Pa la ning la tas ana tortorot, la gas kol ning la longori.

<sup>4</sup> Ning la hanot saot e Jerusalem, a tarai a lotu pa a aposella pa ningnigola ana lotu la agasgas pas la. Pa dia atai la ana ututnala ning dia toli ana rakrakai ane God.

<sup>5</sup> Dingla na Parisaio ning la tortorot o e Iesu, la tur pa la atongi mang, “I tostos ot sur dir kot talilis a tarai ning bel a tarai Juda ning la lingir a nuknukinla. Pa dir asaer la sur lar mur a Warkuraila ane Moses.”

<sup>6</sup> A aposella taum ana ningnigola la kes taum sur lar nuknuk wakak ana utna ne. <sup>7</sup> Ning la ka warwara kol pas onoi, e Pita i tur pa i atai la mange, “Na tastasikla, mulo tasmani mang nating ot, e God i aslang pas iau kusun mulo, sur ar warawai ana Wakak a Warwara tetek la ning bel a tarai Juda, sur lar longori pa lar tortorot ono.

<sup>8</sup> E God, ning i tasman a nuknuk a taraila rop, i asangani tetek dala

mang i gasgas pas la ning bel a tarai Juda, ning i saran a Talngan Tabu tetek la, larning i sarani tetek dala. <sup>9</sup> Bel i purpurngis ondala, anasa i atotoh la otleng ning la tortorot. <sup>10</sup> Sur asa ning mulo mang sur mulor lar e God, ning mulo saran tar a mamahat a titol tetek a tarai a asasaer ning mulo atongi mang lar mur a Warkuraila ane Moses? Anundala mangis a tarai tagun nating bel la tolsot sur lar muri, pa dala otleng ne bel dala tolsot pasi. <sup>11</sup> Ika dala tortorot mang dir alaun dala kamna ana marmaris ana nundala Leklek e Iesu, arlar otleng onla.”

<sup>12</sup> Pa tarai rop ning la kes taum, la kes longoroi, ning la longor e Pol pa e Barnabas, dia warwara ana asilangla taum ana ututna na kulkulan dia toli ana rakrakai ane God tetek a taraila ning bel a tarai Juda. <sup>13</sup> Ning dia manah na warwara, e Jems i atongi mang, “Na tastasikla, mulor longor iau. <sup>14</sup> E Saimon i atai dala ana ningnigo na pukakiar mang e God i maris la ning bel a tarai Juda pa i ben pas dingla na tarai tagun la sur la anunai ot. <sup>15</sup> A utna ne e God i toli i arlar ana warwara anuna propetla. Larning di ka tumus tari mange,

<sup>16</sup> ‘Lamur ono, ar ulak,  
pa ar tol ulak a rumai ane  
Dewit, ning ka taroh.

Pa ar atur ulak pas a rumai ning i  
taroh,  
pa ar tol wakak ulaki.

<sup>17-18</sup> Pa a taraila masik otleng,  
a taraila ning bel a tarai Juda,  
lar talingir tetek a Leklek,  
la ning ia ka kabah pas la sur  
anuki.

A Leklek ka atong tari lerne,  
ka warwara talapor ana utut-  
nala ne’  
*Amos*  
*9:11-12*  
natnating ot.

<sup>19</sup> “Pa a nuknukik i manglarne,  
gong dala saran a mamahat tetek

a taraila ning bel a tarai Juda, ning la talingir tetek e God. <sup>20</sup> Dalar tumtumus tetek la, pa dalar atai la mang gong la ien ta utna ning di ka artabar tar ono tetek a asasongo na godla, anasa a lotu ning i adur a utna na hangan, gong la tol a toltol a pamuk, gong la ien ta utna ning bel di gos wakak a suluk kusuni, pa gong la ien ta inagoi ning di pos koli ka, anasa a suluk kaning ot ono. <sup>21</sup> Anasa tagun nating ot ana hananuala rop, di was a Warkuraila ane Moses, pa la warawai onoi ting na rumai lotula ana pukakiar Sabatla.”

*Di tumtumus tetek a tarai a tortorotla ning bel a tarai Juda*

<sup>22</sup> A aposella, pa dingla na ningnigo, taum ana tarai a lotu rop, la warwara taum sur lar aslang pas ir naur a barsan tagun la, sur diar han taum o e Pol pa e Barnabas utumo e Antiok. La aslang pas e Judas, ning a risana otleng e Barsabas, pa e Sailas, naur a ningnigo tagun la ning la tas ana tortorot. <sup>23</sup> Pa la tumus tar a pas sur lar losi. A pas i atongi mange:

Mila a aposella pa a ningnigola, na tastasimulo, mila tumtumus tetek mulo a tena tortorotla tagun a tarai ning bel a tarai Juda ning mulo kes tumo e Antiok, pa ana naur a papar Siria pa e Silisia:

Marmaris tetek mulo,

<sup>24</sup> Mila ka longori mang dingla na tarai tagun mila, la atongi mang mulor mur a Warkuraila rop ane Moses, pa la aloklokron a nuknukimulo ono. Bel mila sune la. <sup>25</sup> Onone mila ka warwara taum pas, pa mila rop mila nuki mang i wakak sur milar aslang pas naur a barsan, pa milar sune diau tetek mulo taum ana naur a halimila, e Barnabas pa e Pol, <sup>26</sup> naur a barsan ning bel dia mangan alar anundiau a lalaun ana risana anundala Leklek e Iesu Karisito.



<sup>27</sup> Mila sune e Judas pa e Sailas tetek mulo, pa diar atai mulo ana warwarala ne mila tumusi ana pas. <sup>28</sup> A Talngan Tabu i asangan mila sur gong mila saran tar ta mamahat tetek mulo. Dingla na ututnala ka ne mulor muri.\*

<sup>29</sup> Gong mulo ien ta utna ning di artabar ono tetek a asasongo na godla. Gong mulo ien ta utna ning bel di gos wakak a suluk kusuni, pa ta inagoi ning di pos koli ka, anasa a suluk kaning ot ono. Pa gong mulo tol a toltol laulau ana tik. Ir wakak kol tetek mulo ning bel mulor tol a ututnala ne.

Ai ka i ning, marmaris tetek mulo.

<sup>30</sup> Di sune sen la pa la han utumo e Antiok. Pa la kabah taum pas a tarai a lotu, pa la saran tar a pas ning tanla. <sup>31</sup> Ning la wasi, la gas kol ana wakak a warwara na atumarang. <sup>32</sup> E Judas pa e Sailas dia wunan la pa dia arakrakai la ning la tas ana tortorot ana galis a warwara, anasa diau naur a propet. <sup>33-34</sup> Ning dia ka kes bongnan diau tingia, na tastasindiau ana tortorot la tur tulan diau taum ana bal molmol, sur diar ulak us-aot e Jerusalem tetek la ning la sune diau.†

<sup>35</sup> Ika e Pol pa e Barnabas dia kes ot tumo e Antiok. Dia taum ana a galis a tarai tagun la, la asaer a tarai, pa la warawai ana warwara anuna Leklek.

*E Pol pa e Barnabas dia han sarara*

<sup>36</sup> Dingla na pukakiar lamur, e Pol i atai e Barnabas mang, “Dar ulak sur a hananuala rop, ning da ka warawai pas tanla ana warwara anuna Leklek, sur dar oroi na tastasindiau ana tortorot, mang kaning ma la mangasa.” <sup>37</sup> Pa e Barnabas i mang sur diar ben e

Jon, ning a risana otleng e Mak. <sup>38</sup> Ika e Pol i nuki mang bel i wakak ning diar beni, anasa i han kusun diau tumo e Pampilia, pa bel i mur diau tuk a titol i rop. <sup>39</sup> Pa dia warwara na balakut kol ono, pa lamur dia han sarara. E Barnabas i ben pas e Mak, pa dia kas ana sip uto na lolo Saiprus. <sup>40</sup> Pa e Pol i aslang pas e Sailas, sur diar han. Pa na tastasindiau ana tortorot la saran tar diau ana marmaris ana Leklek. <sup>41</sup> Dia han taltal ting na arpotor a naur a papar Siria pa e Silisia, pa dia arakrakai a tarai a lotu ana hananuala.

## 16

*E Timoti i han taum o e Pol pa e Sailas*

<sup>1</sup> Ana tinan ane Pol pa e Sailas dia hanot uting e Derbe pa lamur uting e Listra. Ning tagun a tarai a asasaerla i kes ting na hanua Listra, a risana e Timoti, a nat a hane Juda, a tena tortorot, pa e tamana a te Grik. <sup>2</sup> La ning la tas ana tortorot tumo e Listra pa e Ikonion la warwara o e Timoti mang i a wakak a barsan. <sup>3</sup> Pa e Pol i mang sur ditol ar han taum. I ben pasi, pa i kot talilisi, anasa te Judala ning la kes ana hananuala ning, la tasmani mang e tamana a te Grik. <sup>4</sup> Ning ditol han uting na hananuala, ditol warwara amon ana warkurai anuna aposella pa a ningnigola saot e Jerusalem, sur a tarai lar muri. <sup>5</sup> Di arakrakai a tortorot anuna tarai a lotu ana hananuala, pa a wawas onla i han kas amon ana pukakiarla.

*A tatatai ane Pol tumo e Troas*

<sup>6</sup> A Talngan Tabu i sairas ditol sur gong kaba ditol warawai ana Wakak a Warwara tumo na papar Esia. Ditol han taltal ka utumo na naur a papar Prigia pa e Galesia.

\* **15:28:** A kamkama warwara ne, mang a tarai ning bel a tarai Juda la langolango kusun a Warkuraila anuna tarai Juda, larning gong di kot talilis a palaonla. † **15:33-34:** Dingla na tena tastasmai ana Buk Tabu la nuki mang dingla na warwara otleng i kes te na ves ne. I manglarne: *Ika e Sailas i mang sur ir kes ot tingia.*

<sup>7</sup> Ning ditol hanot ting na ararop a papar Misia, ditol mang sur ditol ar han uto e Bitinia, ika a Inguna e Iesu bel i malmaling sur ditol ar han uto. <sup>8</sup> Pa ditol bolos a papar Misia, pa ditol han uto e Troas.

<sup>9</sup> Ana morom, e Pol i oroi a tatatai. I oroi pas ning a barsan a te Makedonia i tur pa i nunungi mange, “Ur lamut ute Makedonia, pa ur nangan mila.” <sup>10</sup> Ning ka oroi tar a tatatai, mila\* sang kakat sur a tinan uto e Makedonia, anasa mila tasmani mang e God ot i kabah mila, sur milar warawai tetek la ana Wakak a Warwara.

*E Lidia i lingir a nuknukna tumo e Pilipai*

<sup>11</sup> Ning mila han mitimo e Troas mila kas ana sip, pa mila han tostos uto na loló Samotres, ning a pukakiar ulak mila han kale uto e Neapolis. <sup>12</sup> Pa mila han miting e Neapolis uto e Pilipai, a tnan hanua kol tana hananuala masik tumo na papar Makedonia, pa tarai Rom la kes tingia. Mila kes pas dingla na pukakiar tingia. <sup>13</sup> Ana Pukakiar Sabat mila purum ana taman na hanua ning, sur a malum, anasa mila nuki mang ta pukna na nunung kaning ia. Mila kes, pa mila warwara tetek a gurarala ning la kes taum tingia.

<sup>14</sup> Ning a halinla ning la longor mila a risana e Lidia, a hane mitimo e Tiatira, a tena siuran kubar a kaen pa a tena lotu tetek e God. Pa a Leklek i lingir anuna lalaun sur ir longor ana warwarala ning e Pol i atongi. <sup>15</sup> Ning di ka baptais tar e Lidia, pa la otleng ning la kes ting na nuna rumai, i ben pas mila, pa i atongi mang, “Ning mulo nuki mang a tortorot ana Leklek, mulor kas ana nuka rumai, pa mulor kes napik.” Pa i arakrakai pas mila tuk mila malmaling.

*E Pol pa e Sailas dia dodot tumo e Pilipai*

<sup>16</sup> Ning a pukakiar mila han sur a pukna na nunung, mila songo pas ning a tena titol oros, a hane, a mot kaning onoi, pa i tolsot pasi sur ir warwara nigo ana utna ning ir hanot lamur. Anuna na ningnigola la kumkubas a tnan mani ana nuna titol. <sup>17</sup> A hane ne i mur mila taum ma e Pol, pa i warwara kol mange, “A taraila ne, la na tena titol oros ane God i Leklek Kol, pa la atai mulo ana ngas ning dir alaun mulo ono.” <sup>18</sup> A galis a pukakiar i toli lerne. Ning e Pol i ngoro onoi, i talingir, pa i atai a mot mange, “A atai u ana risana e Iesu Karisito, ur purum kusun a hane ne.” Pa ono ot ning, a mot i purum kusuni.

<sup>19</sup> A ningnigola anuna hane ne la tasmani mang bel ma lar oroi ulak ta mani taguni. La tong akes pas e Pol pa e Sailas, pa la dat diau tetek a ningnigola uting na tinine hanua. <sup>20</sup> La ben diau tetek a tena warkuraila pa la atongi mange, “Naur a barsan ne, naur a te Juda, dia tol a tnan mamahat ting na anundala hanua. <sup>21</sup> Pa dia asaer a tarai ana ututnala ning bel i tostos sur dala a tarai Rom dalar longor ono, pa dalar muri.” <sup>22</sup> A kunum a tarai otleng la warwara kol ana ararup on diau, pa a tena warkuraila la arsune sur dir silir sen anundiau na kaenla pa dir dapis diau. <sup>23</sup> Ning di ka dapis rakrakai tar diau, di akas diau ting na rumai a dodot, pa di atai a tena tai alar mang ir tai alar rakrakai diau sur gong dia purum. <sup>24</sup> Ning a tena tai alar i longor a warwara ne, i akas diau ting na tuka rumai a dodot potot, pa i suah alar tar diat a handiau ana palang.

<sup>25</sup> Ana tnan morom, e Pol pa e Sailas dia nunung, pa dia saken a saksakla tetek e God, pa tarai

\* **16:10:** E Luk i tumus “mila”, anasa i han taum o e Pol.

otleng ning la dodot, la longor diau. <sup>26</sup> Bel i bongnani, pa a tnan mamais i hanot kulkulan, pa a gulen a kaba pos ana rumai, a tamanla rop la sapang, pa a senla miting na kun a tarai a dodotla rop la tapapak kakat. <sup>27</sup> A tena tai alar i mata, pa ning i oroi a tamanla i sapang, i dat pas anuna liwan na harum sur ir umkol i ot onoi, anasa i nuki mang a tarai a dodot la ka liu rop. <sup>28</sup> Ika e Pol i arkabah rakrakai tekete mange, “Gong u alaulau u, mila rop kane.”

<sup>29</sup> Pa a tena tai alar i arkabah sur a lamla, i dun kas kapit, i matmataut pa i koloron, i punga purum salanigo napire Pol pa e Sailas. <sup>30</sup> Pa i ben purum pas diau, pa i deken diau mange, “Naur a barsan, asaning ar toli sur dir alaun iau?” <sup>31</sup> Pa dia kelesi mange, “Ur tortorot ana Leklek e Iesu pa dir alaun u, pa la otleng ning la kes ting na numa rumai.” <sup>32</sup> Pa dia warwara ana warwara anuna Leklek tetek la rop ning la kes ting na nuna rumai. <sup>33</sup> Ana morom ot ning, a tena tai alar i ben pas diau, pa i gos a mangmangrasla kaning na palaon diau. Pa ana pukakiar ot ning di baptais a tena tai alar, pa la rop ning la kes ting na nuna rumai. <sup>34</sup> I ben pas diau uting na nuna rumai, pa i tabar diau ana utna na hangan. Pa i bukus ana gasgas, la taum ana nuna tarai, anasa la tortorot o e God.

<sup>35</sup> Ana kobot ning ot a tena warkuraila la sune naur a polis tetek a tena tai alar ana warwara mange, “Ur pak sen naur a barsan ning.” <sup>36</sup> Pa a tena tai alar i atai e Pol mange, “A tena warkuraila la arsune sur dir pak sen mu. Onone mur purum, mur han taum ana bal molmol.” <sup>37</sup> Ika e Pol i atai naur a polis mange, “Bel ot tik i warkurai miau, la dapis miau namatana tarai, ika miau naur a te Rom ot. La akas tar miau uting na rumai a dodot, pa ine la mang sur lar

pak kumnan sen miau. Ika bel! I wakak sur la ot lar lamut ute pa lar pak sen miau.” <sup>38</sup> Naur a polis dia ulak, pa dia atai a tena warkuraila ana warwarala ne. Ning la longori mang diau naur a te Rom, la matmataut. <sup>39</sup> Pa la han, la apuasa anunla na rongo tetek diau. La ben purum diau kusun a rumai a dodot, pa la nunung diau sur diar han masuk kusun a nunla hanua. <sup>40</sup> Pa ning dia ka han kusun a rumai a dodot, dia han sur a rumai ane Lidia. Pa dia oroi la ning la tas ana tortorot tingia. Dia wunan tar la, lamur dia han kusun a hanua.

## 17

### *Tumo e Tesalonika*

<sup>1</sup> Ning e Pol pa e Sailas dia bolos e Ampipolis pa e Apolonia, dia hanot tumo e Tesalonika. Ning a rumai lotu anuna tarai Juda kanging ia. <sup>2</sup> Pa e Pol i kas tetek la ting na rumai lotu larning i sira toli. Ana natol a Pukakiar Sabat ot, i warwara taum onla ana Buk Tabu. <sup>3</sup> I papak, pa i atong talapori mang i sot ot sur e Karisito ir mat pa ir kamtur ulak kusun a minat. Pa i atongi mange, “E Iesu ning a atai mulo onoi, i ot e Karisito.” <sup>4</sup> Dingla na tarai Juda pa galis a te Grik ning la lotu tetek e God, pa galis a ningnigo na gurarala otleng la tortorot ning la longor a warwara, pa la mur e Pol pa e Sailas.

<sup>5</sup> Ika, dingla na tarai Juda la nuknuk laulau on diau, pa la ben pas a tarai laulaula miting na tinine hanua. La han taum, pa la tol a tnan mamahat ting na hanua. La dun kas uting na rumai ane Jeson, la seren e Pol pa e Sailas sur lar ben purum diau tetek a taraila. <sup>6</sup> Ika bel la pastek diau. La dat pas e Jeson pa dingla na tarai otleng ning la tas ana tortorot, tetek a ningnigola ana hanua ning, pa la warwara kol mange, “A taraila ne la tol a tatatnan mamahatla

ting na hananuala te na rakrakan hanua, pa onone, la hanot kale tetek dala! <sup>7</sup> Pa e Jeson i ben kas la uting na nuna rumai. La rop ne la lakai a warkuraila anun e Sisar, a king anuna tarai Rom, pa la atongi mang ning a barsan, a risana e Iesu, i ning a king.” <sup>8</sup> Ning a taraila taum ana ningnigola la longor a warwara ne, la loklokron kol ono. <sup>9</sup> La los mani kusun e Jeson pa la otleng ning di dat taum pas la, sur dir lou purum la ono\*. Lamur la pak sen la.

### *Tumo e Beria*

<sup>10</sup> Ning i morom purum, la ning la tas ana tortorot la sune e Pol pa e Sailas uto e Beria. Ning dia ka hanot tingia, dia kas uting na rumai lotu anuna tarai Juda.

<sup>11</sup> La ne la wakak tanla tumo e Tesalonika, anasa la mang kol sur lar kibas a warwara ne, pa la was wakak a warwarala miting na Buk Tabu ana pukakiarla rop, sur lar tasmani mang a warwara ane Pol i momol o bel. <sup>12</sup> Pa galis a tarai Juda, a galis a tarai Grik otleng, pa galis a gurara Grik ning a ningnigola, la tortorot.

<sup>13</sup> Ning a tarai Juda mitimo e Tesalonika la longori mang e Pol i warawai ana warwara ane God tumo e Beria, la han utumo pa la akutkut a balan a kunum a tarai pa la akamtur a balanla. <sup>14</sup> Pa la ning la tas ana tortorot la sune kapit e Pol utumo latasi. Ika e Sailas dia ma e Timoti dia kes ot tumo e Beria. <sup>15</sup> A taraila ning la ben e Pol, la han taum onoi uto e Athens. Lamur i sune ulak la ana warwara tetek e Sailas pa e Timoti mang diar han kapit teteki.

### *Tumo e Athens*

<sup>16</sup> Ning e Pol i nanan diau, i nuk marisi, ning i oroi a hanua Athens

i bukus ana manarla ning la sira lotu tetek la. <sup>17</sup> Pa i warwara ting na rumai lotu taum ana tarai Juda, pa dingla na tarai masuk otleng ning la lotu tetek e God. Pa ana pukakiarla rop i warwara otleng tanla ning la arsongo ting na tinine hanua. <sup>18</sup> A tena tastasmanla ana asasaer anuna kunum Epikurian pa kunum Stoik la harum na warwara taum o e Pol.† Dingla na tarai la deke mang, “Asa ine a tena aregaia oros ne i atai dala ono?” Pa dingla otleng la atongi mange, “Ngandek i atai dala ana tona godla tagun ta hanua masuk.” La atongi larne, anasa e Pol i warawai o e Iesu pa ana lalaun ulak kusun a minat.

<sup>19</sup> La ben pas e Pol usaot ana kiwung di atongi mang e Areopagus, pa la atai i mange, “Mila mang sur milar tastasman ana tona warwara ning u asaer mila ono. <sup>20</sup> A utna ning u warwara ono, i maskana tetek mila, pa mila mang sur milar tasman a kamkamna.” <sup>21</sup> La atongi larning anasa a te Athens taum ana wasirala otleng ning la kes tingia, la arnore ka ana pukakiarla ana warwara pa longlongor sur al tona asasaer.

<sup>22</sup> E Pol i tur potor a tarai a kiwung Areopagus, pa i atongi mange, “A tarai Athens, ana titolla mulo toli a oroi mang mulo a tena lotula. <sup>23</sup> Anasa, ning a han taltalte, a oroi a manarla ning mulo sira lotu tetek la, pa ia ka oroi tar otleng ning a logo ning di tun a artabarla onoi, a tumtumus ono i mange, ‘Tetek a god ning bel di tasmani’. Esaning mulo lotu teteki, ika bel mulo tasmani, i ot ne, a warawai onoi tetek mulo. <sup>24</sup> E God ot ning i tol a rakrakan

\* **17:9:** E Jeson i malmaling sur gong ulak ma dia tol a mamahatla ting lahanua. † **17:18:** A tarai Athens la sira mur a galis a asasaer anuna tena tastasmanla tagun nating. A tarai miting na naur a kunum Epikurian pa e Stoik la mur naur a ngas a asasaer larning. A asasaer ka anuna tarai, bel i arlar ana Buk Tabu.

hanua taum ana ututnala rop ning la kes ono, i a Leklek ana langit pa a rakrakan hanua, pa bel i kes ana rumai lotula ning a tarai la toli. <sup>25</sup> Pa bel i kapan sur tik ir nangani, anasa i ot i tabar a taraila rop ana lalaun, taum ana wuwu na lalaun ning la losi, pa a ututnala rop. <sup>26</sup> E God i akes tar a ningnigo na barsan. Pa tarai tagun a matanitula rop la hanot taguni, pa la kes ana rakrakan hanua rop. Ana nuknukna e God i nuki mang lar kes tahaia pa nangse lar hanot pa nangse lar rop ulak. <sup>27</sup> E God i tol a ututnala ne sur a tarai lar tai suri, pa ngandek lar tai taltal suri pa lar seren pasi. Ika, e God bel i kes bakbak kusun dala rop. <sup>28</sup> Larning di ka atong tari, 'Dala laun, dala han taltal, pa dala tong akes a lalaun, i kamkamna ot o e God.' Arlar ana numulo na tena pak saksak la atongi mange, 'Dala otleng na natnatnala ot.'

<sup>29</sup> "Ning dala na natnat e God, bel i wakak sur dalar nuki mang e God i arlar ana manar a gol, o silva, o a hat, ning a tarai la nuk otnan pasi pa la toli ana kunla. <sup>30</sup> Ana raula nating, e God i noren a taraila ning bel la nuk pasi, ika onone, i atai a taraila rop ana hananuala sur lar lingir a nuknukinla. <sup>31</sup> Anasa ka kubus tar a pukakiar, sur ir warkurai a rakrakan hanua tosos a warkurai, pa ka aslang tar ning a mainla ning ir tol a warkurai, pa i amomol i tetek a taraila rop, ning i akamtur ulak pas a barsan ning kusun a minat."

<sup>32</sup> Ning la longor a warwara ana lalaun ulak kusun a minat, dingla na tarai tagun la, la morot laulau onoi, ika dingla la atai i mange, "Mila mang sur ur warwara ulak tetek mila ana utna ne." <sup>33</sup> Pa e Pol i purum kusun la. <sup>34</sup> Pa dingla na tarai la tortorot, pa la mur e Pol. La ne: E Dionisius, i miting

na tarai a kiwung Areopagus, pa ning a hane, a risana e Damaris, pa dingla na tarai otleng.

## 18

### *Tumo e Korin*

<sup>1</sup> Ning a ututnala ne ka rop, e Pol i han mitimo e Atens uto e Korin. <sup>2</sup> Dia arsongo taum ana ning a te Juda tingia, a risana e Akuila, i mitimo e Pontus, pa anuna hane, a risana e Prisila. Nating ka dia hanot mitimo e Itali, anasa e Sisar Klodius i warkurai i mang a tarai Juda rop lar han mitimo e Rom, a tnan hanua tumo e Itali. Pa e Pol i han sur ir geren diau. <sup>3</sup> I kes taum andiau pa ditol titol taum, anasa ditol natola tena toltol rumai sel. <sup>4</sup> Ana Pukakiar Sabatla i warwara taum onla ting na rumai lotu, sur ir dat atur a nuknuk a tarai Juda pa la otleng ning bel a tarai Juda sur lar tortorot o e Iesu.

<sup>5</sup> Ning e Sailas pa e Timoti dia hanot mitimo na papar e Make-donia, e Pol bel i manah kusun a warawai ana warwara ane God, pa i apuasa i tetek a tarai Juda mang e Iesu a Karisito ning e God i sune i ute. <sup>6</sup> Ika a tarai Juda la saran taurunla sur e Pol pa la atong saksakani. Pa e Pol i daplan anuna kaen, a asilang mang bel ma ir warwara ulak tetek la. Pa i atai la mange, "Ning mulor hirua ana warkurai ane God, mulo ot a kamkamna, pa ia ka langolango. Turpasi onone, ar han kama tetek la ning bel a tarai Juda." <sup>7</sup> Pa i purum kusun a rumai lotu, pa i kas uting na rumai anuna ning a barsan, a risana e Titius Jastus, a tena lotu tetek e God, pa anuna rumai i tur milau a rumai lotu. <sup>8</sup> E Krispus a ningnigo tagun a rumai lotu pa la rop otleng ning la kes ana nuna rumai, la tortorot ana Leklek. Pa a galis a tarai Korin, ning la longor a warawai ane Pol, la tortorot, pa di baptais la.

<sup>9</sup> Ning a morom a Leklek i warwara tetek e Pol ana tatatai mange, “Gong u matmataut, warwara ka. Gong u kes longoro, <sup>10</sup> anasa a kes taum hom, pa bel tik ir alaulau u, anasa anuka galis a tarai kane ana hanua ne.” <sup>11</sup> Pa e Pol i kes tingia ning a rau pa diono na kalang, pa i asaer la ana warwara ane God.

<sup>12</sup> Ning e Galio i ningnigo tumo na papar Akaia, a tarai Juda la tur taum sur lar um e Pol, pa la beni sur ir tur ana warkurai. <sup>13</sup> Pa la atongi mange, “A barsan ne i asaer a tarai sur lar lotu tetek e God ana toltol ning bel i arlar ana Warkuraila anumila a tarai Juda.” <sup>14</sup> Ning e Pol i mang sur ir warwara, e Galio i atai a tarai Juda mang, “Mulo a tarai Juda, ngandek a utna ne i toli ir laulau, pa bel i mur a warkurai anuna matanitu, ir tostos sur ar longor mulo ono. <sup>15</sup> Ika ning mulo arupi ka ana warwarala, pa ana risingla, pa ana numulo na warkuraila ot, i wakak ning mulo ot mulor warkurai i. Iau bel ar warkurai a toltola larne.” <sup>16</sup> Pa i kepsen la kusun a keskes na warkurai. <sup>17</sup> Pa la rop la tong akes pas e Sostenes, a ningnigo tagun a rumai lotu anuna tarai Juda, pa la umi namatana keskes a warkurai. Ika e Galio bel i pos balana ana utna ne.

#### *E Pol i ulak utumo e Antiok*

<sup>18</sup> Ning e Pol ka kes bongnani tumo e Korin, i han kusun la ning la tas ana tortorot pa i han uto e Senkria. Ning i kes tingia di kot arop a hihna, anasa ka tolsot pas anuna lele tetek e God. E Prisila pa e Akuila taum o e Pol ditol kas ana sip utumo na papar Siria. <sup>19</sup> Ning a sip i sot to e Epeses, e Pol i han kusun diau tingia, pa i kas uting na rumai lotu, pa la warwara taum ana tarai Juda. <sup>20</sup> Ning la nunungi sur ir kes bongnani al siklik taum

onla, bel i longor. <sup>21</sup> Pa ning la han sarara, i atai la mange, “Ning a nemnem ane God, io, ar ulak tetek mulo.” Pa i han mito e Epeses ana sip.

<sup>22</sup> Ning i sot to e Sisaria i han usaot e Jerusalem pa i oroi tar a tarai a lotu, pa lamur i han uto e Antiok. <sup>23</sup> Ning ka kes pas dingla na pukakiar tingia, i han kusun la. Pa i han taltal ana hananuala ana naur a papar e Galesia pa e Prigia, pa i arakrakai a tortorot anuna tarai a asasaerla rop.

#### *E Apolos i kes to e Epeses*

<sup>24</sup> Ning a te Juda mito e Aleksandria, a risana e Apolos, i hanot to e Epeses. I ning a wakak a tena warwara, pa i tastasman kol ana Buk Tabu. <sup>25</sup> Di ka asaer tari ana ngas anuna Leklek, pa i gas kol sur ir warawai. I asasaer wakak o e Iesu, ika i tasman ka a baptais ane Jon\*. <sup>26</sup> I han uting na rumai lotu pa i turpas a warwara pa bel i matmataut. Ning e Prisila pa e Akuila dia longori, dia ben pasi, pa dia atong talapor a ngas ane God teteki. <sup>27</sup> Ning e Apolos i mang sur ir han utumo na papar Akaia, la ning la tas ana tortorot to e Epeses, la wunan tari, pa la tumtumus tetek a tarai a asasaer tumo e Akaia, sur lar gas pasi. Pa ning ka hanot tumo na papar e Akaia, i a wakak a tena harnan-gai tetek la, ning e God ka lingir pas la ana tnan marmaris anunai sur lar tortorot. <sup>28</sup> Anasa i keles rakrakai a warwara anuna tarai Juda namatana tarai ning la puai mang e Iesu bel a Karisito. Pa i amomol tari ana warwara na Buk Tabu mang e Iesu ot a Karisito.

## 19

#### *E Pol i kes to e Epeses*

\* **18:25:** A baptais ane Jon tagun a lingir a nuknukindala. E Apolos bel i tasman a baptais ane Iesu Karisito. A baptais ane Iesu Karisito tagun a tortorot ana minat e Iesu sur ir alaun dala.

<sup>1</sup> Ning e Apolos i kes ting e Korin, e Pol i mur a ngas bual pa i hanot to e Epeses, pa i pastek pas dingla na tarai a asasaer tingia. <sup>2</sup> Pa i deken la mange, “Mangasa, a Talngan Tabu i kes o mulo ning mulo tortorot?” Pa la kelesi mange, “Belal, bel di atai mila ana Talngan Tabu.” <sup>3</sup> Pa i deken la, “Di baptais mulo on esi na ngas a baptais?” Pa la kelesi mange, “A baptais ane Jon.” <sup>4</sup> Pa e Pol i atongi mange, “E Jon i baptais ana baptais na lingir a nuknuk, pa i atai a tarai, sur lar tortorot o esining ir hanot lamur tana. I ning e Iesu.” <sup>5</sup> Ning la ka longor tar a warwara ane Pol, di baptais la ana risana Leklek e Iesu. <sup>6</sup> Ning e Pol i suah naur a kuna saot onla, a Talngan Tabu i kes onla, pa la warwara ana urmatana warwara, pa la warwara na propet. <sup>7</sup> Ngandek la ning a bonot pa pisir naur, pa la a taraila.

<sup>8</sup> E Pol i sira kas uting na rumai lotu, i warwara pa bel i matmataut, pa i papak wakak ana matanitu ane God sur lar tortorot. I toli larning arlar ana natol a kalang. <sup>9</sup> Ika a balan dingla na tarai tagun la i rakrakai kol, pa bel la mang sur lar tortorot, pa la atong laulau a Ngas ane Karisito namatana taraila. Pa e Pol i han kusun la sur a rumai a asasaer ane Tiranus. A tarai a asasaerla la muri pa la warwara taum ana pukakiarla ana rumai ning. <sup>10</sup> Ana naur a rau i sira toli manglarning. Pa la rop, a tarai Juda taum ana tarai ning bel a tarai Juda, ning la kes ana papar Asia, la longor a warwara anuna Leklek.

### *Mahis a nat e Skewa*

<sup>11</sup> E Pol i tol a maskan a ututnala na kulkulan ana rakrakai e God. <sup>12</sup> Pa tarai la los pas anunla na dia tawolla pa a didia kaenla otleng, la suah pasi ting na palaona e Pol, lamur la suah i ana tinsamanla pa

la langolango, pa a motla otleng la purum kusun la.

<sup>13</sup> Dingla na te Juda, la sira han taltal uting na hananuala, sur lar kepsen a motla kusun a tarai. Pa la tohoi sur lar kepsen otleng a motla taum ana risana e Iesu. La sira atongi mange, “A kepsen mulo ana risana e Iesu, ning e Pol i warawai onoi.” <sup>14</sup> Mahis a nat na e Skewa a te Juda, a tnan tena artabar tetek e God, la toli larne. <sup>15</sup> Ning a pukakiar a mot i keles la mange, “A tasman ot e Iesu, pa a tasman otleng e Pol. Ika mulo, esi mulo?” <sup>16</sup> Pa a barsan ning a mot i kas tar onoi, i sirok pas la, pa i um laulau la pa i silir anunla na kaenla pa la dun utumo lapiu a mengere in la kama.

<sup>17</sup> A warwara ana utna ne, i hanot tetek a tarai Juda pa a taraila ning bel a tarai Juda ning la kes to e Epeses, pa la matmataut rop, pa la hanrawai a risan a Leklek e Iesu. <sup>18</sup> A galis tagun la ning la tortorot, la hanot pa la patuai ana laulau a gininla. <sup>19</sup> Pa a galis otleng tagun la ning la wah, la los taum pas anunla na buk a wahla, pa la tun la namatana taraila. Ning la was taman a matana bukla, i arlar ot ana dilima na bonot a rip a mani. <sup>20</sup> A warwara anuna Leklek i han sarara, pa i gomo ana rakrakai.

### *A arsakai to e Epeses*

<sup>21</sup> Ning a ututnala ne ka rop, e Pol i mang sur ir han usaot e Jerusalem, pa ir bolos ana papar Makedonia pa a papar Akaia. Pa i atongi mange, “Ning ia ka han pas saot e Jerusalem, ar han kale uto e Rom.” <sup>22</sup> I sune nigon e Timoti pa e Erastus, dia tagun la ning la sira nangani, utumo e Makedonia, pa i, i kes kaba to na papar Asia.

<sup>23</sup> Ana pukakiarla ning, a tnan arsakai i hanot, anasa a taraila bel la mang sur a Ngas anuna Leklek. <sup>24</sup> Ning a barsan a risana e Demitrius, a tena tol manar ana

silva. I toltol a nanatar a rumai lotu ane Artemis a hane na god, ana silva. Pa a titol ne i tol otnan a tnan mani ane Demetrius pa anuna tarai a titol. <sup>25</sup> I ben taum pas anuna tarai a titol, pa dingla na tarai otleng ning anunla na titol i arlar, pa i atai la mange, “Taraila, mulo tasmani mang dala sira tol otnan a tnan mani tagun a titol ne. <sup>26</sup> Te e Epeses, pa ting na hananuala rop te na papar Esia, a barsan ne, e Pol, ka ben rongon pas a galis a tarai, ning i atai la mang a utunala ne dala sira toli ana kundala, bel a godla. <sup>27</sup> Ning a utna ne ir hanot tetek dala, bel ir alaulau ka a wakak a risana nundala titol, lar nuk atarna pas otleng a rumai lotu ane Artemis a hane na god, pa lar atarna pas a risana. Anundala a god, ning onone a tarai Esia rop pa a rakrakan hanua otleng la lotu teteki.”

<sup>28</sup> Ning la longor a utna ne, la balakut kol, pa la warwara kol mange, “Artemis anuna tarai Epeses, i itna kol!” <sup>29</sup> Pa taraila rop miting na hanua ning la arsakai. La dun pa la tong akes pas e Gaius pa e Aristarkus, naur a te Makedonia ning ditol armuri ma e Pol, pa la kas taum on diau uting na nunla tnan rumai a kiwung. <sup>30</sup> Ning e Pol i mang sur ir kas tetek a tarai, a tarai a asasaer la sairasi. <sup>31</sup> Pa dingla na ningnigola tagun a matanitu na papar Esia, a halalna e Pol, la saran a warwara teteki sur gong i kas uting na rumai a kiwung.

<sup>32</sup> Pa kunum a tarai la arsakai. Dingla na tarai la atong ning a warwara ot, pa dingla otleng la atong maskana warwara, pa galis tagun la bel la tasmani mang asaning la hanot suri. <sup>33</sup> A tarai Juda la sugut otnan e Aleksander tetek a kunum a tarai, pa la ben pasi usalanigo. Pa dingla la atai i ana sa ning ir atongi. E Aleksander i sairasa la ana kuna, sur lar kes

longoroi, pa i mang sur ir atalapor i ot namatana tarai. <sup>34</sup> Ika ning a tarai Epeses la tasmani mang e Aleksander a te Juda, bel la longor, la warwara kol ana naur a awa mange, “Artemis anuna tarai Epeses, i lekkek kol!”

<sup>35</sup> Ning a tena tumtumus anuna hanua ning i sairasa a tarai sur lar kes longoroi, i atai la mange, “A tarai Epeses, esi na hanua kane ning bel i tasmani mang a tarai mite e Epeses la tai alar a rumai lotu anuna tnan god Artemis, pa a manarna otleng ning i punga purum misaot na langit? <sup>36</sup> Bel tik ir puai kusun a utunala ne, i wakak ning mulor kes longoroi pa gong mulo tol ororos. <sup>37</sup> Mulo ka ben tar naur a barsan ne ute, ika bel dia kinkinau ana rumai lotu, pa bel dia atong laulau anundala a hane na god. <sup>38</sup> A keskes a warkurai pa a tena warkuraila kanet. Ning e Demetrius pa a tena titolla ning la armuri, la mang sur lar arup tik on ta utna, lar atai a keskes a warkurai onoi. Pa la, lar atostos a warkurai onoi. <sup>39</sup> Ning ta utna kaning ot mulo mang sur mulor warwara ono, dir atostosi ot ana kiwung na hanua. <sup>40</sup> Sakana dir arup dala ana arsakai ning i hanot ana pukakiar ne. Pa asa ma dalar atong alar dala ono? Anasa bel ta kamkamna.” <sup>41</sup> Ning ka atong tari larning, i sune sarara a taraila kusun a kiwung.

## 20

*A tinan ane Pol utumo e Makedonia pa e Grik*

<sup>1</sup> Ning a arsakai ka rop, e Pol i arsune pas a tarai a asasaer, i wunan tar la, pa i artulai tanla, lamur i han utumo na papar Makedonia. <sup>2</sup> Ning ka han pas ana hananuala ning, pa ka wunan tar la ana galis a wakak a warwara, i hanot tumo na papar Grik. <sup>3</sup> I kes tingia natol a kalang. Ning i sang



sur ir kas ana sip utumo na papar Siria, i tasmani mang a te Judala la pinpidaiwol sur lar umkoli. Pa i nuki mang i wakak sur ir han potor ana papar Makedonia ana nuna tinan ulak. <sup>4</sup> Pa e Sopater, a te Beria, a nat e Pirus, pa naur a te Tesalonika, e Aristarkus pa Sekundus, e Gaius a te Derbe, pa e Timoti, pa naur a te Asia, Tikikus pa e Tropimus, la armuri taum o e Pol. <sup>5</sup> La ne la nigo utumo e Troas, pa la kes nanan mila\* tumo. <sup>6</sup> Ning ka rop a lotu na bret ning belal is ono, mila han ana sip mito e Pilipai. Ning dilima na pukakiar ka rop, mila sot tumo e Troas tetek la ning la nigo kusun mila, pa mila kes pas a mais a pukakiar tingia.

#### *E Pol i alaun pas e Utikus*

<sup>7</sup> Ana ningnigo na pukakiar ana wik, mila kes taum sur milar hangan. E Pol i warwara tetek la, pa i dat abarah anuna warwara, tuk ana tnan morom, anasa i mang sur ir han kusun la ana pukakiar lamur. <sup>8</sup> Ana tuka rumai tisaot ning mila kes taum ono a galis a lam kol tingia. <sup>9</sup> Ning a barman, a risana e Utikus, i kes saot ana windo. Ning e Pol i warwara amon, a matana e Utikus i sulam kol, pa i borbor duman, pa i punga purum misaot ana natol a dek ana rumai ning, utumo na kabalapiu. Pa la los pasi, ka mat. <sup>10</sup> E Pol i purum, pa i borbor saot ono, pa i pos pasi, pa i atongi mang, "Gong mulo matmataut, ka laun."

<sup>11</sup> Lamur e Pol i han kas ulak, i kibik pas a bret† pa i hangan. I warwara bongnani ot tetek la, tuk a kamis i pusa ot, pa lamur i han kusun la. <sup>12</sup> A tarai la han sarara taum o e Utikus, a lalaun na, pa la gas kol.

#### *E Pol i han mito e Troas utumo e Miletus*

<sup>13</sup> Mila kas nigo ana sip utumo e Asos sur milar akas pas e Pol tingia, lar i ot i warkurai tari larning, anasa i mur a ngas. <sup>14</sup> Ning mila arsongo onoi tumo e Asos, mila akas pasi pa mila han utumo e Mitilini. <sup>15</sup> Ana pukakiar lamur mila han mito pa mila hanot milau ning a lolo, a risana e Kios. I kabakiar ulak, mila bolos e Samos, pa ana pukakiar lamur, mila sot to e Miletus. <sup>16</sup> E Pol ka warkurai tari mang ir bolos sen ka e Epeses, sur gong i molot to na papar Asia, anasa i mang sur ir han kapit usaot e Jerusalem ngandek sur ir kes tisaot ana pukakiar a Pentikos.

#### *A ararop na warwara ane Pol tetek a ningnigola anuna tarai a lotu to e Epeses*

<sup>17</sup> Ning mila hanot ana hanua e Miletus, e Pol i arsune uto e Epeses sur a ningnigola anuna tarai a lotu sur lar lamut teteki. <sup>18</sup> Ning la hanot teteki, i atai la mange, "Mulo tasman ot a ngas a keskes anuki ana pukakiarla ning a kes napirimulo, turpasi ana ningnigo na pukakiar ning a hanot totoh to na papar Asia. <sup>19</sup> A tarai Juda la warwara taum sur lar alaulau iau, pa a kilang a mamahat onoi. Ika, a titol ot tetek a Leklek, a atarna pas iau pa a luru matak i punga. <sup>20</sup> Ning a warawai pa a asaer mulo, namatana tarai pa ana numulo na rumrumaila, bel a matmataut pa bel a bunur ta utna ning ir nangan mulo. <sup>21</sup> A warawai tetek a taraila rop, a tarai Juda taum ana tarai masik otleng, sur lar lingir a nuknukinla tetek e God pa lar tortorot ana nundala Leklek e Iesu.

<sup>22</sup> "Pa ne a Talngan Tabu i angongos iau sur ar han ot usaot e

\* **20:5:** E Luk i tumus "mila", anasa i han taum o e Pol. † **20:11:** Dingla na tena tastasmai ana Buk Tabu la nuki mang e Pol i kibik a bret sur ir anuknuk a tarai ana minat e Iesu.

Jerusalem, pa bel a tasman asa ar pasteki tisaot. <sup>23</sup> A tasmani ka mang ana hananuala rop, a Talngan Tabu i atai iau mang a dodot pa a mamahatla la kes pas iau. <sup>24</sup> Ika bel a nuk pas anuka lalaun, pa bel a maris alari. A saran tari ka sur ar tolsot pas anuka tinan pa a titol, ning a Leklek e Iesu i saran tari tak, sur ar warwara talapor ana Wakak a Warwara ana marmaris ane God.

<sup>25</sup> “A tasmani mang mulo rop, ning a han taltal tetek mulo ana warawai ana matanitu ane God, bel mulor oroi ulak a matak. <sup>26</sup> Pa ne a atai talapor mulo, ning tik tagun mulo ir hirua ana warkurai ane God, a sulukna bel ir arup iau, ia ka langolango. <sup>27</sup> Anasa, bel a matmataut pa bel a bunur ta utna ana nuknuk e God, ning a warawai tetek mulo.

<sup>28</sup> “Mulor tai alar wakak mulo ot, pa a kunum a sipsip otleng ning a Talngan Tabu ot i saran tari ta mulo sur mulor tai alar la. Mulor tai alar a tarai a lotu ane God, ning ka lou pas la ana sulukna ot. <sup>29</sup> A tasmani, ning ar han kusun mulo, al tarai arlar ana lomlom a papla ning la ngalngaliah, lar kas tetek mulo, pa lar alaulau a kunum a sipsipla. <sup>30</sup> Pa al tarai otleng o mulo lar tur ot, pa lar lingir a momolna, sur a tarai a lotu lar mur la. <sup>31</sup> Mulor tumarang mulo! Pa mulor nuk pas natol a rau ning a kes taum o mulo. Bel a manah ana warwara na atumarang tetek mulo, ana moromla pa a kabakiarla, pa a luru matak i punta ono.

<sup>32</sup> “Onone a saran tar mulo tetek e God sur ir tai alar mulo, pa a saran tar mulo ana nuna warwara ning i apuasa anuna marmaris. A warwara ning i tolsot sur ir arakrakai mulo, pa ir tabar mulo ana wakak a artabarla ning e God i sira tabar anuna tostos a tarai onoi. <sup>33</sup> A nuknukik bel i laulau

sur ta mani pa ta kaen anuna tik. <sup>34</sup> Mulo ot mulo tasmani mang a titol ot ana naur a kuk sur a ututnala ning i topas iau, pa la otleng ning mila armuri. <sup>35</sup> Iau ot a pas benben mulo ana rakrakai a titol sur mulo otleng mulor sira toli larning, pa mulor nangan la ning la ngoro, pa mulor nuk pas a warwara ning a Leklek e Iesu ka atong tari mange, ‘La ning la artabar la angis tanla ning la kibas a utna.’”

<sup>36</sup> Ning ka atong arop tar a warwara ne, e Pol taum ana taraila rop la kes ana bokona hanla, pa la nunung. <sup>37</sup> La rop la tangis, pa la pos pas e Pol, pa la goro a ris a pahana. <sup>38</sup> Pa a tarai la nuk lingir kol la, anasa ka atai tar la mang bel ma lar tai taum ulak. Pa lamur la tur tulani ting na ngas sur a sip.

## 21

### *A tinan ane Pol usaot e Jerusalem*

<sup>1</sup> Ning mila ka han kusun la, mila kas ana sip sur milar han tostos utumo na lolo Kos. Pa ana pukakiar lamur, mila han utumo na lolo Rodes, mitingia mila han utumo e Patara. <sup>2</sup> Pa mila pastek pas ning a sip tingia, ning ir han utumo na papar Ponika. Mila kas ono, pa mila han. <sup>3</sup> Mila oroi a lolo Saiprus i kes ana ris a kair i mila, mila bolosi. Pa mila han utumo na papar Siria, pa mila sot tumo e Tair, sur a sip ir asirok a ututnala. <sup>4</sup> Ning mila pastek pas a tarai a asasaer tingia mila kes pas a mais a pukakiar taum onla. Pa a Talngan Tabu i anuknuk la ana warwara mang, e Pol gong i han usaot e Jerusalem. <sup>5</sup> Ika ning ka rop anumila na pukakiar na keskes tingia, mila ulak, pa a tarai a asasaer rop taum ana nunla na gurarala pa na natnatunla la tur tulani mila miting na hanua utumo latasi. Lamur mila tur ana bokona

hamila, pa mila nunung. <sup>6</sup> Lamur mila atong artulai tar, mila kas ana sip, pa la, la ulak sur anunla na rumaila.

<sup>7</sup> Mila han mitimo e Tair pa mila sot to e Tolemes, pa mila gasgas pas la ning la tas ana tortorot, pa mila kes taum onla ning a pukakiar. <sup>8</sup> Ana pukakiar lamur, mila han ulak, pa mila hanot to e Sisaria, pa mila kes ting na rumai ane Pilip, a tena warawai ana Wakak a Warwara, i ning tagun a mais a barsan, ning a aposella la ka aslang pas la. <sup>9</sup> A barsan ne, diat a nat na hane, ning bel la taulai pa la sira warwara na propet.

<sup>10</sup> Ning mila kes tingia ana galis a pukakiar, ning a propet, a risana e Agabus, i hanot misaot na papar Judia. <sup>11</sup> I han tetek mila, i los pas a let ane Pol, pa i dot pas naur a hana pa naur a kuna ot ono, pa i atongi mange, “A Talngan Tabu i atongi mange, a tarai Juda saot e Jerusalem lar dot a barsan ning anuna let ne larotne a toli, pa lar sarani uting na kuna tarai ning bel a tarai Juda.”

<sup>12</sup> Ning mila longor a warwara ne, mila taum ana tarai miting na hanua ning, mila sairas e Pol sur gong i han usaot e Jerusalem. <sup>13</sup> Ika e Pol i keles la mange, “Sur asa ning mulo domos, pa mulo abal maris iau? A ka saran tar iau sur lar dot iau pa dir umkol iau otleng saot e Jerusalem, anasa ana risana Leklek e Iesu.” <sup>14</sup> Ning mila tolpanai sur milar sairasi, mila manah kama, pa mila atongi mange, “I wakak ning dir tolsot pas a nemnem anuna Leklek.”

<sup>15</sup> Pa lamur, mila sang pas, pa mila han usaot e Jerusalem.

<sup>16</sup> Mila armuri taum ana tarai a asasaer mitimo e Sisaria. La tulan tar mila tetek ning a barsan, a risana e Nason, a te Saiprus, sur milar kes napirna. I ning tagun a tarai a asasaer tagun nating.

### *E Pol i hanot saot e Jerusalem*

<sup>17</sup> Ning mila hanot saot e Jerusalem, na tastasimila ana tortorot la ben pas mila ana gasgas. <sup>18</sup> Ana pukakiar lamur, mila ma e Pol, mila han sur milar oroi e Jems. Pa a ningnigola rop tagun a lotu la kaning ma. <sup>19</sup> Ning e Pol ka warwara na gasgas pas la, i atai la ana taktakai utna ning i toli ana rakrakai e God ana nuna titol tetek la ning bel a tarai Juda.

<sup>20</sup> Ning la longori, la rakan aleklek pas e God. La atai e Pol mange, “Tasimila, u tasmani mang a galis a rip tan dala a tarai Juda, la ka tortorot, pa la rop la rakrakai sur lar mur a Warkuraila ane Moses. <sup>21</sup> La ka longor a asasongo na warwara hom, mang u asaer a tarai Juda rop ning la kes napira tarai ning bel a tarai Juda, sur lar suah sen a Warkuraila ane Moses, pa u atai la otleng mang gong la kot talilis a natnatunla, pa gong la mur a toltolla ana lotu Juda. <sup>22</sup> Lar longori ot mang u ka hanot ute. Pa asa ma dalar toli? <sup>23</sup> Ur tol a utna ne mila atai u ono: Diat a barsan ne omila, la ka lele tar tetek e God.

<sup>24</sup> Ur ben pas la, pa mulor atotoh pas mulo arlar ana warwara na warkurai, pa u, ur lou a ututnala na artabar ning lar artabar ono, sur dir bot kokor arop a hihinla. Ning ur toli lerne, a taraila rop lar tasmani mang a warwarala ning la longori, bel i momol, pa u otleng u mur ot a warkurai. <sup>25</sup> Pa tetek a tena tortorotla tagun la ning bel a tarai Juda, dala ka tumtumus tar tetek la mange: Gong la ien ta utna ning di artabar ono tetek a asasongo na godla. Gong la ien ta utna ning bel di gos wakak sen a suluk kusuni, pa ta inagoi ning di pos koli ka, anasa a suluk kaning ot ono. Pa gong la tol a pamuk a toltol.”

<sup>26</sup> Ana pukakiar lamur, e Pol i ben pas diat a barsan ning, pa la taum la atotoh la. La kas uting na

rumai a artabar, sur ir atong tar a pukakiar ning a titol na atotoh ir rop ono, pa dir tun otleng a artabar anun la taktakai.

*Di tong akes pas e Pol ting na rumai a artabar*

<sup>27</sup> Ning a mais a pukakiar na atotoh milau ir rarop, dingla na tarai Juda mitimo na papar Esia, la oroi e Pol ting na rumai a artabar. Pa la angangas a tarai sur lar balakut e Pol pa la tong akesi. <sup>28</sup> Pa la warwara kol mange, “A tarai Israel, mulor nangan mila. A barsan ne, i asaer a taraila rop ana rakrakan hanua sur lar nget dala, pa a Warkuraila ane Moses, pa a rumai a artabar. Pa ka ben kas pas otleng a te Grikla ute na rumai a artabar, a pukna ning e God i aslang tari anunai, pa ka aduri namatana e God.” <sup>29</sup> La atongi larn e anasa nating, la ka oroi tar diau ma e Tropimus, a te Epeses, tumo lahanua, pa la nuki mang e Pol i ben kas pasi uting na rumai a artabar.

<sup>30</sup> A taraila rop la arlak pa la dun taum, la tong akes pas e Pol, pa la dat purum pasi kusun a rumai a artabar, pa la tagar kapit a tamanla. <sup>31</sup> Ning la mang ma sur lar umkoli, a warwara i kibas a tnan ningnigo anuna tarai a harum mitimo e Rom, mang a tarai Jerusalem rop la arlak. <sup>32</sup> I ben taum kapit pas a tarai a harum pa anunla ningnigola, pa la dun purum tetek la. Ning a tarai la oroi a tnan ningnigo taum ana tarai a harum, la manah ana um e Pol. <sup>33</sup> A tnan ningnigo i han tetek e Pol, pa i tong akes pasi, pa i arsune sur dir dot akesi ana naur a sen. Pa i deken la mange, “Esi na barsan ne? Asa ning i tol rongon tari?” <sup>34</sup> Dingla na tarai tagun a kunum, la atong ning a warwara, pa dingla otleng la atong ning a warwara masuk. A tnan ningnigo bel i kibas lar pas a momolna, kamna ana

tnan arlak, pa i arsune sur dir ben e Pol uting na rumai anuna tarai a harum. <sup>35</sup> Ning e Pol i hanot ting na leta na rumai, a tarai a harum la losi, anasa a kunum a tarai la ngalngalia kol. <sup>36</sup> Pa kunum a tarai ning la mur la, bel la manah na arkabah mange, “Sai koli!”

*E Pol i awara a taraila*

<sup>37</sup> Ning la mang ma sur lar kas taum o e Pol uting na rumai anuna tarai a harum, i deken a tnan ningnigo mange, “I wakak ka ning ar atong ta utna tam?” Pa a tnan ningnigo i dekeni mang, “Ai, u tasman ot a warwara Grik? <sup>38</sup> A nuki mang u a te Ijip, ning nating i akamtur a harum taum ana matanitu, pa i ben diat a rip a tena tol arlak usaot na hanua bel.” <sup>39</sup> Pa e Pol i kelesi mange, “Iau a te Juda mitimo e Taso, ana papar Silisia, iau bel tagun ta hanua oros ka. Lak, ur malmaling sen iau, sur ar awara a taraila ne.” <sup>40</sup> Ning a tnan ningnigo ka malmaling tar e Pol, i tur ting na leta na rumai, pa i sairas la ana kuna. Ning la tur longoroi, i ataila ana warwara Hibru mange,

## 22

<sup>1</sup> “Na tastasikla, pa na tamtamangla mulor longor a warwara ning ar atalapor iau ono.”

<sup>2</sup> Ning la longori ning i warwara ana warwara Hibru tetek la, la tur longoroi rop. Pa i atongi mange, <sup>3</sup> “Iau a te Juda, di agon iau tumo e Taso ana papar Silisia. A barman tar ot te e Jerusalem, pa iau a kaklik a asaer ot ane Gamaliel, pa i asaer wakak iau ana Warkuraila anuna tumtubundala, pa a titol rakrakai tetek e God larotne mulo toli. <sup>4</sup> Pa a alaulau a tarai ning la mur a Ngas ane Karisito. A umkol dingla na tarai, pa dingla na tarai taum ana gurarala otleng a tong akes la, pa a akas la ana rumai a dodot. <sup>5</sup> A ningnigo na tena

artabar tetek e God pa a tarai a kiwung rop la talapor ana utna ne sur lar warwara talapor ono, pa a los pas a bukla kusun la ning la tumusi tetek na tastasinla a te Judala tumo e Damaskus. Manglarning ar han uto sur ar tong akes pas a taraila, pa ar dot akes la, pa ar ben la, sur dir alaulau la saot e Jerusalem.

*E Pol i warwara talapor ana pukakiar ning i lingir a nuknukna (Ap 9:1-19; 26:12-18)*

<sup>6</sup> “Ning a han milau e Damaskus, ana tnan kamis, a tnan talapor misaot na langit i hanot kulkulan pa i pil talilis pas iau. <sup>7</sup> A punga purum ting lapiu, pa a longor a elngena mainla i atai iau mange, ‘Sol, Sol, sur asa u alaulau iau?’ <sup>8</sup> Pa a dekeni mange, ‘Leklek, esi u?’ Pa i keles iau mange, ‘Tau e Iesu, a te Nasaret, ning u alaulau iau.’ <sup>9</sup> Pa tarai ning mila armuri, la oroi a talapor, ika bel la longor a elngena mainla ning i warwara tetek iau. <sup>10</sup> Pa a dekeni, ‘Leklek, asaning ar toli?’ Pa a Leklek i keles iau mange, ‘Ur tur pa ur han utumo e Damaskus, pa dir atai u ana ututnala ning di ka aslang tari sur ur toli.’ <sup>11</sup> La ning mila armuri la tong benben otnan iau utumo e Damaskus, anasa a matak i kut ana rakrakai a talapor.

<sup>12</sup> “Ning a barsan, a risana e Ananias, a tena lotu momol ning i sira mur asot a Warkuraila, pa a tarai Juda rop ning la kes tingia, la hanrawai koli. I hanot tetek iau, <sup>13</sup> pa i tur milau iau, i atongi mange, ‘Sol, a tasiklik, ur tai ulak.’ Pa ana mais a kamis ot ning, a matak i tapalas pa a oroi e Ananias. <sup>14</sup> Pa e Ananias i atai iau mange, ‘E God anuna tumtubundala nating ka aslang tar u, sur ur tasman anuna nemnem, pa ur oroi a Tena Tostos, pa ur longor anuna warwara miting na pahana. <sup>15</sup> Pa

ur tena warwara talapor anunai tetek a taraila rop ana ututnala ne ning u ka oroi tari pa u ka longor tari. <sup>16</sup> U kes pas asa? Ur tur, pa dir baptais u, pa ur nunung ana risana, sur dir kepsen anum na toltol laulaula.’

*A arkabah tetek e Pol sur ir warawai tetek a tarai ning bel a tarai Juda*

<sup>17-18</sup> “Ning a ulak usaot e Jerusalem, pa a nunung ting na rumai a artabar, a oroi a Leklek ana tatatai, i atai iau mange, ‘Tur kapit! Ur han kapit mite e Jerusalem, anasa bel lar kibas anuma warwara talapor hok.’ <sup>19</sup> Pa a kelesi mange, ‘Leklek, la tasmani mang a sira kas ana rumai lotu rop, pa a akas la ning la tortorot hom ting na rumai a dodot, pa a um la. <sup>20</sup> Pa ning di umkol e Stiwen, esining i warwara talapor hom, iau otleng a tur tingia, a malmaling taum onla, pa a tai alar a kaenla anunla ning la umkoli.’ <sup>21</sup> Pa a Leklek i atai iau mange, ‘Ur han, ar sune bakbak u tetek a tarai ning bel a tarai Juda.’ ”

<sup>22</sup> A tarai la longor a warwara ane Pol tuk ot ana warwara ne. Lamur la kukuk ana tnan elngena mange, “A barsan ne ir rarop kusun a rakrakan hanua, bel i sot sur ir laun.” <sup>23</sup> Ning la kukuk larne, la pas sen anunla na kaenla ning la polpol alar anunla na mermer ono, pa la minggen sarara a kubus usaot. <sup>24</sup> Pa a tnan ningnigo i arsune sur dir ben e Pol uting na rumai anuna tena harumla, pa dir dapisi pa dir dekeni sur dir tasman asa a kamkamna ning a tarai la kukuk larne ono. <sup>25</sup> Ning la dot tari taum ana senla, sur lar dapisi, e Pol i atai a ningnigo anuna tena harumla ning i tur milau mang, “Mangasa, i tostos ka ning mulor dapisi ta te Rom, ning belot di warkurai i?”

<sup>26</sup> Ning a ningnigo anuna tarai a harum i longori, i han tetek anuna ningnigo, pa i atai i mange, “Asa ning u mang sur ur toli? A barsan ne a te Rom.” <sup>27</sup> A tnan ningnigo i han tetek e Pol pa i dekeni mange, “Atai iau. U a te Rom?” Pa i kelesi mange, “Momol. Iau a te Rom.” <sup>28</sup> Pa a tnan ningnigo i atai i mange, “A lou a warkurai sur ar te Rom ana tnan mani.” Pa e Pol i kelesi mange, “Ika iau, di agon iau ot a te Rom.” <sup>29</sup> Pa la ning la mang sur lar dekeni, la tur sarara kapit kusuni. Ning a tnan ningnigo i tasmani mang e Pol a te Rom, i matmataut, anasa ka dot tari ana sen.

*E Pol i tur namatana tarai a kiwung*

<sup>30</sup> Ana pukakiar lamur, ning a tnan ningnigo i mang sur ir tasmán wakak asaning a tarai Juda la arup e Pol onoi, i pak sen a sen, pa i arsune sur a lekkek na tena artabar tetek e God, pa a tarai a kiwung rop sur lar han taum. Pa i ben purum pas e Pol, pa i aturi namatanla.

## 23

<sup>1</sup> E Pol i tai tostos sur a tarai a kiwung, pa i atai la mange, “Na tastasik, tuk onone ia ka han tostos namatana e God, pa a balak bel i arup iau ana ta utna.” <sup>2</sup> Pa e Ananias a ningnigo na tena artabar tetek e God, i sune la ning la tur milau e Pol sur lar pasar a pahana. <sup>3</sup> Pa e Pol i atai i mange, “E God ir pasar u, u arlar ana ris a rumai di sabar tari ana kokok, ika tingui i laulau kol. U kes sur ur warkurai iau arlar ana Warkuraila, ika u kutus a Warkuraila ning u arsune sur dir pasar iau.” <sup>4</sup> La ning la tur milau i la atongi mange, “Mangasa, u asa u, sur ur atong laulau a ningnigo na tena artabar tetek e God?” <sup>5</sup> E Pol i keles la mange, “A tastasikla, bel a tasmani mang i a ningnigo na tena artabar

tetek e God, anasa di ka tumus tari ting na Buk Tabu mange, ‘Gong u atong laulau ta ningnigo ana num a taraila.’” *Kisim Bek 22:28*

<sup>6</sup> Ning e Pol i tasmani mang dingla na tarai tagun la, a Sadusila, pa dingla a Parisaiola, i kukuk ting na kiwung mange, “A tastasikla, iau a Parisaio, pa a nat a Parisaio, onone di arup iau kamna ana nuka tortorot ana lalaun ulak kusun a minat.” <sup>7</sup> Ning ka atong tari larning, a Parisaiola pa a Sadusila la turpas a arlak, pa a kiwung i taptapagal. <sup>8</sup> Anasa a Sadusila bel la tortorot ana lalaun ulak kusun a minat, pa angelola, pa motla, ika a Parisaiola la tortorot on ditol rop. <sup>9</sup> Pa la turpas a tnan arbalakut, pa dingla na Parisaiola, la ning a tena asaerla ana Warkuraila, la tur, pa la arlak kol, pa la atongi mange, “Bel mila pastek ta laulau a utna ning a barsan ne i rongo ono. Sakana ta mot, pa ta angelo kar awarwara tari.” <sup>10</sup> Ning a arlak ka itna pa la turpas a harum, a tnan ningnigo anuna tena harumla i matmataut, sakana lar dat kakahal e Pol. I sune a tarai a harum, sur lar han pa lar dat pasi kusun a taraila, pa lar beni usaot na rumai anuna tarai a harum.

<sup>11</sup> Ana morom ning, a Lekkek i hanot tetek e Pol, pa i atai i mange, “Gong u matmataut, ur tur rakrakai. U ka warwara talapor tar hok te e Jerusalem, mangotleng larning ur warwara talapor hok tumo e Rom.”

*La pinpidaiwol sur lar umkol e Pol*

<sup>12-13</sup> Ana kabakiar kobot ulak, dingla na te Judala, i arlar ona diat a bonot pa i apapisir, ning la warwara taum sur lar lele, mang bel lar hangan, pa bel lar gang, tuk ot ning lar umkol tar e Pol. <sup>14</sup> La han tetek a lekkek a tena artabarla tetek e God, pa a ningnigola tagun a lotu, pa la atongi mange, “Mila

ka lele tar mang bel milar ien ta utna tuk ot ning milar umkol tar e Pol. <sup>15</sup> Mila mang sur mulo pa a tarai a kiwung, mulor saran a warwara tetek a tnan ningnigo anuna tena harumla pa mulor asongo pas e Pol kusuni, sur ir sune i tetek mulo. Mulor atongi mang mulo mang sur mulor longor ta warwara talapor ulak tana. Pa mila ka sang sur milar umkoli ting na ngas ning bel ot ir hanot tetek mulo.”

<sup>16</sup> Ning a etna ane Pol i longor a pinpidaiwol ne, i han sur a rumai anuna tena harumla, pa i atai e Pol ono. <sup>17</sup> Pa e Pol i kabah pas ning a ningnigo ana tena harumla, pa i atai i mange, “Ur ben a barman ne tetek anumulo a tnan ningnigo, anasa i mang sur ir atai i ana ning a warwara.” <sup>18</sup> Pa i beni tetek a tnan ningnigo, pa i atai i mange, “E Pol, ning i dodot, i arsune sur iau, pa i nunung iau sur ar ben tar a barman ne tetek u, anasa i mang sur ir atai u ana ning a warwara.” <sup>19</sup> A tnan ningnigo i tong pas a kuna pa i ben masik pasi, pa i dekeni mange, “Asa ning u mang sur ur atai iau ono?” <sup>20</sup> Pa i atongi mange, “A tarai Juda la ka pinpidaiwol pas sur lar asongo pas e Pol kusun u, sur ur tulani latu tetek a tarai a kiwung, sur lar longor ta warwara talapor ulak tana. <sup>21</sup> Gong u longor tanla, anasa diat a bonot pa i apapisir, la mumun suri. La ka lele tar mang, bel lar hangan pa bel lar gang, tuk ot ning lar umkol tar e Pol. Pa la harnanai kama sur ur malmaling.” <sup>22</sup> Pa tnan ningnigo i atumarangi mang, “Gong u atai tar tik mang u ka atai tar iau ana utna ne.” Pa lamur i sune seni.

### *Di ben pas e Pol tetek e Feliks*

<sup>23</sup> A tnan ningnigo anuna tena harumla, i kabah pas naur a ningnigo teteki pa i atai diau mange, “Mur sang naur a mar a tena harum, pa mais a bonot a tena

harum ning la kas ana hosla, pa naur a mar a tena harum ning la los a turaila, pa mulor han ana siuk a matana kamis onone na morom uto e Sisaria. <sup>24</sup> Mur ben ir naur a hos, sur e Pol ir han ono. Mulor tai alar wakaki tuk mulor hanot onoi tetek e Feliks, a tnan ningnigo ana matanitu.” <sup>25</sup> Pa i tumus a pas mange teteki:

<sup>26</sup> Iau e Klodius Lisia, a tumtumus tetek u Feliks, a tnan ningnigo ana matanitu.

A marmaris tetek u.

<sup>27</sup> A barsan ne a sune i tetek u, a tarai Juda la tong akes pasi, pa milau lar umkoli. Ika mila pa a tena harumla, mila hanot, pa mila alaun pasi, anasa ia ka tasman tari mang i a te Rom. <sup>28</sup> Pa a mang sur ar tasman asaning di arupi ono, pa a ben tari ana nunla kiwung. <sup>29</sup> Onone a talapor onoi mang di arup orosi ka ana toltol ana warkuraila tagun anunla na lotu, ika bel i tol ta laulau a utna sur ir dodot ono, pa dir umkoli ono. <sup>30</sup> Ning di atai iau ana pinpidaiwol sur a barsan ne mang lar umkoli, a sune kapiti tetek u. Pa a atai la ning la arupi, sur lar atalapor anunla na ararup tetek u. Ai ka i ning. Ka rop.

<sup>31</sup> Pa a tarai a harum la ben pas e Pol ana morom uto e Antipatris, larning di atai tar la. <sup>32</sup> Ana pukakiar lamur, a tarai a harum ning la kas ana hosla, la bolos taum o e Pol, pa a tarai a harum otleng la ulak usaot e Jerusalem. <sup>33</sup> Ning la hanot ting e Sisaria, la saran tar a pas tetek e Feliks, a tnan ningnigo ana matanitu, pa la saran tar e Pol ana kuna. <sup>34</sup> Ning e Feliks ka was tar a pas, i deken e Pol mange, “U tagun esi na papar?” Pa ning ka tasman tari mang e Pol a te Silisia, <sup>35</sup> i atai i mange, “Ning a tarai a ararup lar hanot ute, ar longor a utna ning lar arup u ono.” Pa i arsune sur dir tai alari ting na rumai ane Herot.

## 24

### *A tarai Juda la arup e Pol*

<sup>1</sup> Dilima na pukakiar lamur, e Ananias, a ningnigo na tena artabar tetek e God pa dingla na ningnigola tagun a lotu, pa e Tertulus, a tena tastasmai ana Warkuraila, la hanot tumo e Sisaria, pa la atalapor anunla na ararup o e Pol tetek e Feliks a tnan ningnigo ana matanitu. <sup>2</sup> Ning di ka kabah pas e Pol, e Tertulus i turpas a warwara teteki mange,

“Feliks, u lekkek kol. Mila kes bongnani ana bal molmol nahai a warkurai anumi. A galis a utna i hanot ana nundala papar anasa anuma tai alar i wakak kol. <sup>3</sup> Mila taum ana tarai tagun a hananuala rop, mila gas ana numa warkuraila pa mila atong wakak kol tetek u ono. <sup>4</sup> Pa bel ar angoro u an al warwara. A nunung u sur ur maris mila pa ur longor anumila al siklik warwara.

<sup>5</sup> Mila oroi a barsan ne a tena tol arsakai, pa i akamtur a arsakai na arpotor a tarai Juda ana rakrakan hanua rop. Pa i a ningnigo ana asasongo na lotu di atongi mang a lotu Nasaret. <sup>6-8</sup> Pa i mang sur ir tol adur a rumai a artabar sur ir dur ana matana e God. Ika mila tong akes pasi.\* Ning u ot ur tikini, ur tasman a momolna ana sa ne mila arupi ono.” <sup>9</sup> Ning e Tertulus ka warwara rop, dingla na tarai Juda otleng la harnangai ana ararup, la atongi mang i momol ot a ararupla ne.

### *E Pol i warwara talapor namatana e Feliks*

<sup>10</sup> Ning e Feliks, a tnan ningnigo ana matanitu, i amaler a pukulna tetek e Pol sur ir warwara, e Pol i atai i mange, “A gas ning ar atalapor iau kusun u, anasa a tasmani

mang u ka warkurai a galis a rau tetek a tarai ne. <sup>11</sup> Ning ur deke, ur tasmani mang ning a bonot pa pisir naur a pukakiar alar tari ka, a hanot saot e Jerusalem, sur ar lotu. <sup>12</sup> Pa bel la oroi tar tik ning mia arlak taum ting na rumai a artabar, pa bel la oroi tar iau otleng mang a akamtur ta arsakai ting na rumai lotula, pa ting na tinine hanua. <sup>13</sup> Pa bel lar amomol sot pas anunla na ararup tetek u ana sa ning la arup iau ono.

<sup>14</sup> “Ar atai talapor u mang, iau a mur a Ngas ane Karisito, ning la atongi ana asasongo na lotu. Ika ana lotu ne, a lotu ot tetek e God anuna tumtubumila tagun nating, pa a tortorot ana ututnala rop ning di ka tumus tari ana Warkuraila pa ana bukla anuna propetla. <sup>15</sup> Anuka tortorot o e God i arlar ana tarai ne. Iau otleng a harnanai ana tortorot mang e God ir akamtur ulak pas a wakak a tarai pa a laulau a tarai kusun a minat. <sup>16</sup> Ine a kamkamna ning a sira rakrakai sur anuka lalaun ir kes talapor namatana e God, pa namatana taraila otleng.

<sup>17</sup> “A galis a rau bel a kes saot e Jerusalem, pa lamur a ulak usaot sur ar abaran a mani na artabar tetek a kapan a taraila, pa ar saran otleng a artabarla ning dir tun la sur a artabar tetek e God. <sup>18</sup> Lanigo ning belot a kas uting na rumai a artabar ia ka tol arop tar a warkuraila sur ar totoh namatana e God. Ning a kas sur ar tol a titol a artabar, bel la pastetek iau taum ana galis a tarai, pa bel al arsakai. <sup>19</sup> Ika dingla na tarai Juda mitimo na papar Esia la kes tingia ana pukakiar ning la tong akes pas iau. Ning ta utna lar arup iau ono, i wakak sur la ot lar

\* **24:6-8:** Dingla na tena tastasmai ana Buk Tabu la nuki mang dingla na warwara otleng i kes ana rinala ne. I manglarne: *Pa mila nuki mang milar warkurai i arlar ana numila na warkurai. Ika e Lisia, a tnan ningnigo anuna tena harumla, i kas pa i dat maskan pasi kusun a kumila ana rakrakai. Pa i arsune mang mila ning mila arup a barsan ne, milar han tetek u pa milar tur na matam.*



han ute pa lar arup iau na matam.  
 20 Pa i wakak sur la ning kane, lar warwara talapor anal laulau a utna ning la pasteteki hok, ning a tur namatana tarai a kiwung saot e Jerusalem. 21 Ngandek la arup iau ana ning a warwara ka. Ning a tur namatanla, a warwara kol mange, 'A tur ana warkurai na matamulo onone, anasa a tortorot ana lalaun ulak kusun a minat.' "

22 E Feliks ning i talapor wakak ot ana lotu di atongi a Ngas ane Karisito, i amanah tar kaba a warkurai, pa i atongi mange, "Ning e Lisia, a tnan ningnigo anuna tarai a harum ir hanot, ar bot suah ta warkurai ana ararup ne." 23 Pa i atai a ningnigo anuna tena harumla mange, "E Pol ir kes na dodot ana nuna warkurai. Ur noreni, pa gong u sairas na halalnala ning lar nangani."

*E Pol i warwara tetek e Feliks pa e Darusila*

24 Dingla na pukakiar lamur, e Feliks i hanot ulak taum ana nuna hane e Darusila, a hane Juda. I arsune sur e Pol, pa i longor anuna warwara ana tortorot o e Karisito Iesu. 25 Ning e Pol i warwara ana tostos a toltol, pa a toltol ning tik ir warkurai tostos pas anuna lalaun, pa a pukakiar na warkurai ning ir hanot, e Feliks i matmataut, pa i atongi mange, "Pol, ur han kaba. Ning ar langolango, ar arsune ulak sur u." 26 Pa i mang otleng sur e Pol ir atostosi anal mani, sur ir pak seni. Pa i tikai arsune ot suri, pa dia warwara taum.

27 Ning naur a rau ka rop, e Porsius Festus i keles e Feliks. Ika e Feliks belot i pak sen e Pol, anasa i mang sur ir agasgas a tarai Juda.

## 25

*E Pol i tur namatana e Festus*

1 Ning ka natol a pukakiar alar a tinan ot ane Festus ting na hanua Sisaria ana papar ning ir warkurai i, i han usaot e Jerusalem. 2 Pa

leklek a tena artabarla tetek e God pa a ningnigola anuna tarai Juda, la hanot teteki pa la warwara na ararup o e Pol. 3 Pa la nunung e Festus sur ir longor tanla, pa la atai i mange, "Ur maris mila pa ur sune e Pol ute e Jerusalem." Anasa la ka pinpidaiwol pas sur lar umkoli na arpotor ana nuna tinan. 4 Pa e Festus i keles la mange, "E Pol i dodot ot tumo e Sisaria, pa iau otleng ka milau sur ar ulak utumo. 5 I wakak ning al ningnigo o mulo lar han taum hok utumo, pa ning ta utna a barsan ne i rongo ono, mulor arupi ono tumo."

6 Ning e Festus ka kes taum pas onla ngandek siwal o ning a bonot a pukakiar, i ulak utumo e Sisaria. Pa ana pukakiar lamur tana, i turpas a warkurai, pa i arsune sur dir ben e Pol teteki. 7 Ning e Pol i hanot, a tarai Juda misaot e Jerusalem la tur talilis pasi, pa la arupi ana galis a mamahat na ararup, ika bel la atong pas ta utna sur ir amomol tari. 8 Pa e Pol i atalapor i mange, "Bel a tol ta rongo ana warkurai anuna tarai Juda, pa ana rumai a artabar, pa tetek e Sisar."

9 E Festus i mang sur ir agasgas pas a tarai Juda, pa i deken e Pol mange, "Mangasa, ur malmaling ka sur ur han usaot e Jerusalem, sur ar warkurai u ana ararupla ne tisaot?" 10 Pa e Pol i kelesi mange, "Onone a tur ana warkurai ane Sisar, pa i tostos ning dir warkurai iau ot te. Bel a tol ta rongo tetek a tarai Juda, pa u otleng u tasmani. 11 Ning ia ka tol ta laulauna ning i arlar sur ar hirua ono, i wakak ka ning ar hirua. Ika ning a warwara na ararup ne la arup iau onoi bel i momol, bel i tostos sur tik ir saran tar iau tetek la. A nunung sur e Sisar ot ir longor a warkurai hok." 12 Ning e Festus ka warwara taum tar ana nuna tena harnangai na warwara, i atongi mang, "U ka

nunung sur ur han tetek e Sisar, pa ar saran sen u uto e Rom tetek e Sisar.”

*E Agripa pa e Bernaisi dia mang sur diar longor e Pol*

<sup>13</sup> Dingla na pukakiar lamur, King Agripa ditas ma e Bernaisi a hane, dia hanot tumo e Sisaria, sur diar saran a hanrawai tetek e Festus ana nuna keskes na ningnigo. <sup>14</sup> Ning dia ka kes a galis a pukakiar tingia, e Festus i atai a king o e Pol, pa i atongi mange, “E Feliks ka manah kusun anuna titol, ika i noren tar ning a barsan kanet ana rumai a dodot. <sup>15</sup> Pa ning a han usaot e Jerusalem, a lekkek na tena artabar tetek e God pa a ningnigola anuna tarai Juda la atai iau ana warwara na ararup onoi, pa la nunung iau sur ar warkurai i sur dir umkoli. <sup>16</sup> Pa a atai la mange, ‘Bel a toltol anuna tarai Rom mang dir saran tar ta barsan tetek a tena ararupla, ning belot i tur taum onla, sur i otleng ir atalapor i ana nunla na ararupla.’

<sup>17</sup> “Ning mila hanot taum te, bel a harnanai sur ar longor a warkurai. A pukakiar lamur ka tana, a tol a warkurai, pa a arsune sur dir ben pas a barsan ning. <sup>18</sup> Ning a tarai a ararup la tur sur lar warwara, bel la arupi ana ta laulau a utna larning a nuki. <sup>19</sup> Ika la arupi ana ututnala ana lotu anunla, pa ana ning a minat a barsan, a risana e Iesu, ning e Pol i atongi mang ka laun ulak. <sup>20</sup> Bel a tasmani mang ar tikin mangman-gasa a ututnala ne. A nunungi sur ir han usaot e Jerusalem pa dir warkurai i ana warwara na ararup tisaot. <sup>21</sup> Ika, ning e Pol i nunung sur a Sisar ir warkurai i, a arsune sur ir kes kaba ana dodot, tuk ning ar tulani utumo e Rom tetek a Sisar.” <sup>22</sup> Lamur e Agripa i atai e Festus mange, “Iau ot, a mang sur ar longor a barsan ne.”

E Festus i kelesi mange, “Latu ur longori.”

<sup>23</sup> Ana pukakiar lamur, e Agripa pa e Bernaisi dia hanot pa di amermer diau ana urmatana minmar anuna lekkek a tarai. Pa diau taum ana ningnigola anuna tarai a harum, pa dingla na ningnigola tagun a hanua ning, la kas uting na rumai a kiwung. E Festus i arsune sur e Pol, pa di ben pasi. <sup>24</sup> Pa e Festus i atongi mange, “King Agripa, pa mulo otleng a tarai ning dala keskes taum te, mulo oroi a barsan ne. A tarai Juda rop saot e Jerusalem pa te Sisaria otleng, la nunung iau sur ar warkurai i, pa la kukuk mang bel ma i tostos sur ir laun. <sup>25</sup> Ika bel a pastetek pas ta utna ning dir umkoli onoi. Pa ning i nunung sur e Sisar ir warkurai i, a nuki mang ar sune i utumo e Rom. <sup>26</sup> Bel a tasman ta momolna ning ar tumus akesi onoi tetek e Sisar. Mang larning a beni na matam, King Agripa, pa na matamulo pa mulor tikin tari sur ar tasman ta utna ning ar tumusi. <sup>27</sup> Anasa a nuki mang bel i sot sur ar sune tik ning i dodot tetek e Sisar, pa bel di tumus akesi asaning di arupi ono.”

## 26

*E Pol i warwara talapor namatana e King Agripa*

<sup>1</sup> E Agripa i atai e Pol mange, “A malmaling sur u ot ur warwara talapor hom.” Pa e Pol i kodos kas a kuna pa i turpasi sur ir atalapor i mange, <sup>2</sup> “King Agripa, a angis kol sur ar tur te lanigo tam, pa ar atalapor iau ana ututnala rop ning a tarai Juda la arup iau onoi. <sup>3</sup> Anasa u tasman wakak a toltol anuna tarai Juda pa a utna otleng ning la arlak ono. Mang larning, a nunung u sur ur kes longoroi pa ur longor iau.

<sup>4</sup> “A tarai Juda rop la tasman anuka ngas a lalaun turpasi ot

ning a kaklik, ana nuka hanua, pa saot otleng e Jerusalem. <sup>5</sup> La tasman iau tagun nating, ning la mang, lar warwara talapor mang a mur ot a toltolla anuna Parisaiola. Mila ning a kunum tagun a tarai Juda ning mila mur sot rop pas a Warkuraila ana numila lotu. <sup>6</sup> Pa onone a tur ana warkurai anasa a tortorot ana lele ning e God ka tol tari tetek na tumtubumila tagun nating. <sup>7</sup> Anumila ning a bonot pa pisir naur a mangis a tarai la harnanai ana tortorot sur dir tolsot pas a lele ning tetek la, pa la lotlotu tetek e God ana kabakiarla pa ana moromla rop. King, a tarai Juda la arup iau, anasa a tortorot ana lele ning. <sup>8</sup> Sur asa ning tik ta halimulo i nuki mang e God bel i tolsot sur ir akamtur ulak a minatla?

<sup>9</sup> "Iau otleng, nating a nuki mang i wakak ning ar toh arop tar a rakrakai a ngas sur ar sairas a taraila mang gong la tortorot ana risana e Iesu, a te Nasaret. <sup>10</sup> Pa a tol a titolla ne saot e Jerusalem. Ana malmaling anuna lekkek a tena artabarla tetek e God, a han pa a akas a galis a tena tortorot ting na rumai a dodot. Pa ning di umkol la, iau otleng, a malmaling sur lar mat. <sup>11</sup> A galis a taem a kas ting na rumai lotula sur ar alaulau la, pa a ngongos la sur lar warwara laulau o e Iesu. A sira balakut rakrakai tetek la, pa a han otleng ana dingla na hananuala masik, sur ar tai pas la pa ar alaulau la.

*E Pol i warwara talapor ana pukakiar ning i lingir a nuknukna*  
(Ap 9:1-19; 22:6-16)

<sup>12</sup> "Ona ning a tinan anuki, a han ulak utumo e Damaskus ana malmaling pa a arsune anuna lekkek a tena artabarla tetek e God. <sup>13</sup> King, ning a Kamis i kes tostos, a han ting na ngas pa oroi a tnan talapor misaot na langit, i tapgar kol ana talapor na Kamis, pa i sa-sai talilis iau taum onla ning mila

armuri. <sup>14</sup> Mila punga rop uting lapiu, pa a longor a elngen takai i warwara tetek iau ana warwara Hibru mange, 'Sol, Sol, sur asa u alaulau iau? U ot u alaulau pas u ana mamahatla ning u toli hok.' <sup>15</sup> Pa a deke mange, 'Lekkek, esi u?' Pa a Lekkek i keles iau mange, 'Iau e Iesu, ning u alaulau iau. <sup>16</sup> Ur kamtur. A hanot tetek u, anasa a aslang pas u, sur ur tol anuka titol pa ur warwara talapor ana ututnala, u ka oroi tari hok, pa a ututnala otleng ning ar asangani tam. <sup>17</sup> Pa ar alaun u kusun a tarai Juda, pa a tarai masik otleng, la ning ar sune u tetek la. <sup>18</sup> Ur apal-palas a matanla sur lar talingir kusun a mormorom sur a talapor, pa kusun a rakrakai ane Satan tetek e God, sur dir kepsen anunla na toltol laulau, pa lar kes taum onla ning a aslang pas la sur anuka tostos a tarai, la ning la tortorot hok.'

*E Pol i warwara talapor ana nuna titol*

<sup>19</sup> "King Agripa, bel a longor orsan a tatatai ne misaot na langit. <sup>20</sup> A warawai nigo tumo e Damaskus pa e Jerusalem pa ana hananuala ana papar Judia rop, pa lamur tetek la ning bel a tarai Juda, mang lar lingir a nuknukinla, pa lar talingir tetek e God, pa lar tol a titolla, sur ir asangani mang la ka lingir a nuknukinla. <sup>21</sup> A kamkamna ne ning a tarai Juda la tong akes pas iau ting na rumai a artabar, pa la mang sur lar umkol iau. <sup>22</sup> Ika e God i nangan iau tuk onone, pa a tur te na matam pa a warwara talapor tetek a tarai oros ka, pa a lekkek a tarai otleng. Bel a atong ta tona utna, a warwara ka ana utna ning e Moses pa a propetla la ka warwara tar ono ning ir hanot. <sup>23</sup> La atongi mang e Karisito ir mat, pa a i ningnigona ning ir kamtur kusun a minat pa ir

warwara ana talapor tetek a tarai Juda pa a tarai masak otleng.”

<sup>24</sup> Ning kaning ot i atalpori, e Festus i warwara kol teteki mange, ‘Pol, u talar. Anum a tnan asasaer ka atalar pas u.’ <sup>25</sup> E Pol i kelesi mange, “Festus, u u lekkek, bel a talar. Asa ning a warwara onoi i momol, pa a kamkamna ot. <sup>26</sup> A king i tasman wakak a ututnala ne, pa a langolango sur ar warwara talapor onoi. A tasmani mang bel ta utna i mumun ana matana pa ana longlongor anuna i, anasa a ututnala ne i hanot, bel di tol kumnani. <sup>27</sup> King Agripa, mangasa, u tortorot tana propetla? A tasmani mang u tortorot.” <sup>28</sup> E Agripa i deken e Pol mange, “Mangasa, u nuki mang bel ir bongnani ur lingir pas a nuknukik, sur iau otleng ar te Karisito?” <sup>29</sup> E Pol i kelesi mange, “Ning i bongnani o bel i bongnani, ar nunung tetek e God sur u. Ika bel sur u ka, sur mulo rop ning mulo longor iau onone, sur mulor arlar hok, ika gong di dot akes mulo.”

<sup>30</sup> Pa a king i kamtur, taum e Festus pa e Bernaisi, pa la otleng ning la kes taum. <sup>31</sup> Ning la han purum, la warwara pa la atongi mange, “A barsan ne bel i tol ta utna ning i laulau sur ir hirua onoi, pa ir dodot ono.” <sup>32</sup> Pa e Agripa i atai e Festus mange, “Ning a barsan ne bel i nunung sur e Sisar ir warkurai i, i wakak ka sur dir pak seni.”

## 27

*E Pol i kas ana sip utumo e Rom*

<sup>1</sup> Ning di ka kubus tari sur milar \* kas ana sip utumo ana papar Itali, di saran tar e Pol, pa dingla otleng ning la dodot, tetek a ningnigo, a risana e Julius, tagun a tarai a harum ane Sisar. <sup>2</sup> Mila kas ana ning a sip misaot Adramitium,

ning ir han sur ir sot amon ting na hananuala ana papar Esia. Ning mila kas, a sip i han. Mila armuri taum o e Aristarkus misaot e Tesalonika ana papar Makedonia.

<sup>3</sup> Ana pukakiar lamur mila sot te e Saidon. E Julius i maris e Pol, i malmaling seni sur ir han pas tetek na halalna, sur lar tabari ana sa ning i kapan suri. <sup>4</sup> Ning a sip i han ulak, mila dun rait a lolo Saiprus, anasa a wuwu i um mila misalanigo. <sup>5</sup> Lamur, mila kutus milau naur a papar Silisia pa e Pampilia, pa mila sot tumo e Maira, ana papar Lisia. <sup>6</sup> Tingia, e Julius i pastetek ning a sip mitimo e Aleksandria, ning ir han utumo e Itali, pa i akas tar mila onoi. <sup>7</sup> Pa galis a pukakiar mila boko longoroi ka, anasa i rakrakai kol anumila tnan utumo e Nidus. A wuwu i rakrakai, pa bel mila tolsot sur milar han tostos, pa mila dun rait a lolo Krit milau e Salmone. <sup>8</sup> Mila rarar tumokorot, ning a wuwu i rakrakai, pa mila hanot ana ning a pukna, di atongi A Wakak a Mulukun, milau a hanua Lasea.

<sup>9</sup> Mila ka kes a galis a pukakiar, pa a tnan salatasi ka laulau, anasa a Pukakiar na Tamai ka rop pa milau a kalang na wuwu. † Pa e Pol i atumarang la mange, <sup>10</sup> “A taraila! A oroi mang, ning dalar han ka, a sip ir hirua taum ana ututnala, pa dala otleng dalar hirua.” <sup>11</sup> Ika e Julius bel i longor ana warwara ane Pol, i longor pas ka a warwara anuna kipten pa a tamana sip. <sup>12</sup> A mulukun ning la kes ia, bel i wakak sur lar nanan sen a kalang na wuwu tingia, pa a galis tagun la, la malmaling mang, i wakak ning lar han bolos ka utumo e Poniks, sur lar nanan sen a kalang na wuwu tingia. E Poniks a wakak a mulukun tumo ana lolo Krit, ning

\* **27:1:** E Luk i tumus “mila”, anasa i han taum o e Pol. † **27:9:** A kalang lamur tana Pukakiar na Tamai i sira wuwu tumo.

i tai sur a pukna ning a kamis i sup ia.

*A tnan wuwu i hanot*

<sup>13</sup> Ning a wakak a wuwu na tobar i hanot, la nuki mang i wakak ka sur a tinan. La dat kas a aga, pa la rarar amon tumokorot ana lolo Krit. <sup>14</sup> Pa bel i bongnani, a rakrakai a wuwu i hanot, di atongi mang Urakilon. I harum purum misa na lolo. <sup>15</sup> Ning a wuwu i tong kes ana sip, bel i tolsot sur ir han, pa mila lingir seni sur ir mur a wuwu. <sup>16</sup> Ning mila dun rait ana natar a lolo Kauda, i rakrakai kol tetek mila sur milar dat kas a gigi. <sup>17</sup> Ning la dat kas pasi usaot, la rau rakrakai a sip ana inaula. La matmataut sakana lar dun tar na palai a puka woio ning i masmasa milau Sirtis, pa la dat purum sen a sel, pa a sip i saler oros kama, a wuwu i wus amoni. <sup>18</sup> A pukakiar lamur, a sip milau ir tarege ana tnan wuwu, pa la minggen parung a ututnala. <sup>19</sup> Pa ana natola pukakiar, a boskurula la minggen parung a ututnala na sip. <sup>20</sup> Pa galis a pukakiar a kamis pa a nangnang bel la sasai, pa a rakrakai a wuwu bel i manah, pa bel ma mila nuki mang milar laun.

<sup>21</sup> A galis a pukakiar bel la hangan. Lamur e Pol i tur namatanla pa i atai la mange, "A taraila! Ngandek ning mulor longor a nuk a warwara pa bel dala han mitimo e Krit, bel ta utna larne ir kibas dala, pa a sip taum ana ututnala bel ir laulau. <sup>22</sup> Pa onone, a nunung mulo mang, gong mulo matmataut, anasa bel tik ta halimulo ir hirua, a sip ka ir hirua. <sup>23</sup> Nangana morom, ning a angelo ane God i hanot tetek iau, a God ning a titol teteki, pa iau anunai. <sup>24</sup> Pa a angelo i atongi mange, 'Pol, gong u matmataut, ur tur ot ana warkurai namatana e Sisar. Pa e God ir alaun la rop ning mulo han taum ting na sip.' <sup>25</sup> Pa a

tastasikla, gong mulo matmataut, anasa a tortorot o e God mang ir tolsot asaning ka atai tar iau onoi. <sup>26</sup> Ika a sip ir kes ot na palai a masmasa milau ta lolo."

<sup>27</sup> Ana ning a bonot pa pisir diat a pukakiar ana morom, a wuwu kaning ot i wus amon mila ting na tasi Adria. Ana tnan morom, a boskurula la nuki mang mila ka saler milau ta hanua. <sup>28</sup> Pa la toho a laman ana tasi, pa la pasteki mang i naur a bonot a pukna. Lamur siklik ka, la toho ulaki, pa la pasteki mang ning a bonot pa dilima na pukna kama. <sup>29</sup> Pa la matmataut sakana milar saler tar ana ta masmasa, pa la minggen purum diat a aga tumo lamur ana sip, pa la nunung sur ir kabakiar kapit. <sup>30</sup> A boskurula la mang sur lar liu kumna kusun a sip ana gigi. La alorong purumi uting na tasi, pa la asongo mang lar suah a agala salanigo ana sip. <sup>31</sup> E Pol i atai e Julius pa anuna tarai a harum mange, "Ning la ne lar liu kusun tar a sip, bel mulor laun." <sup>32</sup> Pa a tena harumla la kutus sen a inaula kusun a gigi, pa i saler masak.

<sup>33</sup> Ana lar, e Pol i atai la rop mange, "Mulor hangan, anasa ka ning a bonot pa pisir diat a pukakiar ning mulo kes taum ana matmataut, pa bel mulo ien ta utna. <sup>34</sup> Pa a nunung pas mulo sur mulor hangan, sur mulor laun. Pa bel tik ta halimulo ir laulau." <sup>35</sup> Ning e Pol i atong tari larne, i los pas a bret, i atong wakak pas ono tetek e God namatanla rop, i kibiki, pa i hangan. <sup>36</sup> Ning la oroi, la rop la gas, pa la otleng la hangan. <sup>37</sup> Mila rop ting na sip, mila arlar ana naur a mar pa mais a bonot pa diono mila. <sup>38</sup> Ning la ka masur, la minggen parung a utna na hanganla usalatasi, sur a sip ir halala.

*A sip i hirua pa a tarai la laun*

<sup>39</sup> Ning ka kabakiar, la oroi ning a hanua, ika bel la oroi lalani. La oroi pas ning a mulukun a woio tumokorot, pa la atongi mang ngandek i wakak ning lar akes masmasa a sip tingia. <sup>40</sup> Lamur la kot sen a agala, pa la han kusun la tisa latasi, pa ono oting la pak sen otleng a inaula kusun naur a woso na stia, pa la dat paksen a sel salanigo ana sip sur a wuwu ir wus purum la utumo na masmasa. <sup>41</sup> Ika a sip i kes masmasa na palai a woio, a patara sip i kes kas tingia, bel i tolsot pasi sur ir susur. Lamur a tatatnan top la dapis pagal pas a kabala sip pa i tarege. <sup>42</sup> Pa tena harumla la mang sur lar umkol a taraila ning la dodot, sakana halala onla, lar iel purum, pa lar liu. <sup>43</sup> Ika e Julius, a ningnigo anuna tena harumla i mang sur ir alaun e Pol, pa i sairas la. Pa i arsune sur la ning la tasman a iel, lar sirok parung, pa lar iel nigo utumo na masmasa. <sup>44</sup> Pa la ning bel la tasman a iel, lar saler murmur ana palangla pa ana didia sip. Manglarning, la rop la sot purum utumo na masmasa pa la laun.

## 28

### *Tumo e Malta*

<sup>1</sup> Ning mila ka sot tar tumo na masmasa, mila bot tasmani mang a lolo ning di atongi e Malta. <sup>2</sup> A taraila mitingia la maris kol mila, la hatna tar a iah, pa la ben pas mila rop, anasa a kiar pa i kotkoto. <sup>3</sup> Ning e Pol i los pas a buta na rakai, pa i suah i ting na iah, a laplapang a iah i lapang sen a soi laulau miting na buta na rakai, pa i ararat tar ana kuna pa i kulam kes ono. <sup>4</sup> Ning a taraila miting na lolo la oroi mang a soi i kulam kes ana kuna e Pol, la awara artalai la mange, “Ngandek a barsan ne, a tena umkol a tarai. Pa i laun ot miting latasi, ika a god na arkeles

bel i malmaling sur ir laun.” <sup>5</sup> Ika e Pol i lakran sen a soi kusun a kuna usaot na iah, pa bel i alaulau i. <sup>6</sup> La nuki mang a palaona ir surung, o ir punga purum pa aiap ka ir mat. Ika, ning la harnanai kol pa bel ta laulau a utna i han tar ono, la lingir ulak a nuknukinla, pa la atongi mang e Pol ning a god.

<sup>7</sup> E Publius, a leklek a ningnigo tagun a lolo ne, anuna kabalapiula i kes milau. I ben pas mila uting na nuna rumai, pa i agasgas mila. Pa mila kes pas natola pukakiar ting na nuna rumai. <sup>8</sup> E tamana e Publius i kurah ana laplapang pa balsal, pa i borbor. Pa e Pol i kas teteki, pa i nunung, pa i suah naur a kuna saot ono, pa i alangolango pasi. <sup>9</sup> Ning i toli larne, la rop ning la kurah ting na lolo la hanot pa di alangolango la. <sup>10</sup> Pa la asangan anunla hanrawai tetek mila ana galis a wakak a titol. Ning mila kas ulak ana sip sur milar han ma, la tabar mila ana ututnala rop ning mila kapan suri.

### *Mitumo e Malta uto e Rom*

<sup>11</sup> Lamur ana natol a kalang, mila kas ana ning a sip ning i nanan sen a kalang a wuwu ting na lolo. A sip ning, mitimo e Aleksandria pa salanigo ono di ka kot tar a manar ana naur a kasang, a naur a nat a god Sus. <sup>12</sup> Mila sot pas ting e Sirakus, pa mila kes pas natola pukakiar. <sup>13</sup> Mila han mitingia pa mila sot tumo e Regium. Pa ana pukakiar lamur, a tobar i hanot. Pa ana ning a pukakiar ulak lamur tana, mila sot ting e Puteoli. <sup>14</sup> Mila pastetek pas dingla na tastasimila ana tortorot tingia, pa la ben mila sur milar kes pas ta wik napirin la. Lamur, mila han utumo e Rom. <sup>15</sup> La ning la tas ana tortorot tingia, la longor a warwara omila, pa la han barat mila tumo na hanua na sisiurai di atongi e Apus, pa tumo ana hanua di atongi Natol a Rumai a Borbor.

Ning e Pol i oroi pas la, i atong wakak tetek e God, pa a ututnala ning i arakrakai anuna lalaun.

*E Pol i kes to e Rom*

<sup>16</sup> Ning mila hanot uto e Rom, di malmaling tar e Pol sur i ot masik ir kes ana ta rumai, pa ta tena harum ir tai alari.

<sup>17</sup> Lamur ana natola pukakiar, e Pol i kabah taum a ningnigola anuna tarai Juda. Pa ning la hanot taum, i atai la mange, “Na tas-tasikla, bel a alaulau anundala na tarai, pa a toltol anuna tumtubundala tagun nating. Ika la tong akes pas iau, pa la saran tar iau tana tarai Rom saot e Jerusalem.

<sup>18</sup> Pa ning a tarai Rom la ka longor tar a warwara ning a alar iau ono, la mang sur lar pak sen iau, anasa bel la pastek ta utna ning ar hirua ono. <sup>19</sup> A tarai Juda bel la malmaling, pa bel a pastek pas ta ngas ning ar langolango onoi, pa a nunung sur e Sisar ir warkurai iau. Ika bel ta laulau a utna ning ar arup anuka tarai ono. <sup>20</sup> A kamkamna ne ning a arsune sur mulo sur ar oroi mulo, pa dalar warwara taum. Di sen akes tar iau anasa a harnanai ana tortorot sur esaning a tarai Israel otleng la harnanai suri.”

<sup>21</sup> Pa la kelesi mange, “Bel ta pas mitimo e Judia i hanot tetek mila hom, pa bel ta tasimila mitimo ning i hanot te i ususrai hom pa i warwara talapor hom anal laulauna ning u tol tari. <sup>22</sup> Mila mang sur milar longor anumal warwara, anasa mila ka longor tari mang, di atong laulau a tona lotu ne ting na hananuala.”

<sup>23</sup> La kubus pas ning a pukakiar sur lar warwara taum o e Pol. A kumun a tarai kol la hanot teteki ting na rumai ning i kes ono. Tur-pasi ana kobot tuk ana rah, i papak tetek la ana matanitu ane God, pa

i atai talapor la o e Iesu, tagun a Warkuraila ane Moses pa a buk anuna propetla sur lar tortorot.

<sup>24</sup> Dingla na tarai tagun la, la tortorot ana sa ning e Pol i atongi, ika dingla bel la tortorot. <sup>25</sup> La arlak na arpotor in la. Ning la tur sur lar han, e Pol i atong a ararop na warwara tetek la mange, “A momolna ot ning a Talngan Tabu i atongi ana pahana propet Aisaia, tetek na tumtubumulo tagun nating mange, <sup>26</sup> ‘Ur han tetek a taraila ne pa ur atai la mange, Mulor longori pa mulor longori, ika bel mulor longor lalani, mulor oroi pa mulor oroi, ika bel mulor oroi lalani.

<sup>27</sup> Anasa a taraila ne a balanla i rakrakai a talnganla i kutkut, pa a matanla i kut.

Sakana lar oroi lalani ana matanla, pa lar longor lalani ana talnganla, pa lar tastasman ana nuknukinla,

pa lar ulak tetek iau, ar alaun la.’

*Ais 6:9-10*

<sup>28-29</sup> “Onone mulor tasmani mang di ka han ana warwara talapor ana arlaun ane God tetek a tarai ning bel a tarai Juda. I wakak, la, lar kibasi.’ \*

<sup>30</sup> Pa e Pol i kes pas naur a kidol a rau ana rumai ning i ot i loulou i, pa i gasgas pas a taraila rop ning la hanan teteki. <sup>31</sup> I warawai ana matanitu ane God, pa i asaer a tarai ona Leklek e Iesu Karisito, pa bel i matmataut, pa bel tik otleng i sairasi.

\* **28:28-29:** Dingla na tena tastasmai ana Buk Tabu la nuki mang ning a warwara otleng i kes te na ves ne, mange: Lamur ana nuna warwara, a tarai Juda la han, pa la arlak rakrakai na arpotor in la.

## A Pas ane Pol tetek a tarai Rom

### *A warwara talapor nigo*

Ning e Pol i kes tumo e Korin, i tumus a pas ne tetek a tarai a lotu tumo e Rom. I saran a pas tana ning a hane a risana e Pibi pa i abarani utumo e Rom (oroi Rom 16:1).

E Rom a tnan hanua kol, ning a tnan king, ning di atongi mang e Sisar i kes ia.

Ning e Pol i tumus a pas ne belot i han utumo e Rom pa belot i asaer la. Pa ana pas ne i mang sur ir asaer la ana galis a utna. Ning a tnan utna ning i mang sur lar talapor onoi i mange: A taraila rop la ka tol a laulauna pa bel tik i tostos namatana e God. Dalar tostos namatana e God ning dala tortorot o e Iesu Karisito. Pa ning dala tortorot o e Karisito, dalar laun ana tona lalaun pa dalar mur ma a Talngan Tabu. I warwara otleng ana tarai Juda, mang e God bel i duman la.

E Poli ataila otleng mang i mang sur ir han tetek la.

### **A tnan ana buk Rom:**

A kamkama buk ne (1:1-17)

A tarai rop la tol a laulauna pa la kapan sur a lalaun (1:18-3:20)

E God ir alaun dala anasa dala tortorot o e Karisito (3:21-4:25)

O e Karisito dala laun ana tona lalaun (5:1-8:39)

E God bel i duman a tarai Israel (9:1-11:36)

A wakak a toltol ning dalar muri (12:1-15:13)

A ararop a warwara ane Pol tetek a tarai Rom (15:14-16:27)

### *E Pol i warwara talapor ana nuna titol na aposel*

<sup>1</sup> Iau e Pol, a tena titol oros ane Iesu Karisito, a tumus a pas ne tetek mulo. E God i kabah pas iau, sur ar aposel, pa i aslang pas iau

sur ar warwari ana nuna Wakak a Warwara tetek a taraila. <sup>2</sup> A Wakak a Warwara ne, e God ka lele nigo tar onoi, ana warwara ning anuna propetla la ka tumus tari ting na Buk Tabu. <sup>3</sup> A Wakak a Warwara i atai dala o e Natnalik, ning di agon pasi miting na mangis a tarai ane king Dewit. <sup>4</sup> Pa ana nuna kamkamtur ulak kusun a minat, a Talngan Tabu i asangani mang i a Nat e God pa i rakrakai kol. I ot e Iesu Karisito anundala a Leklek. <sup>5</sup> O e Karisito ot, e God i maris mila pa i saran a titol na aposel tetek mila, sur milar alelek pas a risana. Mila sira warwari tetek a tarai rop ning bel na tarai Juda, sur lar tortorot pa lar longor onoi. <sup>6</sup> Mulo otleng dingla na tarai tagun la, ning e God ka kabah pas mulo, sur mulo ane Iesu Karisito.

<sup>7</sup> A tumus a pas ne tetek mulo rop ting e Rom, ning e God i maris mulo pa i kabah pas mulo sur mulo anuna taraila.

A marmaris pa bal molmol tetek mulo ta e God a Tamandala pa tana Leklek e Iesu Karisito.

### *E Pol i nunung sur a tarai Rom*

<sup>8</sup> Ine a ningnigo na utna, ana risana e Iesu Karisito, a atong wakak tetek anuka God o mulo rop, anasa a tarai te na rakrakan hanua rop la warwara talapor ana numulo a tortorot. <sup>9</sup> A titol tetek e God ana nuka lalaun rop, ning a warwari ana Wakak a Warwara o e Natnalik, pa e God ot i tasmani mang a sira nuk pas mulo <sup>10</sup> ana nuk a nunungla ana taemla rop. A nunung otleng mang, ning a nuknuk ot ane God, ngandek ono bot ne ir sapang anuka ngas sur ar han tetek mulo.

<sup>11</sup> A mang kol sur ar oroi mulo, sur ar tabar mulo ana artabarla, ning ir nangan a ingumulo, sur ir arakrakai mulo. <sup>12</sup> Manglarning, ning ar oroi anumulo a tortorot, pa mulo otleng mulor oroi anuka tortorot, dalar arakrakai artalai



dala. <sup>13</sup> Na tastasikla, a mang sur mulor tasmani mang, a galis a taem, a mang sur ar oroi mulo, sur ar nangan mulo par oroi a wana nuka titol ting na numulo a lalaun, larning a oroi ting na lalaun ana maskan a tarai, ning la otleng bel na tarai Juda. Ika, tuk onone, bel a han lar pas.

<sup>14</sup> Anuka titol ot ning e God i saran tari tak, sur ar warawai tetek a tarai ning la tasman a warwara Grik pa tarai otleng ning bel la tasmani, tetek na tena tastasim pa la ning anunla tastasman bel i itna. <sup>15</sup> Ine a kamkamna ning a mang kol sur ar warawai ana Wakak a Warwara tetek mulo otleng tumo e Rom.

*A Wakak a Warwara i a rakrakai e God*

<sup>16</sup> Bel a meme ana Wakak a Warwara, anasa i a rakrakai e God sur ir alaun pas a taraila rop ning la tortorot. Tetek mila a tarai Juda nigo, pa onone tetek mulo otleng ning bel na tarai Juda.

<sup>17</sup> Anasa a Wakak a Warwara i apuasa a ngas ning e God i toli, sur a tarai lar tostos namatana. A ngas ning, a tortorot ka. A tortorot sot ka miting na kamkamna tuk ana araropna. Larning di ka tumus tari ting na Buk Tabu mange, "Esining i tortorot, e God ir atongi mang a tena tostos pa ir laun." *Hab 2:4*

*E God i balakut tetek a tarai ana nunla a toltol laulaula*

<sup>18</sup> E God i apuasa anuna balakut misaot na langit, tetek a tarai ning bel la hanrawai e God pa la tol a laulauna, pa ana nunla na toltol laulaula, la sairas a momolna. <sup>19</sup> E God i balakut, anasa a ututnala ning dir tasman e God onoi, i talapor ka tetek la, anasa i ot ka atalapor tari tetek la. <sup>20</sup> Turpasi ana akakes ana rakrakan hanua, a tarai la oroi a ututna na akakes. I maining la tolsot pasi sur lar tasman na ginina e God, na ginina

ning bel dir oroi. La tasmani mang a rakrakai e God ir kes tikin, pa i e God. I maining bel la tolsot sur lar atongi mang bel la tasman e God.

<sup>21</sup> La tasman ot e God, ika bel la aleklek pasi larning i e God, pa bel la atong wakak otleng teteki. La nuknuk oros ka, pa a balanla i mormorom, anasa bel ta tastasman inla. <sup>22</sup> La atongi mang la tastasman kol, ika la hanot a longlongla ka. <sup>23</sup> Bel la mang sur lar lotu tetek e God ning i laun tikin, pa i bukus ana matatar. La lotu ka tetek a manarla ana tarai ning la sira mat ka, pa tetek a manarla ana manila, pa a inagoila, pa a ututnala ning la kaukawar.

<sup>24</sup> I maining e God i noren tar la sur lar tol a dur a toltolla, larning la mang suri miting na balanla, pa lar tol a toltolla na meme artalai ana palaonla. <sup>25</sup> La keles sen a momolna o e God sur a asasongo. La lotu pa la nunung kama tetek a ututnala ning e God i akes tar la, pa bel ma la lotu tetek a Tena Akakes, i ning dir atong aleklek pasi onone pa lamur pa bel ir rarop. Amen.

<sup>26</sup> Ning la toli larning, e God i noren tar la ana nunla tnan nuknuk sur a laulau a toltolla na meme. I manglarne: A gurarala la keles sen a ngas a tinaulai ning di ka akes tari, pa la taulai ulak la ot. <sup>27</sup> Mang otleng larning tetek a taraila, la han masuk kusun a ngas a tinaulai ning di ka akes tari sur lar taulai a gurarala, pa la bukus ana tnan nuknuk sur la ulak ot, pa la tol a laulauna tetek la ulak. Bel al meme inla ning la toli larning. La ot la ka alaulau pas anunla na lalaun ana toltolla ne. Ine a warkurai na arkeles tetek la, ning i sot taum ana nunla na laulauna.

<sup>28</sup> Ning a utna otleng, bel ma la nuk pas e God, la nuki mang a asasaer o e God i utna oros ka. I maining i noren tar la sur ir laulau a nuknukinla, pa la tol kama a ututnala ning bel i sot sur

lar toli. <sup>29</sup> La bukus ana toltol laulau, la tol a laulauna tetek a tarai, la mang sur na utna ning lar tena gongon onoi, la mang sur lar alaulau a tarai. La bukus ana toltol na ram, la umkol a tarai, la arngaras, la اساسونو, la nget a tarai. La warwara kumkumna, <sup>30</sup> la arle, la nget e God, la harum, la dat abarah a pukulunla, la iau-nan pas la ot. La nuknuk sur a tona ngas sur lar tol a laulauna. La tabun longor tetek na tamtamanla pa kabatnanla. <sup>31</sup> Bel la titol na tasmantaman, bel la tolsot pas anunla na lelela, bel la tasman a marmaris pa wakak a toltol tetek a taraila. <sup>32</sup> A ngas a tarai larne, la tasman ot a warkurai ane God, mang la ning la sira tol a ututnala ne, i sot sur lar mat. Ika la toli ka, pa la malmaling sur a tarai masuk otleng lar toli.

## 2

### *E God ir tol a tostos a warkurai*

<sup>1</sup> I maining mulo rop ning mulo sira tiu a tarai masuk pa mulo nuki mang mulo tostos, a atongi mang bel mulor puai lar pas. Anumulo na artitii ir tiu ulak mulo ot. Anasa mulo tiu a tarai masuk, ika mulo otleng mulo tol ka a toltol laulau arlar onla. <sup>2</sup> Dala tasmani mang, ning e God i warkurai la ning la tol a toltol laulaula, anuna warkurai ning i tostos. <sup>3</sup> Pa mulo a tarai oros ka, mulo tiu la ning la tol a toltol laulau, ika mulo otleng, mulo sira toli ka. Mangasa, mulo nuki mang mulor liu kumna kusun a warkurai ane God? Ir warkurai mulo ot. <sup>4</sup> Ka asangan tar anuna wakak a toltol ning i itna tetek mulo, pa bel i warkurai kapit mulo ana numulo na toltol laulaula, pa bel i ngoro kapit o mulo. Mangasa, mulo oroi purum anuna wakak a toltol? Mangasa, bel mulo tasmani mang i maris mulo larne sur mulor lingir a nuknukimulo?

<sup>5</sup> Ika a balamulo i rakrakai pa bel mulo lingir a nuknukimulo, mulo ot mulo aitna amon anuna balakut tetek mulo, sur a pukakiar na balakut ane God, ning anuna tostos a warkurai ir hanot talapor. <sup>6</sup> E God ir warkurai a taraila tak-takai arlar ot ana titol ning la ka tol tari. <sup>7</sup> La ning la rakrakai ana wakak a titol sur e God ir saran a matatar tanla pa ir aitna pas a risanla, pa la mang sur a lalaun ning bel ir rarop, e God ir saran a lalaun tikin tanla. <sup>8</sup> Ika tetek la ning la sira aitna pas la ot, pa bel la mur a momol a warwara ane God, pa la mur ka a toltol laulau, e God ir balakut tetek la pa ir balana kut tetek la. <sup>9</sup> Pa ir saran a mamahatla pa a tnan kankan tetek la rop ning la tol a laulauna. Ir tol nigoni tetek a tarai Juda, pa lamur tetek a tarai masuk otleng. <sup>10</sup> Ika, tetek la rop ning la tol a wakak a toltol, e God ir saran a matatar tanla, pa ir aitna pas a risanla, pa ir saran tar a bal molmol tetek la. Ir tol nigoni tetek a tarai Juda, pa lamur tetek a tarai masuk otleng. <sup>11</sup> Anasa e God bel i sira purpurngis.

<sup>12</sup> A taraila rop ning bel la tasman a Warkuraila ane Moses, pa la tol a laulauna, lar hirua ot. Pa mangotleng larning tetek la rop ning la tasman a Warkuraila ane Moses, pa la tol a laulauna, e God ir warkurai la otleng arlar ana warwara na Warkuraila. <sup>13</sup> Anasa bel la rop ning la longor a Warkuraila ane Moses la tostos namatana e God. La ka ning la mur a Warkuraila, e God ir atong la mang na tena tostos. <sup>14</sup> I momol, a tarai ning bel a tarai Juda, la ning bel la tasman a Warkuraila ane Moses, ika la tol ot a wakak a toltol arlar ana Warkuraila, i asangani mang a Warkuraila kaning ot na sulukinla. <sup>15</sup> A ngas a tarai ning, i talapor mang e God ka tumus tar a warwara na warkuraila ting na balanla. Ning la tol a laulauna, a

nuknukinla ot i tiu la, pa ning la tol a wakakna, a nuknukinla i gas onoi. <sup>16</sup> Ana pukakiar ning e God ir warkurai a taraila, ir saran tar a warkurai tetek e Karisito Iesu sur ir warkurai la ana ututnala ning i kes kumna ting na balanla. A sira warawai ana ututnala ne, ning a warawai ana Wakak a Warwara.

*A te Judala la iaunan la ana Warkuraila*

<sup>17</sup> Ar warwara tetek mulo ning mulo atongi mang mulo na te Juda. Mulo nuki mang mulo tostos na matana e God anasa i saran tar a Warkuraila tetek mulo, pa mulo iaunan mulo mang, mulo ane God. <sup>18</sup> Mulo sira iaunan mulo mang, mulo tasman wakak a nuknuk e God, pa mulo gas ana wakak a toltol, anasa mulo ka asaer wakak pas a Warkuraila. <sup>19</sup> Mulo nuki mang mulo arlar ana halinla ning i nigon a kut, pa mulo arlar ana talapor tetek la ning la kes ana mormorom. <sup>20</sup> Mulo nuki mang mulo asaer tostos la ning bel la tastasim, pa mulo na tena asaer tetek la ning bel la tasman ta utna, anasa mulo ka tong akes a tastasim rop pa a momolna ting na Warkuraila.

<sup>21</sup> Mulo asaer na tarai masuk ana Warkuraila, ika mulo ot bel mulo asaer wakak pas mulo onoi! Mulo warawai tetek a taraila sur gong la kinkinau, ika mulo ot mulo kinkinau! <sup>22</sup> Mulo atongi tana tarai mang, “Gong mulo tol a laulauna ana ta hane anuna tik o ta barsan anuna tik,” ika mulo ot mulo toli! Mulo nget a asasongo na godla, ika mulo kinkinau ting na rumai artabarla anuna asasongo na godla. <sup>23</sup> Mulo iaunan mulo ana Warkuraila ning e God i saran tari ta mulo, ika mulo alaulau a risana e God, anasa mulo kutus a Warkuraila. <sup>24</sup> Larning di ka tumus tari ting na Buk Tabu mange,

“A taraila ning bel na tarai Juda, la atong laulau a risana e God anasa omulo.” *Ais 52:5*

*A Talngan Tabu i tol a momol a kot talilis*

<sup>25</sup> Ning u mur a Warkuraila, a titol na kot talilis\* ning di toli hom, i nangan u. Ika ning bel u mur a Warkuraila, u arlar ka ana tik ning bel di kot talilisi. <sup>26</sup> Ning a tarai ning bel di kot talilis a palaonla, la mur a ututnala ning a Warkuraila ane God i warwara onoi, e God i oroi la larning di ka kot talilis tar la. <sup>27</sup> Esining bel di kot talilisi pa bel di asaeri ana Warkuraila, ika i mur ot a ututnala ning a Warkuraila i warwara onoi, anuna lalaun ir tiu u, ning di ka kot talilis tar u, pa u tasman a Warkuraila, ika u kutusi. <sup>28</sup> Tik ning a te Juda ka ana rising, bel a te Juda momol. Pa tik otleng ning di kot talilisi ka ana palaona, bel a kot talilis momol. <sup>29</sup> Ika ning tik i mur e God ting na balana, i ning a te Juda momol. Pa a momol a kot talilis, a Talngan Tabu i toli ting na balana, bel a tarai la toli ning la mur a Warkuraila ning di ka tumus tari. Tik ning a Talngan Tabu i toli larne onoi, bel a taraila lar atong alekleki, e God ot ir atong aleklek pasi.

### 3

*Anundala toltol laulau i asangani mang e God i tostos*

<sup>1</sup> Ning tik a te Juda, anuna keskes na te Juda ir nangan mangmang-gasa i? Pa ning tik di ka kot talilis tari ir nangan mangmang-gasa i? <sup>2</sup> I wakak kol teteki. A ningnigo na utna, e God ka suah tar anuna warwara ting na kuna tarai Juda. <sup>3</sup> I momol, dingla na tarai Juda bel la tortorot. Ning bel la tortorot, mangmangasa, i

\* **2:25:** A titol na kot talilis a akinalang ning di toli sur ir asangani mang, a barsan i miting na tarai ane God ning la mur a Warkuraila.

topasi sur ir sairas e God sur gong i tolsot anuna warwara? <sup>4</sup> Bel momol! Ning a taraila rop lar asongo, a warwara ane God i momol ot. Larning a warwara tetek e God ning di ka tumus tari ting na Buk Tabu mang:

“Anum a warwara na warkurai i asangani mang u tostos.

Pa ning dir tiu u,

bel tik ir pastetek pas ta rongo.” *Buk Song 51:4*

<sup>5</sup> Ning dala tol a laulauna, anun-dala toltol laulau i asangan momoli mang e God i tostos. Mangasa, e God i rongo ning ir warkurai dala onoi? A ngas a kabah ning, i hanot miting na nuknuk a tarai ka. <sup>6</sup> Ika bel. Ning anuna warkurai bel i tostos, ir warkurai mangmangasa pas a tarai mite na rakrakan hanua? <sup>7</sup> Ngandek tik ir atongi mang, “Ning iau a tena asasongo, anuka toltol i asangan momoli mang a warwara ane God i momol, pa i aitna pas a risana. I maining sur asa e God i atong iau mang a tena laulau pa ar hirua ana nuna warkurai?” <sup>8</sup> Ngandek tik ir atongi mang, “Dalar tol a laulauna sur a wakakna ir hanot talapor.” Dingla na tarai la atong laulau mila pa la tiu mila mang mila asaer a tarai larne. Ika bel i momol. La ning la atong a warwara ne i sot sur lar hirua ana warkurai ane God.

*Bel tik i tostos na matana e God*

<sup>9</sup> Asaning dalar atongi ana utna ne? Mangasa, mila na tarai Juda mila ka tostos tana tarai masuk? Bel i momol! Ia ka atong tari mang a te Judala pa a tarai masuk otleng la arlar ka. Dala rop dala kes nahai a toltol laulau. <sup>10</sup> Larning di ka tumus tari ting na Buk Tabu mang, “Bel tik i tostos. Bel tik momol!

<sup>11</sup> Bel tik otleng ning i tasasim.

Bel tik i seren e God.

<sup>12</sup> La rop la ka han masuk kusun e God.

La rop bel la topas ma ta utna. Bel tik tagun la i tol a wakakna, bel tik momol.” *Buk Song 14:1-3*

<sup>13</sup> “A pahanla i sapang arlar ana kulam na minat, pa a warwara anunla i arlar ana goh a minat.

La sira atong a asasongo ana lagereminla.” *Buk Song 5:9*

“A warwara miting na pahanla, i arlar ana kusmapak a soi ning i sira harat amat tik.” *Buk Song 14:3*

<sup>14</sup> “A pahanla i bukus ana warwara laulau pa i saran a mamahat tetek a tarai.” *Buk Song 10:7*

<sup>15</sup> “La raras sur lar umkol a tarai.

<sup>16</sup> Ting na ngasla ning la han ia, la kamar a utnala, pa la alaulau a tarai.

<sup>17</sup> Pa a ngas na bal molmol, bel la tasmani.” *Ais 59:7-8*

<sup>18</sup> “Bel la matmataut sur e God.” *Buk Song 36:1*

<sup>19</sup> Dala tasmani mang, asaning a Buk a Warkurai i warwara ono, bel i warwara ana tarai ning bel a tarai Juda ka, i warwara otleng ana tarai Juda, ning la kes nahai a Warkuraila. I maining a tarai rop mite na rakrakan hanua lar tur ana warkurai ane God, pa bel tik ir puai lar pas. <sup>20</sup> I maining bel tik ir tostos lar pas namatana e God anasa i mur anuna Warkuraila. A Warkuraila i sira asangan dala ka ana nundala na toltol laulaula.

*E God i atong a tarai mang la tostos ana tortorot ka*

<sup>21</sup> Ika onone, e God ka tol a ngas sur a tarai lar tostos namatana, ika bel ana mur warkurai. A ngas ne, a Buk a warkurai ane Moses pa a propetla la ka warwara talapor tar onoi. <sup>22</sup> A ngas ne i hanot ta e God, pa i mange: A tarai rop ning la tortorot o e Iesu Karisito, e God ir atong la mang la tostos. A tarai Juda pa a tarai masuk otleng la arlar ka. <sup>23</sup> Anasa a taraila rop

la ka tol tar a toltol laulau, pa la ka kes bakbak kusun a matatar ane God. <sup>24</sup> Ika ana marmaris ane God, e God i atong la mang la tostos. Anuna toltol ne, i arlar ana artabar oros ka, anasa ana arlou ning e Karisito Iesu i toli. <sup>25</sup> E God i saran tar e Natnalik, sur ir mat pa a sulukna ir kepsen a toltol laulaula anuna taraila rop ning la tortorot onoi. Pa a sulukna ir arop sen a balakut ane God ning nating kaning onla. I toli larne sur ir asangan anuna tostos a toltol. Nating e God i noren tar ka toltol laulaula anuna tarai, pa bel i warkurai la onoi, anasa i wowon taum onla. <sup>26</sup> Ika onone, i toli larne sur ir asangan anuna tostos a toltol, sur i ot i tostos pa esaning i atong a taraila mang la tostos ning la tortorot o e Iesu.

<sup>27</sup> Pa asa ma dalar iaunan pas dala onoi? Bel ta utna! Mangasa, dalar iaunan pas dala anasa dala mur a Warkuraila? Bel momol! Ana tortorot ka o e Iesu, dala tostos namatana e God. <sup>28</sup> Anasa onone, dala tasmani mang e God i atong a taraila mang la tostos namatana, ana tortorot ka o e Iesu, pa bel ana mur warkurai. <sup>29</sup> Mangasa, e God a God anuna tarai Juda ka, o a God anuna tarai masik otleng? Momol, i a God anuna tarai masik otleng. <sup>30</sup> Anasa takai ka a God, pa ir atong na tarai Juda mang la tostos namatana ana tortorot. Mangotleng larning tetek a tarai masik, ir atong la mang la tostos ana tortorot otleng. <sup>31</sup> Mangasa, ning dala tortorot dala nuki mang a Warkuraila i utna oros ka? Bel momol! Ana tortorot dala asangani mang a Warkuraila a rakrakainla ot.

#### 4

##### *E Abaram i tortorot*

<sup>1</sup> Pa asaning dalar atongi o e Abaram, tamamila na tarai Juda? Asa ning i asasaer pas onoi ana ngas ning tik ir tostos namatana e

God? <sup>2</sup> Ngandek ning e God i atong e Abaram mang i tostos anasa ana wakak a titol ning i toli, i topasi sur e Abaram ir iaunan pasi ot onoi. Ika bel i tolsot pas sur ir iaunan pasi namatana e God. <sup>3</sup> A Buk Tabu i atongi mang, “E Abaram i tortorot o e God, pa e God i atongi mang i tostos.” *Stat 15:6*

<sup>4</sup> Pa ning tik i titol, dir lou i ana nuna titol, bel a artabar. Anuna arlou ot ning i kibasi. <sup>5</sup> Ir mangmangasa tetek a barsan ning bel i titol, ika i tortorot o e God, esaning i sira atong a tena laulaula mang la tostos? E God ir oroi lalan anuna tortorot pa ir atongi mang i tostos. <sup>6</sup> E Dewit otleng i atongi larne, ning i atongi mang a barsan i angis ning e God i atongi mang i tostos, ana nuna tortorot ka, pa bel ana ututnala ning i toli. I atongi mange,

<sup>7</sup> “La ning e God ka kepsen tar anunla na toltol na kutus warkurai la angis,  
pa la ning e God ka nuk du-  
man sen anunla na toltol  
laulaula, la angis.

<sup>8</sup> A barsan i angis ning a Leklek bel i nuk pas anuna na toltol laulaula,  
pa bel ir warkurai i ono.” *Buk Song 32:1-2*

<sup>9</sup> Mangasa, a tarai ka ning di kot talilis a palaonla, la angis? Bel momol. A tarai otleng ning bel di kot talilis a palaonla, la angis. Anasa dala tasmani mang, ning e Abaram i tortorot, e God i atongi mang i tostos. <sup>10</sup> Nangse ning e God i atong e Abaram mang i tostos? Lanigo tana titol na kot talilis, o lamur? Lanigo tana titol na kot talilis, bel lamur. <sup>11</sup> Ning belot di kot talilis e Abaram, e God i atongi mang i tostos namatana, anasa ana nuna tortorot ot. Ning e Abaram i kibas pas a akinalang na kot talilis, i asangani mang ka tostos namatana e God. I maining

e Abaram a taman a tarai rop ning bel di kot talilis a palaonla. La tortorot pa e God i atong la mang la tostos namatana. <sup>12</sup> Pa i a taman la otleng ning di kot talilis a palaonla. Bel i kamna anasa di kot talilis a palaonla, i kamna anasa la mur a ngas a tortorot ning tamandala e Abaram i muri, ning belot di kot talilisi.

<sup>13</sup> E God i lele tar e Abaram mang ir saran tar a rakrakan hanua tana pa tetek na tumtubunala otleng. A lele ne e God i tol tari tetek e Abaram bel i kamna ning i mur a Warkuraila. I kamna anasa i tortorot, pa e God i atongi mang i tostos namatana. <sup>14</sup> Ngandek ning e God ir saran a rakrakan hanua tana tarai anasa la mur a Warkuraila, a tortorot a utna oros ka, pa a lele ane God bel i topas ta utna. <sup>15</sup> Ika a balakut ane God i kes onla ning la mang sur lar mur a Warkuraila, ika bel la mur sot pasi. Ning belal Warkurai, bel dir kutus a warkuraila.

<sup>16</sup> I maining, a ututnala ning e God ka lele tari, ir sarani tetek la ning la tortorot. E God i toli larning sur ir arlar ana artabar na marmaris, pa ir han tetek a kaba tarai rop ane Abaram. Bel tetek na tarai Juda ka, ning di saran tar a Warkuraila tanla. Tetek la otleng ning la tortorot lar e Abaram, anasa i a tamandala rop. <sup>17</sup> Larning di ka tumus tari ting na Buk Tabu mange,

“A akes tar u sur u a taman a tarai miting na galis a matanitu.”

*Stat 17:5*

Ana matana e God, e Abaram a tamandala, anasa i tortorot o e God, esaning i sira akamtur a tarai kusun a minat, pa i sira warwara ka, pa a ututnala ning belot la hanot, la hanot ka.

<sup>18</sup> E God i lele tar e Abaram mang ir aitna pas ta natnalik. E Abaram i oroi larne a lele anun e God teteki bel ir hanot, ika i harnanai ot ana tortorot suri. I maining e Abaram i hanot a taman

a tarai miting na galis a matan-itu. Larning a lele ane God teteki mang, “Na tumtubum lar galis.”

<sup>19</sup> Pa anuna tortorot bel i punga ning i oroi mang ka takai a mar a rau anunai, pa bel i topasi sur ir agomo. Pa e Sara otleng ka wan pa bel ma i topasi sur ir agon. <sup>20</sup> Ika e Abaram bel i urmatana nuknuk tar ana lele ane God. I tur rakrakai pa e God i arakrakai anuna tortorot ning i atong aleklek pas e God. <sup>21</sup> Pa ana nuna tortorot i tasmani ot mang e God ir tolsot pas a utna ning ka lele tar onoi. <sup>22</sup> I maining “E God i atongi mang i tostos.” <sup>23</sup> Ning i atongi mang, “E God i atongi mang i tostos,” bel i atongi ka o e Abaram. <sup>24</sup> I atongi otleng ondala. Ning dala tortorot o e God, ning i akamtur ulak pas e Iesu anundala Leklek kusun a minat, ir atong dala otleng mang dala na tena tostos. <sup>25</sup> E God i saran tar e Iesu sur ir mat ana nundala na toltol laulaula, pa i akamtur pasi kusun a minat, sur dalar tostos namatana e God.

## 5

*Dala kes na bal molmol taum o e God*

<sup>1</sup> Ana nundala tortorot ot, e God ka atong dala mang dala tostos namatana. I maining dala kes na bal molmol taum o e God, anasa ana nundala Leklek e Iesu Karisito. <sup>2</sup> Ana nundala tortorot, e Karisito i nigon dala pa i akas dala ana marmaris ane God. Pa onone, dala ka laun onoi. Pa dala gas, ning dala harnanai ana tortorot sur a matatar ane God, ning dalar kes onoi lamur.

<sup>3</sup> Bel i ka i ning, dala gas otleng ana mamahatla ning dala kilangi, anasa dala tasmani mang a mamahatla i tol otnan anundala tuntunur rakrakai. <sup>4</sup> Pa anundala tuntunur rakrakai i tol otnan a ngas a lalaun ning a larlarla bel lar apungan pas dala. Pa a ngas a lalaun ne, i tol otnan anundala

keskes na harnanai ana tortorot sur asaning e God ir toli lamur. <sup>5</sup> Ning dala harnanai ana tortorot, dala tasmani mang asaning e God ka lele tar onoi ir hanot ot. Anasa e God ka saran tar a Talngan Tabu tan dala. Pa Talngan Tabu ka pek tar a marmaris ane God te na balandala.

<sup>6</sup> Lanigo bel dala lotu tetek e God, pa bel dala tolsot pas ta utna. Ika ning a pukakiar i sot, e Karisito i mat sur dala. <sup>7</sup> I rakrakai kol ning tik ir mat keles ta tostos a barsan. Ngandek tik ir tolsot pasi sur ir mat sur ta wakak a barsan. <sup>8</sup> Ika e God i asangan anuna marmaris tetek dala larne: Ning dala laun ot ana toltol laulau, e Karisito i mat sur dala. <sup>9</sup> Pa ana sulukna e Iesu, e God i atong dala mang dala tostos namatana. Manglarning dala tasman momoli mang e Iesu ir alaun pas dala kusun a balakut ane God ana pukakiar a warkurai. <sup>10</sup> Ning dala hirua ot taum o e God, i dat dala sur dalar armoro ulak taum onoi, anasa ana minat e Natnalik. Pa onone, ning dala ka armoro taum o e God, dala tasman momoli mang ir alaun pas dala otleng, anasa ana lalaun ane Natnalik.

<sup>11</sup> Bel i ka i ning, dala gas otleng o e God, anasa ana nundala Leklek e Iesu Karisito, ning ka amoro taum tar dala o e God.

*E Adam i saran a minat, pa e Iesu i saran a lalaun*

<sup>12</sup> Takai ka barsan, i tol a toltol laulau, pa a toltol laulau i hanot te na rakrakan hanua. A toltol laulau i tol otnan tar a minat. Pa ana ngas ka ning, a minat i han tetek a tarai rop, anasa la rop la tol a toltol laulau. <sup>13</sup> Anasa lanigo, ning e God belot i saran a Warkuraila, a toltol laulau ka kes te na rakrakan hanua. Ning bel ta warkurai, e God bel ir arup tik ana toltol laulau. <sup>14</sup> Ika turpasi o e Adam tuk ana raula ning e Moses i laun, a tarai rop la kes nahai

a rakrakai ana minat. Dingla na tarai bel la tol a ngas a toltol laulau arlar o e Adam, ning i kutus a warkurai. Ika a minat i umkol la otleng.

E Adam i arlar ana manar a barsan ning ir hanot lamur. <sup>15</sup> Ika a artabar ane God bel i arlar ana toltol na kutus warkurai ane Adam. Anasa galis a tarai la mat ana toltol na kutus warkurai anuna takai ka barsan. Ika a marmaris ane God i itna kol pa i pulpulas, pa ana takai ka barsan, e Iesu Karisito, pa ana nuna marmaris, i saran oros tar ka a artabar tetek a galis a tarai.

<sup>16</sup> Ning a utna otleng, a artabar ane God bel i arlar ana utna ning i hanot miting na toltol laulau ane Adam. Anuna toltol ot ning i dat tar a tarai, sur lar hirua ana warkurai a arkeles ane God. Ika a artabar ane God i mange, ning a tarai la kutus warkurai a galis a taem, e God i maris kol la, pa i atong la mang na tena tostos.

<sup>17</sup> Pa ana toltol na kutus warkurai anuna takai ka barsan, a tarai rop la kes nahai a rakrakai ana minat. Ika, i momol kol, la ning la kibas pas a tnan marmaris ane God ning i bukus, pa la kibas pas anuna artabar ning i atong la mang na tena tostos, lar laun tikin pa lar hanot a tena warkuraila arlar ana kingla, anasa ana takai ka barsan, e Iesu Karisito.

<sup>18</sup> I maining ana takai ka toltol na kutus warkurai ane Adam a tarai rop la ka kes ana warkurai na arkeles ane God. Larotleng ning ana takai ka tostos a toltol ning e Iesu i toli, e God ir atong a taraila rop mang la tostos namatana, pa lar laun. <sup>19</sup> Pa ana tabun longor anuna takai ka barsan, e Adam, a galis a tarai la na tena laulau. Larotleng ning, ana longor anuna takai ka barsan, e Iesu Karisito a galis a tarai la na tena tostos.

<sup>20</sup> E God i saran tar a Warkuraila, sur ir talapor mang a toltol na

kutus warkurai anuna tarai i itna amon. A toltol laulau i itna amon, ika a marmaris ane God i itna bolosi. <sup>21</sup> A tarai rop la kes nahai a rakrakai ana toltol laulau, pa i saran a minat tetek la. Ika onone, la ning la kes nahai a rakrakai ana marmaris ane God, e God i atong la mang la tostos namatana, pa i saran a lalaun tikin tetek la, anasa ana tostos a titol ning e Iesu Karisito anundala Leklek i tol tari.

## 6

*Ning dalar mat taum o e Karisito, dalar laun taum otleng onoi*

<sup>1</sup> I maining, asa dalar atongi? Mangasa, i wakak ka sur dalar tol a toltol laulau sur a marmaris ane God ir itna amon? <sup>2</sup> Bel momol! Dala mat kusun anundala toltol laulau. Dalar laun mangmangasa ulak ma onoi? <sup>3</sup> Mangasa, bel mulo tasmani mang, dala rop ning di baptais dala o e Karisito Iesu, dala mat taum onoi ana baptais ning? <sup>4</sup> Manglarning, ning di baptais dala, dala mat taum onoi, pa di ka por taum dala otleng onoi. E God a Tamandala i akamtur pas e Karisito kusun a minat ana tnan matatarna, larotleng ning dalar laun ana tona lalaun.

<sup>5</sup> Anasa ning dala mat taum o e Iesu ana nuna minat, i momol ot, dalar tur taum ulak otleng onoi ana nuna kamkamtur ulak kusun a minat. <sup>6</sup> Dala tasmani mang anundala turai a lalaun ka mat taum o e Karisito saot na rakai kutus, sur a toltol laulau ana palaondala bel ta rakrakaina. Pa bel ulak ma dala na tena titol oros ana toltol laulau. <sup>7</sup> Anasa ning tik i mat taum o e Karisito, di ka alangolango pasi kusun a toltol laulau.

<sup>8</sup> Ning dala mat taum o e Karisito, dala tortorot mang dalar laun taum otleng onoi. <sup>9</sup> Anasa dala ka tasmani mang, ning e God i akamtur ulak e Karisito kusun

a minat, bel ir mat ulak, anasa a minat bel ta rakrakaina ulak ma sur ir tolsot pasi. <sup>10</sup> I mat muntakai ka, pa i mat sur ir kepsen rop a rakrakai ana toltol laulau. Pa ning i laun ulak, i laun sur e God. <sup>11</sup> Mangotleng larning tetek mulo, mulor tasmani mang mulo ka mat kusun anumulo na toltol laulaula, pa o e Karisito Iesu, mulo laun sur e God.

<sup>12</sup> I maining, gong ulak ma mulo noren a palaomulo, ning i sira mat ka, sur ir kes nahai a rakrakai ana toltol laulau, sur gong mulo longor tana laulau a nuknuk ana palaomulo. <sup>13</sup> Gong ulak ma mulo saran tar ta diah palaomulo sur ir arlar ana utna a titol sur a toltol laulau. Mulo ka laun ulak kusun a minat, i maining, mulor saran tar mulo tetek e God. Pa mulor saran tar otleng a didiah palaomulo rop tetek e God, sur ir arlar ana ututnala na titol sur a tostos a titol. <sup>14</sup> Anasa bel mulor kes nahai a rakrakai ana toltol laulau, anasa bel mulo kes nahai a Warkuraila. Onone mulo ka kes nahai a marmaris ane God.

*Dala na tena titol oros ana tostos a toltol*

<sup>15</sup> Bel dala kes nahai a Warkuraila, dala kes nahai a marmaris ane God. Mangasa, dalar tol ulak a laulauna? Bel momol! <sup>16</sup> Mangasa, bel mulo tasmani mang, ning mulo saran tar mulo tetek tik sur mulor longor tana, mulo na tena titol oros anunai? Ning mulo na tena titol oros ana toltol laulau, ir saran a minat tetek mulo. Ika ning mulo na tena titol oros ana toltol na longor ana warwara ane God, mulor tostos namatana. <sup>17</sup> A atong wakak tetek e God, anasa lanigo mulo na tena titol oros ana toltol laulau, ika onone mulo longor ana balamulo rop ana asasaerla ning di saran tari ta mulo. <sup>18</sup> Di ka alangolango pas mulo kusun a toltol laulau, pa onone mulo na tena titol oros ma ana tostos a toltol.



<sup>19</sup> A warwara ana warwara larlar ne tetek mulo, anasa bel mulo talapor wakak ana utna na ingun. Lanigo mulo saran tar a didiah palaomulo sur ir tena titol oros ana dur a toltol, pa anumulo na toltol laulau i gomo pa i itna. Ika onone, mulo saran tar a didiah palaomulo sur ir tena titol oros ana tostos a toltol, sur anumulo a lalaun ir totoh namatana e God.

<sup>20</sup> Lanigo, ning mulo na tena titol oros ana toltol laulau, bel mulo kes nahai a rakrakai ana tostos a toltol. <sup>21</sup> Mulo tol na toltol laulau, pa onone mulo meme onoi. Ning mulo toli, asaning mulo kibas pasi onoi? A minat ka. <sup>22</sup> Ika onone di ka alangolango pas mulo kusun a toltol laulau, pa mulo na tena titol oros tetek e God. Pa mulor kibas a totoh a lalaun, ning ir suah otnan a lalaun tikin. <sup>23</sup> Anasa a arlou ana toltol laulau a minat. Ika a artabar ane God a lalaun tikin o e Karisito Iesu anundala Leklek.

## 7

*A warwara larlar ana warkurai a tinaulai*

<sup>1</sup> A tastasikla, ar warwara tetek mulo ning mulo tasman ot a Warkuraila. Mangasa, belot mulo tasmani mang la ka ning la laun ot la kes nahai a Warkuraila? <sup>2</sup> Manglarning ar warwara larlar ana warkurai a tinaulai: Ning ta hane i taulai, a warkurai a tinaulai i dot taum diau mana nuna barsan, ning a barsan kaning ot i laun. Ika ning anuna barsan ka mat, a hane ning i langolango kusun a warkurai a tinaulai. <sup>3</sup> I maining, ning a hane ir taulai ulak ta barsan, pa anuna barsan kaning ot i laun, a hane ning i tol a laulauna. Ika ning anuna barsan ka mat, a hane ning i langolango kusun a warkurai a tinaulai, pa ning ir taulai ulak ana ta barsan bel i tol a laulauna.

<sup>4</sup> Larotleng tetek mulo na tastasikla, ning e Karisito i mat, mulo

otleng mulo mat taum onoi. I maining mulo otleng, mulo langolango kusun a Warkuraila, sur mulor kes kale tetek tik masak, tetek e Karisito, ning e God i akamtur ulaki kusun a minat. Pa onone, dala ka langolango, sur dalar suah a waindala sur e God.

<sup>5</sup> Lanigo, ning anundala a lalaun i kes nahai a rakrakai ana turai a lalaun, a Warkuraila i akamtur otnan a laulau a nuknuk sur dalar tol a toltol laulau. Pa a toltol laulau ana nundala lalaun i wai, pa a wana a minat ka. <sup>6</sup> Ika onone, dala mat kusun a Warkuraila ning nating i dot akes dala. Pa di ka alangolango pas dala kusun a rakrakai ana Warkuraila, pa dala titol tetek e God ana tona ngas, ning a Talngan Tabu i saran tari tan dala. Bel i arlar ana ningnigo na ngas, ning dala mur ka a Warkuraila ning di tumus tari.

*A toltol laulau i umkol dala*

<sup>7</sup> Pa asa dalar atongi? Mangasa, a Warkuraila a toltol laulau? Bel momol! Ning bel ta Warkurai, bel ar tasman lalan a toltol laulau. Larne, ning e God bel ir atong tari ana Warkuraila mang, "Gong u ram sur a utna anuna tik," iau otleng bel ar oroi lalani mang a ram sur ta utna anuna tik i a toltol laulau. <sup>8</sup> Ika a toltol laulau i pastetek pas a ngas ana warkurai ning, sur ir suah otnan tar a urmatana ngas a nuknuk ana balak sur a ututnala anuna tik masak. Anasa ning bel ta warkurai, a toltol laulau bel ta rakrakaina.

<sup>9</sup> Ning belot a tasman a Warkuraila ane God, a laun. Ika ning ia ka tasman a Warkuraila, a toltol laulau i laun ot ting na balak, pa a mat. <sup>10</sup> A Warkuraila ning e God i saran tari sur ir saran a lalaun tak, i saran ka a minat tak. <sup>11</sup> A toltol laulau i pastetek pas a ngas ana Warkuraila sur ir asongo tar iau, pa ana rakrakai ana Warkuraila, a toltol laulau i umkol iau.

12 I maining dala tasmani mang a warkurai i totoh, pa na puka warwara na warkuraila rop la totoh, la tostos, pa la wakak. 13 Mangasa, a utna ning i wakak i umkol iau? Bel momol! A toltol laulau i umkol iau. A toltol laulau i titol taum ana wakak a warwara na warkurai, pa i saran a minat tak, sur ir talapor mang a ngas a toltol ne i laulau. Ting na Warkuraila dala oroi lalani mang a toltol laulau i laulau kol.

*A wakakna ning a mang sur ar toli, bel a toli*

14 Dala tasmani mang a Warkuraila ane God a ututnala na ingun. Ika iau a barsan ka mite lapiu, pa a toltol laulau i dot tar iau sur ar tena titol oros anunai. 15 Bel a talapor ana utna ning a toli. Anasa a utna ning a mang sur ar toli, bel a toli, ika a utna ning a ngeti, a toli. 16 Ning a tol a utna ning bel a mang sur ar toli, a malmaling mang a Warkuraila ane God i wakak. 17 I maining bel ma iau ot a tol a laulau a utna ne. A toltol laulau ot ning i laun te hok i toli. 18 A tasmani mang bel ta wakak a utna i laun te hok, ana turai a lalaun. Anasa a mang ot sur ar tol a wakakna, ika bel a tolsot pasi sur ar toli. 19 Anasa a utna ning a toli, bel a wakakna ning a mang sur ar toli. Ika a laulauna ning bel a mang sur ar toli, a sira toli. 20 Ning a tol a utna ning bel a mang sur ar toli, bel ma iau a toli, a toltol laulau ot ning i laun te hok i toli.

21 A oroi a ngas a rakrakai ne i titol te na lalaun anuki: Ning a mang sur ar tol a wakakna, a laulauna kanet hok. 22 Ana nuknukik a mang kol sur a Warkuraila ane God. 23 Ika, ana palaok a oroi otleng ning a ngas a rakrakai, ning bel i mur a warkurai ane God. I harum taum ana wakak a warkurai te na nuknukik, pa i dot akes iau sur a didiah palaok i kes na dodot ana toltol laulau.

24 Iau a pot na marmaris a barsan! Esining ir alangolango iau kusun a palaok ne, ning ir mat? 25 E God ot. A atong wakak teteki anasa i sune e Iesu Karisito anundala Leklek, sur ir alangolango pas iau.

I maining, iau ot ana nuknukik iau a tena titol oros ana Warkuraila ane God, ika ana turai a lalaun iau a tena titol oros ana rakrakai a toltol laulau.

## 8

*Gong dala mur a turai a lalaun*

1 I maining la ning la laun o e Karisito Iesu, bel ma ta warkurairai na arkeles ane God tetek la. 2 Anasa, ning a kes o e Karisito Iesu, a rakrakai ana Talngan Tabu, ning i sira saran a lalaun, i alangolango pas iau kusun a rakrakai ana toltol laulau ning i saran a minat tak. 3 A Warkuraila ane Moses bel i tolsot pasi sur ir sairas a laulauna, anasa bel ta rakrakaindala sur dalar mur a Warkuraila, ning dala laun ana turai a lalaun.

Ika e God i tolsot pasi. I sune tar e Natnalik ute lapiu pa i hanot a mainla arlar ondala, a tarai na tol a toltol laulau. I ka mat pa ka alaun pas dala kusun anundala na toltol laulau. A warkurai na arkeles ana toltol laulau anundala, e God i suah tari ana palaona e Iesu, pa i arop a rakrakai ana toltol laulau. 4 I toli sur a tostos a toltol ning a Warkuraila la warwara onoi ir hanot momol ana nundala lalaun. Bel ma dala mur a turai a lalaun, dala mur a nuknuk ana Talngan Tabu.

5 La ning la mur a turai a lalaun, a nuknukinla otleng i kes ka ana utna ning a turai a lalaun i mang suri. Ika, la ning la mur a nuknuk ana Talngan Tabu, a nuknukinla i kes ana utna ning a Talngan Tabu i mang suri. 6 Esining a nuknukna i mur ka a turai a lalaun ir mat. Ika, esining a nuknukna i kes nahai a Talngan Tabu, ir laun pa ir kilang a

bal molmol. <sup>7</sup> Esining a nuknukna i mur a turai a lalaun, i a hirua ane God. Anasa esining a nuknukna i manglarning, bel i anatarna pasi nahai a Warkuraila ane God, pa bel ir tolsot pasi. <sup>8</sup> Pa la ning la kes nahai a turai a lalaun, bel lar agasgas lar pas e God.

<sup>9</sup> Ika mulo, bel mulo kes nahai a turai a lalaun. Ning a Inguna e God i laun ting o mulo, mulo kes nahai a Talngan Tabu. Ika, ning tik, a Inguna e Karisito bel i laun ono, i bel ane Karisito. <sup>10</sup> Ning e Karisito i laun ting o mulo, a palaomulo ir mat, anasa ana toltol laulau, ika a ingumulo ir laun, anasa mulo tostos namatana. <sup>11</sup> A Inguna e God, ning i akamtur pas e Iesu kusun a minat, i laun ting o mulo. Pa esaning i akamtur ulak pas e Karisito kusun a minat, ir saran a lalaun ting na palaomulo ning i sira mat. Ir sarani ana titol ana Inguna ning i laun ting o mulo.

#### *Dala na natnat e God*

<sup>12</sup> I maining a tastasikla, dala na tena titol. Ika bel dala na tena titol ana turai a lalaun, sur dalar muri. <sup>13</sup> Anasa ning mulo mur a turai a lalaun, mulor mat. Ika ning ana rakrakai ana Talngan Tabu mulo umkol a toltol laulau ana palaomulo, mulor laun. <sup>14</sup> Anasa la ning a Inguna e God i nigon la, la na natnat e God. <sup>15</sup> Anasa a Talngan Tabu ning mulo kibasi, bel ulak ma sur mulo na tena titol oros ana matmataut. A Talngan Tabu ning mulo kibasi sur mulo na natnat e God, ning i ras pas mulo. Pa ana rakrakai ane God dala sira atongi mang, "Aba\*", Tata." <sup>16</sup> Pa a Talngan Tabu i warwara talapor te na ingundala mang dala na natnat e God. <sup>17</sup> Pa ning dala na natnatnala, dalar kibas a ututnala ning e God ka lele tar ono. Dalar kibasi taum o e Karisito. Ning dala kilang a mamahat taum o e Karisito, lamur

dalar kes taum onoi ting na nuna matatar.

#### *Lamur dalar kes taum o e God ting na nuna matatar*

<sup>18</sup> A tasmani mang a wakak a matatar ning lamur e God ir apuasai tetek dala, ir itna kol tana mamahatla ning onone dala barati. <sup>19</sup> A kidol a akakes rop i harnanai pa i mang kol sur a pukakiar ning e God ir apuasa na natnatnala. <sup>20</sup> Anasa a akakesla rop la kes ana dodot na minat pa la utna oros ka. Bel a nuknuk anuna akakesla, a nuknuk e God ot sur lar harnanai sur a pukakiar; <sup>21</sup> ning e God ir paksen la kusun a dodot na marase pa minat. Ir alangolango dala na natnatnala kusun a minat, pa a akakesla lar kes taum ondala ting na wakak a matatar.

<sup>22</sup> Dala tasmani mang tuk onone a kidol a akakes la harnanai taum ana tinangis, arlar ana hane ning i pele ana kankan sur ir agon. <sup>23</sup> Pa bel a akakesla ka, dala otleng, ning e God ka saran tar a ningnigo na artabar tetek dala, a Talngan Tabu, dala otleng dala harnanai taum ana tinangis te na balandala, pa dala mang kol sur a pukakiar ning e God ir apuasa i mang dala na natnatnala, pa ir alangolango a palaondala. <sup>24</sup> E God ka alaun pas dala, pa onone dala harnanai ana tortorot sur a ngas a lalaun ning ir sarani tan dala lamur. Ning tik ir harnanai sur ta utna, ning ka kibas pasi, bel ir harnanai ulak suri. Esi ir harnanai sur ta utna ning ka kibas pasi? <sup>25</sup> Ika dala, dala harnanai ana tortorot sur a utna ning belot dala kibasi. Dala harnanai pa bel dala ngoro.

<sup>26</sup> Mangotleng larne, a Talngan Tabu ot i sira nangan dala, ning bel al rakrakaindala. Bel dala tasmani asaning dalar nunung suri, ika a Talngan Tabu ot i sira nunung tetek e God sur dala. I nunung

\* 8:15: "Aba" a puka warwara Aramaic, pa a kamkamna mang, "Tata."

ana rakrakai a kilkilang ning bel ta warwara ir atalapor lar pasi. <sup>27</sup> Pa e God i oroi a balandala pa i tasman a nuknuk a Talngan Tabu, anasa a Talngan Tabu i nunung arlar ana nuknuk e God, sur e God ir nangan anuna tarai.

<sup>28</sup> Pa dala tasmani mang a ututnala rop ning i hanot, e God i titol onoi sur a wakakna ir hanot tetek la ning la mang sur e God, pa ka kabah pas la arlar ana nuknukna. <sup>29</sup> Lanigo ot e God ka tasman tar la ning anuna tarai. Pa ka aslang pas la otleng nating ot, sur lar hanot arlar o e Natnalik, sur i a ningnigo tana galis a tastasnala. <sup>30</sup> Pa la ning e God ka aslang pas la, i kabah pas la. Pa la ning ka kabah pas la i atong la mang la tostos namatana. Pa la ning ka atong la mang la tostos namatana, i amermer la ana nuna matatar.

*Bel ta utna ir asauran dala kusun a marmaris ane God*

<sup>31</sup> I maining, asaning dalar atongi ana ututnala ne? Ning e God i kes taum ondala, esining ir tolsot pas dala? Bel tik. <sup>32</sup> E God bel i maris alar e Natnalik, i saran tari ka sur ir mat sur dala rop. Ning i saran tar e Natnalik sur ir mat sur dala, dala tasmani mang ir saran oros otleng a wakak a utna rop tetek dala.

<sup>33</sup> Esining ir arup dala a tarai na aslang ane God? Bel tik ir tolsot pasi, anasa e God ot ka atong tar dala mang dala tostos namatana. <sup>34</sup> Esining ir atai e God mang ir saran a warkurai na arkeles tetek dala? Bel tik ir tolsot pasi, anasa e Karisito Iesu ka mat sur dala. Bel i ka i ning i toli, e God ka akamtur ulak pasi kusun a minat, pa onone, kanisa ma ot i kes ting na sot a kuna e God, pa i sira nunung sur dala. <sup>35</sup> Esining ir asauran dala kusun a marmaris ane Karisito? A mamahatla? A kankanla? O ning dir akadik dala? O a munurak? O bel anundala al kaen? O ta utna

na hinirua? O ning dir umkol dala ana liwan na harum? <sup>36</sup> Larning di ka tumus tari ting na Buk Tabu, "A pukakiarla rop a tarai la mang sur lar umkol mila, anasa mila anum na tarai. Mila arlar ana sipsipla ning di sang sur dir umkol la." *Buk Song 44:22*

<sup>37</sup> Bel. Anasa o e Karisito ning i maris kol dala, dala tolsot rop pas a ututnala ne. <sup>38</sup> Anasa a tasmani ot mang bel ta utna ir asauran dala kusun a marmaris ane God. A minat, a lalaun, a angelola, a motla, al ngas a utna ning ir hanot onone pa lamur pa a wah, <sup>39</sup> pa al ngas a utna misaot pa mite lapiu, bel lar asauran dala kusun a marmaris ane God. Bel ta utna ana kidol a akakes ir asauran lar pas dala kusun a marmaris ane God, ning i saran tari tan dala o e Karisito Iesu anundala Leklek.

## 9

*E Pol i bal maris sur anuna tarai*

<sup>1</sup> Bel a asongo, a atong ot a momolna ne namatana e Karisito. Pa a Talngan Tabu taum ana balak dia malmaling mang a warwara ne i momol. <sup>2</sup> A nuknukik i mamahat kol, pa anuka bal maris bel i manah. <sup>3</sup> Ngandek ning ar tolsot pasi, a mang sur ar tur keles anuka tarai, a tarai Israel, pa dir suah tar anunla warkurai na arkeles hok, pa dir kepsen iau kusun e Karisito, sur dir alaun pas la. <sup>4</sup> La a tarai Israel, ning e God i ras pas la sur la na natnatnala. I asangan tar anuna matatar tanla, i tol tar a kunubusla taum onla, i saran tar a Warkuraila tanla, i asangan tar la ana ngas na lotu momol, pa i lele tar tanla. <sup>5</sup> La na kaba tarai e Abaram, Aisak pa e Jekop. Pa ning e Karisito i hanot a barsan momol, i hanot onla. E Karisito i warkurai a ututnala rop, pa i ot e God. Dalar atong alekleki, onone pa lamur pa bel ir rarop. Amen.

*A titol ane God tetek a tarai Israel*

<sup>6</sup> Ning a atongi larne, bel a atongi mang e God bel i tolsot pas anuna lele tetek a tarai Israel. Anasa bel a tarai Israel rop, la a tarai Israel momol namatana e God. <sup>7</sup> Pa bel otleng la rop ning la hanot o e Abaram, la na natnat e Abaram momol. E God i atai e Abaram mange, "La ka ning tagun a kaba tarai e Aisak, ning dir atong la mang anuma kaba tarai." *Stat 21:12*

<sup>8</sup> Bel la rop ning la hanot o e Abaram, dir atong la mang na natnat e God. La ka ning di agon la ana lele ane God, la ning e God i atong la mang na natnat e Abaram momol. <sup>9</sup> A lele ane God i mange, "Ning a pukakiar ir sot, ar ulak, pa e Sara kar agon pas a kaklik barsan." *Stat 18:10, 14*

<sup>10</sup> Bel i ka i ning, e Rebeka i agon pas a kasang, pa ning a tamandiau ka, e Aisak, a tubundala. <sup>11-12</sup> Ning belot di i agon e Esau pa e Jekop, e God i atai e Rebeka mange, "A ningnigo ir titol tetek a murmur." *Stat 25:23*

A warwara ne i hanot ning naur a kaklik belot dia tol ta wakakna pa ta laulauna. E God i toli larning sur anuna aslang ir arlar ot ana nuknukna. E God i kabah pas esining i mang suri, bel ana ta titol ning ka tol tari. <sup>13</sup> Larning e God i atongi ting na Buk Tabu mang, "E Jekop a mang suri, ika e Esau a ngeti." *Mal 1:2-3*

<sup>14</sup> I maining asa dalar atongi? Mangasa, e God bel i tol a tostos a toltol? Gong dala atongi manglarning! <sup>15</sup> Anasa e God i atai e Moses mange,

"Ar maris tik ning a mang sur ar marisi,  
pa ar tol a wakakna tana tik ning a mang sur ar tol a wakakna teteki." *Kisim Bek 33:19*

<sup>16</sup> I maining, ning e God i aslang pas a taraila, bel i kamkamna ana nuknukinla pa ana ta titol ning la toli. Anuna aslang i kamkamna ot ana nuna marmaris. <sup>17</sup> Larning di ka tumus tari ting na Buk Tabu mang, e God i atongi tetek a king mitimo e Ijip mange, "A suah tar u sur king sur ar asangan a rakrakaik ning ar tolsot pas u, pa sur a taraila rop ana rakrakan hanua lar tasmani mang iau ka e God." *Kisim Bek 9:16*

<sup>18</sup> I maining e God i maris la, pa i arakrakai a balan a taraila, ning i mang sur ir arakakai a balanla sur gong la longor.

<sup>19</sup> Sakana tik ir deken iau mang, "E God ot ning i arakrakai a balan a taraila, pa i mangasa ning i arup la? Bel tik ir sairas lar pas asaning e God i mang sur ir toli ting na nuna lalaun." <sup>20</sup> Esi u ning u nuki mang ur keles a warwara ane God? U a barsan ka u. Ning tik i tol ta kuro ana piopap, mangmangasa, a kuro ning i topasi sur ir atongi tetek esaning i toli mang, "Asa kamkamna ning u tol iau larne?" <sup>21</sup> Ning a tena toltol kuro i mang sur ir tol ir naur a kuro tagun ning a diah piopap ka, ir mur ot a nuknukna. Ir tol ta wakak a kuro sur a tatatan ngasala, pa tik otleng sur a pukakiarla oros ka.

<sup>22</sup> Mangotleng larning e God i toli tetek a tarai. I mang sur ir asangan anuna balakut pa rakrakaina. Ika kaning ot i harnanai, pa bel i saran kapit a arkelles tetek a tarai ning la kes nahai a balakut anunai, la ning la ka sang sur lar hirua. <sup>23</sup> I toli larning sur ir asangan anuna tnan matatar tetek a tarai ning la kes nahai a marmaris anunai. La ning i sang tar la nating ot sur lar kes taum onoi ana nuna matatar. <sup>24</sup> Esi la? Dala ot, ning ka kabah pas dala. Mila ning

tagun a tarai Juda, pa mulo ning tagun a tarai masak otleng. <sup>25</sup> I arlar ana warwara ane God ana tarai ning bel a tarai Israel, ning a propet Hosea ka tumus tari mang, “A tarai ning bel anuki, ar atong la mang anuka tarai,  
pa la ning bel a maris la, ar maris la.” *Hosea 2:23*

<sup>26</sup> Pa e Hosea i atongi otleng mange,

“Ting na hanua ning nating e God i atong tari tanla mang,  
‘Mulo bel anuka tarai,’

dir atong la mang ‘na natna e God, ning i laun.’” *Hosea 1:10*

<sup>27</sup> Ika ona tarai Israel, e Aisaia i warwara rakrakai mange,

“A tarai Israel la galis arlar ana woio tumo latasi,  
ika a siklik tarai ka ning e God ir alaun pas la.

<sup>28</sup> A Leklek ir tolsot rop pas anuna warkurai ting na rakrakan hanua,  
ir tol kapit a warkurai na arkeles ning.” *Ais 10:22-23*

<sup>29</sup> Larot ning e Aisaia i atong tari nating mang,

“A Leklek i rakrakai kol,  
ngandek ning bel ir noren al tarai tagun anundala kaba tarai,  
dala kar hirua rop arlar ana tarai miting e Sodom pa e Gomora.” *Ais 1:9*

### *A tarai Israel bel la tortorot*

<sup>30</sup> I maining asa dalar atongi ana ututnala ne? La ning bel a tarai Israel bel la rakrakai sur lar tostos namatana e God. Ika e God i atong la mang la tostos anasa ana nunla tortorot. <sup>31</sup> A tarai Israel la rakrakai sur lar atostos pas la ana mur warkurai, ika bel la tolsot pasi. <sup>32</sup> Asa kamkamna? Anasa bel la tortorot, la nuki ka mang lar tostos anasa ana nunla ana wakak a titol. La buh a hanla ana hat ning la sira buh a hanla

ono. <sup>33</sup> Larotning di ka tumus tari ting na Buk Tabu mang,

“Oroi! Ia ka suah tar a hat saot e Saion, a hat ning a tarai lar buh a hanla onoi,  
pa lar punga onoi.

Ika tik ning ir tortorot onoi, anuna tortorot bel ir ame i.” *Ais 8:14; 28:16*

## 10

*A tarai Israel bel la tasman a ngas ning lar tostos ono*

<sup>1</sup> Na tastasikla, a mang kol sur e God ir alaun pas anuka tarai, a tarai Israel, pa sira nunung otleng larne. <sup>2</sup> Anasa a tasmani ot mang, la mang kol sur lar agasgas e God, ika bel la talapor ana toltol ning ir gas onoi. <sup>3</sup> Bel la anatarna pas la nahai e God, sur ir atong la mang la tostos namatana, anasa bel la tasman a ngas ning e God i asangan sur tik ir tostos namatana, pa la tohi ka sur lar asangan la mang la tostos namatana. <sup>4</sup> E Karisito i tolsot pas a Warkuraila ane Moses. I maining la ning la tortorot o e Karisito lar tostos namatana e God.

<sup>5</sup> E Moses i tumtumus onla ning la mur a Warkuraila, mang lar tostos mangmangasa namatana e God. I atongi mange, “Esining ir mur sot pas a Warkuraila ane Moses, ir laun.” *Liwai 18:5*

<sup>6</sup> Pa e Moses i warwara otleng onla ning la tortorot, mang lar tostos mangmangasa namatana e God. I atongi mang, “Gong mulo nuki mang: Esi ir han usaot na langit?” I manglarning mulo mang sur mulor ben pas e Karisito ute. <sup>7</sup> Pa gong mulo nuki mang: “Esi ir han purum uting na hanua anuna minatla?” I manglarning mulo mang sur mulor ben pas e Karisito kusun a minat. <sup>8</sup> A kamkam a warwara ne i larne, “A warwara ane God ka milau. Kaning ot na pahamulo, pa ting na balamulo otleng.” *Lo 30:12-14*

Ine a warwara na tortorot ning mila warawai onoi. <sup>9</sup> Ning u apuasa i ana numa warwara mang e Iesu a Leklek, pa u tortorot ting na balam mang e God ka akamtur ulak pasi kusun a minat, e God ir alaun u. <sup>10</sup> E God i atong u mang u tostos namatana anasa u tortorot ting na balam. Pa ir alaun u anasa u apuasa i ana numa warwara mang e Iesu a Leklek. <sup>11</sup> Larning di ka tumus tari ting na Buk Tabu mang, “Esining ir tortorot onoi, bel ir amei.” *Ais 28:16*

<sup>12</sup> I arlar rop ka tetek a tarai Juda pa tetek a tarai masuk otleng: Takai ka a Leklek anundala rop. Pa ir angisngis la rop ning la nunung teteki. <sup>13</sup> Larning a Buk Tabu i atongi mange, “La rop ning la nunung tetek a Leklek, ir alaun la.” *Joel 2:32*

<sup>14</sup> Ika, ning bel la tortorot ana Leklek, lar nunung mangmangasa teteki? Ning bel la longor tar ta warwara onoi, lar tortorot mangmangasa onoi? Ning bel tik i atai la onoi, lar longor mangmangasa? <sup>15</sup> Ning bel tik i sune na tena warawai, lar han mangmangasa ana warwara talapor? Larning di ka tumus tari ting na Buk Tabu mange, “A tinan ot anunla ning la hanot ana Wakak a Warwara, i wakak kol.” *Ais 52:7*

<sup>16</sup> Ika bel a taraila rop la kibas a Wakak a Warwara. Larning a propet Aisaia ka atong tari mang, “Leklek, mila warwara talapor, pa bel tik i tortorot ana numila warwara.” *Ais 53:1*

<sup>17</sup> I maining a tortorot i hanot tetek a tarai ning la longor a Wakak a Warwara. A warwara ning la longori, a warwara ot ane Karisito.

<sup>18</sup> Ika, a kabah: Mangmangasa, a tarai Israel belot la longor a Wakak

a Warwara? La longori ot. Larning a Buk Tabu i atongi mang, “A tarai mite lapiu la ka longor a elngenla\*.”

A warwara ning ka han sarara ana pukna rop ting na rakrakan hanua.” *Buk Song 19:4*

<sup>19</sup> A kabah kale: I mangmangasa, a tarai Israel bel la talapor ana warwara ane God? La talapor ot. Anasa nating ot e Moses i warwara ana warwara ane God mang,

“Tau ot ar asanan tar mulo sur mulor ram sur a tarai ning bel la itna,

Par asanan tar mulo otleng sur a balamulo ir kut, anasa ar nangan a tarai ning bel la tastasman.” *Lo 32:21*

<sup>20</sup> Pa e Aisaia otleng i warwara taum ana rakrakai mang,

“A tarai ning bel la tatatai sur iau, la ka pastek pas iau.

A asangan iau tetek la ning bel la deke sur iau.” *Ais 65:1*

<sup>21</sup> Ika, ana tarai Israel, e Aisaia i atong a warwara ane God, mang,

“A pukakiarla rop a arkabah na marmaris

tetek a tarai ning bel la longor, la na tabun longor.” *Ais 65:2*

## 11

*E God i alaun pas dingla ka miting na tarai Israel*

<sup>1</sup> I maining a kabah: Mangmangasa, e God i gilam ris kusun anuna tarai? Bel! I nuk pas la ot. Iau otleng a te Israel ot, a tubuna e Abaram, tagun a mangis a tarai e Benjamin. <sup>2</sup> E God bel i gilam ris kusun anuna tarai ning nating ot ka tasman tar la. Mangmangasa, bel mulo tasman asaning a Buk Tabu i atongi o e Elaija? I ururai tetek e God ana tarai Israel ana toltol laulau ning la toli. I atongi

\* **10:18:** “A elngenla” i warwara ana Kamis, a nangnangla pa kalang. I arlar onoi ning la warwara talapor ona matatar pa a tnan titol ane God tetek a tarai te na rakrakan hanua.

mang, <sup>3</sup> “Leklek, la ka umkol tar anuma propetla, pa la ka regen tar otleng na logo na tun artabar tetek u, pa iau kama kane, pa la tohi sur lar umkol iau.” *1 King 19:10, 14*

<sup>4</sup> Asa a arkeles ane God tetek e Elaija? I kelesi mang, “Anuka mais a rip a tarai kaning ot, ning bel la lotu tetek e Bal, a asasongo na god.” *1 King 19:18*

<sup>5</sup> Mangotleng larning onone, e God ka aslang pas dingla ka miting na tarai, anasa ana nuna marmaris. <sup>6</sup> E God ka aslang pas la ana nuna marmaris, bel ana titol ning la toli. Ngandek ning e God ir aslang pas dingla miting na tarai anasa ana titol ning la toli, bel a marmaris i ning.

<sup>7</sup> Dalar oroi, a tarai Israel la tatatai sur ta ngas ning lar tostos onoi namatana e God, ika bel la pastetek pasi. La ka ning ka aslang pas la, la pastek pasi, ika a tarai masak bel. I arakrakai alar ka a balanla. <sup>8</sup> Larning di ka tumus tari ting na Buk Tabu mange,

“E God i aloklokron a nuknukinla, i san akut a matanla sur gong la tai, pa i akutkut a talnganla sur gong la longor,

tuk onone.” *Lo 29:4*

<sup>9</sup> Pa e Dewit otleng i atai e God mange,

“Ning la kes taum ana nunla na logo na hangan, ur lingiri sur ir arlar ana kun, ning lar sogor pa lar hirua onoi, pa ir arlar ana uben, ning ir tong akes la, pa ir arlar ana hat ning lar buh a hanla onoi pa lar punga, pa ir arlar ana warkurai na arkeles otleng.

<sup>10</sup> Ur san akut a matanla sur gong la tai, pa ur noren la,

sur a intaurunla ir bul tikin ana nnan mamahat.” *Buk Song 69:22-23*

*E God i alaun a tarai ning bel a tarai Israel*

<sup>11</sup> I maining a kabah: Mangman-gasa, ning a tarai Israel la punga, la punga tikin? Bel! Ika, e God i alaun pas a tarai masak, anasa ana toltol laulau anun a tarai Israel, sur ir dat atur a nuknuk a tarai Israel, sur la otleng lar ram sur e God ir alaun la. <sup>12</sup> Ning a tarai Israel la gilam ris kusun a ngas ning e God ir alaun la onoi, e God i atong angisngis a tarai rop te na rakrakan hanua. Ning i kepsen anuna angisngis kusun a tarai Israel, i saran tari tetek a tarai masak. Ika ning a tarai Israel lar ulak tetek e God, a tarai te na rakrakan hanua lar angis kol.

<sup>13</sup> Onone a warwara tetek mulo a tarai ning bel a tarai Israel. Mulo tasmani mang a sira titol na aposel tetek mulo, a tarai ning bel a tarai Israel. A titol ning e God i sune iau onoi, i itna kol te na nuk a lalaun. <sup>14</sup> Ana nuka titol ne, a mang sur ar akamtur a nuknuk ana nuka kaba tarai, sur lar ram omulo pa e God ir alaun pas hal onla. <sup>15</sup> E God i gilam ris kaba kusun a tarai Israel, sur ir armoro a tarai masak. Pa ning e God ir ben ulak pas a tarai Israel, ir wakak kol. A minatla lar laun. <sup>16</sup> Ar warwara larlar otleng mange: Ning a ningnigo na diah bret di sarani tetek e God\*, a kidol a bret ane God. Pa ning a wakir a rakai di sarani tetek e God, a rakrakana otleng ane God.†

*A warwara larlar ana naur a rakai a oliw*

<sup>17</sup> A tarai Israel la arlar ana rakai a oliw momol ning di ka oman tari, pa mulo a tarai masak mulo arlar ana lomlom a rakai a oliw. E God i kuben pas dingla na rakrakana

\* **11:16:** A toltol anuna tarai Israel, a ningnigo na diah bret di sarani tetek e God. † **11:16:** Naur a warwara larlar ne i warwara ana tarai Israel mang la ane God.



rakai a oliw momol, pa i kibas pas dingla na rakrakana lomlom a oliw, pa i tol a bading onla ting na rakai a oliw momol. Pa onone, mulo laun ana polo ning i han miting na wakir a rakai a oliw momol. <sup>18</sup> Gong mulo iaunan mulo ning mulo oroi a rakrakana ning di ka kuben tar la. Mulo tasmani mang a wakir a rakai ot i saran a lalaun tana rakrakana, bel a rakrakana la saran a lalaun tana wakirna. I arlar o mulo, e God i saran a lalaun tetek mulo kamna ana tarai Israel. <sup>19</sup> Sakana mulor atongi mang, “E God i kuben dingla na rakrakana sur ir apatap tar mila ting na pukna ning ka kuben tar la.” <sup>20</sup> A momolna ot, e God i kuben la anasa bel la tortorot. Pa mulo, e God i apatap tar mulo anasa mulo tortorot. Pa gong mulo dat abarah pukulumulo, mulor matmataut. <sup>21</sup> Anasa e God bel i maris alar la, i kuben tar dingla na rakrakana a rakai ning. Ning i toli larning onla, ir toli otleng larning omulo ning bel mulo tortorot.

<sup>22</sup> I maining mulor oroi a marmaris pa balakut ane God. I asangan anuna balakut tetek la ning la han masuk kusuni, pa i asangan anuna marmaris tetek mulo, ning mulo tortorot ana nuna marmaris tetek mulo, pa bel mulo manah kusuni. Ika, ning bel mulor tortorot, ir umsem omulo otleng. <sup>23</sup> Pa a tarai Israel otleng, ning lar tortorot, la otleng, e God ir apatap ulak la, anasa i tolsot pasi. <sup>24</sup> E God i umsem pas mulo miting na lomlom a rakai a oliw, pa i apatap tar mulo ting na rakai a oliw momol. Manglarning, bel i ngangeten sur ir apatap ulak na rakrakana rakai a oliw momol ting na rakaina.

*E God i mang sur ir asangan anuna marmaris tetek a taraila rop*

‡ **11:26:** E Jerusalem di sira atongi otleng mang e Saion. otleng e Israel.

<sup>25</sup> Na tastasikla, a mang sur mulor tastasim ana utna ning nating i mumun, sur gong mulo aitna pas mulo. I manglarne: Dingla na tarai Israel, ir rakrakai a balanla, tuk ning a wawas ana tarai masuk ning la tortorot, ir arlar ana nuknuk e God. <sup>26</sup> I maining ir alaun rop pas a tarai Israel. Larning di ka tumus tari ting na Buk Tabu mange,

“A Tena Alaun ir han misaot e Saion‡,

pa ir lingir a kaba tarai ane Jekop§ sur bel ma lar gilam ris kusun e God.

<sup>27</sup> Pa ine a kunubus ning ar toli taum onla, ar kepsen anunla na toltol laulaula.” *Ais 59:20-21; 27:9*

<sup>28</sup> A tarai Israel la na hirua ane God anasa bel la tortorot ana Wakak a Warwara, sur ir angis mulo a tarai masuk. Ika, e God i maris kol la, anasa i aslang pas na tumtubunla. <sup>29</sup> E God bel i sira lingir a nuknukna kusun a tarai ning ka kabah pas la, pa bel i sira kibas ulak anuna artabarla kusun la.

<sup>30</sup> Nating, bel mulo sira longor tetek e God. Ika ning a tarai Israel bel la longor teteki, e God i maris mulo male. <sup>31</sup> I mangotleng larning, onone a tarai Israel bel la longor tetek e God, sur lar kibas anuna marmaris, anasa i maris mulo. <sup>32</sup> E God i noren tar a tarai rop sur anunla tabun longor ir dot akes la, sur ir asangan anuna marmaris tetek la rop.

*Dalar atong leklek pas e God*

<sup>33</sup> Lakla! I itna kol a wakak a gongon ane God, anuna wakak a nuknukla pa anuna tastasim.

Bel tik ir tolsot sur ir papak ana nuknuk e God.

Bel tik i tasman anuna ngasla.

§ **11:26:** E Jekop ning a risana

<sup>34</sup> “Esining ka tasman tar a nuknuk e God?

Pa esining ka warwara na harnangai tar teteki?” *Ais 40:13*

<sup>35</sup> “Esining ka tabar tar e God anal utna sur ir kelesi teteki?” *Jop 41:11*

<sup>36</sup> Anasa i ot i akes a ututnala rop, pa i ot a kama ututnala rop, pa anunai ot a ututnala rop.

Dalar atong leklek pasi, onone pa lamur pa bel ir rarop. Amen.

## 12

*Dalar saran tar anundala lalaun tetek e God*

<sup>1</sup> I maining, na tastasikla, a nunung mulo sur mulor saran tar a palaomulo rop tetek e God, anasa e God i maris kol mulo. Mulor saran tari arlar ana artabar ning i laun, i totoh, pa e God i gas ono. I ning anumulo a lotu momol tetek e God. <sup>2</sup> Pa gong ma mulo oroi asasaer ana lalaun mite na rakrakan hanua. Mulor saran tar mulo tetek e God sur ir lingir a nuknukimulo, pa ir atonai, sur mulor tasman lalan a ngas a toltol ning e God i mang suri. A toltolla ning i wakak, i tostos kol, pa e God i gas onoi.

<sup>3</sup> Anasa ana nuna marmaris tetek iau, a atongi tetek mulo rop taktakai mang: Gong mulo aitna kol pas mulo ot. Mulor nuknuk wakak omulo, arlar ot ana tortorot ning e God ka saran tari ta mulo.

<sup>4</sup> Dala taktakai takai ka palaondala, ika a galis a didiah palaondala pa anunla titol otleng bel i arlar. <sup>5</sup> Mangotleng larning dala, dala galis, ika ting o e Karisito dala takai ka. Dala taktakai dala na halalna.

<sup>6</sup> Ana marmaris ane God, i saran tar a maskana artabar tetek dala taktakai. Ning tik, e God i saran tar a artabar na warwara na propet teteki, i wakak ning ir titol

wakak onoi, arlar ana nuna tortorot. <sup>7</sup> Ning tik, e God i saran tar a artabar na harnangai teteki, i wakak ning ir nangan wakak a tarai onoi. Ning tik, e God i saran tar a artabar na asaer teteki, i wakak ning ir asaer wakak a tarai. <sup>8</sup> Ning tik, e God i saran tar a artabar teteki sur ir arakrakai a tortorot anuna tarai, i wakak sur ir toli larning. Ning tik, e God i saran tar a artabar na titol na artabar teteki, i wakak ning ir palas a kuna tetek a tarai. Ning tik, e God i saran tar a artabar na titol na ningnigo teteki, i wakak sur ir titol rakrakai sur ir nigon wakak a taraila. Ning tik, e God i saran tar a artabar na titol na marmaris teteki, i wakak ning ir maris a tarai ana gasgas.

*A wakak a toltol ning dalar muri*

<sup>9</sup> Ir wakak ning anumulo a marmaris tetek a tarai ir momol. Mulor nget a laulauna, pa mulor tong akes a wakakna. <sup>10</sup> Mulor mang artalai sur mulo larning mulo mang sur na tastasimulo. Mulor hanrawai artalai mulo, pa gong mulo nuk pas mulo ot. <sup>11</sup> Mulor titol rakrakai, pa gong mulo ngoro. Mulor titol tetek a Leklek ana tnan gasgas ting na balamulo. <sup>12</sup> Mulor harnanai taum ana gasgas sur a ututnala ning e God ir tabar mulo onoi lamur. Ning mulo pastek a mamahatla, mulor tur rakrakai, pa gong mulo manah ana nunung. <sup>13</sup> Ning a tarai ane God la kapan sur ta utna, mulor nangan la. Mulor gas pas na wasira ting na numulo na rumai.

<sup>14</sup> Ning a tarai la alaulau mulo, mulor nunung sur e God ir atong angis la, pa gong mulo nunung sur e God ir alaulau la. <sup>15</sup> Ning a tarai la gas, mulor gas taum onla. Pa ning la bal maris, mulor bal maris taum onla. <sup>16</sup> Mulor tur taum ana wakak a toltol artalai tetek mulo. Gong mulo aitna pas mulo. Mulor gas sur mulor kes taum ana tarai

ning bel di aitna pas la. Pa gong mulo nuki mang mulo tastasman kol.

<sup>17</sup> Gong mulo keles a laulauna ana laulauna. Mulor nuknuk wakak sur mulor tol a toltol ning a tarai lar oroi lalani mang i tostos. <sup>18</sup> Ning mulo tolsot, mulor rakrakai sur mulor kes na bal mol-mol taum ana taraila rop. <sup>19</sup> Na halalik, gong mulo keles tik ning i tol a laulauna tetek mulo. Mulor noren tari ka tetek e God sur ir asangan anuna balakut pa ir kelesi. Anasa di ka tumus tari ting na Buk Tabu mange, “A Leklek i atongi mang, ‘Iau ot ar saran a warkurai na arkeles teteki, pa iau ot ar kelesi.’” *Lo 32:35*

<sup>20</sup> Ika mulor toli mange, “Ning anuma hirua i murak ur tabari,

pa ning i mos ur agangi.

Ning u toli larning teteki, ir meme ana nuna toltol laulau.” *Sindaun 25:21-22*

<sup>21</sup> Gong u noren ta laulauna sur ir tolsot pas u, ika ur tolsot pas a laulauna taum ana wakakna.

## 13

*E God ot i suah tar a matanitu*

<sup>1</sup> Dala rop dalar anatarna pas dala nahai a ningnigola miting na matanitu. Anasa e God ot i saran tar a keskes na ningnigo tetek a ningnigola miting na matanitu, pa bel ta matanitu ning e God bel i tol otnan tari. <sup>2</sup> I maining tik ning bel i longor ana warkurai anuna matanitu, bel i longor ana warkurai ning e God ot ka suah tari. Pa la ning bel la longor tetek a matanitu, la ot lar dat pas a rakrakai a warkurai tetek la. <sup>3</sup> Ning tik i tol a wakakna bel ir matmataut sur a matanitu, ika ning ir tol a laulauna ir matmataut ot. Pa ning u mang sur ur langolango kusun a matmataut sur a matanitu, ur tol a wakakna pa a matanitu ir atong leklek pas u. <sup>4</sup> Anasa e God ot i

suah tar a matanitu sur a tena titol anunai, sur ir tol a wakakna tetek u. Ika, ning u tol a laulauna, ur matmataut, anasa bel i tong oros ka a liwan a harum. A matanitu i a tena titol ane God, sur ir saran a warkurai na arkeles tetek tik ning i tol a laulauna. <sup>5</sup> I maining, i wakak ning dalar anatarna pas dala nahai a ningnigola miting na matanitu. Bel i kamkamna ka ning a matanitu ir saran a warkurai na arkeles tetek dala, i kamkamna otleng mang a wakak a nuknukindala i atai dala mang dalar toli larning.

<sup>6</sup> I maining mulor sira saran otleng a totokom tetek a matanitu, anasa na tena titol ting na matanitu la na tena titol ane God, pa la sira saran a lalaun anuna ana titol ne. <sup>7</sup> Mulor saran asaning i tostos sur mulor sarani tetek a tarai rop. Mulor saran a ngasa totokom rop tetek la ning la los totokom. Pa mulor saran a hanrawai tetek a ningnigola, pa mulor aitna pas la ning i tostos sur mulor aitna pas la.

*Esining a tena marmaris ka tolsot pas a Warkuraila*

<sup>8</sup> Gong u noren tar anum ta dinau tana tik. Ika anum ning a dinau ka ning bel ur manah na kelesi i mange: Ur mang sur a tarai. Anasa esining i mang sur a tarai, ka tolsot pas a Warkuraila ane God. <sup>9</sup> Pa ine a Warkuraila ane God: “Gong u tol a toltol laulau ana ta hane anuna tik o ta barsan anuna tik. Gong u umkol tik. Gong u kinkinau. Gong u ram sur a utna anuna tik.” A warkuraila ne pa a warkuraila rop otleng, takai ka a warkurai i poroi alar la. I mange, “Ur mang sur a halim larning u mang sur u ot.” *Liwai 19:18*

<sup>10</sup> Esining i mang sur a halna bel ir tol ta laulauna teteki. I maining, esining i tol a toltol na marmaris, i tolsot pas a Warkuraila.

<sup>11</sup> Mulor toli larning, pa mulor oroi lalan a pukakiarla onone.

A pukakiar ka hanot sur mulor mata. Anasa ning dala turpas a tortorot o e Karisito, a pukakiar ning e God ir alaun dala, belot i milau kol, ika onone ka milau. <sup>12</sup> Ka morom pas, pa milau ir kabakiar. I maining dalar suah sen a toltol miting na mormorom, pa dalar mermer taum ana ututnala na harum miting na talapor. <sup>13</sup> Dalar mur a tostos a toltol, larning dala laun ana kabakiar. Gong dala sipak, pa gong dala kukuk taltal taum ana longlong a toltol. Gong dala tol a pamuk a toltol, pa gong dala tol a utna na meme. Gong dala arngaras, pa gong dala bal laulau. <sup>14</sup> Ika mulor mermer taum ana lalaun anuna Leklek e Jesu Karisito, pa gong mulo nuknuk sur ta ngas ning mulor agasgas a turai a lalaun.

## 14

*Gong dala artituu ana ututnala ning bel i itna namatana e God*

<sup>1</sup> Gong mulo oroi laulau tik ning bel i tur rakrakai ana tortorot, mulor gas pasi. Pa gong mulo arngaras ana ututnala ning bel i talapor teteki. <sup>2</sup> Dingla na tarai la tortorot mang i wakak ka sur lar ien a ututnala rop. Pa dingla na tarai ning bel la tur rakrakai ana tortorot, bel la mang sur lar ien a inagoila. La ien ka a utna ning di omani. <sup>3</sup> Esining i sira ien a ututnala rop, gong i oroi purpurum esaning bel i ien a utna rop. Pa esining bel i ien a ututnala rop, gong i nuki mang esaning i ien a ututnala rop i tol a toltol laulau, anasa e God ka gas pasi. <sup>4</sup> Esi u ning ur warkurai a tena titol anuna tik masak? Anuna Leklek ot ir oroi mang ir tur rakrakai o ir punga. Ika ir tur rakrakai ot, anasa a Leklek ot ir tolsot pasi sur ir arakrakai i.

<sup>5</sup> Mangotleng larne, dingla na tarai la nuki mang ning a pukakiar

ka i itna tan dingla na pukakiar. Pa dingla na tarai otleng la nuki mang a pukakiarla lar arlar rop ka. I wakak ning dala rop takakai dalar tol asaning i tostos ting na nuknukna. <sup>6</sup> Esining i nuki mang ning a pukakiar ka i itna, a nuknukna i larne, sur ir aleklek pas a Leklek ono. Pa esaning i ien a ututnala rop, i hangan larne, sur ir aleklek pas a Leklek ono, anasa ka atong wakak pas tetek e God onoi. Pa esi otleng ning i ien ka a ututnala ning di omani, i hangan otleng, sur ir aleklek pas a Leklek ono, pa i atong wakak tetek e God onoi. <sup>7</sup> Ning dala laun, bel anundala ot a lalaun, pa ning dala mat, bel otleng a lalaun anundala. <sup>8</sup> Ning dala laun, dala laun sur a Leklek. Pa ning dala mat, dala mat sur a Leklek. I maining, ning dala laun o ning dala mat, dala anuna Leklek ot.

<sup>9</sup> E Karisito i mat pa i laun ulak, sur ir Leklek anuna ning la ka mat, pa anuna otleng ning la laun. <sup>10</sup> Pa u, sur asaning u tiu e tasimlik? Sur asaning u oroi purpurum e tasimlik? Anasa dala rop dalar tur salanigo ana keskes na warkurai ane God. <sup>11</sup> Larning di ka tumus tari ting na Buk Tabu mang, "A Leklek i atongi mang, 'Ning i momol a laun, a warwara otleng anuki i momol larne: A tarai rop lar kes ana bokona hanla salanigo tak,

pa a tarai rop lar atong puasai mang iau e God.' " *Ais 45:23*

<sup>12</sup> I maining, lamur dala rop takakai dalar warwara talapor tetek e God ana ututnala rop ning dala ka tol tari.

*Gong dala tol ta utna ning ir alaulau a tortorot anuna tik*

<sup>13</sup> I maining gong ma dala artituu artalai dala. Mulor nuknuk wakak sur gong mulo tol tar ta toltol ning ta tasimulo ir punga onoi. <sup>14</sup> Ana nuk a lalaun ting na

Leklek e Iesu, a tasman momoli mang bel ta utna na hangan ir asanan tar dala sur dalar laulau namatana e God. Ika, ning tik i nuki mang ir laulau namatana e God ning ir ien ta ngas a utna, i ot i tasmani mang bel i tostos teteki sur ir ieni. <sup>15</sup> Ning u ien ta utna ning i aloklokron a nuknukna e tasimlik, bel u apuasa a toltol na marmaris. Gong u ien ta utna na hangan ning ir alaulau a tortorot anuna tik, ning e Karisito i mat suri. <sup>16</sup> Ning u nuki mang ta utna i wakak, ika tik i atong laulau, gong u toli. <sup>17</sup> Anasa a matanitu ane God bel tagun a hangan pa gang. A matanitu ane God tagun a tostos a toltol, a bal molmol pa gasgas ana Talngan Tabu. <sup>18</sup> Pa ning tik ir mur a toltolla ne ana nuna titol tetek e Karisito, e God ir gas onoi, pa a tarai otleng lar oroi lalani mang a toltol anunai i tostos.

<sup>19</sup> I maining dalar rakrakai kol sur dalar tol otnan a bal molmol, pa dalar arakrakai a tortorot anundala artalai. <sup>20</sup> Gong mulo alaulau a titol ane God, anasa ana utna na hangan. A utna na hangan rop i wakak namatana e God, ika bel i tostos ning tik ir ien ta utna ning ir asanan tik sur anuna tortorot ir punga. <sup>21</sup> I wakak sur gong u ien ta inagoi, pa gong u gang a wain, pa gong u tol ta ngas a utna otleng larning, sakana asaning ur toli ir asanan e tasimlik sur ir punga.

<sup>22</sup> A ututnala rop ning u nuki mang i wakak tetek u, anumui ot ma e God. Esining i tol ta utna pa a nuknukna bel i arupi onoi, i angis. <sup>23</sup> Ika esining i hangan, pa i urmatana nuknuk onoi, e God ir warkurai i, anasa bel i mur anuna tortorot. Pa a ututnala rop ning tik i toli, ning bel i mur anuna tortorot, i ning a toltol laulau.

*Dalar nangan la ning bel la tur rakrakai ana tortorot*

<sup>1</sup> Dala ning dala tur rakrakai, i wakak ning dalar nangan la ning bel la tur rakrakai ana tortorot. Pa gong dala nuk pas dala ka.

<sup>2</sup> Dala rop taktakai dalar nuk pas otleng na halalindala, pa dalar tol a ututnala ning ir nangan la sur ir arakrakai anunla tortorot. <sup>3</sup> Anasa e Karisito otleng, bel i nuk pas i ot, larning di ka tumus tari ting na Buk Tabu mange, “God, a laulau a warwara ning di atongi hom, i akadik iau otleng.” *Buk Song 69:9* <sup>4</sup> Anasa a warwarala rop ning di ka tumus tari nating ting na Buk Tabu, di tumus tari sur ir asaer dala, sur dalar tur rakrakai ana nundala tortorot, pa ir nangan dala otleng sur dalar harnanai ana tortorot sur a utna ning e God ir toli lamur.

<sup>5</sup> A nunung mang e God ot, ning i sira arakrakai anundala tortorot, pa i sira nangan dala, ir dat taum mulo sur ir takai ka a nuknukimulo, ning mulo mur e Karisito Iesu. <sup>6</sup> A nunung larning, sur ir takai ka a balamulo pa elngemulo sur mulo taum mulor atong leklek pas e God, a Taman anundala Leklek e Iesu Karisito.

*E Karisito i hanot otleng sur a taraila ning bel a tarai Israel*

<sup>7</sup> I maining mulor gas artalai pas mulo, arlar ning e Karisito i gas pas mulo, sur mulor atong leklek tetek e God. <sup>8</sup> A atongi ta mulo mange, e Karisito i hanot arlar ana tena titol anuna tarai juda, sur ir tolsot pas a lelela ane God ning i tol tari tetek na tumtubunla. Ning i toli larning i asangani mang a warwara ane God i momol. <sup>9</sup> I hanot otleng sur a tarai ning bel a tarai Israel lar atong leklek pas e God ana nuna marmaris. Larning di ka tumus tari ting na Buk Tabu mange,

“I maining ar atong leklek pas u

napir a tarai ning bel a tarai Israel,  
pa ar saksak na atong leklek tetek u.”

*2 Sam 22:50*

<sup>10</sup> Pa di ka tumus tari otleng mange,

“Mulo a tarai ning bel a tarai Israel,

mulor gasgas taum ana tarai ane God.”

*Lo 32:43*

<sup>11</sup> Pa di ka tumus tari otleng mange,

“Mulo a tarai rop ning bel a tarai Israel,

mulor atong leklek pas a Leklek,

mulo a kaba taraila rop mulor saksak na atong leklek pasi.”

*Buk Song 117:1*

<sup>12</sup> E Aisaia otleng i warwara na propet o e Karisito mange,

“Takai ir hanot miting na kaba tarai e Jesi\* arlar ana sibul ning i gomo miting na wakir a rakai.

Ir king pa ir nigon a tarai miting na matanitula,

pa a tarai ning bel a tarai Juda lar tortorot onoi,

pa lar harnanai ana tortorot sur a wakakna ning ir toli.”

*Ais 11:10*

<sup>13</sup> Pa nunung tetek e God, esaning dala harnanai suri ana tortorot sur a wakakna ning ir toli. A nunung sur ir abukus mulo ana tnan gasgas pa a bal molmol, ning mulo tortorot onoi. Pa ana rakrakai ana Talngan Tabu ot, mulor harnanai ana tnan tortorot sur a wakakna ning e God ir toli lamur.

*E Pol i warwara ana nuna titol*

<sup>14</sup> Na tastasikla, a tasmani ot mang mulo bukus ana wakak a toltol pa a tastasim, pa mulo tolsot pasi sur mulor asaer artalai mulo.

<sup>15</sup> Ika, te na pas ne a warwara kol ana dingla na ututna, sur mulor nuknuk ulak onoi. A tumtumus

tetek mulo, anasa ana nuna marmaris, e God i aslang pas iau, <sup>16</sup> sur ar tena titol ane Karisito Iesu tetek a tarai ning bel na tarai Juda. A arlar ana tena artabar tetek e God, ning a warawai ana Wakak a Warwara ane God, sur a tarai ning bel na tarai Juda la anuka artabar tetek e God ning ir gas onoi. Pa a Talngan Tabu ka atotoh tar la.

<sup>17</sup> O e Karisito Iesu, a gas kol ana nuka titol tetek e God. <sup>18</sup> Bel a mang sur ar warwara ana ta utna masik. A mang sur ar warwara ka ana titol ning e Karisito ka tol tari ana kuk, ning a ben a taraila ning bel a tarai Juda sur lar longor tetek e God. La longor teteki anasa ana ututnala ning a atongi pa a toli na arpotor tanla. <sup>19</sup> La oroi a rakrakai ana akinalangla pa a ututnala na kulkulan ning a toli ana rakrakai a Talngan Tabu. Manglarning misaot e Jerusalem tuk to e Ilirikum ia ka warawai rop pas tingia ana Wakak a Warwara ane Karisito. <sup>20</sup> Ana kamkama nuka titol tetek e Karisito tuk onone, anuka tnan nuknuk sur ar warawai ana Wakak a Warwara ting na hananuala ning bel la tasman e Karisito, sur gong a tol a rumai saot na kamkam a rumai ning tik ka atur tari. <sup>21</sup> Larning di ka tumus tari ting na Buk Tabu mange,

“La ning belot di atai la onoi, lar oroi,

pa la ning belot la longori, lar tasmani.”

*Ais 52:15*

<sup>22</sup> A tohi sur ar han tetek mulo, ika a molot ana titol na warawai ting na hananuala. I a kamkamna ning belot a han tetek mulo.

*E Pol i mang sur ir han utumo e Rom*

<sup>23</sup> Ika, onone anuka titol ka rop ana paparla ne. Ka galis a rau ana nuka tnan nuknuk sur ar oroi mulo. <sup>24</sup> Pa ning ar han utumo e Spen, a nuki mang ar kes siklik pas

\* 15:12: Tamana e king Dewit, e Jesi.

napirimulo pa dalar gas taum pas. Lamur ar kamtur ulak sur ar han utumo e Spen. Pa mang sur mulor nangan iau ana nuka tinan utumo.

<sup>25</sup> Ika onone, ar han kaba usaot e Jerusalem sur ar nangan a tarai ane God tisaot. <sup>26</sup> Na tena tortorot to na naur a papar Makedonia pa e Akaia la gas sur lar minggen taum a mani, sur lar nangan a tarai ane God ning la kapan saot e Jerusalem. <sup>27</sup> Momol, la nuki mang i wakak ning lar toli larning. Pa i tostos otleng ning lar keles tar na tarai Juda, anasa na tarai Juda la ka nangan tar la, sur la otleng lar kibas a utna na ingun ning e God i angis la ono, ning nating ana tarai Juda ka. Pa i wakak sur la male lar angis na tarai Juda ana mani. <sup>28</sup> Pa ning ia ka arop tar anuka titol pa ia ka saran tar a artabar ne tetek a tarai ane God saot e Jerusalem, ar han utumo e Spen. Ana nuk a tinan utumo, ar geren nigon tar mulo. <sup>29</sup> Pa a tasmani mang ning ar hanot tetek mulo, ar bukus ana angangis ning e Karisito ka saran tari tak, sur ir nangan mulo.

<sup>30</sup> Na tastasikla, ana risan a Leklek e Iesu Karisito pa ana marmaris anuna Talngan Tabu, a nunung mulo sur mulor tur taum hok ana mamahatla, ning mulo nunung tetek e God sur iau. <sup>31</sup> Mulor nunung e God sur ir alaun iau kusun a tarai ning bel la tortorot, ning saot na papar Judia. Pa mulor nunung otleng sur a tarai ane God saot e Jerusalem lar gas pas anuka titol na artabar tetek la. <sup>32</sup> Ning a nuknukna e God ar hanot tetek mulo ana gasgas, par manah taum o mulo sur ar kibas ulak pas a rakrakai.

<sup>33</sup> E God, esaning a kama bal molmol, ir kes taum o mulo rop. Amen.

*E Pol i saran a marmaris tetek a tena lotula tumo e Rom*

<sup>1</sup> A atai mulo ana tasindala e Pibi. A hane ne, a wakak a tena titol miting na tarai a lotu tumo e Senkria. <sup>2</sup> A mang sur mulor gas pasi ana risana Leklek, arlar ana tarai ane God la sira toli. Pa mulor nangani ana ta utna ning ir kapan suri, anasa ka nangan wakak tar a galis a tarai pa iau otleng.

<sup>3</sup> Mulor saran anuka marmaris tetek e Prisila pa anuna barsan e Akuila, ning mitol titol taum ana titol ane Karisito Iesu. <sup>4</sup> Dia alaun pas iau ning a tarai la mang sur lar umkol iau, pa bel dia nuk pas anundiau a lalaun. A atong wakak kol tetek diau, pa bel iau ka, a tarai a lotu rop ning bel na tarai Juda, la otleng la atong wakak tetek diau. <sup>5</sup> Mulor saran anuka marmaris otleng tetek a tarai a lotu ning la sira lotu taum ting na nundiau a rumai.

Mulor saran anuka marmaris tetek a halik e Epainetus, i a ning-nigo na barsan mitimo na papar Esia ning i lingir a nuknukna pa i tortorot o e Karisito.

<sup>6</sup> Mulor saran anuka marmaris tetek e Maria, esaning ka titol rakrakai pas tetek mulo.

<sup>7</sup> Mulor saran anuka marmaris otleng tetek e Andronikus pa e Junias, naur a maik ning dia kes taum pas hok ting na rumai a dodot. Na arpotor ana aposella a risandiau i rarang. Dia naur a te Karisito nigo tak.

<sup>8</sup> Mulor saran anuka marmaris tetek e Ampliatas, ning a mang kol suri ana risan a Leklek.

<sup>9</sup> Mulor saran anuka marmaris tetek e Urbanus, ning a tena titol taum hok ana titol ane Karisito, pa mulor saran anuka marmaris tetek a halik otleng e Stakis.

<sup>10</sup> Mulor saran anuka marmaris tetek e Apelis, esaning di tohoi pa i apuasa i mang i a tena tortorot momol o e Karisito.

Pa mulor saran anuka a marmaris tetek la ning miting na rumai ane Aristobulus.

<sup>11</sup> Mulor saran anuka marmaris tetek e Herodion, a maik. Pa mulor saran anuka marmaris tetek la miting na rumai ane Narsisus ning la anuna Leklek.

<sup>12</sup> Mulor saran anuka marmaris tetek e Tripina pa e Triposa. Naur a hane ne dia titol rakrakai ana titol anuna Leklek. Pa mulor saran anuka marmaris tetek ning a halik otleng e Pesis, a hane ning i titol rakrakai kol ana titol anuna Leklek.

<sup>13</sup> Mulor saran anuka marmaris tetek e Rupus, ning a Leklek i aslang pasi. Pa mulor saran anuka marmaris tetek e tana otleng, ning i nangan iau arlar ot o e nang.

<sup>14</sup> Mulor saran anuka marmaris tetek e Asinkritus, Plegon, Hermes, Patrobas, Hermas pa a tasindala otleng ana tortorot ning la kes taum onla.

<sup>15</sup> Mulor saran anuka marmaris tetek e Pilologus pa e Julia, Nereus pa e tasna hane, pa e Olimpasi, pa a taraila rop ane God ning la kes taum onla.

<sup>16</sup> Ning mulo arsongo mulor maris artalai mulo ana argoro na marmaris, pa mulor toli ana totoh na toltol. A tarai a lotu ane Karisito miting na hananuala rop la saran anuna marmaris tetek mulo.

*A ararop a warwara na harnan-gai*

<sup>17</sup> Na tastasikla, a nunung mulo sur mulor atumarang mulo kusun a tarai ning la sira pagal asauran a tarai a lotu, pa la atong a warwarala ning i sairasi a asasaerla ning mulo ka kibasi. Mulor han masiki kusun la. <sup>18</sup> A ngasi a tarai ning, bel la mur anundala Leklek e Karisito. La mur ot a nuknuk na palaonla. La warwara ana namamin na warwara pa a warwara na agasgas, sur lar asobor a tarai

ning bel la tastasman wakak. <sup>19</sup> A taraila rop la talapor ana numulo a longor tetek a Leklek, i maining a gas kol o mulo. Ika, a mangsur mulor tastasman wakak ana asaning i wakak, pa gong mulo alasan mulo ana asaning i laulau. <sup>20</sup> Pa e God, esaning a kama bal molmol, milau ma ir pas gingini e Satan nahai a hamulo.

A marmaris anuna nundala Leklek e Iesu ir kes taum o mulo.

*Na halalna e Pol la saran anuna marmaris*

<sup>21</sup> E Timoti, esaning mia titol taum ana titol ane Karisito, i saran anuna marmaris tetek mulo. Pa natola maik otleng, e Lusius, Jerson pa e Sosipater, ditol saran taranunditol a marmaris tetek mulo.

<sup>22</sup> Iau otleng, e Tertius, ning a tumusi a warwarala ane Pol ana pas ne, a saran anuka marmaris tetek mulo ana risana Leklek.

<sup>23-24</sup> E Gaius i saran anuna marmaris tetek mulo. A barsan ne i gasgas pas iau, taum ana tarai a lotu rop, pa i sapang anuna rumai tetek mila. Pa e Erastus a tena tai alar ana mani mite na hanua ne, pa e Kuatus a tasindala, dia otleng dia saran anundiau a marmaris.\*

*Dalar atong aleklek e God*

<sup>25</sup> Dalar atong aleklek pas e God! I tolsot sur ir tong rakrakai mulo ana tortorot, arlar ana nuna warwara ana Wakak a Warwara ning a sira warawai onoi, a Wakak a Warwara o e Iesu Karisito. A Wakak a Warwara i mumun tagun nating ot. <sup>26</sup> Ika onone, ka hanot talapor. Mila warwara talapor ana asaning a propetla la atong tari o e Karisito. Mila toli arlar larning e God, ning i laun tikin, i atai tar mila sur milar toli, sur a taraila miting na matanitu rop, lar tortorot pa lar muri.

\* **16:23-24:** Dingla na tena tastasmai ana Buk Tabu la nuki mang dingla na warwarala otleng i kes te na ves ne. I mange: *A marmaris anuna Leklek e Iesu Karisito ir kes taum omulo rop. Amen.*



<sup>27</sup> Dalar atong leklek pas e God, takai ka a God, ning a tena tas-tasmai. Dalar atong leklek pasi kamna o e Iesu Karisito, onone pa lamur pa bel ir rarop. Amen.

## A Ningnigo na Pas ane Pol tetek a tarai Korin

*A warwara talapor nigo*

Ning e Pol i kes tumo e Epeses, i tumus a pas ne tetek a tarai a lotu tumo e Korin.

E Korin i a tnan hanua ning i kes tumo latasi, ana papar Akaia. A hanua anuna tarai Grik, ika a galis a tarai Juda otleng la kes tingia.

E Pol i han utumo e Korin ana nuna munaur a tinan, pa i warawai ana Wakak a Warwara tetek la. I kes ning a rau pa diono na kalang tumo, pa i asaer la (oroi Ap 18:1-17). Lamur, e Apolos i han tetek la (oroi Ap 18:27).

E Pol i tumus a pas ne anasa i longor a warwara ana nunla na toltol ning i akes sarara la (oroi 1Kor 1:10). I tumtumus otleng sur ir keles anunla a pas ning la ka tumus tari teteki (oroi 1Kor 7:1 pa 8:1).

### **A tinan ana Ningnigo na buk Korin:**

A kamkama buk ne (1:1-9)

A taptapagal anuna tarai a lotu (1:10-4:21)

Na toltol laulau ning dingla na tarai a tortorot la toli (5:1-6:20)

A asasaer ana keskes na taulai (7:1-40)

Gong dala lotu tetek na asasongo na god pa tetek na laulau a ingun otleng (8:1-11:1)

Na warkurai a lotu, pa na artabar anuna Talngan Tabu (11:2-14:40)

A kamkamtur ulak ane Iesu, pa a tarai a tortorot otleng (15:1-58)

A artabar tetek a tarai a tortorot sa e Judia (16:1-4)

A ararop a warwara ane Pol tetek a tarai Korin (16:5-24)

<sup>1</sup> Iau e Pol, ning e God i kabah pas iau, arlar ot ana nuknukna

sur ar aposel anuna Karisito Iesu. Miau ma e Sostenes a tasindala, mia tumtumus<sup>2</sup> tetek mulo a tarai a lotu ane God to e Korin. Mulo ning e Karisito Iesu i atotoh pas mulo, pa i kabah pas mulo sur mulo a tarai ane God. Mulo a tarai ane God taum ana tarai rop ting na hanua rop ning la sira lotu ana risana anundala a Leklek e Iesu Karisito, esaning a Leklek anunla pa anundala otleng.

<sup>3</sup> A marmaris pa a bal molmol ta e God a Tamandala pa a Leklek e Iesu Karisito, ir kes tetek mulo.

*E Pol i atong wakak tetek e God ana tarai Korin*

<sup>4</sup> A sira atong wakak bolbolos tetek e God o mulo, anasa ana nuna marmaris ning i saran tari tetek mulo o e Karisito Iesu.

<sup>5</sup> Anasa ana numulo na keskes taum o e Karisito, e God i angisngis mulo ana ututnala rop. I angis mulo ana numulo na warwara rop pa ana numulo na tastasim rop.

<sup>6</sup> I toli larning, anasa anumila a warwara talapor o e Karisito tetek mulo, ka hanot talapor ting na numulo na lalaun. <sup>7</sup> I maining bel mulor kapan sur ta artabar anuna Talngan Tabu tetek mulo, pa mulo harnanai ana gasgas sur anundala a Leklek e Iesu Karisito ning ir hanot talapor. <sup>8</sup> I ot ir arakrakai mulo tuk ana ararop a pukakiar, sur bel dir arup sot pas mulo on ta rongo ana pukakiar ning anundala a Leklek e Iesu Karisito ir ulak. <sup>9</sup> Pa a utna ne ning e God i atongi ir toli ot. Pa i kabah pas mulo sur mulor lasan taum o e Natnalik e Iesu Karisito anundala a Leklek.

*A tarai a lotu la taptapagal*

<sup>10</sup> Na tastasik, a nunung mulo ana risan anundala a Leklek e Iesu Karisito, sur mulo rop mulor tur taum, pa gong mulo taptapagal sarara. Pa ir takai ka a nuknukimulo pa balamulo. <sup>11</sup> Na tastasik, dingla na tarai ning la

kes ting na rumai ane Kloe, la atai iau mang mulo sira arlak artalai. <sup>12</sup> Ar pak a kamkam a warwara ne mang: Dingla na tarai o mulo la atongi mang, “A mur e Pol,” dingla la atongi mang, “A mur e Apolos,” dingla la atongi mang, “A mur e Pita,” pa dingla otleng la atongi mang, “A mur e Karisito.”

<sup>13</sup> Mangasa, e Karisito ka tapagal? Mangasa, di sai ahat e Pol saot na rakai kutus sur mulo? Mangasa, di baptais mulo ana risana e Pol? <sup>14</sup> A atong wakak tetek e God anasa bel a baptais tar tik o mulo. E Krispus ka, pa e Gaius ning a baptais diau. <sup>15</sup> I maining, bel tik o mulo ir tolsot pasi sur ir atongi mang, di baptais ana risak. <sup>16</sup> I momol, a baptais la otleng ning la kes te na rumai ane Stepanas, pa bel a tasmani ning ka baptais tar tik otleng o bel. <sup>17</sup> Anasa e Karisito bel i sune iau sur ar baptais. I sune iau sur ar warawai ana Wakak a Warwara. Pa bel ar warawai ana warwara na tastasim anuna tarai, sakana ir kepsen a rakrakai kusun a rakai kutus ane Karisito pa ir utna oros ka.

*E Karisito i a rakrakai ane God pa tastasim ane God*

<sup>18</sup> Anasa a warwara ana rakai kutus, a longlong a warwara ka tetek la ning la han sur a hirua. Ika, tetek dala ning e God i alaun dala, a warwara ana rakai kutus, i a rakrakai ane God. <sup>19</sup> Anasa e God ka atong tari ting na Buk Tabu larne,

“Ar kamar sen a tastasim anuna tena tastasmanla,  
pa ar apungan sen a wakak  
na nuknuk anun la ning la  
mananos.” *Ais 29:14*

<sup>20</sup> Asa dalar atongi ana ta tena tastasim? Asa dalar atongi ana ta tena tastasim ana Warkurai ane Moses? Asa dalar atongi ana ta tena tastasim ning ir keles rop pas na kabah? E God i asan-gani mang, a tastasim mite na

rakrakan hanua a longlong a tastasim ka. <sup>21</sup> Anasa, ana tastasim ane God, i toli sur a tarai te na rakrakan hanua bel lar tol soti sur lar tasman e God ting na tastasim anunlai ot. A warwara ning mila warawai onoi, a tarai la nuki mang a longlong a warwara, ika, ana warwara ning, e God i gas sur ir alaun la ning la tortorot.

<sup>22</sup> A tarai Juda la mang sur lar oroi al akinalang, pa a tarai Grik la tai sur ta tastasim. <sup>23</sup> Ika mila, mila warawai ka o e Karisito, esaning di sai ahati saot na rakai kutus. A warawai ne, a tarai Juda la ngeti, pa tetek la, i arlar ana hat ning la punga tar onoi, pa i arlar ka ana longlong a warwara tetek a tarai ning bel a tarai Juda. <sup>24</sup> Ika, e Karisito a rakrakai ane God, pa a tastasim ane God, tetek a tarai ning e God i kabah pas la. A tarai ning, tagun a tarai Juda pa miting na tarai Grik. <sup>25</sup> A tastasim ane God ning a tarai la nuki mang a longlong a tastasim ka, i itna kol tana a tastasim anuna tarai. A rakrakai ane God ning a tarai la nuki mang bel i rakrakai, i rakrakai kol tana a rakrakai ana tarai.

<sup>26</sup> Na tastasik, mulor nuk pasi mang mulo esi na ngas a tarai ning nating e God i kabah pas mulo. Belsur a galis omulo na tena tastasim namatana a tarai. Belsur a galis omulo, mulo tong akes a rakrakai sur mulor nigon a tarai. Pa bel otleng a galis omulo miting na mangis a tarai ning la leklek namatana a tarai. <sup>27</sup> Ika e God i aslang pas a tarai ning la longlong namatana tarai, sur ir ame na tena tastasim. Pa e God i aslang pasi otleng a tarai ning bel la rakrakai namatana tarai, sur ir ame la ning la rakrakai. <sup>28</sup> E God i aslang pas a tarai, ning a tarai mite na rakrakan hanua la anatarna pas la, pa la nget la, pa la nuki mang la utna oros ka, sur

asaning i itna tetek a tarai mite na rakrakan hanua ir utna oros kama. <sup>29</sup> I toli larning sur gong tik i iaunani namatana e God.

<sup>30</sup> E God ot ka tol tar a ngas sur mulor laun taum o e Karisito Iesu, pa i saran tari sur i a kamkama anundala na tastasim ta e God. O e Karisito, e God i atong dala mang dala tostos namatana, pa dala totoh namatana. Pa ana titol ane Karisito, e God i lou alangolango pas dala kusun anundala na toltol laulau. <sup>31</sup> I maining dalar toli larning di ka tumus tari ting na Buk Tabu mang, "Esining i mang sur ir iaunani, ir iaunan asaning a Leklek ka tol tari." *Jer 9:24*

## 2

<sup>1</sup> Na tastasik, ning a hanot tetek mulo pa a warawai ana warwara talapor o e God, bel a warwara ana ngas a warwara ning a kepaitna pas iau onoi, pa bel a warwara ana ngas a warwara ning na tena tastasim la sira warwara onoi. <sup>2</sup> A warawai larning anasa, ning a kes taum o mulo, bel a mang sur ar nuknuk on ta utna masak. A nuknukik i kes ka o e Iesu Karisito pa nuna minat saot na rakai kutus. <sup>3</sup> Ning a hanot tetek mulo, bel ta rakrakaik, a matmataut pa a koloron kol. <sup>4</sup> Ning a warwara pa warawai, bel a warwara ana warwara na tastasim anuna tarai, pa bel a warwara ana ngas a warwara ning ir dat a nuknukin a tarai. A rakrakai ana Talngan Tabu i amomol anuka warwara, <sup>5</sup> sur anumulo a tortorot o e Karisito bel ir kamna pas ana tastasim anuna tarai, ika ana rakrakai ot ane God.

*A Inguna e God i saran a tastasim tetek dala*

<sup>6</sup> Ika, mila warwara na tastasim ot arpotor napir a tarai ning la tur rakrakai ana tortorot. A tastasim ne, belsur mite na rakrakan hanua, pa belsur tana ningnigola

mite lapiu, ning anunla a warkurair ir rarop ka. <sup>7</sup> A tastasim ne mila warwara onoi, a tastasim ane God, ning nating i mumun tar pa onone ka hanot talapor. Ting na nuna tastasim, i sang tar a ngas sur ir saran a matatar tetek dala. Nating ot, ning belot i akes a rakrakan hanua, ka sang tari. <sup>8</sup> Bel ta ningnigo mite na rakrakan hanua i tasman a tastasim ne. Pa ngandek la ka tasman tari, bel lar sai ahat a Leklek, ning i bukus ana matatar, saot na rakai kutus. <sup>9</sup> Ika, i arlar ana warwara ning di ka tumus tari ting na Buk Tabu larne,

"Bel tik i oroi i,  
pa bel tik i longori,  
pa bel i hanot miting na nuknukin tik,

asaning e God ka sang tari sur la ning la mang kol suri." *Ais 64:4*

<sup>10</sup> Ika a Inguna e God i apuasa i tetek mila. Anasa a Talngan Tabu i tasman a ututnala rop. Momol, i tasmani ot na nuknuk a pidik ane God. <sup>11</sup> Esining i tasman a nuknukin tik? A ingun a barsan sot ka kaning onoi, i tasmani. Larotleng ning, bel tik i tasman a nuknuk e God. A Inguna e God sot ka i tasmani. <sup>12</sup> Pa mila, bel mila kibas a ingun mite na rakrakan hanua. E God i tabar mila ana Talngan Tabu, sur milar tasman lalan na artabarla rop ning i tabar oros tar mila ka onoi. <sup>13</sup> Ning mila warwara ana artabarla ne, bel mila warwara ana warwara na tastasim anuna tarai. Mila warwara ana warwara ning a Talngan Tabu ot i asaer mila onoi. Mila pak a asaer na ingun tetek a tarai ning a Talngan Tabu kaning onla.

<sup>14</sup> Ika, esining a Talngan Tabu bel kaning ono, bel ir kibas na asaerla, ning i hanot miting a Inguna e God. Anasa na asaerla ning, a longlong a ututnala ka teteki. Pa bel ir tasman lalan na asaerla, anasa a Talngan Tabu

bel kaning ono sur ir atalapor. <sup>15</sup> Esining a Talngan Tabu kane onoi, ir tasman lalan na ututnala rop ning i wakak o bel i wakak. Ika, bel tik ir tolsot pasi sur ir warkurai i. <sup>16</sup> Arlar ana Buk Tabu i atongi mang,

“Esining i tasman a nuknuk ana Leklek, sur ir asaer pasi?” *Ais 40:13*  
Ika dala, a nuknukna e Karisito kane ondala.

### 3

#### *Titol taum ana titol ane God*

<sup>1</sup> Na tastasik, nating bel a warwara lar pas tetek mulo arlar ana tarai ning a Talngan Tabu kaning onla. A warwara tetek mulo arlar larning tetek a tarai mite na rakrakan hanua, ning mulo na kakakla ot te na keskes taum o e Karisito. <sup>2</sup> A tabar mulo ka ana polo na sus, bel ana rakrakai a utna na hangan, anasa belot mulo sang sur mulor ien a rakrakai a utna na hangan. Momol, tuk onone, belot mulo sang suri. <sup>3</sup> Mulo mur ot na toltol mite na rakrakan hanua. I talapor mang mulo laun ot arlar ana tarai mite na rakrakan hanua, anasa mulo sira nuknuk laulau pa mulo sira warwara na balakut artalai. Mulo laun arlar onla ning bel la tortorot. <sup>4</sup> Ning tik i atongi mang, “A mur e Pol,” pa tik otleng i atongi mang, “A mur e Apolos,” mulo warwara arlar ka ana tarai mite na rakrakan hanua.

<sup>5</sup> Esining e Apolos? Pa esi otleng e Pol? Miau naur a tena titol oros ka ane God, pa mulo tortorot o e Karisito anasa ana numiau a titol. Miau taktakai mia tol a titol ning a Leklek i saran tari tetek miau.

<sup>6</sup> Iau a oman a wana, e Apolos i gosgosi ana malum, ika e God ot i agomo pasi. <sup>7</sup> I maining esaning i omomai pa esi otleng ning i lam-lamiri ana malum bel dia itna. E God ka i leklek, esaning i agomoi. <sup>8</sup> Esaning i omoman pa esaning

i gosgosi, a nuknukindiau i takai ka. Pa diar kibas anundiau a arlou arlar ot ana nundiau taktakai titol. <sup>9</sup> Anasa miau naur a tena titol taum ane God. Pa mulo, mulo arlar ana barim ane God, pa arlar otleng ana nuna rumai.

<sup>10</sup> Ana marmaris ane God ning ka saran tari tak, a titol arlar ana tena tol rumai ning i tastasim. Ia ka atur tar a kama rumai, pa dingla na tarai maleng la titol saot onoi. La rop taktakai ning la titol saot onoi, lar tumarang la anasi na ngas a titol ning la sira toli.

<sup>11</sup> Anasa e God ka akes tar e Iesu Karisito, i a kama rumai, pa bel dir tol sot ulak pas ta kamna masak.

<sup>12</sup> Ning tik ir titol saot ana kama rumai ne ana gol, o a silwa, o a hatatla ning a matana i abit, o a rakai, o a kunai, o na wai a wit,

<sup>13</sup> dir apuasa anuna ngas a titol ana pukakiar a warkurai. Anasa dir apuasa i ana iah, pa a iah ir toh a ngas a titol anuna tarai taktakai.

<sup>14</sup> Ning a titol anun tik ir tol sot pas a iah, ir kibas pas ot anuna arlou. <sup>15</sup> Ika ning a iah ir tun rop sen anuna titol, anuna titol ir utna oros kama. E God ir alaun pas a tena titol ning, ika ir arlar kama ana barsan ning di alaun pasi kusun a iah.

<sup>16</sup> Mangasa, bel mulo tasmani mang mulo a rumai ane God, pa a Inguna e God kaning o mulo?

<sup>17</sup> Ning tik ir alaulau a rumai ane God, e God ir alaulau a barsan ning. Anasa a rumai ane God i totoh, pa mulo ot a rumai ning.

<sup>18</sup> Gong mulo asongo ulak mulo. Ning ta halimulo i nuki mang i tastasim ana ngas a tastasim mite na rakrakan hanua, i wakak sur ir longlong namatana tarai, sur ir tastasim momol. <sup>19</sup> Anasa a tastasim mite na rakrakan hanua, a longlong a utna ka namatana e God. Larning di ka tumus tari ting na Buk Tabu mang,

“I sira kun sot pas na tena tastasim  
ana nunla na tastasim ot.”  
*Jop 5:13*

<sup>20</sup> Pa di ka tumus tari otleng ting  
na Buk Tabu mang,

“A Leklek i tasmani mang a  
nuknuk a tena tastasimla,  
bel i to pas ta utna.”

<sup>21</sup> I maining gong tik i iaunan pas  
ta barsan. Anasa na ututnala rop  
anumuloi ot: <sup>22</sup> E Pol, e Apolos, e  
Pita, a rakrakan hanua, a lalaun, a  
minat, na ututna tagun onone, pa  
na ututna ning ir hanot lamur, la  
rop ning, anumulo rop ka. <sup>23</sup> Pa  
mulo ane Karisito, pa e Karisito  
ane God.

## 4

### *Na aposel ane Karisito*

<sup>1</sup> I wakak sur mulor nuknuk o  
mila lar mila na tena titol oros  
ane Karisito, ning e God i saran  
tar anuna warwarala tetek mila  
sur milar apuasa i tetek a taraila.  
A warwarala ne, nating i mumun  
tar. <sup>2</sup> La ning di ka saran tar al  
titol tanla, i wakak sur lar tol sot  
pasi. <sup>3</sup> Bel a nuk kol pasi ning  
mulor warkurai iau, o ar tur na-  
matana warkurai sur a tarai lar  
warkurai iau. Momol, iau otleng  
bel a warkurai iau. <sup>4</sup> Bel a nuk  
pas ta utna ning a rongo onoi, ika  
a nuknukik ne bel ir alangolango  
sen iau. A Leklek ot ir warku-  
rai iau. <sup>5</sup> I maining gong mulo  
warkurai tik lanigo tana pukakiar  
a warkurai. Mulor harnanai tuk  
ning a Leklek ir hanot. Pa i ot, ir  
atalapor na ututna ning i mumun  
ting na mormorom, pa ir apuasa a  
nuknuk a taraila. Pa ana pukakiar  
ning, e God ir atong aitna pas a  
taraila, arlar ot ana nunla na titol  
taktakai.

<sup>6</sup> Na tastasik, ia ka atong tar na  
warwara ne o miau ma e Apolos  
sur ir nangan mulo pa ir asaer  
mulo, sur mulor talapor ana kama  
warwara ne: “Mulor mur ka a  
warwara ning di ka tumus tari

ting na Buk Tabu, pa gong mulo  
suah tar ta puka warwara otleng.”  
Ning mulor muri larning, bel ta  
halimulo ir aitna pas tik, pa ir  
anatarna pas tik otleng. <sup>7</sup> Esining  
i atongi mang u wakak tan ta  
halinla? Asa anumi ning e God bel  
i saran tari tam? Ning e God ka  
saran tar na ututna tam, sur asa  
ning u iaunan pas u onoi?

<sup>8</sup> Ngandek mulo ka tong akes  
a ututnala rop ning mulo mang?  
Ngandek mulo ka tena gongonla?  
Mulo nuki mang mulo kes arlar  
ana king, pa mila bel. A mang sur  
mulor kes na king momol, sur mila  
otleng milar kes na king taum o  
mulo. Ika bel. <sup>9</sup> Anasa a nuki mang  
e God i suah tar mila na aposel, sur  
milar barsan oros ka. Mila arlar  
ana tarai ning di ka warkurai tar  
la sur lar mat namatana tarai. A  
tarai pa a angelola otleng la oroi  
mila.

<sup>10</sup> A tarai la nuki mang mila  
na longlong anasa mila sira mur  
e Karisito. Ika mulo, mulo nuki  
mang mulo na tena tastasim ana  
numulo na lalaun o e Karisito.  
Mila, bel mila rakrakai, ika mulo,  
mulo nuki mang mulo rakrakai.  
Mulo, di aitna pas mulo, ika mila,  
di oroi purpurum mila. <sup>11</sup> Tuk  
onone mila sira murak, pa mila  
sira mos, mila sira pipis na tak-  
taksilir a kaen, di sira um laulau  
mila, pa bel ta rumai anumila.  
<sup>12</sup> Mila titol rakrakai ana kumila  
ot. Ning la atong laulau mila, mila  
atong angis la. Ning la akadik  
mila, bel mila keles la. <sup>13</sup> Ning la  
anan laulau mila, mila keles la ka  
ana warwarala na marmaris. Tuk  
onone mila arlar ana beren mite  
na rakrakan hanua, arlar ana utna  
ning i marase pa di minggen seni.

*E Pol i nunung a tarai Korin sur  
lar mur anuna toltol*

<sup>14</sup> Bel a tumus na warwara ne  
sur ar ame mulo onoi. A tumusi  
sur ar atumarang mulo, larning  
mulo na natnatuk ning a mang

kol sur mulo. <sup>15</sup> Ngandek ning anumulo ta bonot arip a tena tai alar, ning la tai alar anumulo na lalaun o e Karisito, ika bel al galis a tamtamamulo. O e Karisito Iesu, iau a tamamulo, anasa a saran a Wakak a Warwara tetek mulo. <sup>16</sup> I maining a arakrakai pas mulo sur mulor mur anuka toltol. <sup>17</sup> Ine i a kamna ning a sune sen e Timoti tetek mulo. I a natuklik ning a mang kol suri, pa i sira momol ana titol anuna Leklek. Ir anuknuk tar mulo ulak ana nuk na toltol, ning i kamna pas ana nuk a keskes taum o e Karisito Iesu. Anuk na toltol i arlar ana nuk a asaer tetek a tarai a lotu ana hananuala rop.

<sup>18</sup> Dingla na tarai o mulo la dat abarah a pukulunla, anasa la nuki mang bel ar ulak tetek mulo. <sup>19</sup> Ika, milau ma ar ulak tetek mulo, ning ot a Leklek ir mang. Ning ar hanot, bel ar talapor ka ana warwara anuna tarai ning la dat abarah a pukulunla. Ar talapor otleng ana rakrakai ning la titol onoi. <sup>20</sup> Anasa a matanitu ane God bel a warwara ka, a rakrakaina ot ning. <sup>21</sup> Asa ning mulo mang suri? Ar hanot tetek mulo taum ana kadas, o taum ana marmaris pa a wowon a toltol?

## 5

*Dir kepsen a tena lotu ning i tol a pamuk a toltol*

<sup>1</sup> A longori mang a pamuk a toltol kane i kes na arpotor ta mulo. Ning a halimulo i tol a toltol laulau taum ana hane ane tamana. A tarai ning bel la tortorot, bel la sira malmaling ana toltol laulau larning. <sup>2</sup> Ika mulo, mulo aitna pas mulo onoi! I mangasa ning bel mulo tangis onoi? Pa i mangasa ning bel mulo kepsen a barsan ning kusun mulo? <sup>3</sup> I momol, te

na palaoka kes masuk kusun mulo, ika te na inguk a kes taum ot o mulo. Pa ia ka saran tar a warkurai o esaning i tol tar a toltol laulau ning, arlar ning a kes taum ot o mulo. <sup>4</sup> Ning mulor hanot taum ana risana anundala a Leklek e Iesu, pa ar kes taum ot o mulo te na inguk, pa a rakrakai ana Leklek e Iesu otleng ir kes taum o mulo, <sup>5</sup> mulor saran tar a barsan ning na kuna e Satan, sur dir alaulau a palaona, pa e God ir alaun pas a inguna ana pukakiar ning a Leklek ir hanot ulak.

<sup>6</sup> Bel i wakak ning mulo iauan pas mulo ot. Mangasa, bel mulo tasmani mang siklik is ka ir abubus rop pas a palawa? <sup>7</sup> Mulor kepsen a turai a is, sur mulor arlar ana tona palawa ning bel al is onoi. I momol ot, bel al is o mulo. Anasa di ka saran tar e Karisito sur anundala na artabar tetek e God, arlar ana sipsip ning di artabar onoi te na tnan pukakiar a lotu na Hanlakai.\* <sup>8</sup> I wakak sur anunla na lalaun ir arlar ana tarai ning la tol a tnan pukakiar a lotu na Hanlakai. Gong dala toli ana is ning ka turai. A turai a is ning, i a toltol laulau pa a dur a toltol. Dalar toli ot ana bret ning bel al is onoi. A bret ning, i a tostos a toltol pa momolna.

<sup>9</sup> Ting na ning a pas nating, ning ia ka tumus tari tetek mulo, ia ka atai tar mulo mang, gong mulo lasan taum ana tarai ning la tol na pamuk a toltol. <sup>10</sup> Belsur a kamkamna mang, gong mulo lasan taum ana tarai mite na rakrakan hanua, ning la sira tol na pamuk a toltol, o la sira mang sur na utna ning lar tena gongon onoi, o la sira ras oros a utna ning belsur anunla, o la ning la sira lotu tetek a اساسong na godla.

\* 5:7: Ning a tarai Juda la sang sur a tnan pukakiar a lotu na Hanlakai, la kepsen rop a is kusun a rumai anunla, pa ana dionomais a pukakiar la ien a bret ning bel al is onoi. A tumtumus ane Pol ana toltol ning a tarai Juda la sira muri, a warwara larlar sur a tarai a lotu ting e Korin lar kepsen rop na toltol laulau anunla.

Ning mulo mang sur mulor han kusun a ngas a tarai larning, mulor han kusun a rakrakan hanua. <sup>11</sup> Ika a tumtumus tetek mulo, sur gong mulo lasan taum onla ning la atongi mang la na tastasindala ana tortorot, ika la sira tol na toltol laulau larne: La sira tol na pamuk a toltol, la sira mang sur na utna ning lar tena gongon onoi, la sira lotu tetek a asongo na godla, la sira hanan laulau a tarai, la na tena gang pa la sira ras oros a utna ning belsur anunla. Pa gong otleng mulo hangan taum ana ngas a tarai larning.

<sup>12-13</sup> Sur asa ning ar warkurai na tarai, ning bel tagun dala a tarai a lotu? E God ot ir warkurai la. Ika ir wakak sur mulor warkurai la ning tagun dala a tarai a lotu. Mulor toli arlar ning di ka tumus tari ting na Buk Tabu larne, "Mulor kepsen a laulau a barsan kusun mulo."

## 6

*Gong a tarai a tortorot la suah ulak la ot ana warkurai*

<sup>1</sup> Ning ta halimulo, anuna ta mamahat tetek ta halinla ana tortorot, sur asa ning ir han tetek la ning bel la tortorot, sur lar warkurai i, pa bel tetek a tarai ane God? <sup>2</sup> Mangmangasa, bel mulo tasmani mang a taraila ane God lar warkurai a rakrakan hanua? Pa ning mulor warkurai a rakrakan hanua, mangasa, bel mulo tolsot pasi sur mulor atostos na nanatar a mamahat? <sup>3</sup> Mangasa, bel mulo tasmani mang lamur dalar warkurai na an-gelo? Manglarning dala tolsot pasi ot sur dalar warkurai na ututna ting na lalaun ne. <sup>4</sup> Ning anumulo al mamahat tagun a lalaun ne, sur asa ning mulo han tetek la ning a tarai a lotu bel la hanrawai pas la, sur lar warkurai i? <sup>5</sup> A atongi larne tetek mulo sur mulor meme onoi. Mangasa, bel tik o mulo i tastasim sur ir warkurai na mamahat arpotor tana tena tortorotla?

<sup>6</sup> Mangasa, ta tena tortorot ir ben ulak tar ning a tena tortorot tetek la ning bel la tortorot, sur lar warkurai i?

<sup>7</sup> A ngasna ne mulo muri, mulo suah ulak mulo ot ting na warkurai, i apuasa i mang mulo ka punga. I mangasa ning bel mulo noren sen la ning la tol a laulaula tetek mulo? I mangasa ning bel mulo noren sen la ning la kinau mulo? <sup>8</sup> Ika, mulo na tarai a tortorot, mulo tol a laulauna pa mulo kinkinau, pa mulo sira tol a toltolla ne tana tastasimulo ot.

<sup>9</sup> Mangasa, bel mulo tasmani mang la ning la tol a laulauna bel lar kibas a matanitu ane God? Gong mulo asongo ulak mulo ot. Anasa la ning la tol na pamuk a toltol, pa la ning la lotu tetek a asongo na godla, pa la ning bel la hanrawai a keskes a taulai, pa la ning na pamuk a barsan ning la siuran a palaonla, pa na barsan ning la taulai ulak ana barsanla, <sup>10</sup> pa na tena kinkinau, pa la ning la mang sur na utna ning lar tena gongon onoi, pa na tena gang, pa la ning la arle, pa la ning la ras oros a utna ning belsur anunla, la rop ning, bel lar kibas a matanitu ane God.

<sup>11</sup> Dingla na tarai o mulo, nating mulo sira tol a toltolla ne. Ika, ana risan a Leklek e Iesu Karisito, pa ana Inguna e God anunla, e God ka gos pas mulo kusun anumulo na toltol laulau, sur mulo anuna taraila, pa ka atong mulo mang mulo na tena tostos.

*Dalar aleklek pas e God ana palaondala*

<sup>12</sup> Sakana tik ir atongi larne, "A ututnala rop i wakak ka sur ar toli." Ika bel a ututnala rop ir nangani. "A ututnala rop i wakak ka sur ar toli," ika bel ar noren pas ta utna sur ar hanot anuna tena titol oros. <sup>13</sup> Sakana tik ir atongi otleng larne, "A utna na hangan



sur a balandala, pa a balandala sur a utna na hangan.” Ika e God ir kamar sen diau rop. A palaondala bel sur dir tol a pamuk a toltolla. A palaondala sur a Leklek ot, pa a Leklek sur a palaondala. <sup>14</sup> Ana rakrakai e God ot, i akamtur ulak pas a Leklek kusun a minat, pa dala otleng ir akamtur ulak pas dala. <sup>15</sup> Mangasa, bel mulo tasmani mang na palaomulo la na didiah palaona e Karisito ot? Mangasa, ar apatap pas al didiah palaona e Karisito taum ana pamuk a hane sur diar takai ka? Bel, bel ir arlar! <sup>16</sup> Mangmangasa, bel mulo tasmani mang esining i apatapi taum ana pamuk a hane, diau takai kama ana palaondiau? I talapor anasa a Buk Tabu i atongi larne, “Naur diar hanot takai kama ana palaondiau.” *Stat 2:24*

<sup>17</sup> Ika, esining i apatapi taum ana Leklek, diau takai ka ana ingundiau.

<sup>18</sup> Mulor han masik kusun a pamuk a toltolla. A toltol laulaula masik ning tik i toli, bel la kes ting na palaona. Ika, ning tik ir tol a pamuk a toltolla, i tol a laulauna ana palaona ot. <sup>19</sup> Mangasa, bel mulo tasmani mang a palaomulo a rumai anuna Talngan Tabu? A Talngan Tabu ning i kes o mulo, e God ka tabar tar mulo onoi. Mulo ot belsur anumuloi, <sup>20</sup> anasa e God ka lou pas mulo ana arlou ning a matana i abit kol. I maining mulor aleklek pas e God ana palaomulo.

## 7

*A asasaerla ana keskes a taulai*

<sup>1</sup> Onone ar keles a ututnala ning mulo tumtumus suri tetek iau: Ir wakak tetek a barsan ning bel i taulai. <sup>2</sup> Ika, kamna ana pamuk a toltolla kaning, i wakak sur taktakai barsan ir taulai nuna hane ot, pa taktakai hane otleng ir taulai nuna barsan ot. <sup>3</sup> Gong a barsan i mangan alar a palaona

kusun anuna hane, pa larotleng ning, gong a hane i mangan alar a palaona kusun anuna barsan. <sup>4</sup> A hane ning i taulai, bel i warkurairai sur a palaona. Anuna barsan i warkurai suri. Pa lar otleng ning, a barsan ning i taulai, bel i warkurai sur a palaona. Anuna hane i warkurai suri. <sup>5</sup> Gong dia mangan alar a palaondiau kusun diau artalai. Ika, i wakak ka ning dia rop diar malmaling sur diar mangan alar kaba a palaondiau kusun diau artalai, sur diar nunung. Ika, lamur diar noren ulak a palaondiau tetek diau artalai, sur gong e Satan i alam tar diau, pa diar punga, anasa bel dia warkurai tostos a nundiau a lalaun. <sup>6</sup> A atong a warwara ne tetek mulo sur ir nangan mulo, bel sur ir arlar ana warkurai tetek mulo. <sup>7</sup> A mang sur a taraila rop lar arlar hok ning bel a taulai. Ika e God i saran tar na artabar tetek a taraila rop taktakai. Takai i kibas ning a artabar, pa takai otleng i kibas ning a artabar masik.

<sup>8</sup> Pa a atongi tanla ning bel la taulai pa tetek na lao mang, i wakak sur lar kes ot larning, arlar hok. <sup>9</sup> Ika ning bel la tolsot pasi sur lar warkurai tostos a nuknuk na palaona, i wakak ka sur lar taulai. Anasa i wakak sur lar taulai, sur gong a nuknuk na palaona i akamtur a balanla.

<sup>10</sup> A saran a warkurai ne tetek la otleng ning la taulai. Pa belsur iau, a Leklek ot i sarani. Gong ta hane i han kusun anuna barsan. <sup>11</sup> Ika, ning ir han kusuni, gong i taulai ulak. Pa ning i mang sur ir taulai ulak, ir ulak tetek anuna barsan pa diar atostos anundiau a keskes a taulai. Pa gong otleng ta barsan i lu sen anuna hane.

<sup>12</sup> A atongi tetek dingla na tarai otleng. Bel a Leklek i atongi, iau ot a atongi larne: Ning ta tasindala ana tortorot, anuna hane bel a tena tortorot, pa a hane ning i

mang sur diar kes taum, gong a tasindala i lu seni. <sup>13</sup> Ning ta hane, a tena tortorot, pa anuna barsan bel a tena tortorot, pa a barsan ning i mang sur diar kes taum, gong a hane i han kusuni. <sup>14</sup> Anasa a barsan ning bel a tena tortorot, i ane God, anasa ana nuna hane ning i tortorot. Pa a hane ning bel a tena tortorot, i ane God, anasa ana nuna barsan ning i tortorot\* Ning bel, na natnatumulo lar dur. Ika, la ka totoh, la a tarai ane God.

<sup>15</sup> Ika, ning naur a suana ning ta halindiau ning bel i tortorot i mang suur han kusun ning a halindiau, noren seni ir han. Ning ir han, anuna barsan o anuna hane, ning i tena tortorot, ir langolango kusun anundiau a keskes a taulai. Anasa e God ka kabah pas dala sur dalar kes na molmol. <sup>16</sup> U a hane, bel u tasmani ning ur nangan anuma barsan sur ir tena tortorot o bel. Pa u otleng a barsan, bel u tasmani ning ur nangan anuma hane sur ir tena tortorot o bel.

*Dalar laun arlar ana ngas a keskes kane tandala*

<sup>17</sup> Taktakai ir laun ot arlar ana lalaun ning a Leklek i saran tari tana, pa arlar ana ngas a keskes kaning tana, ning e God i kabah pasi. A saran a warkurai ne tetek a tarai a lotu ting na hananuala rop. <sup>18</sup> Ning e God ka kabah pas tik ning di ka kot talilis tar a palaona, dir noreni ot larning. Pa ning e God ka kabah pas tik ning bel di kot talilis a palaona, gong ma di kot talilisi. <sup>19</sup> A toltol ning di kot talilis a palaona tik, o bel di kot talilis a palaona, i a utna oros ka. Ika a toltol ning tik i mur a warkuraila ane God, i ning, i itna kol. <sup>20</sup> Taktakai ir laun ot arlar ana ngas a keskes ning kaning tana, ning e God i kabah pasi. <sup>21</sup> Ning u a tena titol oros

ning e God ka kabah pas u, gong u nuknuk sur anuma keskes na tena titol oros. Ika, ning ta ngas sur ur langolango onoi, i wakak sur ur muri. <sup>22</sup> Anasa esaning a tena titol oros ning a Leklek ka kabah pasi, i a langolango a barsan anuna Leklek. Larotleng ning, esaning a langolango na barsan ning a Leklek ka kabah pasi, i a tena titol oros ma ane Karisito. <sup>23</sup> E God ka lou pas mulo ana arlou ning a matana i abit kol. Gong mulo saran tar mulo sur mulo na tena titol oros anuna taraila. <sup>24</sup> Na tastasik, ana numulo a lalaun taum o e God, i wakak ning mulo taktakai mulor laun ot arlar ana ngas a keskes kaning ta mulo ning e God ka kabah pas mulo.

*A asasaerla tetek la ning bel la taulai*

<sup>25</sup> Bel a kibas ta warkurai tana Leklek onla ning bel la taulai. Ika ar atai mulo ana nuknukik. Iau a ngas a barsan ning a taraila la tortorot hok, anasa a Leklek i maris kol iau. <sup>26</sup> A nuki mang i wakak ning mulor laun ot arlar ana ngas a keskes kaning o mulo, anasa ana mamahat onone i hanot. <sup>27</sup> Mangasa, u ka taulai? Gong u lu sen anuma hane. Mangasa, bel u taulai? Gong u tai sur ta hane. <sup>28</sup> Ika, ning ur taulai, bel u tol a toltol laulau. Pa ning ta basbas ir taulai, bel i tol a toltol laulau. Ika, la ning la taulai lar kilang a galis a mamahat ting na nunla a lalaun, pa bel a mang sur mulor pastetek a mamahatla ne.

<sup>29</sup> Na tastasik, a atongi larne, a pukakiar ka milau. Turpasi onone, na barsan ning la taulai, lar laun larning bel la taulai. <sup>30</sup> Pa la ning la tangis, lar laun larning bel la tangis. Pa la ning la gas, lar laun larning bel la gas. Pa la ning la lolou, lar laun larning bel

\* **7:14:** La ning bel la tortorot, bel la kibas a lalaun tikin. Ning la ot lar lingir a nuknukinla, lar kibas a lalaun tikin.

al ututna anunla. <sup>31</sup> Pa la ning la titol ana ututnala ning kane lapiu, lar laun larning bel la nuknuk kol sur na ututnala ning. Anasa a rakrakan hanua ne dala laun onoi, ka rorom amon.

<sup>32</sup> A mang sur mulor langolango kusun a toltol na nuknuk kol. A barsan ning bel i taulai, i molot ana titol anuna Leklek sur ir agasgas a Leklek. <sup>33</sup> Ika a barsan ning ka taulai, i molot ana titol mite na rakrakan hanua, sur ir agasgas anuna hane. <sup>34</sup> A nuknukna bel i takai ka, anasa i mang sur ir agasgas anuna hane pa a Leklek otleng. A hane ning bel i taulai o a basbas, i molot ana titol anuna Leklek. A nuknukna sur ir saran rop tar a palaona pa a inguna tetek a Leklek. Ika, a hane ning ka taulai, i molot ana titol mite na rakrakan hanua, sur ir agasgas anuna barsan. <sup>35</sup> A atong a warwarala ne sur ir awakak anumulo a keskes, bel a sairas mulo. A mang sur mulor mur a tostos a toltol, pa mulor saran rop tar anumulo a lalaun tetek a Leklek, pa gong a nuknukimulo i han masik.

<sup>36</sup> Ning ta barsan i nuki mang bel i tostos anuna toltol tetek a hane ning di ka suah alar tari teteki, pa ning a raula anuna hane ka han kas, pa a barsan ning ka mang sur diar taulai, i wakak sur ir taulai i ka. Bel i tol a toltol laulau. Diar taulai ka. <sup>37</sup> Ika, ning ta barsan ir tur rakrakai ana nuknukna sur gong i taulai, pa bel ta utna i angongos tari sur ir taulai, pa i ot i tai alar a nuknukna, i otleng i tol a tostos a toltol. <sup>38</sup> I maining a barsan ning i taulai i tol a tostos a toltol, ika esaning bel i taulai, i tol a wakak a toltol kol tandiau.

<sup>39</sup> A hane ning ka taulai, a warkurai i kes onoi ning i dot taum diau mana nuna barsan, ning anuna barsan kaning i laun. Ika, ning anuna barsan ir mat, a hane ning ir langolango sur ir taulai ulak on tik ning i mang suri,

ika ir taulai ot on tik ning i tortorot ana Leklek. <sup>40</sup> Ika a hane ning, ir gas kol ning ir kes ka larning, pa bel ir taulai ulak. Ine a nuknukik, pa a nuki mang iau otleng a Inguna e God i kes hok.

## 8

*A ututnala na hangan ning di ka artabar tar onoi tetek a asasongo na godla*

<sup>1</sup> Ar atai mulo ana ututnala na hangan ning di ka artabar tar onoi tetek a asasongo na godla.

Dala tasmani mang, dala rop dala ka tastasmai. A tastasim i sira tol otnan a toltol sur tik ir aitna pasi, ika a marmaris i sira tol otnan a toltol sur tik ir arakrakai a taraila. <sup>2</sup> Ning tik i nuki mang ka tastasmai kol on ta utna, anuna tastasim belot i sot. <sup>3</sup> Ika, ning tik i mang sur e God, e God ka tasman a barsan ning.

<sup>4</sup> Ar atai mulo ana ngasna ning a taraila la sira toli ning la ien a ututnala, ning di ka artabar tar onoi tetek na asasongo na god. Dala tasmani mang a manar ning di koti a utna oros ka mite na rakrakan hanua, belsur a lalauna. Dala tasmani mang takai a God ka, pa bel tik ulak. <sup>5</sup> I momol a galis a ututnala saot na langit pa te na rakrakan hanua, di atong la a godla, pa leklekla. <sup>6</sup> Ika, dala tasmani mang takai ka a God, a Tamandala, ning a kama ututnala rop, esaning dala laun suri. Pa dala tasmani mang takai ka a Leklek, i e Iesu Karisito, ning i akes a ututnala rop, pa i saran tar a lalaun tetek dala.

<sup>7</sup> Ika, bel a taraila rop la tasman a utna ne. Dingla na tena tortorotla, laningo ning belot la tortorot, la sira mur a ngasna ning la artabar tetek a asasongo na godla. Pa tuk onone, ning la ien a utna ning tik ka artabar tar onoi tetek a asasongo na godla,

la nuki mang la ot la lotu tetek a asasongo na godla. La kilangi mang a nuknukinla i tiu la mang la tol a toltol laulau. <sup>8</sup> Ika, a utna na hangan bel i nangan dala sur dalar tostos namatana e God. Ning bel dala hangan, bel dalar laulau namatana e God, pa ning dalar hangan otleng, bel ir nangan dala sur dalar wakak namatana e God.

<sup>9</sup> Mulo langolango sur mulor ien a utna ning tik ka artabar tar onoi tetek a asasongo na godla. Ika mulor tumarang mulo, sur gong anumulo a toltol ning ir apungan tar la ning anunla a tortorot bel i rakrakai. <sup>10</sup> U ka tastasmai sur ur hangan ting na rumai a lotu anuna manar ning di koti, pa a nuknukim bel ir tiu u onoi. Ika ning ur hangan tingia, pa esaning anuna tortorot bel i rakrakai ir oroi u, ur ben tari, sur i otleng, ir ien a utna ning di ka artabar tar onoi tetek a asasongo na godla, pa ir kilangi mang, a nuknukna i tiwi mang, i tol a laulauna. <sup>11</sup> Anum a tastasmai ir alaulau a barsan ning anuna tortorot bel i rakrakai. A barsan ning, a tasindala ning e Karisito i mat suri. <sup>12</sup> Ning mulo tol a toltol laulau larning tetek al tastasindala, sur lar tol a utna ning a nuknukinla ir tiu la onoi, mulo tol a laulauna tetek e Karisito. <sup>13</sup> I maining, ning a utna a ieni, ir apungan a tasiklik ana toltol laulau, bel ar ien ulak ma ta diah inagoi, sur gong ar apungan a tasiklik ana toltol laulau.

## 9

### *I tostos sur dir lou na aposel*

<sup>1</sup> Ia ka langolango. Iau a aposel. A oroi tar ot e Iesu anundala a Leklek. Anumulo a lalaun taum ana Leklek, i a wana tagun anuka titol. <sup>2</sup> Sakana dingla na tarai la nuki mang belsur iau a aposel, ika tetek mulo, i momol mang iau a aposel. Anasa anumulo a lalaun

taum ana Leklek i amomoli mang iau a aposel.

<sup>3</sup> Ning a taraila la tiu iau ana nuk a titol, a keles la larne: <sup>4</sup> Ning mila titol arpotor tamulo i tostos ot sur mulor tabar mila sur milar hangan pa milar gang. <sup>5</sup> Na aposel, pa na tastas a Leklek, pa e Pita la sira ben taltal anunla na hane ning la tortorot. I tostos ot sur mila otleng milar toli larning. <sup>6</sup> Bel i tostos sur mia ma e Barnabas ka, miar titol ana kumiau sur a mani ning miar laun onoi.

<sup>7</sup> Esi na tena harum ning i ot ir lou pas a ututnala ning i kapan suri? Esining ir oman a barim a wain pa bel ir ien pas al wana ono? Esi ning ir tai alar a sipsipla pa bel ir gang pas al polo na sus tanla? <sup>8</sup> A warwara ne a atongi, bel ana nuknuk a taraila. Na Warkurai ane Moses otleng i atongi. <sup>9</sup> Di ka tumus tari ana Warkuraila ane Moses larne, "Gong u dot alar a pahan a karabau ning i pas gingini a wit, i otleng ir hangan ot." *Lo 25:4*

Mangasa, e God i nuknuk ka sur na karabau? Bel. <sup>10</sup> E God i atongi larne sur dala. I momol ot, a warwara ne di ka tumus tari sur dala ot, anasa i tostos mang esining i omomai, pa esining i lakran sarara a palpala wit kusun a wit momol, diar harnanai ana tortorot sur al wana. <sup>11</sup> Mila ka oman tar a warwara na ingun arpotor tamulo. I tostos sur mulor tabar mila on al utna sur milar laun onoi. <sup>12</sup> I tostos sur a tarai masuk lar kibas pas a harnangai ne tamulo, pa i tostos kol sur mila otleng milar kibasi tamulo.

Ika bel mila angongos pas mulo sur anumulo ta harnangai. Mila kilang a galis a mamahat, ika bel mila nunung mulo sur ta harnangai, sur gong mila sairas a Wakak a Warwara ane Karisito. <sup>13</sup> Mulo tasmani mang la ning la titol ting na rumai a artabar, la hangan miting na rumai a artabar. Pa la

otleng ning la tuntun na artabar ting na logo na tuntun artabar; la hangan ot miting na utna ning la tuni. <sup>14</sup> Lar otleng ning a Leklek ka warkurai tari mang, la ning la warawai ana Wakak a Warwara, lar kibas a arlou miting na Wakak a Warwara sur lar laun onoi.

*E Pol bel i mang sur ta arlou ana nuna titol a warawai*

<sup>15</sup> Ika, iau ot bel a kibas pas ta utna mite na ututnala ne, pa bel a tumtumus sur ar kibas ta utna ta mulo. A gas kol ning a warawai tetek mulo pa bel a kibas ta arlou onoi. A minat i utna oros ka tetek iau, ika anuka gasgas ne i itna kol tetek iau, pa bel a mang sur tik ir kepseni kusun iau. <sup>16</sup> Ning a warawai ana Wakak a Warwara, bel a iaunan iau onoi. Anasa e God ka saran tar a titol na warawai tak, pa bel ar tolsot pas sur ar manah onoi. Pa ir laulau kol tetek iau ning bel ar warawai ana Wakak a Warwara. <sup>17</sup> Ning iau ot a mang sur ar warawai, ar kibas ot anuk ta arlou. Ika, ning bel ta nuknukik suri, ar tol ka a titol ning e God ka saran tari tak. <sup>18</sup> Asa ning anuka arlou? Anuk a arlou i larne: Ar gas sur ar warawai ana Wakak a Warwara, pa bel tik ir lou iau. A toli larne sur gong a nunung mulo sur anumulo ta harnangai ning i tostos sur mulor sarani tetek iau.

*E Pol i rakrakai sur ir ben pas a taraila rop tetek e Karisito*

<sup>19</sup> I momol ia ka langolango kusun a taraila rop. Ika a saran tar iau ka sur ar tena titol oros tetek a taraila rop, sur ar ben al galis a tarai tetek e Karisito. <sup>20</sup> Ning a kes taum ana tarai Juda, a mur ot a ngas a lalaun anunla, sur ar ben pas la tetek e Karisito. Bel a kes nahai a warkuraila ane Moses. Ika, ning a kes taum ana tarai ning la kes nahai a warkuraila ane Moses, a saran tar iau sur ar kes nahai a warkuraila ning, sur ar ben pas la tetek e Karisito. <sup>21</sup> Ning a kes taum

ana tarai ning bel la kes nahai a warkuraila ane Moses, iau otleng bel a kes nahai a warkuraila ning, sur ar ben pas la tetek e Karisito. Ika, bel a gilam ris ana Warkurai ane God. A kes nahai a Warkurai ane Karisito. <sup>22</sup> Ning a kes taum ana taraila ning bel la rakrakai, iau otleng bel a rakrakai, sur ar ben pas la tetek e Karisito. A laun arlar ana urmatana taraila rop, pa a mur a urmatana ngas rop sur ar alaun dingla na tarai. <sup>23</sup> A ututnala ne a toli sur a Wakak a Warwara ir gomo, sur ir angis iau taum onla.

*A dududun sur a arlou*

<sup>24</sup> Mangasa, bel mulo tasmani mang, la rop ning la arsoksok ana dududun la dun, ika takai ka onla ir kibas a arlou? Mulor rakrakai ana dududun sur mulor kibas a arlou. <sup>25</sup> A taraila rop ning la mon ana monla, la alasan rakrakai a palaonla. La toli sur lar kibas pas a arlou ning ir rarop ka. Ika dala, dala alasan dala sur dalar kibas pas a arlou ning ir kes tikin. <sup>26</sup> I maining, bel a dun taltal, a dun tostos sur a araropna. Bel a tumtubul arlar ana barsan ning i tubul ka a solsol. <sup>27</sup> A tumtubul a palaok sur ir tena titol oros anuki. A toli larne, sakana ia ka warawai tar ana Wakak a Warwara tetek a tarai masik, ika iau ot, e God ir puain sen iau ka, pa bel ar kibas ta arlou.

## 10

*A toltol anuna tarai Israel i atumarang dala*

<sup>1</sup> Na tastasik, a mang sur mulor nuk pas na tumtubundala, ning la han mitumo e Ijip. La rop la han nahai a diah bakut, pa la rop la kotop a Kubar a Tasi. <sup>2</sup> I arlar larning di baptais la ana diah bakut pa a tasi, pa i apuasa i mang la na tarai ane Moses. <sup>3</sup> La rop la ien takai a utna ka ning a Inguna e God i sarani, <sup>4</sup> pa la gang ana takai a malum ka ning a Inguna e God

i sarani, anasa la gang ana hat a Ingun, ning i han taum onla. Pa a hat ning, e Karisito. <sup>5</sup> Ika a galis kol onla, e God bel i gas onla. La mat amon pa na minatinla la borbor ororos ka ting na hanua bel.

<sup>6</sup> Pa a ututnala ne i hanot sur ir atumarang dala, sur gong a balandala i mang sur a laulauna, arlar ana balanla i mang suri. <sup>7</sup> Gong mulo lotu tetek a asasongo na godla arlar ana dingla na tarai onla. Larning di ka tumus tari ting na Buk Tabu larne,

“A taraila la kes sur lar hangan pa lar gang,

pa la tur ulak sur lar mon oros kama ana palaonla.” *Kisim Bek 32:6*

<sup>8</sup> Gong dala tol na toltol a pamuk, arlar ana dingla na tarai onla la toli. Pa ana takai a pukakiar ka, naur a bonot pa natol a rip a tarai onla, la mat. <sup>9</sup> Gong dala lar a Leklek, arlar ana dingla na tarai onla la toli, pa na soi la harat amat la. <sup>10</sup> Gong mulo ururai, arlar ana dingla na tarai onla la toli, pa a angelo ning i sira um kol a taraila, i um kol arop sen la.

<sup>11</sup> A ututnala ning, i hanot onla, sur ir atumarang dala. Pa di ka tumus tari sur a asaer tetek dala, ning dala laun ana ararop a pukakiarla. <sup>12</sup> Ning tik i nuki mang i tur rakrakai, ir tumarang, sakana ir punga tar ana toltol laulau. <sup>13</sup> Na arlam ning mulo ka pastek tari, bel mulo ka mulo pasteki, a galis a tarai otleng la pasteki. E God i sira tolsot pas anuna warwara, pa bel ir noren sen mulo sur ta arlam ir hanot tetek mulo, ning ir itna tana rakrakaimulo. Ning ta arlam ir hanot, e God ot ir sang pas ta ngas, sur mulor han masak kusuni pa mulor tolsot pasi.

*Gong dala lotu tetek a Leklek pa motla otleng*

<sup>14</sup> I maining na halalik, gong mulo lotu tetek a asasongo na

godla, mulor liu kusun la. <sup>15</sup> A warwara tetek mulo ning mulo ka tastaman. Pa mulo ot mulor warkurai wakak anuka warwara ne. <sup>16</sup> Ning dala gang ana kap ning di ka atong wakak tar onoi tetek e God, dala takai taum o e Karisito, ana sulukna. Pa ning dala hangan ana bret ning dala tibiki, dala takai taum o e Karisito, ana palaona. <sup>17</sup> Takai a bret. Dala galis, ika, dala takai palaondala, anasa dala hangan ana takai ka a bret.

<sup>18</sup> Dalar oroi a tarai Israel. Ning la ien a inagoi ning di ka artabar tar onoi tetek e God ting na logo na tuntun artabar, la takai ka taum o e God. <sup>19</sup> Asa a kamkama nuk a warwara? A utna ning di artabar tar onoi tetek a manar ning di koti, bel i to pas ta utna, pa a manar ning di artabar teteki, i otleng bel i to pas ta utna. <sup>20</sup> A atongi tamulo mang a ututnala ning a taraila ning bel la tortorot la artabar onoi, la artabar onoi tetek a motla, pa bel tetek e God. Pa bel a mang sur mulor lasan taum ana motla. <sup>21</sup> Bel mulor tolsot pasi sur mulor gang ana kap anuna Leklek, pa ana kap otleng anuna motla. Pa bel mulor tolsot pasi sur mulor hangan ting na logo na hangan anuna Leklek, pa ting na logo na hangan otleng anuna motla. <sup>22</sup> Mangasa, dala mang sur dalar angangas a Leklek, sur a nuknukna ir laulau tetek dala? Mangasa, a rakrakaindala i itna tana rakrakaina?

*Dalar aitna pas e God ana ututnala rop ning dala toli*

<sup>23</sup> Sakana tik ir atongi mang, “A ututnala rop i wakak ka sur dalar toli,” ika, bel a ututnala rop ir nangan dala. “A ututnala rop i wakak ka sur dalar toli,” ika, bel a ututnala rop ir arakrakai dala. <sup>24</sup> Gong tik i awakak pasi ot, ir awakak pas a tarai masak.

<sup>25</sup> A inagoila rop ning di siuran la ting na rumai a sisiuran, mulor ieni ka. Pa gong mulo kabah ning di ka artabar tar onoi tetek a manar ning di koti o bel, sur gong a nuknukimulo ir tiu mulo mang mulo tol a laulauna. <sup>26</sup> Anasa a Buk Tabu i atongi larne, "A rakrakan hanua pa a ututnala rop ning la kes ia, anuna Leklek." *Buk Song 24:1*

<sup>27</sup> Ning tik ning bel i tortorot i nunung mulo, sur mulor hangan taum onoi, pa mulo mang sur mulor han, i wakak ka. Pa a ututnala rop ning di tabar mulo onoi, mulor ieni ka, pa gong mulo kabah onoi, sur gong a nuknukimulo ir tiu mulo. <sup>28</sup> Ika, ning tik ir atongi tamulo mang, "A utna ne di ka artabar tar onoi tetek a asasongo na godla," gong mulo ieni, sur gong mulo alaulau a nuknukna esaning i atai mulo onoi. <sup>29</sup> Bel a warwara ana nuknukimulo. A warwara o esaning i atai mulo pa i nuki mang mulo tol a laulauna.

Ia ka langolango. Sur asa ning a nuknukin tik ir warkurai iau? <sup>30</sup> Ning a atong wakak pas tetek e God ana ngak a utna na hangan, sur asa ning tik ir tiu iau ana utna ning ia ka atong wakak pas onoi? <sup>31</sup> I maining, ning mulo hangan, o mulo gang, o ta ngas a utna otleng mulo toli, mulor toli sur mulor aitna pas e God onoi. <sup>32</sup> Gong mulo tol ta utna ning ir apungan tik anasa ir tol a toltol ning a nuknukna ir tiwi onoi. Tik miting na tarai Juda, o miting na tarai ning bel a tarai Juda, o miting na tarai a lotu ane God. <sup>33</sup> A mang sur ar agasgas a tarai rop ana ututnala rop ning a sira toli. Bel a tol ta utna sur ir awakak iau. A tol a ututnala sur ir awakak al galis a tarai, sur e God ir alaun pas la.

## 11

<sup>1</sup> Mulor mur a magirak, ar-

lar larning a mur a magirana e Karisito.

*A toltol ning dir muri ning dir nunung pa dir warwara na propet*

<sup>2</sup> A atong aitna pas mulo, anasa mulo sira nuk pas iau ana ututnala rop, pa mulo mur na asaer ning ia ka asaer tar mulo onoi. <sup>3</sup> Ika, a mang sur mulor tasmani mang, e Karisito a pukul na barsan rop, pa a barsan a pukul a hane, pa e God a pukul e Karisito. <sup>4</sup> Ning ta barsan ir nunung o ir warwara na propet, pa ka pol alar pas a pukulna, i ame a pukulna. <sup>5</sup> Ning ta hane ir nunung o ir warwara na propet, pa bel i pol alar a pukulna, i ame a pukulna. I arlar larning di ka kas rop sen a hih a pukulna. <sup>6</sup> Ning ta hane bel i pol alar a pukulna, i wakak ning dir kumur sen a hih a pukulna. Ika, ir meme, ning dir kumur seni o dir kas rop seni, i maining i wakak ning ir pol alar a pukulna. <sup>7</sup> Bel i tostos ning ta barsan ir pol alar a pukulna, anasa i a manar e God pa i asangan a matatar e God. Ika a hane i asangan a matatar a barsan. <sup>8</sup> Anasa e God bel i tol a barsan miting na hane, i tol a hane miting na barsan. <sup>9</sup> Pa e God bel i tol a barsan sur a hane, i tol a hane sur a barsan. <sup>10</sup> Ine a kamkamna ning a hane ir pol alar a pukulna, sur ir asangani tetek a tarai pa tetek na angelo otleng mang i kes nahai anuna barsan.

<sup>11</sup> Ika, i momol, bel di akes masak a hane kusun a barsan, o a barsan kusun a hane. Diar nangan artalai diau, ana nundiau a keskes a lalaun tetek a Leklek. <sup>12</sup> Anasa a hane i hanot miting na barsan, pa lar otleng ning a hane i agon a barsan. Ika e God ot a kama ututnala rop. <sup>13</sup> Mulo ot mulor nuknuk ana warwarala ne: Mangasa, i tostos sur a hane ir nunung tetek e God, ning bel i pol alar a pukulna? Bel i tostos. <sup>14</sup> A

toltol anuna tarai ot, i asangan dala mang, ta barsan ning a hih a pukulna i barah, i a utna na meme teteki. <sup>15</sup> Ika, ta hane ning a hih a pukulna i barah, i anuna matatar. Anasa e God i saran tar a barbarah a hih a pukulna teteki, sur ir pol alar a pukulna onoi. <sup>16</sup> Ning tik ir ururai ana warwara ne, ar atongi larne: Bel mila mur ta toltol masik, pa a tarai rop otleng ane God ting na hananuala, bel la mur ta toltol masik.

*A toltol a hangan ana Leklek*

<sup>17</sup> Ana toltolla ning onone ar atai mulo onoi, bel ar atong aitna pas mulo. Anasa, ning mulo sira kes taum ana lotu, bel mulo awakak mulo, mulo alaulau mulo ka. <sup>18</sup> A ningnigo na utna: Ia ka longor tari mang, ning mulo sira han taum sur a lotu, mulo sira tapagal sarara ka, pa a nuki ot mang i momol siklik. <sup>19</sup> Anasa a tarai a lotu lar taptapagal ot, sur dir oroi lalan la ning la tostos, pa la otleng ning la rongo. <sup>20</sup> Ning mulo han taum, mulo nuki mang mulo ien a utna na hangan ana Leklek, ika bel. <sup>21</sup> Anasa, ning mulo hangan, taktakai o mulo i nuk pasi ot sur ir hangan nigo, pa bel ir kes pas dingla na tarai otleng. I maining dingla na tarai la murak pa dingla la sipak. <sup>22</sup> Mangasa, bel al rumai anumulo sur mulor hangan pa mulor gang ia? Mangasa, mulo oroi purpurum a tarai a lotu ane God, pa mulo ame la ning la kapan? Asa ning ar atongi tetek mulo? Mangasa, ar atong aitna pas mulo ana toltol ne? Bel!

<sup>23</sup> Anasa a asaer ne a kibas pasi miting tana Leklek pa ka saran tari tetek mulo, i manglarne: Ana pukakiar ana morom ning di asobor tar a Leklek e Iesu, i kibas pas a bret. <sup>24</sup> Ning ka atong wakak pas onoi, i tibiki, pa i atongi larne, "Ine a palaok, a sarani sur mulo. Mulor toli larne, sur mulor sira

nuk pas iau." <sup>25</sup> Lar otleng ning, lamur ning ka hangan pas, i kibas pas a kap pa i atongi mang, "A kap ne, a tona kunubus mite na sulukik, ning i dat taum tar a tarai o e God. Mulor toli larne, sur mulor sira nuk pas iau ning mulo gangi." <sup>26</sup> Anasa, ana pukakiarla ning mulo ien a bret ne, pa mulo gang ana kap ne, mulo warwara talapor ot ana minat anuna Leklek, tuk ning ir ulak.

<sup>27</sup> I maining esining ir ien a bret anuna Leklek, pa ir gang ana nuna kap, pa bel i toli ana hanrawai, i tol a laulau ana palaon a Leklek pa a sulukna, pa dir warkurai i ono. <sup>28</sup> I wakak ning tik ir oroi nigon tar anuna lalaun, pa lamur ir ien a bret pa ir gang ana kap. <sup>29</sup> Ning tik i hangan pa i gang, pa bel i oroi lalan pas a palaona Leklek, ka hangan pas pa ka gang pas ana warkurai a arkeles. <sup>30</sup> Ine a kamkamna ning a galis a tarai na arpotor tamulo la sasam pa bel al rakrakainla, pa dingla otleng la ka mat. <sup>31</sup> Ngandek ning dala ot, dalar oroi nigon tar anundala a lalaun, e God bel ir saran a warkurai a arkeles tetek dala. <sup>32</sup> Ika, ning a Leklek i warkurai dala, i atostos dala, sur gong dala hirua ana warkurai a arkeles taum ana rakrakan hanua.

<sup>33</sup> I maining, na tastasik, ning mulo han taum sur mulor hangan, mulor kes harnanai sur mulo artalai. <sup>34</sup> Ning al tarai o mulo la murak, i wakak ning lar hangan nigo pas ot ting na nunla na rumai, sur gong a warkurai a arkeles ane God ir kibas mulo, ning mulo kes taum.

Ning ar hanot, ar saran ulak al warwara na atostos tetek mulo anal ututna otleng.

## 12

*A artabarla ana Talngan Tabu*



<sup>1</sup> Na tastasik, onone ar atai mulo ana artabarla anuna Talngan Tabu, anasa a mang sur mulor talapor ono. <sup>2</sup> Mulo tasmani mang, ning belot mulo tortorot, di ben rongon pas mulo ana urmatana ngas, tetek a asasongo na godla, ning bel la sira warwara, pa mulo lotu tetek la. <sup>3</sup> I maining ar atongi tamulo larne, bel tik ning a Inguna e God ir nigoni, ir atong lar pasi mang, "E Iesu ir hirua tikin." Pa bel tik ir atong lar pasi mang, "E Iesu a Leklek," ning a Talngan Tabu bel i nigoni.

<sup>4</sup> A urmatana ngas a artabarla, ika takai ka a Talngan Tabu, ning i tabar dala ono. <sup>5</sup> A urmatana ngas a titolla na harnangai, ika takai ka a Leklek, ning dala titol teteki. <sup>6</sup> A urmatana ngas a titolla, ika takai ka a God, ning i tol na titol ning, ting na lalaun anuna taraila rop.

<sup>7</sup> A titol ana Talngan Tabu i hanot puasa ting na lalaun anunla taktakai, sur lar nangan a taraila rop. <sup>8</sup> A Talngan Tabu i tabar takai ana tastasim sur ir warwara onoi, pa a Talngan Tabu ning, i tabar takai otleng ana wakak a nuknuk sur ir warwara onoi. <sup>9</sup> Pa a Talngan Tabu ning, i tabar takai otleng ana tortorot, pa a Talngan Tabu ning, i tabar takai otleng ana artabar sur ir alangolango a tinsamanla. <sup>10</sup> Pa i tabar takai otleng ana rakrakai sur ir tol a ututnala na kulkulan, pa takai otleng ana warwara na propet. Pa i tabar takai otleng ana tastasim sur ir tasman lalan a Talngan Tabu pa na ingun masik otleng, pa takai otleng ana tastasim sur ir warwara ana urmatana ngas a warwara, pa takai otleng ana tastasim sur ir pak a kama urmatana ngas a warwara. <sup>11</sup> Takai ka a Talngan Tabu ning i tol na titol rop ne. Pa i tabar taktakai onla, arlar ana nuknukna ot.

*Takai a palaondala ka, ika a*

*galis a didiah palaondala*

<sup>12</sup> A barsan i takai ka, ika a galis a didiah palaona. Na didiah palaona la galis, ika di apatap taum pas la sur takai a palaona. I mangotleng larning o e Karisito. <sup>13</sup> Anasa takai ka a Talngan Tabu i baptais dala rop, sur dala takai ka palaona e Karisito, dala a tarai ka palaona e Karisito, dala a tarai Juda, pa dala ning bel a tarai Juda, dala na tena titol oros pa dala ning bel dala tena titol oros. Pa e God i saran takai ka a Talngan Tabu tetek dala rop sur dalar gang ono.

<sup>14</sup> A palaon a barsan belsur takai ka diah palaona. A galis a didiah palaona ot. <sup>15</sup> Ning a hana ir atongi mang, "Bel iau a diah palaona, anasa bel iau a kuna," i momol mang, belsur a kuna, ika, a diah palaona ot ning. <sup>16</sup> Pa ning a talngana ir atongi mang, "Bel iau a diah palaona, anasa bel iau a matana," i momol mang, belsur a matana, ika a diah palaona ot. <sup>17</sup> Ning a kidol a palaona a matana rop ka, ir longor ma mangmangasa? Ning a kidol a palaona a talngana rop ka, ir isisong ma mangmangasa? <sup>18</sup> Ika e God ka suah taum tar a didiah palaondala rop taktakai, arlar ot ana nuknukna. <sup>19</sup> Ning a didiah palaondala rop la arlar ka, ir kidol ma mangmangasa? <sup>20</sup> Ika i mangot larning, a galis a didiah palaondala, ika takai a palaondala.

<sup>21</sup> A matana bel ir atong sot pasi tan a kuna larne, "Bel a kapan u!", pa pukulna otleng, bel ir atong sot pasi tan naur a hana mang, "Bel a kapan mu!" <sup>22</sup> Bel i manglarning! A didiah palaondala ning dala nuki mang bel la rakrakai, anunla a titol kaning ot. <sup>23</sup> Pa a didiah palaondala ning dala nuki mang bel la tatatai wakak, dala amermer wakak la. Pa a didiah palaondala ning dala meme onla, dala pipis alar la. <sup>24</sup> Pa didiah palaondala ning la tatatai wakak, bel la kanan

sur ta utna. Ika e God ka suah taum tar a didiah palaondala, pa a didiah palaondala ning dala nuki mang bel la wakak ka saran tar a matatar tetek la. <sup>25</sup> I toli larné sur gong a palaondala i tapagal sarara. A didiah palaondala lar nangan artalai la, pa a harnangai ning, ir arlar tetek la rop. <sup>26</sup> Ning ta diah palaondala i kankan, a didiah palaondala rop lar kilangi taum onoi. Ning di atong aйна pas ta diah palaondala, a didiah palaondala rop lar gas taum onoi.

<sup>27</sup> Mulo ot a palaona e Karisito, pa mulo rop taktakai a didiah palaona. <sup>28</sup> E God ka suah tar a taraila arpotor tan a tarai a lotu larné: a ningnigona ot na aposel, a munaurna na propet, a muna-tolna na tena asaer, pa la otleng ning la tol a ututnala na kulkulan, pa la ning la kibas a artabar sur lar alangolango pas a tinsamanla, pa la ning la nangan a taraila, pa la ning la sira nigon a taraila ana titolla, pa la ning la warwara ana urmatana ngas a warwara. <sup>29</sup> Mangasa, la rop na aposel ka? Bel. Mangasa, la rop na propet ka? Bel. Mangasa, la rop na tena asaer ka? Bel. Mangasa, la rop la tol a ututnala na kulkulan? Bel. <sup>30</sup> Mangasa, la rop la kibas a artabar sur lar alangolango pas a tinsamanla? Bel. Mangasa, la rop la warwara ana urmatana ngas a warwara? Bel. Mangasa, la rop la sira pak a kama urmatana ngas a warwara? Bel. <sup>31</sup> Ika, mulor mang kol sur na artabar ning i itna kol.

Onone ar asangan mulo ana ngas ning i wakak kol tanla rop.

### 13

#### *A marmaris*

<sup>1</sup> Ning ar warwara ana urmatana ngas a warwara anuna taraila pa anuna angelola otleng, ika ning bel ar lasan ana marmaris, a arlar ka ana garamut ning

i aregaia kol, o a kudu ning i tangtangis oros ka. <sup>2</sup> Ning ar tong akes a artabar sur ar warwara na propet, pa ning ar tasman a ututnala na pidik rop pa na tastasim rop, pa ning ar tong akes a tortorot sur ar akarai na mangir, ika ning bel a lasan ana marmaris, iau a utna oros ka. <sup>3</sup> Ning ar saran sen anuka ututnala rop tetek na kapan a tarai, par saran a palaok otleng sur dir tun iau, ika ning bel a lasan ana marmaris, bel ir nangan iau.

<sup>4</sup> Esining i lasan ana marmaris a palaona bel i sira ngoro kapit tetek tik, pa i sira tol a wakakna tetek a taraila. Bel i sira ram sur ta utna anuna tik, bel i sira iaunani, pa bel i sira aйна pasi. <sup>5</sup> Bel i laulau a ginina, bel i nuk pasi ot, bel i sira balakut kapit, bel i sira nuk akes a laulauna ning di toli teteki. <sup>6</sup> Bel i gas ana toltol ning bel i tostos, i gas ka ana momolna. <sup>7</sup> Esining i lasan ana marmaris i sira tai alar a taraila, i sira tortorot, pa i harnanai ana tortorot sur a ututnala rop ning e God ir toli, pa i sira tur rakrakai ning a mamahatla i hanot.

<sup>8</sup> A marmaris bel ir rop lar pas. Ika na warwara na propet lar rarop ka, a urmatana ngas a warwara lar rarop ka, pa a tastasim otleng ir rarop ka. <sup>9</sup> Anasa anundala a tastasim bel i kidol, pa anunla a warwara na propet otleng bel i kidol. <sup>10</sup> Ika lamur, ning a ututnala ning i kidol ir hanot, a ututnala ning bel i kidol ir rarop. <sup>11</sup> Ning a kaklik ot, a warwara arlar ana kaklik, a nuknuk arlar ana kaklik, pa a tastasim otleng arlar ana kaklik. Ning ia ka itna, a amanah sen a ginin a kaklik. <sup>12</sup> Onone anundala a tatatai o e God bel i talapor, i arlar larning dala oroi a manarindala ting na galas, ning i gawul ka. Ika lamur, dalar oroi e God ana matmatan-dala. Onone anuka tastasim bel i

kidol, ika lamur ar tastasim rop, arlar o e God i tasman rop iau.

<sup>13</sup> Natol a utna ne ditol kes tikin: a tortorot, a keskes harnanai ana tortorot sur asaning e God ir toli, pa a marmaris. Ika a marmaris i itna kol tan ditol rop.

## 14

*A warwara na propet i wakak tana warwara ana urmatana ngas a warwara*

<sup>1</sup> Mulor rakrakai ana marmaris. Mulor mang sur na artabar ana Talngan Tabu. Pa mulor mang kol sur mulor warwara na propet.

<sup>2</sup> Anasa tik ning ir warwara ana urmatana ngas a warwara, bel i warwara tetek a tarai, i warwara tetek e God. A tarai bel la tasman a kamkamna. I atong a ututnala na pidik ana rakrakai a Talngan Tabu. <sup>3</sup> Ika, tik ning i warwara na propet, i warwara tetek a taraila sur ir arakrakai la, ir nangan la pa ir amoro la. <sup>4</sup> Tik ning i warwara ana urmatana ngas a warwara i arakrakai pasi ot. Ika, tik ning i warwara na propet i arakrakai a tarai a lotu. <sup>5</sup> A mang sur mulo rop mulor warwara ana urmatana ngas a warwara, ika a mang kol sur mulor warwara na propet. Esaning i warwara na propet i wakak kol ta esaning i warwara ana urmatana ngas a warwara. Ika, ning tik ir papak ana kamkam a urmatana ngas a warwara sur ir arakrakai a tarai a lotu, i wakak larotleng ning a warwara na propet.

<sup>6</sup> Na tastasik, ning ar hanot tetek mulo par warwara ana urmatana ngas a warwara, ar nangan mangasa mulo? Ika, ning a mang sur ar nangan mulo, ar warwara tetek mulo ana warwara ning e God ka apuasa tari tak, o ar warwara ana tastasim, o ar warwara na propet, o ar saran tar a asaer tetek mulo.

<sup>7</sup> Lar otleng ning a ututnala ning bel la laun, arlar ana tulal pa a

gita. La sira tangis ot, ika ning a tinangis inla i han masak ka, dalar tasman mangasa a saksak ning?

<sup>8</sup> Pa ning a tawuru bel ir tangis talapor, esi na tena harum ir sang sur a harum? <sup>9</sup> Lar otleng ning tetek mulo. Ning bel mulo atong talapor na warwara, dir tasman mangasa a warwarala ning mulo atongi? Anumulo a warwarala ir han ka ana solsol. <sup>10</sup> I momol ot, a urmatana ngas a warwara kane na rakrakan hanua, ika bel ta warwara ning bel ta kamkamna. <sup>11</sup> Ning bel a tasman a kamkam a warwara ning tik i warwara ono tetek iau, a arlar ka ana wasira teteki, pa i otleng, i arlar ka ana wasira tetek iau. <sup>12</sup> Lar otleng ning tetek mulo. Mulo sira rakrakai sur na artabar anuna Talngan Tabu. I wakak sur mulor rakrakai sur na artabar ning ir arakrakai a tarai a lotu.

<sup>13</sup> Ning ir manglarning, i wakak sur esining i warwara ana urmatana ngas a warwara, ir nunung sur ir tolsot pasi sur ir pak a kamkama nuna warwara.

<sup>14</sup> Ning a nunung ana urmatana ngas a warwara, a inguk i nunung, ika a nuknukik bel i nuk ta utna.

<sup>15</sup> Asa ar toli? Ar nunung ana inguk, par nunung otleng ana nuknukik. Ar saksak ana inguk, par saksak otleng ana nuknukik.

<sup>16</sup> Ning u atong wakak tetek e God ana ingum ana urmatana ngas a warwara, tik ning bel i talapor ana kamkama num a warwara, ir atong "Amen" mangmangasa? Anasa bel i tasman asaning u atongi. <sup>17</sup> I momol, anuma nunung na atong wakak tetek e God i wakak, ika bel i arakrakai tik otleng.

<sup>18</sup> A atong wakak tetek e God, anasa a lasan kol ana warwara ana urmatana ngas a warwara ta mulo rop. <sup>19</sup> Ika ning a kes taum ana tarai ana lotu par atong ka ir dilima na puka warwara ning a

kamkamna ir talapor tetek la sur ar asaer la ono, i ning i wakak kol tara ning a bonot a rip a puka warwara ana warwara masik, ning bel lar longor lalani.

<sup>20</sup> Na tastasik, gong a nuknukimulo i arlar ana kakakla. Ana toltol laulau i wakak sur mulor arlar ana kakak mermeremla. Ika, ana nuknukimulo, mulor arlar ana tatatnanla. <sup>21</sup> A Leklek ka atong tari ting na Buk Tabu larne,

“Ar warwara tetek anuka taraila, ana elngen dingla na tarai masik, ning la warwara ana warwara masik, ika bel lar longor iau.” *Ais 28:11-12*

<sup>22</sup> A urmatana ngas a warwara, ine a akinalang tetek la ning bel la tortorot, bel tetek la ning na tena tortorot. Ika a warwara na propet, a warwara sur na tena tortorot, bel a warwara sur la ning bel la tortorot. <sup>23</sup> Ning mulo na tarai a lotu rop mulor kes taum, pa mulo rop mulor warwara ana urmatana ngas a warwara, pa al tarai ning bel la talapor ana utna ning, o al tarai ning bel la tortorot lar kas, lar atongi mang mulo longlong.

<sup>24</sup> Ika ning mulo rop mulo warwara na propet, pa tik ning bel a tena tortorot, o tik ning bel i talapor ana utna ning ir kas tetek mulo, anumulo na warwara rop ning i longori ir so a balana pa ir tiwi mang i a tena laulau. <sup>25</sup> Pa a ututnala ning i kes kumna ting na balana, ir hanot puasa. Pa ir kes ana bokona hana pa ir lotu tetek e God, pa ir warwara talapor mang, “I momol ot, e God i kes arpotor tamulo.”

*A wakak a tinan a lotu*

<sup>26</sup> Na tastasik, asa ar atongi? Ning mulo kes taum ana lotu, dingla na tarai lar saksak, dingla lar asaer a tarai, dingla lar warwara puasa on ta utna ning e

God ka asangan tari tanla, dingla lar warwara ana urmatana ngas a warwara, pa dingla otleng lar pak a kamkamna. A ututnala rop ne dir toli sur ir arakrakai a tarai a lotu. <sup>27</sup> Ning al tarai lar warwara ana urmatana ngas a warwara, ir naur o ir natol ka pa gong la galis. Tik kaba ir warwara, pa tik ir pak a kamkamna. Ditol rop ditol ir toli larning. <sup>28</sup> Ning bel tik kaning sur ir pak a kamkamna, i wakak sur esaning i warwara ana urmatana ngas a warwara, gong i warwara ana lotu. Ir warwara ka teteki ot pa e God.

<sup>29</sup> Ir naur o ir natol, ditol ir warwara na propet, pa a taraila lar nuknuk wakak ana nunditol a warwara ning i momol o bel. <sup>30</sup> Ning tik kaning i kes ana lotu i kibas ta warwara ta e God, esaning kaning i warwara ir manah. <sup>31</sup> Ning mulo rop mulo mang sur mulor warwara na propet, i wakak sur tik kaba ir warwara, pa lamur tik maleng, tuk mulo rop mulor warwara. Mulor toli larning, sur a taraila rop lar kibas a asasaer, pa ir wunan la. <sup>32</sup> A warwara na propet i kes nahai a warkurai anuna propet ot. <sup>33-34</sup> Anasa e God, a God na molmol, pa bel i mang sur a utna ning i lokloklor.

I wakak ning a gurara lar kes wowon ka ana lotu, arlar larning a tarai ane God la sira toli ting na hananuala rop. Bel di malmaling sur lar warwara. Lar anatarna pas la, arlar ana Warkurai anuna tarai Juda i atongi. <sup>35</sup> Ning la mang lar kabah on ta utna, i wakak sur lar kabah anunla na barsan ting na nunla na rumai. Anasa a utna na meme ning a hane ir warwara ana lotu.

<sup>36</sup> Mangasa, mulo a kama warwara ane God? Bel. Mangasa, i hanot ka tetek mulo? Bel. <sup>37</sup> Ning tik i nuki mang i ot a propet, o i nuki mang a Talngan Tabu

kaning i kes onoi, i wakak sur ir tasmani mang asaning a tumusi tetek mulo, i a warkurai ot anuna Leklek. <sup>38</sup> Ning tik bel i mur a warwara ne, e God bel ir oroi lalani.

<sup>39</sup> I maining, na tastasik, mulor mang kol sur mulor warwara na propet, pa gong mulo sairas tik ning i warwara ana urmatana ngas a warwara. <sup>40</sup> Ika mulor mur a tostos a tinan a lotu ana hanrawai.

## 15

*E Pol i warawai ana kamkamtur ulak ane Karisito*

<sup>1</sup> Na tastasik, a mang sur ar atai ulak mulo ana Wakak a Warwara, ning nating ia ka warawai tar ono tetek mulo, pa mulo ka kibas pasi, pa mulo ka tur rakrakai onoi. <sup>2</sup> Ning mulo tong akes a warwara ning ia ka warawai tar onoi tetek mulo, e God ir alaun pas mulo ana Wakak a Warwara ne. Ning bel, mulo tortorot oros ka.

<sup>3</sup> Anasa a warwara ning ia ka kibas pasi, ia ka saran tari tamulo pa i itna kol. I manglarne: E Karisito i mat sur anundala na toltol laulau, larning di ka tumus tari ting na Buk Tabu. <sup>4</sup> Di akas tari ting na kulam a minat, pa natol a pukakiar lamur e God i akamtur ulak pasi kusun a minat, larning di ka tumus tari ting na Buk Tabu. <sup>5</sup> Pa i hanot tetek e Pita, pa lamur tetek ning a bonot pa pisir naur a aposel. <sup>6</sup> Lamur i hanot tetek na tastasindala ana tortorot. A wawasinla i arlar ana dilima na mar pa i punta, ning la kes taum ana pukakiar ning. Pa galis kol on la, la kaning ot la laun, ika, dingla la ka mat. <sup>7</sup> Pa lamur i hanot tetek e Jems, pa lamur tetek na aposel rop.

<sup>8</sup> Pa lamur tanla, i hanot tetek iau otleng, ning a arlar ana kaklik ning e tana i agon kapit tari, ning anuna kalang belot i sot.

<sup>9</sup> Anasa iau, a natarna kol tana aposella rop, pa bel a wakak sur dir atong iau a aposel, anasa a sira alaulau a tarai a lotu ane God. <sup>10</sup> Ika, e God i saran tar a lalaun ne a laun onoi, anasa ana nuna marmaris. Pa bel i arop oros tari ka anuna marmaris hok. A titol rakrakai kol tanla rop. Ika, belsur iau ot a titol, a marmaris ane God, ning i kes taum hok, i ning i titol. <sup>11</sup> Ning a warawai, o na aposel otleng la warawai, mila rop mila warawai ana warwara ne o e Karisito, pa mulo ka tortorot ono.

*A kamkamtur ulak kusun a minat*

<sup>12</sup> Ning di warawai o e Karisito ning e God i akamtur ulak pasi kusun a minat, sur asa ning dingla na tarai kaning arpotor tamulo la atongi mang bel al kamkamtur ulak kusun a minat? <sup>13</sup> Ngandek ning bel ta kamkamtur ulak kusun a minat, e God bel ir akamtur ulak pasi otleng e Karisito kusun a minat. <sup>14</sup> Ngandek ning e God bel ir akamtur ulak pas e Karisito kusun a minat, anumila na warawai ir utna oros ka, pa anumulo a tortorot otleng ir utna oros ka. <sup>15</sup> Pa ngandek ning bel al kamkamtur ulak kusun a minat, dir oroi i mang mila asasongo o e God, anasa mila warwara talapor o e God mang i akamtur ulak pas e Karisito kusun a minat. Ika, ning bel al kamkamtur ulak kusun a minat, e God bel ir akamtur ulak pas e Karisito kusun a minat. <sup>16</sup> Ngandek ning e God bel ir akamtur ulak pas na minat, larka otleng ning bel ir akamtur ulak pas e Karisito kusun a minat. <sup>17</sup> Ngandek ning e God bel i akamtur ulak pas e Karisito kusun a minat, anumulo a tortorot i utna oros ka, pa kaning ot mulo kes ana numulo na toltol laulau. <sup>18</sup> Pa na tena tortorot otleng o e Karisito ning la ka mat, la mat tikin. <sup>19</sup> Ning dala harnanai ana tortorot o e

Karisito sur a ututnala ning ir toli ana lalaun ka te lapiu, dalar pot na marmaris kol tana tarai rop.

<sup>20</sup> Ika i momol, e God ka akamtur ulak e Karisito kusun a minat. I a ningnigo na barsan ning i kamtur ulak kusun a minat, pa i asangani mang lamur a minatla otleng lar kamtur ulak. <sup>21</sup> A minat i hanot anasa ana takai ka barsan, e Adam. Larka otleng ning a kamkamtur ulak kusun a minat i hanot anasa ana takai ka barsan, e Karisito. <sup>22</sup> Anasa a tarai rop o e Adam lar mat, larka otleng ning a tarai rop o e Karisito lar tong akes a lalaun. <sup>23</sup> Ika a tinan ana kamkamtur ulak i manglarne: E Karisito a ningnigo na barsan ning i kamtur ulak kusun a minat, pa lamur ning ir hanot ulak, la ning anuna, la otleng. <sup>24</sup> Lamur, a ararop a rakrakan hanua ir hanot, ning e Karisito ir kamar sen na laulau a ingun rop larne, la ning na ningnigo, la ning la tong akes a warkurai pa la ning la tong akes a rakrakai. Pa ir saran tar a matanitu tetek e God e Tamana. <sup>25</sup> Anasa e Karisito ir kes na king tuk ning ir tol sot pas anuna hiruala rop sur lar kes nahaina. <sup>26</sup> A ararop a hirua ning ir kamari, a minat. <sup>27</sup> Anasa di ka tumus tari ting na Buk Tabu larne, “E God ka sua tar a ututnala rop nahaina.” *Buk Song 8:6*

Ika, ning a Buk Tabu i atongi mang “a ututnala rop”, i talapor mang bel i warwara o e God, anasa e God bel i kes nahai e Karisito. E God ot ka suah tar a ututnala rop nahai e Karisito. <sup>28</sup> Ning a ututnala rop ka kes nahai e Karisito a Nat e God, e Karisito otleng ir suah tari ot nahai e God e Tamana, esaning i suah tar a ututnala rop nahai e Karisito. E Karisito ir toli larning sur e God ir ningnigo ana ututnala rop.

<sup>29</sup> Ngandek ning bel ta kamkamtur ulak kusun a minat, la ning di baptais la sur na minat, asaning

lar toli? Ngandek ning i momol mang na minat bel lar kamtur ulak kusun a minat, sur asa ning di baptais a taraila sur na minat? <sup>30</sup> Mila otleng, ning bel ta kamkamtur ulak kusun a minat, sur asa ning mila tol a titol ning mila barat a mamahatla ono, ting na pukakiarla rop? <sup>31</sup> Na tastaik, ana pukakiarla rop a barat a mamahatla pa a kilangi mang ia ka mat. A warwara ne i momol arlar larning anuka gasgas sur mulo i momol. A gas o mulo anasa dala kes taum o e Karisito Iesu anundala a Leklek. <sup>32</sup> Ngandek ning a harum taum ana rokoio na tarai te e Epeses sur ar tol sot pas a nuknukik ka, i nangan mangmangasa iau? Ning na minat bel lar kamtur ulak kusun a minat, dalar mur a warwara anunla ning la sira atongi larne,

“Dalar hangan pa dalar gang,  
anasa latu dalar mat.” *Ais 22:13*

<sup>33</sup> Gong di ben rongon mulo, anasa “A keskes taum ana laulau a tarai, ir alaulau a wakak a ginin tik.” <sup>34</sup> Mulor mata, mulor mur a tostos a toltol, pa mulor manah kusun na toltol laulau. Anasa dingla na tarai o mulo bel la tasmaan e God. A atongi larne sur mulor meme.

*E God ir lingir pas a palaondala*

<sup>35</sup> Sakana tik ir kabah mang, “Di akamtur ulak pas na minat mangmangasa? Esi na ngas a palaonla ning lar kamtur ulak ono?” <sup>36</sup> U a longlong! Ning u oman a pata rakai, ning bel ir mat pas, bel ir laun. <sup>37</sup> Pa ning u oman a pata wit o ta pata rakai masik otleng, bel ur oman a rakaina, ur oman ot a patna. <sup>38</sup> Ning ir gomo, ir hanot ot a ngas a rakai arlar ana nuknuk e God. Taktakai a ngas a pata rakai ir gomo ot a rakaina ot.

<sup>39</sup> A palaon a ututnala rop ning la laun, bel la arlar. A

taraila a palaonla ot, pa na inagoi a palaonla i maskana, pa a palaona manila i maskana, pa a palaona sisla otleng i maskana ot. <sup>40</sup> A ututnala saot na bakut, na palaonla ot, pa a ututnala mite lapiu, na palaonla otleng. A matatar ana ututnala saot na bakut i maskana ot, pa a matatar ana ututnala mite lapiu i maskana otleng. <sup>41</sup> A Kamis a matatarna ot, pa a kalang a matatarna i maskana ot, pa a matatar ana nangnangla i maskana ot, pa a matatar ana nangnangla taktakai i maskana otleng.

<sup>42</sup> I larka otleng ning ana kamkamtur ulak anuna minatla. A palaonla ning di por la onoi ir marase ka, ika ning ir kamtur ulak, bel ir marase ma. <sup>43</sup> A palaona minat ning di pori bel i tatatai wakak, ika ning ir kamtur ulak ir kamtur ana tnan matatar. Ning di pori bel i rakrakai, ika ning ir kamtur ulak ir kamtur taum ana rakrakai. <sup>44</sup> A palaona ning di pori ono, i mitet lapiu, ika ning ir kamtur ulak, ir kamtur taum ana palaona ning a ingun, misaot na langit.

I momol mang takai a palaondala mite lapiu, pa takai a palaondala otleng ning a ingun. <sup>45</sup> I maining di ka tumus tari ting na Buk Tabu larne, "A ningnigo na barsan, e Adam, e God i saran tar a lalaun teteki." *Stat 2:7* Ika a ararop a Adam, i a Ingun ning i tabar a tarai ana lalaun. <sup>46</sup> A palaondala ning a ingun bel i hanot nigo. A palaondala ning mite lapiu i hanot nigo, pa lamur a palaondala ning a ingun. <sup>47</sup> A ningnigo na barsan, e Adam, i mite lapiu, pa e God i toli ana piu. A munaur a barsan, e Karisito, i misaot na langit. <sup>48</sup> A taraila ning mite lapiu la arlar ana barsan ning e God i toli ana piu. Pa la ning misaot na langit, la arlar ana barsan misaot na langit. <sup>49</sup> Dala

kibas a manar a barsan ning e God i toli ana piu, pa lar otleng ning, dalar kibas a manar a barsan misaot na langit.

<sup>50</sup> Na tastasik, a atongi tamulo mang, a palaondala mite lapiu bel ir kas ting na matanitu ane God. A palaondala ning i sira marase ka, bel ir kas ting na matanitu ane God, ning bel ir marase. <sup>51</sup> Mulo longor, ar atai mulo ana utna na pidik larne: Bel dala rop dalar mat, ika e God ir lingir pas dala rop. <sup>52</sup> Ning a ararop a tawuru ir tangis, e God ir lingir kapit pas dala ana pilkut ka. Anasa a tawuru ir tangis, e God ir akamtur ulak na minat pa bel lar mat, pa ir lingir pas dala. <sup>53</sup> Anasa a palaondala mite lapiu ning i sira marase ka, ir talingir sur a palaondala ning bel ir marase. A palaondala mite lapiu ning i sira mat ka, ir talingir sur a palaondala ning bel ir mat. <sup>54</sup> Pa ning a palaondala ning i sira marase ka, ir talingir sur a palaondala ning bel ir marase, pa a palaondala ning i sira mat ka ir talingir sur a palaondala ning bel ir mat, a tumtumus ting na Buk Tabu ir sot maleng, larne, "E God ka tol sot pas a minat, pa i kamar rop seni." *Ais 25:8*

<sup>55</sup> "A minat, kanaha a rakrakaim?"

A minat, kanaha anuma tikio ning u akadik a taraila onoi?" *Hosea 13:14*

<sup>56</sup> A toltol laulau, i a tikio anuna minat, pa a toltol laulau i kibas pas a rakrakaina miting na Warkuraila ane Moses. <sup>57</sup> Ika, dalar atong wakak tetek e God, anasa i tabar dala ana rakrakai sur dalar tol sot pas a toltol laulau pa minat, ana titol ning e Iesu Karisito anundala a Leklek ka tol tari.

<sup>58</sup> I maining na tastasik, mulor tur rakrakai, pa gong i gulgule anumulo a tortorot ana kamkamtur ulak kusun a minat. Mulor saran rop tar anumulo a lalaun sur a titol anuna Leklek, anasa

mulo tasmani mang a titolla rop mulo toli ana rakrakai ana Leklek belsur a utna oros ka.

## 16

*Anunla a artabar tetek a tarai ane God saot e Jerusalem*

<sup>1</sup> Ar atai mulo ana asaning mulor toli ana mani ning mulo minggen taumi sur a tarai ane God ning la kes saot e Jerusalem. Mulor toli larning ia ka atai tar a tarai a lotu ting na hananuala tumo na papar Galesia sur lar toli. <sup>2</sup> Ana ningnigo na pukakiar ana taktakai wik, mulo rop taktakai mulor suah masuk sen ta mani miting na anumulo a mani pa mulor suah tari ka. La ning la tol otnan a tnan mani lar saran a tnan, pa la ning la tol otnan a natarna lar saran a natarna. Gong ning ar hanot, mulor minggen taum bot a mani. <sup>3</sup> Mulor aslang pas al tarai ning mulo tortorot onla sur lar los anumulo a artabar. Pa ning ar hanot tingia, ar saran tar na pas a warwara talapor tetek la sur lar losi taum ana anumulo a artabar, par sune sen la ono usaot e Jerusalem. <sup>4</sup> Ning i wakak sur iau otleng ar han, milar han taum.

*E Pol i atai talapor la ana nuna tinan*

<sup>5</sup> Ar han utumo na hananuala tumo na papar Masedonia. Pa lamur ar han otleng uting tetek mulo. Anasa ar han kaba utumo e Masedonia. <sup>6</sup> Ngandek ar kes siklik pas ot taum o mulo tingia, o ngandek ar kes tuk na kalang a kotkoto pa a tnan wuwu ir rop, pa lamur mulor nangan iau ana nuk a tinan sur a hanuala maleng ning ar han ia. <sup>7</sup> Bel a mang sur ar han tetek mulo onone, par tur pas ka napirimulo ana nuk a tinan. Ning a Leklek ir malmaling pas iau, a mang sur ar kes bongnan pas iau ot napirimulo. <sup>8</sup> Ar kes te e Epeses tuk ana Pukakiar a

Pentikos, <sup>9</sup> anasa a ngas ka sapang sur anuka titol ir gomo pa ir wai, pa galis a tarai otleng la mang sur lar sairasi.

<sup>10</sup> Ning e Timoti ir hanot tetek mulo, mulor tai alari sur gong i matmataut ning i kes napirimulo, anasa i tol a titol anuna Leklek, arlar hok otleng ning a toli. <sup>11</sup> Gong mulo oroi purumi. Ning ir ulak ute tetek iau, mulor sune seni ana molmol. Pa iau, a kes nanan pasi, ning ir hanot taum ana tastasin-dala.

<sup>12</sup> A mang sur ar atai mulo ana tasindala e Apolos. A nunung rakrakai i mang ir han taum ana tastasindala tetek mulo, ika belot i mang suir han. Lamur ning ta ngas ir sapang teteki, ir han ot.

*Na ararop a warwara ane Pol*

<sup>13</sup> Mulor tumarang, pa mulor tur rakrakai ana tortorot. Mulor arlar ana rakrakai a barsanla, ning bel la matmataut. <sup>14</sup> Mulor tol a utunala rop ana marmaris.

<sup>15</sup> Mulo ka tasmani mang a tarai ning la kes ting na rumai ane Stepanas, la a ningnigo na tarai ning la lingir a nuknukinla ting na papar Akaia, pa la ka saran tar la sur lar nangan a tarai ane God. A nunung mulo na tastasik, <sup>16</sup> sur mulor anatarna pas mulo tetek a ngas a tarai larning, pa tetek la ning la titol taum onla, pa la rakrakai ana titol ning. <sup>17</sup> A gas ana tinan ot ute ane Stepanas, Potunatus pa e Akaikas, anasa ditol nangan iau ning bel mulo kes taum hok. <sup>18</sup> Ditol agasgas pas a inguk, pa ingumulo otleng. I wakak ning mulor oroi lalan a ngas a tarai larning, pa mulor hanrawai la.

<sup>19</sup> A tarai a lotu te na hananuala te na papar Asia la saran anunla a marmaris tetek mulo. E Akuila pa e Pirisila pa a tarai a lotu otleng ning la sira lotu taum ting na nundiau a rumai, la saran anunla a tnan marmaris tetek mulo ana



risan a Leklek. <sup>20</sup> Na tastasindala rop la saran anundala a marmaris tetek mulo. Ning mulo arpastek, mulor mang artalai sur mulo ana argoro a marmaris taum ana totoh a toltol.

<sup>21</sup> Siklik warwara na marmaris ne, iau ot, e Pol, a tumusi tetek mulo ana kuk. <sup>22</sup> Ning tik bel i mang sur a Leklek, ir hirua tikin. A Leklek, han ute!

<sup>23</sup> A marmaris anuna Leklek e Iesu ir kes taum o mulo. <sup>24</sup> Anuk a marmaris tetek mulo rop o e Karisito Iesu. Amen.

## A Munaur a Pas ane Pol tetek a tarai Korin

### *A warwara talapor nigo*

Te na pas ne e Pol i tumtumus ulak tetek a tarai Korin, ning i kes tumo na papar Masedonia. Ting na nun a ningnigo na pas i warwara rakrakai tetek la ana nunla na toltol. Lamur i sune sen e Taitus uting ia. Ning e Taitus i ulak tetek e Pol, i atai i mang a tarai Korin la ka lingir a nuknukinla. Ika dingla na tarai la nuki mang e Pol bel a aposel momol.

Te na pas ne e Pol i warwara ana diat a utna: A ningnigona, e Pol i gas anasa la lingir a nuknukinla. A munaurna, i warwara ulak ana Wakak a Warwara. Pa munatolna, i atai la mang lar sang anunla na artabar tetek a kapan a taraila. A mundiatna i warwara talapor tetek la mang i a aposel momol ane Iesu.

### **A tinan ana Munaur a Buk Korin:**

A kamkama buk ne (1:1-11)

A titol ane Pol tetek a tarai (1:12-7:16)

A artabar tetek a tarai a tortorot saot e Jerusalem (8:1-9:15)

E Pol i a aposel momol (10:1-13:10)

A ararop a warwara ane Pol tetek a tarai Korin (13:11-13)

<sup>1</sup> Iau e Pol, a aposel anun e Karisito Iesu ana nuknuk e God, miau ma e Timoti a tasindala, mia tumus a pas ne tetek mulo a tarai a lotu ane God tingia e Korin, pa a tarai rop ane God ting na papar Akaia.

<sup>2</sup> A marmaris pa a bal molmol ta e God a Tamandala pa a Leklek e Iesu Karisito ir kes o mulo.

### *E God a tena armoro*

<sup>3</sup> Dalar atong aleklek pas e God a Taman a Leklek anundala e Iesu Karisito, pa a Tamandala

otleng, ning a tena marmaris, pa a kamkama ngas a armoro rop. <sup>4</sup> I sira amoro mila ana mamahatla rop ning mila kilangi, sur mila otleng milar amoro a tarai ning la kilang a mamahatla, ana armoro ning e God i saran tari tetek mila. <sup>5</sup> A tnan kankan ning e Karisito ka kilang tari, i pulpulas o mila pa mila otleng mila kilangi. Larkaotleng ning, o e Karisito, a amoro ane God i pulpulas o mila. <sup>6</sup> Mila kilang a mamahatla, sur mulor los a harnangai ono, pa sur dir alaun mulo. Pa ning e God ir amoro mila, mulo otleng mulor kilangi, pa ir arakrakai mulo sur mulor tur rakrakai ana ngas a kankanla ne mila kilangi. <sup>7</sup> Mila tortorot momol o mulo mang mulor tur rakrakai ot, anasa mila tasmani mang, mulo kilang a kankan taum o mila, larkaotleng ning, mulor kilang a armoro ane God taum o mila.

<sup>8</sup> Na tastasimila, mila mang sur mulor tasman a kankanla ning mila kilangi ting na hananuala tumo na papar Esia. Mila kilang a tnan mamahat kol. Bel ma mila rakrakai pa bel ma mila nuki mang milar laun. <sup>9</sup> A momolna, mila nuki mang mila kar mat. A utna ne i hanot sur gong mila tortorot ana rakrakaimila ot, milar tortorot ka o e God, esaning i sira akamtur a minatla. <sup>10</sup> E God i alaun pas mila ning milau milar mat, pa ir alaun ulak mila. Pa mila tortorot mang ir alaun pas mila ana pukakiarla rop kaning lanigo, <sup>11</sup> ning mulor nangan mila ana nunung. I maining a galis a tarai lar atong wakak tetek e God omila, anasa i maris mila pa i longor anunla na nunungla.

### *E Pol i lingir a nuknukna ana nuna tinan*

<sup>12</sup> Ine a utna ning mila iaunan mila ono, a nuknukimila bel i sira tiu mila ana ta utna, anasa

mila tasmani mang, mila mur ot a tostos pa a totoh a toltol ta e God, ana numila na lalaun te lapiu, pa anumila na keskes taum o mulo. Bel ma mila mur a tastasmai anuna tarai, mila titol murmur ot a marmaris ane God. <sup>13-14</sup> Mila tumtumus ka tetek mulo ana ututnala ning mulor was lar pasi, pa mulor talapor ono. Mulo ka talapor siklik omila, ika a tortorot mang lamur mulor talapor wakak omila. I maining ana pukakiar ning a Leklek ir hanot ulak, mulor iaunan mila, arlar o mila, milar iaunan mulo.

<sup>15</sup> A nuki mang mulor gas o mila, pa ine a kamkamna ning lanigo a atai tar mulo mange ar hanot tetek mulo ana ningnigo na tinan, pa lamur ar hanot ulak ana munaur na tinan, sur ar saran a harnangai tetek mulo naur a taem. <sup>16</sup> A nuki mang ar geren tar mulo, ning ar han utumo na papar e Masedonia. Lamur, ning ar ulak mitumo, ar kes ulak pas napirimulo, sur mulor nangan iau ana nuk a tinan usaot na papar Judia. <sup>17</sup> Mangasa, ning bel a hanot, mulo nuki mang, a nuknuk oros ka ana nuk a tinan ot tetek mulo? Mangasa, ngandek anak na warwara i arlar ana tarai te na rakrakan hanua ning la malmaling on ta utna, ika bel la toli? Iau, bel a manglarning.

<sup>18</sup> E God i momol, larotleng ning anumila a warwara i momol. Ning mila malmaling, a kamkamna mang milar tolsot pasi. <sup>19</sup> Iau, Sailas pa e Timoti, mitol warawai tetek mulo o e Iesu Karisito, a Nat e God. E Karisito bel i sira malmaling pas pa lamur ir puai. Ir tolsot pasi ot anuna warwara. <sup>20</sup> Anasa e Karisito i tolsot pas a lelela rop ane God. Pa o e Karisito ka dala tol lar pasi sur dalar atongi mang, "Amen," pa dalar atong aleklek pas e God onoi. <sup>21</sup> E God ka, i atur rakrakai mila, pa mulo otleng o e Karisito. I aslang pas dala sur dala anuna taraila

ot, <sup>22</sup> i suah tar anuna akinalang ondala sur ir talapor mang dala anunai ot. Pa i akes a Inguna te na balandala arlar ana akinalang ning i asangani mang lamur dalar kibas a ututnala ning e God ka sang tari sur dala.

<sup>23</sup> A nunung e God sur ir apuasai mang a atong a momolna. Bel a han ulak tetek mulo to e Korin, anasa bel a mang sur a nuknukimulo ir mamahat on al rakrakai a warwara ning ar atongi tetek mulo. <sup>24</sup> Bel mila mang sur milar warkurai sur anumulo a tortorot. Mila mang ka sur milar titol taum o mulo, sur mulor gas, anasa mulo ka tur rakrakai ana tortorot.

## 2

<sup>1</sup> I maining a nuki mang, bel ulak ma ar han tetek mulo, sakana mulor bal maris. <sup>2</sup> Ning ia ka saran tar a bal maris tetek mulo, esi ma ir agasgas iau? Mulo ot. Ika mulor agasgas iau mangmangasa, ning ia ka saran tar a bal maris tetek mulo? <sup>3</sup> Ine a kamkamna ning ia ka tumtumus tar larning tetek mulo, sakana ning ar hanot mulor saran a bal maris tak. Anasa mulo ka mulor tolsot sur mulor agasgas iau. A tasmani mang ar gas, taum o mulo. <sup>4</sup> A tumtumus tetek mulo ana bal maris, pa a nuknukik i mamahat kol pa a luru matak i punga. Bel a tumtumus sur ar saran a bal maris tetek mulo, a mang sur mulor tasmani mang a mang kol sur mulo.

*Mulor nuk duman sen a toltol laulau anuna ta halimulo*

<sup>5</sup> Ning tik ka saran tar a bal maris ne, bel i saran tari ka tak, i saran tari otleng tetek a galis o mulo. A atongi ka larne sur gong a atongi mang i saran tar a bal maris tetek mulo rop. <sup>6</sup> A galis o mulo, mulo ka saran tar a warkurai a arkeles teteki, pa i arlar larne. <sup>7</sup> Pa onone, mulor nuk duman sen

anuna toltol laulau ning, pa mulor amoro i, sur gong i bal maris rakrakai, pa ir punga solsol. <sup>8</sup> I maining a nunung mulo sur mulor apuasa ulak anumulo a marmaris teteki. <sup>9</sup> A tumtumus tetek mulo, sur ar toho mulo ka onoi, sur ar tasmani mang mulor longor ana ututnala rop, o bel. <sup>10</sup> Ning mulor duman sen a toltol laulau anuna tik, iau otleng ar duman sen anuna toltol laulau. Pa ning a barsan ning ka tol tar ta toltol laulau, ia ka duman seni namatana e Karisito. A duman seni anasa a nuk pas mulo, <sup>11</sup> sur gong e Satan ir apungan pas dala, anasa dala ka tasman a nuknukna.

*A Wakak a Warwara i arlar ana tomtoboh*

<sup>12</sup> Ning a hanot ting na hanua Troas, sur ar warawai ana Wakak a Warwara ane Karisito, a oroi i mang a Leklek ka sapang tar a ngas sur ar warawai. <sup>13</sup> Ika a nuknukik bel i molmol, anasa bel a pastek e Taitus, a tasiklik ana tortorot. I maining a artulai tar tanla tingia, pa han utumo e Masedonia.

<sup>14</sup> Ika a atong wakak tetek e God, anasa e Karisito i nigon mila arlar ana king ning ka tolsot pas a hiruala pa i nangan mila sur milar warwara puasa ting na hananuala rop ana Wakak a Warwara o e Karisito. A Wakak a Warwara i arlar ana tomtoboh tetek la ning la longori. <sup>15</sup> Mila arlar ana tomtoboh, ning e Karisito i artabar onoi tetek e God. Pa a tobohna i han tetek la ning e God ir alaun la, pa la otleng ning la han sur a hinirua. <sup>16</sup> Dala arlar ana toboh minat tetek la ning la han sur a hinirua, pa toboh lalaun tetek la ning lar laun tikin.

Esi ir tolsot pas a titol ne? <sup>17</sup> Bel mila arlar onla, ning la titol ka ana warwara ane God sur a mani. Ika, o e Karisito mila warwara ana momol namatana e God, anasa i ot i sune sen mila.

### 3

*Mila na tena titolla ana tona kunubus*

<sup>1</sup> Mangasa, mulo nuki mang mila aleklek pas mila na mata-mulo? Dingla na tarai la sira los a pasla ning i warwara talapor ana nunla a ngas a lalaun. Mangasa, mulo mang sur milar los ta pas larne tetek mulo? Mangasa, milar nunung mulo sur mulor tumus ta pas larne o mila? <sup>2</sup> Mulo ot anumila a pas, ning di ka tumus tari te na balamila. A taraila rop la wasi pa la tasmani. <sup>3</sup> I talapor mang mulo a pas ning e Karisito i tumusi, anasa ana numila a titol tetek mulo. Bel i tumusi ana pen, i tumusi ot ana Inguna e God esaning i laun. Bel i tumusi ting na didiah hatat, i tumusi ot ting na balan a taraila.

<sup>4</sup> Mila warwara ana ututnala ne, anasa mila laun o e Karisito pa mila tortorot o e God mang a ututnala ne i momol ot. <sup>5</sup> Mila tasmani mang, mila ot bel mila tolsot sur milar tol a titol ne, ika e God ot i nangan mila sur milar toli. <sup>6</sup> I ot i suah tar mila sur mila na tena titolla ana tona kunubus, pa i saran tar a rakrakai tetek mila sur milar titol onoi. A tona kunubus ne, bel i kamkamna ana warwara na Warkurai ning di ka tumus tari, i kamkamna ot ana Talngan Tabu. A warwara na Warkurai i saran ka a minat, ika a Talngan Tabu i saran a lalaun.

<sup>7</sup> A Warkuraila ning e God i saran tari tetek e Moses, ning di tumus tari ting na naur a hat, la hanot taum ana matatar ane God. Ning e Moses i losi tetek a tarai Israel, bel la tolsot sur lar oroi a patarna, anasa a patarna i talapor ana matatar ane God. Ika lamur, a talapor ana mermer ning, i rop amon kusuni. A Warkuraila ning la sira saran a minat, la hanot ana matatar manglarne. <sup>8</sup> Ika, a tona kunubus ana Talngan Tabu,

a matatarna i itna kol tana. <sup>9</sup> A Warkuraila ane Moses la hanot ana tnan matatar, ika a titol na mur Warkurai i saran ka a minat. Ika a titol ana tona kunubus i atosos a tarai namatana e God, pa a matatarna a titol ne i itna kol. <sup>10</sup> A ningnigo na kunubus, bel ma ta matatarna, anasa a matatar ana tona kunubus i talapor kol tana. <sup>11</sup> A Warkuraila ane Moses ning i rarop amon, i hanot taum ana matatar. Ika a tona kunubus ning ir kes tikin, a matatarna i itna kol tana.

<sup>12</sup> I maining, bel mila matmataut, anasa mila tortorot mang a tona kunubus ir kes tikin. <sup>13</sup> Bel mila arlar o e Moses, ning i poroi alar a matana ana diah kaen, sur gong a tarai Israel la oroi a matatar, ning i rarop amon kusun a matana. <sup>14</sup> Ika a nuknukinla i tamakut, pa tuk onone, ning di was a warwara ana ningnigo na kunubus tetek la, i arlar ka larning di poroi alar a nuknukinla ana diah kaen ning. Bel tik ka kepsen tari, e Karisito ka, ir kepseni kusun esining i laun o e Karisito. <sup>15</sup> A momolna, tuk onone, i arlar ana diah kaen kaning i poroi alar a nuknukinla, ning di sira was a Warkuraila ane Moses tetek la. <sup>16</sup> Ika ning tik i talingir tetek a Leklek, e Karisito ir kepsen a diah kaen ning. <sup>17</sup> A Leklek i a Inguna, pa tik ning a inguna Leklek kaning ono, ir langolango kusun a Warkuraila ane Moses. <sup>18</sup> Pa dala, ning bel di poroi alar a matandala ana ta diah kaen, dala apuasa a matatar ana Leklek. Pa anundala na lalaun i talingir amon sur dalar arlar o e Karisito, pa anuna matatar ir itna amon ting na nundala a lalaun. A matatar ne, tana Leklek ot, esaning a Inguna.

#### 4

*Mila arlar ka ana kuro orosla ning di toli ona piopap*

<sup>1</sup> E God i maris mila pa i saran tar a titol ne tetek mila. I maining bel milar manah kusun. <sup>2</sup> Mila ka manah kusun a toltol laulaula ning a tarai la sira tol kumnani pa la sira meme ono. Bel mila titol ana asasongo, pa bel mila pak rongo a warwara ane God. Mila pak talapor a momol a warwara tetek a tarai, sur lar oroi lanani ot ting na nuknukinla mang mila atong a momolna namatana e God. <sup>3</sup> Ning a Wakak a Warwara ne mila sira warawai ono ir parau, ir parau ka kusun la ning lar hirua. <sup>4</sup> E Satan, a god mite na rakrakan hanua, i san akut pas a nuknuk a tarai ning bel la tortorot, sur bel lar oroi a talapor ana Wakak a Warwara ning i apuasa a matatar ane Karisito, i ot a manar e God. <sup>5</sup> Bel mila warawai o mila ot, mila warawai ka o e Iesu Karisito mang i a Leklek. Pa mila anumulo na tena titol ka, kamna ana arsune ane Iesu. <sup>6</sup> Nating ot ning e God i akes a rakrakan hanua i atongi mang, "A talapor ir sasai ot miting na mormorom." Pa onone, e God ka suah tar anuna talapor te na balandala, sur ir sasai teia, sur dalar tasman a matatar ane God, ning di oroi i ting na patar e Karisito.

<sup>7</sup> A talapor ne, ning kane o mila, i arlar ana utna ning a matana i abit kol. Ika mila arlar ka ana kuro orosla ning di toli ana piopap, sur ir talapor mang, a tnan rakrakai ning kane o mila, ta e God ot, bel mite o mila. <sup>8</sup> A mamahatla i barat mila te na risrisim mila rop, ika bel i alaulau mila. A galis a utna i aloklokron a nuknukim mila, ika bel mila manah. <sup>9</sup> A taraila la akadik mila, ika e God i kes ot taum o mila. La um mila, ika bel la umkol mila. <sup>10-11</sup> Ning mila laun, a minat i milau ka, anasa mila titol tetek e Iesu. Ana pukakiarla rop mila asangan a minat ane Iesu te na palaomila, sur a taraila lar oroi otleng a lalaun ane Iesu te

na palaomila, ning i sira mat. <sup>12</sup> I maining a minat i titol o mila, ika a lalaun i titol o mulo.

<sup>13</sup> Di ka tumus tari ting na Buk Tabu mang, "A warwara puasa anasa a tortorot." *Buk Song 116:10* Mila otleng mila tortorot ana ngas a tortorot larne, i maining mila warwara puasa. <sup>14</sup> Anasa mila tasmani mang e God, esaning ka akamtur ulak pas a Leklek e Iesu kusun a minat, ir akamtur pas mila otleng taum o e Iesu, pa ir ben pas mila taum o mulo, sur dalar kes namatana e God. <sup>15</sup> A mamahatla ning mila kilangi, la hanot sur mulor wakak ono. Pa ning a marmaris ane God i han sarara tetek a taraila, a galis a tarai lar atong wakak tetek e God, pa lar atong aleklek pas e God.

<sup>16</sup> I maining bel mila ngoro ana numila na titol. A palaomila i kes purum amon, ika di atona a ingumila ana pukakiarla rop. <sup>17</sup> A mamahatla ning mila kilangi, bel i itna pa bel i kes bongnani, ika i saran a matatar tamila, a matatar ning bel ir rarop. A matatar ning i itna kol tana mamahatla ning mila kilangi. <sup>18</sup> Bel mila suah tar a nuknukimila ting na ututnala ning di oroi i, mila suah tar ka a nuknukimila ting na ututnala ning bel di oroi i. Anasa a ututnala ning di oroi i, bel ir kes bongnani, ika a ututnala ning bel di oroi i, ir kes tikin.

## 5

*Dalar mermer ana tona palaondala*

<sup>1</sup> A palaondala i arlar ana rumai sel ning dala laun ono te na rakrakan hanua. Pa dala tasmani mang ning ir laulau, e God ir saran a tona rumai tetek dala saot na langit. A rumai ning ir kes tikin. Bel a tarai la toli ana kunla. E God ot ka tol tari. <sup>2</sup> Ning dala laun te na rumai sel dala tangis,

anasa dala mang sur dalar mermer ana palaondala tisaot na langit. <sup>3</sup> Anasa ning dala mermer ana palaondala misaot na langit, bel ma dalar mengere. <sup>4</sup> Ning kanet dala laun ana palaondala ne, dala tangis pa dala kilang a mamahat. Anasa bel dala mang sur dalar mat, ika dala mang sur dalar mermer ana palaondala tisaot na langit, sur a palaondala ning i sira mat, ir keles sur a palaondala ning ir laun tikin. <sup>5</sup> E God ot ka akes tar dala sur dalar kibas a tona lalaun ne, pa i tabar dala ana Talngan Tabu, i a akinalang sur ir amomoli mang lamur dalar kibas a ututnala ning e God ka sang tari sur dala.

<sup>6</sup> I maining a utna ne i arakrakai mila, pa mila tasmani ot mang, ning mila laun ana palaomila ne, bel mila kes taum ana Leklek. <sup>7</sup> Mila laun ana tortorot, bel mila laun ana utna ning mila oroi i. <sup>8</sup> Ika mila tasman momoli mang milar gas ning milar han kusun a palaomila ne, pa milar kes taum ana Leklek. <sup>9</sup> Manglarning, ana lalaun te lapiu, pa ana lalaun saot na langit, mila mang sur milar agasi. <sup>10</sup> Anasa dala rop dalar tur salanigo na keskes na warkurai ane Karisito. Ning dalar tol a wakakna o a laulauna, dala rop taktakai dalar kibas a arlou ana ututnala ning dala ka tol tari ana nundala lalaun te lapiu.

*O e Karisito, e God i amoro a tarai taum ono*

<sup>11</sup> Mila titol kol sur milar akamtur a nuknuk a tarai sur lar tortorot, anasa mila matmataut sur a Leklek. E God i tasman mila mang mila esi na ngas a tarai, pa a tortorot mang mulo otleng mulo tasman mila. <sup>12</sup> Bel mila mang sur milar aleklek pas mila tetek mulo. Ika mila mang sur mulor iaunan mila, pa mulor keles la ning la sira iaunan la ana saning miting na palaonla ning a tarai la oroi i,

ika bel la nuknuk sur a balanla ir totoh.

<sup>13</sup> Ning a tarai lar nuki mang mila longlong, mila manglarning sur milar tol a titol ane God. Ning a tarai la nuki mang mila tastamai, mila tastamai sur milar nangan mulo. <sup>14</sup> A marmaris ane Karisito i akamtur mila, sur milar titol teteki. Anasa mila tasman momoli mang takai ka i mat sur dala rop. I maining dala rop dala mat taum onoi. <sup>15</sup> I mat sur dala rop, sur dala ning dala laun gong dala laun sur dalar agasgas pas dala ot. Dalar laun sur e Karisito, esaning i mat sur ir alaun pas dala, pa i kamtur ulak kusun a minat.

<sup>16</sup> I maining, onone anumila toltol tetek a tarai bel i arlar larning nating. Lanigo mila oroi a tarai arlar ana tarai mite na rakrakan hanua lar oroi la. Pa mila oroi e Karisito mangotleng larning. Ika onone, anumila a tatatai bel ma i manglar nating. <sup>17</sup> Ning tik ir laun o e Karisito, i a tona akakes. Anuna toltol tagun nating ka rop. Oroi, a tona lalaun ka hanot. <sup>18</sup> I hanot ot ta e God, esaning i amoro pas dala taum ono, anasa ana minat e Karisito. Pa ka saran tar a titol tetek mila, sur milar warawai ana titol ane God ning i amoro pas dala taum ono. <sup>19</sup> O e Karisito, e God i amoro pas a taraila te na rakrakan hanua. Bel ma i nuk ulak pas anunla na toltol laulau sur ir warkurai la ono. Pa ka saran tar a warwara na armorone tetek mila. <sup>20</sup> I maining mila na tena warwara ane Karisito, pa ning mila warwara i arlar o e God ot i nunung mulo sur mulor armoro taum onoi, pa mila otleng mila nunung mulo ana risana e Karisito sur mulor armoro taum o e God. <sup>21</sup> E Karisito bel i tol ta toltol laulau, ika e God i suah tar anundala na toltol laulau saot ono, sur ning dala laun o e Karisito, dalar tostos namatana e God.

## 6

<sup>1</sup> Mila titol taum o e God, pa mila nunung mulo, sur gong mulo kibas oros a marmaris ning e God ka saran tari tetek mulo. <sup>2</sup> Anasa e God i atongi mang,

“Ning a taem ka sot, a longor u,  
Pa ana pukakiar ning a alaun u, a nangan u.” *Ais 49:8*

Oroi, onone, a taem ka sot, onone a pukakiar ning e God i alaun pas mulo.

*A aposella la kilang a mama-hatla*

<sup>3</sup> Bel mila mang sur milar tol ta utna ning ir san alar tik sur gong i tortorot, sakana a taraila lar atong laulau anumila a titol. <sup>4</sup> A titolla rop ning mila sira toli, i asangani mang mila na tena titol ane God. Mila tur rakrakai ning mila kilang a mamahatla pa a kankanla pa akadikla. <sup>5</sup> Di miras mila pa di akas mila tingui na rumai a dodot. Di balakut tetek mila pa di lu mila. Mila titol rakrakai, bel mila sira borbor ana moromla, pa mila murak. <sup>6</sup> Mila tol a totoh a toltol, pa mila titol ana tastamai. Bel mila sira ngoro tetek a taraila, mila tol ka a wakak a toltol tetek la. Mila titol ana harnangai anuna Talngan Tabu, pa mila titol ana marmaris momol. <sup>7</sup> Mila atong a momolna, pa mila titol ana rakrakai e God. Mila tong akes a tostos a toltol arlar ana numila a utna na harum ana sot a kumila pa ana kair otleng.

<sup>8</sup> Dingla na tarai la hanrawai mila, pa dingla na tarai bel. Dingla na tarai la atong laulau mila, pa dingla na tarai la atong aleklek pas mila. Dingla na tarai la nuki mang mila a tena asasongola, ika mila atong a momolna. <sup>9</sup> Dingla na tarai la puai mang belal risamila, ika a risamila i itna ot. Mila milau tar a minat, ika kanet mila laun. Di um mila, ika bel di umkol mila. <sup>10</sup> Mila bal maris, ika mila sira gas ana pukakiarla rop. Mila kapan,

ika mila sira angisngis a galis a tarai ana gongon ana ingun. Bel anumila al utna, ika a ututnala rop anumila.

<sup>11</sup> Mulo a tarai Korin, mila ka warwara momol tar tetek mulo, pa a balamila i bukus ana marmaris tetek mulo. <sup>12</sup> Mila saran anumila a marmaris tetek mulo, ika mulo ot mulo tong akes anumulo a marmaris kusun mila. <sup>13</sup> A warwara tetek mulo arlar larning a warwara tetek na natnatukla: Mulor mang sur mila ana balamulo rop.

*A tena tortorot gong i bal taum onla ning bel la tortorot*

<sup>14</sup> Gong mulo bal taum onla ning bel la tortorot, anasa a tostos a toltol ir bal taum mangasa ana toltol laulau? A talapor ir kes taum mangasa ana mormorom? <sup>15</sup> E Karisito pa e Satan diar malmaling taum mangasa? Ta tena tortorot ir bal taum mangasa on tik ning bel i tortorot? <sup>16</sup> A asasongo na godla pa rumai a artabar ane God diar malmaling taum mangasa? Anasa dala ot a rumai a artabar ane God ning i laun. Larning e God ka atong tari mange,

“Ar kes taum onla,  
pa ar han arpotor tanla.  
Pa iau anunla a God,  
pa la anuka taraila.” *Liwai*

*26:12*

<sup>17</sup> Pa Leklek i atongi otleng mang,  
“Mulor purum kusun la, pa mulor kes masuk kusun la.

Pa gong mulo tuk a dur a ututnala.  
Pa iau ar gas pas mulo.” *Ais*

*52:11*

<sup>18</sup> A Leklek ning i rakrakai kol i atongi mang,

“Ar hanot a Tamamulo,  
pa mulo na natnatukla, a taraila pa a gurarala.” *2 Sam 7:14*

## 7

<sup>1</sup> Na halalik, e God ka saran tar a lelela ne tetek dala, i maining dalar atotoh pas dala kusun a ututnala rop ning i adur a palaondala

pa a ingundala. Pa dalar totoh arlar ana taraila ane God, anasa dala sira hanrawai teteki.

### *E Pol i gas*

<sup>2</sup> Mulor mang sur mila ana balamulo. Bel mila tol tar ta toltol laulau tetek tik, bel mila ben rongon tar tik, pa bel mila asongo pas ta utna tana tik. <sup>3</sup> Bel a atong a warwara ne sur ar tiu mulo ono. Ia ka atai tar mulo nating mang, mila katnan mulo. Bel milar duman mulo, mila sang sur milar laun taum omulo o milar mat taum omulo. <sup>4</sup> A tortorot o mulo. Pa sira iaunan mulo. Anumulo a lalaun i arakrakai iau. Anuka gasgas i pulpulas arpotor ana mamahatla ning mila kilangi.

<sup>5</sup> Ning mila hanot tumo na papar Masedonia, bel mila manah lar pas, anasa mila barat a galis a mamahat. Mila barat a warwara na balakut anuna tarai tetek mila, pa ana balamila, mila kilang a matmataut. <sup>6</sup> Ika, e God ning i sira amoro a taraila ning la bal maris, i amoro mila ana tinan ot ane Taitus tetek mila. <sup>7</sup> Pa bel a tinan ot ka ane Taitus ning i amoro mila, mila gas otleng ning mila longori mang mulo arakrakai i. I atai mila mang mulo mang kol sur mulor oroi iau, pa mulo bal maris, pa onone mulo mang sur dalar armoro taum ulak. A warwara ne, i agasgas kol mila.

<sup>8</sup> Anuk ning a pas kaba ka abal maris tar mulo. Ika bel a bal maris ono. Lanigo a bal maris ono, anasa i abal maris mulo, ika onone a oroi i mang a bal maris anumulo bel i bongnani. <sup>9</sup> Onone a gas, bel i kamna ning mulo bal maris. A gas anasa anumulo a bal maris i ben pas mulo sur mulor lingir a nuknukimulo. Anumulo a bal maris i arlar ana nuknuk e God, anasa i ben tar mulo sur mulor lingir a nuknukimulo. I maining bel mila alaulau mulo. <sup>10</sup> A bal maris ning e God i mang suri, i ben a taraila sur lar lingir a nuknukinla. Pa ning lar lingir a nuknukinla, e



God ir alaun la. Dalar gas ana ngas a bal maris ne. Ika a ngas a bal maris mite na rakrakan hanua i saran tar ka a minat.

<sup>11</sup> Oroï, a bal maris ne ta e God i tol otnan a galis a wakak a utna o mulo: A tnan nuknuk kaning o mulo sur mulor langolango kusun a toltol laulau. Pa mulo mang sur mulor atostos pas a risamulo kusun a artituu. Mulo balakut tetek esaning i tol a toltol laulau, pa mulo matmataut. Mulo mang kol sur dalar armoro taum ulak, mulo rakrakai, pa mulo mang sur mulor atostos a utna ning bel i tostos. Anumulo a toltol i asangani mang mulo tostos ana utna ne. <sup>12</sup> A tumtumus tetek mulo, bel a kamkamna ana barsan ning i tol a toltol laulau, pa bel a kamkamna otleng ana barsan ning di tol a toltol laulau teteki. A tumtumus sur mulor talapor namatana e God ana anumulo na tuntunur taum omila. <sup>13</sup> I maining, ana ututnala ne mulo arakrakai mila.

Mulo arakrakai mila, pa mila gas kol otleng ning mila oroi i mang e Taitus i gas, anasa mulo rop mulo nangani sur a nuknukna ir manah. <sup>14</sup> Ning belot i han, a iau-nan mulo teteki, pa bel mulo ame iau. A ututnala ning mila atongi tetek e Taitus o mulo i momol, arlar ana numila na warwara rop tetek mulo i momol. <sup>15</sup> A marmaris ane Taitus i itna kol ning i nuk pasi mang mulo rop mulo mur anuna warwara, pa mulo gas pasi ana matmataut pa koloron. <sup>16</sup> A gas kol omulo, anasa a tortorot momol o mulo.

## 8

### *A artabar*

<sup>1</sup> Na tastasimila, mila mang sur mulor tasman a marmaris ning e God i saran tari tetek a tarai a lotu tumo na papar Masedonia. <sup>2</sup> La kilang a galis a mamahat, ika anunla a gasgas i pulpulas.

Pa ting na nunla a keskes a kapan, anunla gasgas i akamtur la sur lar artabar, pa anunla artabar i pulpulas. <sup>3</sup> Pa atai mulo ana momol, asaning la tolsot sur lar sarani lar sarani ot, ika la saran wot ulaki. A nuknukinla ot sur lar toli lerne. <sup>4</sup> Pa la nunung rakrakai mila sur la otleng lar saran anunla na mani na artabar tetek a tarai ane God saot e Jerusalem. <sup>5</sup> Pa bel la saran tari ka a mani larning mila nuki mang lar sarani, la saran nigon tar anunla a lalaun ot tetek a Leklek, pa tetek mila otleng, arlar ana nuknuk e God.

<sup>6</sup> I maining mila nunung e Taitus sur ir nangan mulo sur mulor tol arop a titol a artabar ne, anasa i ot i nangan mulo ning mulo turpasi. <sup>7</sup> Mulo wakak kol ana ututnala rop ne: Anumulo a tortorot, pa anumulo a warwara, anumulo a tastamai, anumulo a tnan nuknuk na harnangai, pa anumulo a tnan marmaris tetek mila. Pa i wakak sur mulor wakak kol otleng ana titol a artabar ne.

<sup>8</sup> Bel a atong a utna ne sur ir arlar ana warkurai tetek mulo. Ika, a atai mulo ana tarai Masedonia, pa anunla a tnan gasgas sur lar artabar, sur ar lar anumulo a marmaris, i momol o bel. <sup>9</sup> Anasa mulo tasman a marmaris ana nundala a Leklek e Iesu Karisito. I ot i angis kol, ika i han kusun anun a wakak a keskes saot na langit, anasa i maris mulo. I kes na kapan te na rakrakan hanua, sur mulo, mulor angis.

<sup>10</sup> Ar atai mulo ana nuknukik ana utna ne: I wakak sur mulor tol arop a titol a artabar ning mulo turpasi ana rau ning i rop. Mulo a ningnigo na tarai ning mulo mang sur mulor artabar, pa mulo a ningnigo na tarai otleng ning mulo turpas a artabar. <sup>11</sup> I wakak sur onone mulor tol aropi larning mulo mang kol sur mulor toli ning mulo turpasi. Mulor saran asaning mulo tolsot sur mulor sarani.

<sup>12</sup> Ning mulo mang kol sur mulor artabar, e God ir gas. E God i mang sur mulor saran asaning mulo tolsot sur mulor sarani, bel i nuknuk sur asaning bel mulo tolsot sur mulor sarani.

<sup>13</sup> Bel a atongi mang mulor nangan a tarai masik, pa mulo, mulor kapan. Ika a mang sur mulo rop mulor arlar ka. <sup>14</sup> Onone, mulo ka kibas a galis, sur mulor nangan a tarai masik onoi. Pa lamur ning la kibas al galis, la maleng lar nangan mulo, ana saning mulo kapan suri, sur mulo rop mulor arlar ka. <sup>15</sup> Larning di ka tumus tari ting na Buk Tabu mang, "Esining i suah taum al galis a utna, a utna ning i kibasi i tolsot pas ka anuna kapan. Pa esining bel i suah taum al galis a utna, i otleng i kibas a utna ning i tolsot pas anuna kapan." *Kisim Bek 16:18*

*E Taitus ir han tetek a tarai Korin*

<sup>16</sup> A atong wakak tetek e God, esaning i anuknuk tar e Taitus sur ir mang sur mulo larning iau otleng a mang sur mulo. <sup>17</sup> I gasgas kol ning mila nunungi sur ir nangan mulo, pa ana nuknukna ot, onone ir han tetek mulo ana tnan gasgas. <sup>18</sup> Milar sune seni taum ning tasimila, ning a tarai a lotu ting na hananuala rop la atong aleklek pasi ana nuna wakak a titol ning i warawai ana Wakak a Warwara. <sup>19</sup> Pa la ot la aslang tari sur milar han taum usaot e Jerusalem, sur milar abaran a mani na artabar. Milar tol a titol ne sur milar aleklek pas a Leklek, pa sur milar asangani mang mila mang sur milar nangan a tarai a lotu saot e Jerusalem. <sup>20</sup> Milar han taum, sur bel ta artituu ir kibas mila ana numila a titol ning milar abaran sen a tnan artabar ne. <sup>21</sup> Mila rakrakai sur milar tol a utna ning i tostos, bel namatana Leklek ka, namatana taraila otleng.

<sup>22</sup> Pa milar sune sen otleng ning a tasimila ana tortorot taum ondiau. Mila ka toho tari a galis a taem, pa mila tasmani mang i sira gasgas sur a titol. Pa onone i mang kol sur ir harnangai ana titol ne, anasa i tortorot o mulo. <sup>23</sup> Pa e Taitus i titol taum hok, sur miar nangan mulo. Pa naur a tasimila, ning diar han taum o e Taitus, dia tur aslang a tarai a lotu, pa ana nundiau a lalaun dia saran a hanrawai tetek e Karisito. <sup>24</sup> I maining mulor asangan anumulo a marmaris tetek ditol, pa a kamkamna ning mila iaunan mulo, sur a tarai a lotu ting na hananuala masik, lar oroi lalan anumulo a lalaun.

## 9

*A tarai Korin lar sang a nunla na artabar*

<sup>1</sup> Bel ma ar tumtumus ulak tetek mulo ana titol a harnangai tetek a tarai ane God saot e Jerusalem. <sup>2</sup> Anasa ia ka tasmani mang mulo gas sur mulor tol a titol ne. A iaunan pas mulo, ning mulo kes to na papar Akaia, tetek a taraila tumo na papar Masedonia. Pa a atai la mang, ana rau ning i rop, mulo sang sur mulor saran sen anumulo a mani. Pa numulo a gasgas sur a artabar i akamtur a nuknukin a galis a tarai kol onla sur la otleng lar artabar. <sup>3</sup> Ar sune sen natol a tasimila ne tetek mulo, sur ditol ar nangan mulo sur mulor sang, arlar onoi ning ia ka atong tari tanla. Sakana a tarai Masedonia lar oroi i mang anuka warwara ning a iaunan mulo ono, bel i momol. <sup>4</sup> Ning ar hanot tetek mulo taum on al taraila miting e Masedonia, pa lar oroi mang, bel mulo sang, milar meme ana nuka warwara ning ia ka atong tari, pa mulo otleng mulor meme kol. <sup>5</sup> I maining ar sune nigon sen natol a tasimila ne, sur ditol ir han nigo uting, pa ditol ir nangan mulo sur mulor sang a artabar ning mulo

lele tari mang mulor sarani. Ning mulo ka sang nigon tar anumulo a artabar, i a artabar momol ning mulo mang sur mulor sarani, pa bel a utna ning di angongos pasi ka kusun mulo.

<sup>6</sup> Mulor nuk pasi, esining i oman siklik, ir sol pas ka otleng al siklik. Pa esining i oman a galis, ir sol pas otleng al galis. <sup>7</sup> Mulo taktakai, mulor saran a utna ning mulo ka nuki mang mulor gas sur mulor sarani. Pa gong mulo saran a utna ning bel mulo gasgas sur mulor sarani, pa gong mulo artabar ning di angongos tar mulo ka. Anasa e God i mang sur la ning la artabar ana gasgas. <sup>8</sup> E God i tolsot sur ir tabar mulo ana ututnala rop ning mulo kapan suri, pa i galis tana utna ning mulo kapan suri. Pa ana pukakiarla rop bel mulor kapan sur ta utna, a ututnala rop ning mulo kapan suri kaning ka, pa al utna otleng sur mulor tol a wakak a titolla onoi. <sup>9</sup> Larning di ka tumus tari ting na Buk Tabu mange,

“Esining i sira artabar ana galis a utna tetek a kapan a taraila, anuna tostos a toltol ir kes tikin.” *Buk Song 112:9*

<sup>10</sup> E God esaning i tabar a taraila ana utna ning lar omani pa a utna otleng ning lar eni, ir tabar mulo otleng ana ututnala sur mulor tol a wakak a titol onoi. Pa lamur mulor sol a galis a utna miting na numulo a tostos a toltol. <sup>11</sup> E God ir tabar mulo ana ututnala rop, sur mulo otleng mulor sira artabar ana galis a taem. Ning mulor toli manglarne, a galis a tarai lar atong wakak tetek e God ana numulo a artabar, ning milar abaran seni tetek la.

<sup>12</sup> A titol na harnangai ne mulo toli, bel i nangan ka a tarai ane God ana utna ning la kapan suri, i tol otnan otleng a atong wakak tetek e God tana galis a taraila. <sup>13</sup> A titol ne mulo toli, i amomol anumulo

a tortorot. Pa a galis lar atong aleklek pas e God, anasa anumulo a tortorot ana Wakak a Warwara o e Karisito i saran a toltol na longor. Pa lar atong leklek e God ana numulo a wakak a toltol ning mulo tabar la pa a tarai rop otleng. <sup>14</sup> Ning lar nunung sur mulo, ting na balanla lar mang kol sur mulo, anasa ana tnan marmaris ning e God ka asangan tari tetek mulo. <sup>15</sup> Dalar atong wakak kol tetek e God ana nuna tnan artabar ning bel tik ir tol sot sur ir pak lar pasi.

## 10

*E Pol i warwara talapor ana nuna titol*

<sup>1</sup> Iau, e Pol, ning dingla na tarai la atongi hok mang, a sira anatarna pas iau ning a tai taum o mulo, ika ning a kes masik anuka warwara tetek mulo i rakrakai kol. A nunung mulo sur mulo longor iau, anasa e Karisito i anatarna pasi, pa i titol ana wowon na magirana tetek a taraila. <sup>2</sup> Ning ar hanot tetek mulo, a tolsot sur ar atostos mulo ana rakrakai a warwarala. Ika bel a mang. A nunung la ning la nuki mang mila mur ka a toltol mite na rakrakan hanua mang lar manah kusun a ngas a nuknuk ning, sur gong a hanot ana rakrakai a warwarala tetek la. <sup>3</sup> I momol, mila laun te na rakrakan hanua, ika bel mila harum arlar ana tarai mite na rakrakan hanua. <sup>4</sup> Anasa a ututnala na harum ning mila harum onoi, bel mite na rakrakan hanua. A rakrakai a ututnala na harum ane God, pa la rakrakai kol sur milar regen a rakrakai a worohla anuna hiruala onoi. <sup>5</sup> Mila kamar sen a اساسongo na warwarala ning a taraila la iaunan la ono, pa i sairas a taraila sur gong la tasman e God. Pa mila dat lingir a nuknuk a taraila, sur lar longor tetek e Karisito. <sup>6</sup> Ning mulor longor rop tetek e Karisito, milar sang sur milar warkurai la ning bel la longor.

<sup>7</sup> Mulor oroi wakak a ututnala! Ning tik i nuki mang i ane Karisito, i wakak sur ir nuknuk wakak pa ir oroi lalani mang mila otleng ane Karisito, arlar ka onoi. <sup>8</sup> Ning mulo nuki mang mila sira iaunan mila ana rakrakai ning a Leklek ka saran tari tetek mila, bel mila meme onoi, anasa ka saran tari sur milar arakrakai mulo onoi, bel sur milar alaulau mulo. <sup>9</sup> Gong mulo nuki mang a tumus anuka pasla tetek mulo sur mulor matmataut. <sup>10</sup> Anasa dingla na taraila la atongi mang, “Ting na anuna pasla, anuna warwara i mamahat pa i rakrakai, ika ning i kes napirimila, bel i rakrakai pa anuna warwara i utna oros ka.” <sup>11</sup> I wakak sur lar tasmani mang anumila a rakrakai a warwarala ning la was tari ting na numila pasla, milar tolsot pasi ot ning milar hanot tingia.

<sup>12</sup> Bel mila sira arlar mila onla ning la atongi mang la itna kol. Ning la arlar artalai la ulak ot, la longlong kol! <sup>13</sup> Ika mila, bel milar iaunan mila ana ututnala masak, milar iaunan mila ka ana titol ning e God ka saran tari tetek mila. A titol a warawai ning i han tuk ting na numulo a hanua. <sup>14</sup> Bel mila iaunan mila ana ta titol ning bel mila tol tari. Ngandek ning bel mila hanot tetek mulo, anumila a toltol na iaunan bel ir tostos. Ika, milar hanot ot tetek mulo ana Wakak a Warwara o e Karisito. <sup>15</sup> Pa bel mila iaunan mila otleng on ta titol ning a taraila masak la ka tol tari. Ika mila tortorot mang, ning anumulo a tortorot ir gomo, anumila a titol otleng arpotor tamulo ir gomo kas, <sup>16</sup> sur milar warawai otleng ana Wakak a Warwara ting na hananuala kanisa lanigo ta mulo, ning belot tik i warawai tingia. Anasa bel mila mang sur milar iaunan mila ana titol ning tik masak ka tol tari. <sup>17</sup> A Buk Tabu i atongi mang, “Esining i mang sur ir iaunan pasi,

i wakak sur ir iaunan pas a Leklek.”

*Jer*  
9:24

<sup>18</sup> Anasa esining i atong aleklek pasi ot, esaning bel i itna namatana Leklek, ika esining a Leklek i atong aleklek pasi, esaning i itna.

## 11

*E Pol bel i arlar ana asasongo na aposella*

<sup>1</sup> A mang sur mulor longor anak siklik longlong a warwara. A tasmani mang mulor longor iau. <sup>2</sup> A matmataut kol o mulo, arlar o e God i matmataut o mulo, sakana mulor han masak kusun e Karisito. Ia ka aslang tar mulo sur mulo ane Karisito, arlar ana totoh a basbas ning belot i kes taum ana ta barsan. <sup>3</sup> Ika onone, a matmataut sakana dir ben rongon a nuknukimulo kusun anumulo a toltol ning bel ta dur onoi, pa anumulo a tortorot momol o e Karisito, arlar ana soi i asongo pas e Iwa. <sup>4</sup> Anasa mulo gas sur mulor longor tik ning i hanot tetek mulo pa i warawai ana maskana Iesu, bel e Iesu ning mila warawai ono. Pa mulo gas ka sur dir tabar mulo ana maskana ingun, bel a Talngan Tabu. Pa mulo gas ka sur mulor longor a maskana Wakak a Warwara, bel a Wakak a Warwara ning mulo ka tortorot ono.

<sup>5</sup> Bel a natarna tanla ning mulo atong la na tatatnan aposella. <sup>6</sup> Sakana mulo nuki mang bel a asaer pas sur a tena warawai, ika a tasman ot asaning a warawai ono. Mila ka atalapor tar mulo ana tastasmai rop ne ana ututnala rop mila toli.

<sup>7</sup> Mangmangasa, a rongo anasa bel a nunung mulo sur ta mani ning a warawai ana Wakak a Warwara tetek mulo? A anatarna pas iau ot napirimulo, sur mulo, mulor itna. <sup>8</sup> A los a mani miting na tarai a lotu ting na dingla na hanua

masuk, sur ir nangan iau ana nuk a titol arpotor ta mulo. I arlar larning a kinau anunla a mani sur ar titol tetek mulo. <sup>9</sup> Ning a kes taum o mulo pa a kapan sur ta utna, bel a saran ta mamahat tetek mulo anasa na tastasimila ana tortorot misaot e Masedonia la hanot, pa la tabar iau ana utna ning a kapan suri. Bel a nunung tar mulo, pa bel ar nunung tar mulo otleng sur ta utna. <sup>10</sup> Momol, a momolna ane Karisito i kes o mila, pa a atai mulo ana momolna mang, bel tik ting na papar Akaia ir sairar lar pas iau sur gong a iaunan iau ana nuk a toltol ne tetek mulo. <sup>11</sup> Mangmangasa, ning bel a nunung mani ta mulo, i apuasa i mang bel a mang sur mulo? E God i tasmani mang a mang kol sur mulo!

<sup>12</sup> Ar tol liknan a ututnala ne a toli, sur la ning la atong la mang na aposel, lar tasmani mang anunla a titol bel i arlar ana numila a titol. I maining bel ta kamkamna sur lar iaunan la ana nunla titol. <sup>13</sup> Anasa a taraila ning, a asasongo na aposella, a asasongo na tena titolla, pa la lingir pas la sur lar arlar ana aposella ane Karisito. <sup>14</sup> Bel a utna na kulkulan, anasa e Satan otleng i sira lingir pasi sur ir arlar ana angelo tagun a talapor. <sup>15</sup> Pa bel dalar kulkulan otleng ning anuna tena titolla lar lingir pas la sur lar arlar ana tena titolla tagun a tostos a toltol. Lamur lar los anunla na arlou, arlar ot ana nunla na laulau a titol.

### *A mamahatla ning e Pol i kilangi*

<sup>16</sup> Ar atong ulaki mang gong mulo nuki mang iau a longlong. Ika ning mulor nuki hok manglarne, mulor noren tar a longlong ne sur ir iaunan pasi ot. <sup>17</sup> A momolna, ning a iaunan pas iau ot, bel a warwara arlar ana

nuknuk anuna Leklek, a warwara ka arlar ana longlong. <sup>18</sup> A galis a tarai la iaunan pas la arlar ana toltol anuna rakrakan hanua, i maining iau otleng ar iaunan pas iau ot. <sup>19</sup> Mulo noren tar ka na longlong a tarai sur lar asaer mulo, anasa mulo tastasmai kol. <sup>20</sup> Momol, mulo noren la sur mulor na tena titol oros ka anunla, pa sur lar alaulau mulo, pa lar arop sen anumulo na ututnala, pa lar aitna pas la na matamulo, pa lar pasar na patarimulo. <sup>21</sup> A meme kol ning ar atongi mang mila ot belal rakrakaimila sur milar toli manglarne!

A ututnala ning la iaunan pas la ono, iau otleng a tolsot pasi sur ar iaunan pas iau ono. Onone a warwara arlar ana longlong. <sup>22</sup> La atong aitna pas la mang la na te Hibru, gepi? Iau otleng a te Hibru. La miting na tarai Israel, gepi? Iau otleng a te Israel. La na natnat e Abaram, gepi? Iau otleng a nat e Abaram. <sup>23</sup> La na tena titolla ane Karisito, gepi? Iau a wakak a tena titol tanla rop. A warwara arlar lar a longlong. A titol rakrakai kol tanla rop, ia ka kes pas ting na rumai a dodot a galis a taem, na harumla di toli hok i rakrakai kol, a galis a pukakiar milau ar mat. A ututnala rop ning di toli o mila i itna tana utna ning di toli onla. <sup>24</sup> A tarai Juda la dapis a intauruk arlar ana natol a bonot pa pisir siuk a dapdapis. I arlar ana dilima na taem rop ning la toli hok. <sup>25</sup> Ning a taem di wolot iau ana hatatla. A tarai Rom otleng la dapis iau a galis a taem ana bulse. I arlar ana natol a taem rop ning la toli hok.\* Pa natol a taem a hirua ana sip tisa latasi.† Pa ning a pukakiar na morom pa ning a pukakiar na kamis a saler ana solsol a tasi.

\* **11:25:** Ap 16:22-23 i atai dala ana ning a pukna ning di dapis e Pol ana bulse. † **11:25:** Ap 27:39-44 i atai dala ana ning a pukna ning e Pol i hirua ana sip tisa latasi.

<sup>26</sup> Ia ka han ana galis a tinan. A arlar ana utna na hinirua ana tinan ana malumla, pa dingla na taem milau ar hirua ting na kuna tena kinkinaula. Milau ar barat a hinirua tana nuk a tarai ot, pa a tarai masak otleng. Milau ar barat a hinirua ting na hananuala, pa ting na hanua bel, pa tisa latasi. Pa milau otleng, ar hirua tana asasong na tastasik ana tortorot. <sup>27</sup> A rakrakai pa a titol rakrakai. Pa galis a taem bel a tolsot sur ar borbor. A galis a taem a mos pa a murak. Pa dingla na taem a kapan sur a kaen pa a kilang a kotkoto.

<sup>28</sup> Ika ning a utna i itna kol tana ututnala ne i hanot tetek iau: anuka taialar tetek a tarai a lotu ting na hananuala rop i mamahat kol te na nuk a lalaun ana pukakiarla rop. <sup>29</sup> Ning tik anuna tortorot bel i rakrakai, iau otleng ar kilangi larne. Ning tik di ka ben tari uting na toltol laulau, ir itna kol anak a bal maris ono.

<sup>30</sup> Ning ar iaunan pas iau, ar iaunan pas iau ka ana ututnala ning i apuasa i mang, belal rakrakai. <sup>31</sup> E God, a Taman anundala a Leklek e Iesu Karisito, ning dala atong aleklek pasi onone pa lamur pa bel ir rarop, i tasmani ot mang a atong a momolna. <sup>32</sup> Tumo na hanua Damaskus, a ningnigo miting na hanua ning, ning i titol nahai a king Aretas, i atur tar na tena taialar ting na taman na woroh, sur lar dat pas iau. <sup>33</sup> Ika di alorong purum iau ana rat, ting na windo ana woroh, pa a laun kes ana kuna ningnigo ning.

## 12

*Ana tatatai e God i kibas kas pas e Pol usaot na langit*

<sup>1</sup> Ar iaunan pas iau ot. Ar iaunan pas iau ot ona tatataila pa a reresala ning a Leklek ot i ka asangan tar iau ono, ika anak a warwara ne bel i gas on ta utna. <sup>2</sup> A tasman a

barsan, a te Karisito, ning a bonot pa pisir diat a rau i rop di kibas pasi usaot ana munatol a langit. Bel a tasmani ning di los kas pasi taum ana palaona o a inguna ka. E God ka i tasmani. <sup>3-4</sup> A tasmani mang a barsan ne di los kas pasi usaot na Paradais, ika bel a tasmani ning di los kas pasi taum ana palaona o a inguna ka. E God ka i tasmani. Ning i kes saot, i longor a ututnala ning bel di tolsot pasi sur dir atongi ana warwara, pa di arsairas otleng sur gong tik i atatai ono.

<sup>5</sup> Ar iaunan pas a barsan ne, ika bel ar iaunan pas iau ot, ika ar iaunan pas iau ot ana ututnala ka ning i apuasa i mang belal rakrakai. <sup>6</sup> Ngandek ning ar iaunan pas iau ana ututnala ne, bel a longlong, anasa ar atong ot a momolna. Ika bel a mang sur ar warwara kol ana nuk a tatataila, anasa bel a mang sur tik ir aitna pas a nuknukna hok, sakana a nuknukna bel ir arlar ana utna ning a toli pa a atongi.

*E Pol i gas ning belal rakrakaina*

<sup>7</sup> A ututnala ning e God ka asangan tar iau ono i itna kol, ika di saran tar ning a utna ning i sira suksuk a palaok, sur gong a nuk aleklek pas iau ot ana tatataila ne. A suksuk ning, a tena titol ane Satan ning i alaulau a palaok. <sup>8</sup> Natol a taem ia ka nunung tar a Leklek sur ir kepsen a utna ne kusun iau. <sup>9</sup> Ika i atongi tak mange, "Anak a marmaris tetek u ka sot, pa bel ur kapan sur ta utna masak. Anasa dir oroi puasa a rakrakai hom ning belal rakrakaim." I maining a gas sur ar iaunan pas iau mang, belal rakrakai, sur a rakrakai e Karisito ir kes hok. <sup>10</sup> I maining a gas kol mang belal rakrakai, pa ning di atong laulau iau, pa ana mamahatla, pa ning a taraila la akadik iau, pa ning a kilang a rakrakai a bal maris, anasa a

tortorot o e Karisito. A gas, anasa ning belal rakrakai, a rakrakai.

*E Pol i atong puasa anuna marmaris tetek a tarai Korin*

<sup>11</sup> Ia ka atong tar na longlong a warwara ne, anasa bel mulo nuki mang iau a aposel momol. I tostos sur mulo ot mulor oroi lalan iau mang iau a aposel momol. I momol ot, iau a barsan oros ka, ika bel a natarna tanla ning mulo atong la mang a tatatnan na aposella. <sup>12</sup> Ning a kes napirimulo, a amomol tar iau na matamulo mang iau a aposel momol. A tol na rakrakai a ututnala, a ututnala na kulkulan pa a akinalangla pa bel a ngoro ning a kilang a mama-hatla. <sup>13</sup> Asa a kamkamna ning mulo nuki mang bel a titol wakak tetek mulo, arlar larning a toli tetek a tarai a lotu ting na hananuala otleng? Ngandek ning bel a nunung mulo sur ta utna. Mulor nuk duman sen anuk a toltol laulau ne!

<sup>14</sup> Oroi, ine a munatol a taem ning a sang sur ar han tetek mulo. Pa bel ar nunung sur ta utna ta mulo, anasa bel a mang sur anumulo a mani, a mang sur mulo ot. Anasa bel i tostos sur a kakakla lar tabar na tamanla pa na kabatnanla. I wakak sur a tamanla pa na kabatnanla ot lar suah a utna sur lar tabar na natnatunla onoi. <sup>15</sup> A gas ka sur ar saran tar anuk a ututnala rop tetek mulo, pa ar saran tar anuk a lalaun otleng. Ning anuk a marmaris tetek mulo ir itna kol, mangmangasa, anumulo a marmaris tetek iau ir natarna ka?

<sup>16</sup> Mulo ka tasmani mang bel a nunung pas ta mani ta mulo. Ika, sakana tik tagun mulo ir atongi mang iau a tena tastasim pa ia ka asongo pas ta utna ta mulo.

<sup>17</sup> Mangasa, ia ka kibas pas ta utna ta mulo, tana tarai ning a sune sen la tetek mulo? <sup>18</sup> A nunung pas e Taitus sur ir han tetek mulo, diau

taum ana ning a tasimila otleng. Mangasa, e Taitus ka los pas ta utna ta mulo? Bel i toli. Mila murka ning a toltol, pa ning a ngas ka ning mila sira muri.

*E Pol i matmataut sur a tarai Korin*

<sup>19</sup> Mangasa, mulo nuki mang mila warwara alar mila ka kusun mulo? Mila warwara ana momolna namatana e God arlar ana tena titolla ane Karisito. A ututnala rop ning mila toli, mila toli sur ir arakrakai mulo. <sup>20</sup> A matmataut, sakana ning ar hanot tetek mulo, bel ar oroi barat a toltolla ning a mang sur ar oroi i. Pa mulo otleng bel mulor gas ana toltol ning ar hanot onoi. A matmataut sakana ar pastek pas a ngas a toltol larne: mulo warwara na arlak, mulo bal laulau, mulo balakut, mulo kes sarara, mulo arle, mulo warwara kumkumna, mulo dat abarah pukulumulo, pa anumulo a keskes i loklokron. <sup>21</sup> A matmataut, sakana ning ar hanot ulak, anuk a God ir anatarne pas iau namatamulo. Pa ar bal maris ana galis omulo ning la tol a laulauna tagun nating pa bel la lingir a nuknukinla kusun anunla na dur a toltolla, na toltolla na pamuk pa na nuknukinla sur a toltol laulaula ning la sira muri.

## 13

*E Pol i atumarang la*

<sup>1</sup> Ine a munatol a tinan anuki tetek mulo. Pa di ka tumus tari ting na Buk Tabu mang, "Ning ir naur o ir natol anunla a warwara i takai ka on ta utna, anunla a warwara i momol." *Lo 19:15*

<sup>2</sup> Ana nuk a munaur a tinan ot tetek mulo, ia ka atumarang tar mulo ana numulo na toltol laulaula. Pa onone ning a kes masik, ar atai mulo ulak ot ana utna ne: Lamur, ning ar hanot, ar warwara rakrakai tetek la ning belot la lingir a nuknukinla kusun anunla na toltol laulaula tagun

nating, pa tetek esi otleng ning i tol a toltol laulau. <sup>3</sup> Mulo mang sur mulor tasman momoli mang a warwara ana warwara ane Karisito, gepi? A rakrakai e Karisito bel i natarna, i sira titol napirimulo ana rakrakai. <sup>4</sup> I momol, ning di sai ahat e Karisito saot na rakai kutus, bel ta rakrakaina. Ika ana rakrakai e God ot, i laun ulak. Manglarne belal rakrakaim mila taum o e Karisito, ika mila laun taum onoi ana rakrakai e God, sur milar titol tetek mulo.

<sup>5</sup> Mulor oroi anumulo a lalaun, ning anumulo a tortorot i momol o bel. Mulor toho a lalaun anumulo. Mulo tasmani mang a lalaun ane Karisito Iesu i kes omulo, gepi? Ning bel, anumulo a tortorot bel i momol. <sup>6</sup> A tortorot mang mulor tasmani otleng mang mila laun momol ana tortorot ane Karisito. <sup>7</sup> Pa onone, mila nunung tetek e God mang gong mulo tol ta laulauna, bel sur a taraila lar oroi i mang mila na tostos a taraila, ika sur mulor tol ka a ututnala ning i tostos. Ning a taraila la nuki mang bel mila tostos, i wakak ka. <sup>8</sup> Bel milar tol ta utna ning ir sairas a momolna ane God, milar muri ka. <sup>9</sup> Ning mulo rakrakai pa mila bel mila rakrakai, mila gas ka. Pa mila nunung sur mulor tostos ana numulo a tortorot. <sup>10</sup> Ine a kamkamna ning a tumus na ututnala ne tetek mulo ning belot a hanot. Pa ning ar hanot, bel ar warwara ana rakrakai a warwara tetek mulo, pa bel ar warkurai mulo ana warkurai ning a Leklek i ka saran tari tak. I saran tari tak sur ar arakrakai mulo onoi, bel sur dir alaulau mulo onoi.

#### *A ararop a warwara*

<sup>11</sup> Anuk a ararop a warwara ne: Na tastasimila, mulor gas! Mulor atostos mulo, mulor mur anuk a warwara, ir takai ka a nuknukimulo, pa mulor kes na molmol artalai. Pa e God ning i

sira saran a marmaris pa a bal molmol ir kes taum omulo.

<sup>12</sup> Ning mulo arpastek, mulor maris artalai mulo taum ana argoro a marmaris, pa mulor toli ana totoh a toltol.

<sup>13</sup> A taraila rop ane God ning la kes taum hok la saran anunla na marmaris tetek mulo.

<sup>14</sup> A marmaris anun a Leklek Iesu Karisito, pa a marmaris ane God, pa a keskes taum ana Talngan Tabu ning i dat taum dala, ir kes taum omulo rop.



## A Pas ane Pol tetek a tarai Galesia

### *A warwara talapor nigo*

E Pol i tumus a pas ne tetek a tarai ning la kes ting na hananuala tumo na papar Galesia. Lanigo e Pol i han taltal ana hananuala tumo e Galesia pa i warawai ana Wakak a Warwara tetek la. A tarai a lotu tumo e Galesia belsur a tarai Juda, pa e Pol i atai la mang, a tortorot ka o e Iesu ir tolsot sur ir alaun la.

Lamur a tarai Juda la hanot pa la atongi mang, a warwara ane Pol bel i tostos. La atongi mang, a tarai a lotu lar mur a Warkuraila ane Moses, sur lar tostos namatana e God. La atongi mang dir kot talilis a tarai a lotu rop. A kot talilis i arlar ana asilang mang la ka arlar ana tarai Juda pa lar mur rop a Warkuraila ane Moses pa anuna tarai Juda. Ning e Pol i longori i balakut kol. I atongi mang, anunla asaerla bel i tostos. Ngandek ning dala tostos anasa dala mur a Warkuraila ane Moses, a minat ane Iesu ir utna oros ka, pa bel ir tolsot sur ir kepsen anundala na toltol laulau. E Pol i warwara rakrakai tetek a tarai Galesia ana pas ne. I mang sur lar han masak kusun a asaerla anuna asasongo na tena asaerla, pa lar ulak sur a tortorot ka o e Iesu.

### **A tinan ana buk Galesia:**

Ning a Wakak a Warwara ka (1:1-10)

E Pol i hanot a aposel momol (1:11-2:21)

E God ir alaun dala kamna ka ana nundala tortorot o e Iesu, bel ning dala mur a Warkuraila (3:1-4:31)

Dala langolango kusun a rakrakai ana toltol laulau pa dalar mur a nuknuk ana Talngan Tabu (5:1-6:10)

A araop na warwara ane Pol tetek la (6:11-18)

<sup>1</sup> Iau e Pol, a aposel, a tumus a pas ne tetek mulo. Bel ta barsan mite lapiu i aslang pas iau, pa bel otleng a tarai la sune iau sur ar aposel. E Iesu Karisito ot pa e God e Tamana, dia aslang pas iau. E God, esaning i akamtur ulak pas e Iesu kusun a minat. <sup>2</sup> Pa a tastasikla rop ning mila kes taunte, la malmaling taum hok ana pas ne tetek mulo a tarai a lotu rop ting na papar Galesia.

<sup>3</sup> A marmaris pa a bal molmol miting ta e God a Tamandala pa a Leklek e Iesu Karisito ir kes o mulo. <sup>4</sup> E Iesu i saran anuna lalaun sur anundala na toltol laulau, sur ir alangolango dala kusun a toltol laulaula ning a tarai la toli ana raula ne, mang ot lar a nuknuk ana nundala God a Tamandala. <sup>5</sup> Dalar rakan alekleki, pa bel ir rarop. Amen.

### *Takai ka a Wakak a Warwara*

<sup>6</sup> A kulkulan kol mang belot i bongnani, pa mulo ka han masak kusun e God, ning i kabah pas mulo ana marmaris ane Karisito. Pa onone mulo ka talingir sur a maskana asasaer. <sup>7</sup> A asasaer ning, bel a Wakak a Warwara, ika onone dingla na tarai la aloklokron mulo pa la mang sur lar lingir a Wakak a Warwara o e Karisito. <sup>8</sup> Ning mila ot, o ta angelo otleng misaot na langit ir warawai ana maskana asasaer, ning bel i arlar ana Wakak a Warwara mila warawai tetek mulo onoi, i wakak ning ir hirua tikin ana warkurai ane God. <sup>9</sup> Ia ka atai nigon tar mulo, pa onone ar atong ulaki mang, ning tik ir warawai tetek mulo anal asasaer ning bel i arlar ana Wakak a Warwara ning mulo ka kibas pasi, i wakak sur ir hirua tikin ana warkurai ane God!

<sup>10</sup> Bel a mang sur a tarai lar agasgas pas iau, a mang ka sur e

God ot ir gas hok. Bel a mang sur ar agasgas ka a tarai. Ning ar agasgas ka a taraila, iau bel a tena titol oros ane Karisito.

*E God ot i kabah pas e Pol sur ir aposel*

<sup>11</sup> Na tastasikla, a mang sur mulor tasmani mang a Wakak a Warwara ning a warawai onoi, bel a asasaer anuna tarai mite lapiu.

<sup>12</sup> Bel a kibasi tana tarai, pa bel otleng di asaer iau onoi. E Iesu Karisito ot i atalpori tak.

<sup>13</sup> Mulo ka longor tar anuka ngas a lalaun tagun nating, ning a tur rakrakai ana lotu Juda, pa a alaulau kol a tarai a lotu ane God, pa a toho i sur ar kamar sen la.

<sup>14</sup> A tur rakrakai ana lotu Juda, pa anuka tastasman ana lotu i itna tan a halalikla rop ning anumila na rau i arlar. A rakrakai kol, sur ar mur wakak a toltolla anuna tumtubuk tagun nating. <sup>15-16</sup> Ika, ning belot di agon iau, e God ka aslang pas iau, pa ana nuna marmaris, i kabah pas iau. Pa i gas sur ir asangan e Iesu e Natnalik tetek iau, sur ar warawai onoi tetek a taraila ning bel a tarai Juda. Bel ta barsan i asaer iau onoi. <sup>17</sup> Pa bel a han usaot e Jerusalem tetek la ning la ka aposel nigo tak sur lar asaer iau. Ika a han kakat uto e Arebia\*, pa lamur a ulak utumo e Damaskus.

<sup>18</sup> Lamur ana natol a rau, a bot han usaot e Jerusalem sur ar tasman e Pita, pa a kes taum onoi ning a bonot pa pisir dilima na pukakiar. <sup>19</sup> Bel a oroi ta aposel otleng, e Jems ka a tas a Leklek. <sup>20</sup> Oroi! A lele namatana e God mang asaning a tumusi tetek mulo bel a asongo!

<sup>21</sup> Lamur a han utumo ana papar Siria, pa a papar Silisia. <sup>22</sup> Ika a tarai a lotu ane Karisito tumo e Judia bel la tasman iau. <sup>23</sup> La longor ka a warwara hok mang, "A

barsan ning i mang sur ir alaulau dala, onone i warawai kama ana tortorot o e Iesu, ning nating i mang sur ir kamar seni." <sup>24</sup> Pa la rakan aleklek pas e God anasa hok.

## 2

*A aposella la gasgas pas e Pol*

<sup>1</sup> Lamur ana ning a bonot pa pisir diat a rau, a ulak kale usaot e Jerusalem, taum o e Barnabas, pa a ben otleng e Taitus. <sup>2</sup> A han anasa e God ot i atai iau sur ar han. Pa a atai a ningnigola ka anuna tarai a lotu, ana Wakak a Warwara, ning a sira warawai onoi tetek a taraila ning bel a tarai Juda. Anasa, a matmataut sakana a ningnigola bel lar noren anuka titol nigo pa anuka titol onone, pa ir utna oros ka. <sup>3</sup> Mia kes taum o e Taitus, a te Grik, ika bel la angongosi sur dir kot talilisi.

<sup>4</sup> Mila warwara ana utna ne, anasa dingla na asasongo na tena tortorot, la ka kas kumna tar tetek a tena tortorotla. La mang sur lar turan a keskes langolango ning dala ka kibas pasi ta e Karisito Iesu, sur lar tol dala lar a tena titol orosla ulak ana Warkurai. <sup>5</sup> Ika bel mila malmaling pas la. Mila mang sur a momolna ana Wakak a Warwara ir kes ot tetek mulo.

<sup>6</sup> A taraila ning di atong la mang a ningnigola ana lotu la kaning. Ana nuknukik ot, ning la a ningnigola o bel, i utna oros ka. Tetek e God a taraila rop la arlar ka. Bel la tugus tar ta utna ana Wakak a Warwara ning a warawai onoi. <sup>7</sup> La oroi lalani mang e God ot i saran tar a titol sur ar warawai ana Wakak a Warwara tetek a taraila ning bel a tarai Juda, arlar o e Pita ning i warawai ana Wakak a Warwara tetek a tarai Juda. <sup>8</sup> E God i saran tar a rakrakai ta e Pita sur ir aposel tetek a tarai Juda, mang otleng larning tetek iau, i saran tar a rakrakai tak sur ar

\* 1:17: E Arebia a hanua bel.

apospel tetek la ning bel a tarai Juda. <sup>9</sup> E Jems, Pita pa e Jon, ning a tarai la tasmani mang natola a ningnigo, ditol oroi lalan a marmaris ning e God i tabar iau ono, pa ditol sikan miau ma e Barnabas sur miar titol. Ditol malmaling sur miar han tetek a taraila ning bel a tarai Juda, pa ditol, ditol ar han tetek a tarai Juda. <sup>10</sup> Pa ditol nunung miau sur miar nangan a kapan na tarai ting na nunla lotu, a titol ning iau otleng a mang sur ar toli.

*E Pol i atai e Pita ana nuna rongo*

<sup>11</sup> Ning e Pita i hanot tumo e Antiok, a atai matana ot ana utna ning i toli, anasa i ka rongo. <sup>12</sup> E Jems i sune dingla na tarai Juda ning la torotorot o e Karisito utumo e Antiok. Lanigo ana tinan ot anunla, e Pita i sira hangan oros ka taum ana taraila ning bel a tarai Juda. Ika ning la hanot, i kes masak kusun la ning bel a tarai Juda, pa bel ma i hangan taum onla. Anasa i matatan a tarai Juda ning la mang sur dir kot talilis a tarai a lotu rop. <sup>13</sup> Pa dingla na te Juda ning la tortorot o e Iesu, la mur e Pita pa bel ma la hangan taum ana tarai a lotu ning bel a tarai Juda. Pa nunla na toltol ne, i ben rongon otleng e Barnabas.

<sup>14</sup> Ning a oroi a utna ne la toli, bel i mur a momolna ana Wakak a Warwara, a atai e Pita namatanla rop mang, "Pita, u a te Juda, ika u laun arlar ana taraila ning bel a tarai Juda, ning u kes pa u hangan taum onla. Asa kamkamna ning u angongos a taraila ning bel a tarai Juda sur lar mur a toltol anuna tarai Juda?"

*A tarai rop ning la tortorot o e Karisito, e God i atong la mang la tostos*

<sup>15</sup> "Di agon dala a te Judala, bel dala arlar ana tarai ning bel a tarai Juda, ning dala atong la

mang a tena laulaula. <sup>16</sup> Ika, dala tasmani mang e God bel i atong tik mang a tena tostos ning i mur a Warkuraila. Ir atong tik mang a tena tostos ning i tortorot o e Iesu Karisito. Manglarning, dala otleng dala tortorot o e Karisito Iesu, sur dalar tostos namatana e God. Dala tostos ning dala tortorot o e Karisito, pa bel ana mur warkurai. Anasa, e God bel ir atong tik mang a tena tostos ning i mur a Warkuraila.

<sup>17</sup> "Namatana tarai Juda dala a tena laulaula, anasa dala tortorot o e Karisito sur dalar tostos namatana e God, pa bel dala mur a Warkuraila sur dalar tostos namatana. I mangasa, e Karisito i a kamkamna sur dala na tena laulaula? Bel momol! <sup>18</sup> Ika, ning ar mur ulak a Warkuraila ning ia ka manah pas kusun la, i asangani mang iau a tabun longor ana Warkuraila.

<sup>19</sup> "Ning a mang sur ar mur a Warkuraila, a Warkuraila ot i suah tar iau ana minat. Pa ia ka mat kusun la, sur ar laun sur e God. <sup>20</sup> Di ka sai ahat tar iau taum o e Karisito saot na rakai kutus, pa bel ma iau ne a laun, e Karisito i laun hok. A lalaun na palaondi ning a laun ono, a laun ana tortorot o e Nat e God, ning i maris iau pa i saran tar anuna lalaun sur iau. <sup>21</sup> Bel a noren oros tar a marmaris ane God. Ngandek ning e God ir atong tik mang i a tena tostos ana mur Warkuraila, e Karisito i mat oros ka."

### 3

*A tortorot o e Iesu Karisito*

<sup>1</sup> A tarai Galesia, mulo na longlong! Esi i aloklokron mulo? Ia ka atai talapor tar mulo ana minat ane Iesu Karisito saot na rakai kutus, lar ot ning mulo ka oroi tari. <sup>2</sup> A mang sur ar deken mulo ana ning a utna larne: Mulo kibas a Talngan Tabu anasa mulo mur a warkuraila? Bel! Mulo

kibasi anasa mulo longor a Wakak a Warwara pa mulo tortorot onoi. <sup>3</sup> Mangasa, mulo na longlongla? Mulo turpasi ana rakrakai ana Talngan Tabu. Pa onone i mangasa, mulo mang sur mulor ararop ana rakrakaimulo ot? <sup>4</sup> Mangasa, a galis a mamahat ning mulo kilangi i utna oros ka? Bel a tortorot larning. <sup>5</sup> Mangmangasa, e God i tabar mulo ana Talngan Tabu pa i tol a ututnala na kulkulan na arpotor imulo, anasa mulo mur a Warkuraila anuna tarai Juda? Belal! E God i toli anasa mulo longor a Wakak a Warwara pa mulo tortorot onoi.

<sup>6</sup> A Buk Tabu i warwara o e Abaram mange, "I tortorot o e God, pa e God i atongi mang i tostos." *Stat 15:6*

<sup>7</sup> Mulo tasmani mang la ning la tortorot, la na natnat e Abaram.

<sup>8</sup> A Buk Tabu ka atong nigon tari mang e God ir atong a taraila ning bel a tarai Juda mang a tena tostosla anasa la tortorot. E God ka atai nigon tar e Abaram ana Wakak a Warwara mange, "Dir angisngis a tarai miting na matanitu rop hom." *Stat 12:3*

<sup>9</sup> Pa onone la rop ning la tortorot di angisngis la, larning di angisngis e Abaram ning i tortorot.

<sup>10</sup> La ning la nuki mang lar mur a warkurai sur e God ir atong la mang a tena tostos, a rakrakai a balakut ane God ka kes onla. Anasa di ka tumus tari ting na Buk Tabu mang, "A rakrakai a balakut ane God ka kes o esining bel i mur sot pas asa rop ning di ka tumus tari ana Buk na warkurai." *Lo 27:26*

<sup>11</sup> I talapor tetek dala mang e God bel ir atong tik mang a tena tostos ning i mur a Warkuraila. Anasa, a Buk Tabu i atongi mange, "A tena tostos ir laun ana tortorot." *Hab 2:4*

<sup>12</sup> Esining i mur a Warkuraila sur ir tostos onoi, bel i tortorot. A

Buk Tabu i atongi, "Esining i mur sot pas a Warkuraila rop, ir laun." *Liwai 18:5*

<sup>13</sup> A Warkuraila i suah tar dala ana rakrakai a balakut ane God. Ika e Karisito i lou langolango pas dala kusun a rakrakai a balakut ane God. Pa i tur keles dala, ning i los pas a rakrakai a balakut ning sur dala. Anasa di ka tumus tari ting na Buk Tabu mang, "Esining di akulami saot ana rakai, a rakrakai a balakut ane God i kes onoi." *Lo 21:23*

<sup>14</sup> E Karisito i lou langolango pas dala, sur e God ir angisngis a tarai ning bel a tarai Juda, larning i angisngis e Abaram. Manglarning ana tortorot o e Karisito Iesu, dalar kibas a Talngan Tabu, arlar ana nuna lele.

*A lele ane God i itna tana Warkuraila*

<sup>15</sup> Na tastasikla, ar atong a warwara larlar ta mulo. Mulor nuk pasi, ning ir naur a barsan dia lele tar pa dia ka tol tar ta malmaling taum, bel tik ulak ir lingir lar pasi.

<sup>16</sup> Mang otleng larning, e God ka lele tar tetek e Abaram pa tetek e natnalik. Bel i atongi mang, "tetek na natnatna," a kamna mang, a galis a tarai. Ika, i atongi mang, "tetek e natnalik," i kamna mang, takai ka a barsan, e Karisito ot. <sup>17</sup> Ine a kamkamna: A Warkuraila ning la hanot diat a mar pa natol a bonot a rau lamur, bel la lingir lar pas a malmaling taum ane God tetek e Abaram, ning e God i lele nigo tar teteki. <sup>18</sup> Ngandek ning a artabar ane God i hanot tetek dala anasa dala mur a Warkuraila, bel i hanot kamna ana nuna lele. Ika e God i lele onoi tetek e Abaram ana nuna nnan marmaris ka teteki.

<sup>19</sup> E God i saran a Warkuraila sur asa? I sarani sur a tarai lar oroi lalan anunla na toltol laulau. Di mur a Warkuraila tuk a nat e Abaram i hanot, esaning e God i lele tar onoi, e Karisito ot. Ning e God i saran a Warkuraila, i sune a angelola onoi tetek e Moses,

esaning i tur potor a taraila pa e God, sur e Moses ir sarani tetek la. <sup>20</sup> Ika, ning e God i lele tetek e Abaram, bel tik i tur potor diau. E God sot ka.

*Dala langolango anasa dala tortorot o e Karisito*

<sup>21</sup> I mangasa, a Warkuraila pa a lelela ane God dia hirua artalai? Bel momol! Ngandek ning a Warkuraila lar saran a lalaun tana taraila, lar tostos namatana e God anasa la mur a Warkuraila. <sup>22</sup> Ika a Buk Tabu i atong puasai mang, a taraila rop te na rakrakan hanua la kes ana dodot ana nunla toltol laulau. Manglarning, la ka ning la tortorot o e Iesu Karisito lar kibas pas a artabar ning e God i lele tar onoi.

<sup>23</sup> Ning belot di asangan a ngas ana tortorot tetek dala, dala kes na dodot ana rakrakai ana Warkuraila. Bel dala kes langolango tuk ning e God i atalapor a tortorot o e Iesu Karisito tetek dala. <sup>24</sup> A Warkuraila i arlar ana tena tai alar tetek dala, sur ir ben dala tetek e Karisito, sur dalar tortorot onoi pa dir atong dala mang a tena tostosla namatana e God. <sup>25</sup> Ika onone, a ngas ana tortorot ka hanot, larning bel ma dala kes ulak nahai a Warkuraila, ning i tai alar dala.

*Dala na natnat e God anasa ana tortorot*

<sup>26</sup> Onone mulo rop a natnat e God, anasa mulo tortorot o e Karisito Iesu. <sup>27</sup> Ning di ka baptais tar mulo, i asangani mang mulo takai taum o e Karisito, pa mulo mermer ana nuna lalaun. <sup>28</sup> Ana tortorot o e Karisito, bel tik i maskana namatana e God: a tarai Juda pa a tarai masik, na tena titol oros pa la ning bel na tena titol oros, a taraila pa gurarala. Mulo rop mulo takai ka o e Karisito Iesu. <sup>29</sup> Ning mulo ane Karisito, mulo na natnat e Abaram, pa mulor kibas a utna ning e God i lele tar onoi tetek e Abaram.

## 4

*A warwara larlar ona naur a tamana*

<sup>1</sup> Ar warwara tetek mulo ana warwara larlar. A nat a barsan ir kibas a gongonla rop ane tamana ning tamana ir mat. Ika ning i kaklik ot, belot ir kibasi, ir arlar ka lar a tena titol oros. <sup>2</sup> Na tena tai alar lar tai alari taum ana nuna gongonla, pa ir longlongor tanla, tuk ning ir sot a taem ning e tamana i kubus tari, sur a natna ir kibas anuna gongonla. <sup>3</sup> Mang otleng larning tetek dala, ning e Karisito belot i hanot, dala arlar lar a kaklik, dala a tena titol oros ana motla mite na rakrakan hanua. <sup>4</sup> Ika, ning a taem ka sot, e God i sune Natnalik ute. A hane i agon pasi, pa i kes nahai a warkurai ana tarai Juda, <sup>5</sup> sur ir lou langolango pas la ning la kes nahai a warkurai, sur e God ir ras pas dala sur dala na natnatna.

<sup>6</sup> Mulo na natnat e God ot. Ine a kamkamna ning i saran a Talngan Tabu, a Inguna e Natnalik, sur ir kes ting na balamulo, pa i arkabah tetek e God mange, "Aba! Tata!" <sup>7</sup> Onone bel mulo kes na tena titol oros ulak ma. Mulo na natnat e God, pa mulor kibas a ututnala ane God.

*E Pol i nuknuk kol ana tarai Galesia*

<sup>8</sup> Nating ning bel mulo tasman e God, mulo na tena titol oros ana godla ning bel a momol a godla. <sup>9</sup> Ika onone mulo ka tasman a momol a God. Momol, e God i tasman mulo. Pa sur asa ning mulo ulak sur a ingun laulau orosla mite na rakrakan hanua ning bel al rakrakainla pa bel la to pas ta utna? Mangasa, mulo mang sur mulor na tena titol oros ulak anunla? <sup>10</sup> Mulo rakrakai kol sur mulor mur a Warkuraila anuna tarai Juda ana tatatnan pukakiar, pa kalangla, pa raula, pa mulo nuki mang mulor tostos onoi. <sup>11</sup> A matmataut kol o mulo, sakana

anuka titol tetek mulo ir utna oros ka.

<sup>12</sup> Na tastasikla, a nunung rakrakai mulo sur mulor kes langolango kusun a warkurai arlar hok, anasa ia ka hanot arlar o mulo ning belsur a tarai Juda. Nating ning a kes napirimulo, bel mulo alaulau iau. <sup>13</sup> Mulo ka tasmani mang, a warawai nigo ana Wakak a Warwara tetek mulo anasa a sasam. <sup>14</sup> Anuka tinsaman i amatmataut mulo, ika bel mulo bilbilor iau, pa bel mulo kepsen iau. Mulo gasgas pas iau arlar ana angelo ane God, o arlar o e Karisito Iesu ot. <sup>15</sup> Sakana ning mulor tolsot pasi, mulo kar lek sen a kalso na matamulo pa mulo kar sarani tak. Ika onone, kanaha ma a gasgas ning? <sup>16</sup> Mangasa, onone mulo nuki kama mang a hanot anumulo a hirua, anasa a atong a momolna ta mulo?

<sup>17</sup> Na asasongo na tena asaer ning, la rakrakai sur mulor mur la, ika belsur ir awakak mulo. La mang ka sur mulor tapagal kusun mila, sur mulor rakrakai taum onla. <sup>18</sup> I wakak ning mulor rakrakai sur a utna ning i wakak. Pa mulor rakrakai onoi, ning dala kes taum, pa ning a kes masik otleng kusun mulo.

<sup>19</sup> Na natnatukla, a kilang ulak a kankan sur mulo arlar ana hane ning i agon. Ar kilangi tuk mulor arlar o e Karisito. <sup>20</sup> A mang sur ar kes napirimulo, pa ar warwara na marmaris tetek mulo, anasa bel a tasmani mang asa ulak ma ar toli tetek mulo.

*A warwara larlar o e Hagar pa e Sara*

<sup>21</sup> Ning mulo mang sur mulor mur a Warkuraila, mulor keles iau: Mulo tasman ot a kamkama Warkuraila? <sup>22</sup> A Buk Tabu i atongi mang, e Abaram naur a natna. Takai a nat a hane ning a tena titol oros, pa takai otleng, a nat a hane ning i kes langolango, pa bel

i tena titol oros. <sup>23</sup> A nat e Abaram ning a tena titol oros i agoni, i agoni arlar ana ngas a tinaulai mite na rakrakan hanua. Ika a nat e Abaram ning a hane ning i kes langolango i agoni, i agoni anasa e God i tolsot pas anuna lele.

<sup>24</sup> A warwara ne di larlar ondala. Naur a hane ne dia tur aslang naur a kunubus. Ning a kunubus ning e God i toli saot ana mangir Sinai ning i saran a Warkuraila ta e Moses. E Hagar i tur aslang a kunubus ning, pa a taraila ning la kes ana kunubus ning, la arlar ana tena titol oros. <sup>25</sup> E Hagar i tur aslang a mangir Sinai tumo e Arebia, pa i arlar o e Jerusalem onone, anasa i kes na tena titol oros taum ana natnatna.

<sup>26</sup> Ika e Jerusalem saot na langit, i kes langolango pa i arlar o e Sara, a hane ning i kes langolango, pa i a kabatnandala na tena tortorot. <sup>27</sup> Di ka tumus tari ting na Buk Tabu mange,

“U a pombo na hane ning bel u agon, ur gas,  
ur saksak pa ur kukuk ana gasgas,  
u ning bel u kilang ta kankan na agon.

Anasa na natnat a hane, ning anuna barsan i han pas kusuni, lar galis kol,  
tana hane ning i kes napir a nuna barsan.” *Ais 54:1*

<sup>28</sup> Mulo na tastasikla, di agon mulo ana lele ane God, larning di agon e Aisak ana lele ane God. <sup>29</sup> E Ismael ning di agoni ana ngas a tinaulai mite na rakrakan hanua, i akadik e Aisak ning di agoni ana rakrakai ona Inguna e God. Mang otleng larne tetek dala onone. <sup>30</sup> Ika, asaning a Buk Tabu i warwara tar onoi? I atongi mang, “Ur kepsen sen a tena titol oros a hane taum e natnalik. Anasa a nat a tena titol oros bel ir kibas a gongon ane tamana, taum ana nat a hane ning i kes langolango.” *Stat 21:10*

31 Na tastasikla, bel dala na nat a tena titol oros a hane. Dala na nat a hane ning i kes langolango.

## 5

### *A keskes langolango o e Karisito*

<sup>1</sup> E Karisito ot ka alangolango pas dala, sur dalar langolango momol. Mulor tur rakrakai, pa gong mulo noren tar tik sur ir dot akes ulak mulo sur mulor arlar ana tena titol orosla.

<sup>2</sup> Longori! Iau e Pol, a atai mulo, ning mulor malmaling sur dir kot talilis mulo sur mulor tostos namatana e God, a titol ane Karisito ir utna oros kama tetek mulo. <sup>3</sup> Ar atalapor ulaki tetek mulo taktakai mang: Ning mulor malmaling sur dir kot talilis mulo, mulor mur a Warkuraila rop ane Moses. <sup>4</sup> Ning mulo tohi sur dir atong mulo mang mulo tostos anasa mulo mur a Warkuraila, mulo ka kes sarara kusun e Karisito. Mulo ka han masuk pas kusun a marmaris ane God. <sup>5</sup> Ika dala, ana rakrakai ana Talngan Tabu dala harnanai ana tortorot sur e God ir atong dala mang dala tostos. <sup>6</sup> Ning dala kes o e Karisito Iesu, ning di kot talilis tik, o bel di kot talilisi, i utna oros ka namatana e God. Ika, a utna ning i utna namatana e God, ning tik i tortorot, pa anuna tortorot i tol otnan a marmaris.

<sup>7</sup> Nating mulo dun wakak ana arsoksok. Ika onone, esining ka aloklokron tar mulo, pa bel mulo longor ma ana momolna? <sup>8</sup> A asasaer ne, ning i aloklokron tar mulo bel i han miting ta e God, esaning i kabah pas mulo sur mulo anunai. <sup>9</sup> I arlar ana warwara larlar ne: "Al siklik is ka i tolsot pasi sur ir abubus pas a palawa rop." <sup>10</sup> Ika iau ot, a tortorot mang a Leklek ir nangan mulo sur mulor malmaling taum hok. Pa esining i aloklokron a nuknukimulo, ir kilang ot a rakrakai a warkurai ane God teteki.

<sup>11</sup> Na tastasikla, bel ma a asaer ulak a taraila ana kot talilis. Ine a kamkamna ning a tarai Juda la akadik iau. Ngandek ning ar asaer ot a taraila ono, bel lar akadik iau. Ika la akadik iau anasa a asaer a taraila sur lar tortorot ka ana rakai kutus ane Karisito. <sup>12</sup> A mang sur la ning la aloklokron a nuknukimulo sur dir kot talilis mulo, lar sil pas la!

<sup>13</sup> Na tastasikla, e God ka kabah pas mulo sur mulor langolango momol. Ika gong mulo nuki mang mulo ka langolango sur mulor mur a lalaun turai. Mulor nangan artalai mulo ana marmaris. <sup>14</sup> A Warkuraila rop ane God, di suah taum pas la sur takai a warkurai kama, ne: "Ur mang sur a halim larning u mang sur u ot." *Liwai 19:18*

<sup>15</sup> Ika ning mulo akadik artalai mulo arlar ana inagoila ning la harat artalai la pa la ien artalai la, mulor atumarang mulo, sakana mulor alaulau rop sen mulo.

### *Dalar noren a Talngan Tabu ir nigon dala*

<sup>16</sup> Onone, ar atongi tetek mulo mange: Mulor noren a Talngan Tabu ir nigon anumulo a lalaun. Ning mulor toli larning, bel mulor mur a lalaun turai. <sup>17</sup> A lalaun turai i mang sur asaning bel i arlar ana nuknuk a Talngan Tabu, pa a Talngan Tabu otleng i mang sur asaning bel i arlar ana lalaun turai. Naur a utna ne, dia harum artalai, pa bel mulo tolsot asaning mulo mang suri. <sup>18</sup> Ika, ning a Talngan Tabu ir nigon mulo, mulor kes langolango kusun a Warkuraila.

<sup>19</sup> Dala ka tasman a laulau a toltolla ning a lalaun turai i sira toli. Ine la: A pamuk a toltolla, a dur a toltol, a nuknuk sur a tol a toltol laulau, <sup>20</sup> a lotu tetek a asasongo na godla, a wah, a arngetnget, a arngaras, a nuknuk laulau, a balakut, a nuknuk sur a

keskes na lekkek, a keskes sarara pa keskes taptapagal, <sup>21</sup> a ram sur a utna ana tik masak, a sipak, a kukuk taltal taum ana longlong a toltol, pa al toltol laulau otleng larning. Ia ka atumarang nigon tar mulo kaba, pa ne a atumarang mulo ulak, mang a taraila ning la tol a toltolla ne, bel lar kibas pas a matanitu ane God.

<sup>22</sup> Ika, a wana Talngan Tabu ine la: A marmaris, a gasgas, a bal molmol, a kes wowon, a harnangai tetek tik masak, a wakak a toltol, a momol a toltol tetek tik, <sup>23</sup> a hanrawai, a toltol ning tik ir warkurai tostos anuna lalaun. Bel ta warkurai ir sairasa a toltolla ne.

<sup>24</sup> A taraila ane Karisito Iesu, la sai ahat a lalaun turai saot na rakai kutus ane Karisito.

<sup>25</sup> Ning dala laun taum ana Talngan Tabu, i wakak ning dalar hanhan taum onoi. <sup>26</sup> Gong dala iaunan, gong dala akutkut artalai dala, pa gong dala ram sur a utna ana tik masak.

## 6

### *A harnangai artalai*

<sup>1</sup> Na tastasikla, ning ta tena tortorot ir punga ana toltol laulau, mulo ning a Talngan Tabu i nigon mulo, mulor dat atur ulak pasi ana toltol a hanrawai. Ika mulor tai alar mulo ot, sakana mulo male mulor punga ana ta arlam. <sup>2</sup> Mulor nangan artalai mulo ana numulo na mamahatla. Ning mulo toli lerne, mulo tolsot pas a warkurai ane Karisito. <sup>3</sup> Ning tik i nuki mang i lekkek, ika bel, i ot i asongo ulak pasi. <sup>4</sup> Taktakai ir toh anuna titolla, sur i ot ir gas ono. Ika gong i lar anuna titol taum ana ta titol ana tik masak. <sup>5</sup> Anasa taktakai ir los ot a mamahat anunai.

<sup>6</sup> Ning tik i asaer mulo ana warwara ane God, mulor nangani anal wakak a utna miting na numulo a ututnala.

### *Dalar sol ot a utna ning dala oman tari*

<sup>7</sup> Gong mulo asongo ulak mulo. Bel tik ir asongo sot pas e God. A barsan ir sol ot a ututnala ning i oman tari. <sup>8</sup> Esining i mur a lalaun turai, ir sol pas a minat tikin. Pa esining i mur a Talngan Tabu, ir sol a lalaun tikin tana Talngan Tabu. <sup>9</sup> Gong dala ngoro ana wakak a titolla ning dala toli, pa gong dala manah kusuni. Ning a pukakiar i sot, dalar tong akes pas a wana nundala a titol. <sup>10</sup> Ning dala tolsot pasi sur dalar tol a wakak a titol tetek tik, i wakak sur dalar toli. Dalar tol a wakak a titol nigo tetek a tena tortorotla, pa lamur tetek a tarai masak otleng.

### *A ararop a warwara*

<sup>11</sup> Mulo oroi a tnan tumtumus ne, iau ot a tumusi ana kuk tetek mulo.

<sup>12</sup> La ning la tohi sur lar ngongos pas mulo sur dir kot talilis mulo, la toli anasa la mang sur lar alekkek pas la namatana taraila. La toli lerne anasa la matmataut sakana dir akadik la, ning lar warawai ka ana tortorot ana rakai kutus ane Karisito. <sup>13</sup> La ot ning di kot talilis a palaonla, bel la mur sot pas a Warkuraila, ika la mang sur dir kot talilis mulo, sur dir atong lekkek pas a risanla o mulo.

<sup>14</sup> Iau ot bel ar aйна pas iau. Ar aйна pas ka anundala Lekkek e Iesu Karisito ning i mat saot na rakai kutus. Anasa saot na rakai kutus, a toltol mite na rakrakan hanua i mat kusun iau, pa iau otleng, ia ka mat kusun a toltolla mite na rakrakan hanua. <sup>15</sup> Ning di kot talilis tik, o bel di kot talilisi, i utna oros ka namatana e God. Ning a utna ka i itna, dala a tona akakes ane God. <sup>16</sup> A bal molmol pa a marmaris tetek la ning la mur a asaer ne, la na tarai Israel momol ane God.

<sup>17</sup> Onone, bel a mang ulak larning tik ir saran a mamahat tak,



anasa a bulurla ne na palaok lar  
asilangi mang iau ane Iesu.

<sup>18</sup> Na tastasikla, a marmaris  
anuna Leklek anundala, e Iesu  
Karisito ir kes ana ingumulo.  
Amen.

## A Pas ane Pol tetek a tarai Epeses

*A warwara talapor nigo*

E Pol i kes ting na rumai a dodot tumo e Rom anasa i warawai ana Wakak a Warwara. Ning i kes tingia, i tumus diat a pas. Takai tetek a tarai Epeses, takai tetek a tarai Pilipai, takai tetek a tarai Kolosi pa takai otleng tetek e Pilimon.

I tumus a pas ne tetek a tarai a lotu tumo e Epeses sur lar wasi pa lamur lar sarani tetek a tarai masak.

E Epeses takai a tnan hanua ting na papar Esia. A tarai miting na hanua ning la mang kol sur a mani, pa la sira lotu tetek a asasong na god di atongi e Artemis. La tol takai a tnan rumai lotu ane Artemis (oroï Ap 19:17).

Ana munaur a tnan ane Pol i warawai tetek a tarai Juda ning la kes tumo e Epeses (oroï Ap 18:18-21). Pa lamur ana nuna munatol a tnan i han ulak utumo e Epeses pa i kes tumo natol a rau pa i asaer a taraila ning la lingir a nuknukinla pa la tortorot o e Iesu (oroï Ap 19). Dingla na tarai a tortorot la na te Judiala, pa dingla na tarai bel. E Pol i asaer la mang o e Iesu Karisito dala takai ka, a tarai Juda taum ana tarai masak otleng. I asaer la ana natola warwara larlar ana tarai tortorot mange:

Dala arlar ana palaona ning a barsan, pa e Iesu a pukulundala. Dala arlar otleng ana rumai lotu ane God, pa e Iesu a hat kes ning a kidol a rumai ir tugus wakak onoi, Dala arlar ana hane ning di sangi sur ir taulai.

### A tnan ana buk Epeses:

A kamkama buk ne (1:1-2)  
Dala takai ting o e Karisito (1:3-3:21)

A kes taum anuna tarai a tortorot (4:1-16)

A tona lalaun o e Karisito (4:17-5:20)

Dalar anatarna artalai tetek dala (5:21-6:10)

A mermer a harum kaning o e Karisito (6:11-20)

A ararop na warwara ane Pol tetek a tarai Epeses (6:21-24)

<sup>1</sup> Iau e Pol, aposel ane Karisito Iesu ana nuknuk e God. A tumus a pas ne tetek mulo a tarai ane God, ning mulo kes tingia e Epeses, ning mulo na momol a tena tortorot o e Karisito Iesu.

<sup>2</sup> A marmaris pa a molmol ta e God a Tamandala pa a Leklek e Iesu Karisito ir kes tetek mulo.

*O e Karisito, e God i angis dala*

<sup>3</sup> Dalar atong leklek pas e God, a Tamana e Iesu Karisito anundala Leklek. I angisngis dala ana ututnala rop misaot na langit sur ir nangan a ingundala, ning dala kaning o e Karisito. <sup>4</sup> E God ka aslang pas dala, ning dala ane Karisito, nating ot ning belot i akes a rakrakan hanua, sur dala totoh, pa bel dir arup sot pas dala on ta rongo namataña.

<sup>5</sup> Ana nuna marmaris, nating ot ka aslang dala sur ir ras pas dala sur dala natnatnala, ning dala kes o e Iesu Karisito. Ana nuknukna ot pa ana nuna gasgas i toli larne.

<sup>6</sup> Pa dalar atong aleklek pas e God ana nuna wakak a marmaris, ning ka tabar oros dala onoi, o e Natnalik ning i katnan koli. <sup>7</sup> Pa ning dala kaning o e Karisito, a sulukna i lou alangolango pas dala, pa e God i kepsen anundala na toltol laulaula. A marmaris ane God i itna kol, <sup>8</sup> ning i sira tabar mokos dala onoi, taum ana tastasmai rop pa wakak a nuknuk.

<sup>9</sup> E God i apuasa dala ana ututnala ning ir toli, ning nating i mumun, pa ir tolsoti o e Karisito. Ana ututnala ne i mur ot a nuknukna, pa i gas suir toli. <sup>10</sup> A nuknukna i

mange: Ir dat taum a ututnala rop saot na langit pa te na rakrakan hanua, sur la rop lar kes nahai a warkurai ane Karisito. Tagun nating ot e God ka tasman a utna ne ir toli o e Karisito, pa ning a pukakiar ir sot ir tolsot pasi ot.

<sup>11</sup> Nating ot i aslang pas mila na tarai Juda, sur mila anuna tarai o e Karisito. A ututnala rop ning e God i sira toli, i toli arlar ot ana nuknukna. <sup>12</sup> I aslang pas mila sur mila na ningnigo na tarai ning mila tortorot o e Karisito, sur milar atong lekkek pas e God ana nuna matatar. <sup>13</sup> Pa mulo otleng, mulo laun o e Karisito, ning mulo longor a momol a warwara ne, a Wakak a Warwara mang e God ir alaun pas mulo. Ning mulo longori pa mulo tortorot o e Karisito, e God i suah tar anuna akinalang o mulo, a Talngan Tabu, ning ka lele nigo tar onoi. <sup>14</sup> A Talngan Tabu, a ningnigo na artabar, sur ir amomoli mang lamur ana pukakiar ning e God ir alangolango pas anuna taraila, dalar kibas a ututnala ning e God ka lele tar onoi. Pa dalar atong lekkek pas e God ana nuna matatar.

*E Pol i nunung sur a tarai a lotu*

<sup>15</sup> Larne, ning a longori mang mulo tortorot ana Lekkek e Iesu, pa mulo mang sur a taraila rop ane God, <sup>16</sup> bel a manah ana atong wakak tetek e God o mulo. Pa ana nuka nunungla a sira nuk pas mulo. <sup>17</sup> A sira nunung mang e God anuna Lekkek anundala e Iesu Karisito, a Tamandala ning i bukus ana matatar, ir tabar mulo ana tasasmai miting tana Talngan Tabu, pa ir atalapor a nuknukimulo, sur mulor tasman wakak e God. <sup>18</sup> A nunung mang ir atalapor a ingumulo, sur mulor tasman a ututnala ning dala harnanai ana tortorot suri, ning e God i kabah pas dala sur dalar kibas pasi. A ututnala ning dala na tarai ane

God, dalar kibas pasi, i itna kol pa i bukus ana matatar. <sup>19</sup> Pa a nunung sur mulor tasmani mang a rakrakai e God ning i nangan dala onoi, ning dala tortorot, i itna kol. Bel dir arlar sot pasi ana ta utna. Ana tnan rakrakaina ning, <sup>20</sup> e God i akamtur pas e Karisito kusun a minat, pa i akes tari ting na ris a sot a kuna saot na langit. <sup>21</sup> Pa e Karisito i lekkek tana urmatana ingun rop larne, a ningnigola anuna ingunla, a ingunla ning la tong akes a warkurai, pa a ingunla ning la tong akes a rakrakai, pa la ning la keskes na lekkek. A risana e Karisito i lekkek kol tana risingla rop ana lalaun ne, pa ana lalaun lamur. <sup>22</sup> E God i suah tar a ututnala rop nahai a rakrakai e Karisito, pa e God i akes tar e Karisito sur ir itna tana ututnala rop, pa i ot a ningnigo ana ututnala rop sur a harnangai tetek a tarai a lotu. <sup>23</sup> Pa a tarai a lotu la a palaona e Karisito. Pa e Karisito i bukus onla, pa i abukus a ututnala rop otleng ting na urmatana ngas.

## 2

*Onone e God ka alaun pas dala o e Karisito*

<sup>1</sup> Nating a ingumulo i mat, anasa mulo kutus warkurai pa mulo tol a toltol laulaula. <sup>2</sup> Mulo mur a toltolla mite na rakrakan hanua, pa mulo longor tetek e Satan, a ningnigo ana matanitu saot na puka solsolna, pa onone a inguna i titol onla ning la tabun longor tetek e God. <sup>3</sup> Nating, dala otleng dala laun arlar ana tarai a tabun longor. Dala otleng dala tol asaning a lalaun turai i mang suri, pa dala mur a laulau a nuknukla ana lalaun turai pa a ginina lalaun turai. Di agon pas dala otleng a tena laulaula ot, pa a balakut ane God i kes ondala, larning i kes ona tarai a tabun longor.

<sup>4</sup> Ika, e God i bukus ana marmaris! I alaun pas dala anasa i

maris kol dala. <sup>5</sup> Ning dala mat ana nundala na toltol laulaula, i alaun pas dala taum o e Karisito. E God ka alaun pas mulo, anasa ana nuna marmaris. <sup>6</sup> Ning dala kaning o e Karisito Iesu, e God i akamtur dala taum o e Karisito kusun a minat, pa i akes dala taum onoi saot na langit sur dalar warkurai taum onoi. <sup>7</sup> E God i toli larne, sur ir asangan anuna marmaris tetek dala o e Karisito Iesu, sur ana raula kaning ot lamur, anuna tnan marmaris ir hanot talapor. <sup>8</sup> E God i maris mulo pa i alaun pas mulo ning mulo tortorot. Bel mulo ot mulo kamkamna onoi, a artabar ka ane God tetek mulo. <sup>9</sup> Bel i alaun pas mulo kamkamna ana wakak a titolla ning mulo toli, sakana tik ir aitna pas i ot ono. <sup>10</sup> Dala rop, a ngen kuna e God, i akes dala o e Karisito Iesu, sur dalar tol a wakak a titolla, ning e God ka sang tari sur dalar toli.

*A tarai Juda pa a tarai ning bel a tarai Juda, dala takai kama*

<sup>11</sup> Mulor nuk pasi, di agon mulo bel mulo a tarai Juda. A tarai Juda la sira kot talilis a palaonla, a akinalang ning i asangani mang la ane God. A toltol ning, a tarai ka la sira toli ana kunla. Pa a tarai Juda la atong mulo mang bel mulo ane God, anasa bel di kot talilis mulo. <sup>12</sup> Mulor nuk pasi mang, nating ning mulo kes masak ot kusun e Karisito, mulo bel a tarai Israel, pa a kunubusla ning e God i lele tar ono, bel anumuloi. Pa ana numulo a lalaun te na rakrakan hanua, bel mulo tasman e God, pa bel ta wakak a utna ning mulor harnanai suri ana tortorot. <sup>13</sup> Nating mulo kes bakkak kusun e God, ika onone, ning mulo kaning o e Karisito Iesu, a sulukna ka ben milau tar mulo tetek e God.

<sup>14</sup> Onone dala kes ana bal molmol, kamna o e Karisito. I dat taum pas mila a tarai Juda pa mulo ning bel a tarai Juda, sur dala takai

kama. Lanigo bel dala armoro, i arlar ana woroh i pagal dala, ika e Karisito ka regen tar a woroh na balakut, sur dalar armoro taum. <sup>15</sup> I regen tari ning i mat, i arop sen a warkurai anuna tarai Juda, sur ir dat taum a tarai Juda pa la ning bel a tarai Juda, sur takai kama a tona mangis a tarai, sur dala rop dalar kes ana molmol. <sup>16</sup> Pa ning dala takai ka, e Karisito i amolmol taum dala rop taum o e God. Ning i mat saot na rakai kutus i kepsen a balakut na arpotor indala, a tarai Juda pa a tarai masak. <sup>17</sup> I hanot pa i warawai ana bal molmol tetek mulo ning mulo kes bakkak, pa tetek mila otleng na tarai Juda ning mila kes milau. <sup>18</sup> Anasa o e Karisito ka, a Talngan Tabu i alangolango a ngas anundala rop tetek e Tamandala.

<sup>19</sup> I maining mulo bel ulak ma mulo a wasirala. Onone mulo takai kama taum ana tarai ane God, pa mulo hanot a mangis a tarai ane God. <sup>20</sup> Mulo a rumai ane God, ning di aturi saot na aposella pa propetla. La a kama rumai, pa e Karisito Iesu ot, a wakak a hat kes, ning di tol a rumai saot ono. <sup>21</sup> Pa ana hat kes ne, a kidol a rumai ir tugus wakak onoi, pa ir hanot a totoh a rumai artabar ana Leklek. <sup>22</sup> Pa ning mulo kaning o e Karisito, i dat taum mulo otleng, sur mulor hanot a rumai ning a Inguna e God i kes ia.

### 3

*A titol ane Pol tetek la ning bel a tarai Juda*

<sup>1</sup> I maining, iau e Pol, a nunung sur mulo. A kes ting na rumai a dodot anasa a titol ana titol ane Karisito Iesu tetek mulo ning bel na tarai Juda.

<sup>2</sup> Mulo ka tasmani mang e God ka saran tar a titol ne tak ana nuna tnan marmaris, sur ar nangan mulo. <sup>3</sup> Pa e God i apuasa iau ana utna ning i mumun tar. Pa te na

pas ne, ia ka tumtumus siklik pas onoi. <sup>4</sup> Pa ning mulor wasi, mulor tasman asaning ia ka talapor ono, ana utna ning i mumun tar o e Karisito. <sup>5</sup> A taraila tagun nating bel tik i apuasa la onoi, ika onone, a Talngan Tabu i apuasa i tetek a aposella anun e God pa a propetla. <sup>6</sup> Ine a utna ning i mumun tar nating: La ning bel na tarai Juda, lar kibas a ututnala ning e God i angis tar na natnatunla ono, taum ana tarai Juda. Pa la rop la hanot takai a palaonla kama. Pa ning la longor ana Wakak a Warwara, a lele ane God ning i tolsoti o e Karisito Iesu, anunla otleng.

<sup>7</sup> A hanot a tena titol ana Wakak a Warwara ne. E God ot, ana nuna marmaris pa rakrakaina, i saran tar a titol ne tak. <sup>8</sup> Pa iau, a natarna kol tanla rop a tarai ane God. Ika i maris iau pa i saran tar a titol ne tak, sur ar warawai tetek a taraila ning bel a tarai Juda ana wakak a gongon ane Karisito, ning bel dir nuk lar pas a araropna anasa i itna kol. <sup>9</sup> E God ning i akes a ututnala rop, i saran tar a titol tak sur ar atalapor a taraila rop ana ngas ning ir tolsot pas a utna ning nating i mumun ting na nuknukna. <sup>10</sup> Pa onone, i toli larne tetek a tarai a lotu, sur ir apuasa anuna tnan tastasman tetek na ingun saot na langit, a ningnigola anuna ingunla, pa la ning la tong akes a rakrakai sur lar warkurai. <sup>11</sup> Tagun nating ot e God i tasmani ting na nuknukna mang ir toli larne. Pa onone, ka tolsot pasi o e Karisito Iesu anundala Leklek. <sup>12</sup> Dala langolango sur dalar han tetek e God pa bel dalar matmataut, anasa dala kaning o e Karisito pa dala tortorot onoi. <sup>13</sup> Larning, a nunung mulo sur gong anumulo a tortorot ir punga anasa a kilang a mamahatla sur mulo te na rumai a dodot. A kilang a mamahatla sur dir atong leklek

mulo.

#### *A marmaris ane Karisito*

<sup>14</sup> A kes ana bokona hak pa a nunung namatana e Tamandala, <sup>15</sup> esaning a Tamana mangis a taraila saot na langit pa te lapui otleng, pa i saran tar a lalaun tetek la rop. <sup>16</sup> E God anuna gongon i bukus ana matatar. Pa a nunung mang, miting na nuna gongon, ir arakrakai mulo ana rakrakai a Talngan Tabu ting na ingumulo, <sup>17</sup> sur e Karisito ir kes uting na balamulo, ning mulo tortorot onoi. Pa a nunung mang a wakwakirim mulo ir tong kes ana marmaris pa mulo tur rakrakai onoi, <sup>18</sup> pa mulo taum ana taraila rop ane God, mulor rakrakai sur mulor tasman momol a marmaris ane Karisito. Mulor tasmani mang i palar mangasa, i barah mangasa, i tur kas mangasa, pa i dordorong mangasa. <sup>19</sup> Pa mulor tasman a marmaris ane Karisito ning i itna tana tastasmai anuna taraila, sur mulor bukus ana kidol a lalaun ane God.

<sup>20</sup> A atong leklek e God, esaning i rakrakai pa i tolsot pasi sur ir tol asaning i itna kol tana utna ning dala nuki, pa dala nunung suri, pa i titol ana rakrakaina ning i titol te na nundala lalaun. <sup>21</sup> Dala taum ana tarai lamur, dalar atong leklek pasi, bel ir rop pa bel ir rop ana tnan ututnala i ka tol tari ana tarai a lotu, pa o e Karisito Iesu. Amen.

## 4

### *Dala takai o e Karisito*

<sup>1</sup> A kes ting na rumai a dodot anasa a titol tetek a Leklek. Pa a nunung kol mulo, sur mulor laun arlar ana lalaun ning di ka kabah pas mulo suri. <sup>2</sup> Mulor anatarna pas mulo, pa mulor kes na molmol. Mulor asangan a longoroi a toltol, pa mulor mang artalai sur mulo, pa gong mulo keles a toltol anuna tik. <sup>3</sup> Mulo takai ka ana keskes ning a Talngan Tabu

ka saran tari ta mulo, anasa i dot taum mulo ana molmol. Mulor rakrakai sur mulor tong akes anu-mulo a keskes. <sup>4</sup> Dala rop dala takai a palaona e Karisito, pa takai ka a Talngan Tabu i kes ondala rop. Pa e God i kabah pas dala sur dalar takai ka ting na keskes harnanai ana tortorot sur a ututnala ning ir angis dala onoi. <sup>5</sup> Anundala takai ka a Leklek, pa takai ka a tortorot, pa takai ka a baptais. <sup>6</sup> Pa takai ka a God, a Tamandala rop. I warkurai dala rop, i titol ting na nundala lalaun rop, pa i kes ondala rop.

<sup>7</sup> E Karisito i tabar dala tak-takai ana artabar, arlar ot ana nuknukna. <sup>8</sup> I maining, a Buk Tabu i atongi larne onoi,

“Ning i han kas usaot,

i ben a galis a tarai a dodot

pa i tabar a taraila ana artabarla.”

*Buk Song 68:18*

<sup>9</sup> Ning di tumusi larne, “i han kas”, a kamna mang nating ka han purum pas ute lapiu. <sup>10</sup> Esaning i han purum, i ot ning i han kas kol usaot, bolos a langit rop, sur ir abukus a ututnala rop tisaot pa te lapiu. <sup>11</sup> I ot ning i saran a artabarla ning tetek anuna taraila larne: a aposella, a propetla, na tena warwara talapor ana Wakak a Warwara, a tena tai alarla, pa a tena asaerla, <sup>12</sup> sur lar sang a taraila ane God, sur lar titol teteki, sur a tarai a lotu lar agomo anunla lalaun ting o e Karisito. A tarai a lotu, la a palaona e Karisito. <sup>13</sup> Lar toli larning tuk dalar takai ka ana tortorot, pa ana tastasmai ana Nat e God, pa tuk ning dalar hanot a rakrakai a tena tortorotla. Dalar gomo tuk ning dalar bukus ana kidol a lalaun ane Karisito.

<sup>14</sup> I maining bel ma dalar arlar ulak ana kakakla ning nunla tortorot i maler, arlar ana utna ning a wuwu taum ana top i minggen tal-tali utumo pa ute. Bel dalar mur a

asasaerla anuna tena asasongola, ning la mang sur lar ben rongo a taraila taum ana nunla na namnamin a warwarala. <sup>15</sup> Ika, dalar atong a momol a warwara taum ana marmaris. Dalar gomo ana ututnala rop sur dalar arlar taum o e Karisito, ai a pukulundala. <sup>16</sup> Pa dala a palaona, pa o e Karisito, a kidol a palaona i tugus taum wakak. Pa ning tak-takai diah palaona i tol ot anuna titol, a kidol a palaona ir gomo pa ir rakrakai, pa ir bukus ana marmaris.

*A tona lalaun kaning o e Karisito*

<sup>17</sup> A atai mulo ana risana Leklek, pa a atumarang mulo mang gong ulak ma mulo laun arlar ana taraila ning bel la tortorot. A nuknukinla bel i topas ta utna. <sup>18</sup> Anunla tastasmai i mormorom pa la bakbak kusun a lalaun ane God, anasa bel la tasman a momolna, anasa a balanla i rakrakai kol. <sup>19</sup> Bel ta meme inla ma, pa la saran tar la kama sur a laulau a nuknukla, taum ana urmatana dur a toltol, pa nuknukinla sur a toltol laulau bel ir manah.

<sup>20</sup> Ika mulo, ning di asaer tar mulo o e Karisito, bel di asaer mulo ana toltolla larne. <sup>21</sup> A tasmani mang di ka asaer tar mulo o e Iesu pa mulo ka longor pasi, pa mulo tasman a momolna ning i kes onoi. <sup>22</sup> Di asaer mulo sur mulor han kusun a ngas a lalaun ning mulo murmuri nating. Mulor pak seni arlar taum ana turai a kaen, anasa i laulau pa i asongo dala sur dalar mur a laulau a nuknukla. <sup>23</sup> Mulor saran tar mulo tetek e God sur ir atona a ingumulo pa nuknukimulo. <sup>24</sup> Pa mulor mermer taum ana tona lalaun ning e God i akes tari arlar ot ana manarna, sur mulor mur a tostos a toltol momol, pa mulor hanot a totoh a tarai ane God.

<sup>25</sup> I maining mulor manah kusun asasongo, pa mulor atong

a momolna tetek a halalimulo, anasa dala rop dala na didiah palaona e Karisito. <sup>26</sup> Ning mulo balakut, gong mulo tol a toltol laulau. Pa gong a kamis i sup ning kaning ot mulo balakut, <sup>27</sup> pa gong mulo saran tar ta kolo ta e Satan. <sup>28</sup> Esining i kinkinau, gong ulak ma i kinkinau. I wakak ning ir tol a wakak a titol ana naur a kuna, sur ir tol otnan a utna ning i to pasi, pa ir tabar la otleng onoi ning la kapan.

<sup>29</sup> Pa gong ta laulau a warwara i purum miting na pahamulo. Mulor atong ka a warwara ning i wakak sur ir arakrakai a tarai pa ir nangan la ana asaning la kapan suri, sur anumulo na warwara ir awakak la ning la longor mulo. <sup>30</sup> Pa gong mulo abal maris a Totoh a Inguna e God, a akinalang ning e God ka aslang tar mulo onoi mang mulo anunai, sur a pukakiar ning e God ir alangolango mulo. <sup>31</sup> Mulor kepsen a toltolla larne kusun anumulo a lalaun: a nuknuk laulau, a balakut, a arngaras, a arkabah na balakut, a warwara laulau, pa urmatana toltol laulaula rop otleng. <sup>32</sup> Mulor tol a wakak tetek mulo pa mulor mang artalai sur mulo. Pa ning tik o mulo i tol a laulau tetek mulo, mulor nuk duman seni, arlar larning e God i toli tetek mulo o e Karisito.

## 5

### *A lalaun ana talapor*

<sup>1</sup> Mulor laun arlar ana lalaun ane God, anasa mulo na natnat e God, pa i maris kol mulo. <sup>2</sup> Mulor laun ana marmaris, arlar larning e Karisito i maris dala, pa i saran tar anuna lalaun sur dala, arlar ana artabar ning i toboh wakak tetek e God.

<sup>3</sup> Gong ta pamuk a toltol i kes potor ta mulo, gong ta dur a toltol, pa gong otleng mulo nuknuk sur

a galis a gongon. Anasa na toltol ne bel i sot sur a totoh a tarai ane God lar toli. <sup>4</sup> Gong mulo atong ta laulau a warwara, o ta longlong a warwara, pa gong mulo morot ana laulau a morot. A warwarala ne bel i wakak sur mulor atongi, ika mulor atong wakak tetek e God. <sup>5</sup> Mulor tasman a utna ne: La ning la tol a pamuk a toltol, o a dur a toltol, pa la ning la nuknuk sur a galis a gongon, bel lar kibas a matanitu ane Karisito pa e God. Anasa la ning la nuknuk sur a galis a gongon, la ning a tena lotu tetek a asasongo na godla. <sup>6</sup> Gong mulo noren tar tik sur ir asongo mulo anal warwara oros ka. Anasa a toltolla ning ir dat pas ka a balakut ane God tetek la ning bel la longor teteki. <sup>7</sup> Larning, gong mulo tur taum onla ana nunla na toltol laulaula.

<sup>8</sup> Nating mulo kes ana mormorom, ika ne a Leklek ka akes tar mulo ana talapor. Pa mulor laun arlar ana natnat a talapor. <sup>9</sup> Anasa a wana lalaun anun esining i kes ana talapor i manglarne: a wakak a toltolla, a tostos a toltolla, pa momolna. <sup>10</sup> Pa mulor tai sur a toltol ning a Leklek i gas onoi. <sup>11</sup> Gong mulo tol a toltolla ning a tarai a mormorom la sira toli ning bel ta wana. Ika mulor apuasa anunla toltolla. <sup>12</sup> Anasa a toltolla ning la sira tol kumnani, a utna na meme kol, pa dalar meme ning dalar warwara onoi. <sup>13</sup> Ika a talapor i apuasa a toltolla rop sur ir hanot talapor. <sup>14</sup> Anasa ning a talapor i atalapor a ututnala, dir oroi lalan la. I maining di atongi larne, “U ning a tena borbor,  
ur mata,  
ur kamtur kusun a minat,  
pa e Karisito ir atalapor u.”

<sup>15</sup> Mulor tai alar wakak anumulo a ngas a lalaun, pa gong mulo arlar ana longlongla, mulor arlar ana tarai a tastamai. <sup>16</sup> Ana pukakiarla rop, ning i

langolango sur mulor apuasa anumulo a tortorot, mulor toli, anasa a pukakiarla ne, a laulau a pukakiarla. <sup>17</sup> Larning, gong mulo longlong, ika mulor tasman a nuknuk anuna Leklek.

<sup>18</sup> Gong mulo gang a wain pa mulo sipak onoi, anasa ir alaulau mulo. Ika, mulor bukus ana Talngan Tabu. <sup>19</sup> Pa mulor awara artalai taum ana saksak miting na Saksakla ane Dewit, na saksak a lotu, pa saksakla ning a Talngan Tabu i tabar mulo onoi. Pa mulor saksak taum ana warwara leklek ting na balamulo tetek a Leklek. <sup>20</sup> Pa ana pukakiarla rop, mulor atong wakak ana ututnala rop tetek e God a Tamandala, ana risana e Iesu Karisito anundala a Leklek.

*A asasaer ana keskes a tinaulai  
(Kol 3:18-19)*

<sup>21</sup> Mulor anatarna pas mulo artalai, anasa mulo hanrawai tetek e Karisito.

<sup>22</sup> Mulo na tinaulai a gurara, i wakak sur mulor anatarna pas mulo tetek anumulo na tarai lar otning mulo toli tetek a Leklek.

<sup>23</sup> Anasa a barsan i a pukul a keskes a tinaulai, arlar o e Karisito i a pukul a tarai a lotu, pa la a palaona, pa i anunla Tena Alaun.

<sup>24</sup> A tinaulai a hanela lar anatarna pas la tetek anunla na tarai ana ututnala rop, arlar ana tarai a lotu la anatarna pas la tetek e Karisito.

<sup>25</sup> Mulo otleng, a tinaulai na tarai, mulor mang sur anumulo na gurarala, arlar lar ning e Karisito i maris a tarai a lotu, pa i saran tar anuna lalaun sur la, <sup>26</sup> sur la anuna tarai momol. Pa i gos totoh la ana malum pa anuna warwara.

<sup>27</sup> I toli larne sur ir ben pas anuna tarai teteki, arlar ana nuna wakak a hane ning bel ta dur onoi, pa bel i karkar a palaona, pa bel ta laulau a utna onoi. Ir totoh pa bel dir arup sot pasi on ta rongho.

<sup>28</sup> Mang otleng larning, na tarai lar

mang kol sur anunla na gurara, lar ot ning la mang sur a palaona ot. Esining i mang sur anuna hane, i mang suri ot. <sup>29</sup> Bel tik i sira bilbilor a palaona ot. I tai alari, pa i tamtabari, arlar o e Karisito otleng i toli tetek anuna tarai a lotu. <sup>30</sup> Anasa dala na didiah palaona e Karisito. <sup>31</sup> A Buk Tabu i atongi larne, “I maining a barsan ir han kusun e tamana pa e tana, pa ir kes taum ana nuna hane, sur diau takai kama.” *Stat 2:24*

<sup>32</sup> A warwara ne ana tinaulai, a tnan kamkamna ning i mumun. Ika a warwara o e Karisito pa a tarai a lotu. <sup>33</sup> Pa i wakak otleng ning taktakai o mulo ir mang sur anuna hane larning i mang suri ot. Pa i wakak sur na gurara lar hanrawai tetek anunla na taraila.

## 6

*A asasaer tetek a kakakla pa na tamtamanla  
(Kol 3:20-21)*

<sup>1</sup> Kakakla, mulo anuna Leklek, mulor longor tana tamtamamulo pa na kabatnamulola, anasa i tostos sur mulor toli larne. <sup>2</sup> A Buk Tabu i atongi mange, “Ur hanrawai e tamam pa e tnam.” Ine a ningnigo na warkurai ning a lele i kes taum onoi. <sup>3</sup> I atongi mang, “Ning ur toli larne, ir wakak tetek u pa ur laun bongnan u te na rakrakan hanua.” *Lo 5:16*

<sup>4</sup> Pa mulo na tamtamana a kakakla, gong mulo angangas oros la, ika ning mulor tai alar la, mulor alasan la, pa mulor asaer la ana ngas ning a Leklek ir gas ono.

*A asasaer tetek a tena titolla pa ningnigola*

*(Kol 3:22—4:1)*

<sup>5</sup> Ning u a tena titol, ur longor tetek anuma ningnigo mite na rakrakan hanua, pa ur matmataut pa ur hanrawai i. Ur longor ana momolna ting na balam, larning u longor tetek e Karisito. <sup>6</sup> Gong



u muri ka anuna warwara ning i oroi u, sur ur agasgas tari ka. Ur titol larning u a tena titol oros ane Karisito, pa ur tol a titol ning e God i mang suri, pa ur saran emol tar anuma lalaun ana titol. <sup>7</sup> Ur titol taum ana gasgas tetek anuma ningnigo, larning u titol ot tetek a Leklek, pa bel tetek a tarai. <sup>8</sup> Anasa mulo ka tasmani mang a Leklek ir saran a arlou tana tarai rop ana wakak a titolla ning la toli, la ning na tena titol pa la otleng ning bel na tena titol.

<sup>9</sup> Pa mulo na ningnigola, mulor toli mang otleng larning tetek anumulo na tena titol oros. Gong mulo amatmataut la, anasa mulo ka tasmani mang, takai ka a Leklek kanisaot na langit, anunla pa anumulo otleng. Pa bel i pur-purngis.

*Na mermer na harum ane God*

<sup>10</sup> Anuka ararop a warwara i mange: Mulor tur rarakai ona tnan rarakai ana Leklek. <sup>11</sup> Mulor mermer rop taum ana mermer na harum anun e God, sur mulor sairas a larlarla ane Satan. <sup>12</sup> Anasa bel dala harum taum ana tarai, dala harum taum ana ningnigola anuna laulau a ingunla, a ingunla ning la tong akes a rarakai sur lar warkurai, a ingunla ning la tong akes a rarakai ana mormorom te na rakrakan hanua, pa a laulau a ingunla miting na solsol.

<sup>13</sup> I maining mulor mermer taum ana mermer na harum ane God, sur ning a laulau a pukakiar ir hanot, mulor tolsot sur mulor tur rarakai. Pa ning mulo ka sang tar mulo larning, mulor tur rarakai ot. <sup>14</sup> Mulor tur rarakai, mulor dot akes mulo ana momolna, arlar ana let. Pa mulor suah alar mulo ana tostos a toltol, arlar ana puka aen ning a tena harum i sira alar a malwasna ono. <sup>15</sup> Mulor sang sur a tinan ana Wakak a Warwara na bal molmol, larning a tena harum i

sira akas naur a su ting na naur a hana. <sup>16</sup> Pa lamur, mulor tong akes a tortorot, arlar ana palang ning a tena harum i sira suah alari ono, sur mulor suah alar a irnga na turai ane Satan. <sup>17</sup> Pa mulor nuk pasi mang e God ka alaun pas mulo, arlar ana tena harum i suah a kukuh na harum. Pa mulor los pas a liwan na harum ana Talngan Tabu, i a warwara ane God. <sup>18</sup> Mulor nunung taum ana rarakai ana Talngan Tabu ana pukakiarla rop, taum ana urmatana nunung rop. Mulor kes na sang, pa mulor sira nunung bolbolos ana taraila rop ane God.

<sup>19</sup> Mulor nunung otleng hok, sur e God ir saran tar a warwarala tak sur ar atongi, pa gong a matmataut ning ar apuasa a ututnala ning nating la mumun pa onone la hanot talapor ting na Wakak a Warwara. <sup>20</sup> E God ka suah tar iau sur ar tena warawai ana Wakak a Warwara, pa ana titol ne a kes na dodot. Mulor nunung hok sur ar warawai, pa bel ar matmataut, larning i wakak sur ar toli.

*A ararop a warwara*

<sup>21</sup> E Tikikus, a wakak a tasindala pa a momol a tena titol anuna Leklek, ir atai mulo ana ututnala rop, sur mulor tasmani mang kane a laun mangmangasa pa asaning a sira toli. <sup>22</sup> I maining a sune i tetek mulo, sur mulor tasmani mang mila kes mangmangasa, pa ir ararakai mulo.

<sup>23</sup> A bal molmol tetek mulo na tastasikla, pa a marmaris taum ana tortorot, ta e God e Tamandala pa a Leklek e Iesu Karisito. <sup>24</sup> A marmaris tetek la rop ning la mang sur anundala Leklek e Iesu Karisito ana marmaris ning bel ir rarop.

## A Pas ane Pol tetek a tarai Pilipai

### *A warwara talapor nigo*

E Pol i kes ting na rumai a dodot tumo e Rom anasa i warawai ana Wakak a Warwara. Ning i kes tingia, i tumus diat a pas. Takai tetek a tarai Epeses, takai tetek a tarai Pilipai, takai tetek a tarai Kolosi pa takai otleng tetek e Pilimon.

A pas ne i tumusi tetek a tarai a lotu tumo e Pilipai, pa i atong wakak tetek la ana mani ning la saran tari tana. La saran tari ta e Epaproditus, pa i abarani teteki.

E Pilipai a tnan hanua tumo na papar Masedonia. E Pol i han utumo ana nun a munaur a tnan. Ning e Pol i han utumo belot la longor a Wakak a Warwara. Pa a taraila ning la lingir a nuknukinla ana warawai ane Pol, la na ningnigon a tarai a lotu tumo na papar Masedonia (oro i Ap 16:12-40)

A tarai a lotu tumo e Pilipai bel al galis a mani anunla. Ika i gasgas sur lar artabar ana mani tetek a tarai a lotu tisa na papar Judia ning la kapan kol, pa tetek e Pol otleng sur a arnangai ana tnan anunai.

E Pol i kes ting na rumai a dodot, ika i gas pa i mang sur a tarai Pilipai otleng lar gas ning la pastek a mamahatla. E Pol i atai la mang lar tur rakrakai pa lar tai alar la kusun na asasongo na tena asasaer ning la asaer a tarai mang lar kot talilis la. La asaer la mang lar tortorot o e Iesu pa lar mur otleng a toltol ana tarai Juda mang lar kot talilis la.

E Pol i atongi otleng mang lar mur a toltol ane Iesu ning i anatarna pasi.

### **A tnan ana buk Pilipai:**

A kamkama buk ne (1:1-11)

E Pol i atai la ana nun a keskes ting na rumai a dodot (1:12-26)

A toltol ning na tena tortorot lar muri (1:27-2:18)

E Pol i mang suir sune sen e Timoti pa e Epaproditus (2:19-30)

Lar tur rakrakai ana asasaer mang e God i alaun pas dala anasa dala tortorot ka o e Iesu (3:1-16)

Lar mur a ngas a toltol ane Pol (3:17-4:9)

E Pol i gas ana nunla a artabar (4:10-20)

A ararop a warwara ane Pol tetek la (4:21-23)

<sup>1</sup> Iau e Pol, miau ma e Timoti, naur a tena titol oros ane Karisito Iesu, mia tumtumus tetek mulo na tarai rop ane God, ning mulo laun o e Karisito Iesu, ting na hanua Pilipai, taum ana ningnigola tagun a lotu pa na tena harnangai. <sup>2</sup> A marmaris pa a bal molmol miting ta e God a Tamandala pa a Leklek e Iesu Karisito ir kes taum o mulo.

### *A nunung ane Pol sur a tarai Pilipai*

<sup>3</sup> Ana taemla rop ning a sira nuk mulo, a atong wakak tetek a nuk a God o mulo. <sup>4</sup> Pa ana nuk na nunung rop sur mulo rop, a nunung taum ana gasgas, <sup>5</sup> anasa mulo tur taum hok ana Wakak a Warwara, turpasi ana ningnigo na pukakiar ning mulo longori tuk onone. <sup>6</sup> A tasman momoli mang e God ning i turpas a wakak a titol o mulo, anuna titol kaning ot i han, tuk ning ir aropi ana pukakiar ning a Karisito Iesu ir hanot onoi.

<sup>7</sup> I tostos sur ar nuknuk lerne o mulo rop, anasa mulo kes momol te na nuknukik. Ning a kes te na rumai a dodot, pa a keles a warwara anuna tarai ning la atong laulau a Wakak a Warwara, pa a apuasa i tetek a taraila, dala rop dala tur taum ana titol ne, ning e God i saran tari tak ana nuna

marmaris. <sup>8</sup> E God i tasmani mang a mang kol sur ar oroi mulo rop, anasa a mang kol sur mulo ana marmaris ane Karisito Iesu.

<sup>9</sup> Anuk a nunung i larne: A nunung mang anumulo a marmaris ir itna pa ir itna rakrakai, taum ana mananos pa a tastamai, <sup>10</sup> sur mulor tolsot pasi sur mulor tasman lalan asaning i wakak kol, pa mulor totoh, pa bel dir arup sot pas mulo on ta rongo ana pukakiar ning e Karisito ir hanot onoi. <sup>11</sup> Pa a nunung otleng mang, mulor bukus ana wana tostos a toltol, ning e Iesu Karisito i tol otnan tari ting na numulo a lalaun, sur a taraila lar atong aitna pas e God pa lar alekleki.

*A keskes ane Pol ting na rumai a dodot i agomo a Wakak a Warwara*

<sup>12</sup> Na tastasik, a mang sur mulor tasmani mang asaning i hanot hok, i agomo a Wakak a Warwara sur ir han sarara. <sup>13</sup> Pa ine, i talapor tetek na tena harum rop ning la tai alar a rumai anuna ningnigo ana matanitu Rom, pa tetek a taraila rop otleng, mang a kes te na rumai a dodot anasa iau ane Karisito. <sup>14</sup> Anuk a keskes ting na rumai a dodot ka arakrakai a galis a tastasik ana tortorot ana Leklek, sur lar warwara talapor ana warwara ane God taum ana rakrakai, pa bel lar matmataut.

<sup>15</sup> I momol mang dingla na tarai la warawai o e Karisito anasa la nuknuk laulau tetek iau pa la mang lar sairas iau kusun a keskes a ningnigo. Ika dingla na tarai la warawai ana wakak a nuknukinla. <sup>16</sup> La warawai anasa a marmaris i kes ting na balanla. La tasmani mang a kes te na rumai a dodot sur ar keles a warwara anuna tarai ning la atong laulau a Wakak a Warwara. <sup>17</sup> Ika dingla na tarai la warawai ana Karisito anasa la mang lar aitna pas la ot, pa bel i momol a balanla. La mang lar wot ulak ka anuka mamahatla,

ning a kes te na rumai a dodot. <sup>18</sup> Ika bel ta utna. Ning la warawai ana laulau a nuknuk o a wakak a nuknuk, la rop ne la warawai ka ana Karisito. Ine a kamna ning a gas.

I momol, ar gas bolbolos, <sup>19</sup> anasa a tasmani mang ana numulo na nunung, pa a harnangai anuna Inguna e Iesu Karisito, na utna ning a kilangi ir tol otnan iau sur ar langolango. <sup>20</sup> A tortorot mang bel ar tol ta utna ning ar meme onoi. Ar tur rakrakai pa bel ar matmataut, sur ar aitna bolbolos e Karisito ana nuk na toltol. Ning ar laun o ar mat, ar aitna pasi. <sup>21</sup> Anasa i manglarne: Ning a laun, a laun sur e Karisito, pa ning ar mat ar kibas pas a wakak a utna kol. <sup>22</sup> Ning a laun ana palaok, ar titol sur ta wakak a wana nuk a titol. Pa bel a tasmani esi na halindiau ning ar aslang pasi, a lalaun o a minat. <sup>23</sup> I naur a nuknukik. Takai, a mang kol sur ar han par kes taum o e Karisito, esaning i wakak kol tan ning a halindiau. <sup>24</sup> Ika i wakak kol sur ar laun, sur ar nangan mulo. <sup>25</sup> I maining, a tasmani mang ar laun par kes taum o mulo, sur mulor gomo, pa mulor gas ana tortorot. <sup>26</sup> Pa ning dalar tai taum ulak, anumulo na gasgas o e Karisito Iesu ir galis kol, anasa ia ka ulak tetek mulo.

<sup>27</sup> Asa ning ir hanot, mulor tai alar anumulo a lalaun sur ir mur a Wakak a Warwara ane Karisito. Larne, ning ar han sur ar oroi mulo, o ning ar kes bakbak pa ar longor ka a warwara o mulo, ar tasmani mang mulo tur rakrakai ana takai ka a nuknuk, pa mulo titol taum arlar ana takai ka barsan sur mulor tai alar a Wakak a Warwara, ning dala tortorot onoi, <sup>28</sup> pa bel mulor matatan a hiruala. Ning bel mulor matatan la ir asangani mang lar hirua, ika mulo, e God ir alaun mulo.

29 Anasa e God ka angis tar mulo. Bel ana numulo na tortorot ka ana Karisito ning i angis mulo, ana mamahat otleng ning mulo kilangi ana risana. <sup>30</sup> Mulo harum taum ana hirua ana Wakak a Warwara, larning a sira toli. A harum ning nating mulo oroi mang a toli, pa onone mulo longori mang kanet a toli.

## 2

*Dalar anatarna pas dala arlar o e Karisito i anatarna pasi*

<sup>1</sup> Anumulo a lalaun ane Karisito i arakrakai mulo, anuna mar-maris i amoro mulo, mulo laun taum ana Talngan Tabu, mulo sira mang sur al tarai, pa mulo sira maris la. <sup>2</sup> Pa a mang sur ir takai ka a nuknukimulo, pa mulor mang artalai sur mulo, pa ir takai a nuknukimulo ana titolla ning mulo mang sur mulor toli, pa ir takai ka balamulo. Ning mulor toli larne, anuka gasgas ir itna kol. <sup>3</sup> Gong mulo tol ta utna ning mulor aitna pas mulo onoi, o mulor aunan mulo onoi. Mulor anatarna pas mulo pa mulor nuk aitna pas a tarai masuk sur lar itna tamulo. <sup>4</sup> Mulo taktakai, gong mulo nuk pas mulo ot pa anumulo na titol ka. Mulor nuk pas a tarai masuk otleng pa anunla na titol.

<sup>5</sup> I wakak ning a nuknukimulo ir arlar ana nuknuk e Karisito Iesu.

<sup>6</sup> I e God,

ika bel i nuki sur ir tong akes anuna tnan keskes ning i arlar o e God.

<sup>7</sup> I han kusun anuna tnan keskes, i kibas pas na gini na tena titol oros, di agoni, i hanot a mainla arlar ondala.

<sup>8</sup> Pa na tarai la oroi mang, i a barsan momol.

I anatarna pasi,

pa i longor pa i saran tari ot sur ir mat.

Momol ot, i mat saot na rakai kutus.

<sup>9</sup> Pa e God i aitna pas a Karisito ana keskes ning i itna kol saot pa i saran tar a rising tana, ning i itna tan a risingla rop,

<sup>10</sup> sur ana risana e Iesu, na akakes rop saot na langit pa te na rakrakan hanua pa nahai a rakrakan hanua, la rop lar kes ana bokona hanla,

<sup>11</sup> pa la rop lar atong puasa i mang e Iesu Karisito i a Leklek, sur lar aitna pas e God a Tamandala.

*Dalar talapor arlar ana nangnangla*

<sup>12</sup> Na halalik, mulo sira longlongor ana pukakiarla ning a kes napirimulo. Pa onone, ning bel a kes taum o mulo, i wakak sur mulor rakrakai ana longor. Mulor sira asangani ting na numulo a lalaun mang e God ka alaun pas mulo, pa mulor toli ana matmataut pa koloron. <sup>13</sup> Anasa e God ot i titol ana numulo a lalaun, sur mulor mang sur asaning ir gas ono, pa mulor toli otleng.

<sup>14</sup> Ana ututnala rop ning mulo toli, gong mulo ururai pa gong mulo arngaras ono, <sup>15-16</sup> sur bel dir arup sot pas mulo on ta rongo pa mulor totoh, na natnat e God, ning bel ta rongo o mulo, arpotor tan a tarai ning bel la tostos pa a gininla i laulau kol. Ning mulor artabar ana warwara na lalaun, mulor talapor arpotor tanla arlar ana nangnangla ning la talapor te na rakrakan hanua. Ning mulor toli larne, ar gas o mulo ana pukakiar ning e Karisito ir hanot ulak ono, anasa ir talapor mang bel a dun oros ka, pa anuka titol bel i utna oros ka. <sup>17</sup> Anumulo a titol ning anumulo a tortorot i tol otnani, i arlar ana artabar tetek e God. Pa ning ar mat, ar gas par gas taum o mulo rop, anasa a sulukik ir arlar ana artabar ning di peki

saot ana numulo na artabar ning.\*  
 18 Larning mulo otleng mulor gas,  
 pa mulor gas taum hok.

*E Pol i mang suir sune e Timoti  
 pa e Epaproditus*

19 Ning a Leklek i malmaling ana nuknukik, bel ir bongnani ar sune sen e Timoti tetek mulo, sur iau otleng ar gas ning ar longor na warwara talapor o mulo. 20 Bel tik kane i arlar o e Timoti, ning i nuknuk kol o mulo. 21 Anasa a tarai rop la nuk pas la ot pa a nunla na titol, pa bel la nuk pas e Iesu Karisito pa anuna titol. 22 Ika mulo ka tasman a wakak a toltol ane Timoti, ning i titol taum hok ana warawai ana Wakak a Warwara arlar ana kaklik ning i titol taum o e tamana. 23 Ning ia kar tasman asaning dir toli hok, a nuki mang ar bot sune seni tetek mulo. 24 Ana anuka tortorot ana Leklek, a tasmani mang milau ma iau ot ar han tetek mulo.

25 A nuki mang ir wakak kol ning ar sune ulak sen e Epaproditus, a tasiklik ana tortorot. Esaning a tena titol pa a tena harum taum hok, pa anumulo a tena titol ning mulo sune seni sur ir nangan iau ana ututnala ning a kapan suri. 26 I mang kol sur ir oroi mulo rop ulak, pa i nuknuk kol ning mulo longori mang i sasam. 27 I momol ot mang i sasam, milau ir mat. Ika e God i marisi, pa bel i maris ka e Epaproditus, i maris iau otleng, sur gong a bal maris ir kibas ulak iau. 28 Onone a mang kol sur ar sune seni tetek mulo, sur mulor gas ning mulor tai taum ulak, pa bel ar nuknuk ulak. 29 Mulor gas pasi ana risana a Leklek. Mulor gas pasi ana tnan gasgas, pa mulor hanrawai tetek a ngas a tarai larning, 30 anasa bel i nuk pas anuna lalaun. I saran tari sur a titol ane

Karisito, pa milau sur ir mat. I toli larning sur ir nangan iau, anasa mulo ot, bel mulo tol lar pasi.

### 3

*Dala ning dala tortorot o e  
 Karisito dala na tena tostos momol*

1 Na tastasik, a ararop a warwara ne a tumusi tetek mulo: Mulor gas ana Leklek. A gas sur ar tumus ulak asaning ia ka tumus tari nating tetek mulo, sur ir nangan mulo.

2 Mulor tumarang mulo kusun a tarai ning la tol a laulauna, ning la arlar ana ngalngaliah na pap. La kot laulau a palaon a tarai, pa la asaer la mang, ning bel di kot talilis la, e God bel ir alaun la.\*

3 Dala ning dala lotu tetek e God taum ana rakrakai a Inguna, dala ka a tarai momol ane God, larning di ka kot talilis tar dala. Bel dala tortorot ana rakrakai a tarai. Dala tortorot ka ana titol ning e Karisito Iesu ka tol tari on dala. 4 Ngandek ning a rakrakai ana tarai ir alaun dala, iau ot ar tolsot pasi sur ar tortorot onoi. Asa ning la tortorot onoi, iau a wakak kol tanla ono. 5 Iau a te Israel, a hal a mangis a tarai ane Benjamin. Iau a te Hibu pa a mur a nunla na toltol. Ning ka siwal a pukakiar lamur tana pukakiar ning di agon iau, di kot talilis iau. Iau a Parisaio pa a sira mur rakrakai na warkurai ane Moses. 6 A rakrakai kol sur ar mur tostos pas a titol ane God, pa ana nuk na titol ning, a alaulau na tena tortorot ane Karisito. Ngandek ning tik ir tostos anasa i mur rop na warkurai, bel ta artituu ir kibas iau.

7 Ika a ututnala rop ne, ning nating a nuki i wakak kol tetek iau, onone i utna oros ka tetek iau, anasa o e Karisito. 8 Momol, a ututnala rop, la utna oros kama

\* 2:17: Ning di tun a inagoi sur a artabar tetek e God, dingla na pukakiar di pek sen otleng a wain saot onoi sur i otleng a artabar. \* 3:2: A kokot talilis a akinalang ning di toli sur ir asangani mang, a barsan ning, a hal a tarai ane God, ning la mur na warkurai.

tetek iau, bel ma a tortorot onla. Ning a utna ka i wakak kol, sur ar tasman e Karisito Iesu anuka Leklek. A ututnala rop la ka rop kusun iau, anasa o e Karisito Iesu. La arlar kama ana beren tetek iau, sur ar kibas pas e Karisito ana nuk a lalaun, <sup>9</sup> pa ar kes taum ono. Pa bel a tena tostos anasa a mur na warkurai. A tena tostos anasa a tortorot o e Karisito. I momol, e God i atong dala na tena tostos anasa dala tortorot o e Karisito. <sup>10</sup> A mang sur ar tasman e Karisito pa a rakrakai ana nuna kamkamtur ulak kusun a minat, pa a mang sur ar tur taum onoi ana kankanla anunai, par arlar ot onoi ana nuna minat. <sup>11</sup> Larning, a tortorot mang iau otleng ar kamtur ulak kusun a minat.

#### *A dududun sur a araropna*

<sup>12</sup> Bel a nuki mang ia ka tong akes a ututnala rop ning. Pa belot a tostos momol. Ika a rakrakai ot sur a utna ning e Karisito Iesu i kabah pas iau suri. <sup>13</sup> Na tastasik, bel a nuki mang ia ka kibas pasi. Ika ning a utna ka a toli. Ine, ia ka duman sen a ututnala tagun nating, a rakrakai kama sur a utna ning kane lanigo tak. <sup>14</sup> A dun usa lanigo sur a ararop ana dun, sur ar kibas pas a arlou, a arkabah ane God tetek iau o e Karisito Iesu sur a lalaun saot na langit.

<sup>15</sup> Dala ning dala tur rakrakai, i wakak sur a nuknukindala ir larning. Ika ning a nuknukimulo ir han masuk on ta utna, e God ot ir atalapori tetek mulo. <sup>16</sup> Ika, a utna ning i itna, dalar mur a momol a asaer ning dala ka kibas pasi.

<sup>17</sup> Na tastasik, mulor mur anuka ngas a toltol. Pa i wakak sur mulor tai murmur la ning la mur a ngas a lalaun ning mila ka asangan tari tamulo. <sup>18</sup> Anasa a galis la lalaun arlar ana hiruala ana rakai kutus ane Karisito, larning ia ka atai tar mulo a galis a pukakiar, pa onone a tangis ning a atong ulaki tamulo.

<sup>19</sup> La han ka sur a hirua, asaning a palaonla i mang suri la muri ka. La aunan la ana toltolla ning di sira meme onoi. A nuknukinla i kes ka sur a ututnala mite lapiu.

<sup>20</sup> Ika dala, a hanua momol ngasindala saot na langit, pa dala misaot ia. Pa dala sira harnanai taum ana tnan gasgas sur a Tena Alaun ning ir han purum misaot, a Leklek e Iesu Karisito. <sup>21</sup> Ir keles pas a palaondala ning bel i rakrakai, sur ir arlar ana palaona, ning i bukus ana matatar. Ir kelesi ana rakrakaina, ning i titol onoi sur ir suah tar a ututnala rop nahai anuna warkurai.

## 4

<sup>1</sup> Na tastasik, mulor tur rakrakai ana Leklek lar otning ia ka atai tar mulo ono. Na halalik a mang kol sur mulo pa mang sur ar oroi mulo, anasa mulo anuka gasgas pa mulo arlar ana arlou ana nuk a titol.

#### *Na warwara ning ir arakrakai a tarai a tortorot*

<sup>2</sup> E Euodia pa e Sintike, a nunung rakrakai mu, sur ir takai ka a nuknukimu, anasa mu anuna Leklek. <sup>3</sup> Pa u otleng ning a momol a tena titol taum hok, a nunung u sur ur nangan naur a hane ne, anasa dia titol rakrakai taum hok sur a Wakak a Warwara ir han sarara. Mila titol taum o e Kelemen, pa dingla na tarai otleng ning a risanla ka kes tar ana buk a lalaun.

<sup>4</sup> Mulor sira gasgas ana Leklek a pukakiarla rop. Ar atong ulaki mang, mulor gasgas. <sup>5</sup> Mulor apuasa anumol na wowon a toltol tetek a taraila rop sur lar oroi i. A Leklek milau ir hanot. <sup>6</sup> Gong mulo nuknuk kol sur ta utna. Ana ututnala rop, mulor nunung ana nunung a atong wakak tetek e God. Pa mulor atai i ana sa ning mulo mang suri. <sup>7</sup> Pa bal molmol ane God ning i itna kol tana tastasmai rop anuna

taraila, ir tai alar a balamulo pa a nuknukimulo, anasa mulo ane Karisito Iesu.

<sup>8</sup> Na tastasik, a ararop a warwara ne a tumusi tetek mulo: A nuknukimulo ir kes ana ututnala ne: asaning i momol, asaning di hanrawai i, asaning i tostos, asaning i totoh, asaning i tatatai wakak pa asaning a taraila la atong wakak ono. Asa ning i wakak kol, pa asaning di rakan aleklek pasi, a nuknukimulo ir kes onoi. <sup>9</sup> Asa ning mulo ka asaer pasi tak, pa mulo ka kibas pasi pa mulo ka longor tari tak, pa mulo ka oroi tari tak, mulor toli ka. Pa e God ning a kamkama molmol ir kes tetek mulo.

*E Pol i gas ana artabar anuna tarai a lotu mitumo e Pilipai*

<sup>10</sup> A gasgas kol ana Leklek, anasa ka bongnani pa bel mulo nangan iau, ika onone mulo nangan ulak iau. I momol, bel mulo duman iau, ika bel ta ngas sur mulor nangan iau. <sup>11</sup> Bel a atongi larne anasa a kapan. Anasa ia ka asaer pas sur a nuknukik ir manah ana ngas a keskes ning ir barat iau. <sup>12</sup> A tasman a keskes a kapan, pa a tasman otleng a keskes a leklek. Ia ka asaer pas sur a nuknukik ir manah ana ngas a keskes ning ir barat iau: ning ar masur, o ar murak, ning ar tong akes a galis a ututnala, o ar kapan. <sup>13</sup> A tolsot pas a ututnala rop anasa o e Karisito ning i arakrakai iau.

<sup>14</sup> Ika i wakak ning mulo tur taum hok ana mamahatla ning a barati. <sup>15</sup> Mulo a tarai Pilipai, mulo tasmani mang nating a warawai ana Wakak a Warwara tumo na papar Masedonia pa mulo lingir a nuknukimulo, pa ning a han mitumo e Masedonia, bel al tarai a lotu la tur taum hok pa la nangan iau ana ta artabar, mulo sot ka. <sup>16</sup> Pa ning a kes tumo e Tesalonika,

mulo sira tabar iau ning a kapan. <sup>17</sup> Bel anumulo na artabar ning a tai suri. A mang ka sur mulor kibas a arlou ana numulo a wakak a titol ning. <sup>18</sup> Ia ka kibas pas a ututnala rop pa i itna kol, i itna tana nuk a kapan. Bel ma a kapan sur ta utna, anasa a ututnala ning mulo saran seni, ia ka kibas pasi ta e Epaproditus. I arlar ana artabar tetek e God ning i tomtoboh wakak, ning e God i gas onoi pa i mang kol suri. <sup>19</sup> Anuk a God ir bonot asaning mulo kapan suri, misaot na wakak a gongon anunai, anasa mulo ane Karisito Iesu. <sup>20</sup> Dalar aleklek pas anundala a God a Tamandala. Dalar alekleki a pukakiarla rop, bel ir rop pa bel ir rop. Amen.

*Na warwara na marmaris*

<sup>21</sup> Mulor saran anuka marmaris tetek a taraila rop ane Karisito Iesu. Na tastasik ana tortorot ning kane la kes taum hok, la saran anunla na marmaris tetek mulo. <sup>22</sup> Na tarai ane God la rop la saran anunla na marmaris tetek mulo, pa a tarai ane God ning la kes ting na rumai anuna Sisar la otleng la saran anunla na marmaris tetek mulo.

<sup>23</sup> A marmaris anuna Leklek e Iesu Karisito ir kes ting na ingumulo. Amen.

## A Pas ane Pol tetek a tarai Kolosi

### *A warwara talapor nigo*

E Pol i kes ting na rumai a dodot tumo e Rom anasa i warawai ana Wakak a Warwara. Ning i kes ting, i tumus diat a pas. Takai tetek a tarai Epeses, takai tetek a tarai Pilipai, takai tetek a tarai Kolosi pa takai otleng tetek e Pilimon.

A pas ne i tumusi tetek a tarai Kolosi. I sarani tetek e Tikikus pa e Onesimus pa dia han onoi utumo e Kolosi.

Ning e Pol i kes to e Epeses i sune sen ning a tena titol a risana e Epapras utumo e Kolosi sur ir warawai tetek la (oroï Kol 1:7), pa tetek a tarai ting na naur a hanua otleng, e Laodisia pa e Hierapolis (oroï Kol 4:13). E Pol bel i han utumo e Kolosi, ika i longori mang la ka lingir a nuknukinla pa i sira nunung sur la.

E Pol i tumus a pas ne anasa e Epapras i ulak teteki, pa i atai i ana asasongo na tena asaer. E Pol bel i mang sur a asasongo na tena asaer lar alaulau a tortorot anuna tarai Kolosi. Na tena asasongo ne la atongi mang a tarai lar lotu tetek a rakrakai a ingunla pa tetek a angelola, pa la atongi mang e Iesu bel a Nat e God, i arlar ka ana angelo. La mang otleng mang a tarai lar mur a Warkuraila ane Moses pa dir kot talilis a palaonla. Ana pas ne e Pol i asaer la mang e Iesu pa e God dia takai ka. Anundiau a matatar, a nuknukindiau, pa anundiau a toltol i arlar ka. Pa o e Iesu Karisito, e God i akes a rakrakan hanua, pa esaning a pukul a tarai a lotu. O e Iesu ka dalar lalaun tikin.

### **A tinan ana buk Kolosi:**

A kamkama buk ne (1:1-2)

E Pol i nunung sur a tarai Kolosi (1:3-14)

E Karisito i itna kol (1:15-23)

E Pol i titol rakrakai (1:24-2:5)

Lar mur a tona lalaun o e Karisito (2:6-3:17)

A asasaer ana wakak a toltol ning dalar toli artalai tetek dala (3:18-4:1)

A ararop a warwara ane Pol tetek la (4:2-18)

<sup>1</sup> Iau e Pol, aposel ane Karisito Iesu ana nuknuk ane God. Miau ma e Timoti a tasindala ana tortorot, mia tumtumus <sup>2</sup> tetek mulo a tarai ane God ning mulo kes ting e Kolosi, ning mulo na tastasimiau ana numulo a keskes o e Karisito, pa mulo momol ana numulo a tortorot. A marmaris pa bal molmol ta e God a Tamandala ir kes o mulo.

### *E Pol pa e Timoti dia nunung sur a tarai Kolosi*

<sup>3</sup> Ning mia nunung sur mulo, mia sira atong wakak tetek e God, e Tamana nundala Leklek e Iesu Karisito, <sup>4</sup> anasa mia ka longori mang mulo ka tortorot o e Karisito Iesu, pa mulo mang sur a taraila rop ane God. <sup>5</sup> Anumung tortorot pa marmaris ne i kamkamna ana numulo a keskes harnanai ana tortorot sur a utna ning e God i tai alari sur mulo saot na langit. A utna ning, mulo ka longor tar a warwara onoi, ting na momol a warwara, i a Wakak a Warwara <sup>6</sup> ning i hanot tetek mulo. A Wakak a Warwara ning i gomo pa i wai te na rakrakan hanua rop, arlar larning ka suah tari na arpotor ta mulo, turpasi ana pukakiar ning mulo longori pa mulo tasman momol a marmaris ane God. <sup>7</sup> E Epapras ka asaer tar mulo onoi. I a wakak a tena titol taum o mila, ning mila mang kol suri, pa a momol a tena titol ane Karisito ning i tur aslang mila. <sup>8</sup> I ka atai tar miau ana numulo a marmaris, ning a Talngan Tabu i tabar mulo onoi.



<sup>9</sup> Ine a kamkamna mang bel mia manah ana nunung sur mulo, turpasi ana pukakiar ning mia longor a warwara o mulo. Mia sira nunung e God sur ir abukus tar mulo ana tastasmai sur mulor tasman a nuknukna, pa a tastasmai pa wakak a nuknuk rop ir kes o mulo, ning a Talngan Tabu i sira artabar ono. <sup>10</sup> Mia nunung larné sur anumulo a lalaun ir arlar ana toltol anuna Leklek, pa mulor sira tol asaning ir gas onoi. Larning anumulo a lalaun ir suah a waimulo ana wakak a titol rop ning mulor toli, pa mulor gomo ana numulo a tastasman o e God.

<sup>11</sup> Pa e God ir arakrakai mulo ana rakrakaila rop, ning i bukus ana matatar, sur mulor kes wowon pa mulor tur rakrakai ana mamahatla rop ning ir pastek mulo. Pa mulor gas, <sup>12</sup> pa mulor atong wakak tetek e Tamandala, esaning i tol asot mulo, sur mulor kibas a ututnala taum ana nuna tarai. A ututnala ning ka lele tari tetek la, ning la kes ting na talapor. <sup>13</sup> I ka alaun pas dala kusun a rakrakai ana mormorom, pa ka ben kas pas dala uting na matanitu ane Natnalik ning i mang kol suri, <sup>14</sup> esaning ka lou alangolango pas dala pa ka kepsen tar anundala na toltol laulau.

*A keskes a leklek ane Karisito*

<sup>15</sup> Bel dala oroi tar e God, ika e Karisito a manar e God. I a ningnigo na Nat e God pa i leklek kol tana akakesla rop. <sup>16</sup> Anasa e God i akes a ututnala rop ana rakrakai e Karisito: a ututnala saot na langit pa ututnala te lapiu, a ututnala ning di oroi la pa a ututnala ning bel di oroi la, mange, a ingunla ning la kes na leklek, a ingunla ning la tong akes a rakrakai, a ningnigola anuna ingunla pa a ingunla ning la tong akes a rakrakai sur lar warkurai. O e Karisito, e God i akes a ututnala rop pa i

akes la sur lar hanrawai e Karisito. <sup>17</sup> Ning e God belot i akes a ututnala rop, e Karisito ka laun, pa i tong akes a ututnala rop sur lar titol taum wakak. <sup>18</sup> I ot a pukul a tarai a lotu, pa la ning a palaona. I a kamkama lalaun anunla, pa a ningnigona ning i kamtur ulak kusun a minat, sur i ot ir leklek tana ututnala rop. <sup>19</sup> Anasa e God i gas sur anuna lalaun rop ir kes o e Natnalik. <sup>20</sup> Pa ana minat e Natnalik, a ututnala rop la ulak teteki sur lar kes na armoro taum onoi, a ututnala te lapiu pa a ututnala saot na langit. I tol a bal molmol ana suluk e Natnalik ning i mat saot na rakai kutus.

<sup>21</sup> Nating mulo kes bakbak kusun e God, pa ting na nuknukimulo mulo ngeti, anasa ana numulo na toltol laulau. <sup>22</sup> Ika onone, e God ka kibas pas mulo teteki sur mulo na halna ulak. I tol a titol ne ana palaona e Karisito ning i mat, sur ir ben otnan pas mulo namatana e God, pa mulo anuna totoh na tarai ning bel ta dur i kes o mulo, pa bel dir arup sot pas mulo on ta rongo. <sup>23</sup> E God ir tol a utna ne ning mulor rakrakai ana tortorot, pa mulor tur rakrakai onoi. Pa gong mulo han masik kusun a keskes na harnanai ana tortorot sur a ututnala ning e God ir toli, ning mulo ka longor tari ana Wakak a Warwara. A Wakak a Warwara ning, di ka atatai tar onoi tetek a taraila rop te na rakrakan hanua. Iau e Pol, a hanot a tena titol ana Wakak a Warwara ning.

*E Pol i titol rakrakai sur a tarai a lotu*

<sup>24</sup> Onone a gas ana mamahatla ning a kilangi sur ir nangan mulo. Ana mamahatla ning a kilangi ana palaok, a tolsot pas a mamahatla ane Karisito, sur ar nangan a tarai a lotu, la ning a palaona e Karisito. <sup>25</sup> E God i suah tar iau sur iau a tena titol anuna tarai a lotu.

I saran tar a titol ne tak sur ar warawai ana nuna warwarala rop tetek mulo. <sup>26</sup> A warwara ne, a utna ning nating i mumun tar kusun a tarai tagun nating, ika onone e God ka apuasa i tetek anuna tarai. <sup>27</sup> E God i apuasa i mang, a tarai ning bel na tarai Juda, la otleng lar tasman anuna warwara, a utna ning nating i mumun tar, ning i wakak pa i bukus ana matatar. Ine a utna ning: E Karisito ot kaning o mulo, i maining, mulo harnanai ana tortorot sur a matatar ane God ning mulor kibasi.

<sup>28</sup> Mila warawai o e Karisito tetek a taraila rop. Mila atumarang la pa mila asaer la ana tastasman rop, sur milar saran tar la rop tetek e God, pa lar tostos rop, anasa la kaning o e Karisito. <sup>29</sup> A titol rakrakai sur a utna ne ir hanot momol. A rakrakai ana tnan rakrakai e Karisito, ning i titol rakrakai ting na nuk a lalaun.

## 2

<sup>1</sup> A mang sur mulor tasmani mang a titol rakrakai sur mulo pa a tarai Laodisia, pa la rop otleng ning bel mila arsongo pas. <sup>2</sup> A toli larning sur ir arakrakai anunla lalaun, pa lar kes na marmaris taum, sur lar bukus ana tnan tastasman rop, sur lar tasman a utna ane God, ning nating i kes mumun, esaning e Karisito ot. <sup>3</sup> A tastasman rop pa a wakak a nuknuk rop la arlar ana wakak a gongonla, pa la kes mumun o e Karisito.

<sup>4</sup> A atongi larne tetek mulo, sur gong tik i asongo mulo an al namnamin na warwara. <sup>5</sup> A momolna, a kes masik kusun mulo ana palaok, ika ana inguk a kes taum ot o mulo, pa a gas ning a oroi mang mulo warkurai tostos anumulo na lalaun pa mulo tur rakrakai ana numulo na tortorot o e Karisito.

*Gong dala mur a warkurai anuna tarai, dalar mur a wakak a lalaun ane Karisito*

<sup>6</sup> Mulo ka kibas pas e Karisito Iesu sur ir Leklek ana lalaun anumulo, i maining i wakak ning mulor laun onoi. <sup>7</sup> Anumulo lalaun ir suah a wakir o e Iesu sur ir gomo, pa mulor tur saot onoi. Mulor tur rakrakai ana tortorot larning di ka asaer tar mulo onoi, pa mulor bukus ana atong wakak tetek e God.

<sup>8</sup> Mulor tai alar mulo, sur gong tik ir dot akes mulo ana tastasman anuna tarai ka, a asasaerla oros ka, pa a asasongo ka. A tastasman ning i hanot ka miting na asaerla ana tumtubunla nating pa miting na ingun laulaula mite na rakrakan hanua, pa bel ta e Karisito.

<sup>9</sup> Anasa a lalaun rop ane God i kes ot o e Karisito ting na palaona. <sup>10</sup> Pa ana lalaun anumulo ting o e Karisito, mulo otleng mulo bukus ana lalaun rop. I ot i leklek tana ingunla rop ning la tong akes a rakrakai pa ingunla rop ning la tong akes a rakrakai sur lar warkurai. <sup>11</sup> O e Karisito, i kot talilis mulo, ika bel a ngas a kot talilis ning a tarai la toli ana kunla. A kot talilis ning e Karisito i toli mange, ka kepsen tar a lalaun turai. <sup>12</sup> Ning di baptais mulo, di por mulo taum o e Karisito. Pa mulo kamtur ulak taum onoi, anasa mulo tortorot ana rakrakai e God, esaning i akamtur ulak pas e Karisito kusun a minat.

<sup>13</sup> Lanigo a ingumulo i mat, anasa mulo tol a toltol laulaula, pa belot di kepsen tar a lalaun turai anumulo. Ika onone, e God ka alaun pas mulo taum o e Karisito. I ka kepsen tar anundala na toltol laulaula rop. <sup>14</sup> Dala sira tabun longor ana Warkuraila ane Moses, pa a artituu i kibas dala. Ika e God i kepsen tar a artituu, ning i sai ahati saot na rakai kutus. <sup>15</sup> E God

ka kepsen tar a rakrakai ana ingunla ning la tong akes a rakrakai pa a ingunla ning la tong akes a rakrakai sur lar warkurai. Pa saot na rakai kutus, i ame la namatana taraila rop, anasa i asangani mang ka tolsot pas la.

<sup>16</sup> I maining gong mulo noren tar tik sur ir tiu mulo mang bel mulo tolsot pas a warkuraila ana asaning mulo ieni pa mulor gangi, o ana asaning mulo toli ana tnan pukakiar a lotu, o ana kalang ning i hanot kamna, o ana Pukakiar Sabat. <sup>17</sup> A warkuraila ne la arlar ka ana manar a utna ning ir hanot lamur. Ika a utna momol, e Karisito. <sup>18</sup> Ning tik i asasongo mang i anatarna pasi ana nuna ngas a lotu, pa i lotu tetek a angelola, pa i sira warwara ana tatatai ning i oroi, gong mulo noren tari sur ir tiu mulo. Anasa a ngas a barsan ning i rakan aleklek orosi ka ana nuknukna, ning i bukus taum ana lalaun turai. <sup>19</sup> I ka takutus kusun e Karisito, i ning a pukul a tarai a lotu, pa dala a palaona. E Karisito i arakrakai a didiah palaona sur lar nangan artalai la pa lar kes taum, arlar ana lolosla ning la tungtugus taum. Pa a kidol a palaona i gomo, larning e God i mang suri.

<sup>20</sup> Ning mulo ka mat taum o e Karisito, mulo ka langolango kusun a asasaerla anun a ingun laulaula mite na rakrakan hanua. Sur asa ning mulo laun ulak ka larning mulo mite na rakrakan hanua pa mulo mur a warkuraila mite? <sup>21</sup> A warkuraila manglarne, "Gong mulo tongi! Gong mulo ieni! Gong mulo tuk tari!" <sup>22</sup> A warkuraila ne i warwara ana ututnala ning dala titol pas onoi, pa lamur bel la to pas ta utna, anasa a warkuraila ne pa asasaerla ne la hanot ka miting na tarai. <sup>23</sup> A momolna, a warkuraila ne a tarai la nuki mang ir arakrakai la ana nunla lotu, pa la anatarna pas la,

pa la alaulau a palaonla, ika bel i nangan la. A warkuraila ne, la tatatai larning la hanot tagun a wakak a tastasman, ika bel la tolsot pasi sur lar sairas a lalaun turai.

### 3

#### *A tona lalaun o e Karisito*

<sup>1</sup> E God ka akamtur pas mulo taum o e Karisito kusun a minat, i maining i wakak ning mulor suah a nuknukimulo rop ana ututnala saot na langit, ning e Karisito i kes ia, ana ris a sot a kuna e God. <sup>2</sup> I wakak ning a nuknukimulo ir kes ana ututnala saot na langit, pa gong i kes ana ututnala mite lapiu. <sup>3</sup> Anasa mulo ka mat, pa onone anumulo a lalaun i kes mumun taum o e Karisito, tingui o e God. <sup>4</sup> E Karisito i anumulo a lalaun. Pa ning ir hanot mulo otleng mulor hanot puasa taum onoi ting na nuna matatar.

<sup>5</sup> I maining mulor umkol a toltol laulaula mite lapiu ning kaning na lalaun anumulo. A ututnala ning ine: a pamuk a toltol, a dur a toltol, a nuknuk sur asaning a palaondi i mang suri, a nuknuk sur a toltol laulaula pa a nuknuk sur a galis a utna na gongon. A nuknuk sur a galis a utna na gongon, i ning a lotu tetek a asasongo a godla. <sup>6</sup> A balakut ane God ir hanot tetek a tarai anasa la tol a toltolla ne.

<sup>7</sup> Ana numulo a lalaun nating, mulo otleng mulo sira mur a toltolla ne. <sup>8</sup> Ika onone, mulor kepsen a toltolla rop ne: a balakut, a arlak, a toltol laulaula, a warwara laulau, pa a arle otleng. <sup>9</sup> Gong mulo asongo artalai mulo, anasa mulo ka kepsen tar a toltol laulaula ning nating mulo sira toli, <sup>10</sup> pa mulo ka mermer pas ana tona lalaun. A tona lalaun ne, e God ot i saran tari ta mulo pa i sira atonai, sur mulor arlar ot ana manarna, pa mulor tasman momol e God. <sup>11</sup> Pa larning, dala

rop dala arlar kama: na tarai Juda, a tarai Grik, la ning di ka kot talilis tar la pa la ning bel di kot talilis la, a tarai ning bel la tastasman wakak, pa a tarai miting esi na ngas a mangis a tarai otleng, a tena titol orosla pa a taraila otleng ning bel la tena titol oros. E Karisito ot i itna kol, pa i kes ondala rop.

*A marmaris artalai*

<sup>12</sup> Mulo na totoh a tarai ane God, ning i maris mulo, pa i aslang pas mulo. I maining i wakak sur mulor mermer taum ana toltolla ne: mulor nangan a taraila, mulor tol a wakakna tetek la, mulor anatarna pas mulo, mulor kes a bal molmol pa mulor asangan a molmol na toltol. <sup>13</sup> Mulor malmaling artalai mulo. Pa ning ta halimulo i tol tar ta laulauna tetek mulo, gong mulo kelesi, mulor nuk duman sen anuna toltol laulau, larning a Leklek ka kepsen anumulo na toltol laulaula. <sup>14</sup> Saot na toltolla rop ne, i wakak ning mulor mermer ana marmaris artalai mulo. A marmaris i dat taum a toltolla rop ne, sur lar titol taum wakak.

<sup>15</sup> I wakak ning a bal molmol ning e Karisito i tabar mulo onoi ir nigon mulo ana lalaun anumulo. Anasa mulo a didiah palaona e Karisito, pa e God i kabah pas mulo sur mulor kes taum ana bal molmol. Pa mulor sira atong wakak tetek e God. <sup>16</sup> I wakak ning a warwara ane Karisito ir kes tingui na balamulo pa ir bukus. Pa mulor asaer artalai mulo onoi, pa mulor arakrakai artalai mulo otleng onoi, taum ana tastasman rop. Pa mulor saksak otleng onoi ning mulo saken a Saksakla ane Dewit, pa na saksak a lotu, pa na saksak ning a Talngan Tabu i tabar mulo onoi. Pa mulor saksak ana atong wakak tetek e God tingui na balamulo. <sup>17</sup> Ana ututnala rop ning mulo toli pa mulo atongi, mulor toli ot ana risan a Leklek e Iesu, pa mulor atong wakak tetek e God

a Tamandala, anasa ana titol ning e Karisito i toli o mulo.

*A asasaer tetek a kamkabai tamana*

*(Ep 5:22—6:4)*

<sup>18</sup> Mulo na tinaulai a gurara, i wakak ning mulor anatarna pas mulo tetek anumulo na tarai, anasa a toltol ning, i tostos sur mulo, a tarai ana Leklek.

<sup>19</sup> Mulo otleng, na tinaulai a tarai, mulor mang sur anumulo na gurarala, pa gong mulo angongos la ana titol rang.

<sup>20</sup> Kakakla, mulor longor tana tamtamamulo pa na kabatnamulola ana ututnala rop, anasa a Leklek ir gas ning mulor sira toli larning.

<sup>21</sup> Mulo a tamtamana kakakla, gong mulo angangas a natnatumulola, sakana lar bulnga.

*A asasaer tetek a tena titol orosla pa nunla ningnigola*

*(Ep 6:5-9)*

<sup>22</sup> Mulo na tena titol oros, mulor longor tetek anumulo na ningnigo mite lapiu ana titol rop. Gong mulo titol wakak ka ning la oroi mulo, sur mulor agasgas tar la ka. Mulor titol wakak tetek la ana momolna ting na balamulo, pa hanrawai tetek a Leklek. <sup>23</sup> Ana titol rop ning mulo toli, mulor saran arop tar anumulo a lalaun onoi. Mulor titol larning mulo titol ot tetek a Leklek, pa bel tetek a tarai. <sup>24</sup> Anasa mulo tasmani mang, a Leklek ir saran a arlou tetek mulo, i a wakak a keskes ning mulor kibasi lamur. Mulo a tena titol oros ana Leklek e Karisito, pa i ot anumulo a ningnigo momol. <sup>25</sup> Esining i tol a laulauna ir kibas a warkurai a arkeles ana laulauna ning ka tol tari, anasa a Leklek bel i purpurngis.

**4**

<sup>1</sup> Mulo a ningnigola, mulor toli a tostos a toltol tetek anumulo

na tena titol oros, pa gong mulo purpurngis, anasa mulo tasmani mang mulo otleng, anumulo a Leklek, ning i kes saot na langit.

*Dalar atatai o e Karisito*

<sup>2</sup> Mulor rakrakai ana nunung. Ning mulo nunung, a nuknukimulo ir talapor, pa mulor atong wakak tetek e God. <sup>3</sup> Mulor nunung otleng o mila, sur e God ir sapang a ngas sur milar apuasa a warwara o e Karisito, ning nating i mumun. Kane a kes na dodot, anasa a atatai onoi. <sup>4</sup> Mulor nunung sur ar atatai talapor wakak onoi, sur ar tolsot pas anuka titol.

<sup>5</sup> Mulor titol taum ana tastasman tetek a tarai ning bel la tortorot, pa ana pukakiarla rop, ning i langolango sur mulor atatai tetek la, mulor toli. <sup>6</sup> Ning mulor warwara tetek a tarai, anumulo na warwara ir wakak, pa ir agasgas la, sur mulor saran a tostos a arkeles ana kabah anunla taktakai.

*E Pol i sune e Tikikus utumo e Kolosi*

<sup>7</sup> E Tikikus ir atai mulo ana ututnala rop ning a toli. I a tasindala ning mila mang kol suri, a momol a tena harnangai pa a tena titol taum o mila ana titol anuna Leklek. <sup>8</sup> A sune i tetek mulo, sur mulor tasman anumila lalaun i mangmangasa, pa sur ir arakrakai a balamulo. <sup>9</sup> Ir han taum o e Onesimus, a tasindala ning i momol ana nuna titol pa dala mang kol suri, i ning a halimulo. Diar atai mulo ana ututnala rop ning i hanot te.

*A warwara na marmaris*

<sup>10</sup> E Aristarkus, esaning i kes taum hok ana rumai a dodot, i saran anuna marmaris tetek mulo, dia ma e Mak a malna e Barnabas. Ning e Mak ir hanot tetek mulo, mulor gasgas pasi, larning a warwara ning mulo ka kibas pasi nating. <sup>11</sup> Pa e Iesu, ning a risana otleng e Jastus, i otleng i saran anuna marmaris tetek mulo. Ditol

ne, ditol natol a te Juda ning ditol tortorot, pa ditol sot ka tagun a tarai Judala ditol titol taum hok sur a matanitu ane God. Ditol arakrakai iau.

<sup>12</sup> E Epapras, i ning a halimulo, pa a tena titol ane Karisito Iesu, i saran anuna marmaris tetek mulo. I sira nunung rakrakai o mulo, sur mulor tur rakrakai, pa mulor rakrakai ana lalaun anumulo o e Karisito, pa mulor tasman a nuknuk rop ane God. <sup>13</sup> Anasa iau ot a oroi pa a atatai momol onoi tetek mulo, mang i titol rakrakai sur mulo pa sur la tumo e Laodisia pa la otleng to e Hierapolis. <sup>14</sup> E Luk, a dokta ning mila mang kol suri, pa e Demas, dia saran anundiau a marmaris tetek mulo.

<sup>15</sup> Mulor saran anuka marmaris tetek a tastasindala tumo e Laodisia, pa tetek a hane ne, e Nimpa, taum ana tarai a lotu otleng, ning la sira lotu taum ting na nuna rumai.

<sup>16</sup> Ning di ka was tar a pas ne tetek mulo, lamur mulor sarani tetek a tarai a lotu tumo e Laodisia sur dir wasi tetek la otleng. Mang otleng larning, mulor was a pas ning a tumusi tetek a tarai Laodisia.

<sup>17</sup> Mulor atai e Arkipus manglarne, ir tol arop tar a titol anuna Leklek ning di ka saran tari tana.

<sup>18</sup> Siklik warwara na marmaris ne iau ot, e Pol, a tumusi ana kuk tetek mulo. Gong mulo duman tar iau, mulor nuk pas iau, ning a kes na dodot.

A marmaris ane God ir kes taum o mulo.

## A Ningnigo na Pas ane Pol tetek a tarai Tesalonika

*A warwara talapor nigo*

Ning e Pol i kes to e Korin i tumus a pas ne, a ningnigo na pas tetek a tarai a tortorot to e Tesalonika.

E Tesalonika a tnan hanua ting na papar Makedonia. Ana munatol a tinan ane Pol i hanot to e Tesalonika pa i warawai tetek la (oro i Ap 17:1-14). Dingla na tarai ning la lingir a nuknukinla, tagun a tarai Juda, ika a galis otleng tagun a tarai masak. A ningnigola anuna tarai Juda to e Tesalonika la balakut ning la oro i mang dingla na tarai tagun la, la tortorot o e Iesu, pa la kepsen e Pol kusun a nunla hanua. Pa e Pol i han utumo e Beria. Lamur i sune sen e Timoti tetek la, pa e Timoti i atai e Pol onla.

Ana pas ne, e Pol i atong wakak tetek e God anasa a tarai Tesalonika la tur rakrakai ana tortorot ning la pastetek a mamahatla, pa la maris e Pol. E Pol i mang sur ir arakrakai anunla tortorot, pa i keles otleng anunla na kabah ana minat.

### **A tinan ana Ningnigo na Buk Tesalonika:**

A kamkama buk ne (1:1)

E Pol i gas onla (1:2-10)

A titol ane Pol to e Tesalonika (2:1-3:13)

A ngas a lalaun ning i agasgas e God (4:1-12)

A tinan ot ulak anuna Leklek (4:13-5:11)

A ararop a warwara ane Pol tetek la (5:12-28)

<sup>1</sup> Iau e Pol, Sailas, pa e Timoti, mitol tumtumus tetek mulo a tarai a lotu to e Tesalonika, mulo ning mulo laun o e God e Tamandala pa a Leklek e Iesu Karisito. A

marmaris pa a bal molmol tetek mulo.

*A lalaun pa a tortorot anuna tarai Tesalonika*

<sup>2</sup> Mitol sira atong wakak tetek e God o mulo rop, pa mitol sira saran tar mulo tetek e God ana numitol na nunungla. <sup>3</sup> Ning mitol nunung tetek anundala God a Tamandala, mitol nuk pas a ututnala ning mulo sira toli kamkamna ana numulo a tortorot, pa mitol nuk pas a titol ning mulo toli kamkamna ana numulo a marmaris, pa mitol nuk pas otleng anumulo na tuntunur rakrakai kamkamna ana numulo a keskes harnanai ana tortorot ana Leklek e Iesu Karisito.

<sup>4</sup> Na tastasimitol, ning e God i maris mulo, mitol tasmani mang ka aslang pas mulo, <sup>5</sup> anasa a Wakak a Warwara ning mitol apuasa i tetek mulo, bel i hanot ana warwara ka, i hanot taum ana rakrakai pa taum ana Talngan Tabu, pa mulo longor lalani pa mulo tong akesi ana bala-mulo. Mulo tasman wakak anumitol a toltol, ning mitol laun potir napirim mulo sur mulor wakak onoi. <sup>6</sup> Mulo ka mur pas a ginimitol pa a ginina Leklek. A tarai la alaulau mulo, ika mulo tong akes a warwara ana gasgas, ning a Talngan Tabu i sarani ta mulo. <sup>7</sup> Pa larning, mulo asangan a wakak a toltol sur a tarai a tortorot rop tingia ana naur a papar ning, e Makedonia pa e Akaia lar muri. <sup>8</sup> A warwara anuna Leklek ning mulo apuasa i ka han sarara, arlar ana tinangis ana garamut, ning i han bakbak. Belsur ting ka e Makedonia pa e Akaia. A hananuala rop la ka tasman anumulo a tortorot o e God. Manglarning, asa kale ning mitol ar atongi? <sup>9</sup> Anasa la ot la warwara talapor ana numulo a wakak a toltol ning mulo gas pas mitol. Pa la atatai otleng o mulo, ning mulo ka talingir tar

tetek e God, pa bel mulo lotu ma tetek a asasongo na godla. Mulo titol ma tetek e God, esaning a momolna pa a lalauna. <sup>10</sup> Pa la atatai otleng o mulo mang, mulo harnanai sur e Natnalik ning ir han purum misaot ana langit, esaning e God ka akamtur ulak pasi kusun a minat. E Iesu, ning i alaun pas dala kusun a balakut ane God ning ir hanot.

## 2

*A titol ane Pol ditol to e Tesalonika*

<sup>1</sup> Na tastasimitol, mulo ot mulo tasmani mang anumitol a tinan ot tetek mulo bel i utna oros ka, i suah ot a wana. <sup>2</sup> Mulo tasmani mang lanigo tana numitol a tinan ot tetek mulo, a tarai la alaulau mitol pa la ame mitol to e Pilipai. Ika ana harnangai anuna nundala God, mitol rakrakai ot sur mitol ar atatai ana nuna Wakak a Warwara tetek mulo, pa bel mitol matatan la ning la sairas rakrakai mitol. <sup>3</sup> Ning mitol nunung mulo sur mulor lingir a nuknukim mulo, bel anumitol a warwara i rongo, bel otleng mitol warwara ana laulau a nuknuk pa bel mitol asongo pas mulo. <sup>4</sup> Belal momol! Mitol atatai ana Wakak a Warwara, anasa e God ka lar tar mitol, pa i tortorot o mitol sur mitol ar toli. Ning mitol atatai bel sur mitol ar agasgas a taraila onoi, sur e God ot ir gas onoi, ai ning i lar mitol. <sup>5</sup> Mulo ka tasmani mang bel mitol agasgas mulo anal namnamin a warwara, pa bel mitol nuknuk kumna sur ta mani ta mulo. E God i oroi pa i tasman mitol. <sup>6</sup> Bel mitol mang sur mulo o tik masik otleng ir atong leklek pas mitol.

<sup>7</sup> I tostos ning mitol ar nunung mulo sur ta arlou, anasa mitol natola aposel ane Karisito. Ika bel mitol toli larning. Mitol asangan a molmol a ginimitol na arpotor ta mulo, arlar ana hane ning i tai

alar na natnatnala. <sup>8</sup> Mitol mang kol sur mulo, pa mitol gas kol sur mitol ar atai mulo ana Wakak a Warwara ane God. Bel sur i ka ine, mitol gas sur mitol ar saran anumitol a lalaun otleng tetek mulo, anasa mulo itna kol namatamitol.

<sup>9</sup> Na tastasimitol, mulor tasman anumitol a rakrakai a titol. Mitol titol taum ana kumitol ana moromla pa a kabakiarla. Mitol toli larne sur gong mitol saran ta mamahat tetek mulo ning mulor lou mitol, ana numitol a titol na warawai tetek mulo taum ana Wakak a Warwara ane God. <sup>10</sup> Mulo ot, pa e God otleng, mulo oroi anumitol a lalaun ning mitol kes taum ono na arpotor ta mulo, a tena tortorotla. Anumitol a lalaun i totoh pa i tostos, pa bel di arup sot pas mitol on ta rongo. <sup>11</sup> Mulo tasmani mang anumitol a toltol tetek mulo rop taktakai i arlar ana toltol ning a barsan i toli tetek na natnatnala. <sup>12</sup> Manglarne, mitol arakrakai mulo, mitol warwara na amolmol tetek mulo, pa mitol atai mulo sur mulor laun taum ana ngas a lalaun ning i agasgas e God, ai ning i sira kabah pas mulo sur anuna matanitu pa anuna matatar.

<sup>13</sup> Pa mitol sira atong wakak otleng tetek e God mange, ning mulo longor a warwarala ane God ta mitol, mulo kibasi. Bel mulo kibasi arlar ana warwarala ka anuna tarai, mulo kibasi anasa a warwara ot ane God. A warwara ning kaning i titol ting na lalaun anumulo ning mulo ka tortorot. <sup>14</sup> Na tastasimitol, i manglarning anasa mulo arlar ana tarai a lotu ane God ning la kaning o e Karisito e Iesu, ning la kes to na papar Judia. Pa mulo otleng mulo kilang kankan ana kuna taraila ting na numulo a hanua, arlar ana tarai a lotu to e Judia la kilangi ana kuna nunla na tarai ot, a tarai Juda, <sup>15-16</sup> la ning la umkol a Leklek e Iesu pa a propetla, la kepsen mitol

otleng. La toho i sur lar sairas mitol, sur gong mitol warawai tetek a taraila ning bel na tarai Juda sur gong e God ir alaun pas la. Ning la toli larne, e God bel i gas onla, pa la kes na hirua taum ana taraila rop. Pa ana nunla toltol ning, la tol taum ka anunla na toltol laulaula, tuk ning a balakut ane God ka hanot tetek la.

*Ditol mang sur ditol ir oroi ulak a tarai Tesalonika*

<sup>17</sup> Na tastasimitol, ning a tarai Juda la akes sarara tar mitol kusun mulo, anundala keskes sarara bel i bongnani. Dala kes sarara ana palaondala, ika ana nuknukimitol mitol nuk mulo ot. Mitol mang kol sur mitol ar oroi mulo, pa mitol rakrakai sur mitol ar tolsot pasi. <sup>18</sup> Mitol mang kol sur mitol ar ulak tetek mulo. Iau e Pol a toho i pa toho i sur ar han tetek mulo, ika e Satan i sairas mitol. <sup>19</sup> Mitol mang kol sur mitol ar oroi mulo, anasa mitol tortorot o mulo mang mulo tur rakrakai, pa mulo a kamkamna ana numitol a gasgas, pa mitol ar iaunan mitol o mulo ana pukakiar ning anundala Leklek e Iesu ir hanot, pa dalar tur namatana. <sup>20</sup> I momol kol ning mulo ot anumitol a matatar pa anumitol a gasgas.

### 3

<sup>1</sup> Bel ma mitol mang sur mitol ir kes kol, anasa mitol nuknuk kol o mulo. Mitol nuki mang i wakak ning mia ka ma e Sailas, miar kes te e Atens pa miar sune e Timoti. <sup>2</sup> Pa mia ka sune tar e Timoti a tasindala, pa a tena titol ane God taum o miao, ning mitol sira warwara talapor ana Wakak a Warwara o e Karisito. Mia ka sune seni tetek mulo, sur ir arakrakai mulo, pa ir warwara na harnangai tetek mulo ana numulo na tortorot, <sup>3</sup> sur gong tik tagun mulo a nuknukna ir loklokron ana mamahatla ning mulo kilangi. Anasa mulo tasmani

ot mang a mamahatla ir kibas dala. <sup>4</sup> Ning dala kes taum, mitol sira atai mulo mang dir alaulau dala. Pa mulo ka tasmani mang a mamahatla ning ka hanot. <sup>5</sup> Ine a kamkamna ning a sune e Timoti tetek mulo. Bel a mang sur ar kes kol, anasa a nuknuk kol o mulo, pa a sune i tetek mulo sur ar tastasman ana numulo a tortorot. A matmataut, sakana a Tena Alam ka apungan ulak pas mulo, pa anumitol a titol tetek mulo ir utna oros ka.

*E Timoti i los a wakak a warwara talapor ana tarai Tesalonika tetek e Pol diau*

<sup>6</sup> Ika onone e Timoti ka ulak kusun mulo tingia ute tetek miao. I abaran a wakak a warwara talapor o mulo tetek miao, ana numulo a tortorot pa anumulo a marmaris. I atai miao mang mulo sira gas ning mulo sira nuk ulak pas anundala keskes taum nating, pa mulo mang kol sur mulor oroi mitol, larning mitol otleng mitol mang kol sur mitol ar oroi mulo. <sup>7</sup> Na tastasimitol, ning mitol kes na arpotor ana mamahatla ning mitol kilangi pa akadikla, anumulo a tortorot i arakrakai mitol. <sup>8</sup> Onone anumitol a lalaun i wakak kol, anasa mulo tur rakrakai ana Leklek. <sup>9</sup> Mitol gas kol o mulo namatana nundala God, pa mitol atong wakak tekei. Anumitol a gasgas i itna kol, pa bel mitol tolsot pasi sur mitol ar atong wakak sur ir arlar ana numitol a tnan gasgas. <sup>10</sup> Ana moromla pa a kabakiarla, mitol saran arop tar anumitol a lalaun ana nunung. Mitol nunung sur mitol ir oroi ulak mulo, pa mitol ar asaer mulo anal utna ning mulo kapan suri ana numulo a tortorot.

<sup>11</sup> Pa mitol nunung mang e God a Tamandala pa nundala Leklek e Iesu, ir atalapor anumitol a ngas sur mitol ar han tetek mulo. <sup>12</sup> Pa



mitol nunung otleng sur a Leklek ir agomo numulo a marmaris sur ir bukus pa ir taptapek artalai o mulo pa tetek a tarai masik otleng, lar anumitol a marmaris tetek mulo. <sup>13</sup> Manglarning, a Leklek ir arakrakai mulo sur mulor totoh, pa bel dir arup sot pas mulo on ta rongo, ning mulor tur namatana e God a Tamandala, ana pukakiar ning anundala Leklek e Iesu ir hanot, taum ana nuna tarai rop.

#### 4

*A ngas a lalaun ning ir agasgas e God*

<sup>1</sup> Na tastasimitol, mitol ka asaer tar mulo ana ngas a lalaun sur mulor laun taum ono sur ir agasgas e God. Larotning mulo ka muri. Pa onone mitol nunung mulo, pa mitol arakrakai mulo ana risana Leklek e Iesu, sur anumulo a ngas a lalaun larning ir itna pa ir gomo rakrakai. <sup>2</sup> Anasa mulo ka tasman a asasaerla ning mitol ka asaer tar mulo onoi. A asasaerla ning la hanot ot miting tana Leklek e Iesu. <sup>3</sup> A nuknuk e God sur anumulo a lalaun ir totoh namatana, pa mulor han masik kusun a toltol a pamuk. <sup>4</sup> Taktakai o mulo ir alasani sur ir warkurai alar a palaona, sur a toltol na totoh pa hanrawai ir kes ting na nuna lalaun. <sup>5</sup> Pa gong mulo mur a rakrakai a nuknuk ana pamuk a toltol, arlar onla ning bel la tasman e God. <sup>6</sup> Gong ta halimulo i tol a laulauna ana hane ane tasnalik ana tortorot. Ning ir toli larning, i asasongo ka e tasnalik. Mitol ka atong tari pa mitol ka atumarang tar mulo mang, a Leklek ir saran a warkurai na arkeles tetek la ning la tol a toltolla larne. <sup>7</sup> Anasa e God bel i kabah pas dala sur a dur a toltol, i kabah pas dala sur dalar mur a totoh na lalaun. <sup>8</sup> Larne, ning tik bel i mang sur a asasaer ne, bel i gilam ris tetek a tarai. I gilam ris tetek

e God, esaning i tabar dala ana Inguna, a Talngan Tabu.

<sup>9</sup> Bel mitol ar tumtumus ulak tetek mulo ana numulo a marmaris tetek na tastasimulo, anasa e God ka asaer tar mulo sur mulor mang artalai sur mulo. <sup>10</sup> A momolna ot, mulo mang sur na tastasimulo rop ting na papar Make donia rop. Ika, mitol nunung mulo sur anumulo a marmaris ir itna pa ir gomo rakrakai.

<sup>11</sup> Mulor rakrakai sur anumulo a toltolla ir manglarne: Mulor kes na bal molmol, pa gong mulo subaran pukulumulo sur ta utna anuna tik. Mulor titol ana kumulo sur amulo al utna na hangan, larning mitol ka atai tar mulo. <sup>12</sup> Ning mulor toli larning, a tarai ning bel la tortorot lar hanrawai mulo, pa bel mulor kapan sur ta utna.

*A tinan ot ulak ana Leklek*

<sup>13</sup> Na tastasimitol, mitol mang sur mulor tastasman onla ning la ka mat, pa gong mulo bal maris arlar ana tarai ning bel la harnanai ana tortorot ana kamkamtur ulak kusun a minat. <sup>14</sup> Dala tortorot mang e Iesu i mat, pa i kamtur ulak. Pa larning, dala tortorot mang la ning la tortorot o e Iesu, pa la ka mat, e God ir ben taum la o e Iesu, ning ir ulak.

<sup>15</sup> A warwara ning mitol atai mulo onoi, a warwara ot anuna Leklek. Dala ning dalar laun tuk ana pukakiar ning a Leklek ir hanot ulak, bel dalar nigo tanla ning la ka mat. <sup>16</sup> Anasa a Leklek ot ir han purum misaot na langit, a elngen tik ir arkabah, a ningnigo anuna angelola ir warwara, a tawuru ane God ir tangis, pa la ning la mat pa la tortorot o e Karisito lar kamtur nigo. <sup>17</sup> Lamur, dala ning kaning ot dala laun, dir los taum pas dala usaot na didiah bakut sur dalar arsongo taum ana Leklek ting na puka solsolna. Pa larning, dalar kes tikin taum ana

Leklek. <sup>18</sup> I ma ining, mulor arakrakai artalai mulo ana warwara ne.

## 5

*Dalar kes na sang sur a tinan ot ana Leklek*

<sup>1</sup> Na tastasimitol, bel mitol ar tumtumus tetek mulo ana pukakiar pa kalang ning a Leklek ir hanot ono. <sup>2</sup> Anasa mulo ka tasman wakaki mang a pukakiar ana Leklek ir hanot kulkulan, arlar ana tena kinkinau ana morom. <sup>3</sup> Ning a tarai lar warwara lerne, "Dala kes ana bal molmol pa ana wakak a lalaun," a hinirua ir hanot kulkulan tetek la, arlar ana kankan ning a hane i kilangi ning milau ir agon. Bel lar bolos lar pas kusuni.

<sup>4</sup> Ika mulo, na tastasimitol, bel mulo kes ana mormorom, sur a pukakiar ning ir akulkulan mulo, arlar ana tena kinkinau. <sup>5</sup> Anasa mulo rop na natnat a kabakiar. Belsur dala tagun a morom pa tagun a mormorom. <sup>6</sup> Pa gong dala arlar ana dingla na tarai ning la borbor duman. Dalar tai alar dala pa dalar warkurai tostos anundala lalaun. <sup>7</sup> Anasa la ning la borbor duman, la sira borbor ana morom, pa la ning la sipak, la sira sipak ana morom.

<sup>8</sup> Ika dala tagun a kabakiar, i wakak ning dalar warkurai tostos anundala lalaun. Dalar amermer dala ana tortorot pa ana marmaris sur ir tai alar dala, arlar ana tena harum i suah alar a molosna ana puka aen. Pa dalar amermer dala otleng ana keskes na harnanai ana tortorot o e God sur ir alaun dala, arlar ana tena harum i suah alar a pukulna ana kukuh na harum. <sup>9</sup> Anasa e God bel i aslang pas dala sur dalar kilang kankan tingui na nuna balakut. I aslang pas dala sur anundala Leklek e Iesu Karisito ir alaun dala. <sup>10</sup> I mat sur dala, sur dalar laun taum onoi ning ir ulak purum. Dala rop, la

ning kaning ot la laun, pa la ning la ka mat. <sup>11</sup> Pa mulor warwara na harnangai artalai tetek mulo, pa mulor arakrakai mulo, mang ot larning mulo sira toli.

*A ararop a asasaer*

<sup>12</sup> Na tastasimitol, mitol nunung mulo sur mulor hanrawai la ning la titol rakrakai na arpotor imulo, pa la tai alar mulo ana ngas ana Leklek, pa la asaer mulo. <sup>13</sup> Mulor asangan a tnan hanrawai tetek la taum ana marmaris, anasa ana nunla titol. Pa mulor kes na bal molmol artalai.

<sup>14</sup> Na tastasimitol, mitol nunung mulo mang mulor atumarang a tarai ning la ngoro, mulor arakrakai la ning la sira matmataut, mulor nangan la ning bel la rakrakai ana tortorot, pa mulor bal molmol tetek a taraila rop. <sup>15</sup> Mulor tai alar mulo sur gong mulo keles a laulauna ana laulauna. Mulor rakrakai sur mulor tol a wakakna artalai tetek mulo, pa tetek a tarai masik otleng.

<sup>16</sup> Mulor sira gasgas. <sup>17</sup> Gong mulo manah ana nunung. <sup>18</sup> Mulor atong wakak tetek e God ana sa la rop ning i hanot tetek mulo. Anasa ine a nuknuk e God tetek mulo, ning mulo ana Karisito Iesu.

<sup>19</sup> Gong mulo sairas a titol ana Talngan Tabu. <sup>20</sup> Gong mulo nuknuk ororos ana warwarala na propet. <sup>21</sup> Mulor lar rop a warwarala pa a toltolla, pa mulor tong akes a wakak a toltol. <sup>22</sup> Pa mulor han masuk kusun a urmatana laulaula rop.

<sup>23</sup> Mitol nunung sur e God ot, a God na bal molmol ir atotoh pas anumulo na lalaun, sur mulor totoh rop namatana. Mitol nunung otleng mang e God ir tai alar anumulo a lalaun rop, lerne a ingumulo, a nuknukimulo pa a palaomulo, sur gong di arup sot pas mulo on ta rongo ana pukakiar ning anundala Leklek e

Iesu Karisito ir ulak purum onoi.

<sup>24</sup> Esaning i kabah pas mulo ir toli ot larning, anasa i momol.

<sup>25</sup> Na tastasimitol, mulor nunung sur mitol. <sup>26</sup> Ning mulo arsongo taum ana tastasumulola, mulor asangan anumulo a marmaris tetek la ana argoro, ana totoh a nuknuk. <sup>27</sup> A nunung mulo ana risana Leklek sur mulor was a pas ne tetek a tastasindala rop.

<sup>28</sup> A marmaris ana nundala Leklek e Iesu Karisito ir kes taum o mulo.

## A munaur a Pas ane Pol tetek a tarai Tesalonika

*A warwara talapor nigo*

Ning e Pol i kes to e Korin i tumus a pas ne.

I longori mang dingla na tarai la urmatana nuknuk ana tinan ot ulak ane Iesu. Dingla na tarai la atongi mang e Iesu ka hanot tar. Ana pas ne e Pol i asaer la ana tinan ot ane Iesu. I atai la mang a laulau a barsan ir hanot nigo pa ir asongo a galis a tarai. Lamur e Iesu ir hanot ulak pa ir warkurai a tena laulau. E Pol i atai la otleng mang gong la palaona ngoro, lar rakrakai ana tol a wakak a toltol.

**A tinan ana Munaur a Buk Tesalonika:**

A kamkama buk ne (1:1-2)

E God ir warkurai a tarai (1:3-12)

A tinan ot anuna laulau a barsan pa lamur e Iesu ir hanot (2:1-17)

Lar tol a wakak a titol pa gong a palaonla i ngoro (3:1-15)

A ararop a warwara ane Pol tetek la (3:16-18)

<sup>1</sup> Iau e Pol, Sailas pa e Timoti, mitol tumtumus tetek mulo a tarai a lotu to e Tesalonika, mulo ning mulo laun o e God e Tamandala pa a Leklek e Iesu Karisito.

<sup>2</sup> A marmaris pa a bal molmol tetek mulo miting ta e God a Tamandala pa a Leklek e Iesu Karisito.

*E God ir saran a warkurai na arkeles tetek a tarai*

<sup>3</sup> Na tastasimitol, i wakak sur mitol ar sira atong wakak tetek e God o mulo. I tostos ning mitol toli larning, anasa anumulo a tortorot i gomo, pa i gomo rakrakai, pa a marmaris artalai tetek mulo otleng i gomo amon. <sup>4</sup> Ine a kamkamna ning mitol ot mitol sira atong aitna pas mulo tetek a tarai

a lotu ane God ting na hananuala. Mitol sira atong aitna pas mulo ana numulo a tuntunur rakrakai pa anumulo a tortorot, na arpotor ana mamahatla ning mulo kilangi taum ana kankan ning a tarai la akadik mulo onoi.

<sup>5</sup> A ututnala rop ne i apuasa i mang a warkurai ane God i tostos. Mulo kilang kankan anasa mulo agomo anuna matanitu. Manglarning e God i atong mulo mang mulo tostos sur anuna matanitu. <sup>6</sup> E God i tostos, pa ir akadik la ning la akadik mulo, <sup>7</sup> pa ir saran a manmanah tetek mulo ning mulo kilang kankan, pa tetek mitol otleng. E God ir toli larning, ning a Leklek e Iesu ir hanot misaot ana langit taum ana irnga na iah pa anuna na rakrakai a angelola. <sup>8</sup> Ir saran a warkurai na arkeles tetek la ning bel la tasman e God, pa bel la longor ana Wakak a Warwara ana nundala Leklek e Iesu. <sup>9</sup> Lar kilang a warkurai na arkeles ning bel ir rarop, i a hinirua tikin, pa lar kes masik kusun a Leklek taum ana matatar ana rakrakaina. <sup>10</sup> A warkurai ne ir hanot ana pukakiar ning a Leklek ir hanot sur anuna totoh na tarai lar aitna pasi pa la rop ning la tortorot onoi lar hanrawai i. Mulo otleng taum onla, anasa mulo tortorot ana warwarala ning mitol ka atai tar mulo onoi.

<sup>11</sup> Ine a kamkamna ning mitol sira nunung o mulo. Mitol nunung tetek anundala God sur ir atong mulo mang mulo tostos sur mulor mur a ngas a lalaun ning i kabah pas mulo suri. Pa ana rakrakaina ir nangan mulo, sur mulor tolsot pas a wakak a titol ning mulo mang sur mulor toli, pa a toltolla rop ning anumulo a tortorot i tol otnani. <sup>12</sup> Mitol nunung larning sur dir aitna pas a risana nundala Leklek e Iesu anasa mulo muri, pa e God otleng ir aitna pas mulo. A ututnala rop ne, ir hanot anasa

ana marmaris ana nundala God pa a Leklek e Iesu Karisito.

## 2

*A tinan ot ana barsan na kutus warkurai*

<sup>1</sup> Na tastasimitol, mitol mang sur milar atai mulo ana tinan ot ulak ana nundala Leklek e Iesu Karisito, pa ana nundala tinan taum teteki. Mitol nunung mulo, <sup>2</sup> sur gong a nuknukimulo i talar kapit pa i loklokron ning mulo longori mang a pukakiar ana Leklek ka hanot. Ning tik i atongi mang ta ingun tik i atai i onoi, pa ning tik i atai mulo onoi, pa ning mulo wasi otleng ana ta pas ning di atongi mang mitol tumusi tetek mulo, gong mulo tortorot onoi. <sup>3</sup> Gong mulo noren pas tik sur ir asongo mulo ana ta ngas a ngas. Anasa a pukakiar ning belot ir hanot, tuk ning al galis a tarai lar tabun longor tetek e God, pa a barsan na kutus warkurai ir hanot talapor, esaning ir hirua. <sup>4</sup> Ir harum na warwara ana ututnala rop ning a tarai la atong la mang a godla pa la lotlotu tetek la, pa ir aitna pas i ot, pa ir kes ana rumai a artabar ane God, pa ir atatai onoi mang i ot e God.

<sup>5</sup> Ning a kes taum o mulo, a sira atai mulo ana ututnala ne. Mangasa, bel mulo nuk pasi? <sup>6</sup> Mulo ka tasman asaning i sairas tar a barsan na kutus warkurai, sur ir hanot talapor ning a taem i sot. <sup>7</sup> A rakrakai ana toltol na kutus warkurai kane ka titol kumna te na rakrakan hanua. Ika, esaning i sairas tari, i sairasi ot kaba, tuk ana pukakiar ning dir los maskan seni. <sup>8</sup> Lamur a barsan na kutus warkurai ir hanot talapor, pa a Leklek e Iesu ir kamar seni ana wuwu na pahana, pa ir alaulau i ana matatar ana nuna tinan ot. <sup>9</sup> A barsan na kutus warkurai ir hanot taum ana rakrakai e Satan, pa ir asangan a galis a asasongo na utna na kulkulan, pa a galis

a asasongo na rakrakai a titol, pa a galis a asasongo na akinalang. <sup>10</sup> Ana ngas a toltol laulau rop ning ir toli, ir asongo a tarai ning la han amon sur a hinirua. Lar hirua anasa bel la longor sur lar mang sur a momolna sur e God ir alaun la. <sup>11</sup> Ine a kamkamna mang e God i aloklokron a nuknukinla sur lar tortorot ana asasongo. <sup>12</sup> Manglarning, la rop ning bel la tortorot ana momolna pa la gas ka ana toltol laulau, lar hirua ana warkurai ane God.

*Dalar tur rakrakai*

<sup>13</sup> Na tastasimitol, mulo ning a Leklek i maris mulo, i wakak ning mitol sira atong wakak tetek e God o mulo, anasa e God ka aslang pas mulo miting na kamkamna sur ir alaun mulo. I alaun pas mulo ning a Talngan Tabu i atotoh pas mulo pa mulo tortorot ana momolna. <sup>14</sup> Ana Wakak a Warwara ning mitol warawai onoi, e God i kabah pas mulo sur ir alaun mulo, sur mulor kibas a matatar anuna Leklek anundalai e Iesu Karisito. <sup>15</sup> Pa larning, na tastasimitol, mulor tur rakrakai, pa mulor nuk akes a asasaerla ning mitol ka asaer tar mulo onoi. A asasaerla ning mitol ka atai tar mulo onoi o mitol ka tumus tari otleng tetek mulo.

<sup>16</sup> Anundala Leklek e Iesu Karisito ot pa e God a Tamandala, i maris dala, pa ana nuna marmaris i tabar dala ana warwara na armoro ning bel ir rarop, pa i nangan dala sur dalar harnanai ana tortorot sur a wakakna ning ir toli. <sup>17</sup> Pa mitol nunungi mang ir amoro mulo pa ir arakrakai mulo ana numulo na wakak a titol pa anumulo na wakak a warwara otleng.

## 3

*E Pol ditol ditol nunung la sur lar nunung on ditol*

<sup>1</sup> Na tastasimitol, ning a warwara otleng ning mitol ir atai mulo

onoi, mang mulor nunung o mitol, sur a warwara anuna Leklek ir han sarara kapit pa a tarai lar hanrawai i larning mulo hanrawai i. <sup>2</sup> Pa mulor nunung o mitol sur e God ir alaun mitol kusun a laulau a tarai, anasa bel a taraila rop la tortorot.

<sup>3</sup> Ika a Leklek i momol, pa ir arakrakai mulo pa ir tai alar mulo otleng kusun e Satan. <sup>4</sup> Mitol tortorot ana Leklek mang kaning ot mulo tol a ututnala ning mitol ka atai tar mulo onoi, pa bel mulor manah na toli larning.

<sup>5</sup> Mitol nunung a Leklek sur ir nigon a nuknukimulo sur mulor tasman momol a marmaris ane God pa mulor tasman otleng a tuntunur rakrakai ana mamahatla ning e Karisito ka asangan tari tetek dala.

*A atumarang tetek a ngoro na tarai*

<sup>6</sup> Na tastasimitol, mitol nunung mulo ana risana Leklek e Iesu Karisito, sur mulor han masik kusun na tastasindala ning la ngoro pa bel la mur a asasaerla ning mitol atai mulo onoi. <sup>7</sup> Mulo ot mulo ka tasmani mang i wakak ning mulor mur a wakak a toltol ning mitol ka tol tari namatamulo. Anasa, ning mitol kes taum o mulo, palao mitol bel i ngoro. <sup>8</sup> Bel mitol ien oros pas ta utna na hangan tan tik ning bel mitol lou i. Mitol titol rakrakai ana moromla pa a kabakiarla ana kumitol, sur gong mitol saran a mamahat tetek ta halimulo sur ir nangan mitol. <sup>9</sup> I tostos ning mitol ar nunung mulo sur mulor nangan mitol. Ika bel mitol toli. Mitol titol rakrakai ot sur mitol ar tai alar mitol, sur mitol ir asangan a wakak a toltol ne tetek mulo sur mulor muri. <sup>10</sup> Ning mitol kes napirim mulo, mitol saran a warkurai ne tetek mulo: Ning tik bel ir titol, gong i hangan.

<sup>11</sup> Mitol longori mang dingla o mulo la ngoro. Bel la titol, la molot ka ana subaran la ana utna ning bel anunla. <sup>12</sup> Ana risana Leklek e Iesu Karisito mitol sairasa a ngas a taraila ning, pa mitol nunung la, sur lar mur a molmol a lalaun pa lar titol sur anla ta utna na hangan ning lar ieni. <sup>13</sup> Pa tetek mulo na tastasimitol, mulor rakrakai sur mulor tol a tostos a toltol, pa gong a palaomulo i ngol onoi.

<sup>14</sup> Ning tik bel i longor ana numitol a warwara ana pas ne, mulor nuk akesi. Gong mulo lasan taum onoi, sur ir oroi lalan anuna lalaun pa ir meme onoi. <sup>15</sup> Ika gong mulo oroi larning anumulo a hirua, mulor atumarang pasi ka arlar larning a tasimulo.

*A ararop a warwara na marmaris*

<sup>16</sup> Mitol nunung a Leklek ning a kamkama bal molmol, sur i ot ir tabar mulo ana bal molmol ana pukakiarla rop pa ana urmatana keskes ning mulo baratati. A Leklek ir kes taum o mulo rop.

<sup>17</sup> Anuk siklik warwara na marmaris ne, iau ot e Pol, a tumusi tetek mulo ana kuk. Ine a aकिनालang ana nuka bukla rop. A sira tumtumus ot larne.

<sup>18</sup> A marmaris ana nundala Leklek e Iesu Karisito ir kes taum o mulo rop.

## A Ningnigo na Pas ane Pol tetek e Timoti

*A warwara talapor nigo*

A pas ne a ningnigo na pas ane Pol, tetek e Timoti. E Timoti mito na papar Esia. E tana a hane Juda pa e tamana a te Grik. Ning e Pol i han ana nuna areur a tinan, i aslang pas e Timoti sur diar armuri pa diar titol taum (oroï Ap 16:1-3). Lamur e Pol i aslang pas e Timoti sur ir tena tai alar ana lotu to e Epeses.

Ana pas ne, e Pol i atai e Timoti mang ir tai alar a lotu kusun a asasongo na tena asaerla, sakana lar alaulau a tortorot anuna taraila. I atai i otleng ana wakak a asasaer, pa i atai i ona si na ngas a taraila dir aslang pas la sur lar tena titol ana lotu, pa ana wakak a toltol ning ir muri.

### **A tinan ana Ningnigo na Buk Timoti:**

A kamkama buk ne (1:1-2)

E Timoti ir sairas a asasongo na asasaerla (1:3-20)

A ngas ana lotu (2:1-15)

A ningnigola ana lotu (3:1-16)

E Timoti ir tai alari, sur ir hanot a wakak a tena titol (4:1-16)

A asasaer tetek e Timoti ana nuna titol (5:1-6:21)

<sup>1</sup> Iau e Pol, esaning e God pa e Karisito Iesu dia sune iau sur ar aposel ane Karisito Iesu. E God anundala Tena Alaun pa e Karisito Iesu, esaning dala harnanai suri ana tortorot. <sup>2</sup> A tumus a pas ne tetek u e Timoti, a natuklik momol ana tortorot. A marmaris pa a wakak a toltol taum ana bal molmol, ta e God a Tamandala pa e Karisito Iesu anundala Leklek, ir kes taum hom.

*E Timoti ir sairas a asasongo na asasaerla*

<sup>3</sup> Onone a arakrakai u kale sur ur kes ot ting e Epeses, larning a atong tari tam ning a han utumo e Makedonia. Ur kes sur ur sairas la ning la asaer a taraila anal asasongo na asasaerla. <sup>4</sup> Pa gong la molot ana asasaer oros ka, pa ana ususrai ana mangis a tarai, ning bel ta araropna. I tol otnan ka a arlak, pa bel i harnangai ana titol ane God. A titol ane God i gomo ka ana tortorot. <sup>5</sup> A atongi manglarning, sur a marmaris ir itna artalai na arpotor in dala. A marmaris ning i han miting na totoh na balandala, pa a nuknukindala ning bel ta rongo namata e God, pa tortorot momol. <sup>6</sup> Dingla na tarai la ka han masuk kusun a wakak a toltol ne, pa la mur a warwara oros kama. <sup>7</sup> La mang sur lar asaer a taraila ana Warkuraila ane God, ika bel la tasman asaning la warwara onoi, pa a kamkama warwara ning la nuki mang la tastasman onoi.

<sup>8</sup> Dala tasmani mang a Warkuraila la wakak, ning tik ir titol wakak onoi. <sup>9</sup> Dala tasmani mang a Warkuraila bel di sarani sur a tena tostos. Di sarani ka sur a ngas a taraila mange: la ning la kutus warkurai, a tabun longorla, la ning bel la lotu tetek e God, a tena tol laulaula, la ning bel la mur a nuknuk e God, la ning la mur a toltol mite na rakrakan hanua, la ning la umkol a taraila, pa la ning la umkol na tamtamanla pa na kabatnanla, <sup>10</sup> la ning la tol a pamuk a toltol, a taraila ning la taulai ulak ka a taraila, la ning la tong akes pas a taraila sur lar siuran la, a tena asasongola, la ning la lele asasongo, pa la rop ning la tol a ututnala ning bel i arlar ana tostos na asasaer ane God. <sup>11</sup> A tostos na asasaer i kes ana Wakak a Warwara, ning e God i saran tari tak sur ar atatai onoi. A Wakak a Warwara ne ane God, a God na matatar ning i angis tikin.

*A warwara gasgas ana mar-mar is ane God*

<sup>12</sup> A atong wakak tetek e Karisito Iesu anundala Leklek, esaning i tortorot hok pa i saran tar a rakrakai tak, pa i aslang pas iau sur ar titol teteki. <sup>13</sup> Nating a sira atong laulau e Iesu, a alaulau a taraila ning la tortorot pa a akadik la. Ika e God i maris iau, anasa bel a tasman a utna ning a toli, pa belot a tortorot. <sup>14</sup> Anundala Leklek i pek anuna tnan marmaris hok, pa i tabar iau ana tortorot pa a ginina ning ar mang sur a tarai. A artabar ne i kamkamna o e Karisito Iesu.

<sup>15</sup> Karisito Iesu i han purum ute na rakrakan hanua sur ir alaun a tena laulaula. A warwara ne i momol kol, pa dalar tortorot onoi. Pa iau, a laulau kol tana tena laulaula rop. <sup>16</sup> Ika e God i maris iau, sur e Karisito Iesu ir asangan anuna wowon a toltol tetek iau, ning i alaun pas iau pa i kepsen anuka toltol laulaula. Pa i tol a toltol ne hok, sur a taraila otleng lar oroi pa lar tortorot ono, pa lar kibas a lalaun tikin. <sup>17</sup> Dalar saran a hanrawai pa dalar atong aleklek pas a King ning i laun tikin, esaning bel dala oroi, ning i ka i God. A aleklek ne bel ir rarop pa bel ir rarop. Amen.

<sup>18</sup> E Timoti a natuklik, a asasaerla ne a sarani tam, i arlar ana warwara na propet ning di ka atong tari hom ning la nunung hom. Ning ur mur a asasaerla ne, u ning a wakak a tena harum ana Wakak a Warwara. <sup>19</sup> Ur tur rakrakai ana numa tortorot, pa ur mur a nuknukim ning bel ta rongo na mata e God. Dingla na tarai bel la toli lerne, pa anunla tortorot i hirua arlar ana sip ning a top i dapis regen seni pa i murung. <sup>20</sup> E Himeneus pa e Aleksander naur a halinla, ning ia ka saran tar diau na kuna e Satan, sur diar

tastasman mang gong ulak ma dia atong laulau e God.

## 2

*A asasaer ana ngas tagun a lotu*

<sup>1</sup> A ningnigo na utna, a mang sur a tarai a lotu lar nunung, lar nunung sur a utna ning la kapan suri, lar nunung sur a taraila masik, pa lar nunung sur a atong wakak tetek e God. Mulor nunung larning sur a taraila rop, <sup>2</sup> pa a kingla pa a ningnigola rop, sur dalar kes longoroi ana bal molmol, ana totoh na lalaun pa a toltol ning e God i mang suri. <sup>3</sup> Ning mulor toli lerne, ir wakak kol pa e God anundala Tena Alaun ir gas ono. <sup>4</sup> I mang sur ir alaun a taraila rop, pa lar tasman a momolna. <sup>5</sup> Anasa takai sot ka a God, pa takai ka otleng ning i dat taum e God pa a taraila, a barsan ne Karisito Iesu, <sup>6</sup> ning i saran tar anuna lalaun sur ir lou alangolango a taraila rop. Ana taem ning e God ka kubus tari, e Iesu i amomol tar a nuknuk e God mang, i mang sur ir alaun a taraila rop. <sup>7</sup> Ine kamkamna ning e God i aslang pas iau sur ar aposel pa ar warawai ana Wakak a Warwara tetek a taraila ning bel na tarai Juda, pa ar asaer la ana tortorot momol. A atong momoli, bel a asongo.

<sup>8</sup> A mang sur a barsanla ting na hananuala rop, lar totoh pa lar tuslan a kunla usaot pa lar nunung, pa gong la balakut pa gong la arlak.

<sup>9</sup> A mang otleng sur a gurar-ala lar mermer ana kaen ning i sot ana minmar anuna gurarala. Lar mermer ana minmar i apuasa a hanrawai taum ana wakak a nuknuk. Gong la iris a hih na pukulunla, gong la mermer taum ana wanarakai ning di toli ana gol o ning a matana i abit, pa gong otleng la mermer taum ana kaen



ning a matana i abit. <sup>10</sup> A gurarala ning la atongi mang la lotu tetek e God, lar mermer taum ana wakak a titol.

<sup>11</sup> Ning a gurarala lar kibas a asasaer ting na Buk Tabu, i wakak ning lar kes wowon pa lar anatarna la. <sup>12</sup> Bel a noren tar ta hane sur ir asaer ta barsan o ir nigon ta barsan. I wakak sur ir kes wowon ka. <sup>13</sup> Anasa e God i akes nigon ot e Adam pa lamur e Iwa. <sup>14</sup> Pa bel e Adam ning e Satan i asongo i. E Iwa ning e Satan i asongo i, pa i punga ana toltol laulau. <sup>15</sup> Dir alaun a gurarala kamkamna ana agon. Dir alaun la ning la tur rakrakai ana tortorot, a marmaris, a totoh a toltol pa ana wakak a nuknuk.

### 3

#### *A ningnigola ana lotu*

<sup>1</sup> A warwara ne i momol kol, mange: Ning tik i mang sur ir ningnigo ana lotu, a wakak a titol ning i mang suri. <sup>2</sup> Pa ning tik i mang sur ir ningnigo ana lotu i wakak sur a ginina ir manglarne: gong ta ararup i kes onoi, ir taulai ka takai a hane, ir tai alar anuna lalaun, ir tai alar anuna nemnemla, i a ngas a barsan ning a taraila la hanrawai i, ir sira gas pas a taraila uting na nuna rumai, pa i a wakak a tena asaer. <sup>3</sup> Pa gong i a tena gang, gong i a tena harum, ir tena bal molmol, gong i tena arlak, pa gong i mang kol sur a mani. <sup>4</sup> I a wakak a ningnigo ana keskes anun latamana, pa ir asaer na natnatnala sur lar hanrawai i pa lar longor teteki. <sup>5</sup> Esining bel i lasan sur ir nigo wakak a keskes anun latamana, bel ir tolsot pasi sur ir tai alar a tarai a lotu ane God. <sup>6</sup> A barsan ning ono kane i lingir tar a nuknukna, gong i ningnigo ana lotu, sakana ir rakan alekleki pa ir punga ana warkurai arlar o e Satan. <sup>7</sup> A ningnigo ana lotu a ngas

a barsan ning a tarai masik otleng ning bel la lotlotu, la hanrawai onoi. Ning bel, lar atong kumnani, pa ir hirua ana kun ane Satan.

#### *A tena harnangai ana lotu*

<sup>8</sup> Mang otleng larning tetek a tena harnangai ana lotu, i wakak sur la a ngas a barsan ning a tarai la hanrawai la, lar momol ana nunla warwara, gong la na tena gang pa gong la mang sur a galis a mani. <sup>9</sup> Lar tong akes a tortorot momol taum ana nuknukinla ning bel ta rongong na mata e God. <sup>10</sup> Dir lar nigon tar la, pa ning a gininla i wakak, lar kibas bot a titol na tena harnangai ting na lotu.

<sup>11</sup> Tetek anunla na gurarala otleng ir manglarning, la a ngas a gurarala ning a tarai la hanrawai la, gong la warwara kumkumna, lar tai alar wakak anunla lalaun, pa lar momol ana titolla rop.

<sup>12</sup> A tena harnangai ting na lotu ir taulai ka takai hane, pa ir nigon wakak na natnatnala, pa la rop ting na nuna rumai.

<sup>13</sup> La ning la titol wakak ana titol na tena harnangai ting na lotu, lar kibas a hanrawai anuna tarai tetek la. Pa lar warwara talapor ana nunla tortorot o e Karisito Iesu pa bel lar matmataut.

#### *Anundala tortorot*

<sup>14</sup> A mang sur ar hanot kapit tetek u, ika ar tumtumus nigo tetek u. <sup>15</sup> Pa ning bel ar hanot kapit, u ka tasman a toltol ning a tarai ane God lar toli na arpotor tanla. A tarai a lotu ane God ning i laun, la arlar ana pos pa a kama rumai ning la arakrakai a momolna. <sup>16</sup> Dala tasman momoli mang, a asasaer ning dala tortorot onoi i itna kol. I mange:

E Karisito i hanot a barsan,  
a Talngan Tabu i apuasa i mang e  
Karisito i tostos na mata e  
God,  
a angelola la oroi,

di atatai onoi pa a warwara ne  
i han sarara tetek a taraila  
miting na matanitu rop,  
pa a galis te na rakrakan hanua la  
tortorot onoi,  
i han kas pa i kes ana matatar.

#### 4

##### *A asasongo na tena asaerla*

<sup>1</sup> A Talngan Tabu i apuasa  
i mang al tarai lar han masuk  
kusun a momol a tortorot ana  
ararop a pukakiarla, pa lar mur  
a mot asasongola, pa lar mur  
a asasaerla anuna motla. <sup>2</sup> A  
asasaerla ne i hanot miting tana  
tena asasongola, a tarai ning bel la  
oroil lalan a tostosna pa laulauna,  
anasa a tostos a nuknukinla ka  
mat. <sup>3</sup> A ngas a tarai ne, la sairas  
a tinaulai pa la sairas a tarai  
sur gong la ien al ngas a utna  
na hangan. A utna na hangan  
ning, e God i akes tari, sur a  
tarai a tortorot ning la tasman a  
momolna, lar atong wakak tetek  
e God onoi pa lar ieni. <sup>4</sup> Anasa a  
ututnala rop ning e God i akes tar  
la, la wakak, pa gong dala bilbilor  
la. Dalar atong wakak tetek e God  
onoi ning dalar ieni. <sup>5</sup> Anasa a  
warwara ane God pa a nunung  
dia awakak a utna na hangan sur  
ir wakak na mata e God.

##### *A wakak a tena titol ane Karisito*

<sup>6</sup> Ning ur asaer na tastasimla  
ana asasaer ne, u a wakak a tena  
titol ane Karisito Iesu, ning u ka  
alasan wakak pas u ana tortorot  
momol pa a wakak a asasaer ning  
u muri. <sup>7</sup> Ur han masuk kusun a  
asasaer orosla ning bel i topas al  
utna. Ur alasan u sur ur gomo  
ana ngas a lalaun ning e God i  
mang suri. <sup>8</sup> Ning dala alasan a  
palaondala ana ngas a urmatana  
mon, i nangan a palaondala, ika  
ning dala alasan dala sur dalar  
gomo ana toltol ning e God i mang  
suri, i wakak kol tana ututnala

rop. I nangan a lalaun ne pa a  
lalaun lamur otleng. <sup>9</sup> A warwara  
ne a atongi, i momol kol, i wakak  
ning dalar muri pa dalar tortorot  
onoi. <sup>10</sup> Ine a kamkamna ning mila  
rakrakai pa mila titol rakrakai,  
anasa mila harnanai ana tortorot  
o e God, esaning i laun pa i sira  
alaun anuna taraila rop, ning la  
tortorot onoi.

<sup>11</sup> Ur asaer la pa ur arakrakai  
la ana ututnala ne. <sup>12</sup> Gong u  
noren tik ning ir oroi purpurum u  
anasa u barman. Ur tol a wakak  
a toltol tetek a tena tortorotla ana  
num a warwara, anuma toltol,  
anuma marmaris, anuma tortorot  
pa anuma totoh a lalaun, sur lar  
muri. <sup>13</sup> Ur rakrakai ana wawas  
ting na Buk Tabu tetek a tarai  
a lotu, ur rakrakai ana warawai  
taum ana asasaerla tetek la, tuk  
ning ar hanot. <sup>14</sup> Gong u noren a  
artabar ana Talngan Tabu, ning di  
sarani tetek u, ning a ningnigola  
la suah tar a kunla saot hom pa la  
warwara na propet.

<sup>15</sup> Ur titol rakrakai ana ututnala  
ne. Ur saran anuma lalaun sur a  
ututnala ne, sur a taraila rop lar  
oroil u mang u gomo ana lalaun  
ning e God i mang suri. <sup>16</sup> Ur  
tai alar anuma lalaun pa anuma  
asasaer, ur tur rakrakai on diau.  
Anasa, ning ur toli larning, ur  
alaun pas u ot, pa la otleng ning la  
longor u.

#### 5

##### *A harnangai tetek a laola*

<sup>1</sup> Ning ur atostos ta barsan ning  
di agon nigoni tam, gong u war-  
wara na balakut, ur warwara  
molmol ka larning u toli tetek e  
tamam. Ur toli tetek a barmanla,  
larning u toli tetek na tastasim.  
<sup>2</sup> Pa tetek a gurarala ning di agon  
nigon la tam, ur toli tetek la larn-  
ing u toli tetek etnam. Pa tetek a  
basbasla, ur toli tetek la larning u  
toli tetek na tastasim hanela, ana  
totoh a toltol.

<sup>3</sup> Ur nangan a laola ning bel tik i tai alar la. <sup>4</sup> Ika, ning ta lao na natnatna o na tumtubuna kaning, i wakak ning lar atalapor nigon anunla tortorot ana harnangai tetek anunla tarai, sur lar keles a marmaris ane tamanla pa kaba tnanla pa a tumtubunla. Ning lar toli larné, e God ir gas. <sup>5</sup> A lao ning i sot ka i kes pa bel tik i tai alari, i tortorot ka o e God ir nangani. I rakrakai ana lotu pa a nunung, ana moromla pa a kabakiarla, sur e God ir nangani. <sup>6</sup> Ika, a lao ning i mang sur ir gas oros ka, ning kaning ot i laun, a inguna ka mat. <sup>7</sup> Ur asaer a tarai ana asasaerla ne, sur gong ta artitui i kibas la. <sup>8</sup> Ning tik bel i nangan a mainala, pa la otleng ning ana nuna rumai, ka han masuk kusun a tortorot. I ning i laulau kol tana tarai ning bel la tortorot.

<sup>9</sup> Gong u tumus akes a risana laola ning belot i diono na bonot a rau anunla sur a tarai a lotu lar nangan la. Lar nangan ka a ngas a hane ning i taulai ka takai a barsan, <sup>10</sup> pa a taraila rop la tasman anuna wakak a titolla, larning i lawat wakak a kakakla, pa i sira gas pas a tarai ting na nuna rumai, pa i gos sen a kubus kusun a hana tarai ane God, \* pa i nangan a tarai ning a mamahatla i kibas la, pa i saran tar anuna lalaun sur ir tol a urmatana wakak a titol.

<sup>11</sup> Pa a laola ning la rakrakai ot, gong u tumus akes a risanla. Anasa, ning a nuknuk a taulai ir hanot onla, lar han masuk kusun e Karisito. <sup>12</sup> Pa a warkurai ane God ir kibas la, anasa la kutus anunla ningnigo na lele tetek e Karisito. <sup>13</sup> Belsur i ka ne, la sira palaona ngorongoro pa lar sira arop pukakiar ana han taltal ting na tamanla, pa a utna ning la laulau kol onoi ning la a tena war-

wara kumkumna, la sira asubaran oros la ana utna ning bel anunla, pa la sira atong a warwarala ning bel i wakak sur lar atongi. <sup>14</sup> Pa a mang sur a laola ning la rakrakai ot, lar taulai ulak, lar agon ulak, pa lar tai alar anunla rumaila, sur gong la tol ta utna ning anundala hiruala lar atong laulau dala onoi. <sup>15</sup> Dingla na lao la ka han masuk pa la ka mur e Satan. <sup>16</sup> Ning ta hane a tena tortorot, pa ta halinla a lao, i wakak sur ir nangani, sur gong a tarai a lotu la molot onoi. A tarai a lotu lar molot tostos ka onla ning bel tik i nangan la.

*A atumarang tetek a ningnigola ana lotu*

<sup>17</sup> I wakak ning a ningnigola ana lotu ning la titol wakak ana titol, dir saran a hanrawai pa a wakak a arlou tetek la. Dir toli larning tetek la ning la titol rakrakai ana warawai pa asasaer. <sup>18</sup> Anasa a Buk Tabu i atongi mange, “Gong u dot akes a pahana karabau ning i pas pagal a wit, i otleng ir hangan ot.” *Lo 25:4*  
Pa i atongi otleng mange, “I tostos sur a tena titol ir kibas ot anuna arlou.” *Lk 10:7*

<sup>19</sup> Gong u longor tar ta artitui ana ta ningnigo ning takai ka i atongi. Ning naur o natol ditol ar tiui, ur longor a artitui ning. <sup>20</sup> Ning ta ningnigo ir tol a toltol laulau, ur atostosi namatana tarai a lotula rop, sur a atumarang tetek al tarai otleng onla. <sup>21</sup> A warwara rakrakai tetek u namatana e God pa e Karisito Iesu pa angelola ning e God ka aslang pas la, sur ur mur a asasaerla ne, pa gong u rakrakai ka sur ning a ris pa ning a ris bel, pa gong u mang ka sur ning a ris pa ning a ris bel. <sup>22</sup> Gong u suah kapit naur kum saot on tik pa u angisi sur a titol anuna Leklek. Pa gong u

\* **5:10:** A toltol anuna tarai Juda, ning al wasira la kas, pa a hanla i kubus, a tena titol ir gosi taum ana malum.

mur a taraila ana toltol laulau. Ur tai alar anuma lalaun sur ir totoh.

<sup>23</sup> Gong u gang ka a malum, ur gang otleng al siklik wain sur ir nangan a balam, pa ir kepsen a tinsaman ning u sami.

<sup>24</sup> A toltol laulau anuna dingla na tarai dir oroi lalan nigoni ana pukakiar ning di warkurai la onoi. Ika toltol laulau anuna dingla na tarai otleng bel tik ir oroi lalan kapiti, lamur ot dir oroi lalani.

<sup>25</sup> Mang otleng larning, ana wakak a titol. A wakak a titolla anuna dingla na tarai ka hanot talapor. Ika a titolla ana dingla na tarai otleng bel dir oroi lalani onone, lamur ot dir oroi lalani.

## 6

*A asasaer tetek a tena titol orosla*

<sup>1</sup> A tena titol orosla lar hanrawai anunla ningnigola, sur gong tik i atong laulau a risana e God pa anundala asasaer. <sup>2</sup> Pa la ning anunla ningnigo a tena tortorot, gong la tabun longor teteki, anasa lar nuki mang la tas ka ana tortorot. Lar longlongor wakak teteki, anasa la titol ot tetek a tena tortorot, ning la mangi. Ur asaer la pa ur arakrakai la ana asasaerla ne.

*A nuknuk sur a mani pa a keskes na leklek*

<sup>3</sup> Ning tik ir asaer a tarai ana ta asasaer masik ning bel i arlar ana asasaer momol ana nundala Leklek e Iesu Karisito, pa bel i arlar ana asasaerla ning e God i mang suri, <sup>4</sup> a ngas a barsan ning, i aitna pas i ot, pa bel i tasman ta utna. Anuna laulau a nuknuk sur a arlak pa a harum na warwara i arlar ana tinsaman teteki. Naur a toltol ne i tol otnan a toltol ne: a toltol ning tik i ram sur a utna anuna tik, a harum na warwara, a arle, a nuknuk laulau ana taraila. <sup>5</sup> A nuknukinla i loklokron pa la

balakut artalai tetek la, pa a momolna i rop oros kusun la. La nuki mang ning lar mur a toltol ning e God i mang suri, ir tol otnan a mani sur lar losi.

<sup>6</sup> Ika ning tik ir mur a toltol ning e God i mang suri taum ana bal molmol, a toltol ning, a momol a gongon. <sup>7</sup> Ning di agon pas dala, bel dala los otnan ta utna ute na rakrakan hanua, pa ning dalar ulak, bel dalar los otleng ta utna mite. <sup>8</sup> Ning a utna na hangan andalai pa nundala a kaenla otleng ir kes, asaning dalar nuknuk ulak suri? Dalar bal molmol ka. <sup>9</sup> La ning la mang sur a tnan mani, lar punga ana arlam, pa lar hirua ana kun ana longlong a nuknuk pa a nuknuk sur a utna ning ir alaulau la. Ir alaulau la pa ir kamar la. <sup>10</sup> Anasa a nuknuk sur a mani, i a kama urmatana toltol laulau. Pa dingla na tarai ning la nuknuk kol suri, la ka han masik kusun a tortorot, pa la alaulau anunla lalaun ana galis a mamahat.

*E Pol i arakrakai e Timoti ana titol na lotu*

<sup>11</sup> Ika, u Timoti, a barsan ane God, ur han masik kusun a utnala ne. Ur rakrakai sur ur mur a toltos a toltol, a toltol ning e God i mang suri, a tortorot momol, a marmaris, a tuntunur rakrakai pa a molmol a toltol. <sup>12</sup> Ur tur rakrakai ana tortorot arlar ana wakak a tena harum. Pa ur tong akes a lalaun tikin sur anumi, i ning e God i kabah pas u suri, ning u warwara talapor ana tortorot anumi namatana galis a tarai. <sup>13</sup> A warwara tetek u namatana e God, ning i tabar a utnala rop ana lalaun, pa namatana e Karisito Iesu ning i warwara talapor ono i ot lanigo ta e Pontius Pailat. A atongi tam mange: <sup>14</sup> Ur mur a arsunela ne, sur gong ta rongo pa ta artitui ir kibas u. Ur toli tuk ana pukakiar ning anundala Leklek e Iesu Karisito ir ulak. <sup>15</sup> Ning a

taem ir sot, e God ot ir sune seni sur ir ulak. E God takai sot ka a tnan Tena warkurai pa i ngis tikin, a King anuna kingla, pa a Leklek anuna leklekla. <sup>16</sup> Anunai ka a lalaun tikin, pa i kes ana tnan talapor ning bel tik ir han milau. Belot tik i oroi tari pa bel tik ir oroi lar pasi. Dir saran tar a tnan hanrawai teteki, pa i tong akes a tnan rakrakai ning ir kes tikin. Amen.

<sup>17</sup> Ur atumarang la ning la tong akes a galis a ututnala te na rakrakan hanua sur gong la alek-lek pas la ot. Pa gong la tortorot ana mani ning ir rarop ka. Lar tortorot ka o e God, ning i tabar dala ana wakak a ututnala rop sur dalar gas onoi. <sup>18</sup> Ur atai la sur lar tol a wakakna, pa lar bukus ana wakak a titol. Lar arartabar pa lar asalar al utna otleng tetek al tarai. <sup>19</sup> Ning lar toli larne, lar tong akes a gongon momol. I ning, a wakak a kamkama nunla lalaun lamur, sur lar kibas pas a lalaun ning a lalaun momol.

<sup>20</sup> Timoti, ur tai alar wakak a titol ning e God i saran tari tam. Ur han masik kusun la ning la atong a warwarala oros ka ning bel i arlar ana nuknuk ane God. Pa ur han masik otleng kusun la ning la arlak ana utna la atongi mang “a tastasman”, ika bel a tastasman momol. <sup>21</sup> Dingla na tarai la atongi mang la tortorot ot ana tastasman ning, pa la ka han masik kusun a tortorot o e Iesu.

A marmaris ane God ir kes tetek mulo.

## A munaur a Pas ane Pol tetek e Timoti

*A warwara talapor nigo*

Ning e Pol i kes ting na rumai dodot to e Rom i tumus a pas ne. E Timoti i a tena titol taum o e Pol, pa lamur i hanot a tena tai alar ana lotu to e Epeses.

E Pol i tasmani mang milau ma ir mat, pa i tumus a pas ne. I mang sur ir arakrakai a tortorot ane Timoti. I atai i otleng mang gong i manah ana warawai ana Wakak a Warwara.

### **A tinan ana Munaur a Buk Timoti:**

A kamkama buk ne (1:1-2)

E Pol i gas o e Timoti pa i mang sur ir rakrakai ana titol (1:3-2:13)

A toltol anuna momol na tena titol (2:14-26)

A toltol anuna taraila ana ararop a pukakiar (3:1-9)

E Pol i arakrakai e Timoti (3:10-4:5)

E Pol i warwara ono i ot (4:6-18)

A ararop a warwara ane Pol tetek e Timoti (4:19-22)

<sup>1</sup> Iau e Pol, a aposel ane Karisito Iesu ana nuknuk ane God, sur ar atatai ana lalaun ning ka lele tari tetek dala ning dala ane Karisito Iesu. <sup>2</sup> A tumus a pas ne tetek u Timoti a wakak a natuklik ana tortorot. A marmaris pa a wakak a toltol pa a bal molmol, miting ta e God a Tamandala pa e Karisito Iesu anundala Leklek ir kes tetek u.

*E Pol i arakrakai a tortorot ane Timoti*

<sup>3</sup> A atong wakak tetek e God, esaning a titol teteki ana nuknuk ning bel ta rongo na mata e God, arlar ana tumtubuk tagun nating. A atong wakak teteki ana moromla pa a kabakiarla ning a nunung hom. <sup>4</sup> A nuk pas u kale

ning u domos iau, pa a mang kol mang ar oroi u sur ar bukus ana gas. <sup>5</sup> A nuk pas anuma momol a tortorot, ning i arlar ana tortorot ana naur a hane ne, e tubum Lois pa etnam Iunis. A tasmani mang a ngasa tortorot ne, ka kes otleng hom. <sup>6</sup> I ma ining a atai u kale sur ur alaun ulak a artabar ning e God i tabar u onoi ana pukakiar ning a suah naur a kuk saot hom. <sup>7</sup> Anasa e God bel i tabar dala an ingun na matmataut. I tabar dala ana Talngan Tabu ning i saran a rakrakai tetek dala, pa a marmaris, pa a toltol ning taktakai i warkurai tostos pas anuna lalaun.

<sup>8</sup> Pa gong u meme sur ur atatai ana Leklek anundala, pa gong u meme hok ning a kes te na rumai a dodot ana risana. Ika, ur sang sur u otleng ur kilang kankan ana Wakak a Warwara taum hok. Pa e God ot ir saran a rakrakai tetek u ning ur titol. <sup>9</sup> Ai ot ka alaun pas dala, pa ka kabah pas dala sur dala anuna totoh na taraila. Bel i kamkamna ana nundala wakak a titol. I kamkamna ot ana nuknukna, pa anuna marmaris, ning i saran tari tetek dala o e Karisito Iesu, nating ot ning belot i akes a rakrakan hanua. <sup>10</sup> Pa onone, dala ka oroi a marmaris ane God tetek dala ana tinan ot ana nundala Tena Alaun e Karisito Iesu, esaning i kamar sen a rakrakai a minat. Pa ana Wakak a Warwara i atalapor a lalaun tikin sur ir hanot talapor.

<sup>11</sup> E God ka aslang pas iau sur ar tena warawai ana Wakak a Warwara ne, ar aposel onoi pa ar tena asaer otleng onoi. <sup>12</sup> Ine kamkamna ning a kilang kankan larne. Ika, bel a meme, anasa a tasman esaning a tortorot onoi. I momol kol, a tasmani mang ir tolsot pasi sur ir tai alar a titol ning i saran tari tak, tuk ana pukakiar a warkurai.

<sup>13</sup> Ur mur a tostos a asasaer ning

u ka longor tari tak, pa ir wakak a tatatai tetek u sur ur muri. Pa ur tur rakrakai ana tortorot pa a marmaris anundala ning dala kes taum o e Karisito Iesu. <sup>14</sup> Ana rakrakai ana Talngan Tabu ning i kes ondala, ur tai alar wakak a Wakak a Warwara ning e God ka saran tari tam.

<sup>15</sup> U tasmani mang a tena tortorot rop ning la kes ana papar Esia la ka han pas kusun iau. E Pigelus pa e Hermogenes naur tagun la. <sup>16</sup> A nunung sur e God ir maris e Onesiporus latamana, anasa e Onesiporus i sira agasgas iau, pa bel i meme hok ning a kes ana dodot. <sup>17</sup> Ning i hanot to e Rom i tai amon sur iau, tuk i pastetek pas iau. <sup>18</sup> A nunung sur a Leklek ir maris e Onesiporus ana pukakiar a warkurai. U tasman wakak a titol ning ka tol tari tetek iau ting e Epeses.

## 2

*A wakak a tena harum ane Karisito*

<sup>1</sup> Timoti, a natuklik ana tortorot, ur tur rakrakai ana marmaris ane God tetek dala, ning dala kes o e Karisito Iesu. <sup>2</sup> A asasaerla ning u ka longor pasi kusun iau namatana galis a tarai, ur asaer al barsan onoi, la ning u tortorot onla mang lar tolsot pasi sur lar asaer al tarai otleng onoi. <sup>3</sup> Ur kilang a mamahat taum omila, arlar ana wakak a tena harum ane Karisito Iesu. <sup>4</sup> A wakak a tena harum bel i molot ana titol anuna tarai oros ka. Ir tol ot anuna titol sur ir agasgas anuna ningnigo. <sup>5</sup> Mang otleng larning a tena ardune ning i dun ana arsoksok, bel ir kibas ta arlou ning bel i mur a warkurai ana arsoksok. <sup>6</sup> A tena omomai ning i titol rakrakai, i ot ir sol nigon a utna na hangan ting na barim ning ir makos. <sup>7</sup> Ur nuk akes pas a ututnala ne a tumusi tetek

u, anasa a Leklek ot ir atalapor a kamkamna tetek u.

<sup>8</sup> Ur nuk pas e Iesu Karisito, esaning tagun a mangis a tarai ane Dewit pa i kamtur ulak kusun a minat. A Wakak a Warwara ning a warawai onoi ine. <sup>9</sup> A kilang kankan pa di dot iau otleng arlar ana tena laulau, anasa a warawai ana Wakak a Warwara. Ika a warwara ane God bel dir dot lar pasi. <sup>10</sup> Pa kane ma a kilang kankan, ika a tur rakrakai ot, sur la ning e God ka aslang pas la. A tur rakrakai sur la otleng lar kibas a arlaun ning i kes o e Karisito Iesu, taum ana matatar tikin. <sup>11</sup> A warwara ne ar atongi tam, i momol kol:

Ning dalar mat taum o e Iesu Karisito,

dalar laun taum otleng onoi.

<sup>12</sup> Ning dala kilang kankan taum onoi,

dalar warkurai arlar ana king taum otleng onoi ana nuna matanitu.

Ning dala puain seni,

i otleng ir puain sen dala.

<sup>13</sup> Ning bel dala tolsot pas anundala lele sur dalar mur e Iesu Karisito,

i ot ir tur rakrakai ana nuna lele,

anasa bel ir tolsot pasi sur ir kutus anuna lele, belal.

*A momol a tena titol ane God*

<sup>14</sup> Gong u manah ana atatai tetek anuma tarai ana asasaerla ne. Ur atumarang la namatana e God, sur gong la arlak ana warwara oros ka. A arlak bel i to pas ta utna pa i alaulau otleng la ning la longori.

<sup>15</sup> Ur saran tar u tetek e God pa ur rakrakai sur u a momol a tena titol namata e God, ning bel ta utna ning ir ame i ana nuna titol, anasa i sira asaer wakak a taraila ana momol a warwara ane God. <sup>16</sup> Ur han masik kusun a warwarala ning bel i sot ana nuknuk e God, anasa a tarai ning la molot ana asasaer larning la ka han bakbak kol kusun e God pa la

han amon ot. <sup>17</sup> Anunla asasaer ning ir han sarara arlar ana laulau a masak ning i marase amon. E Himeneus pa e Piletus naur tagun la, <sup>18</sup> ning dia ka han rongo kusun a momolna. Dia atongi mang dala ka kamtur ulak pas kusun a minat, pa dia alaulau a tortorot anuna dingla na te Karisito.

<sup>19</sup> Ika, e God ka suah tar a kama tortorot ning bel ir gulgule, pa di ka tumus tar a warwara onoi mange, “A Leklek i tasman la ning anunai.” *Namba 16:5* Pa di ka tumus tari otleng mange, “Esining i atongi mang ai anuna Leklek ir gilam kusun a toltol laulau.”

<sup>20</sup> Ona ning a tnan rumai, dingla na kap di tol la ana silwa pa ana gol, pa dingla otleng di tol la ana rakai pa ana piopap. Dingla na kap sur a tatatnan pukakiar ka, pa dingla otleng sur a dur a ututnala ka. <sup>21</sup> Ning tik i atotoh pas anuna lalaun kusun a toltol laulaula, ir arlar ana kap ning di gang kusuni ana tatatnan pukakiar. Anasa ka totoh sur a Leklek ir titol ting na lalaun anunai sur ir tol a titol anunai, pa ka sang sur ir tol a wakak a titol.

<sup>22</sup> Ur han masak kusun a nuknuk na barman, pa ur mur a tostos a toltol, a tortorot, a marmaris pa a bal molmol, taum onla ning la nunung tetek a Leklek ana totoh na nuknukinla. <sup>23</sup> Ur han masak kusun a kutkut a warwarala ning bel ta kamkamna, anasa la agomo ka a arlak. <sup>24</sup> A tena titol anuna Leklek gong i arlak, ir wakak a tena asaer. Ir tol a wakakna tetek a tarai rop, pa ir asangan anuna molmol a toltol tetek a tarai ning i atostos la. <sup>25</sup> La ning bel la mang sur anuna asasaer, ir atostos la ana molmol, sakana e God ir atalapor a matanla sur lar lingir a nuknukinla, pa lar tasman a momol a asasaer, <sup>26</sup> pa lar tastasman wakak, pa lar purum kusun a kun

ane Satan, ning la ka hirua tar onoi sur lar sira mur a nuknukna.

### 3

*A ginina tarai ana ararop a pukakiarla*

<sup>1</sup> Ika, ur nuk akes a warwarala ne: Ana ararop a pukakiarla, a rakrakai a mamahatla ir hanot. <sup>2</sup> A tarai lar nuk pas la ot, lar mang sur a mani, lar rakan aleklek la, lar aitna pas la ot, lar arle tetek e God pa tetek a taraila otleng, lar tabun longor tetek a tamtamanla taum ana kabatnanla, bel lar lasan sur lar atong wakak tetek e God pa tetek a tarai otleng, pa bel lar hanrawai e God. <sup>3</sup> Bel lar maris a tarai, bel lar nuk duman sen a toltol laulau ning tik ir toli tetek la, lar atong a laulau a warwara tana tarai, bel lar warwurai tostos anunla lalaun, lar harum pa lar alaulau a tarai, pa bel lar mang sur a wakakna. <sup>4</sup> Lar alaulau ulak na halalinla, lar tol a kutkut a toltolla, lar aitna pas la, lar mang kol sur a gasgas mite na rakrakan hanua, pa bel lar mang sur e God. <sup>5</sup> Lar mur a toltol ning e God i mang suri ana palaonla ka, ika bel lar noren a rakrakai ane God sur ir keles a lalaun anunlai. Ur han masak kusun a ngas a tarai larne.

<sup>6</sup> A ngas a tarai larne, la sira kas oros ka uting na rumai, pa lar hamoro pas a gurarala sur lar mur a nuknukinla. A gurarala ning bel ta wakak a nuknukinla, la ning la pot na marmaris ana nunla na toltol laulau, pa a laulau a nuknukinla i ben rongon la. <sup>7</sup> A gurarala ne la kibas a asasaerla ana pukakiarla rop, ika bel la tasman lar pas a momolna. <sup>8</sup> A ngas a barsan larne, la sairas a momol a asasaer, arlar o e Janes pa e Jambres dia sairas e Moses. A nuknukinla i laulau kol pa anunla tortorot bel i momol. <sup>9</sup> Ika anunla titol bel ir gomo, anasa a taraila



rop lar oroi lalan pas anunla longlong a toltol, arlar ana tarai ning nating la oroi lalan pas a kutkut a toltol anuna naur a barsan Janes pa e Jambres\*.

*E Pol i arakrakai e Timoti ana nuna tortorot pa anuna titol*

<sup>10</sup> Ika u Timoti, u ka tasman rop anuka asasaerla, anuka toltol, a kamkamna momol anuka toltol, anuka tortorot, anuka bal molmol, anuka marmaris, anuka tuntunur rakrakai ana kankan, <sup>11</sup> a toltol ning la toli hok, pa a kankan a kilangi. U tasman rop a tnan kankan ning a kilangi to e Antiok, Ikonion pa e Listra. Ika a Leklek ot i alaun pas iau kusun a mama-hatla rop ne. <sup>12</sup> Momol, a tarai lar akadik la rop ning la laun taum o e Karisito Iesu pa la mang sur lar mur a lalaun arlar ana nuknuk e God. <sup>13</sup> Pa a laulau a tarai pa tena asasongo lar laulau, pa lar laulau kol. Lar asongo a taraila, pa lar asongo ulak la otleng.

<sup>14</sup> Ika u, Timoti, ur tur rakrakai ana asasaer ning di ka asaer tar u onoi pa u ka tortorot rakrakai onoi, anasa u tasman wakak anum na tena asaerla, <sup>15</sup> pa u tasman a Buk Tabu turpasi ning u kaklik ot. A Buk Tabu i tolsot pasi sur ir atastasman u, sur ur tortorot o e Karisito Iesu, pa e God ir alaun pas u. <sup>16</sup> A puka warwarala rop ting na Buk Tabu i kamkamna ot o e God, pa i wakak sur a asasaer, pa ir atalapor a laulauna anuna tik tetek i ot, pa ir atostos a rongo, pa ir asaer a tarai ana tostos a toltol, <sup>17</sup> sur a tarai ane God lar tolsot a wakak a titolla rop.

#### 4

<sup>1</sup> E Karisito Iesu ir hanot ute taum ana nuna matanitu. Ir warkurai la ning la laun, pa la

ning la ka mat. Pa manglarning, a nunung u namatana e God pa e Karisito Iesu mang: <sup>2</sup> Ur warawai ana Wakak a Warwara, ur rakrakai onoi ana pukakiar ning a taraila la mang sur lar longor u, pa a pukakiar ning bel la mang suri. Ur atostos a taraila, ur atalapor anunla rongo tetek la pa ur arakrakai la. Ning ur toli larne, ur titol taum ana molmol a toltol pa ur asaer wakak la. <sup>3</sup> Anasa a taem ir hanot, ning a taraila bel lar mang sur a tostos a asasaer. Lar mur a nuknukinla, lar ben taum a galis a tena asaer tetek la, sur lar asaer la ana ututnala ning la mang sur lar longori. <sup>4</sup> Bel lar longor a momolna, lar longor kama a asasaer oros ka. <sup>5</sup> Ika u, ur nuknuk wakak ana pukakiar rop. Ning ur kilang a kankan, ur tur rakrakai ot. Ur rakrakai ona warawai ana Wakak a Warwara, pa ur tolsot pas anum na titol rop, ning e God ka saran tari tam.

<sup>6</sup> Anasa milau ar mat pa a sulukik ir tapek. Ir arlar ana wain ning di peki ana utna ning di tuni sur a artabar tetek e God. Pa ka milau a pukakiar ning ar han kusun a lalaun ne. <sup>7</sup> Ia ka tolsot pas anuka wakak a harum pa anuka ardune ana arsoksok, pa a ka mur sot pas a momol a tortorot. <sup>8</sup> A nanan a harlou ning e God ka suah tari sur iau, anasa a tostos namatana. A Leklek, a tostos na Tena warkurai ir sarani tak ana pukakiar na warkurai. Pa bel tetek iau ka, ir saran a harlou ning tetek la rop ning la mang kol sur ir ulak.

*A arsune sur e Timoti, pa a lalaun ane Pol*

<sup>9</sup> Ur rakrakai sur ur han kapit tetek iau, <sup>10</sup> anasa e Demas ka han kusun iau, anasa i mang sur a ututnala mite na rakrakan hanua, pa ka han utumo e Tesalonika.

\* 3:9: A tarai Juda la nuki mang naur a barsan ne, naur a tena sinet ane Pero pa bel la bal taum o e Moses pa e Aron. Oroi Kisim Bek 7:11, 22.

E Kresko i han utumo ana papar Galesia pa e Taitus i han utumo ana papar Dalmatia. <sup>11</sup> E Luk kama kane miau. Ur ben pas e Mak pa mur han ute, anasa i tolsot pasi sur ir nangan iau ana nuka titol. <sup>12</sup> A sune sen e Tikikus uting e Epeses. <sup>13</sup> Ning ur han ute, ur los anuka kaen na polpol, kaning a han kusuni napire Karpo to e Troas. Ur los otleng anuka bukla, pa gong u duman dingla onla ning di toli ana palaona inagoila. <sup>14</sup> E Aleksanda, a tena tol utna ana aen, i tol a galis a toltol laulau tetek iau. A Leklek ot ir kelesi teteki. <sup>15</sup> Ur tai alar u kusuni, anasa i asairas rakrakai anundala na asasaer.

<sup>16</sup> A ningnigo na pukakiar ning a tur ana warkurai pa a atalapor iau, bel tik i tur nangan iau, la han rop ka kusun iau. A nunung mang e God gong i keles anunla toltol. <sup>17</sup> Ika a Leklek i nangan iau, pa i arakrakai iau sur ar tolsot pas a warawai ana Wakak a Warwara, pa a taraila rop ning bel na tarai Juda lar longori. Pa ning la mang sur lar umkol iau, a Leklek i alaun pas iau. <sup>18</sup> A Leklek ir alaun iau kusun a laulau a ututnala rop, pa ir akes iau ana nuna matanitu saot na langit. Dalar atong leklek pasi, bel ir rarop pa bel ir rarop. Amen.

*A ararop na warwara na marmaris*

<sup>19</sup> Ur saran anuka marmaris tetek e Prisila pa e Akuila, pa la rop ning kaning la kes taum tingia na rumai ane Onesiporo. <sup>20</sup> E Erastus i kes suai to e Korin, pa a han pas kale kusun e Tropimus to e Mileto, anasa i sasam. <sup>21</sup> Ur rakrakai sur ur han ute ning belot a kalang a kotkoto.

E Ubulo, Pudén, Linus, Kaludia pa na tastasindala rop ana tor-torot, la saran anunla marmaris tetek u.

<sup>22</sup> A Leklek ir kes taum ana ingum. A marmaris ane God ir kes tetek mulo.

## A Pas ane Pol tetek e Taitus

*A warwara talapor nigo*

A pas ne e Pol i tumusi tetek e Taitus. E Taitus belsur a te Juda. I longor a warawai ane Pol pa i lingir a nuknukna pa i tortorot o e Iesu Karisito. E Taitus i han taum o e Pol usaot e Jerusalem pa a aposella rop la kes taum (oroï Ap 15:2). E Pol i sune sen e Taitus utumo e Korin naur a dihna (oroï 2 Kor 7:6-7 pa e 8:17). Lamur e Pol i aslang pas e Taitus sur ir tena tai alar ana lotu tumo na lolo Krit (oroï e Taitus 1:5).

Ana pas ne e Pol i atai e Taitus ana si na ngas a tarai dir aslang pas la, sur la a tena titolla ana lotu. Pa i atai i mang ir tai alar a lotu kusun a asasongo na tena asaer, pa ir asaer wakak a tarai a lotu ana wakak a toltol.

### **A tinan ana Buk Taitus:**

A kamkama a buk ne (1:1-4)

A ningnigola miting na lotu (1:5-16)

A asaer tetek a tarai a lotu (2:1-15)

A wakak a toltol ning dalar muri (3:1-11)

A ararop a warwara ane Pol tetek e Taitus (3:12-15)

<sup>1</sup> Iau e Pol a tena titol oros ane God pa a aposel ane Iesu Karisito, sur ar nangan a tortorot ana tarai a aslang ane God, pa ar asaer la sur lar tasman a momolna. A momolna ning ir ben la sur lar mur a toltol ning e God i mang suri.

<sup>2</sup> A tortorot ning, pa a momolna ning, i hanot miting na keskes harnanai ana tortorot sur a lalaun tikin. A lalaun tikin ning e God i lele tar onoi, ning belot i akes a rakrakan hanua. Pa e God bel i sira asongo. <sup>3</sup> Ning a pukakiar i sot i apuasa anuna lele ning mila warawai onoi. E God anundala a Tena Alaun ning i saran tar a titol

na warawai tak arlar ot ana nuna arsune.

<sup>4</sup> A tumtumus tetek u e Taitus, u a natuklik, anasa takai ka a tortorot anundala. A marmaris pa a bal molmol ta e God a Tamandala pa e Karisito Iesu anundala a Tena Alaun, ir kes hom.

*A ningnigola miting na lotu*

<sup>5</sup> A han kusun u ting na lolo Krit, sur u ma ur arop a titolla ning belot i rop, pa ur aslang pas al ningnigo ana lotu ting na hananuala rop arlar ot ning ia ka atong tari tam. <sup>6</sup> Ur aslang pas tik ning bel di arup sot pasi on ta rongo, ning i taulai ka takai a hane pa na natnatna la na tena tortorot, pa bel ta artitui i kibas la ana ta toltol, pa bel la tabun longor tetek tik. <sup>7</sup> A ningnigo ana lotu, i ot a tena tai alar ana titol ane God, pa i wakak ning i a ngas a barsan larne: bel di arup sot pasi on ta rongo, gong i aitna pasi, gong i sira balakut kapit, gong i a tena gang, gong i a tena harum, pa gong i muk pa i nuknuk sur a tnan mani. <sup>8</sup> Ir sira gas pas a tarai ting na nuna rumai, pa ir mang sur a wakak a toltol, ir warkurai tostos anuna lalaun, ir tena tostos, ir totoh namatana e God, pa ir tai alar a nuknukna. <sup>9</sup> Ir tong akes a momol a asaer ning di ka asaer tari ono, sur ir arakrakai otleng a tarai ana tostos a asaer, pa ir atong puasa a rongo anunla ning la sairas a asaer ning.

*A warwara na harnangai tetek e Taitus ana nuna titol*

<sup>10</sup> Ur aslang pas a ningnigola miting na lotu, anasa a galis a tarai na tabun longor. La awara a tarai ana ututnala oros ka pa la asongo pas la. Dingla na tarai onla, la ning la atongi mang, dir kot talilis a palaon a tarai ning bel a tarai Juda.

<sup>11</sup> Ur sairas anunla na warwara, anasa la sira alaulau a tortorot anuna galis a kabai tamana ana asaer ning bel i wakak sur dir

asaer la ono. La sira asaer la, sur lar asongo pas ka a mani kusun la. <sup>12</sup> Ning a propet miting ot na tarai Krit i atongi larne, "A tarai Krit, na tena asasongo momol, la arlar ana laulau a rokoio, la na ngoro na tarai, la tagun a hangan ka." <sup>13</sup> A warwara ne i momol kol. Ur warwara rakrakai tetek la ana nunla na rongo sur lar tong akes a tostos a tortorot. <sup>14</sup> Pa gong ma la mur a asaer oros ka anun na tarai Juda, pa a warkurai anun na tarai ning la gilam kusun a momolna. <sup>15</sup> A ututnala rop la totoh tetek la ning la totoh, ika tetek la ning bel la totoh pa bel la tortorot, a ututnala rop bel la totoh. A nuknukinla i laulau kol pa bel ta tostos ting na nuknukinla. <sup>16</sup> La atongi mang la tasman e God, ika anunla a titolla ot i apuasa i mang bel la tasmani. La na laulau a tarai kol, a tabun longorla, pa bel lar tol lar pas ta wakak a titol.

## 2

### *A tostos a asaer*

<sup>1</sup> Ika u, ur asaer la ana ututnala ning i mur wakak a tostos a asaer. <sup>2</sup> Ur asaer a barsanla ning di agon nigon la tam, sur lar tai alar wakak anunla na toltol, lar kibas a ngas a lalaun ning a tarai lar hanrawai la ono, lar warkurai tostos anunla lalaun, lar momol ana nunla na tortorot, anunla a marmaris pa anunla na tuntunur rakrakai ning la pastetek a mamahat.

<sup>3</sup> Larne, ur asaer a gurarala ning di agon nigon la tam, sur lar lasan ana ngas a hanrawai ana nunla a lalaun, gong la anan laulau tik, gong la na tena gang, lar asaer a tarai ana utna ning i wakak. <sup>4</sup> Lar toli larne, sur lar asaer a gurarala ning di agon murmur la tanla, sur lar mang sur anunla na barsan pa na natnatunla, <sup>5</sup> lar warkurai tostos anunla a lalaun, lar mur a totoh a toltol, lar lasan ana toltol

wowou ting na nunla na taman, lar lasan ana marmaris, pa lar longor tetek anunla barsanla, sur gong tik i atong laulau a warwara ane God.

<sup>6</sup> Larne, ur arakrakai a barmanla, sur lar warkurai tostos anunla a lalaun. <sup>7</sup> Ana ututnala rop ning u sira toli, ur tol a wakak a titol na matanla, sur a wakak a tatatai tetek la sur lar muri. Ning ur asaer la, ur titol taum ana momolna, pa a hanrawai ana warwara ane God. <sup>8</sup> Ur atong a tostos a warwara ning bel tik ir lingir lar pas u ono, sur a hiruala lar meme, anasa bel ta laulau ning lar atong dala ono.

<sup>9</sup> Ur atai na tena titol oros sur lar longor anunla na ningnigo, pa lar agasgas la ana titolla rop ning la toli, pa gong la balu warwara. <sup>10</sup> Gong la kinau anunla na ningnigo. Lar apuasa anunla a wakak a toltol sur anunla na ningnigo lar tortorot onla, sur ir apuasa i mang a asaer o e God anundala a Tena Alaun i wakak.

<sup>11</sup> Anasa a marmaris ane God, ning ir alaun a tarai rop, ka hanot puasa. <sup>12</sup> A marmaris ne i asaer dala, sur dalar han masik kusun na toltol ning bel i sot ana nuknuk e God, pa kusun a nuknuk sur a ututnala mite na rakrakan hanua. Dalar warkurai tostos anundala a lalaun, dalar tostos, pa dalar laun murmur a nuknuk e God ana lalaun onone, <sup>13</sup> ning dala hananai ana tortorot sur a pukakiar na gas ning ir hanot. A pukakiar ning anundala a leklek e God, e Iesu Karisito, anundala a Tena Alaun ir hanot taum ana anuna matatar. <sup>14</sup> I saran tar anuna lalaun sur dala, sur ir lou alan-golango dala kusun anundala na toltol laulaula rop, pa ir atotoh pas dala, sur dala anuna tarai momol ot, dala a tarai ning dala mang kol sur dalar tol asaning i wakak.

<sup>15</sup> Ur asaer la ana ututnala ne. Ur arakrakai a tarai, pa ur

atong puasa anunla na rongo namatanla. Ur toli ana rakrakai ning e God ka saran tari tam. Pa gong u noren tar tik sur ir oroi purum u.

### 3

*A ngas a lalaun ning a te Karisito ir muri*

<sup>1</sup> Ur atai ulak anuma tarai sur lar hanrawai tetek a ningnigola miting na matanitu, pa tetek la rop ning la tong a warkurai. Lar longor tetek la pa lar sang sur lar tol asaning i wakak. <sup>2</sup> Gong la anan tik, lar kes ana bal molmol, lar tol a wakak a toltol tetek a tarai, pa lar anatarna la tetek a tarai rop.

<sup>3</sup> Anasa dala otleng lanigo, bel dala mananos, dala na tabun longor, dala han rongo, dala kes ana dodot ana nundala a laulau a nuknuk pa a urmatana ututnala rop ning dala gas suri. Ana nundala a keskes a lalaun, dala tol a laulau a utna, dala ram, a tarai la nget dala, pa dala otleng dala nget la.

<sup>4</sup> Ika ning a wakak a toltol pa a marmaris ane God anundala a Tena Alaun i hanot, <sup>5</sup> i alaun dala, anasa ana nuna marmaris tetek dala, belsur on al tostos a titol ning dala ka tol tari. I alaun dala ning i pukur totoh pas dala. A Talngan Tabu i toli te na nundala a lalaun, ning i agon tona dala pa anundala a lalaun i hanot toh ono. <sup>6</sup> E God i tabar dala ana Talngan Tabu, ning i pek rakrakai koli saot ondala, pa dala bukus onoi, anasa ana titol ane Iesu Karisito, anundala a Tena Alaun. <sup>7</sup> Anasa ana marmaris ane God, i atong dala mang dala tostos namatana, pa i tabar dala ana lalaun tikin, ning dala harnanai suri ana tortorot. <sup>8</sup> A warwarala ne i momol kol. Pa a mang sur ur rakrakai ana warwarala ne sur a tarai ning la tortorot o e God lar saran momol tar a lalaun anunla ana wakak a titol. A ututnala ne i wakak pa i nangan a tarai rop.

<sup>9</sup> Ur han masik kusun a longlong a warwara na arlak, pa a ususr ai ana mangis a tarai, a arlak pa a harum ana warkuraila ane Moses, anasa bel la topas ta utna pa bel lar nangan u. <sup>10</sup> Ning tik ir sira pangpagal a tarai a tortorot, ur atumarangi. Ning bel ir longor, ur atumarang ulaki. Ning bel ir longor, ur han masik kusuni. <sup>11</sup> Ning tik i toli lerne, ur tasmani mang ka rongo pa ka bukus ana toltol laulau. Anuna toltol laulau ot i beni sur a hirua tikin.

*A nunung ane Pol tetek e Taitus*

<sup>12</sup> Ning ar sune sen e Artemas tetek u, o ar sune e Tikikus, ur rakrakai sur ur han tetek iau tumo e Nikopolis, anasa ar kes nanan sen na kalang a kotkoto tumo. <sup>13</sup> Ur nangan e Senas, a tena mananos ona warkurai, pa e Apolos otleng, pa ur tabar diau sur gong dia kapan sur ta utna ting na nundiau a tinan. <sup>14</sup> Anundala a tarai lar asaer sur lar saran momol tar a lalaun anunla ana wakak a titol, sur anunla a lalaun ir suah a wakak a wana pa lar nangan a kapan a tarai.

<sup>15</sup> La rop ning la kes taum hok, la saran anunla na marmaris tetek u. Ur saran anumila a marmaris tetek a halalimila ana tortorot.

A marmaris ane God ir kes taum o mulo rop.

## A Pas ane Pol tetek E Pilimon

*A warwara talapor nigo*

E Pol i kes ting na rumai a dodot tumo e Rom anasa i warawai ana Wakak a Warwara. Ning i kes tingia, i tumus diat a pas. Takai tetek a tarai Epeses, takai tetek a tarai Pilipai, takai tetek a tarai Kolosi pa takai otleng tetek e Pilimon.

E Pol i tumus a pas ne tetek e Pilimon. E Pilimon a lekkek a barsan miting na hanua Kolosi, pa a tena tortorot otleng. Anuna ning a tena titol oros, a risana e Onesimus, i liu pas kusuni. Lamur di doti pa dia arpastetek ma e Pol ting na rumai a dodot. E Pol i warawai teteki pa i lingir a nuknukna. Ning di pak sen e Onesimus, e Pol i mang sur ir ulak tetek anuna ningnigo e Pilimon, pa i tumus a pas ne tetek e Pilimon sur e Onesimus ir losi teteki. I atai i mang gong i balakut tetek e Onesimus, ir gas pasi, anasa ka lingir tar a nuknukna pa i tortorot o e Iesu arlar o e Pilimon.

### A tinan ana buk Pilimon:

A kamkama a buk ne (1-3)

A wakak a toltol ane Pilimon (4-7)

E Pol i mang sur e Pilimon ir gas pas e Onesimus (8-22)

A ararop a warwara ane Pol tetek e Pilimon (23-25)

<sup>1</sup> Iau, e Pol, a kes ting na rumai a dodot anasa a tortorot o e Karisito Iesu. Miau ma e Timoti a tasindala, mia tumus a pas ne tetek u Pilimon, a wakak a halimila ana titol, <sup>2</sup> pa tetek e Apia a tasindala hane, pa tetek e Arkipus a halindala na harum ana Wakak a Warwara, pa tetek a tarai a lotu ning mulo sira han taum ting na num a rumai. <sup>3</sup> A marmaris pa bal molmol ta e God a Tamandala, pa

Lekkek e Iesu Karisito ir kes taum hom.

*A marmaris pa a tortorot ane Pilimon*

<sup>4</sup> Ning a nunung, a sira nuk pas u, pa a atong wakak tetek e God hom, <sup>5</sup> anasa a longori mang u mang sur a tarai rop ane God, pa u tortorot ana Lekkek e Iesu. <sup>6</sup> A nunung mang ur apuasa anuma tortorot o e Karisito tetek a tarai, sur ur mananos kol ana wakak a ututnala rop anundala ning kanning o e Karisito. <sup>7</sup> Tasiklik, ning a longori mang u mang sur a tarai ane God pa u agasgas anunla a lalaun, a gas kol, pa i arakrakai iau otleng.

*A nunung ane Pol sur e Pilimon ir malmaling pas e Onesimus*

<sup>8</sup> Ning a utna a mang kol sur ur toli. Bel a matmataut sur ar warwara rakrakai tetek u onoi, anasa o e Karisito. <sup>9</sup> Ika a nunung wowon u, anasa a mang sur u. Onone ia ka bun, pa a kes te na rumai a dodot anasa a tortorot o e Karisito Iesu. <sup>10</sup> A nunung u sur ur malmaling pas e Onesimus, a natuklik ana tortorot. Iau e tamana, anasa a warwara talapor o e Karisito teteki ning i kes ting na rumai a dodot pa i tortorot. <sup>11</sup> Lanigo bel i tolsot pas ta titol, ika anone, i a wakak a tena titol ma, tetek u pa tetek iau.\*

<sup>12</sup> Onone a sune ulak seni tetek u. I arlar ana balak rop i han taum ono i. <sup>13</sup> A mang sur ir kes kama napirik, sur ir keles u Pilimon, ana tai alar tetek iau, ning a kes ting na rumai a dodot anasa ana Wakak a Warwara. <sup>14</sup> Ika bel a mang sur ar angongos pas u sur ur nangan iau, a mang sur u ot ur toli ona num a gasgas. Bel ar tol ta utna tuk ning u ot ur malmaling. <sup>15</sup> Ngandek e Onesimus i kes siklik pas kusun u, sur i ma ning ir kes tikin ulak taum hom. <sup>16</sup> Onone bel ir arlar ulak ma ona tena titol oros, ir arlar o

\* **1:11:** A rising Onesimus a kamkamna mang "i topas ot a titol."

e tasimlik momol ana tortorot. A mang suri, ika anuma marmaris teteki ir itna kol, anasa i anuma tena titol pa tasimlik otleng ana Leklek.

<sup>17</sup> Ning u nuki mang da halna, ur gas ulak pas e Onesimus, arlar larning ur gas pas iau ot. <sup>18</sup> Ning ka tol tar ta toltol laulau tetek u o i kibas pas anum ta utna, iau ar kelesi tetek u. <sup>19</sup> Iau e Pol a tumus a warwara ne ana kuk ot: ar keles tar a dinau ning tetek u. Bel ar atong ta utna tam, u ot u ka tasmani mang a tona lalaun ning u kibas pasi i kamkamna ot hok, pa i arlar ana dinau tetek u. <sup>20</sup> Momol, tasiklik, ana risana Leklek, a mang sur ur tol asaning ia ka atong tari tam. U a tasiklik o e Karisito, ur agasgas anuka lalaun. <sup>21</sup> Ning a tumus a pas ne, a tasman momoli mang ur longor ot ana nuk a nunung tetek u, pa a tasmani otleng mang ur tol a utna ning i itna kol tana utna ning a nunung u suri.

<sup>22</sup> Ning a utna otleng, a nunung u sur ur sang ta tuka rumai tetek iau. A tortorot mang e God ir alan-golango sen iau kusun a rumai a dodot sur ar han ulak tetek mulo. Ine a wana numulo na nunung.

*A ararop a warwara na marmaris*

<sup>23</sup> E Epapras, esaning i dodot taum hok anasa ana tortorot o e Karisito Iesu, i saran anuna marmaris tetek u. <sup>24</sup> Pa la otleng ne, e Mak, e Aristarkus, e Demas pa e Luk. Mila na halalinla taum ana titol.

<sup>25</sup> A marmaris ana Leklek Iesu Karisito ir kes ana ingumulo.

## A Pas tetek a tarai Hibru

### *A warwara talapor nigo*

A pas ne di tumusi tetek a tarai Juda, ning di atong la otleng mang a tarai Hibru, anasa la warwara ana warwara Hibru. Bel tik i tasman esining i tumus a pas ne.

A tarai Juda ning di tumus a pas ne tetek la, la tortorot o e Iesu, ika a tarai ning bel la tortorot la alaulau la. Pa dingla na tarai onla ning la tortorot, la mang sur lar han ulak sur a lotu Juda. A pas ne i atai la mang gong la ulak. Ana tortorot ka o e Iesu la tostos namatana e God. E Iesu i itna kol, i a Nat e God pa i itna tana angelola pa a propetla. Pa tona kunubus ning e Iesu i toli, i keles sen a ningnigo na kunubus. E Iesu ka anundala ningnigo na tena artabar tetek e God pa i artabar ana sulukna ot. I wakak ning dalar tortorot ka o e Iesu.

### **A tinan ana buk Hibru:**

E Iesu a Nat e God, pa i asangan e God tetek dala (1:1-4)

E Iesu i itna tana angelola pa i a Tena Alaun (1:5-2:18)

E Iesu i itna ta e Moses pa e Josua (3:1-4:13)

E Iesu anundala ningnigo na tena artabar tetek e God (4:14-7:28)

A tona kunubus (8:1-9:28)

A suluk e Iesu i kepsen sen anundala na toltol laulau (10:1-39)

A tortorot anuna tarai Karisito ning la kibas mamahat (11:1-40)

Dalar tortorot o e Iesu pa dalar longor teteki (12:1-13:19)

A ararop a warwara (13:20-25)

### *A Nat e God i itna kol tana angelola*

<sup>1</sup> Nating ot e God i warwara ana elgen a propetla tetek na tumtubundala. I warwara larning ana galis a taem ana urmatana ngas.

<sup>2</sup> Ika ana ararop a pukakiarla ne, i warwara ana elgena e Natnalik tetek dala. E Natnalik ning i aslang pasi sur ir kibas a ututnala rop. Pa ana kuna e Natnalik, e God i akes a rakrakan hanua rop. <sup>3</sup> E Natnalik i talapor kol ana matatar ane God, pa i arlar momol ot o e God. Ana nuna warwara ning i rakrakai kol, i tong akes a rakrakan hanua rop sur ir titol taum wakak. I saran tar anuna lalaun, sur ir atotoh dala kusun a toltol laulaula rop. Pa ning ka tol arop tar a titol ne, i kes ting na ris a sot a kuna e God, a tnan king kol, saot na langit. <sup>4</sup> I maining e God i aitna pas e Natnalik sur ir itna kol tana angelola. I itna kol, arlar ana risana ning i itna kol tana risana a angelola. A risana ning e Tamana i saran tari tana.

<sup>5</sup> Anasa e God bel i atongi tetek ta angelo larne,

“U a Natuklik,

pa onone ia ka hanot e  
Tamam.” *Buk Song 2:7*

pa bel i atongi otleng on ta angelo mang,

“Iau e Tamana,

pa i a Natuklik.” *2 Sam 7:14*

<sup>6</sup> Pa ning e God i sune sen a ningnigo na Natnalik ute na rakrakan hanua, i atongi ono larne,

“I wakak ning a angelola rop ane  
God lar lotu teteki.” *Lo 32:43*

<sup>7</sup> Pa i atongi ana nuna angelola larne,

“I lingir anuna angelola sur lar  
arlar ana wuwu,

a angelola ning la anuna tena  
titolla,

i lingir la sur lar arlar otleng  
ana irnga na iah.” *Buk Song 104:4*

<sup>8</sup> Ika i atongi o e Natnalik larne,

“God, anuma keskes a king ir kes  
tikin pa bel ir rop.

U sira warkurai anuma  
matanitu ana tostos a toltol.

<sup>9</sup> U mang kol sur a tostos a toltol,  
pa u nget a toltol laulau.



Ine a kamkamna ning e God,  
 anuma God, i aslang pas u  
 pa i saran tar a gasgas pa a  
 hanrawai tam,  
 ning i itna kol tana gasgas pa a  
 hanrawai ning i sarani tetek  
 na halalim.” *Buk Song*  
*45:6-7*

<sup>10</sup> Pa e God i atongi otleng tetek e  
 Natnalik larne,

“Leklek, ana turturkamna, u, u  
 akes tar a kama rakrakan  
 hanua,  
 pa u akes a langit ana kum.

<sup>11</sup> Diar rop oros ka, ika u, ur kes  
 tikin.

Diar turai amon arlar ana  
 kaen.

<sup>12</sup> Ur hin diau arlar ana kaen a  
 polpol,

ur keles diau arlar lar tik ning  
 i keles sen a turai a kaen.

Ika u, bel ur ries,  
 pa num na raula bel ir rop.”

*Buk Song 102:25-27*

<sup>13</sup> E God bel i atongi otleng tetek ta  
 angelo larne,

“Ur kes te na sot a kuk,  
 tuk ning ar tolsot pas anum na  
 hirua

sur lar kes nahaim.” *Buk*  
*Song 110:1*

<sup>14</sup> A angelola rop la na ingun, ning  
 la titol tetek e God. I sune sen la  
 sur lar nangan a tarai, la ning ir  
 alaun la.

## 2

*A tnan titol ane God ning i alaun  
 a tarai*

<sup>1</sup> I maining i wakak sur dalar  
 mur a asasaerla ning dala ka lon-  
 gor tari. Dalar muri sur gong dala  
 han masik. <sup>2</sup> A warwarala ning  
 nating a angelola la warwara ono,  
 i dot la\*. Pa ning tik bel i longor  
 ono pa bel i muri, di saran tar  
 a warkurai a arkeles teteki, ning  
 i arlar ana nuna tabun longor.

<sup>3</sup> Manglarning, ir mangmangasa  
 tetek dala, ning onone dala gilam

ris ana tnan titol ane God ning i  
 alaun a tarai? Bel dalar tol sot sur  
 dalar liu kumna kusun a warkurai  
 na arkeles. A titol na alaun a tarai,  
 a Leklek ot ka warwara nigo tar  
 ono. Pa la ning la longor a elngena,  
 la apuasa i tetek dala mang i mo-  
 mol kol. <sup>4</sup> E God i tol a akinalangla  
 pa a ututnala na kulkulan, pa na  
 rakrakai a titol, pa i artabar sarara  
 ana artabarla anuna Talngan Tabu  
 arlar ot ana nuknukna. Ana nuna  
 titolla ning, i apuasa i mang anuna  
 titol na alaun a tarai i momol.

*E Iesu i hanot a barsan sur ir  
 alaun pas a tarai*

<sup>5</sup> E God bel i suah tar a angelola  
 sur lar warkurai a tona rakrakan  
 hanua ning lamur ir hanot. A  
 rakrakan hanua ning dala war-  
 wara ono. <sup>6</sup> Ika takai a tukna ting  
 na Buk Tabu, ning tik i atongi tetek  
 e God larne,

“Mila a tarai, esi momol mila ning  
 u nuk pas mila?

Sur asa ning u tai alar mila?

<sup>7</sup> U ka akes tar mila sur a an-  
 gelola lar leklek tamila, sik-  
 lik pukakiar ka.

U suah tar a matatar pa han-  
 rawai omila arlar ana king  
 ning di suah tar a kukuh  
 ono,

<sup>8</sup> pa u ka suah tar mila sur a utut-  
 nala rop lar kes nahaimila.”

*Buk Song 8:4-6*

Ning e God ka suah tar a ututnala  
 rop nahaindala, i talapor mang bel  
 ta utna ulak ma ning bel i kes  
 nahaindala. Ika, ana raula ne,  
 belot dala oroi mang a ututnala  
 rop la kes nahaindala. <sup>9</sup> Ika dala  
 oroi e Iesu, esaning e God i atarna  
 tari sur ir natarna tana angelola,  
 siklik pukakiar ka, sur ir kilang a  
 tnan kankan pa ir mat sur a taraila  
 rop. I mat anasa e God i maris la.  
 Ika onone, dala oroi mang e God  
 ka suah tar a matatar pa hanrawai  
 ono arlar ana king ning di suah tar

\* **2:2:** A warwara ning a angelola la warwara onoi a warkuraila ane Moses.

a kukuh ono, anasa ana kankan pa a minat ning i kilangi.

<sup>10</sup> E God i akes tar a ututnala rop sur i ot. Pa i tostos ning ir awakak kol pas e Iesu ana kankan ning i kilangi. E God i awakak pasi, sur ir ben pas a galis a natnatna sur lar kibas pas a matatar. Anasa e Iesu anunla Tena Alaun. <sup>11</sup> E Iesu taum ana tarai ning i atotoh pas la kusun a nunla na toltol laulaula, takai a Tamanla ka. Ine a kamkamna ning e Iesu bel i meme sur ir atong la mang na tastasna. <sup>12</sup> Pa i atongi ta e God larne,

“Ar warwara talapor hom tetek na tastasikla,  
pa ar saksak na atong leklek tetek u na arpotor tana tarai a lotu.” *Buk Song 22:22*

<sup>13</sup> Pa i atongi otleng larne,  
“Ar tortorot ot o e God.” *Ais 8:17*  
Pa i atongi otleng larne,

“Oroi, iau mane taum ana kakakla ning e God ka saran tar la tak.” *Ais 8:18*

<sup>14</sup> A kakakla ne, a momolinla ot, a palaonla pa sulukinla ot. Pa e Iesu otleng i hanot a barsan, arlar onla, a palaona pa sulukna ot. I toli larning sur ana nuna minat ir alaulau sen e Satan, esaning i tong akes a rakrakai ana minat. <sup>15</sup> E Iesu i mat sur ir alangolango la ning a matmataut na minat i dot la ana nunla na pukakiar a lalaun rop. <sup>16</sup> I momol kol mang e Iesu bel i tol a titol ne sur ir nangan a angelola. I toli sur i nangan a tarai ning na tumtubuna e Abaram. <sup>17</sup> Ine a kamkamna ning e Iesu i hanot arlar ot ana tastasnala ana ututnala rop, sur ir ningnigo na tena artabar tetek e God pa ir titol ana marmaris pa momolna, pa ir saran anuna lalaun sur ir mat, pa e God ir kepsen a toltol laulaula anuna tarai, pa ir arop sen anuna balakut, ning nating kaning onla. <sup>18</sup> E Iesu i tolsot pasi sur ir nangan la ning di lar la, anasa i otleng di lari pa i kilang a kankan ono.

### 3

#### *E Iesu i leklek ta e Moses*

<sup>1</sup> I maining na tastasikla ning e God i kabah pas mulo sur mulo anuna tarai, mulor nuk akes e Iesu. Esaning Aposel pa a ningnigo na tena artabar tetek e God ning dala tortorot onoi pa dala warwara talapor ono. <sup>2</sup> E God ka aslang tari sur a titol ne, pa i momol onoi, larning e Moses i momol ana nuna titol na arpotor ana tarai ane God. <sup>3</sup> A hanrawai ning di sarani tetek a barsan ning i tol a rumai, i itna kol tana hanrawai ning di sarani tetek a rumai ning i toli. I mang otleng larning, a hanrawai ning di sarani tetek e Iesu i itna kol tana hanrawai ning di sarani tetek e Moses. <sup>4</sup> Na rumai taktakai rop taktakai barsan i toli, ika e God i tol a ututnala rop. <sup>5</sup> E Moses, i a tena titol oros ane God, pa i momol ana nuna titol ting na rumai ane God. I warwara talapor nigo tar ana ututnala ning e God ir warwara talapor ono lamur. <sup>6</sup> Ika e Karisito, i a Nat e God pa i momol ana nuna titol ning i tai alar a rumai ane God. Ning dala tur rakrakai ana tortorot, pa bel dala matmataut, pa dala harnanai sur a ututnala ning e God ir toli, dala a rumai ane God.

*La ning bel la tortorot bel lar kas ting na hanua na manah ane God*

<sup>7</sup> Dala a tarai ane God, dalar mur a warwara ana Talngan Tabu ning i atongi larne,

“Onone ning mulo longor a elngena e God,

<sup>8</sup> gong mulo arakrakai alar a balamulo

arlar larning na tumtubumulola nating la toli,

ning la gilam ris,

ana raula ning la kes ting na hanua bel, pa la lar iau.

<sup>9</sup> La lar iau tingia,

pa la oroi ot anuk na titol ana  
diat a bonot a rau.

<sup>10</sup> Ine a kamkamna ning a balakut  
tetek a tarai ning,  
pa a atongi larne,  
'A nuknukinla i han rongo bol-  
bolos,  
pa bel la mur anuka ngas.'

<sup>11</sup> I maining, a balakut pa a lele  
larne,  
'Bel lar kas ting na nuka  
hanua na manah.'" *Buk  
Song 95:7-11*

<sup>12</sup> Na tastasikla, mulor tai alar  
mulo, sur gong tik o mulo a  
nuknukna ir mur a toltol laulau  
pa bel ir tortorot, pa ir han masuk  
kusun e God, ning i laun. <sup>13</sup> Mulor  
warwara na harnangai artalai  
tetek mulo, ana pukpukakiarla  
rop ning di atongi mang "onone."  
Mulor toli larning, sur gong a  
tolto laulau ir asongo pas tik  
o mulo, pa ir arakrakai alar a  
balana. <sup>14</sup> Dala o e Karisito, ning  
dalar tur rakrakai ana tortorot tuk  
ana araropna, arlar larning dala  
turpasi nating. <sup>15</sup> Larning di ka  
atong tari ting na Buk Tabu larne,  
"Onone ning mulo longor a el-  
ngena e God,  
gong mulo arakrakai a bala-  
mulo,  
arlar larning na tumtubumulola  
nating la toli,  
ning la gilam ris kusun iau."  
*Buk Song 95:7-8*

<sup>16</sup> Esi la ning la longor a elngena  
e God, ika la gilam ris? La rop ning  
e Moses i ben purum pas la mitimo  
e Ijip. <sup>17</sup> Esi la ning e God i balakut  
tetek la diat a bonot a rau? La ning  
la tol a toltol laulau pa la mat ting  
na hanua bel. <sup>18</sup> Esi la ning e God i  
lele mang bel lar kas ting na nuna  
hanua na manah? La ning bel la  
mur anuna warwara. <sup>19</sup> I maining  
dala oroi mang bel la tolsot pasi  
sur lar kas, anasa bel la tortorot.

## 4

*A hanua na manah anuna tarai  
ane God*

<sup>1</sup> E God ka lele tar tetek dala  
mang dalar kas ting na nuna  
hanua na manah. Anuna lele ning  
kanet. I maining dalar atumarang  
dala, sakana al tarai o mulo bel  
lar tolsot pasi sur lar kas. <sup>2</sup> Anasa  
dala otleng dala ka longor tar a  
Wakak a Warwara arlar ana tum-  
tubundala tagun nating. La longor  
tari ot, ika bel i nangan la, anasa  
bel la tortorot ono. <sup>3</sup> Dala ning  
dala ka tortorot o e God, dalar kas  
ana nuna hanua na manah. Ika e  
God ka atong tari onla ning bel la  
tortorot larne,

"A balakut pa lele larne,

'Bel lar kas ting na nuka  
hanua na manah.'" *Buk  
Song 95:11*

E God i atong a warwara ne ana  
raula ane Moses, ika i momol, nat-  
ing ot i atong anuna titol ning i akes  
a rakrakan hanua, pa i manah. I  
maining ka sang tar anuna hanua  
na manah. <sup>4</sup> Pa i atalapor mang ka  
sang tari, anasa a Buk Tabu i war-  
wara ana ararop a pukakiar ana  
wik larne, "Diono na pukakiar e  
God i titol, pa ana pukakiar lamur  
i manah kusun anuna titolla rop."  
*Stat 2:2*

<sup>5</sup> Pa ting na Buk Tabu ning dala ka  
was tari, e God i atong ulaki larne,  
"Bel lar kas ting na nuka hanua na  
manah." *Buk Song 95:11*

<sup>6</sup> La ning la longor a Wakak a  
Warwara nating, bel la kas ting  
na nuna hanua na manah, anasa  
bel la mur anuna warwara. Ika a  
ngas i sapang ot, sur al tarai masuk  
lar kas ting na nuna hanua na  
manah. <sup>7</sup> I talapor larning, anasa  
a galis a rau lamur tanla ning bel  
la mur anuna warwara, e God i  
warwara ot ana nuna hanua na  
manah. I warwara ana pahana e  
Dewit larne,  
"Onone, ning mulo longor a el-  
ngena e God,

gong mulo arakrakai a bala-  
mulo.” *Buk Song*  
95:7-8

Ning e God i atongi “onone” i kamkamna mang ka suah tar takai a pukakiar ulak sur a tarai lar kas ting na nuna hanua na manah. <sup>8</sup> Ngandek ning e Josua ka saran tar a manmanah tetek na tum-tubundala\*, e God bel ir suah ulak tar ta pukakiar masik sur a tarai lar kas uting na nuna hanua na manah. <sup>9</sup> Larning tetek a tarai ane God, anunla manmanah kaning ot i kes. A manmanah ning i arlar ana manah ane God ana pukakiar Sabat. <sup>10</sup> Anasa esining i kas uting na hanua na manah ane God, ka manah kusun anuna titolla, arlar o e God ning i manah kusun anuna titolla. <sup>11</sup> I maining dalar rakrakai sur dalar kas uting na hanua na manah ning, sur gong tik ondala ir punga arlar ana tarai ning bel la mur anuna warwara pa bel la kas.

<sup>12</sup> Anasa a warwara ane God i laun pa i titol. I harat kol tana liwan na harum ning naur a ris. I kas pa i kokot tuk ana pukna ning a ingundala pa balandala dia han taum ia. Pa i kas pa i kokot tuk ana pukna ning a surla la han taum ia. Pa i warkurai a nuknukindala pa balandala. <sup>13</sup> Pa bel ta utna ning e God ka akes tari ning i mumun kusun a matana. A ututnala rop i tur langolango pa i talapor rop ka ana matana. Pa lamur dalar tur namatana pa dalar atong puasa a ututnala rop ning dala ka tol tari.

*E Iesu anundala ningnigo na tena artabar tetek e God*

<sup>14</sup> E Iesu, a Nat e God, i a tnan ningnigo na tena artabar tetek e God, ning i han usaot na langit. I maining dalar tur rakrakai ana asasaerla ning dala tortorot ono pa dala sira warwara talapor ono.

\* **4:8:** E Josua i nigon a tarai Israel ning la han kas uting na hanua Kenan, ning e God ka lele tar la ono.

<sup>15</sup> I tasmani mang bel ta rakrakain-dala sur dalar tolsot pas a toltol laulaula, pa i maris dala. Anasa di ka lar nigon tar e Iesu ana urmatana ngas a larlar rop ning di sira lar dala ono, ika bel i tol ta toltol laulau. <sup>16</sup> I maining dalar han tetek e God, anundala King, a tena marmaris, pa gong dala matmataut. Dalar han teteki sur dalar tong akes anuna marmaris, ning ir nangan dala ana nundala na mamahat.

## 5

<sup>1</sup> A ningnigo na tena artabarla rop tetek e God, e God i aslang pas la kusun a tarai, pa i suah tar la sur lar tur aslang a tarai namatana. Lar saran a artabarla pa lar tun a inagoila sur e God ir kepsen a toltol laulaula anuna tarai. <sup>2</sup> A ningnigo na tena artabarla tetek e God i tolsot pasi sur ir titol ana marmaris tetek a tarai ning bel la tastamai pa la han rongo, anasa i otleng bel ta rakrakaina sur ir tolsot pas na toltol laulau. <sup>3</sup> Ine a kamkamna ot ning i sira tun a artabarla. Bel sur ir kepsen sen ka a toltol laulaula anuna tarai. Surning ir kepsen otleng anuna toltol laulaula.

<sup>4</sup> Bel ana nuknukin tik ning ir los pas a leklek a tiniba na ningnigo na tena artabar tetek e God. Ana arkabah ot ane God ning a barsan ir ningnigo na tena artabar, arlar larning i toli tetek e Aron. <sup>5</sup> Mang otleng larning, e Karisito bel i alek-lek pasi sur ir ningnigo na tena artabar tetek e God. Ika e God i atongi tana larne,

“U a Natuklik,  
pa onone ia ka hanot e  
Tamam.” *Buk Song 2:7*

<sup>6</sup> Pa ning a tukna otleng ting na Buk Tabu, e God i atongi larne,

“U a tena artabar tetek e God,

a ngas a tena artabar arlar o e Melkisedek, pa anuma titol ir tur tikin.” *Buk Song 110:4*

<sup>7</sup> Ning e Iesu i laun te na rakrakan hanua, i kukuk ana nuna nunungla ana lurus matana tetek e God, esaning i tolsot sur ir alaun pasi kusun a minat. Pa e God i longori, anasa i anatarna pasi nahaina. <sup>8</sup> I momol kol e Iesu a Nat e God, ika ning i kibas a kankan, i asaer ana toltol na mur a warwara ane God. <sup>9</sup> Ning e God ka tol sot pas a titol ning o e Natnalik, e Natnalik i hanot a kama titol na alaun tikin tetek la rop ning la mur anuna warwara. <sup>10</sup> Pa e God i suah tari sur i a ningnigo na tena artabar, a ngas a tena artabar arlar o e Melkisedek.

*A atumarang sur gong tik i han masuk kusun a tortorot*

<sup>11</sup> A galis a utna ot ning milar warwara ono ana utna ne. Ika i ngangaten sur milar pak wakaki tetek mulo, anasa bel mulo kibas kapiti. <sup>12</sup> Mulo ka tortorot bongnani, pa onone i sot ma sur mulo a tena asaerla. Ika, mulo kapan ot sur tik ning ir asaer mulo ulak ana ningnigo na asasaer ana warwara ane God. Bel mulo tolsot pasi sur mulor ien a rakrakai a utna. Mulo tolsot pasi ka sur mulor sus. <sup>13</sup> Esining kaning ot i sus, i a kaklik betbete ot, pa bel i lasan ana asasaer ana tostos a toltol. <sup>14</sup> La ning la ka itna la ien a rakrakai a utna na hangan. La ning la ka alasan pas la sur lar oroi lalan a wakakna pa a laulauna.

## 6

<sup>1</sup> I maining dalar han usa lanigo sur dingla na asasaer kale ning ir arakrakai dala ana nundala tortorot. Gong dala asasaer ulak ana ningnigo na asasaerla o e Karisito ning dala ka asasaer pas ono. A ningnigo na asasaerla larne: dalar lingir a nuknukindala kusun a

toitolla ning ir ben dala sur a minat, a tortorot o e God, <sup>2</sup> a asasaer ana baptais, a asasaer ana suah kundi saot ana tarai, a kamkamtur ulak kusun a minat pa a warkurai a arkeles tikin. <sup>3</sup> Dalar han usa lanigo ning e God ir malmaling.

<sup>4-6</sup> A tarai ning la ka tasman a talapor ane God, la ka lartumus tar a artabar misaot na langit, la ka los pas a Talngan Tabu, la ka tasmani mang a warwara ane God i wakak pa la ka kilang tar a rakrakai ane God ning ir hanot lamur. Ning la ka gilam ris kusun e God, bel tik ir tolsot sur ir ben ulak la sur lar lingir a nuknukinla. Anasa i arlar larning la sai ahat ulak a Nat e God saot na rakai kutus pa la ame i namatan a tarai.

<sup>7</sup> A kabalapiu ning i gang pas a polo na kiar ning i sira punga, pa i saran a utna na hangan ning i nangan la ning la oman tari, a kabalapiu ning e God i atong angisi. <sup>8</sup> Ika a kabalapiu ning i saran ka a suksukla pa rosrosla bel ta utna i to pasi ono. Bel i bongnani pa e God ir saran a warkurai a arkeles teteki pa lamur ir tun seni ting na iah.

<sup>9</sup> Na halalimila, mila ka atong tar a rakrakai a warwarala ne ta mulo. Ika mila tasman momoli mang mulo mur a wakak a ngas, ning ir sot sur a tarai ning e God ka alaun pas la. <sup>10</sup> E God bel i sira tol ta utna ning bel i tostos. Bel ir duman sen pas anumulo a titol pa anumulo na marmaris ning mulo toli teteki, ning mulo ka nangan tar anuna tarai, pa kaning ot mulo toli. <sup>11</sup> Mila mang kol sur mulo rop taktakai mulor rakrakai ana marmaris mang ot larning mulo sira toli, tuk ana araropna. Mulor toli larning sur a ututnala ning mulo harnanai ana tortorot suri, ir hanot momol ot tetek mulo. <sup>12</sup> Bel mila mang sur mulor ngoro. Mila mang sur mulor arlar onla ning la tortorot pa la harnanai pa bel la

ngoro, pa lar tong akes a ututnala ning e God ka lele tar ono.

*A lele ane God i momol*

<sup>13</sup> Ning e God i lele tetek e Abaram, i arakrakai anuna lele ana risana ot, anasa bel ta risana tik ulak i itna tana. <sup>14</sup> E God i lele tar mang, "A momolna, ar atong angis u pa ar saran tar al galis a kaba tarai hom." *Stat 22:17*

<sup>15</sup> Pa e Abaram i harnanai pa bel i ngoro, pa lamur i tong akes a utna ning e God ka lele tar ono teteki.

<sup>16</sup> Ning a tarai la lele, la arakrakai anunla lele ana risana tik ning i itna tanla. Manglarning, a lele ning ir tur rakrakai pa bel ta warwara na linglingir ulak ma ono. <sup>17</sup> Pa e God otleng, i arakrakai anuna lele ana risana ot, sur ir apuasa i tetek anuna tarai, la ning i tol tar anuna lele tetek la, mang bel ir lingir ulak a nuknukna. <sup>18</sup> E God i tol a lele, pa i arakrakai i ana risana. Naur a utna ne, bel tik ir keles lar pas diau, anasa e God bel i asongo lar pas. I lele larning sur ir arakrakai dala, ning dala ka dun rait tar teteki, sur dalar tur rakrakai ana nundala keskes harnanai ana tortorot sur a lele ane God, ning kaning lanigo tan dala. <sup>19</sup> Anundala tortorot ning dala harnanai ono sur a lele ane God, i arlar ana aga ning i tong akes a ingundala, pa bel ir susur. Anundala keskes harnanai ana tortorot i kas uting na rumai a artabar ting na pukna ning i Tabu Kol lamur tana kaen na alalar kutus saot na langit. <sup>20</sup> E Iesu ka kas nigo usaot sur ir nangan dala. I anundala ningnigo na tena artabar tetek e God, a ngas a tena artabar arlar o e Melkisedek, pa anuna titol ning ir tur tikin.

## 7

*E Melkisedek a tena artabar tetek e God*

<sup>1</sup> E Melkisedek i a king mitimo e Salem, pa a tena artabar tetek

e God, esaning i Leklek Kol. I pastetek e Abaram ning i han ulak kusun a harum ning ka tolsot pas diat a king. Pa e Melkisedek i atong angisi. <sup>2</sup> Pa e Abaram otleng i saran tar taktakai kusun ning a bonot ta e Melkisedek miting na ututnala rop ning i kibasi ning i tolsot pas a harum. A risana e Melkisedek, a kamkamna mang a king anuna tostos a toltol. Pa a king mitimo e Salem, a kamkamna mang a king a molmol. <sup>3</sup> Bel tik i tasman e tamana pa e tana, pa anuna mangis a tarai. Bel ta kamkama nuna lalaun, pa bel ta araropna otleng. E Melkisedek i arlar o e Nat e God, i otleng a tena artabar tetek e God, pa nuna titol ir tur tikin.

<sup>4</sup> Oro, e Melkisedek i leklek kol. E Abaram, i a tnan tubundala, ika i saran tar taktakai kusun ning a bonot ta e Melkisedek kusun a ututnala rop ning i kibasi kusun a harum ning ka tolsot pasi. <sup>5</sup> A warkurai ane Moses i warkurai i mang a mangis a tarai Liwai, la ning a tena artabarla tetek e God, lar kibas pas taktakai kusun ning a bonot miting na ututnala rop anuna tarai Israel. A tarai ning la na tastas a mangis a tarai Liwai. A momolna mang la otleng na tumtubuna e Abaram, ika la saran ot taktakai kusun ning a bonot miting na nunla ututnala rop. <sup>6</sup> E Melkisedek, bel i miting na mangis a tarai Liwai, ika i kibas pas taktakai kusun ning a bonot miting na ututnala rop ane Abaram. I atong angis e Abaram, esaning ka kibas pas a lelela ta e God. <sup>7</sup> I talapor mang esaning i itna i atong angis esaning i natarna tana.

<sup>8</sup> Na tena artabar tetek e God la sira kibas taktakai kusun ning a bonot miting na ututnala rop anuna tarai Israel. Pa a tena artabarla ning lar mat ka. Melkisedek otleng i kibas taktakai

kusun ning a bonot miting na ututnala rop ane Abaram. Ika i laun tikin, arlar ana Buk Tabu i atongi. <sup>9</sup> Pa dalar atongi larne, Liwai otleng i saran taktakai kusun ning a bonot tetek e Melkisedek ana pukakiar ning e Abaram i artabar, anasa e Liwai a mangis a tarai ane Abaram. Ika a mangis a tarai ane Liwai la sira kibas taktakai kusun ning a bonot anuna tarai Israel. <sup>10</sup> Ning e Melkisedek i pastek e Abaram belot di agon e Liwai. Ika i arlar larning e Liwai kaning ui o e Abaram, anasa lamur ir hanot miting na mangis a tarai ane Abaram.

*E Iesu a tena artabar tetek e God arlar o e Melkisedek*

<sup>11</sup> A titol ning a tena artabarla tetek e God, a mangis a tarai ane Liwai, la toli, a kama Warkuraila ane Moses ning e God i sarani tetek a tarai Israel. Ngandek ning a titol anuna tena artabarla i tolsot sur ir kepsen sen a toltol laulau anuna tarai, bel dir kapan ulak ma sur ta maskana tena artabar, ta ngas a tena artabar arlar o e Melkisedek, esaning bel i arlar o e Aron. \*

<sup>12</sup> Ning dir keles a tena artabarla tetek e God, dir keles otleng a Warkuraila. <sup>13</sup> A warwarala ne di atongi ona Leklek anundala, esaning miting na ning a mangis a tarai ot. Pa bel tik miting na nuna mangis a tarai i tol a titol na tena artabar tetek e God. <sup>14</sup> I talapor mang a Leklek anundala i miting na mangis a tarai ane Juda. Ika e Moses bel i atong a mangis a tarai ane Juda ning i warwara ana tena artabarla tetek e God.

<sup>15</sup> A warwarala ning i hanot talapor kol anasa takai a maskana tena artabar tetek e God ka hanot. Esaning i arlar o e Melkisedek. <sup>16</sup> I kibas a titol na tena artabar tetek e God, ika bel i kamkamna ning i

miting na mangis a tarai ane Liwai arlar ana warwara na Warkurai. I kibas a titol anasa ana rakrakai a lalaun ning bel ir tolsot sur ir rop. <sup>17</sup> Anasa a Buk Tabu ka atong tari onoi larne,

“U a tena artabar tetek e God,  
a ngas a tena artabar arlar o e Melkisedek,  
pa anuma titol ning ir tur tikin.”  
*Buk Song 110:4*

<sup>18</sup> Manglarning, i talapor mang di ka kepsen a ningnigo na warkurairai ning i warwara ana tena artabarla, anasa a warkurai ning bel ta rakrakaina pa bel ta utna i to pasi. <sup>19</sup> Anasa a warkurai ning bel i atostos pas a tarai sur lar han milau tetek e God. Ika e God ka tol tar a ngas sur dalar han milau teteki. A ngas ning i wakak kol tana Warkuraila. Pa onone dala tolsot sur dalar harnanai ana tortorot suri.

<sup>20</sup> Ning e God i saran tar a titol na tena artabar tetek e Iesu, i lele tar ono pa i arakrakai anuna lele ana risana. Ika ning i saran a titol na tena artabar tetek a mangis a tarai ane Liwai, bel i toli larning. <sup>21</sup> Ika ning e Iesu i kibas a titol na tena artabar, e God i lele mange,

“A Leklek ka lele tar,  
pa bel ir lingir a nuknukna.  
‘U a tena artabar tetek e God,  
pa num a titol ir kes tikin.’”  
*Buk Song 110:4*

<sup>22</sup> Manglarning e Iesu i amomol tar a kunubus ning i wakak tana kunubus ning e God i sarani tetek e Moses.

<sup>23</sup> A galis a tena artabar, anasa a minat i sairas la sur gong la titol tikin. <sup>24</sup> Ika e Iesu, i a tena artabar ning anuna titol ir kes tikin, anasa i laun tikin. <sup>25</sup> I maining e Iesu i tolsot pasi sur ir alaun a tarai ning la han tetek e God ana risana e Iesu. Ir alaun la pa lar laun tikin, anasa i laun tikin sur ir nunung onla.

\* **7:11:** E Aron i a tena artabar tetek e God, pa i miting na mangis a tarai ane Liwai.

<sup>26</sup> E Iesu i a ningnigo na tena artabar, ning i sira nangan dala. I totoh namatana e God, bel dir arup sot pasi on ta rongo, pa bel ta dur namatana e God. E God i akes maskan tari kusun a laulau a tarai, pa i alekleki tisaot na langit. <sup>27</sup> Bel i arlar ana ningnigo na tena artabarla, ning la sira tun artabar ana pukakiarla rop, sur anunla na toltol laulaula nigo, pa lamur anuna tarai otleng. E Iesu bel i toli larning. I saran tar ka takai a artabar ana toltol laulau anuna tarai. I artabar ot ono. I tol muntakai tari ka, pa bel ir tol ulaki, anasa a artabar ning ir kes tikin. <sup>28</sup> A ningnigo na tena artabarla ning di suah tar la arlar ana Warkuraila ane Moses, bel al rakrakainla. Ika, lamur tana Warkuraila ane Moses, e God i lele, pa i suah tar e Natnalik sur ir ningnigo na tena artabar, ning i tostos pa ir kes tikin.

## 8

*E Iesu anundala ningnigo na tena artabar tetek e God ana tona kunubus*

<sup>1</sup> A tnan utna ning mila ka warwara pas ono i mange: Anundala ningnigo na tena artabar tetek e God, ning ka kes tar ana ris a sot a kuna keskes ane God, a leklek a King kol saot na langit. <sup>2</sup> I titol tetek e God saot na langit uting na pukna ning i Tabu Kol ting na rumai a sel ane God. I ne a rumai a sel momol, ning a Leklek ot i toli, bel a tarai la toli.

<sup>3</sup> A ningnigo na tena artabarla rop tetek e God, e God i suah tar la sur lar saran tar a artabarla pa lar tun a inagoila sur a artabar teteki. Manglarning i tostos sur e Iesu anundala ningnigo na tena artabar otleng ir artabar ot anal utna. <sup>4</sup> Ngandek ning ir kes te lapiu, bel ir tena artabar tetek e God, anasa dingla na tena artabar kanet la lapiu, pa la sira saran

a artabarla arlar ana Warkuraila ane Moses. <sup>5</sup> A titol na artabar la sira toli ting na rumai a artabar. A rumai ning i arlar ka ana manar a rumai saot na langit. Ine kamkamna ning e God i atumarang e Moses, ning i sang sur ir tol a rumai a sel ning lar tun artabar ono. I atongi tana mange, “Tumarang tar! Ur tol a ututnala rop, arlar ot ana manar a rumai ning ia ka asangan tari tam saot na mangir.” *Kisim Bek 25:40*

<sup>6</sup> Ika e Iesu ka kibas pas a titol na tena artabar ning i itna kol tana titol na artabar anuna tena artabarla. Mang otleng larning a kunubus ning e Iesu ka tolsot pasi sur ir dat taum e God pa tarai, i itna kol tana ningnigo na kunubus. A lelela ning la a kama kunubus, la wakak kol tana ningnigo na lelela.

<sup>7</sup> Ngandek ning a ningnigo na kunubus kar tostos kol, bel dir tai ulak sur tik. <sup>8</sup> Ika e God i oroi mang a toltol laulau kaning ot ona tarai pa i atongi larne,

“A Leklek i atongi mang: Oroi, a pukakiarla lar hanot, ning ar tol a tona kunubus taum ana tarai Israel pa tarai Juda.

<sup>9</sup> Bel ir arlar ana kunubus ning a toli taum ana tumtubunla ana pukakiar ning a ben purum pas la mitimo e Ijip, anasa bel la mur anuka kunubus, pa a gilam ris kusun la.

<sup>10</sup> A Leklek i atongi larne: A kunubus ning ar toli taum ana tarai Israel, ana pukakiarla lamur, i mange:

Ar suah tar anuka warkuraila ting na nuknukinla, pa ar tumus tari uting na balanla.

Pa iau a God anunla, pa la anuka tarai.

<sup>11</sup> Bel tik ir asaer ta halna, o ta tasnalik ulak ma larne,



‘Ur tasman a Leklek,’  
 anasa la rop lar tasman iau,  
 a tarai oros ka pa la otleng  
 ning la leklek.

<sup>12</sup> Ar kepsen sen anunla na rongo,  
 pa bel ar nuk ulak pas ma  
 nunla na toltol laulaula.” *Jer*  
*31:31-34*

<sup>13</sup> Ning e God i atong a kunubus  
 ne mang “a tona kunubus”, i tala-  
 por mang a ningnigo na kunubus  
 ka muar. Pa utna i muar pa ka  
 bongnani ono, milau ma sur ir  
 rorom.

## 9

*A ngas a lotu ning i mur a ning-  
 nigo na kunubus*

<sup>1</sup> Ana ningnigo na kunubus, a  
 warkuraila na lotu, pa rumai sel  
 ning di lotu ono te lapiu. <sup>2</sup> Di atur a  
 rumai sel. A ningnigo na tuka ru-  
 mai di atongi mang a pukna ning  
 i Tabu. Tingui ono, a turtur a lam,  
 pa a logo, pa a bret ning di artabar  
 onoi tetek e God. <sup>3</sup> Pa lamur tana  
 areur a kaen na alalar kutus, ning  
 a tuka rumai male ning di atongi  
 mang a pukna ning i Tabu Kol.  
<sup>4</sup> Kaning ono, a logo ning di toli  
 ana gol. Ana logo ning, di sira tun  
 a paura ning a sasawana i toboh  
 wakak. Kaning otleng ana tuka  
 rumai ning, a bok a kunubus ning  
 di ka apatap tar a gol ana risna  
 rop. Pa tingui na tinine bok a  
 kunubus, ning a kap di toli ana gol,  
 ning a mana i kes tingui onoi, pa a  
 bulse ane Aron ning ka gomo\*, pa  
 naur a diah hat ning e God i tumus  
 a Warkuraila on diau. <sup>5</sup> A matana  
 a bok ning, a tena artabarla tetek e  
 God la sira lamir a suluk saot onoi,  
 sur e God ir kepsen a toltol laulau  
 anuna tarai. Naur a manar in naur  
 a akakes kanisaot na bok ning, pa  
 dia asangan a matatar e God. Na  
 dehelindiau i pol alar a bok ning.  
 Ika onone bel a pukakiar sur ar  
 papak ana ututnala rop ne.

<sup>6</sup> Ning di ka sang rop tar a utut-  
 nala tingui na rumai sel, a tena  
 artabarla la kaskas pa la purpu-  
 rum ana pukakiar rop ting na  
 ningnigo na tuka rumai, ning i tur  
 tumo lapiu, sur lar tol anunla titol.

<sup>7</sup> Ika a ningnigo na tena artabar  
 tetek e God, i sot ka, i sira kas  
 muntakai tar ka ana taktakai a  
 rau, uting na naur a tuka rumai  
 ning kaning ui. Bel ir kas oros  
 ka, ir kibas pas ot a suluk, sur  
 ir artabar onoi tetek e God, sur  
 e God ir kepsen anuna na toltol  
 laulaula, pa toltol laulaula otleng  
 anuna tarai ning la tol tari pa bel  
 la tasmani. <sup>8</sup> Ana ututnala ne a Tal-  
 ngan Tabu i apuasa i mang, ning  
 a ningnigo na rumai sel kaning  
 ot i tur, anundala a ngas a kas  
 uting na pukna ning i Tabu Kol  
 belot i sapang. <sup>9</sup> Ine a manar sur  
 a raula ne. A kamkamna mang  
 a artabarla ning bel di tuni pa a  
 artabarla otleng ning di tuni, ning  
 di tabar e God onoi, bel ir atotoh  
 sot pas a nunukin a tena lotu ning  
 i artabar onoi. <sup>10</sup> A warkuraila ne  
 tagun a hangan pa gang pa titolla  
 na munmun. La a warkuraila ka  
 tagun a palaondala. La tur ka tuk  
 ana taem ning e God i atona a  
 ututnala.

*A suluk e Karisito i atotoh a  
 taraila*

<sup>11</sup> Ika e Karisito ka hanot. I a  
 ningnigo na tena artabar tetek e  
 God, ning i warkurai sur a wakak  
 a ututnala, ning kane la ka kes.  
 I kas uting na rumai sel, ning i  
 wakak kol tana ningnigo na rumai  
 sel. Bel a tarai la toli, pa i talapor  
 mang bel miting na akakesla ne  
 te na rakrakan hanua. <sup>12</sup> E Iesu  
 i kas ana pukna ning i Tabu Kol.  
 I tol muntakai tari ka. Bel i kas  
 taum ana suluk na me pa nanatar  
 a bulumakaula sur ir artabar onoi.  
 I kas ana sulukna ot, pa i lou alan-  
 golango pas dala. Pa nuna titol a  
 arlou ning ir kes tikin. <sup>13</sup> Arlar

\* 9:4: Oroi Namba 17:7-8, ning i warwara ona bulse ane Aron ning i gomo.

ana Warkuraila ane Moses, di sira lamir a taraila ana suluk na me pa bulumakaula pa a kubus a natar a bulumakau a hanena, ning di ka tun tari. Di lamir la ning la dur namatana e God, sur ir atotoh a palaonla. <sup>14</sup> Ning i momol mang di atotoh a taraila manglarning, i momol kol ning a suluk e Karisito i atotoh dala! Ana rakrakai a Talngan Tabu ning i kes tikin, Karisito i saran tar anuna lalaun tetek e God. Anuna lalaun bel ta dur onoi. A sulukna i atotoh anundala lalaun kusun a minat a titolla ning dalar hirua ono, sur dalar titol tetek e God ning a lalauna.

<sup>15</sup> Ine a kamkamna ning e Karisito i kes potoro e God pa anuna tarai pa i tol tar a tona kunubus, ning i dat taum tar la. I toli sur a tarai ning e God ka kabah pas la, lar angis tikin arlar ana nuna lele. E Karisito i lou langolango pas la ana sulukna, ning i mat onla. Anuna minat i alangolango pas la kusun anunla na toltol laulaula ning la sira toli, ning a ningnigo na kunubus kaning ot i kes.

<sup>16</sup> Ning tik i mang sur ir warwara talapor mang esining ir kibas pas anuna ututnala lamur ning ir mat, ir tol a kunubus. Ika a kunubus ning bel i to pas ta utna tuk ning a tarai la tasmani mang a barsan ning ka mat. <sup>17</sup> A kunubus ning bel ta titol ning a barsan ning kaning ot i laun. Ika, ning ka mat, tik ir tolsot pasi bot sur ir keles pas a ututnala kaning na kunubus.

<sup>18</sup> Manglarning a ningnigo na kunubus ning e God i toli taum ana tarai, bel i titol oros ka. I titol ot ana suluk ning i apuasa i mang a inagoi i mat. <sup>19</sup> Ning e Moses ka atong arop tar a Warkuraila tana taraila rop, i kibas pas a suluk a nanatar a bulumakaula pa mela, pa i suah taum pasi ana malum. I kibas pas a rakraka rakai ning di atongi ana hisop, ning di ka dot

tari ana kubar a hih a sipsip. I amurung pasi ting na suluk ning, pa i lamir a buk a Warkurai pa a taraila rop onoi. <sup>20</sup> Pa i atongi larne, "Ine a suluk a kunubus, ning e God i warkurai tari mang mulor muri."

*Kisim Bek 24:8*

<sup>21</sup> Mang otleng larning i lamir a rumai sel ana suluk. Pa i lamir otleng a ututnala rop ning la sira titol ono ting na lotu. <sup>22</sup> I momol, a Warkuraila ane Moses i atongi mang dir atotoh a galis a utna ana suluk. Ning a suluk bel ir tapek, e God bel ir kepsen a toltol laulaula.

*A artabar ane Iesu i kepsen anundala na toltol laulaula*

<sup>23</sup> Dir atotoh a rumai sel pa a ututnala tingui na rumai, ana suluk a inagoila. La ning a manar a ututnala saot na langit. Ika a ututnala saot na langit, di atotoh la ana artabar ning i wakak kol tana artabarla te lapiu. <sup>24</sup> Anasa e Karisito bel i kas ting na pukna ning i Tabu Kol, ning a tarai la toli. A pukna ning, a manar ka ana momol a pukna ning i Tabu Kol. I kas usaot na langit pa onone i tur salanigo namatana e God sur dala.

<sup>25</sup> I kas usaot na langit sur ir saran tar i ot sur a artabar tetek e God, takai ka pukakiar. Bel i kas a galis a pukakiar, arlar ana ningnigo na tena artabarla, ning i sira kas ana pukna ning i Tabu Kol ana raula rop ana suluk a inagoila.

<sup>26</sup> Ngandek ning ir manglarning, e Karisito kar hirua a galis a taem, turpasi ot ana kamkama a rakrakan hanua. Ika ana ararop a pukakiarla i hanot muntakai tar ka. I saran tar i ot sur a artabar tetek e God sur ir kamar sen a toltol laulaula.

<sup>27</sup> A taraila rop lar mat muntakai ka, pa lamur lar tur ana warkurai ane God. <sup>28</sup> Mang otleng larning e Karisito i saran tar i ot sur a artabar tetek e God muntakai ka, sur ir kibas maskan sen a toltol laulaula anuna galis a taraila. Pa

ir hanot munaur ulak. Bel sur ir kibas maskan sen a toltol laulaula. Ir hanot sur ir alaun pas la ning la harnanai suri.

## 10

*A artabarla bel lar kepsen a toltol laulaula*

<sup>1</sup> A Warkuraila ane Moses i arlar ka ana manar a wakak a ututnala ning lamur ir hanot, bel a ututnala momol ning. I maining, a Warkuraila ane Moses ning i atongi mang lar sira artabar ana raula rop, bel ir atosot sot pas a taraila ning la han milau tetek e God sur lar lotu teteki. <sup>2</sup> Ngandek ning ir atosot la, bel lar artabar ulak. Anasa a artabarla ning, ir gos totoh a tena lotula, pa a nuknukinla bel ir arup ulak la ana nunla na toltol laulau. <sup>3</sup> Ika, ning la artabar ana raula rop, la nuk ulak pas anunla na toltol laulaula. <sup>4</sup> Anasa a suluk a bulumakaula pa a mela bel la toltot sur lar kepsen a toltol laulaula anuna taraila.

<sup>5</sup> I maining, ning e Karisito i hanot ute na rakrakan hanua, i atongi tetek e God mange, "A artabarla ning bel di tuni pa a artabarla ning di tuni, bel u mang suri, ika u ka sang tar a palaok sur ar artabar ono tetek u.

<sup>6</sup> A artabarla ning di tun arop seni, pa a artabarla otleng tagun a toltol laulaula bel u gas onla.

<sup>7</sup> Pa a atongi mang, 'God, oroi, ia ka hanot, sur ar toltot pas a nuknukim, arlar larning di ka tumtumus tar hok ana num a buk.'" *Buk Song 40:6-8*

<sup>8</sup> A ningnigo na warwara ane Karisito i mange, "A artabarla ning bel di tuni pa a artabarla ning di tuni, pa a artabarla di tun arop seni pa a artabarla ana toltol laulau bel u mang suri, pa bel u gas onla." Ika a artabarla ne di saran tari arlar ana Warkuraila

ane Moses. <sup>9</sup> Lamur e Karisito i atongi mang, "Oroi, ia ka hanot sur ar toltot pas a nuknukim." I kepsen a ningnigona artabarla, sur ir atur a munaurna. <sup>10</sup> E Iesu Karisito i mur sot pas a nuknuk e God ning i saran tar a palaona ot sur a artabar tetek e God. I saran muntakai tari ka. Pa nuna artabar ning i atotoh pas dala namatana e God.

*A artabar ane Karisito i kepsen a toltol laulaula*

<sup>11</sup> A tena artabarla rop la tur pa la tol anunla titol na lotu, ning la sira tun artabar tetek e God. A pukakiarla rop a artabarla ne bel la sira keles la, la arlar ka larne. Pa bel la toltot sur lar kepsen a toltol laulaula. <sup>12</sup> Ika e Karisito i saran tar i ot, a artabar tetek e God sur a toltol laulaula anuna taraila. I tol muntakai tari ka. Anuna titol ning ir kes tikin, pa bel ir tol ulaki. Pa ning ka tol tari, i kes ting na ris a sot a kuna e God. <sup>13</sup> Pa onone kanisaot i kes nanan a pukakiar ning e God ir toltot pas anuna hiruala sur lar kes nahaina. <sup>14</sup> Anasa ona takai a artabar ka, ka atosot tikin tar a taraila ane God, la ning i sira atotoh la.

<sup>15</sup> Pa a Talngan Tabu otleng i warwara talapor tar ono tetek dala. Anuna ningnigo na warwara i mange,

<sup>16</sup> "A Leklek i atongi larne: A kunubus ning ar toli taum onla, ana pukakiarla lamur, i mange:

Ar suah tar anuka warkuraila uting na balanla, pa ar tumus tari ting na nuknukinla." *Jer 31:33*

<sup>17</sup> Pa i atongi otleng mange, "Anunla na toltol laulaula pa anunla na tabun longor ana warkurai bel ar nuk ulak pasi ma." *Jer 31:34*

<sup>18</sup> Ning e God ka kepsen a toltol laulaula pa a tabun longor ana

warkurai, bel di kapan ulak ma sur ta artabar ning ir kepsen a toltol laulaula.

*A minat e Iesu i sapang a ngas sur dalar han milau tetek e God*

<sup>19</sup> Na tastasikla, e God ka kepsen anundala na toltol laulaula, i maining dala langolango pa bel dalar matmataut sur dalar kas ana pukna ning i Tabu Kol, anasa ana suluk e Iesu. <sup>20</sup> A minat e Iesu i sapang a tona ngas ning i han sur a lalaun, sur dalar muri. A ngas ning i han kas uting na kaen a alalar kutus sur a pukna ning i Tabu Kol. A kaen ning, i a palaona e Iesu ot. <sup>21</sup> E Iesu anundala a tnan tena artabar tetek e God ning i tai alar a taraila ane God. <sup>22</sup> Manglarning, dalar han milau tetek e God ana momolna ting na balandala pa a rakrakai a tortorot, pa a nuknukindala ning i langolango kusun a artitui ana toltol laulaula, anasa e Iesu ka lamir totoh tari ana sulukna. Dalar han milau teteki ana palaondala ning ka gos tari ana totoh a malum.

<sup>23</sup> Dalar tur rakrakai ana nundala keskes harnanai ana tortorot sur a ututnala ning e God ir toli, ning dala sira warwara talapor ono. Dalar tur rakrakai, pa gong dala han masuk kusuni, anasa e God ir tol ot a ututnala ning ka lele tar ono. <sup>24</sup> Dalar nuknuk sur al ngas sur dalar amata artalai a nuknukindala sur dalar mang sur a taraila pa dalar tol a wakak a titolla. <sup>25</sup> Gong dala manah kusun anundala na keskes taum ting na lotu, larning dingla na tarai la sira toli. Dalar arakrakai artalai dala, pa dalar rakrakai onoi, anasa mulo oroi mang ka milau sur a pukakiar anuna Leklek ir hanot.

<sup>26</sup> Ning dala ka tasman momol a momolna, ika kanet dala sira mur na toltol laulau, bel ta artabar ulak ma ning ir kepsen a toltol laulaula. <sup>27</sup> Dalar harnanai kama ana matmataut sur a warkurai

ning ir hanot, pa a tnan irnga na iah ning ir tun arop sen a hiruala ane God. <sup>28</sup> Ning ir naur o ir aretol ditol malmaling taum sur ditol ar arup tik mang i gilam ris ana warkurai ane Moses, bel dir marisi, dir umkoli. <sup>29</sup> Ning tik i anatarna pas a Nat e God, pa i nuki mang a suluk ana kunubus, ning di ka atotoh tari onoi i a utna oros ka, pa i atong laulau a Talngan Tabu na marmaris, ir rakrakai kol a warkurai a arkeles teteki. Ir rakrakai kol tana warkurai a arkeles tetek tik ning i tabun longor ana warkurai ane Moses. <sup>30</sup> Anasa dala tasman e God, esaning i atongi mang, "Anuki ka a warkurai a arkeles. Iau ar kelesi." *Lo 32:35*

Pa i atongi otleng larne, "A Leklek ir warkurai anuna taraila." *Lo 32:36*

<sup>31</sup> Ir rakrakai kol a matmataut anuna tik, ning e God a lalauna, ir saran a rakrakai a warkurai a arkeles teteki.

*Dalar tur rakrakai ana tortorot*

<sup>32</sup> Mulor nuk pas a pukakiarla nating ning mulo ka kibas pas a talapor ana numulo na lalaun, pa la saran a tnan mamahat pa a kankan tetek mulo, ika mulo tur rakrakai ot. <sup>33</sup> Al taem dingla na tarai la morot o mulo, pa la akadik mulo namatana taraila. Pa al taem otleng mulo tur taum ana taraila ning di akadik la. <sup>34</sup> Mulo mang kol sur la ning la kes ting na rumai a dodot pa mulo nangan la. Pa mulo gas ka ning a tarai la ras pas anumulo na ututnala, anasa mulo tasmani mang anumulo a ututnala masuk, ning lar tur tikin, pa la wakak kol tana ututnala ning la ras pasi.

<sup>35</sup> I maining, gong mulo matmataut pa gong mulo noren sen anumulo a rakrakai a tortorot, anasa ir itna kol anumulo a arlou ono. <sup>36</sup> Gong mulo ngoro, mulor tur rakrakai sur mulor mur a nuknuk e God, pa lamur mulor

kibas pas a ututnala ning ka lele tar ono. <sup>37</sup> Anasa a Buk Tabu i atongi larne,

“Milau kama,

esaning ir hanot, ir hanot ot, pa bel ir bongnani.

<sup>38</sup> Ika esining i tortorot, ar atongi mang anuka tena tostos pa ir laun.

Pa ning ir susur ulak kusun a tortorot,

bel ar gas ono.” *Hab 2:3-4*

<sup>39</sup> Ika dala, bel dala miting onla ning la susur ulak kusun a tortorot pa la hirua. Dala miting na tarai a tortorot, pa e God ka alaun pas dala.

## 11

### *Asa ning a tortorot?*

<sup>1</sup> Ning tik i tortorot a kamkamna larne, ka tasman momoli mang, a utna ning i harnanai suri, ir kibas pasi ot. Belot i oroi, ika i tasmani mang i momol ot. <sup>2</sup> Na ningnigo ning la laun nating la tortorot manglarning, pa e God i gas onla, anasa ana nunla tortorot.

<sup>3</sup> Ana tortorot dala tasmani mang e God i akes a rakrakan hanua ana nuna warwara. Pa a ututnala rop ning dala oroi, e God i toli kusun a ututnala ning bel di oroi.

<sup>4</sup> Ana tortorot, e Abel i saran tar a artabar tetek e God ning i wakak kol tana artabar ane Kaen. Ana nuna tortorot e God i atongi a tena tostos, ning i atong angis pasi ana nuna artabar. A momolna e Abel ka mat, ika, kanet i warwara tetek dala, anasa ana nuna tortorot.

<sup>5</sup> Ana tortorot, e God i kepsen e Enok sur gong i kilang a minat. Bel di oroi ulaki ma, anasa e God ka kibas pasi. Ning e God bel i kibas pasi ot kaba, i gas kol o e Enok. <sup>6</sup> Ning tik bel i tortorot, e God bel ir gas lar pas onoi. Anasa esining i mang sur ir han tetek e God, ir tortorot mang e God i kes, pa ir tortorot otleng mang e God

ir saran a arlou tanla ning la tai momol suri.

<sup>7</sup> E Noa i longor a atumarang ane God teteki ana ututnala ning ir hanot ning belot di oroi. Pa ana tortorot, i hanrawai e God pa i mur anuna warwara, pa i tol a sip, ning i alaun pas latamana. A tortorot ane Noa i atalapor a toltol laulaula anuna tarai te na rakrakan hanua, pa e God i warkurai la ono. Pa e God i atong e Noa a tena tostos, anasa ana nuna tortorot.

<sup>8</sup> Ana tortorot, e Abaram i longor tetek e God ning i kabah pasi sur ir han uting na pukna ning lamur ir hanot a hanua ngasna. I han, ika bel i tasman a pukna ning i han suri. <sup>9</sup> Ana tortorot i kes arlar ana wasira ting na pukna ning e God ka lele tari sur a hanua ngasna. A lele ning e God i lele onoi tetek e Abaram, lamur i kes otleng tetek e Aisak pa e Jekop. E Abaram la, la laun ka ana rumai sel. Mang otleng larning tetek e Aisak pa e Jekop. <sup>10</sup> E Abaram i kes larne, anasa i tatatai sur a hanua ning ir kes tikin. A hanua ning e God ot ka sang tari pa ka tol tari.

<sup>11</sup> E Abaram dia ma e Sara dia ka bun pa e Sara i pombo. Ika, ana tortorot, e Abaram i tolsot sur ir aitna pas ta kaklik, anasa i tasmani mang e God ning ka lele tar teteki ir tolsot pasi ot. <sup>12</sup> Manglarning anuna mangis a tarai la galis arlar ana nangnangla saot na solsol, pa i arlar otleng ana woio tumo latasi, ning bel dir was sot pasi. La hanot ka on takai a barsan ning i bun laulau.

<sup>13</sup> A taraila rop la tortorot tuk ning la mat. Ning la laun te lapiu, bel la tong akes a ututnala ning e God ka lele tar ono. La oroi ka miting bakbak, pa la gas onoi. Pa la atong puasa i mang la na wasira ka, pa lar laun siklik pas ka te na rakrakan hanua. <sup>14</sup> Ning la atongi larne, i talapor mang la tatatai sur anunla ta hanua. <sup>15</sup> Ngandek ning

lar nuk ulak pas a hanua ning la ka han kusuni, lar tolsot sur lar han ulak suri. <sup>16</sup> Ika a nuknukinla sur a hanua saot na langit, a hanua ning i wakak tana hanua ning la ka han kusun tari. I maining e God bel i meme sur lar atongi mang ai anunla God, anasa ka sang tar a hanua sur la.

<sup>17-18</sup> Ana tortorot, e Abaram i saran tar e natnalik, e Aisak tetek e God arlar ana artabar, ana pukakiar ning e God i tohoi. A momolna, e God ka tol tar anuna lele tetek e Abaram mange, "A tumtubumla lar hanot o e Aisak." *Stat 21:12*

E Abaram, esaning e God ka lele tari larne, i sang sur ir umkol e natnalik takai sot ka, arlar ana artabar, bel i longor puaini. <sup>19</sup> E Abaram i tasmani mang e God i tolsot pasi sur ir akamtur ulak pas a minatla. Momol, i arlar ot larning e Abaram i kibas ulak pas e Aisak kusun a minat.

<sup>20</sup> Ana tortorot, e Aisak i atong angis tar e Jekop pa e Esau ana ututnala ning ir hanot lamur.

<sup>21</sup> Ana tortorot, e Jekop, ning milau ir mat, i atong angis tar naur a nat e Josep. I sukul hat pasi ana nuna bulse pa i lotu tetek e God.

<sup>22</sup> Ana tortorot, e Josep, ning milau ir mat, i warwara ana tinan purum ana tarai Israel mitimo e Ijip, pa i atai tar la mang lar kibas na sursurna ning lar han.

<sup>23</sup> Ana tortorot, e tamana e Moses pa e tana dia bunuri natola kalang lamur tana nuna agon, anasa dia oroi mang a wakak a kaklik, pa bel dia matatan a warkurai anuna king.

<sup>24</sup> Ana tortorot, e Moses, ning ka barman, bel i malmaling sur dir atongi mang di tana ma e nat e Pero. <sup>25</sup> I aslang pasi sur ir kilang kankan taum ana tarai ane God, pa bel i mang sur ir mur na toltol laulau ning anuna gasgas bel ir bongnani. <sup>26</sup> I nuki mang a

meme ning ir kilangi ana risana e Karisito i wakak kol tana gongonla tumo e Ijip, pa a matana i abit kol, anasa i nuknuk sur anuna arlou lamur. <sup>27</sup> Ana tortorot, e Moses i han mitimo e Ijip, pa bel i matatan a balakut ana king. I tur rakrakai anasa ka oroi tar e God, esaning bel di oroi. <sup>28</sup> Ana tortorot, e Moses i tol a lotu na Han Lakai, pa i arsune sur dir lamir a ris a taman ana suluk, sur a angelo na minat gong i umkol na natnat a tarai Israel, na kakak barsan ning di agon nigon la.

<sup>29</sup> Ana tortorot, a tarai Israel la kotop ting na Kubar a Tasi larot ning ka masmasa. Ika ning a tarai Ijip la lar a tinan larning, la dom rop.

<sup>30</sup> Ana tortorot, a woroh na hat ning i tur talilis a hanua Jeriko i tarege purum, ning a tarai Israel la ka han talilisi mais a pukakiar.

<sup>31</sup> Ana tortorot, e Rehap, a pamuk a hane bel i hirua taum ana tarai Jeriko ning bel la longor tetek e God, anasa i gas pas naur a tena tatatai kumna nigo anuna tarai Israel.

<sup>32</sup> Pa asa ulak ma ar atongi? Ir bongnani ot ning ar ususrai o e Gidion, Barak, Samson, Jepta, Dewart, Samuel, pa propetla otleng.

<sup>33</sup> Ana tortorot a tarai ne la harum taum ana matanitula masik pa la tolsot pas la rop. La tol a tostos a toltol, la kibas pas a ututnala ning e God ka lele tar la ono, pa la tong alar a pahana laionla. <sup>34</sup> La umkol a irnga na iah, pa la laun ot kusun a liwan na harum. La ning bel la rakrakai, e God i arakrakai la, la kibas rakrakai sur a harum pa la alulu a tarai a harum miting na matanitula masik.

<sup>35</sup> Ana tortorot, na gurarala la gas pas na mainla ning la ka laun ulak kusun a minat. Dingla na tarai otleng di akadik laulau la, tuk ning la mat, anasa bel la mang sur lar puai kusun e God sur dir pak

sen la. La nuk pas a lalaun ulak kusun a minat ning i wakak kol tana lalaun te na rakrakan hanua.<sup>36</sup> Dingla na tarai di morot onla pa di miras la. Dingla otleng di dot la ana senla pa di akas la ting na rumai a dodot.<sup>37</sup> Di wolot amat la ana hatatla, di kot kutus la sur naur a tuk, di so amat la ana liwan a harum. Dingla na tarai la mermer ka ana palaona sipsip pa palaona me, la kapan kol, di akadik la pa di alaulau la.<sup>38</sup> A toltol anunla ning la tortorot i wakak tana toltol anuna tarai mite na rakrakan hanua, pa bel i arlar sur lar laun na arpotor tanla. La laun taltal ana hanua bel, pa a mangirla, kulamla pa tungla.

<sup>39</sup> La rop ne, e God i gas onla anasa ana nunla tortorot. Ika bel la tong akes a ututnala ning e God ka lele tari tanla,<sup>40</sup> anasa e God ka sang tar a utna ning i wakak kol sur dala rop. Bel i mang sur ir atostos nigon la ka. I mang sur ir atostos taum pas dala pa la.

## 12

*E God i sira atostos na natnatnala*

<sup>1</sup> Dala tasmani mang a galis a tena tortorot tagun nating la tur talilis dala pa la oroi dala. I maining i wakak ning dalar kepsen a mamahat a utna ning i sira sairas dala ana nundala a tinan, pa a toltol laulaula ning i sira dot akes dala. Pa dalar dun, pa gong dala ngoro ana ardune ana nundala arsoxsok, ning e God ka sang tari sur dala.<sup>2</sup> Dalar tai tostos sur e Iesu, esaning i nigon dala ana toltol na tortorot, pa esaning ir agomo pas anundala tortorot tuk ir kidol. E Iesu i mat saot na rakai kutus, a utna na meme momol. Ika bel i nuk pas a meme ning, i saran tar i ot sur ir kilang kankan pa ir mat saot na rakai kutus, anasa i tasmani mang lamur ir kibas a tnan gasgas. Pa onone ka kes ting

na ris a sot na keskes a king ane God.

<sup>3</sup> Mulor nuk pas e Iesu, esaning i kilang a mamahatla, ning a tena laulaula la toli onoi, sur gong mulo ngoro pa gong mulo manah ana tortorot.<sup>4</sup> Mulo harum ana toltol laulaula, ika belot di umkol mulo.<sup>5</sup> Mulo ka duman sen a warwarala na arakrakai ning e God i atongi tetek mulo a natnatnala larne,

“Natuklik, ning a Leklek i atostos u,  
gong u nuki mang a utna oros ka,  
pa gong u bulnga ning i atong puasa anuma toltol laulaula tetek u.

<sup>6</sup> Anasa a Leklek i atostos la ning i maris la,  
pa i dapis la ning i atong la mang na natnatnala.” *Sindaun 3:11-12*

<sup>7</sup> Mulor tur rakrakai ana mamahatla, anasa ine a ngas ning e God i atostos mulo ono. Anuna titol ning i arlar ana titol ning a barsan i sira toli o e natnalik. Anasa esi na kaklik ning e tamana bel ir atostosi?

<sup>8</sup> E God i sira atostos a natnatnala rop. Pa ning bel i atostos mulo, i talapor ning bel mulo a natnatnala momol, di agon oros tar mulo ka ting na ngas.<sup>9</sup> Na tamtamandala mite na rakrakan hanua la atostos dala, pa dala ka hanrawai tar la ana nunla na toltol ne tetek dala. Ning dala toli larne, i momol kol mang dalar longor otleng tetek a Tamana ingundala, ning i atostos dala, pa dalar laun.<sup>10</sup> Na tamtamandala mite na rakrakan hanua la atostos dala, arlar ana ngas ning la nuki mang i wakak. Pa anunla titol ne bel i bongnani. Ika e God i atostos dala sur dalar wakak, pa dalar tong akes a totoh a toltol, arlar ot onoi.<sup>11</sup> Ana taem ning e God i sira atostos dala, bel dala gas onoi, dala sira kilang ka a kankan. Ika lamur la ning e God i atostos la pa la longor ana nuna asasaerla,

lar sol a molmol pa a tostos a toltol ting na nunla lalaun.

<sup>12</sup> I maining mulor arakrakai na kumulo ning bel i rakrakai pa na hamulo otleng. <sup>13</sup> Pa “mulor han ana tostos a ngasla,” *Sindaun 4:26* sur a hamulo ning bel i rakrakai gong i talabus, ir wakak ulak ka.

*A atumarang sur dalar longor tetek e God*

<sup>14</sup> Mulor rakrakai sur mulor kes na molmol taum ana taraila rop, pa mulor mur a totoh a toltol. Ning a lalaun ana tik bel i totoh, bel ir oroi a Leklek. <sup>15</sup> Mulor tai alar mulo, sur gong tik i han masak kusun a marmaris ane God, pa i arlar ana wakir a rakai ning i mapak, ning ir gomo ot pa ir saran a mamahat ta mulo, pa ir adur pas al galis namatana e God. <sup>16</sup> Mulor tai alar mulo, sur gong tik i tol a pamuk a toltol, pa gong tik i nuknuk oros ana nuknuk e God teteki, arlar o e Esau. E Esau a ningnigo na nat e Aisak ning lamur ir kibas a galis a gongonla ane tamana, ika i siuran sen anuna keskes a ningnigo sur ning a pelet a utna ka. <sup>17</sup> Mulo ka tasmani mang lamur ning i mang sur ir kibas ulak a warwara na angangis ta e tamana, e tamana i puain seni kama. A momolna, i domos sur ir kibas ulak pas a warwara na angangis ning, ika bel i pastek ulak pas ta ngas sur ir lingir asaning ka tol tari.

<sup>18</sup> Bel mulo hanot saot na mangir Sinai arlar ana tarai Israel. A mangir ning la tolsot sur lar tuki. A iah i irnga tingia, pa la oroi a mormorom pa a mutmut a langit pa tnan wuwu. <sup>19</sup> La longor a elngena tawuru, pa a elngen takai ning i warwara. Ning la longori, la nunungi mang gong ulak ma i warwara tetek la, <sup>20</sup> anasa la matmataut kol ana warkurai larne, “Ning ta barsan o ta inagoi, ir tuk a mangir ning, dir wolot koli.” *Kisim Bek 19:12-13*

<sup>21</sup> A ututnala ning la oroi, i amatmataut kol la, pa e Moses i atongi mang, “A matmataut, pa koloron.” *Lo 9:19*

<sup>22</sup> Ika, mulo ka hanot saot na mangir Saion, e Jerusalem saot na langit, a hanua ane God, ning a lalauna. Mulo ka hanot tetek a galis a angelola kol ning bel dir was lar pas la, ning la kes taum ana gasgas. <sup>23</sup> Mulo ka hanot ana keskes taum anuna ningnigo na natnat e God, la ning di ka tumus tar na risanla saot na langit. Mulo ka hanot tetek e God, esaning a tena warkurai ana taraila rop, pa tetek a inguna tena tostosla, ning e God ka atostos kol la, <sup>24</sup> pa tetek e Iesu, esaning i tol tar a tona kunubus taum ondala, pa tetek a sulukna, ning di ka lamlamir tar ono. A suluk ne i warwara ana utna ning i wakak kol tana ututnala ning a suluk e Abel i warwara onoi.

<sup>25</sup> Mulor tai alar mulo, sur gong mulo gilam ris kusun e God ning i warwara. Nating a tarai ning bel la longor teteki ning i atumarang la saot na mangir Sinai, bel la dun kumna lar pas kusun a warkurai a arkeles. Pa i momol kol, dala otleng, bel dalar dun kumna lar pas, ning dala gilam ris ka kusun esaning i atumarang dala misaot na langit. <sup>26</sup> Ning e God i warwara tetek a tarai Israel saot na mangir Sinai a elngena i kunran a rakrakan hanua. Ika onone, ka lele tar larne, “Lamur ar kunran muntakai ulak a rakrakan hanua, pa bel a rakrakan hanua ka, a langit otleng.” *Hag 2:6*

<sup>27</sup> Ning e God i atongi mang ir kunran muntakai ulaki, i asangani mang ir kepsen a ututnala ning i gulgule ka, a ututnala ning ka akes tar la. Ir kepsen la sur a ututnala ning bel dir kunran sot pas la, lar kes ot.

<sup>28</sup> I maining dalar atong wakak tetek e God, anasa dala ka tong



akes a matanitu ning bel ir gul-gule. Dalar lotu tetek e God ana hanrawai pa a matmataut ning i arlar ana nuknukna, <sup>29</sup> anasa anundala God i arlar ana tnan irnga na iah, ning ir ien arop sen a ututnala rop.

## 13

*A toltol ning e God ir gas ono*

<sup>1</sup> Gong mulo manah ana marmaris artalai tetek mulo, arlar o mulo na kabaitas ana tortorot. <sup>2</sup> Mulor sira gas pas a wasirala ting na numulo na rumai. Anasa dingla na tarai ning la tol a toltol ning, la ka gas pas a angelola, ika bel la tasmani. <sup>3</sup> Mulor nuk pas la ning la kes ting na rumai a dodot, arlar larning mulo dodot taum otleng onla. Mulor nuk pas la otleng ning di alaulau la, arlar larning di alaulau mulo otleng.

<sup>4</sup> I wakak ning mulo rop, mulor hanrawai a keskes a tinaulai, pa gong ta dur a toltol ir kes ono. Anasa e God ir warkurai tik ning i tol a laulau a toltol ana ta hane ana tik, pa tik otleng ning i tol a pamuk a toltolla.

<sup>5</sup> Mulor tai alar mulo sur mulor langolango kusun a tnan nuknuk sur a mani. Mulor gas ka ana artabar ane God ning ka kes tetek mulo. Anasa i ot ka atong tari larne,

“Bel ar noren sen u,  
pa bel ar han kusun u.” *Lo*  
*31:6*

<sup>6</sup> I maining bel dalar matmataut, dalar atongi ka larne,

“A Leklek anuka tena harnangai,  
pa bel ar matmataut.  
Asa ning a tarai lar toli hok?” *Buk*  
*Song 118:6-7*

<sup>7</sup> Mulor nuk pas anumulo na ningnigo, ning nating la asaer mulo ana warwara ane God. Mulor nuk pas anunla ngas a lalaun, pa mulor mur anunla tortorot. <sup>8</sup> E Iesu Karisito bel ir ries. Nating,

onone pa lamur pa bel ir rarop, e Iesu Karisito i arlar ka.

<sup>9</sup> Gong mulo mur a urmatana ngas a asasaerla ning ir ben rongon mulo. I wakak ning a marmaris ane God ir arakrakai a ingundala. Ning dala mur a warkuraila ana utna na hangan bel ir arakrakai a ingundala, pa bel ir nangan la ning la muri.

<sup>10</sup> Ika anundala logo na tun artabar kaning. A tena artabarla tetek e God, ning la titol ting na rumai sel, bel tik i malmaling sur lar hangan ana anundala logo na tun artabar. <sup>11</sup> A ningnigo na tena artabarla tetek e God i sira kibas kas a suluk a inagoila ting na pukna ning i Tabu Kol, sur a artabar ning ir kepsen a toltol laulaula. Ika, a kidol a palaona inagoila di tun sen la tumo lapiu na hanua. <sup>12</sup> Mang otleng larning e Iesu i kilang kankan pa i mat tumo lapiu na woroh na tnan hanua, sur ir atotoh a tarai ana sulukna ot. <sup>13</sup> I wakak ning dalar han teteki kaning ot lapiu na hanua, pa dalar kilang meme taum onoi. <sup>14</sup> Anasa bel anundala ta hanua te ning ir kes tikin. Dala tai sur a hanua ning lamur ir hanot.

<sup>15</sup> I maining, ana pukakiarla rop dalar atong leklek pas e God, ana risana e Iesu. A atong leklek ne i arlar ana artabar ning dala sarani tetek e God, ning a pahandala i apuasa a risana. <sup>16</sup> Gong mulo dumdumai sur mulor tol a wakak a titol pa mulor tabar a tarai. Ning mulo toli larning, i arlar ana artabar tetek e God ning i gas ono.

<sup>17</sup> Mulor longor tetek anumulo na ningnigola, pa mulor anatarna mulo nahai a nunla na warkurai, anasa la tai alar mulo, pa lamur lar warwara talapor namatana e God ana nunla titolla tetek mulo. Mulor longor tanla sur lar gas ana nunla titolla, pa bel lar titol taum ana bal mamahat. Anasa ning la

titol taum ana bal mamahat bel ir nangan mulo.

<sup>18</sup> Mulor nunung omila. Mila tasman momoli mang a nuknukimila bel i arup mila on ta utna, pa mila mang sur anumila a lalaun ir tostos ana ututnala rop. <sup>19</sup> Pa a nunung rakrakai mulo, sur mulor nunung, sur e God milau ir sune ulak iau tetek mulo.

*A nunung sur a harnangai ane God*

<sup>20</sup> A nunung e God ning i sira saran a molmol. Esaning i akamatur ulak pas anundala Leklek e Iesu kusun a minat. E Iesu, i a tnan tena tai alar a sipsip ning i mat pa i saran tar a sulukna ot sur ir tol a kunubus ning ir kes tikin. <sup>21</sup> A nunung e God sur ir tabar mulo ana wakak a ututnala rop, sur mulor mur a nuknukna. A nunung otleng, mang ana titol ane Iesu Karisito, e God ir awakak dala arlar ot ana nuknukna. Dalar atong leklek pas e Iesu Karisito, bel ir rarop pa bel ir rarop. Amen.

*A ararop a warwara na marmaris*

<sup>22</sup> Na tastasikla, a nunung mulo sur mulor longor wakak a warwara na harnangai ne, anasa a pas ne a tumusi tetek mulo bel i barah. <sup>23</sup> Ar atai mulo mang, a tasindala e Timoti, di ka apurum seni kusun a rumai a dodot. Ning ir hanot kapit ute, miau rop miar hanot tetek mulo.

<sup>24</sup> Mulor saran anumila marmaris tetek anumulo na ning-nigola rop, pa tetek a taraila rop ane God. La otleng mitimo e Itali la saran anunla marmaris tetek mulo.

<sup>25</sup> A marmaris ane God ir kes tetek mulo rop.

## A Pas ane Jems

### *A warwara talapor nigo*

E Jems i tumus a pas ne. A galis a tena tastasmai la nuki mang i a tas e Iesu (oroï Mt 13:55). E Jems i ning a ningnigo anuna tarai a lotu saot e Jerusalem (oroï Ap 15:13, 21:18).

I tumus a pas ne tetek a tena tortorotla, ning la pastetek a galis a mamahat tana tarai ning bel la tortorot. La lu sen na tena tortorot. Pa lamur na tena tortorot la kes na wasira ting na hananuala.

Ana pas ne i warwara ana wakak a toltol ning a tena tortorotla lar muri. I atai dala otleng mang anundala a wakak a toltol i amomol anundala a tortorot.

### **A tinan ana buk Jems:**

A kamkama a buk ne (1:1)

A tortorot pa a tastasmai (1:2-8)

A kapan na tarai pa na tena gongon (1:9-11)

Dalar tur rakrakai ning a alam ir hanot (1:12-18)

A longlongor (1:19-27)

Dalar hanrawai a tarai rop (2:1-13)

A wakak a titol i han taum ana tortorot (2:14-26)

A laigeremindala (3:1-18)

A atumarang tetek la ning la mang sur a toltol mite na rakrakan hanua (4:1-5:6)

Dalar tur rakrakai ana tortorot (5:7-20)

<sup>1</sup> Iau e Jems, a tena titol oros ane God pa a Leklek e Iesu Karisito, a tumus a pas ne tetek mulo, ning a bonot pa naur a mangis a tarai Israel, ning mulo kes sarara arpotor tana tarai miting na matanitula. A marmaris tetek mulo.

### *A tortorot pa a tastasmai*

<sup>2</sup> Na tastasikla, ning al ngas a mamahat ir hanot tetek mulo, mulor gas, <sup>3</sup> anasa mulo tasmani

mang ning mulo pastek a mamahatla ning di lar anumolo a tortorot onoi, ir aitna anumolo a tuntunur rakrakai. <sup>4</sup> Ning mulor tur rakrakai, anumolo na lalaun rop ir tostos, pa bel mulor kapan sur ta utna na ingun.

<sup>5</sup> Ning tik o mulo i kapan sur a mananos, i wakak ning ir nunung e God suri. Pa e God ir tabari onoi, anasa i sira tamtabar dala rop, pa bel i sira san alar ta utna. Pa bel i sira balakut tetek tik ning i nunungi. <sup>6</sup> Ika ning ir nunung, ir nunung ana tortorot, pa gong i urmatana nuknuk, anasa esining ir urmatana nuknuk i arlar ka ona top, ning a wuwu i wus taltali. <sup>7</sup> A barsan ning i urmatana nuknuk, gong i nuki mang ir kibas ta utna tana Leklek. <sup>8</sup> Anasa i naur a nuknukna, pa bel ir tur rakrakai ana nuna titol rop.

### *A kapan na barsan pa a tena gongon*

<sup>9</sup> Ta tasindala ana tortorot ning ir tong akes ta natar a utna ka te lapiu, i wakak ning ir gas ka, anasa e God ot ir aleklek pas a barsan ning. <sup>10</sup> Ika ta tena gongon, ir gas ka ning e God ir anatar na seni. Anasa anuna lalaun i arlar ka ana sar a rakai, ir rorom ka. <sup>11</sup> Pa a kamis i hanot taum ana laplapangna, i rang a rakai, pa sarna ir punga, pa a wakak a tatatai ono ir rop. Arlar ka otleng ana tena gongon, ir rorom ning ir molot ot ana nuna gongonla.

### *E God bel i sira alam tik*

<sup>12</sup> A barsan ning i tolsot pas a arlam, pa i tur rakrakai, i angis. Anasa esaning i tolsot pas a ututnala ning di lar anuna tortorot onoi, ir kibas pas a kukuh na lalaun tikin, ning e God i lele tar sur ir sarani tanla rop ning la mang suri.

<sup>13</sup> Ning a arlam ir hanot tetek tik, gong i atongi mang e God i alami. Anasa e God bel ta toltol

laulau ir alam lar pasi, pa e God ot bel ir alam tik. <sup>14</sup> Ika, a taraila rop, taktakai, anunla a laulau a nuknuk ot i alam pas la pa i dat la sur lar tol a toltol laulau. <sup>15</sup> Lamur, ning anunla a laulau a nuknuk ir itna, ir agon otnan pas a toltol laulau. Ning a toltol laulau ir itna, ir agon otnan pas a minat.

<sup>16</sup> Na wakak a tastasikla, gong mulo noren tar tik sur ir asongo mulo. <sup>17</sup> Na wakak a artabar rop, ning la tostos, la han purum misaot na langit. La hanot ta e Tata, esaning i akes a kamis, a kalang pa a nangnangla. Ika e Tata bel i arkeles pa bel i ries a magirana lar a kamis, ning i sasai ana kabakiar pa morom bel. <sup>18</sup> Ana nuknukna ot, i agon tona dala ana nuna warwara momol. I aslang pas dala kusun a akakesla rop, sur dala anuna tarai ot, arlar ana ningnigo na wana rakai ning di sira artabar onoi teteki.

*Dalar longor a warwara ane God pa dalar muri*

<sup>19</sup> Na wakak a tastasikla, mulor tasman a utna ne: I wakak ning mulo rop, mulor longlongor kapit, pa gong mulo iapiap sur mulor warwara, pa gong mulo iapiap sur mulor balakut. <sup>20</sup> Anasa a balakut anuna tik bel ir tol otnan a tostos a toltol ning e God i mang suri. <sup>21</sup> Mulor manah kusun a dur a toltol pa na toltol laulau ning kane i bukus te na rakrakan hanua. Pa mulor anaterna pas mulo ning mulo kibas a warwara ning di ka oman tari ting na balamulo, a warwara ane God ning ir alaun lar pas mulo.

<sup>22</sup> Mulor mur a warwara ane God, pa gong mulo longor oros tari ka, sakana mulor asongo ulak pas mulo ot. <sup>23</sup> Esining i longor oros tar ka a warwara ane God, pa bel i muri, i arlar ka ana barsan ning i oroi a manarna ting na galas. <sup>24</sup> Ning i han masik, aiap ka i duman sen a manarna i tai

mangmangasa. <sup>25</sup> Ika ning tik ir longor wakak a tostos a warkurai ane God, ning i alangolango a tarai, pa ir sira muri, pa bel i duman, a barsan ning i angis ana nuna titol.

<sup>26</sup> Ning tik ir nuki mang i a momol a tena lotu, ika bel i tumarang a laigeremna kusun a laulau a warwara, anuna lotu i utna oros ka, pa i asongo pasi ot. <sup>27</sup> Ika ning dala nangan a nat a biasuila, pa a laola ning la pot na marmaris, pa ning dala tumarang dala otleng kusun a dur a toltol mite na rakrakan hanua, ine i a tostos a lotu, pa bel ta utna i rongo ono namatana e God a Tamandala.

## 2

*Gong dala purpurngis*

<sup>1</sup> Na tastasikla, mulo ning mulo tortorot ana nundala a Leklek e Iesu Karisito, a Leklek na matatar, gong mulo purpurngis. <sup>2</sup> Ning tik ir kas uting na numulo a kiwung a lotu pa ir suah ta ring ning di toli ana gol pa ir mermer ona wakak a kaen, pa ning ta kapan a barsan otleng ir kas ana muar a kaen, <sup>3</sup> pa mulo hanrawai ka tetek esining ir mermer ona wakak a kaen pa mulo atongi tana mang, “Ur kes te na wakak a keskes.” Pa mulo atongi ka tetek a kapan na barsan mang, “Ur tur ot ting ia” o “Ur kes ting lain napir naur a hak.” <sup>4</sup> Ning mulo toli larne, mulo purpurngis, pa mulo hanot a tena warkuraila ka ana laulau a nuknukimulo.

<sup>5</sup> Na wakak a tastasikla, mulor longor iau: I mangasa, bel mulo tasmani mang e God i aslang pas a kapan a tarai te lapiu, sur lar tena gongon ana tortorot? Lar kibas pas a matanitu ning e God i lele tar sur ir sarani tanla rop ning la mang suri. <sup>6</sup> Ika mulo, mulo ame ka a kapan a tarai. I mangasa, ngandek bel mulo tasmani mang na tena gongon la sira warkurai

laulau mulo ana rakrakainla? Pa la dat pas mulo sur mulor tur ana warkurai. <sup>7</sup> Mulor tasmani ot mang la sira atong laulau a wakak a risana e Iesu esaning mulo anunai.

<sup>8</sup> Mulor tolsot pas a warkurai ning e God, a king, i saran tari, ting na Buk Tabu. I atongi larne,

“Ur mang sur a halim larning u mang sur u ot.” *Liwai 19:18*

Ning mulor toli larne, mulo tol a tostosna. <sup>9</sup> Ika ning mulo purpurngis, mulo tol a toltol laulau. Pa a Warkuraila ane God ir tiu sot pas mulo mang, mulo na tena kutus warkurai. <sup>10</sup> Ning tik ir mur a warkuraila rop, ika i kutus takai ka, dir warkurai i arlar larotning i kutus a Warkuraila rop. <sup>11</sup> E God i atongi mang, “Gong u tol a toltol laulau ana ta hane anuna tik o ta barsan anuna tik,” pa i atongi otleng larne, “Gong u umkol tik.” Pa ning bel u tol a toltol laulau ana ta hane anuna tik, ika u umkol tik, u a tena kutus warkurai.

<sup>12</sup> Mulor nuk pasi, e God ir warkurai mulo ana warkurai ning i sira alangolango a tarai. I wakak ning anumolo a warwara pa anumolo na titol otleng ir mur a warkurai ning. <sup>13</sup> Anasa esining bel i lasan ana marmaris, ana pukakiar a warkurai e God otleng bel ir marisi. Ika esining ir lasan ana marmaris, e God ir marisi ana pukakiar a warkurai.

*A tortorot ning i han taum ana wakak a titol*

<sup>14</sup> Na tastasikla, ir wakak mangmangasa ning tik ir atongi mang i tortorot, ika bel i tol ta wakak a titol? I mangasa, a ngas a tortorot ning ir alauni o bel? <sup>15</sup> Ning tik ta tasindala, ta hane o ta barsan, bel anuna ta kaen pa i kapan sur ta utna na hangan, <sup>16</sup> pa tik o mulo ir atongi tana mang, “Ur han ana bal

molmol, ur mermer pa ur masur,” ika ning bel ir tabari ana ta utna ning i kapan suri, a warwara ning ir nangan mangasa i? <sup>17</sup> Larka otleng ning ana tortorot, ning bel i han taum ana ta wakak a titol, a tortorot ning a minatna ka.

<sup>18</sup> Ning tik ir atongi mang, “Dingla la tortorot, pa dingla otleng la tol a wakak a titol.” Ika iau, ar atongi mang, ur apuasa toh anuma tortorot tetek iau, ning bel ta wakak a titol i han taum ono. Pa iau ar apuasa anuka tortorot tam ana nuk a wakak a titolla. <sup>19</sup> U tortorot mang takai ka a God. I wakak. A motla otleng la tortorot onoi larne, pa la matmataut pa la koloron.

<sup>20</sup> U a longlong! I mangasa, u mang sur ar asangani tam mang, a tortorot ning bel ta wakak a titol onoi, i utna oros ka? <sup>21</sup> Di atong a tamandala, e Abaram, mang i tostos namatana e God, anasa ana nuna titol ning i saran tar e natalik, e Aisak, arlar ana artabar tetek e God ting na logo na artabar ning i toli ana hatatla. <sup>22</sup> Ur oroi i, anuna tortorot i han taum ana nuna wakak a titolla. Pa ana nuna titol, a tortorot anunai i bot kidol. <sup>23</sup> Pa di tolsot pas a warwara ting na Buk Tabu larne, “E Abaram i tortorot o e God, pa e God i atongi mang i tostos.” *Stat 15:6*

Pa e God i atongi otleng mang a halna. <sup>24</sup> Mulo oroi i, e God ir atong ta barsan mang a tena tostos ana nuna wakak a titolla, pa bel ana nuna tortorot ka.

<sup>25</sup> Larka otleng ning tetek e Rehap, a pamuk a hane. Ika e God i atongi mang i tostos namatana, ana nuna titol, ning i tai alar naur a barsan ning e Josua ka sune tar diau, pa i sune kumnan sen diau ulak ana ning a ngas masik\*.

\* **2:25:** E Josua i sune sen naur a barsan sur diar oroi kumnan a hanua Jeriko pa dingla na pukna otleng, sur lamur ir nigon a tarai Israel sur lar harum pa lar kibas a hananuala ning. Oro i e Josua sapta 2 pa 6 ting na Buk Tabu.

<sup>26</sup> Tik ning a inguna i han kusuni, i a minatna. Larka otleng a tortorot, ning bel ta wakak a titol onoi, a minatna ka.

### 3

#### *A laigeremindala*

<sup>1</sup> Na tastasik, gong al galis o mulo la hanot na tena asaering na lotu, anasa mulo tasmani mang, a warkurai ane God tekemila, na tena asaer, ir rakrakai kol tana warkurai tetek a tarai masik. <sup>2</sup> Dala rop dala rongo ana galis a utna. Ika, ning tik bel i rongo on ta utna ana nuna warwara, esaning i tostos kol, pa i tolsot pasi sur ir tai alar anuna lalaun rop.

<sup>3</sup> Ning dalar suah a natar a diah aen ting na pahana hos, sur ir longor tandala, dalar tolsot sur dalar dat lingir pas a kidol a hos onoi. <sup>4</sup> Mulor oroi i otleng a sip sel. I itna kol, pa na rakrakai a wuwu la aduni, ika dir atostosi ka ana natar a stia, sur ir mur a nuknuk a kipten.

<sup>5</sup> Larka otleng a laigeremindala, a natar a pukna ka miting na palaondala, ika i sira aitna pasi ana tatatnan utna ning i sira toli. Mulo oroi i, ta natar a kalar ka ana iah ir tolsot sur ir tun arop ta tnan lokor. <sup>6</sup> A laigeremindala i arlar ana iah. I a puka palaondala, ning i bukus ana laulauna, pa i adur a kidol a palaondala rop. I asot anundala a kidol a lalaun ana iah, miting na tnan iah, ning bel i sira mat. <sup>7</sup> A tarai la ka amoro pas a inagoila, a manila, pa a ututnala ning la kaukawar, pa a ututnala ning la laun tisa latasi. <sup>8</sup> Ika a laigeremindala, bel tik ir tolsot sur ir amoroi, pa bel tik otleng ir tolsot sur ir sairasi. I laulau kol, pa i bukus ana polo laulau ning di sira mat ono.

<sup>9</sup> Dala rakan aleklek pas anundala a Leklek a Tamandala ana laigeremindala, pa dala atong

laulau otleng a tarai onoi, la ning e God i akes tar la ana manarna. <sup>10</sup> A warwara na rakan aleklek a Leklek, pa a warwara ning ir alaulau tik, dia rop, dia sira purum ka miting na pahandala. Na tastasik, bel i tostos larne. <sup>11</sup> A malum ning i mapak, pa a malum ning i wakak, bel diar burburak taum miting na takai ka a matana malum. <sup>12</sup> Na tastasik, a rakai a fig bel ir suah a wana oliw, pa a rakai a wain otleng bel ir suah a wana fig. Larka otleng a wakak a malum bel ir hanot miting na malum ning i mapak.

#### *A mananos misaot na langit*

<sup>13</sup> Esi na halimulo i mananos, pa i tastasmai? I wakak ning ir apuasa i ting na nuna wakak a lalaun, ana wakak a titolla, ana toltol ning i anatarna pasi ot. A toltol ning i hanot miting na tastasmai momol. <sup>14</sup> Ika, ning mulor ram sur ta utna ana tik, pa mulo nuknuk sur ta ngas sur mulor aitna pas mulo onoi, gong mulo atong aleklek pas mulo ono, pa gong mulo asongo alar pas a momolna ono. <sup>15</sup> A mananos ning, bel misaot na langit, a mananos ka mite lapiu. I hanot ka ta e Satan, pa bel tana Talngan Tabu. <sup>16</sup> Anasa, esining i ram sur a utna anuna tik, pa i nuknuk sur ta ngas sur ir aitna pasi ono, anuna lalaun i loklokor pa i bukus ana urmatana toltol laulau.

<sup>17</sup> Ika esining i tong akes a mananos misaot na langit, a ningnigo na utna anuna lalaun ir totoh. Pa ir tena bal molmol otleng, pa ir sira nuk pas a tarai masik, pa ir sira longor, ir bukus ana marmaris, pa ir suah a wakak a wana ting na nuna lalaun, bel ir purpurngis, pa bel ta asasongo ting na nuna lalaun. <sup>18</sup> A tena bal molmol ning i sira titol ana bal molmol, i arlar ana tena omomai, pa i sol pas a tostos a toltol.

## 4

*Esining i mang sur a toltol mite na rakrakan hanua i a hirua ane God*

<sup>1</sup> Asa a kamna ning mulo harum pa mulo arlak artalai? I kamna ana numulo na laulau a nuknuk ning la harum ting na numulo a lalaun. <sup>2</sup> Mulo mang sur a ututnala, ika bel mulo tong akesi. Mulo umkol a tarai, pa mulo ram sur a utna, ika bel mulo kibas asaning mulo mang suri. Mulo arlak pa mulo harum. Bel mulo kibas asaning mulo mang suri, anasa bel mulo nunung e God suri. <sup>3</sup> Ning mulo nunung, bel mulo kibas asaning mulo nunung suri, anasa a nuknukimulo bel i tostos. Mulo nunung ka sur a utna ning ir agasgas mulo ot.

<sup>4</sup> Mulo ka han kusun e God, arlar ana hane ning i han kusun anuna barsan, pa i tol a toltol a pamuk. I mangasa, bel mulo tasmani, ning mulo mang sur a toltol mite na rakrakan hanua, mulo na hirua ane God? *Esining i aslang pas a rakrakan hanua sur dia halna, ir hanot a hirua ane God.* <sup>5</sup> Mulo nuki mang a Buk Tabu i warwara oros ka? I atongi mang, “A Inguning e God i saran tari tandala, i mang sur dalar kes nahai e God.” <sup>6</sup> Ika e God i saran tar a marmaris ning i itna kol tandala. I maining a Buk Tabu i atongi larne,

“E God i anatarna pas la ning la sira aitna pas la,

ika i maris la ning la sira anatarna pas la.” *Sindaun 3:34*

<sup>7</sup> Mulo anatarna pas mulo, pa mulor mur e God. Mulor tur na harum rakrakai o e Satan, pa ir han kusun mulo. <sup>8</sup> Mulor han milau e God, pa e God ir han milau mulo. Mulo na tena tol a toltol laulau, mulor gos na kumulo, pa mulo ning naur nuknukimulo, mulor atotoh na

balamulo. <sup>9</sup> Mulor bal maris, mulor domos, pa mulor tangis. Mulor lingir anumulo a langlagar sur a tinangis, pa mulor lingir anumulo a gasgas sur a bal maris. <sup>10</sup> Mulor anatarna pas mulo namatana Leklek, pa ir aleklek pas mulo.

*Gong u atong saksakan a halim*

<sup>11</sup> Na tastasik, gong mulo atong saksakan mulo. *Esining i atong saksakan ta tasnalik, pa i warkurai i, i atong laulau a Warkuraila ane God pa i warkurai a Warkuraila ning. Pa ning u warkurai a Warkuraila, bel u muri, u nuki mang u itna tana.* <sup>12</sup> E God ka saran tar a warkurai, pa i ka a Tena warkurai. I ka i warkurai a tarai sur a lalaun, o sur a hinirua. Ika u esi na ngas a barsan sur ur warkurai a halim?

*A atumarang tetek la ning la aitna pas la*

<sup>13</sup> Mulor longor, mulo ning mulo sira atongi mang, “Onone o latu, milar han sur ta hanua, pa milar kes tingia takai a rau. Milar lololou pa milar sisiurai sur milar tol otnan al mani.” <sup>14</sup> Ika bel mulo tasman asaning ir hanot latu. Anumulo na lalaun i arlar ana sa? Mulo arlar ka ana laukap, ning i hanot pas ka, pa i rorom ulak. <sup>15</sup> Ika, i wakak sur mulor atongi larne, “Ning a nuknuk a Leklek, milar laun pa milar toli larne o larning.” <sup>16</sup> Ika anone, mulo ka iaunan pas mulo pa mulo aitna pas mulo ana anumulo na warwara. A toltol larning i laulau. <sup>17</sup> Esaning i tasman a wakakna sur ir toli, ika bel i toli, i tol a toltol laulau.

## 5

*A atumarang tetek na tena gongon*

<sup>1</sup> Mulo na tena gongon, mulor longor: Mulor tangtangis, pa mulor kukukuk, anasa a kankan ir hanot tetek mulo. <sup>2</sup> Anumulo na

gongon la ka marot, pa a koro-  
pos ka alaulau anumulo na kaen.  
<sup>3</sup>Anumulo na gol pa a silwa dia ka  
ros, pa a ros indiau ir arup mulo,  
pa ir ien a palaom mulo arlar ana  
iah. Ana ararop a pukakiar ne,  
mulo ka suah taum pas anumulo  
na ululeng. <sup>4</sup>Oroi, bel mulo tokom  
tar a tarai ning la titol ting na  
numulo na barim, pa arlou anunla  
i arup mulo. Pa e God, a rakrakai  
a Leklek, ka longor tar a tinangis  
anunla ning la sol.

<sup>5</sup>Ana numulo a lalaun te na  
rakrakan hanua, mulo sai a tnan  
mani, ana utna na hangan sur  
mulo ot, pa asaning i agasgas  
mulo. Mulo tabar butbut mulo, pa  
milau ma mulor hirua, arlar ana  
inagoila, ning di tabar butbut la  
sur dir umkol la. <sup>6</sup>Mulo ben tar  
na tena tostos uting na warkurai,  
pa mulo umkol la, ika bel la keles  
mulo.

*Dalar tur rakrakai ana tortorot  
pa gong dala ngoro*

<sup>7</sup>Na tastasik, gong mulo ngoro  
kapit, ning mulo harnanai sur a  
titan ot ulak ana Leklek. Mulor  
oroi a tena omomai, bel i ngoro  
kapit, ning i harnanai sur a kiar  
ir punga, pa a barim ir makos  
wakak. <sup>8</sup>Mulo otleng, gong mulo  
ngoro kapit, mulor tur rakrakai  
ana tortorot, anasa a titan ot ulak  
ana Leklek ka milau. <sup>9</sup>Na tastasik,  
gong mulo ururai artalai, sakana  
e God ir warkurai mulo. Oroi,  
a Tena Warkurai ka tur ting na  
taman.

<sup>10</sup>Na tastasik, mulor nuk pas  
a propetla tagun nating, ning la  
warwara ana risana Leklek. La  
pastetek a kankan, ika bel la  
ngoro, la tur rakrakai ana tor-  
torot. Pa anunla a lalaun, a wakak  
a manar tetek mulo, sur mulor  
muri. <sup>11</sup>Oroi, dingla na tarai  
tagun nating la tur rakrakai ana  
tortorot ning la pastetek a mama-  
hatla. Dala atong la mang la angis.  
Mulo tasman a lalaun ane Jop, i

tur rakrakai ana tortorot ning i  
pastetek a mamahatla. Pa lamur,  
a Leklek i angis ulaki. A Leklek  
i bukus ana marmaris pa a tena  
harnangai.

*A warwara talapor ana lele*

<sup>12</sup>Na tastasik, ning a utna ning  
i itna kol, gong mulo arakrakai  
anumulo na lele ana ta ngas a  
warwara otleng. Gong mulo lele  
ana langit, o a rakrakan hanua, o  
ta utna masik otleng. Mulor atongi  
ka mang “ma” o ‘bel,” sakana  
mulo hirua ana warkurai ane God.

*Dalar nunung ana tortorot*

<sup>13</sup>Ning tik o mulo i kilang a  
mamahat, i wakak sur ir nunung.  
Ning tik i gasgas, i wakak sur  
ir saken a saksakla na aleklek  
e God. <sup>14</sup>Ning tik o mulo i  
sasam, ir arsune sur a ningnigola  
na lotu, sur lar nunung ono, pa  
lar sabari ana wel, ana risan a  
Leklek. <sup>15</sup>A nunung ning i han  
taum ana tortorot, ir alangolango  
esining i sasam, pa a Leklek ot, ir  
alangolango ulak pasi. Pa ning ka  
tol tar a toltol laulau, a Leklek ir  
kepseni. <sup>16</sup>Mulor warwara puasa  
artalai tetek mulo ana numulo na  
tolto laulaula, pa mulor nunung  
sur mulo artalai, sur a Leklek ir  
alangolango pas mulo. A nunung  
anuna tena tostos i rakrakai kol,  
pa i wai otnan a wana.

<sup>17</sup>E Elaija, a propet, i a barsan  
arlar ka ondala. I nunung sur gong  
i kiar, pa natol a rau pa diono  
na kalang bel i kiar. <sup>18</sup>Lamur i  
nunung ulak sur ir kiar, pa a kiar i  
punga, pa a ututnala i gomo ulak,  
pa la wai.

<sup>19</sup>Na tastasik, ning tik o mulo  
ir han rongo kusun a momolna,  
mulor ben lingir ulak pasi. <sup>20</sup>Mulo  
nuk pasi, ning tik ir ben lingir pas  
a tena laulau kusun anuna rongo,  
ka alaun pas a ingun a barsan



ning kusun a minat, pa a Lek-  
lek ir kepsen anuna galis a toltol  
laulaula.

## A Ningnigo na Pas ane Pita

### *A warwara talapor nigo*

A pas ne e Pita i tumusi. E Pita a hala ning a bonot pa pisir naur a kakak a asaer ane Iesu. I tumus a pas ne tetek a tarai a lotu ning la kes na wasira ting na hananuala. I kes tumo e Rom pa i tumus a pas ne. I atong e Rom e Babilon, a warwara larlar ana toltol mite na rakrakan hanua ning i bukus tumo e Rom.

A tena tortorotla la barat a galis a mamahat miting na matanitu anasa la tortorot o e Iesu. Ana pas ne, e Pita i mang sur ir arakrakai anunla a tortorot. I atai la ana nunla a tona lalaun o e Karisito, pa ana toltol ane Iesu, anasa e Iesu otleng i barat a mamahatla. I atai la otleng ana wakak a toltolla ning lar muri.

### **A tinan ana Ningnigo na Buk ane Pita:**

A kamkama buk ne (1:1-2)

Dalar harnanai ana tortorot sur a lalaun tikin (1:3-12)

A totoh a lalaun (1:13-2:12)

A wakak a toltol ning dalar muri (2:13-3:7)

A tarai ane Karisito lar kilang a kankan (3:8-4:19)

Dalar anatarna pas dala (5:1-11)

A ararop a warwara ane Pita (5:12-14)

<sup>1</sup> Iau e Pita, a aposel ane Iesu Karisito, a tumtumus tetek mulo ning e God ka aslang pas mulo sur mulo anunai, pa mulo kes sarara arlar ana wasirala tumo na paparla Pontas, Galesia, Kapedosia, Esia pa e Bitinia. <sup>2</sup> E God a Tamandala ka aslang pas mulo ning ka tasman nigon tar mulo, pa a Talngan Tabu i atotoh mulo, sur mulor longor tetek e Iesu Karisito, pa dir lamir mulo ana sulukna.

A marmaris pa bal molmol ir kes tetek mulo, pa ir itna bolos.

*Dala harnanai ana tortorot sur a lalaun tikin*

<sup>3</sup> Dalar atong aleklek pas e God, a Taman anundala Leklek e Iesu Karisito. Ana nun a tnan marmaris, i agon tona pas dala. I maining dala harnanai ana tortorot sur a lalaun tikin, anasa e Iesu Karisito i kamtur ulak kusun a minat, <sup>4</sup> pa dalar kibas a utna ning e God ka sang tari saot na langit, a utna ning bel ir marase, bel ir laulau pa bel ir rorom. E God ka sang tari sur mulo.

<sup>5</sup> Pa i tai alar mulo ana rakrakaina, anasa mulo tortorot onoi. Ir tai alar mulo tuk ana ararop a pukakiar ning ir alaun mulo. Pa ana nuna titol ning, ir apuasa asaning ka sang tari sur mulo. <sup>6</sup> A utna ne ir agasgas kol mulo. I momol ot, a urmatana mamahat ning mulo kilangi onone ir saran a bal maris ta mulo, ika bel ir bongnan la. <sup>7</sup> A mamahatla ne la hanot sur dir toho anumulo a tortorot, sur dir oroi i mang i momol o bel. Di toho anumulo a tortorot arlar onoi ning di tun atotoh a gol ting na iah. Ika anumulo a tortorot i itna kol tana gol ning ir rop ka. Pa ning anumulo a tortorot i tur rakrakai lamur tana larlarla, e Iesu Karisito ir rakan aleklek pas mulo, pa ir aitna pas mulo, pa ir saran a hanrawai tetek mulo ana pukakiar ning ir hanot puasa. <sup>8</sup> Tur pasi nating tuk onone belot mulo oroi i, ika mulo mang kol suri. Onone bel mulo oroi i, ika mulo tortorot onoi. Pa mulo bukus ana tnan gasgas ning bel dir pak sot pasi ana ta warwara, pa i bukus ana matatar. <sup>9</sup> Anasa e God ka alaun pas a ingumulo, ine a wana numulo a tortorot.

<sup>10</sup> A propetla tagun nating la warwara na propet ana titol ane God ning ir alaun mulo, arlar ana artabar ning ir tabar mulo onoi.

La tatatai suri, pa la rakrakai sur lar tasmani. <sup>11</sup> A Inguna e Karisito i kes onla, pa i atai nigon la ana mamahatla ning e Karisito ir kilangi, pa ana nun a matatar lamur. La tiktikin mang nangse momol, pa esi na barsan ning a utna ne ir hanot onoi. <sup>12</sup> E God i apuasai tetek a propetla mang a ututnala ne, bel ir hanot tetek la. La warwara ka ana ututnala ning e God ir toli tetek mulo. Pa onone, mulo ka longor tari kusun a tarai ning la warawai ana Wakak a Warwara tetek mulo ana rakrakai a Talngan Tabu esaning di sunei misaot na langit. Pa a ututnala ne, na angelo otleng la mang kol sur lar oroi i.

### *A totoh a lalaun*

<sup>13</sup> I maining mulor sang a nuknukimulo sur anumulo a titol, mulor warkurai tostos anumulo a lalaun, pa mulor harnanai ana tortorot momol sur a utna ning dir tabar mulo onoi ning e Iesu Karisito ir hanot puasa. <sup>14</sup> Mulo na natnat e God, ning mulo sira longor tana, gong mulo mur a laulau a nuknukla ning mulo sira toli nating, ning bel mulo mananos. <sup>15</sup> Mulor totoh ana numulo na toltol rop, arlar o esaning i kabah pas mulo i totoh. <sup>16</sup> Anasa di ka tumus tari ting na Buk Tabu mang, "Mulor totoh, anasa iau, a totoh." *Liwai 11:45*

<sup>17</sup> Mulo sira atong Tamamulo o e God. Pa i wakak ning mulor laun taum ana matmataut namatana, ana numulo a keskes a wasira te lapiu, anasa ir warkurai a taraila rop, ana ututnala rop ning la ka tol tari, pa bel ir purpurngis. <sup>18</sup> Mulo ka tasmani mang e God ka lou langolango pas mulo kusun na toltol orosla ka, ning mulo kibasi tana tamamulola. Bel i lou langolango pas mulo ana utna ning ir rorom ka, arlar ana silwa o a gol. <sup>19</sup> I lou

langolango pas mulo ana wakak a sulukna e Karisito, esaning i arlar ana nat a sipsip ning i totoh pa bel ta tinsaman kaning onoi.\* <sup>20</sup> E God ka aslang pasi nating ot ning belot i akes a rakrakan hanua, pa ana ararop a pukakiarla ne, ka hanot sur mulo. <sup>21</sup> O e Karisito, mulo tortorot o e God, ning i akamtur ulak pasi kusun a minat, pa i saran tar a matatar teteki. Larning mulo tortorot o e God pa mulo harnanai ana tortorot sur a utna ning ir toli lamur.

<sup>22</sup> Pa onone, ning mulo ka longor ana momol a warwara, mulo ka totoh, sur mulor mang momol sur na tastasimulo ana tortorot. Larning mulor mang artalai sur mulo ana marmaris momol ting na balamulo. <sup>23</sup> Anasa di ka agon ulak pas mulo. Pa anumulo a tona lalaun, bel i kamna pas on tik mite lapiu, anasa tik mite lapiu ir rarop ka. Di agon tona mulo ana utna ning bel ir rarop, i a warwara ane God, ning i laun pa ir kes tikin.

<sup>24</sup> I arlar larning di ka tumus tari ting na Buk Tabu mang, "A taraila rop la arlar ka ana wulai, pa anunla na mermer i arlar ka ana purpur ning i sar.

A wulai ir marang, pa a purpur ir punga,

<sup>25</sup> ika a warwara ana Leklek ir kes tikin." *Ais 40:6-8*

Pa a warwara ne, i a Wakak a Warwara, ning di ka warawai tar onoi tetek mulo.

## 2

### *E Iesu a lalaun a hat*

<sup>1</sup> I maining mulor kepsen a toltol laulaula rop, a warwara asasongo pa lalaun a asasongo, ram sur a utna ana tik masik pa urmatana warwara laulau. <sup>2</sup> Mulor mang

\* **1:19:** A tarai Israel la sira artabar tetek e God ana nat a sipsip ning i totoh pa bel ta tinsaman kaning onoi, sur e God ir kepsen anunla na toltol laulau. Oro i a Wok Pris 22:17-25.

kol sur a utna na ingun ning i to-  
toh, arlar ana kakak mermeremla  
la mang kol sur a polo na sus.  
Mulor mang sur a utna na in-  
gun, sur mulor gomo onoi tuk  
ana pukakiar ning mulor kibas a  
lalaun tikin. <sup>3</sup> Anasa mulo ka toho  
tar a lalaun ana Leklek, pa mulo  
tasmani mang a Leklek i wakak  
kol.

<sup>4</sup> Mulor han tetek a Leklek, esan-  
ing a lalaun a hat. A taraila la  
kepseni, ika e God i aslang pasi,  
pa i wakak kol namatana. <sup>5</sup> Pa  
mulo otleng, mulo arlar ana lalaun  
a hatatla, ning e God i titol o mulo  
sur mulor hanot a rumai ana Tal-  
ngan Tabu. Mulor hanot na totoh  
a tena artabar tetek e God, sur mu-  
lor saran na artabar ning i hanot  
miting na Talngan Tabu, ning i  
wakak namatana e God, anasa o  
e Iesu Karisito. <sup>6</sup> Larning di ka  
tumus tari ting na Buk Tabu larne,  
“Oroi i, ia ka suah tar a hat saot e  
Saion.

A hat ning a aslang pasi sur ir a  
wakak a hat kes, ning di tol  
a rumai saot ono.

Pa esining ir tortorot onoi, anuna  
tortorot bel ir ame i.” *Ais*  
*28:16*

<sup>7</sup> Tetek mulo ning mulo tortorot, a  
hat ning i wakak, ika tetek la ning  
bel la tortorot,

“A hat ning na tena tol rumai la  
kepseni,  
i ot ning a hat kes, ning di tol  
a rumai saot ono.” *Buk*  
*Song 118:22*

<sup>8</sup> “A hat ning, a tarai lar buh a  
hanla onoi,  
pa lar punga onoi.” *Ais 8:14*

La buh a hanla onoi, anasa bel  
la longor ana warwara ane God.  
Ning la toli larning, anuna war-  
wara ning ka atong tari nating i sot  
onla.

<sup>9</sup> Ika mulo na tarai a aslang, na  
tena tuntun artabar tetek a King,  
mulo na totoh a mangis a tarai,  
pa mulo na tarai ane God. E God

ka kabah pas mulo miting na mor-  
morom sur anuna talapor ning i  
wakak kol, sur mulor warwara  
talapor ana anun na wakak a titol.  
<sup>10</sup> Nating bel mulo na tarai ane  
God, ika onone mulo anuna tarai.  
Nating bel mulo kibas a marmaris  
ane God, ika onone mulo ka kibasi.

<sup>11</sup> Na halalik, mulo kes na wasira  
te na rakrakan hanua, bel anu-  
mulo a hanua ne. I maining a  
nunung mulo, sur gong mulo mur  
na laulau a nuknuk, ning la harum  
taum ana ingumulo. <sup>12</sup> Ika mulor  
tol a wakak a toltol na arpotor  
tanla ning bel la tortorot, sur la  
ning la tiu mulo mang mulo tol  
a laulaula, lar oroi anumulo na  
wakak a titol, pa lar atong leklek  
pas e God ana pukakiar ning ir  
hanot ono.

*Mulor anatarna pas mulo tetek  
a ningnigola*

<sup>13</sup> Mulor anatarna pas mulo  
tanla rop ning la tong akes a  
warkurai te lapiu. Mulor toli  
anasa a Leklek i mang suri. Mulor  
anatarna pas mulo tetek a king,  
esaning a tnan ningnigo ting na  
matanitu. <sup>14</sup> Pa mulor anatarna  
pas mulo otleng tetek na tena  
warkurai ning a king i sira sune  
sen la, sur lar warkurai a tarai  
ning la tol a laulau, pa lar aitna  
pas a tarai ning la tol a wakakna.

<sup>15</sup> Anasa e God i mang sur mu-  
lor tol na wakak a titol, sur mu-  
lor sairas na warwara oros ka  
ana tarai ning bel la tastasman.

<sup>16</sup> Mulo ka langolango, ika gong  
mulo nuki mang mulo ka lan-  
golango sur mulor tol a laulau  
pa mulor nuki mang i wakak ka.  
Mulor laun arlar larning mulo na  
tena titol oros ane God. <sup>17</sup> Mulor  
hanrawai a tarai rop. Mulor mang  
sur na tastasimulo ana tortorot,  
mulor matmataut sur e God, pa  
mulor hanrawai a king.

*Dalar mur a toltol ane Iesu*

<sup>18</sup> Mulo na tena titol oros, mulor sira anatar na pas mulo tetek anumulo na ningnigo taum ana hanrawai. Bel mulor anatar na pas mulo ka tetek la ning la wakak pa la sira maris mulo, mulor anatar na pas mulo otleng tetek la ning i rakrakai na magiranla tetek mulo. <sup>19</sup> Ning bel mulo tol ta laulau a utna, ika mulo kilang a mamahat kusun a tarai, e God ir gas o mulo ning mulo mur a nuknukna pa mulor tur rakrakai. <sup>20</sup> Ning di um mulo ana numulo na toltol laulau ot, pa mulo tur rakrakai, e God bel ir aitna pas mulo. Ika ning mulo tol a tostos a toltol, pa di akadik mulo onoi, e God ir gas o mulo ning mulo tur rakrakai.

<sup>21</sup> E God ka kabah pas mulo sur mulor tur rakrakai ning mulo kilang na mamahat. Anasa e Karisito i kilang a kankan sur mulo, pa ka tol tar a manar tamulo, sur mulor mur a kiuna.

<sup>22</sup> “Bel i tol tar ta toltol laulau, pa bel i atong tar ta asasongo na warwara.” Ais 53:9

<sup>23</sup> Ning di atong laulau i, bel i kelesi. Ning di akadiki, bel i balakut pa bel i atong tar ta warwara mang ir alaulau la. I noren tari ot na kuna e God, esaning anuna warkurai i tostos. <sup>24</sup> E Karisito ot i kibas pas anundala na toltol laulau ana palaona ning i mat saot na rakai kutus, sur dalar mat kusun a toltol laulau, pa dalar laun sur a tostos a toltol. Pa ana hirua ting na palaona, i alangolango pas mulo.

<sup>25</sup> Anasa nating mulo han rongo arlar ana sipsipla, ika onone mulo ka han ulak tetek anumulo Tena tai alar anuna sipsipla, pa Tena tai alar ana ingumulo.

### 3

#### *A keskes a tinaulai*

<sup>1</sup> Mang otleng larning mulo na tinaulai a gurara, mulor anatar na pas mulo tetek anumulo na

barsan, sur ning dingla onla bel la tortorot ana warwara ane God, anumulo na wakak a toltol ka ir warwara tetek la. Anumulo na toltol ir ben pas la tetek e God, <sup>2</sup> ning la oroi lalan anumulo na totoh a toltol pa hanrawai. <sup>3</sup> Gong mulo nuknuk kol sur a mermer ting na palaomulo larne, a iris pukulumulo, pa wakak na kabaruruan di toli ana gol, pa na wakak a kaen. <sup>4</sup> Anumulo a mermer momol ning bel ir rop, ir hanot ting na balamulo, larne a wowon a toltol pa keskes na molmol. A utna ne, i itna kol namatana e God. <sup>5</sup> A toltol ne, na totoh na gurara tagun nating, ning la tortorot o e God, la sira amermer la ono. La sira anatar na pas la tetek anunla na barsan, <sup>6</sup> arlar o e Sara ning i longor ta e Abaram, pa i atongi anuna leklek. Pa mulo na natnat e Sara, ning mulo tol asaning i tostos, pa bel mulo matmataut.

<sup>7</sup> Mang otleng larning mulo na tinaulai a barsan, ana numulo a keskes a taulai, mulor mur a wakak a nuknuk tetek anumulo na gurarala pa mulor hanrawai tetek la, anasa mulo tasmani mang, a rakrakainla bel i arlar ana rakrakaimulo, pa la otleng lar kibas a lalaun ning e God ir sarani tamulo. Mulor toli larning, sur gong ta utna i sairas anumulo na nunung.

*A kankan ning dir kilangi ana tostos a toltol*

<sup>8</sup> Anuk na ararop a warwara tetek mulo rop larne, i wakak sur ir takai ka a nuknukimulo, pa ning ta halimulo ir kilang a mamahat, mulo otleng mulor kilangi taum onoi. Mulor mang artalai sur mulo larning mulo tas, mulor lasan ana marmaris, pa mulor anatar na pas mulo. <sup>9</sup> Gong mulo keles a laulauna uting na laulau, pa gong mulo keles a laulau a warwara uting na laulau a warwara.

Ika mulor atong angis la ning la tol a laulauna tetek mulo, anasa e God i kabah pas mulo sur mulor toli larne, sur ir angis mulo. <sup>10</sup> Larning a Buk Tabu i atongi larne,

“Ning tik i mang sur a wakak a lalaun,

pa i mang sur ir oroi na wakak a pukakiar na gasgas,

ir tai alar a pahana kusun na laulau a warwara, pa gong i اساسونو.

<sup>11</sup> Ir talingir kusun a laulauna pa ir tol a wakak a toltol.

Ir tai sur a molmol pa ir rakrakai sur ir muri.

<sup>12</sup> Anasa a matana Leklek i sira tong ana tena tostosla,

pa i sira longor anunla na nunung.

Ika i sira saran tar a intaurna tetek la ning la tol a laulauna.”

*Buk Song 34:12-16*

<sup>13</sup> Ning mulo rakrakai sur mulor tol a wakakna, esining ir alaulau mulo? Bel tik ir alaulau mulo.

<sup>14</sup> Ika ning dir akadik mulo anasa ana numulo na tostos a toltol, mulo angis.

“Gong mulo matatan asaning lar amatmataut mulo onoi,

pa gong mulo koloron.” *Ais 8:12-13*

<sup>15</sup> Ika, ting na numulo a lalaun, mulor tong akes e Karisito sur a Leklek anumulo. Na pukakiar rop mulor kes na sang sur mulor keles tik ning ir kabah mulo mang asa a kamna ning mulo harnanai ana tortorot. Pa ning mulo kelesi, mulor kelesi ana wakak a toltol pa hanrawai. <sup>16</sup> Pa mulor sira mur a toltol ning mulo tasmani mang i tostos, sur la ning la atong laulau na wakak a toltol mulo toli ning mulo mur e Karisito, lar meme ana nunla a warwara ning la atong laulau mulo onoi. <sup>17</sup> Ning mulor kilang a kankan, anasa mulo tol a laulauna, i wakak ka. Ika i wakak kol ning mulor kilang a kankan

ana wakak a titol ning mulo toli, ning e God i mang suri.

<sup>18</sup> Anasa e Karisito i mat muntakai pas ka, sur anundala na toltol laulau. A Tena Tostos i mat sur la ning bel la tostos, sur ir ben pas mulo tetek e God. La um kol a palaona, ika di alaun pasi ana inguna. <sup>19</sup> Pa i han pa i warawai tetek na ingun ning la kes na dodot. <sup>20</sup> Na ingun ning, na ingun a tarai tagun nating ot ana raula ane Noa. E God i harnanai pas la sur lar lingir a nuknukinla, ning e Noa i tol a sip. Ika bel la longor teteki. Pa e God i alaun pasi kama a siwal la kusun a lomom.

<sup>21</sup> A lomom i tur aslang a baptais ning i alaun mulo onone. Bel di baptais mulo sur dir gos sen a dur ting na palaomulo. A baptais i warwara talapor mang mulo tasmani mang mulo tostos namatana e God. Pa ir alaun mulo anasa ana kamkamtur ulak ane Iesu Karisito kusun a minat. <sup>22</sup> Esaning i han kas usaot na langit, pa onone i kes ting na sot a kuna e God. Pa na angelo, pa ingunla ning la tong akes a rakrakai sur lar warkurai, pa ingunla ning la tong akes a rakrakai, la kes nahaina.

## 4

*Mulor manah kusun a toltol laulaula*

<sup>1</sup> E Karisito i kilang a kankan ana palaona. I maining mulo otleng mulor sang sur mulor kilang a kankan arlar onoi. Anasa esining i kilang a kankan ana palaona ka manah kusun a toltol laulaula. <sup>2</sup> Pa onone, bel i saran tar anuna lalaun sur a laulau a nuknukla mite lapiu. I saran tari ka sur ir mur a nuknuk e God. <sup>3</sup> Ka bongnan mulo ning mulo ka tol tar na toltol laulau, ning na tarai ning bel la tortorot la mang sur lar toli. La tol na toltol a pamuk, la mur na laulau a nuknukinla, la sipak pa la kukuk taltal taum ana longlong a toltol,

pa la tol orosi ka na toltol ning bel i wakak. Pa la lotu tetek a asasongo a godla, ning e God i sairas dala kusuni. <sup>4</sup> Pa onone, na halalimulo la kulkulan kol ning bel mulo mur na laulau a toltol ne taum onla, pa la atong laulau mulo. <sup>5</sup> Ika lamur lar tur namatana e God, pa lar warwara talapor ana asaning la ka tol tari. Anasa e God ka sang sur ir warkurai a tarai rop, la ning la laun pa la ning la ka mat. <sup>6</sup> Ine a kamkamna ning di ka warawai ana Wakak a Warwara tetek a tarai ning la ka mat. Ning la mat la kibas a warkurai ana palaonla, arlar ana tarai rop, ika di warawai tetek la sur a ingunla ir laun arlar o e God i laun.

*Dalar titol ana artabarla ning e God ka saran tari tan dala*

<sup>7</sup> A ararop ana ututnala rop ka milau. I maining mulor nuknuk wakak pa mulor warkurai tostos anumulo a lalaun, sur mulor tol sot sur mulor nunung. <sup>8</sup> Ine a utna ning i leklek kol tan a ututnala rop, mulor mang artalai sur mulo ana momol, anasa a marmaris i poroi a galis a toltol laulau. <sup>9</sup> Mulor gas artalai pas mulo ting na numulo na rumai, pa gong mulo toli ana ururai.

<sup>10</sup> E God ka saran tar na artabar tetek mulo taktakai miting na urmatana artabarla. Pa ir wakak sur mulor titol wakak onoi, sur mulor nangan artalai mulo. <sup>11</sup> Ning tik i kibas a artabar sur ir tena warawai, i wakak sur ir warawai arlar ot ana warwara ane God. Ning tik i kibas a artabar sur ir tena harnangai, i wakak sur ir harnangai taum ana rakrakai ning e God i saran tari tana, sur a tarai lar atong aleklek pas e God ana ututnala rop, anasa o e Iesu Karisito. Anunai ka a matatar pa a rakrakai, bel ir rop pa bel ir rop. Amen.

*A tarai ane Karisito lar kilang a kankan*

<sup>12</sup> Na halalik, gong mulo kulkulan ning di toho mulo ana rakrakai a kankan arlar larning a iah i tun mulo, pa gong mulo nuki mang a tona utna ning i hanot tetek mulo. <sup>13</sup> Ika mulor gas anasa mulo kilang a kankan arlar o e Karisito i kilangi, sur mulor bukus ana gasgas ning e Karisito ir hanot taum ana nun a matatar. <sup>14</sup> Ning di atong laulau mulo anasa mulo ane Karisito, mulo angis. Anasa a Inguna e God, a Ingun a matatar, i kes o mulo. <sup>15</sup> Gong tik o mulo i kilang a kankan anasa i a tena um kol a tarai, o a tena kinkinau, o a tena laulau, o a tena tol oros tetek a tarai. <sup>16</sup> Ika, ning di akadik u ka anasa u a te Karisito, gong u meme. Ur atong aleklek pas e God, anasa u kibas a risana e Karisito. <sup>17</sup> A taem ning e God ir warkurai ka hanot. Dir warkurai nigon dala a tarai ane God. Ning dir warkurai nigon dala, ir mangmangasa a warkurai tetek la ning bel la mur a Wakak a Warwara ane God? <sup>18</sup> A Buk Tabu i atongi larné,

“Ir ngangaten sur dir alaun pas na tostos a tarai.

Pa ir mangmangasa tetek na laulau a tarai pa la ning bel la tortorot o e God?” *Sindaun 11:31*

<sup>19</sup> I maining la ning la kilang a kankan, anasa ana nuknukna e God, lar saran tar la ting na kuna a Tena Akakes anunla, ning bel ir noren oros la, pa gong la manah kusun a wakak a toltol.

## 5

*A liur a sipsip ane God*

<sup>1</sup> Onone ar warwara tetek mulo na ningnigo ana lotu, ning iau otleng a ningnigo arlar o mulo. Ning e Karisito i kilang a kankan ia ka oroi tari, pa lamur ning ir hanot, iau otleng taum o mulo, dalar kimkibas ana nun a matatar.

<sup>2</sup> Mulor tai alar a liur a sipsip ane God, ning di saran tari tetek

mulo sur mulor tai alari. Gong mulo titol anasa a tarai ka la an-gongos tar mulo, mulor titol anasa mulo ot mulo mang sur mulor agasgas e God. Gong mulo titol ka sur a mani. Mulor titol ana tnan gasgas. <sup>3</sup> Gong mulo warkurai rakrakai la ning di ka saran tar la sur mulor tai alar la. Anumulo a lalaun ir arlar ana wakak a manar tetek a liur a sipsip. <sup>4</sup> Ning a Ning-nigo na tena tai alar anuna sipsipla ir hanot, mulor kibas a kukuh na matatar ning a matatarna bel ir rop.

<sup>5</sup> Mang otleng larning, mulo na barman, mulor sira anatarna pas mulo tetek la ning la nigo ta mulo. Mulo rop mulor anatarna pas mulo artalai, esaning anumulo a wakak a mermer. Anasa a Buk Tabu i atongi mang,

“E God i nget esining i aitna pasi ot, pa i maris esining i anatarna pasi.”

<sup>6</sup> I maining mulor anatarna pas mulo nahaina rakrakai a kuna e God, sur ning a taem ir sot arlar ana nuknukna, ir aleklek pas mulo. <sup>7</sup> Mulor saran rop tar anumulo na mamahat tetek e God, anasa i sira tai alar mulo.

<sup>8</sup> Mulor tumarang pa mulor warkurai tostos anumulo a lalaun, anasa anumulo a hirua, e Satan, i han taltal arlar ana laion, ning i kukukuk, pa i tai sur al tarai sur ir ien la. <sup>9</sup> Mulor tur rakrakai ana tortorot pa mulor sairasi, anasa mulo tasmani mang na tas-tasimulo te na rakrakan hanua rop la kilang na kankan arlar o mulo.

<sup>10</sup> Ika e God i a God na marmaris, pa o e Karisito i kabah pas mulo sur mulor kes taum onoi ana nun a matatar ning bel ir rop. A kankan ning mulo kilangi, bel ir bongnani, pa lamur i ot ir awakak ulak pas mulo, ir arakrakai mulo pa ir nangan mulo sur mulor tur rakrakai.

<sup>11</sup> A rakrakaina ir kes tikin. Amen.

### *Na ararop a warwara*

<sup>12</sup> E Sailas i nangan iau ning a tumus a natar a pas ne tetek mulo. E Sailas a tasik ana tortorot, ning a tortorot kol onoi. Ana pas ne, a mang sur ar arakrakai mulo pa ar atai talapor mulo ana marmaris momol ane God. Mulor tur rakrakai onoi.

<sup>13</sup> A tarai a lotu ning la kes te e Babilon\*, la saran anunla na marmaris tetek mulo. La a tarai na aslang ane God taum o mulo. E Mak, a natuklik ana tortorot, i otleng i saran anuna marmaris tetek mulo. <sup>14</sup> Ning mulo arpastek, mulor maris artalai mulo taum ana argoro a marmaris.

A bal molmol tetek mulo rop ning kaning mulo o e Karisito.

\* **5:13:** E Babilon i tur aslang e Rom, pa i warwara larlar ana toltol mite na rakrakan hanua ning i bukus tumo e Rom.



## A Munaur a Pas ane Pita

### *A warwara talapor nigo*

A pas ne a munaur a buk ane Pita tetek a tarai a lotu, ning la kesing na hananuala. I tumus a pas ne sur ir atumarang la kusun na asasongo na tena asaer. Na tena asasongo ne la ben rongon a tarai a lotu. La atongi mang i wakak ka ning lar tol a toltol laulau, pa la atongi otleng mang e Iesu bel ma ir hanot ulak.

E Pita i atai ulak la o e Iesu sur lar tur rakrakai ana tortorot, E Iesu belot i hanot, anasa i mang sur a taraila rop lar lingir a nuknukinla.

### **A tinan ana Munaur a Buk ane Pita:**

A kamkama buk ne (1:1-2)

Dalar laun arlar ana tarai ane God (1:3-15)

A warwara ana tinan ot o e Iesu Karisito te na rakrakan hanua i momol (1:16-21)

A atumarang kusun na asasongo na tena asaer (2:1-22)

A tinan ot ulak ana Leklek (3:1-18)

<sup>1</sup> Iau e Saimon Pita, a tena titol oros pa aposel ane Iesu Karisito. A tumtumus tetek mulo ning e God ka tabar tar mulo ana tortorot, anasa ana tostos a toltol ane Iesu Karisito, anundala a God pa nundala a Tena Alaun. A tortorot ning, i wakak kol arlar ana anumila a tortorot. <sup>2</sup> A marmaris pa molmol ir abukus mulo, anasa mulo tasman e God pa e Iesu anundala a Leklek.

*Dalar laun arlar lar a tarai ane God*

<sup>3</sup> Ana rakrakai e God, i tabar dala ana ututnala rop ning dala kapan suri, sur dalar laun wakak pa dalar tol a toltol ning e God i mang suri, anasa dala tasmani e God, esaning i kabah pas dala,

sur dalar kibas anuna matatar pa wakak a toltol anunai. <sup>4</sup> I tabar dala ana lelela ning i itna pa i wakak kol, anasa ana anuna matatar pa wakak a toltol anunai. I ka lele tar sur mulor tolsot pasi sur mulor kibas a toltol ane God pa nuna lalaun, pa mulor alah kusun a laulauna miting na rakrakan hanua ning i sira hanot miting na laulau a nuknuk.

<sup>5</sup> I maining mulor rakrakai sur mulor palataum anumulo a tortorot taum ana wakak a toltol. Pa mulor palataum a wakak a toltol taum ana tastasmai o e God. <sup>6</sup> Pa mulor palataum a tastasmai o e God taum ana toltol ning mulor warkurai tostos anumulo a lalaun. Pa mulor palataum a toltol ning taum ana tuntunur rakrakai. Pa mulor palataum a tuntunur rakrakai taum ana toltol ning e God i mang suri. <sup>7</sup> Pa mulor palataum a toltol ning e God i mang suri taum ana marmaris tetek na tastasimulo ana tortorot. Pa mulor palataum a marmaris ning taum ana marmaris otleng tetek a taraila rop. <sup>8</sup> Ning a toltolla ne i kes o mulo, pa la gomo tingui na numulo a lalaun, anumulo a tastasmai sur anundala a Leklek e Iesu Karisito bel ir utna oros ka, ir suah ot a wana. <sup>9</sup> Ika esining bel i tong akes na toltol ne, ka gawul a matana pa ka kut, pa ka duman seni mang e God ka atotoh tari kusun na toltol laulau anunai.

<sup>10</sup> I maining na tastasik, mulor rakrakai sur mulor asangani ting na numulo a lalaun mang e God ka kabah pas mulo pa ka aslang pas mulo. Ning mulor toli larning, bel mulor punga, <sup>11</sup> pa e Iesu Karisito, anundala a Leklek pa nundala a Tena Alaun ir kibas pas mulo ana gasgas uting na nuna matanitu ning bel ir rop.

<sup>12</sup> Ar anuknuk tar mulo ulak ana ututnala ne. I momol, mulo ka tasmani, pa mulo ka tur rakrakai ana

momol a asaer ning mulo ka kibas pasi, ika i wakak ning ar anuknuk tar mulo ulak onoi. <sup>13</sup> Ning kaning ot a laun ana palaok, a nuki mang i tostos sur ar amata ulak tar a nuknukimulo sur a ututnala ne. <sup>14</sup> Anasa a tasmani mang ka milau sur ar han kusun a palaok ne, larning anundala a Leklek e Iesu Karisito ka apuasa tari tak. <sup>15</sup> Ar rakrakai sur ar anuknuk tar mulo ana ututnala ne, sur mulor nuk akes la ning ia ka mat.

*Mila ka oroi tar a matatar ane Karisito*

<sup>16</sup> Ning mila atai mulo ana rakrakai e Iesu Karisito anundala a Leklek pa ana nuna tinan ot ulak, bel mila ususrai oros ana ususraila ning mila nuk pas la ka. Mila ot mila ka oroi tar anuna matatar ana matamila. <sup>17</sup> E God e Tamana i aleklek pasi pa i saran a matatar tana, ning i warwara misaot na langit ana elngena ning i bukus ana matatar. I atongi mang, "Ine a Natuklik, a katnan koli, a gas kol onoi." <sup>18</sup> Pa mitol ot mitol ka longor tar a elngena ne, ning i han misaot na langit, ana pukakiar ning mila kes taum onoi saot na mangir ane God.

<sup>19</sup> A ututnala ning mila oroi, i amomol tar a warwara anuna propetla tetek dala, pa i wakak sur mulor longori. Anasa a warwara anuna propetla i arlar ana ning a talapor ana mormorom, tuk ot ana lar, pa a matlai ir atalapor a balamulo. <sup>20</sup> Ning a tnan utna ne mulor tasmani mang, bel ta warwara na propet ting na Buk Tabu i hanot miting na nuknuk a propet. <sup>21</sup> Anasa bel ta warwara na propet i hanot miting na nuknukin ta barsan. A Talngan Tabu ot i nigon a taraila ning la warwara ana warwara miting ta e God.

## 2

*Na asasongo na tena asaer*

<sup>1</sup> Ika nating na asasongo na propet la kes arpotor tana tarai Israel. Larka otleng ning na asasongo na tena asaer lar hanot arpotor ot ta mulo. Lar akas kumnan anunla na asasongo na asaer ning ir alaulau a tortorot, pa lar puain sen a Leklek ning ka lou pas la. Lar kibas kapit pas a hinirua. <sup>2</sup> A galis lar mur na toltol a pamuk anuna asasongo na tena asaerla. I maining a tarai masik lar atong laulau a momol a tortorot. <sup>3</sup> Ana nunla na tnan nuknuk sur a mani, lar asongo tar mulo ana namnamin a warwara oros ka, sur lar kibas anumulo na mani. Ika anunla warkurai na arkeles, tagun nating ot i ka sang pa bel i borbor, pa milau ir hanot.

<sup>4</sup> Oroi i, e God bel i maris na angelo ning la tol a toltol laulau. I minggen purum sen la uting na iah, pa la dodot ting na tnan tung ning i mormorom, sur lar kes nanan a pukakiar a warkurai. <sup>5</sup> Pa e God bel i maris otleng a rakrakan hanua nating, pa i sune sen a tnan lomom, pa a tarai ning bel la tol a toltol ning e God i mang suri, la hirua. I alaun pas ka e Noa, a tena warawai ana tostos a toltol. Pa i alaun pas mais la otleng. <sup>6</sup> Pa i saran a warkurai a arkeles tetek naur a hanua e Sodom pa e Gomora\* ning i tun sen diau, pa dia kubus kama. I toli larning sur a manar asaning ir hanot tetek a tarai ning bel la tol a toltol ning e God i mang suri. <sup>7</sup> Ika, i alaun pas e Lot a tena tostos, ning i balmaris kol ana toltolla na pamuk anuna tarai a kutus warkurai. <sup>8</sup> A tena tostos ne, i kes na arpotor tana laulau a tarai ning, pa ana pukakiarla rop i kilang a tatatnan mamahat ana toltolla na kutus warkurai, ning i oroi i pa

\* 2:6: Oroi e Stat 19:1-26

i longori. <sup>9</sup> I maining a Leklek i tasman a ngas ning ir alaun pas a tarai ning la tol a toltol ning e God i mang suri, ting na mamahat ning ir barat la. Pa i tasman otleng a ngas ning ir akadik la ning bel la tol a tostos a toltol, ning la har-nanai sur anunla na warkurai a arkeles ana pukakiar a warkurai. <sup>10</sup> Pa a Leklek ir warkurai rakrakai la ning la mur na dur a toltol ana lalaun turai, pa la nget anuna warkurai.

Na asasongo na tena asaer ning bel la matmataut ana ta utna, la nuk aitna pas la ot. Bel la matmataut ning la atong laulau na akakes ning kanisaot na langit. <sup>11</sup> Na angelo la rakrakai kol tana asasongo na tena asaer ne, ika ning la tur namatana Leklek bel la atong laulau na akakes ning kanisaot na langit. <sup>12</sup> Ika na asasongo na tena asasaer ne, la arlar ana rokoio na inagoila, ning bel ta mananos, pa la mur ka asaning a palaonla i mang suri, pa di agon la ka sur dir tong akes la pa dir um kol la. La atong laulau ka na ututna ning bel la tasmani. Pa lar hirua arlar ana rokoio na inagoila.

<sup>13</sup> La tol a laulauna pa e God ir keles la ana laulauna. La gas ka ning lar gang pa lar longlong taltal ana kamis. Ning la kes taum o mulo ana utna na hangan, pa la gas ana anunla na asasongo na toltol ning la toli, anunla na dur a toltolla ir ame mulo. <sup>14</sup> A matanla i tai ka sur na tintaulai a gurara, sur lar tol a toltol laulau taum onla. Anunla na laulau a toltol bel ir rop lar pas. La alam rongon la ning bel la tur rakrakai. La lasan kol ana toltol ning la mang kol sur a galis a gongon. Ika, anunla hinirua ka sang. <sup>15</sup> La ka han kusun a tostos a ngas, pa la ka rongo. La ka mur a ngas ane Balam a nat e Beor, esaning i tol a toltol laulau, anasa i mang kol

sur a mani. <sup>16</sup> Na dongki bel la sira warwara, ika anuna dongki i warwara teteki ana nuna rongo ana elngena barsan, pa i sairas a longlong a titol anuna propet e Balam.

<sup>17</sup> Na barsan ne, la arlar ana matmatana malumla ning la ka masa, pa la arlar otleng ana laukap ning a tnan wuwu i wus seni. E God ka sang tar a pukna sur la ana tnan mormorom. <sup>18</sup> La aitna pas la ana warwarala oros ka, pa la alam a taraila sur lar mur a pamuk a toltol ana lalaun turai. Ana ngasna ne, la alam a taraila ning belot i bongnan la anunla tinan masik kusun a tena laulaula. <sup>19</sup> La lele tetek la mang lar langolango, ika la ot bel la langolango, la tena titol oros ana dur a magiranla. Anasa tik ir tena titol oros ana sa ning i sira longor onoi. <sup>20</sup> A taraila ning la ka alah kusun na dur a toltol mite na rakrakan hanua, anasa la ka tasman e Iesu Karisito, anundala a Leklek pa Tena Alaun, ika lamur la punga ana kun a toltol laulau, pa na laulau a toltol i dot akes ulak pas la, anunla na keskes lamur ir laulau kol tana anunla na keskes nating ning belot la tasman e Iesu Karisito. <sup>21</sup> Ngandek ning bel la tasman a ngas ana tostos a toltol, kar wakak tetek la. Ika onone, i laulau kol tetek la, ning la ka tasmani, ika la gilam masik kusun a totoh a warkurai ning di ka abaran tari tanla. <sup>22</sup> A warwara larlar ne i sot onla: "A pap i han ulak sur a muraena." Pa ning a warwara larlar otleng ne: "A palsai a boroi ning di ka pukur tari ir han ulak pa ir polpolos."

### 3

#### *A tinan ot ulak anuna Leklek*

<sup>1</sup> Na halalik, ine a munaur a pas ning a tumusi tetek mulo. Pa te na naur taum a pas ne, a anuknuk mulo ulak ana ututnala, sur a

nuknukimulo ir tostos. <sup>2</sup> A mang sur mulor nuk pas na warwara ning a propetla ane God la ka warwara nigo tar onoi, pa mulor nuk pasi otleng a warkurai ana nundala a Leklek pa Tena Alaun, ning a aposella la ka atai tar mulo onoi.

<sup>3</sup> A ningnigo na utna, mulor tasmani mang, ana ararop a pukakiarla, dingla na tena morot lar hanot pa lar muri ka na laulau a nuknukinla. Lar morot laulau, <sup>4</sup> pa lar atongi mang, “Kana ma a tinan ot ulak ane Iesu, ning i lele tar onoi? Turpasi ana raula ning na tumtubundala nating la mat, a ututnala i tur larot ning e God i akes tar la ana kamkam a akakes.”

<sup>5</sup> Ika ning la atongi larning, la duman seni mang, natnating ot, e God i akes a bakut pa a rakrakan hanua ana anuna warwara ot. I akes a rakrakan hanua ana malum, pa i masa ot miting na malum. <sup>6</sup> I sune a lomom pa i alaulau a rakrakan hanua ne ana malum. <sup>7</sup> Ana warwara otne e God i tong akes a bakut pa a rakrakan hanua ne dala oroi diau, sur dia harnanai sur a pukakiar a warkurai, ning a iah ir alaulau diau, pa a taraila otleng ning bel la tol a toltol ning e God i mang suri.

<sup>8</sup> Na halalik, gong mulo duman ning a utna ne: Ning a pukakiar i arlar ana ning a rip a rau tetek a Leklek, pa ning a rip a rau i arlar ka ana ning a pukakiar teteki. <sup>9</sup> A Leklek bel i wowon sur ir tolsot pas anuna lele mang ir ulak, larning dingla na tarai la nuki. I kes nanan pas mulo, anasa bel i mang sur tik ir hirua. I mang sur a taraila rop lar lingir a nuknukinla.

<sup>10</sup> Ika a pukakiar anuna Leklek ir hanot arlar ana tena kinkinlau. A bakut ir rorom ana tnan unga, pa na akakes kanisaot onoi lar laulau ana tnan iah, pa a rakrakan

hanua pa a ututnala rop ning kanning ia, lar rorom\*.<sup>11</sup> Ning a ututnala rop ne lar laulau lerne, esi na ngas a lalaun ning mulor muri? I wakak ning anumulo a lalaun ir totoh, pa mulor tol a toltol ning e God i mang suri,<sup>12</sup> ning mulor harnanai sur a pukakiar ane God, pa mulor aboso a pukakiar sur ir hanot kapit. Ana pukakiar ning, e God ir tun sen a bakut, pa na ututna saot na bakut ir polo ana tnan laplapang a iah, pa ir rorom.<sup>13</sup> Ika, dala harnanai sur a utna ning e God ka lele tar onoi: a tona langit pa a tona rakrakan hanua otleng, ning a tostos a toltol ir kes onoi.

*Dalar tai alar dala kusun a taraila ning la pak rongon a Buk Tabu*

<sup>14</sup> Na halalik, ning mulo keskes harnanai sur a pukakiar ning, mulor rakrakai sur a magiramulo bel ta dur ono, pa bel dir arup sot pas mulo on ta rongo, pa mulor kes na molmol taum o e God.<sup>15</sup> Mulor nuk pasi, a Leklek belot i hanot, anasa i harnanai sur a taraila lar lingir a nuknukinla pa ir alaun pas la. A warwara ne, e Pol otleng, a tasindala, ka tumus tari nating tetek mulo. I tumusi ana tastamai ning e God i saran tari tana.<sup>16</sup> Ting na nuna bukla rop, ning i warwara ana ututnala ne, anuna warwara i arlar ana sa ning ia ka atong tari. Dingla na warwara ning i tumusi, i ngangeten sur dir tasman a kamkamna. Pa dingla na tarai ning bel la talapor wakak onoi, pa anunla a tortorot i gulgule ka, anunla a papak onoi i rongo ka, arlar ana nunla a papak ana dingla na warwara otleng ting na Buk Tabu. Pa la ot lar hirua onoi.

<sup>17</sup> Ika mulo, na halalik, mulo ka tasman a ututnala ne. I maining mulor tai alar mulo, sur gong a

\* **3:10:** Ana dingla na buk ana warwara Grik di tumusi lerne, “lar rorom”, pa ana dingla otleng di tumusi lerne, “lar hangan rop ana iah.”

tarai a kutus warkurai lar ben rongo mulo sur anunla na asaer ning i rongo, pa mulor punga kusun a rakrakai a keskes ning onone mulo ka kes onoi. <sup>18</sup> I wakak sur mulor gomo tingui na marmaris ane Iesu Karisito anundala a Leklek pa Tena Alaun, pa mulor gomo otleng ana numulo a tastamai onoi. Anunai ot a matatar, onone pa lamur pa bel ir rarop! Amen.

## A Ningnigo na Pas ane Jon

### *A warwara talapor nigo*

A pas ne e Jon i tumusi. E Jon i ning a halinla ning a bonot pa pisir naur a kakak a asaerla ane Iesu. I ka bun, pa i kes tumo e Epeses ning i tumus a pas ne. I tumusi tetek a tarai a lotu ting na papar Esia.

E Jon i atai la sur lar tur rakrakai ana tortorot o e God e Tamana pa e Natnalik e Iesu Karisito. Pa ning la mang sur e God lar mang sur na halalinla otleng. A marmaris i itna kol.

Pa i atai la sur lar tai alar la kusun a asasongola na tena asaerla. A tena asasongola la atongi mang e Iesu bel i hanot a barsan momol. La nuki mang a palaondala i a laulau a utna, pa e Iesu bel ir tolsot sur ir hanot a barsan momol arlar ondala. A tena asasongola la atongi otleng mang a tastasman i a tnan utna, ika a marmaris pa a wakak a toltol dia utna oros ka. A tarai ning la atongi larne, la na hirua ane Karisito, pa e Jon i mang sur dalar oroi lalan la.

### **A tinan ana Ningnigo na Buk ane Jon:**

E Iesu i a Warwara na Lalaun (1:1-4)

A talapor pa a mormorom (1:5-2:29)

Na natnat e God pa na natnat e Satan (3:1-4:6)

A marmaris (4:7-21)

A tortorot ir tolsot pas a rakrakan hanua (5:1-21)

### *A Warwara na Lalaun*

<sup>1</sup> Mila warwara talapor o esaning a Warwara na Lalaun. Natnat-ing ot ning belot di akes a rakrakan hanua, i laun. Mila ka longor tari, mila ka oroi tari ana matamila,

mila oroi momol tari ot, pa mila tong ot a palaona. <sup>2</sup> Pa a Warwara na Lalaun i hanot talapor. Mila ka oroi tari, pa onone mila atalaporitetek mulo mang, i ning a lalaun tikin ning nating i kes taum o e Tamana, pa i hanot talapor tetek dala. <sup>3</sup> Mila warwara talapor tetek mulo o esaning mila ka oroi tari pa mila ka longor tari, sur dalar bal taum, larning mila bal taum o e Tamandala, pa e Natnalik e Iesu Karisito. <sup>4</sup> Pa mila tumus a ututnala ne, sur anundala gasgas ir itna ono.

### *E God a talapor momol*

<sup>5</sup> A warwara talapor ne, mila longori ta e Iesu Karisito, pa mila atalaporitetek mulo mange: E God a talapor momol, pa bel ta mormorom i kes onoi. <sup>6</sup> Ning dala atongi mang dala bal taum o e God, ika dala laun ana mormorom, dala na tena asasongola, pa a momolna bel i kes ondala. <sup>7</sup> Ning dala laun ana talapor, arlar o e God i kes ana talapor, dalar bal artalai dala, pa suluk e Iesu, e Natnalik, ir atotoh dala kusun a toltol laulaula rop.

<sup>8</sup> Ning dala atongi mang belal toltol laulau anundala, dala asongo ulak dala ot, pa a momolna bel i kes ondala. <sup>9</sup> Ning dala atong talapor anundala na toltol laulau, e God i tostos, pa ir tolsot anuna lele pa ir kepsen anundala na toltol laulaula, pa ir atotoh dala kusun a ututnala ning bel i tostos. <sup>10</sup> Ning dala atongi mang bel dala tol ta toltol laulau, dala atongi mang e God a tena asasongo\*, pa anuna warwara bel i kes ana balandala.

## 2

*E Karisito anundala tena har-nangai*

\* **1:10:** E God i atongi mang dala rop dala tol a toltol laulaula. Oro Rom 3:23 Ning dala atongi mang bel dala tol a toltol laulau, dala atong e God mang a tena asasongo.

<sup>1</sup> Na natnatukla, a tumus a ututnala ne tetek mulo sur gong mulo tol a toltol laulau. Ika ning tik ir tol a toltol laulau, anundala a tena harnangai, e Iesu Karisito a Tena Tostos, ir atalapor tetek e Tamana. <sup>2</sup> I ot i mat sur ir lou langolango pas dala kusun anundala na toltol laulaula, pa ir arop sen a balakut ane God, ning nating kaning on dala. Pa bel i mat sur anundala na toltol laulaula ka, a toltol laulaula anuna taraila rop te na rakrakan hanua.

<sup>3</sup> Ning dala longor ana nuna warkuraila, dala talapor mang dala tasman ot e God. <sup>4</sup> Ning tik i atongi mang, "A tasman e God," ika bel i longor ana nuna warkuraila, i a tena asasongo, pa a momolna bel i kes ono. <sup>5</sup> Ning tik ir longor ana warwara ane God, ir mang momol sur e God. Dala tasmani dala ane God mange: <sup>6</sup> Ning tik i atongi onoi mang ai ane God, ir laun arlar ana lalaun ane Karisito.

### *A tona warkurai*

<sup>7</sup> Na halalik, bel a tona warkurai ne a tumusi tetek mulo, a turaina, ning mulo ka longor tari tagun nating ot. A warkurai ne, mulor mang sur na tastasimulo. <sup>8</sup> Ika a warkurai ning, tuk onone i totoh ot. A momol ana warkurai ne di oroi o e Karisito, pa o mulo otleng, anasa a mormorom i rop amon, pa a talapor momol ka hanot.

<sup>9</sup> Esining i atongi mang i kes ana talapor, ika i nget e tasnalik, a barsan ning kaning ot i kes ana mormorom. <sup>10</sup> Ika ning tik ir mang sur e tasnalik, i laun ana talapor pa bel ta utna kaning ana nuna lalaun ir tolsot sur ir apungani. <sup>11</sup> Ika esining i nget e tasnalik, i kes ana mormorom, pa i hanan ana mormorom, pa bel i tasmani mang i han utaha, anasa a mormorom ka sanakut pas a matana.

<sup>12</sup> A tumtumus tetek mulo a kakakla, anasa di ka kepsen anumulo na toltol laulau ana risana e Karisito.

<sup>13</sup> A tumtumus tetek mulo a tatatan tarai, anasa mulo ka tasman esining i laun tagun nating ot.

A tumtumus tetek mulo a barmanla, anasa mulo ka tolsot pas e Satan.

A tumtumus tetek mulo a kakakla, anasa mulo ka tasman e Tamandala.

<sup>14</sup> A tumtumus tetek mulo a tatatan tarai, anasa mulo ka tasman esining i laun tagun nating ot.

A tumtumus tetek mulo a barmanla, anasa mulo rakrakai, pa a warwara ane God i kes ting na balamulo, pa mulo ka tolsot pas e Satan.

<sup>15</sup> Gong mulo mang sur a rakrakan hanua, pa ututnala otleng ning kaning ia. Ning tik ir mang sur a rakrakan hanua, i asangani mang bel i mang sur a Tamandala. <sup>16</sup> Anasa a ututnala ning la kes ting na rakrakan hanua, larne a laulau a nuknuk ting na balandala, a ram sur a ututnala ning dala oroi, pa a toltol na iaunani ana gongon anundala pa anundala titol. A ututnala ning, bel i han miting ta e Tata, i hanot tagun a rakrakan hanua. <sup>17</sup> A rakrakan hanua pa a laulau a nuknukna lar rarop ka, ika esining i mur a nuknuk ane God, ir laun tikin.

### *A hiruala ane Karisito*

<sup>18</sup> Na natnatukla, onone dala kes ana ararop a pukakiarla. Mulo ka longor tari mang a hirua ane Karisito ir hanot, pa onone a galis a hirua la ka hanot. Larning dala tasmani mang a ararop a pukakiar ka milau. <sup>19</sup> Na hirua ane Karisito la lasan taum ondala, ika la ka han, anasa la bel tagun dala momol. Ngandek ning la tagun

dala momol, lar kes tikin taum ondala. Ika anunla tinan kusun dala i asangani mang la bel tagun dala.

<sup>20</sup> Ika mulo, e Karisito ka saran tar a Talngan Tabu tetek mulo. Pa mulo rop mulo ka tasman tar a momolna. <sup>21</sup> Bel a tumtumus tetek mulo kamkamna mang bel mulo tasman a momolna. A tumtumus tetek mulo anasa mulo ka tasman tar a momolna, pa a momolna bel i kamkamna on ta asasongo. <sup>22</sup> Esining a tena asasongo? Esaning i puai mang e Iesu bel a Karisito. Tik ning i atongi larne, ai a hirua ane Karisito, anasa i puai sen otleng e Tamana pa e Natnalik. <sup>23</sup> Tik ning i puai sen a Nat e God, e Tamana otleng bel i kes onoi. Pa tik ning i patuai talapor o e Natnalik, e Tamana otleng i kes onoi.

<sup>24</sup> I wakak ning a asasaerla rop ning mulo longor tari nating ot ir laun o mulo. Ning i laun o mulo, mulo otleng mulor laun o e Natnalik, pa o e Tamana. <sup>25</sup> Asa ning i lele tari sur ir sarani tetek dala, a lalaun tikin.

<sup>26</sup> A tumus a ututnala ne tetek mulo, sur ar atumarang mulo kusun la ning la mang sur lar ben rongan mulo. <sup>27</sup> A Talngan Tabu ning e Karisito i saran tari tetek mulo, i patap o mulo, pa bel mulo kapan sur tik ir asaer mulo. Anasa a Talngan Tabu i asaer mulo ana ututnala rop. Pa a utna ning i asaer mulo ono i momol, pa bel i asongo. Mulor nuk akes a asasaer ne sur mulor patap o e Karisito.

<sup>28</sup> Momol, a natnatukla, mulor patap tikin o e Karisito, sur gong dala matmataut pa gong dala meme namatana ana nuna tinan ot. <sup>29</sup> Mulo tasmani mang e God a tena tostos, pa mulo tasmani otleng mang la rop ning la tol a tostos a toltol, la na natnat e God.

### 3

#### *Na natnat e God*

<sup>1</sup> Oro! E Tamandala i asangan anuna tnan marmaris tetek dala, ning i atong dala mang dala na natnatnala. I momol ot, dala na natnat e God. A tarai mite na rakrakan hanua bel la tasmani mang dala na natnat e God, anasa bel la tasman e God. <sup>2</sup> Na halalik, onone dala na natnat e God, pa belot di atalapor dala mang lamur dalar mangmangasa. Ika dala tasmani mang, lamur ning e Iesu ir hanot, dalar arlar onoi, anasa dalar bot oroi momoli. <sup>3</sup> Esining i harnanai ana tortorot sur e Karisito ir ulak, i atotohi larning e Karisito i totoh.

<sup>4</sup> Esining i tol a toltol laulau, bel i mur a warkurai ane God, anasa a toltol laulau i a tabun longor ana warkuraila. <sup>5</sup> Pa mulo tasmani mang e Karisito i hanot sur ir kepsen anundala na toltol laulau, pa i ot bel anuna ta toltol laulau. <sup>6</sup> Pa esining i laun o e Karisito, bel i sira tol a toltol laulau. Pa esining i sira tol a toltol laulaula, bel i oroi e Karisito, pa bel i tasmani otleng.

<sup>7</sup> Na natnatukla, gong mulo noren tar tik ir ben arongan mulo. Esining i tol a tostos a toltol, i tostos arlar o e Karisito. <sup>8</sup> Pa esining i tol a toltol laulau, i ane Satan, anasa e Satan i tol a laulauna turpasi ot ana turturkamna. Pa a Nat e God i hanot sur ir kamar sen a titolla ane Satan. <sup>9</sup> La rop ning na natnat e God, bel lar tol ulak a toltol laulaula, anasa a lalaun ane God i kes onla. Bel lar tol ulak a toltol laulau, anasa la na natnat e God. <sup>10</sup> Dala oroi lalan na natnat e God pa na natnat e Satan otleng mange: Esining bel i tol a tostos a toltol, i bel a nat e God, mang otleng larning tetek esining bel i mang sur e tasnalik.

#### *Dalar mang artalai sur dala*

<sup>11</sup> A warwara ning, mulo longori tagun nating ot, mang dalar mang



artalai sur dala. <sup>12</sup> Pa gong dala arlar o e Kain, ning ane Satan, pa i umkol e tasnalik e Abel. Asa kamkamna ning i umkoli? Anasa anuna toltol i laulau, pa a toltol ane tasnalik i tostos.

<sup>13</sup> Na tastasikla, gong mulo kulkulan ning a tarai tagun a rakrakan hanua lar nget mulo. <sup>14</sup> Dala tasmani mang dala ka han kusun a minat sur a lalaun, anasa dala mang sur na tastasindala. Esining belal marmaris kaning ot i kes ana minat. <sup>15</sup> Esining i nget e tasnalik, i a tena umkol a taraila, pa mulo tasmani mang a tena umkol a taraila bel i kibas a lalaun tikin.

<sup>16</sup> Dala tasman a marmaris momol mange: E Iesu Karisito i saran anuna lalaun sur dala. Pa i wakak sur dalar saran anundala lalaun sur na tastasindala. <sup>17</sup> Ning tik, anuna al utna, pa i oroi e tasnalik i kapan, ika bel i marisi, a marmaris ane God bel i kes onoi. <sup>18</sup> Na natnatukla, gong dala maris tik ana warwara ka, pa ana pahandala ka. Dalar maris tik ana wakak a titol momol.

<sup>19</sup> Ning dala maris tik larning, dala tasmani mang dala anuna momolna, pa bel dalar matmataut ning dala kaning ui o e God. <sup>20</sup> Ning a nuknukindala i arup dala, e God i leklek tana ararup ting na nuknukindala, pa i tasman a ututnala rop. <sup>21</sup> Na halalik, ning a nuknukindala bel i arup dala, bel dalar matmataut ning dala kaning ui o e God. <sup>22</sup> Pa ututnala rop ning dala nunungi tana, i sarani tan dala, anasa dala longor ana nuna na warkuraila, pa dala tol a utna ning i gas onoi. <sup>23</sup> A warkurai ane God i mange: Dalar tortorot ana risana e Natnalik, e Iesu Karisito, pa dalar mang artalai sur dala, arlar ana nuna warkurai tetek dala. <sup>24</sup> Esining i longor ana nuna na warkuraila, i laun o e God, pa e God i laun onoi. Pa dala tasmani mang e God i laun ondala, anasa

a Talngan Tabu ning i tabar dala ono, i laun ondala.

## 4

*A tumarang ana propet asasongola*

<sup>1</sup> Na halalik, gong mulo tortorot ororos ka ana tik ning i atongi mang a Talngan Tabu i saran tar a warwara teteki. I wakak sur mulor tohi sur mulor tasman lalani mang i tagun e God o bel, anasa a galis a propet asasongola kane ma na rakrakan hanua. <sup>2</sup> Mulor tasman lalan a Inguna e God manglarne: Esining i atongi mang e Iesu Karisito i hanot a barsan momol, i tagun e God. <sup>3</sup> Ika esining i puai ka, i bel tagun e God. A inguna ning kaning ui onoi, a hirua ane Karisito, ning mulo ka longor tari mang ir hanot, pa onone ka hanot te na rakrakan hanua.

<sup>4</sup> Na natnatukla, mulo ane God, pa mulo ka tolsot pas a propet asasongola, anasa a Talngan Tabu ning kaning o mulo, i leklek kol ta e Satan ning i kes te na rakrakan hanua. <sup>5</sup> A propet asasongola mite na rakrakan hanua, pa anunala na warwara i mur a nuknukin a rakrakan hanua, pa a tarai mite na rakrakan hanua la longor la. <sup>6</sup> Dala tagun e God, pa esining i tasman e God i longor dala. Ika esining bel tagun e God bel i longor tan dala. Larning dala oroi lalan a Talngan Tabu ning i momol, pa a laulau a inguna ning a tena asasongo.

*E God a marmaris*

<sup>7</sup> Na halalik, dalar mang artalai sur dala, anasa a marmaris i han miting ta e God. La rop ning la asangan a marmaris, la na natnat e God, pa la tasman e God. <sup>8</sup> Esining bel i tasman a marmaris, bel i tasman e God, anasa e God a marmaris. <sup>9</sup> E God i asangan anuna marmaris tetek dala manglarne: I sune e Natnalik, takai sot ka, ute na rakrakan

hanua sur dalar laun onoi. <sup>10</sup> A marmaris i mange: Bel dala, dala mang nigo sur e God. Ika, e God ot i mang nigo sur dala, pa i saran tar e Natnalik ning i mat sur ir lou langolango pas dala kusun anundala na toltol laulaula, pa ir arop sen a balakut ane God, ning nating kaning on dala. <sup>11</sup> Na halalik, ning e God i mang kol sur dala larne, i wakak sur dala otleng dalar mang artalai sur dala. <sup>12</sup> Belot tik i oroi tar e God. Ika ning dala mang artalai sur dala, e God i laun ondala, pa anuna marmaris i kes kidol ondala.

<sup>13</sup> Dala tasmani mang dala laun o e God, pa i laun ondala, anasa i ka saran tar a Talngan Tabu tetek dala. <sup>14</sup> E Tamana i saran e Natnalik sur ir Tena Alaun anuna rakrakan hanua, pa mila, mila ka oroi tari, pa mila warwara talapor onoi. <sup>15</sup> Ning tik i patuai mang e Iesu a Nat e God, e God i laun onoi, pa i laun o e God. <sup>16</sup> Pa dala ot dala tasman a marmaris ane God tetek dala pa dala tortorot onoi.

E God a marmaris, pa esining i laun taum ana marmaris, i laun o e God, pa e God i laun onoi. <sup>17</sup> Ana ngas ne, anuna marmaris i kes kidol ondala, sur bel dalar matmataut ana pukakiar a warkurai, anasa te na rakrakan hanua dala laun arlar o e Karisito. <sup>18</sup> Belal matmataut i kes ana marmaris. Ika a kidol a marmaris i kepsen a matmataut. Ning tik i matmataut anasa i nuki mang ir hirua ana warkurai na arkeles teteki, anuna marmaris bel i kidol.

<sup>19</sup> Dala marmaris, anasa e God i maris nigon dala. <sup>20</sup> Ning tik ir atongi mang, "A mang sur e God," ika i nget e tasnalik, i a tena asasongo. Anasa esining bel i mang sur e tasnalik ning i oroi, bel ir mang sur e God ning bel i oroi. <sup>21</sup> Pa i saran tar a warkurai ne tetek dala mange: Esining i mang

sur e God ir mang otleng sur e tasnalik.

## 5

### *A tolsot ana rakrakan hanua*

<sup>1</sup> La rop ning la tortorot mang e Iesu i a Karisito, la na natnat e God. Pa la rop ning la mang sur e tamana, la mang otleng sur e natnalik. <sup>2</sup> Dala tasmani mang dala mang sur na natnat e God mange: Dala mang sur e God, pa dala longor ana nuna warkuraila. <sup>3</sup> Dala mang sur e God mange: Dalar longor ana nuna na warkuraila. Pa anuna na warkuraila bel la ngangaten sur dalar mur la. <sup>4</sup> Anasa la ning na natnat e God, la ka tolsot pas a rakrakan hanua. A rakrakai ning dala tolsot pas a rakrakan hanua onoi mange: anundala tortorot. <sup>5</sup> Esining ir tolsot pas a rakrakan hanua? La ka ning la tortorot mang e Iesu i a Nat e God.

### *A warwara talapor o e Iesu Karisito*

<sup>6</sup> E Iesu Karisito i hanot ana malum pa suluk.\* Bel i hanot ana malum ka, i hanot ana malum pa suluk. A Talngan Tabu i warwara talapor o e Iesu Karisito, anasa a Talngan Tabu i a momolna. <sup>7</sup> Ditol ning ditol warwara talapor onoi ine: <sup>8</sup> A Talngan Tabu, a malum, pa a suluk, ditol rop ditol malmaling taum. <sup>9</sup> Dala kibas pas a warwara talapor anuna tarai, ika a warwara talapor ane God i lekkek kol. Anasa, i ot a warwara talapor ane God ot, pa i warwara o e Iesu a Natnalik. <sup>10</sup> Esining i tortorot ana Nat e God, a warwara talapor ane God kaning ui na balana. Pa esining bel i tortorot ana warwara talapor ane God, i atong e God mang a tena asasongo, anasa bel i tortorot ana warwara talapor ane God o e Natnalik. <sup>11</sup> Anuna warwara

\* **5:6:** Dingla na tena tastamai ana Buk Tabu la nuki mang, a malum i asilang anuna baptais pa suluk i asilang anuna minat.

talapor i mange: E God ka saran tar a lalaun tikin tetek dala, pa a lalaun ning, kaning o e Natnalik. <sup>12</sup> Esining a Nat e God i laun onoi, ka kibas a lalaun. Pa esining a Nat e God bel i laun onoi, bel i kibas a lalaun.

*E Iesu a lalaun tikin*

<sup>13</sup> A tumus a ututnala ne tetek mulo, ning mulo tortorot ana risana e Nat e God, sur mulor tasmani mang mulo ka kibas a lalaun tikin. <sup>14</sup> Dala tasman momoli ning dala nunung tetek e God, sur ta utna arlar ana nuna nemnem, ir longor dala. <sup>15</sup> Pa ning dala tasmani mang ka longor dala, asa rop ning dala nunung suri, dala tasmani mang dalar kibasi tana.

<sup>16</sup> Ning tik i oroi e tasnalik i tol a toltol laulau ning bel i han sur a minat, ir nunung, pa e God ir saran a lalaun teteki. A nunung ne ir nangan la ning anunla na toltol laulau bel i han sur a minat. Ika ning a toltol laulau i han sur a minat, bel a atongi mang mulor nunung onla.† <sup>17</sup> A toltol laulaula rop bel la tostos, ika dingla na toltol laulau bel i han sur a minat.

<sup>18</sup> Dala tasmani mang la rop ning na natnat e God, bel la tol ulak a toltol laulaula. Anasa a Nat e God i tai alar la, pa e Satan bel i tolsot sur ir alaulau la. <sup>19</sup> Dala tasmani mang dala na natnat e God, pa a rakrakan hanua rop i kaning nahai a warkurai ane Satan. <sup>20</sup> Dala tasmani otleng mang a Nat e God ka hanot, pa ka tabar tar dala ana tastasman, sur dalar tasman a momol a God. Dala laun ana momol a God, anasa dala laun ana Natnalik e Iesu Karisito. I a momol a God, pa lalaun tikin. <sup>21</sup> Na natnatukla, mulor tai alar mulo kusun a asasongo na godla.

---

† 5:16: Dingla na tena tastasmai la nuki mang a toltol laulau ning i han sur a minat i warwara o esining i puai sen e Iesu.

## **A Munaur a Pas ane Jon A warwara talapor nigo**

A pas ne e Jon i tumusi. I tumusi tetek a hane, ika a galis a tena tastasmanla la nuki mang a hane i warwara larlar ana lotu, pa na natnatna i warwara larlar ana tena tortorotla. Ning i warwara o e tasna hane a hane ning, i warwara ana lotu ana ning a hanua masik.

Ana pas ne i atai la mang lar mang artalai sur la, pa lar tai alar la kusun a asasongo na tena asaerla.

### **A tinan ana Munaur a Buk ane Jon:**

A kamkama buk ne (1-3)

A marmaris (4-6)

A tumarang ana tena asasongo (7-11)

A ararop na warwara (12-13)

<sup>1</sup> Iau e Jon, a ningnigo, a tumumus tetek u, a hane ning e God i aslang pas u, pa na natnatum, ning a mang kol sur mulo ana momolna. Pa bel ia ka, mila rop otleng ning mila tasman a momolna. <sup>2</sup> Mila mang sur mulo anasa ana momolna ning i laun ondala, pa ir kes tikin taum ondala.

<sup>3</sup> A marmaris, a wakak a toltol pa a bal molmol miting ta e God a Tamandala pa e Iesu Karisito e Natnalik, ir kes taum ondala ning dala kes ana momolna pa dala mang artalai sur dala.

### *Dalar mang artalai sur dala*

<sup>4</sup> A gas kol ning a longori mang na natnatum la mur a momolna, arlar ana warkurai e Tamandala ka saran tari tetek dala. <sup>5</sup> Pa onone a nunung u, wan, sur dalar mang artalai sur dala. Bel a tumus ta tona warkurai tetek u. A warkurai

ka ning dala longor tari nating ot. <sup>6</sup> A marmaris i manglarne: Dalar mur a warkurai ane God. Anuna warkurai, ning nating mulo ka longor tari, i manglarne, mulor laun ana marmaris.

*Mulor tai alar mulo kusun a tena asasongola*

<sup>7</sup> A galis a tena asasongola ning la puai mang e Iesu Karisito bel i hanot a barsan momol, la ka han sarara te na rakrakan hanua. A ngas a taraila ning, la na tena asasongo, pa la na hiruala ane Karisito. <sup>8</sup> Mulor tai alar mulo sur gong mulo suah sen a utna ning mulo ka titol suri. Ika, mulor tur rakrakai sur mulor kibas pas anu-mulo na kidol a arlou. <sup>9</sup> La ning la han masik kusun a asasaerla ane Karisito pa bel la muri, e God bel i kes onla. Ika la rop ning la mur a asasaerla ne, a Tamandala pa e Natnalik dia kes onla. <sup>10</sup> Ning tik ir han tetek mulo anal asasaer ning bel i arlar ana asasaer o e Karisito, gong mulo gasgas pasi pa mulo ben kasi ana numulo na rumaila. <sup>11</sup> Ning tik ir gasgas pasi, i harnangai ana nuna na laulau a titol.

### *A ararop a warwara*

<sup>12</sup> A galis a utna ning ar tumusi tetek mulo, ika bel a mang sur ar tumtumus ana paka buk pa pen. Ika a nuki mang ar geren mulo, par awara mulo, sur a gasgas anundala ir itna kol.

<sup>13</sup> Na natnat a tasimhane ning e God ka aslang pasi, la saran anunla marmaris tetek u.

## A Munatol a Pas ane Jon

*A warwara talapor nigo*

A buk ne e Jon i tumusi. I tumusi tetek ning a tena tortorot a risana e Gaius. I atong wakak teteki anasa i nangan a tena titol ning la han ana Wakak a Warwara. I warwara otleng ana ning a barsan a risana e Diotrepe, ning anuna toltol bel i wakak.

**A tinan ana Munatol a Buk ane Jon:**

A kamkama buk ne (1-4)

E Jon i gas o e Gaius (5-8)

A toltol ane Diotrepe bel i wakak (9-10)

A toltol ane Demetrius i wakak (11-12)

A ararop na warwara (13-15)

<sup>1</sup> Iau, e Jon, a ningnigo, a tumtumus tetek u, a halik e Gaius, ning a mang kol sur u ana momolna.

<sup>2</sup> Halik, a nunung sur anuma keskes ir wakak pa ur laun wakak, larning a ingum i laun wakak. <sup>3</sup> A gas kol ning dingla na tastasindala la hanot, pa la warwara talapor hom mang u mur momol a momolna, pa u laun onoi. <sup>4</sup> Ana nuk a longlongor mang na natnatuk la laun ana momolna, a gas kol, pa bel ta utna ulak ir aleklek anuka gasgas.

*A harnangai tetek a tastasindala ning la han ana Wakak a Warwara*

<sup>5</sup> Halik, u momol ana titol ning u toli tetek na tastasindala, ning la wasira tetek u. <sup>6</sup> Pa dingla tagun la, la warwara talapor tetek a tarai a lotu ana num a marmaris. Pa i wakak ning ur nangan la anal utna ana nunla tinan. A toltol ne e God i gas onoi. <sup>7</sup> La han ana risana e Karisito, pa bel la kibas harnangai tana taraila ning bel la tortorot. <sup>8</sup> Manglarning i wakak sur dalar

nangan a ngas a tarai ning, sur dalar titol taum sur a momolna.

*A lalaun ane Diotrepe pa e Demetrius*

<sup>9</sup> La ka tumus tar a pas tetek a tarai a lotu, ika e Diotrepe ning i mang kol sur ir ningnigo anumulo, bel i longor pas mila. <sup>10</sup> Pa ning ar hanot, ar atai mulo ana ututnala ning i toli, i warwara kumkumna omila. Pa bel i ka i ning, i otleng ne, bel i gasgas pas na tastasindala ning la hanot ana Wakak a Warwara, pa i sairas la ning la mang sur lar gasgas pas la pa i kepsen la kusun a lotu.

<sup>11</sup> Halik, gong u oroi asasaer ana toltol laulau ne, ur mur a wakakna. Esining i tol a wakakna, ai anune God. Pa esining i tol a laulauna, bel i tasman e God.

<sup>12</sup> A taraila rop la warwara talapor o e Demetrius, mang a wakak a barsan, pa anuna momol a asasaerla otleng i warwara talapor onoi. Mila otleng mila warwara talapor onoi, pa u tasmani mang anumila na warwara i momol.

*A ararop a warwara*

<sup>13</sup> A galis a utna ning ar tumusi tetek u, ika bel a mang sur ar tumtumus tetek u ana pen. <sup>14</sup> Ika a nuki mang ar pastek u par awara u.

<sup>15</sup> A bal molmol tetek u. Na halalim mite, la saran anunla marmaris tektek u. Pa u otleng ur saran anuka marmaris tetek na halalindau rop ning la kes tingia.

## A Pas ane Jut

*A warwara talapor nigo*

E Jut i tumus a pas ne. A galis a tena tastasim la nuki mang e Jut a tas e Iesu pa e Jems. Oroí Mt 13:55 pa oroi otleng a warwara talapor ana pas ane Jems.

I tumus a pas ne tetek na tena tortorot. Ning i longori mang a asasongo na tena asaerla la ben rongon la, i tumtumus sur ir atumarang la. Pa i atongi mang a Leklek ir warkurai a tena laulaula. I atai la otleng mang lar mur a Wakak a Warwara, pa lar tur rakrakai ana tortorot.

### **A tinan ana buk Jut:**

A kamkama buk ne (1-2)

A ginina asasongo na tena asaerla (3-16)

Dalar tur rakrakai ana tortorot (17-23)

Dalar rakan aleklek pas e God (24-25)

<sup>1</sup> Iau e Jut, a tena titol oros ane Iesu Karisito pa a tas e Jems. A tumus a pas ne tetek mulo, ning e God a Tamandala ka kabah pas mulo, pa i maris mulo, pa mulo kes ting na tatatai alar ane Iesu Karisito.

<sup>2</sup> E God ir saran a tnan harnan-gai, a tnan bal molmol pa a tnan marmaris tetek mulo.

*Mulor atumarang mulo kusun na asasongo na tena asaer*

<sup>3</sup> Na halalik, a mang kol sur ar tumtumus tetek mulo ana titol ane God ning i alaun pas dala. Ika onone, a nuki mang ar tumtumus ana ning a utna masak. Ar arakrakai mulo, sur mulor tai alar wakak a Wakak a Warwara kusun a hiruala. A Wakak a Warwara ning dala tortorot onoi, pa di ka saran tari tetek a tarai ane God, pa bel tik ir lingir lar pasi. <sup>4</sup> A tumtumus, anasa dingla na tarai

la ka kas kumna tar tetek mulo. Bel la mur a nuknuk e God, pa lar han tostos sur a hinirua, larot ning di ka tumus tari natnating ot ting na Buk Tabu. La lingir laulau a marmaris ane God, pa la atongi mang, “I wakak ka ning dalar tol na toltol a pamuk.” Pa la puain sen anundala a Ningnigo pa anundala Leklek, e Iesu Karisito, i takai sot ka.

<sup>5</sup> Mulo ka tasman a ututnala ne, ika a mang sur ar atai ulak mulo onoi, mang: A Leklek i alaun a tarai Israel mitumo e Ijip, ika lamur, i ahirua sen la ning bel la tortorot ono. <sup>6</sup> Pa angelola otleng, ning bel la mang sur a tiniba na warkurai ning e God i saran tari tanla, pa la han kusun anunla a keskes, e God ka dot akes tar la ana dodot tikin. Pa anone la ka kes ting na mormorom pa la harnanai sur a tnan pukakiar ning dir warkurai la ono. <sup>7</sup> Larka otleng ning e Sodom pa e Gomora, pa na hananuala milau diau. A tarai mitingia la tol a toltol na pamuk, pa la tol a laulauna ulak tetek la ot a barsanla. Na hanua ning, la hirua rop ana iah. Pa anunla hinirua i atumarang dala sur dalar tasmani mang a tnan iah ning bel i sira mat, i kes sur dir tun a tena laulaula ono.

<sup>8</sup> Larka otleng a tarai ning la ka kas tar tetek mulo. La tortorot ana ututnala ning la oroi i ana reresala. Ana reresela ning, la adur ulak la ot ana laulau a toltolla, bel la mang sur lar kes nahai e God, pa la atong laulau na angelo misaot. <sup>9</sup> Ika e Maikel, a ningnigo anuna angelola, ning dia arlak taum o e Satan ana minatna e Moses, bel i atong tar ta laulau a warwara o e Satan. I atongi ka mang, “A Leklek ot ir akadik u.” <sup>10</sup> Ika a tarai ne la warwara laulau ana utna ning bel i talapor tetek la. Pa anunla a mananos i arlar ka ana mananos anuna inagoila, ning la muri ka a

nuknuk ana palaonla. Ine a utna ning lar hirua ono.

<sup>11</sup> Ir laulau kol tetek la ning! La mur a toltol ane Kain\*. Pa la arlar o e Balam†, ning i tol ka a laulau a titol sur ir kibas mani onoi. Pa lar hirua arlar o e Kora‡, esaning i nigon pas a tarai ning la gilam ris kusun e God, pa la hirua rop. <sup>12</sup> A tarai ning, la arlar ana dur a utna, ning la kes taum o mulo ting na utna na hangan. La tabar masur pas la ot, pa bel la hanrawai a tarai masik. La arlar ana kokok a bakut ning a wuwu i wus taltali, pa kiar bel i punga. La arlar otleng ona rakaila ning bel la wai ana kalang a wai, la ka mat. Di ka gat sen la, pa ine a munaur a minatinla. <sup>13</sup> La arlar ana tnan top ning i takube, pa nunla na toltol na meme, ning bel la sira meme ono, i hanot talapor arlar ana busana. Pa la arlar otleng ana nangnangla ning bel la kes ting na ngasinla, la han taltal ka, pa e God ka sang tar a tnan mormorom sur la, ning bel ir rarop.

<sup>14</sup> Pa e Enok otleng, mais a mangis a tarai o e Adam, ka atong tar a warwara na propet onla mang, “Oroi i, a Leklek ir hanot ana nuna galis a rip a totoh na angelo, <sup>15</sup> sur ir warkurai a tarai rop. Pa la rop ning bel la mur a nuknukna e God, lar hirua ana warkurai, ana anunla na laulau a titol ning la ka tol tari, pa ana laulau a warwara ning a laulau a tarai la ka atong tari ana Leklek.”

<sup>16</sup> A tarai ne, la na tena abereng wara pa na tena linglingir. La mur a laulau a nuknukinla, pa la aitna pas la ot. La amoro pas ka a tarai ana anunla na namnamin a warwara, sur lar kibas ta utna kusun la.

*Mulor arakrakai anumulo a tortorot*

<sup>17</sup> Ika mulo, na halalik, mulor nuk pas a warwarala anuna aposella ane Iesu Karisito anundala a Leklek, ning la ka atai nigon tar mulo ono. <sup>18</sup> La ka atong tari ta mulo mang, “Ana ararop a pukakiarla, al tarai lar atong laulau e God, pa lar mur a nuknukinla, ning bel i arlar ana nuknuk e God.” <sup>19</sup> Ine a tarai ning la pagal mulo. La mur ka a nuknuk mite na rakrakan hanua, pa a Talngan Tabu bel i kes onla.

<sup>20</sup> Ika mulo, na halalik, ir wakak ning mulor arakrakai anumulo a totoh a tortorot, pa mulor nunung ana rakrakai ana Talngan Tabu. <sup>21</sup> E God i sira mang kol sur mulo pa mulor kes milau i pa mulor noreni sur ir mang bolbolos sur mulo. Pa mulor harnanai sur anundala Leklek e Iesu Karisito ning ir tabar mulo ana lalaun tikin, anasa i maris mulo.

<sup>22</sup> Mulor asangan a marmaris tetek la ning a nuknukinla i talar. <sup>23</sup> Pa mulor kepsen kapit pas dingla na tarai ning kaning na iah pa mulor alaun la. Pa tetek dingla na tarai otleng mulor asangan a marmaris pa mulor matmataut, sur gong mulo kibas anunla na toltol. Pa mulor matatan anunla na kaen ning i dur ana anunla na laulau a toltol.

*A warwara na atong aleklek e God*

<sup>24</sup> Dalar atong aleklek pas e God, ning i tolsot pas sur ir tai alar mulo sur gong mulo punga, pa ir atur mulo namatan anuna matatar, ana tnan gasgas pa bel ta artitui ir kibas mulo. <sup>25</sup> Takai ka a God pa i anundala a Tena Alaun, anasa ana minat e Iesu Karisito anundala a Leklek. Anunai ot a matatar, a keskes a leklek, a rakrakai pa a warkurai, tagun na raula ning ka rop, pa onone, pa bel ir rarop. Amen.

\* 1:11: Oroi Stat 4:3-8 † 1:11: Oroi Namba 22-24 ‡ 1:11: Oroi Namba 16

## A Tatatai ane Jon

### *A warwara talapor nigo*

E Jon i tumus a buk ne. I ning a halinla ning a bonot pa pisir naur a kakak a asaer ane Iesu. I tumus a buk ne, ning i kes na dodot tumo na lolo Patimos. I tumusi diono na bonot pa dilima na rau lamur tana tinan ane Iesu usaot na langit. Ana rau ning, a tarai a lotu la pastek a galis a mamahat, pa tarai la alaulau la pa di um kol a galis onla otleng. E Jon i tumus a buk ne anasa i mang sur lar tur rakrakai pa lar nuk pas e Iesu.

I atai dala mang e God i tasman a ututnala rop ning ir hanot, pa ir tolsot pas e Satan. Pa ana ararop a rakrakan hanua, a mamahat ning dala pasteki te lapiu ir rarop. Pa e God ir alaun pas a tarai ning la tortorot, pa ir warkurai a tarai ning bel la tortorot. Pa ka sang tar a wakak a hanua sur la ning anunai.

A galis a utna te na buk ne i arlar ana warwara larlar.

### **A tinan ana buk Tatatai:**

A kamkama buk ne (1:1-8)

A tumtumus tetek a tarai a lotu ting na mais a hanua (1:9-3:22)

A Leklek i sapang a buk ning di ka hin tari (4:1-8:1)

A mais a angelo la wus mais a tawuru (8:2-11:19)

A dregon pa naur a rokoio na inagoi (12:1-13:18)

Na tatatai (14:1-15:8)

Mais a besen a balakut ane God (16:1-21)

E Babilon i punga pa e God i tolsot pas e Satan (17:1-20:10)

A pukakiar a warkurai (20:11-15)

A tona langit pa tona rakrakan hanua (21:1-22:6)

A ararop a warwara (22:7-21)

<sup>1</sup> A buk ne, a warwara puasa ane Iesu Karisito, ning e God i saran

tari tana, suir asangan tar anuna na tena titol oros ana sa ning milau ir hanot. E Iesu i sune sen anuna angelo tetek anuna tena titol oros e Jon, suir warwara puasa ana ututnala ne tana. <sup>2</sup> E Jon i warwara talapor ana ututnala rop ning ka oroi tari. Ine a utna ning, a warwara ane God pa a warwara talapor ane Iesu Karisito. <sup>3</sup> Esining ir was a warwarala na propet ne ir angis, pa la otleng ning lar longori pa lar muri, la otleng lar angis, anasa a taem ning a ututnala ne ir hanot ka milau.

*A tumtumus ane Jon tetek a tarai a lotu ting na mais a hanua*

<sup>4</sup> Iau e Jon, a tumtumus tetek mulo a tarai a lotu ting na mais a hanua tumo na papar Esia.

A marmaris pa a bal molmol tetek mulo ta esaning i laun nigo, i laun onone pa ir hanot lamur, pa tana mais a ingun otleng kanisa lanigo na nuna keskes a king, <sup>5</sup> pa ta e Iesu Karisito, i a momol a tena warwara talapor o e God, a ningnigo tanla ning lar laun ulak kusun a minat, pa a ningnigo anuna kingla te na rakrakan hanua.

I maris dala, pa i alangolango pas dala kusun anundala na toltol laulau ana sulukna, <sup>6</sup> pa i akes dala sur dalar warkurai taum onoi pa sur dala na tena artabar tetek e Tamana, esining anuna God. Dala na tena artabar sur dalar titol tetek e God. A matatar pa a rakrakai rop i kes o e Iesu Karisito, bel ir rop pa bel ir rop. Amen.

<sup>7</sup> Oroi, i han purum ana diah bakut,

pa a matana tarai rop lar oroi i,

pa la otleng ning la so tari,

pa a mangis a tarai rop te na rakrakan hanua lar domos anasa onoi.

Ir hanot lar otning. Amen.



<sup>8</sup> A Leklek e God i atongi mang, “Iau a Alpa pa Omega\*, esaning i laun nigo, i laun onone pa ir hanot lamur, esaning i rakrakai kol.”

*E Jon i oroi takai i arlar ana Nat a Barsan*

<sup>9</sup> Iau e Jon, a tasimulo pa a halimulo ning dala tur taum o e Iesu ana kankan, pa ana nuna matanitu pa a tuntunur rakrakai ning dala kilang a kankan. A kes na dodot tumo na lolo Patimos, anasa a warawai ana warwara ane God, pa a warwara talapor ane Iesu.

<sup>10</sup> Ana pukakiar anuna Leklek† a bukus ana Talngan Tabu, pa tumo lamur tak, a longor a tnan elngen takai, i arlar ana tawuru. <sup>11</sup> I atongi larne, “A utna ning u oroi i, ur tumus akesi ana buk ning di hini pa ur saran seni utumo tetek a tarai a lotu ona mais a hanua ne: Epeses, Smerna, Pergamum, Tiatira, Sardis, Piladelpia pa Lao-disia.”

<sup>12</sup> A talingir suar oroi esining i warwara tetek iau. Ning a talingir, a oroi a mais a turtur a lam na gol.

<sup>13</sup> Pa na arpotor tana mais a turtur a lam a oroi takai i “arlar ana Nat a Barsan,” i mermer ana barbarah a kaen i barah misaot tuk tumo na naur a hana, pa i dot a malwasna ana inau na gol. <sup>14</sup> A pukulna pa hih a pukulna dia kokok kol, arlar ana hih a sipsip, pa i arlar otleng ana busa na top, pa naur a kalso matana i arlar ana irnga na iah.

<sup>15</sup> Naur a hana dia arlar ana bras ning di ka tun totoh tari ana iah, pa a elngena i arlar ana unga na malum ning i naro. <sup>16</sup> I tong mais a nangnang ana sot a kuna, pa a liwan na harum naur a risna rop dia harat kol, kaning na pahana i gom pasi. Pa patarna i arlar ana kamis ning i sasai kol.

<sup>17</sup> Ning a oroi i, a punga purum tar napir naur a hana arlar ana minat. Lamur i suah tar a sot a kuna saot hok, pa i atongi mang, “Gong u matmataut, iau a ningnigona pa araropna. <sup>18</sup> Iau a lalauna. Ia ka mat pas, oroi i, ia ka laun tikin pa a tong akes a kila ana minat pa ana hanua Hedes, a hanua anunla ning la mat.

<sup>19</sup> “Ur tumusi ma a ututnala ning u ka oroi tari: a ututnala ning ka hanot pa a ututnala ning ir hanot lamur. <sup>20</sup> Ine a kamkama ututnala na pidik ana mais a nangnang ning u ka oroi tari te na sot a kuk, pa mais a turtur a lam na gol: A mais a nangnang i tur aslang a angelola anuna tarai a lotu ting na mais a hanua, pa mais a turtur a lam i tur aslang a tarai a lotu ting na mais a hanua.

## 2

*A warwara tetek a tarai a lotu tumo e Epeses*

<sup>1</sup> “Ur tumtumus tetek a angelo anuna tarai a lotu tumo e Epeses mang:

Na warwara ne anun esaning i tong mais a nangnang ana sot a kuna, pa i han potor ting na mais a turtur a lam na gol.

<sup>2</sup> A tasman anumolo na titol pa anumolo na rakrakai a titol, pa anumolo a tuntunur rakrakai ning mulo kilang a kankan. A tasmani mang bel mulo noren tar na laulau a tarai. Pa mulo ka lar tar la ning la atong la na aposel, ika belsur la na aposel momol, pa mulo ka oroi lalan la mang na tena asasongo.

<sup>3</sup> Mulo ka kilang a kankan anasa mulo anuki, ika bel mulo palaona ngorngoro, mulo gomo rakrakai ot.

<sup>4</sup> Ika a tiu mulo ana utna ne: Bel mulo mang sur iau ma, arlar ning nating mulo mang sur

\* **1:8:** A Alpa a ningnigo na leta ana warwara Grik, pa Omega a ararop a leta. † **1:10:** A pukakiar anuna Leklek a kamkam a warwara mang a ningnigo na pukakiar ana wik ning di akinalang a kamkamtur ulak ane Iesu.

iau. <sup>5</sup> Mulor nuk pas anumulo a wakak a keskes lanigo ning mulo ka punga tar kusuni! Mulor lingir a nuknukimulo, pa mulor tol ulak a anumulo na titol ning lanigo mulo toli. Ning bel mulor lingir a nuknukimulo, ar hanot tetek mulo, par kibas sen anumulo na turtur a lam kusun a ngasna. <sup>6</sup> Ika takai a utna ine ning mulo toli i wakak: Mulo nget a titolla anun na tarai ning la mur a asaer ane Nikolas, ning iau otleng a ngeti.

<sup>7</sup> Esining a talngana kaning, i wakak sur ir longor a warwara ning a Talngan Tabu i atongi tetek a lotula. Esining i tolsot pas a harum, ar malmaling pasi suir hangan miting na rakai a lalaun, ning kaning na Paradais ane God.

*A warwara tetek a tarai a lotu tumo e Smerna*

<sup>8</sup> “Ur tumtumus tetek a angelo anun na tarai a lotu tumo e Smerna mang:

Na warwara ne anun esaning a ningnigona pa a araropna, ning i mat pas, pa i laun ulak.

<sup>9</sup> A tasman a kankan ning i monong mulo, pa anumulo a kapan a keskes, ika mulo kes na leklek ot! A tasman a warwara laulaula ning dingla na tarai la atongi o mulo. La ning, la atongi mang la na te Juda, ika belsur la na te Juda, la tarai ane Satan. <sup>10</sup> Gong mulo matatan a kankan ning milau ir hanot tetek mulo. Oro i, e Satan ir akas tar dingla na tarai o mulo uting na rumai a dodot suir lar mulo, pa mulor kilang a kankan ana ning a bonot a pukakiar. Mulor tur rakrakai ot ana anumulo a tortorot tuk ana pukakiar ning mulor mat ono, par saran tar a lalaun tetek mulo, larning di saran a arlou tetek tik ning i tolsot pas a arsoksok.

<sup>11</sup> Esining a talngana kaning, i wakak sur ir longor a warwara ning a Talngan Tabu i atongi tetek

a lotula. Esining i tolsot pas a harum, a munaur a minat bel ir alaulau i.

*A warwara tetek a tarai a lotu tumo e Pergamum*

<sup>12</sup> “Ur tumtumus tetek a angelo anuna tarai a lotu tumo e Pergamum mang:

Na warwara ne anun e esaning anuna liwan na harum naur a risna rop dia harat kol.

<sup>13</sup> A tasman a hanua ning mulo kes ia, a hanua ning e Satan i kes na king ia. Ika mulo tur rakrakai ana risak. Anumulo a tortorot bel i han masak kusun iau, ning di um kol e Antipas. Esaning anuka momol a tena warwara talapor, ning di um koli ting na numulo a hanua, ning e Satan i kes ia.

<sup>14</sup> Ika a tiu mulo ana ututnala ne: Dingla na tarai kaning na arpotor tamulo, la ka mur a asaer ane Balam, esaning i asaer e Balak suir asobor a tarai Israel pa la tol a toltol laulau, ning la ien a utna na hangan ning di ka artabar tar ono tetek a asasongo na godla, pa la tol na toltol a pamuk. <sup>15</sup> Larka otleng ning, dingla na tarai o mulo la ka mur a asaer ane Nikolas. <sup>16</sup> Mulor lingir a nuknukimulo! Ning bel, ar hanot kapit tetek mulo, par harum taum onla ana liwan a harum ning kane na pahak a gom pasi.

<sup>17</sup> Esining a talngana kaning, i wakak sur ir longor a warwara ning a Talngan Tabu i atongi tetek a lotula. Esining i tolsot pas a harum, ar tabari on ta mana ning i kes kumna. Pa ar saran tar otleng a kokok a hat di ka tumus tar a tona rising ono, ning bel tik i tasmani. I sot ka, ning ar saran tar a hat ne tana ir tasmani.

*A warwara tetek a tarai a lotu tumo e Tiatira*

<sup>18</sup> “Ur tumtumus tetek a angelo anuna tarai a lotu tumo e Tiatira mang:

Na warwara ne anuna Nat e God esaning naur a kalso matana

i arlar ana irnga na iah, pa naur a hana dia arlar ana bras ning di ka tun totoh tari ana iah.

<sup>19</sup> A tasman a titolla ning mulo toli, anumulo na marmaris, anumulo na tortorot, anumulo na titol na harnangai pa numulo na tuntunur rakrakai ning mulo kilang a kankan. Pa tasmani mang anumulo na titol anone, la itna kol tana anumulo na titol ning mulo toli nating.

<sup>20</sup> Ika a tiu mulo ana utna ne: Bel mulo lu sen e Jesabel, a hane ning i atongi mang i a propet. I asaer rongon anuk na tena titol oros, sur lar tol a toltol na pamuk pa sur lar ien a utna ning di ka artabar tar ono tetek a asasongo na godla. <sup>21</sup> Ia ka saran tar a taem tana suir lingir a nuknukna kusun anuna pamuk a toltolla, ika bel i mang. <sup>22</sup> Oroï, ar saran a tnan tinsaman tana pa ir sira borbor ka ana logo ngasna. Pa la otleng ning la tol a pamuk a toltol taum ono, pa bel la lingir a nuknukinla kusun na toltol ane Jesabel, ar saran a rakrakai a kankan tetek la. <sup>23</sup> Par um kol na natnat e Jesabel, sur a tarai a lotu rop lar tasmani mang a tasman a balan a tarai pa a nuknukinla, par kelesi tetek mulo taktakai arlar ot ana numulo na titol.

<sup>24</sup> Ika mulo tingia e Tiatira ning bel mulo mur a asaer ane Jesabel, pa bel mulo mur a ututnala ne di atongi mang a rakrakai a utna na pidik ane Satan, a atongi tamulo mang, bel ar suah ulak tar ta mamahat saot o mulo. <sup>25</sup> A utna rop ning mulo tol akesi mulor tur rakrakai ono tuk ning ar hanot.

<sup>26-27</sup> Esining i tolsot pas a harum, pa i tolsot pas a nuknukik tuk ana araropna, ar saran tar a warkurai tana larot a warkurai ning e Tata i saran tari tak, suir warkurai a tarai miting na matanitu rop. 'Ir warkurai rakrakai la ana bulse na aen,

pa ir miren la arlar ning di pagal gingini a kuro ning di toli ona piopap.' *Buk Song 2:9*

<sup>28</sup> Pa ar tabari otleng ana matlai.

<sup>29</sup> Esining a talngana kaning, i wakak sur ir longor a warwara ning a Talngan Tabu i atongi tetek a lotula.

### 3

*A warwara tetek a tarai a lotu tumo e Sardis*

<sup>1</sup> "Ur tumtumus tetek a angelo anuna tarai a lotu tumo e Sardis larne:

Na warwara ne anun esaning i tong mais a Inguna e God pa mais a nangnang.

A tasman anumulo na titol. A tarai la atongi mang mulo laun, ika mulo ka mat. <sup>2</sup> Mulor mata, pa mulor arakrakai anumulo na wakak a toltol ning i mang sur ir mat, anasa a oroi i mang, anumulo na titol belot i kidol namatana e God anuki. <sup>3</sup> I maining mulor nuk pas a asaer ning mulo ka kibas pasi pa mulo ka longor tari, mulor longor ono pa mulor lingir a nuknukimulo. Ika ning bel mulor mata, ar hanot tetek mulo arlar ana tena kinkinau pa bel mulor tasmani nangse ar hanot tetek mulo.

<sup>4</sup> Ika dingla o mulo tingia e Sardis, bel la adur anunla na kaen. Lar han taum hok, lar mermer ana kokok a kaen, anasa anunla na lalaun i tostos. <sup>5</sup> Esining i tolsot a harum, ir mermer larne ana kokok a kaen. Pa bel ar kepsen a risana miting na buk a lalaun, par atong puasa i namatana e Tata pa anuna angelola.

<sup>6</sup> Esining a talngana kaning, i wakak sur ir longor a warwara ning a Talngan Tabu i atongi tetek a lotula.

*A warwara tetek a tarai a lotu tumo e Piladelpia*

<sup>7</sup> "Ur tumtumus tetek a angelo anuna tarai a lotu tumo e Piladelpia larne:

Na warwara ne anun esaning i tostos, pa i momol. I tong a ki ane Dewit, pa ning ir sapang a taman, bel tik ir tagar lar pasi, pa ning ir tagar, bel tik ir sapang lar pasi.

<sup>8</sup> A tasman anumulo na titol. Oroï, ia ka sapang tar a taman salanigo tamulo, ning bel tik ir tagar lar pasi. A tasmani mang a rakrakaimulo bel i itna, ika mulo mur ot anuka warwara, pa bel mulo puai sen a risak. <sup>9</sup> La ning a tarai ane Satan ning la atongi mang la na te Juda, ika bel, la na tena asasongo. Ar warkurai la sur lar han tetek mulo pa lar kes ana bokona hanla salanigo tamulo, pa lar atong puasa i mang iau a maris mulo. <sup>10</sup> Ning a tnan lalar ir hanot te na rakrakan hanua rop, suir lar la ning la kes te lapiu, ar tai alar mulo ana pukakiar ning, anasa mulo mur anuka warkurai sur mulor tur rakrakai ning mulo kilang a kankan.

<sup>11</sup> Milau kama ar hanot. Mulor tong arakrakai tar asaning mulo ka kibas pasi, sur gong tik i kibas anumulo a arlou, ning e God ir saran tari tamulo, larning di saran tar a arlou tan tik ning i tolsot pas a arsoksok. <sup>12</sup> Esining i tolsot pas a harum, ar aturi sur i a pos a rumai a artabar anuna God anuki pa bel ir purum ulak kusuni. Pa ar tumus a risan a God anuki ono, pa risan a hanua anuna God anuki, a tona Jerusalem, ning ir han purum misaot na langit kusun a God anuki. Pa ar tumus tar otleng a tona risak ono.

<sup>13</sup> Esining a talngana kaning, i wakak sur ir longor a warwara ning a Talngan Tabu i atongi tetek a lotula.

*A warwara tetek a tarai a lotu tumo e Laodisia*

<sup>14</sup> “Ur tumtumus tetek a angelo anuna tarai a lotu tumo e Laodisia larne:

Na warwara ne anun esaning di atongi Amen, a tena warwara

talapor ane God ning i momol kol, pa kama akakes ane God.

<sup>15</sup> A tasman anumulo na titol. Bel mulo kotkoto pa bel mulo laplapang otleng. A mang sur mulor kotkoto o mulor laplapang. <sup>16</sup> Ar muraen sen mulo kusun a pahak, anasa mulo laplapang siklik ka, bel mulo laplapang momol, pa bel mulo kotkoto. <sup>17</sup> Mulo atongi mang, ‘Mila gongon, mila suah taum a galis a gongon pa bel mila kapan sur ta utna.’ Ika bel mulo oroï lalani mang anumulo a keskes bel i wakak, mulo pot na marmaris, mulo kapan, mulo kut pa mulo mengere. <sup>18</sup> A nangan mulo ana nuknukla ne: Mulor lou a gol tak, ning di ka tun totoh tari ana iah, sur mulor gongon ono. Pa mulor lou otleng a kokok a kaen pa mulor pipisi, sur mulor pipis alar mulo sur gong mulo meme, anasa mulo mengere ka. Pa mulor lou a marasin tak pa mulor suahi ana naur a kalso matamulo, sur mulor tai wakak.

<sup>19</sup> La ning a maris la, a sira saran a rakrakai a warwara tetek la pa a sira atostos la. I maining mulor rakrakai sur mulor mur a tostos a toltol pa mulor lingir a nuknukimulo. <sup>20</sup> Oroï, a tur ting na taman pa a pinpidir. Ning tik ir longor a elngek pa ir sapang a taman, ar kas teteki, pa ar hangan taum onoi, pa i, ir hangan taum hok.

<sup>21</sup> Esining i tolsot pas a harum, ar malmaling sur miar kes taum ana nuk a keskes a king, larning a tolsot pas a harum, pa a kes taum o e Tata ana nuna keskes a king.

<sup>22</sup> Esining a talngana kaning, i wakak sur ir longor a warwara ning a Talngan Tabu i atongi tetek a lotula.”

## 4

*A lotu saot na langit*

<sup>1</sup> Lamur a tai, a oroi pas a taman i sapang saot na langit. Pa elngena esaning a longor nigon tari, ning i warwara tetek iau arlar ana tawuru, i atongi mang, “Han kas ute, ar asangan tar u ana sa ning ir hanot lamur.” <sup>2</sup> Ono otning a bukus ana Talngan Tabu. Pa salanigo tak, a oroi a keskes na king saot na langit, pa takai i kes tar ono. <sup>3</sup> Pa esaning i kes tar ana keskes na king, i talapor arlar ana naur a hat ning a matandiau i abit, ning di atong diau mang jaspas pa karnelian. Pa pakasir i tur talilis pas a keskes a king, i tatatai arlar ana wakak a hat ning di atongi a emeral. <sup>4</sup> Pa naur a bonot pa diat a keskes na king la tur talilis a keskes na king ning, pa naur a bonot pa diat a ningnigo kaning la kes tar tingia. La mermer ana kokok a kaenla, pa ting na pukulunla la suah na kukuh a king ning di toli ana gol. <sup>5</sup> A pil, a pupugur pa unga, ditol hanot miting na keskes na king. Pa salanigo na keskes a king, mais a lam kaning la irnga. La ning a mais a ingun e God. <sup>6</sup> Ting otleng napir a keskes a king, ning a utna i tatatai arlar ana puka tasi ning di toli ana galas, pa i talapor kol.

Ting na arpotor, diat a lalaun a utna la tur talilis a keskes a king, a kalso matanla i bonot arop a palaonla, salanigo pa tumo lamur. <sup>7</sup> A ningnigo na lalaun a akakes i arlar ana laion, a munaurna i arlar ana bulumakau, a munatolna a patarna i arlar ana barsan, pa mundiatna i arlar ana manigulai ning i rowoi. <sup>8</sup> Diat a lalaun a akakes ne, taktakai onla, diono na dehelna, pa a kalso matanla i bonot arop a palaonla, pa ting nahai na dehelinla otleng. Ana morom pa kamis, bel la manah ana atong a warwara mang,

“I totoh, i totoh, i totoh,

A Leklek e God, esaning i rakrakai kol,  
esaning i laun nigo, i laun onone pa ir hanot lamur.”

<sup>9</sup> Esaning i kes ana keskes a king, ning i laun tikin bel ir rop pa bel ir rop, diat a lalaun na akakes ne la aitna pasi, la hanrawai pa la atong wakak teteki. A tuka kamis rop ning la toli larne, <sup>10</sup> naur a bonot pa diat a ningnigo otleng la punga hanrawai namatana esaning i kes ana keskes a king, pa i laun tikin bel ir rop pa bel ir rop, pa la lotu teteki. La suah tar anunla na kukuh a king salanigo na keskes a king pa la atongi mang,

<sup>11</sup> “Anumila a Leklek pa anumila a God,  
i tostos kol sur dir aitna pas u pa dir hanrawai u,  
pa i tostos kol ning ur tong akes a rakrakai,  
anasa u, u akes a ututnala rop.  
U akes la ana nuknukim ot,  
pa la laun ka hom.”

## 5

*A buk ning di ka hin tari pa a Nat a Sipsip*

<sup>1</sup> Lamur a oroi a buk ting na sot a kuna esaning i kes ana keskes a king. A buk ning di ka hin tari, di ka tumtumus rop tar ana naur a risna, pa di ka bulit alar tari ana mais a bulit. <sup>2</sup> Pa a oroi a rakrakai a angelo i deke ana nlan elngena mang, “Esi ning i tostos suir pilik sen mais a bulit ne mite na buk, pa ir paki?” <sup>3</sup> Bel tik saot na langit, pa te lapiau, pa tingui na piu i tolsot pasi suir pak a buk ning, o ir oroi i. <sup>4</sup> A tangis kol iau, anasa bel tik i tostos suir pak a buk ning, o ir oroi a tumtumus tingui na tinine. <sup>5</sup> Ning a ningnigo i atongi tak mang, “Gong u tangis! Oroi, a laion anuna mangis a tarai Juda, a wakir e Dewit, ka tolsot pas a hiruala anunai. I tolsot pasi suir

pilik sen mais a bulit pa ir pak a buk ning.”

<sup>6</sup> Lamur a oroi a Nat a Sipsip, i tai arlar larning di ka um kol tari, i tur napir a keskes a king, pa diat a lalaun na akakes taum ana ningnigola la tur talilis pasi. A Nat a Sipsip ning, mais a komna, pa mais a kalso matana. La ning, mais a inguna e God, ning i sune sen la ute na rakrakan hanua rop.

<sup>7</sup> A Nat a Sipsip i han pa i kibas pas a buk miting na sot a kuna esaning i kes ana keskes a king. <sup>8</sup> Ning ka kibas a buk ning, diat a lalaun a akakes pa naur a bonot pa diat a ningnigo, la punga hanrawai tar salanigo tana Nat a Sipsip. La rop la tong taktakai a gita pa taktakai a besen ning di toli ana gol. A besenla ning, la bukus ana ning a ngas a bulit, ning di tuni pa sasawana i toboh wakak. La ning, a nunungla anuna tarai ane God.

<sup>9</sup> Pa la saken a tona saksak larne, “U ot u tostos sur ur kibas pas a buk pa ur pilik sen na bulit kusuni,

anasa di um kol u,

pa u lou lingir pas a tarai tetek e God ana sulukim,

a tarai tagun a mangis a tarai rop, a tarai tagun na urmatana ngas a warwara rop, a tarai mite na hananuala rop pa a tarai tagun a matanitula rop.

<sup>10</sup> U ka akes tar la sur lar warkurai taum hom,

pa la na tena artabar tetek anundala a God,

pa lar warkurai te na rakrakan hanua.”

<sup>11</sup> Lamur a tai pa a longor a elngen a galis a angelo ning la tur talilis pas a keskes a king pa diat a lalaun a utna pa ningnigola. A angelola la galis kol, bel tik ir was lar pas la. <sup>12</sup> La saksak ana tnan elngenla larne,

“I tostos kol sur a Nat a Sipsip ning di um kol tari

ir tong akes a warkurai, a galis a gongon, a tastamai pa rakrakai.

Pa i tostos kol ning dir hanrawai i, dir aitna pasi pa dir atong aleklek pasi!”

<sup>13</sup> Pa a longor na elngen na akakes rop saot na langit pa te na rakrakan hanua pa tingui na piu pa tingui na puka tasi, a ututnala rop ning di akes la, la saksak larne, “Tetek esaning i kes ana keskes a king, pa tetek a Nat a Sipsip, dalar atong aitna pas diau, dalar hanrawai diau pa dalar aitna pas diau.

Pa diar tong akes a rakrakai, bel ir rop pa bel ir rop.”

<sup>14</sup> Pa diat a lalaun na utna la atongi mang, “Amen,” pa na ningnigo la punga hanrawai pa la lotu.

## 6

### *A Nat a Sipsip i pilik sen na bulit*

<sup>1</sup> A oroi ning a Nat a Sipsip i pilik sen a ningnigo na bulit miting na mais a bulit kaning na buk. A longor ning a halin diat a lalaun na akakes i arkabah ana elngena i arlar ana pungpugur mang, “Han ute!” <sup>2</sup> Pa ning a tai, a oroi pas a kokok a hos salanigo tak. Pa esaning i kes saot ono, i tong pas a kaba raurau na harum, pa di saran tar a kukuh na king tana. I han ana rakrakai suir tolsot pas a harum.

<sup>3</sup> Ning a Nat a Sipsip i pilik sen a munaur a bulit, a longor munaur a lalaun na akakes i atongi mang, “Han ute!” <sup>4</sup> Ning a hos maleng i hanot i kubar kol. Pa esaning i kes saot ono di saran tar a rakrakai tana suir kibas sen a molmol mite na rakrakan hanua, pa a tarai lar um kol artalai la. Pa di saran tar a tnan liwan na harum tana.

<sup>5</sup> Ning a Nat a Sipsip i pilik sen a munatol a bulit, a longor a munatol a lalaun na utna i atongi mang, “Han ute!” Ning a tai, a oroi pas a mutmut a hos salanigo tak. Pa esaning i kes saot ono, ting na kuna i tong pas a sikel. <sup>6</sup> Pa longor takai a utna i arlar ana elngen takai na arpotor indiat a lalaun na akakes i atongi mang, “A matana utna ir abit kol. Dir lou takai a kilogrem a wit ana takai a denaria,\* pa dir lou natol a kilogrem a bali† otleng ana takai a denaria. Ika gong di alaulau naur a utna ne: a wel a oliw pa wain.”

<sup>7</sup> Ning a Nat a Sipsip i pilik sen a mundiat a bulit, a longor a elngen a mundiat a lalaun na akakes i atongi mang, “Han ute!”

<sup>8</sup> Ning a tai, a oroi pas a kubus a hos salanigo tak. Pa esaning i kes saot ono a risana A Minat. E Hedes, a hanua anunla ning la mat, i mur milau i. Di saran tar a warkurai tan diau sur diar asalar a tarai mite na rakrakan hanua ona diat a kunum a tarai pa diar um kol ning a kunum a tarai onla. Diar um kol la ana liwan na harum, pa munurak, pa na laulau a tinsaman, pa na rokoio a inagoi otleng mite na rakrakan hanua.

<sup>9</sup> Ning a Nat a Sipsip i pilik sen a mundilima bulit, a oroi a ingunla ning di ka um kol tar la, anasa la mur sot pas a warwara ane God pa la warwara talapor ono. A oroi la ting lain a logo na tun artabar. <sup>10</sup> La arkabah ana tnan elngenla mange, “Leklek, u a King, u totoh pa u momol. Nangse ma ur warkurai la ning la kes te na rakrakan hanua pa ur keles a sulukimila tetek la?” <sup>11</sup> Lamur di saran tar taktakai a kokok a kaen tanla rop. Pa di atai la mang, lar kes siklik ulak pas, tuk ning dir um kol la otleng ning la titol taum

onla ana Wakak a Warwara, pa na tastasinla ana tortorot. Dir um kol la arlar onla ning di ka um kol nigon tar la, tuk a wawasinla ir sot.

<sup>12</sup> A oroi ning a Nat a Sipsip i pilik sen a mundiono na bulit. A tnan mamais i gulgule rakrakai kol, a kamis i mutmut arlar ana mutmut a kaen a tobo ning di toli ana hih a meme, pa a kalang i kubar arlar ana suluk. <sup>13</sup> Pa na nangnang saot na solsol la punga purum te na rakrakan hanua, arlar ana pirau a wana figla ning la punga purum ana rakrakai a wuwu i wus pungan la. <sup>14</sup> Pa a bakut otleng i rorom ka arlar ana mat ning di hini. Pa na mangir rop pa na lolo rop la karai pas kusun a ngasinla.

<sup>15</sup> A kingla mite na rakrakan hanua pa na ningnigo, na ningnigo anuna tena harumla, la ning la leklek ana gongonla, na tena rakrakai, na tena titol oros pa la ning belsur na tena titol oros, la rop la parau ting na kulamla, pa na arpotor a tatatnan hatat ting na mangirla. <sup>16</sup> Pa la woiwoi tetek na tatatnan hatat pa na mangir mang, “Mulor punga alar mila, pa mulor bunur mila kusun a patarna esaning i kes ana keskes a king, pa kusun a balakut ana Nat a Sipsip! <sup>17</sup> Anasa anundiau a tnan pukakiar a balakut ka hanot, pa esi ma ir tolsot pas diau?”

## 7

*Di suah tar a akinalang ana 144 a rip miting na tarai Israel*

<sup>1</sup> Lamur tana, a oroi diat a angelo la tur ting na diat a matmatana wuwu te na rakrakan hanua. La tong alar pas diat a matmatana wuwu sur gong la wus a hananuala, pa na puka tasi, pa na rakai. <sup>2</sup> A oroi pas ning angelo

\* 6:6: Ning a denaria i arlar ana arlou anuna tik ana ning a pukakiar a titol. † 6:6: Naur a ngas a ulai ning di tol a palawa ana wandiau, a wit pa bali. A wit i wakak tana bali.

kaleng i hanot miting namatana tobar pa i tong pas a akinalang ane God, esaning i laun. I arkabah ana tnan elngena tetek diat a angelo ning di ka saran tar a rakrakai tanla sur lar alaulau na hanua pa puka tasi. <sup>3</sup> I atongi larne, “Gong mulo alaulau na hanua, pa puka tasi pa na rakai, tuk ning milar suah tar a akinalang ting na patar a tena titol orosla ane God anundalai.” <sup>4</sup> Pa longor a wawasinla ning di ka aslang tar la, kane la: 144 a rip miting na mangis a tarai Israel rop.

<sup>5</sup> Di ka aslang tar 12 a rip miting a mangis a tarai Juda,

12 a rip miting a mangis a tarai Ruben,

12 a rip miting a mangis a tarai Gat,

<sup>6</sup> 12 a rip miting a mangis a tarai Aser,

12 a rip miting a mangis a tarai Naptali,

12 a rip miting a mangis a tarai Manase,

<sup>7</sup> 12 a rip miting a mangis a tarai Simion,

12 a rip miting a mangis a tarai Liwai,

12 a rip miting a mangis a tarai Isakar,

<sup>8</sup> 12 a rip miting a mangis a tarai Sebulon,

12 a rip miting a mangis a tarai Josep,

12 a rip miting a mangis a tarai Benjamin.

*A kunum a tarai la lotu tetek e God*

<sup>9</sup> Lamur tana, a tai, pa a oroi pas a tnan kunum a tarai ning bel tik ir was lar pas la. A tarai miting na matanitula rop, pa miting na mangis a taraila rop, pa miting na hananuala rop pa miting na urmatana ngas a warwarala rop, la tur salanigo na keskes a king pa Nat a Sipsip. La mermer ana kokok a kaenla, pa la tong a paka

baibaila. <sup>10</sup> La woiwoi ona tnan elngena larne,

“E God anundalai,

esaning i kes ting na keskes a king

pa Nat a Sipsip,

dia alaun pas dala.”

<sup>11</sup> Na angelo rop la tur talilis pas a keskes a king pa na ningnigo pa diat a lalaun na akakes. La punga hanrawai ana matanla ting na piu salanigo na keskes a king, pa la lotu tetek e God, <sup>12</sup> la atongi mang, “Amen!

Dalar atong aitna pas e God anundalai, dalar aitna pasi, dalar atong wakak teteki pa dalar hanrawai i.

I tong akes a tastasmai, pa warkurai pa rakrakai,

bel ir rop, pa bel ir rop.

Amen!”

<sup>13</sup> Pa takai a hal a ningnigola i deken iau mang, “Esi la ne la mermer ana kokok a kaenla? Pa la han mitahaia?” <sup>14</sup> Pa kelesi mang,

“Leklek, u ot u tasmani.” Pa i atongi tak mang, “La ne, la ning la

ka laun ot miting na tnan kankan ning i monong la. La ka gos kokok

pas anunla na kaen ana suluk a Nat a Sipsip. <sup>15</sup> Manglarning,

la tur salanigo na keskes a king ane God,

la titol teteki ting na nuna rumai a artabar

ana kamisla pa moromla.

Pa esaning i kes ana keskes a king ir pol alar la sur lar kes

taum onoi.

<sup>16</sup> Bel lar murak,

pa bel lar mos ulak ma.

Pa a kamis bel ir alaulau la,

pa bel ta utna otleng ir rang sakan la.

<sup>17</sup> Anasa a Nat na sipsip ning i kes na arpotor a keskes a king,

ir hanot anunla a tena tai alar.

Ir nigon la sur na matmatana malum a lalaun.

Pa e God ir sah sen na luru matanla rop.”



## 8

*A ararop a bulit*

<sup>1</sup> Ning a Nat a Sipsip i pilik sen a ararop a bulit ting na mais a bulit, saot na langit, a keskes wowowon i arlar ana natol a bonot a minit. <sup>2</sup> Pa oroi a mais a angelo ning la sira tur salanigo ta e God, pa di saran tar a mais a tawuru tanla. <sup>3</sup> Ning a angelo kaleng i hanot i tur tar napir a logo na tun artabar. I tong pas a besen na gol, ning di sira tuntun a bulit ning a sasawana i toboh wakak onoi. Di saran tar a tnan bulit ning tana sur ir tuni sur a artabar. I suah taumi ana nunungla ana tarai rop ane God ting na logo na tun artabar ning di toli ana gol, salanigo na keskes a king. <sup>4</sup> A sasawan ana bulit ning i toboh wakak i han usaot taum ana nunungla anuna taraila ane God. A sasawana i kamtur miting na kuna angelo usaot namatana e God. <sup>5</sup> Lamur a angelo i kibas pas a besen pa i abukus ulaki taum ana iah miting na logo na tun artabar, pa i minggen purum tari saot na rakrakan hanua. A bakut i pugur, pa unga, a pil i pil pa mamais i hanot.

*Na angelo la wus na tawuru*

<sup>6</sup> Pa mais a angelo ning la tong mais a tawuru la sang sur lar wus la. <sup>7</sup> A ningnigo na angelo i wus anuna tawuru, pa kiar a ais i hanot taum ana iah ning di ka tol taman tari ana suluk, pa di minggen purum seni te na rakrakan hanua. Di salar a rakrakan hanua rop ona natol a pukna pa takai a pukna miting na natol a pukna i irnga rop. Di salar a rakaila rop ona natol a pukna pa takai a pukna miting na natol a pukna i irnga rop, pa ulaila rop otleng ning la gomo, la irnga rop.

<sup>8</sup> A munaur a angelo i wus anuna tawuru, pa ning a utna i arlar ana tnan mangir ning i irnga, di minggen seni uting latasi.

Di salar a puka tasi ona natol a pukna, pa takai a pukna miting na natol a pukna i keles sur a suluk. <sup>9</sup> Di salar a ututnala la laun salatasi ona natol a pukna, pa takai a pukna miting na natol a pukna la mat, pa di salar a sipla ona natol a pukna, pa takai a pukna miting na natol a pukna la hirua.

<sup>10</sup> A munatol a angelo i wus anuna tawuru, pa a tnan nangnang ning i irnga arlar ana sulu i punga misaot na bakut. Di salar a malumla pa a matmatana malum ona natol a pukna, pa takai a pukna miting na natol a pukna, a nangnang ning i punga tar saot ono. <sup>11</sup> A risana nangnang ning di atongi mang Mapak Kol. Pa a malum miting na malumla pa matmatana malum ning a nangnang i punga tar saot onla i mapak kol. Pa galis a tarai ning la gang a malum ning, la mat, anasa a malum ning i mapak kol.

<sup>12</sup> A mundiat a angelo i wus anuna tawuru. Di salar a kamis, a kalang pa na nangnang ona natol a pukna, pa takai a pukna miting na natol a pukna miting na kamis, di dapisi pa i keles sur a mormorom, pa takai a pukna miting na kalang di dapisi pa i keles sur a mormorom, pa takai a pukna miting na nangnangla di dapisi pa la keles sur a mormorom. Takai a pukna miting na natol a pukna miting na pukakiar ana morom pa takai a pukna miting na pukakiar ana kamis otleng, bel ta talapor ono.

<sup>13</sup> Ning a tai, a longor a manigulai ning i rowoi saot na solsolna i arkabah ana tnan elngena larné, "Ir laulau! Ir laulau! Ir laulau tetek la ning la kes te na rakrakan hanua, anasa ana elngen natol a tawuru ning milau natol a angelo ditol ir wusi."

## 9

<sup>1</sup> A mundilima angelo i wus

anuna tawuru, pa oroi a nangnang ning ka punga purum tar misaot na bakut ute na rakrakan hanua. Di saran tar a ki tana, a ki ana tnan tung ning bel ta araropna. <sup>2</sup> Ning i sapang a tnan tung, a sasawan i tur ot mitingia arlar ana sasawan ana tnan iah ning i irnga kol. Pa kamis pa bakut i mormorom ana sasawan miting na tung ning. <sup>3</sup> Na mum la han purum miting na sasawan ning, pa la kes te na rakrakan hanua, pa di saran tar a rakrakai tanla, arlar ana rakrakai ana radamla. <sup>4</sup> Di atai la mang gong la alaulau a ulai te na rakrakan hanua, o a rakaila otleng. Lar alaulau a taraila ka ning bel ta akinalang ane God ting na patarinla. <sup>5</sup> Ika belsur di saran tar a rakrakai tanla sur lar um kol la, sur lar akadik la ka dilima na kalang. Pa anunla a kankan i arlar ana kankan ning a radam i sira pisi a tarai. <sup>6</sup> Ana pukakiarla ning, a galis a tarai lar tai sur a minat, ika bel lar mat. Lar mang sur lar mat, ika a minat ir alah la ka.

<sup>7</sup> Na mum ning, la tai arlar ana hosla ning di ka sang tar la sur a harum. Ting na pukulunla a utunala i arlar ana kukuh a king ning i tatatai lar a gol, pa a patarinla i arlar ana patara momolna. <sup>8</sup> A hih a pukulunla i barah arlar ana hih a gurarala, pa na ngesenla i arlar ana ngesen a laion. <sup>9</sup> Di suah alar na malwasinla ana ututnala ning i tai arlar ana aen. A unga na dehelinla i arlar ana unga na galis a hos pa a galis a karis la dun kapit sur a harum. <sup>10</sup> Na mukmukinla i pispisi arlar ana radam. Pa a rakrakai i kes ting na mukmukinla sur lar alaulau a tarai ana dilima na kalang. <sup>11</sup> A angelo miting na tnan tung ning bel ta araropna, esaning anunla a king. Di atong a risana ana warwara Hibru Abadon, pa ana

warwara Grik Apolion.\* <sup>12</sup> Ka rop a ningnigo na kankan. Naur a kankan kaning ot ir hanot.

<sup>13</sup> A mundiono na angelo i wus anuna tawuru, pa a longor a elngen takai i hanot miting na diat a utna ning i tatatai lar diat a kom ning i tur saot na logo na tun artabar. A logo ning di toli ana gol, pa i tur salanigo ta e God. <sup>14</sup> A elngen takai i atai a mundiono na angelo ning i tong anuna tawuru larné, “Ur pak sen diat a angelo ning di dot akes tar la ting na tnan malum Iupretis.” <sup>15</sup> Pa i pak sen diat a angelo ning, sur lar salar a tarai rop ona natol a pukna, pa takai a pukna miting na natol a pukna, lar um kol la. Diat a angelo ning e God ka sang tar la sur a puka kamis ning, pa pukakiar ning, pa kalang ning pa rau ning.

<sup>16</sup> A wawas ana tarai a harum ning la kes ana hos la arlar ana naur a mar a milian rop. A longori larné. <sup>17</sup> Ana nuk a tatatai a oroi na hos pa la ning la kes saot on la. Na utna ning la suah alar na malwasinla ono i kubar arlar ana iah, i bulu pa i sinang arlar ana salfa. Pa pukul a hosla ning i arlar ana pukul a laionla. A sasawan, a iah pa salfa ditol purum miting na pahanla. <sup>18</sup> Di salar a tarai rop ona natol a pukna, pa takai a pukna miting na natol a pukna, a sasawan, a iah pa salfa ning i purum miting na pahanla, i um kol la. <sup>19</sup> A rakrakai ana hosla i kes ting na pahanla pa na mukmukinla. Anasa na mukmukinla i arlar ana soila, pa a pukul a soila la akadik a tarai.

<sup>20</sup> Pa a tarai ning a laulau a akadikla ne bel i um kol la, bel la lingir a nuknukinla kusun a manarla ning la toli ona kunla. Bel la manah ana lotu tetek a motla pa na manarla ana gol, pa silwa, pa bras, pa hat, pa na rakaila. Na

\* 9:11: Abadon pa Apolion a kamkamna mang a “Tena alaulau a tarai.”

manarla ning, bel la tai, bel la longor pa bel la sira han. <sup>21</sup> Pa bel la lingir a nuknukinla otleng kusun a um kol a tarai, a wah, na pamuk a toltol o na kinkinau.

## 10

*A angelo pa natar a buk ning di sira hini*

<sup>1</sup> Lamur a oroi pas ning a rakrakai a angelo maleng i han purum amon misaot na langit. I mermer ana bakut, pa a pakasir i kes lao tar saot na pukulna. A patarna i arlar ana Kamis, pa naur a hana i tatatai arlar ana naur a pos i sot. <sup>2</sup> I tong pas a natar a buk ning di sira hini, kaning i sapang tar ting na kuna. I atur tar a sot a hana saot na puka tasi, pa kair a hana ting na piu. <sup>3</sup> Pa i kukukuk ana nnan elngena arlar ana elngen a laion. Ning i agaia, a elngen mais a pungpugur la warwara. <sup>4</sup> Ning mais a pungpugur la ka warwara rop, a mang suar tumtumus, ika a longor a elngen takai misaot na langit i atongi mang, “Gong u tumus akes a warwarala ning mais a pungpugur la ka atong tari, ur pidik alari ka.”

<sup>5</sup> Pa a angelo ning a oroi tari ning i tur tar saot na puka tasi pa ting na piu, i tuslan kas a sot a kuna usaot na langit. <sup>6</sup> Pa i lele tar o esaning i laun tikin, bel ir rop pa bel ir rop, ning i akes a bakut pa ututnala rop ning la kaningia, pa rakrakan hanua pa ututnala rop ning la kaningia, pa puka tasi pa na ututnala rop ning la kaningia, pa i atongi mang, “Bel ma e God ir molot ulak. <sup>7</sup> Ana pukakiarla ning a ararop a angelo miting na mais a angelo ir mang suir wus anuna tawuru, dir tolsot pas a utna na pidik anun e God, arlar ono ning ka atong tari tana nuna tena titol orosla, a propetla.”

<sup>8</sup> Pa elngen takai, ning ia ka longor tari misaot na langit, i atong ulaki tak larne, “Ur han pa ur kibas pas a buk, ning kaning i sapang tar ting na kuna angelo ning i tur tar saot na puka tasi pa ting na piu.”

<sup>9</sup> Pa han tetek a angelo pa a nunungi suir saran tar a natar a buk ning tak. Pa i atongi tak mang, “Kibasi, pa ur ieni. Ir amapak a balam, ika a paham ir namnamnin arlar ana polo na tatos.” <sup>10</sup> Pa a kibas pas a natar a buk ning kusun a kuna angelo, pa a ieni. Pa a pahak i namnamnin arlar ana polo na tatos. Ika, ning a konomi, i amapak a balak. <sup>11</sup> Pa di atongi tak mang, “Ur warwara na propet ulak ana galis a tarai ting na hananuala, a galis a tarai miting na matanitula, a galis a tarai miting na urmatana ngas a warwara pa galis a king.”

## 11

*Naur a momol a tena warwara talapor*

<sup>1</sup> Di saran tar a por tak, i arlar ana rakai di sira mak onoi pa di atai iau mang, “Ur han pa ur mak a rumai a artabar ane God, pa a logo na tun artabar, pa ur was la ning la lotlotu tingia. <sup>2</sup> Ika ur madek sen a pukna tumo lapiu na rumai a artabar, gong u mak tari. Anasa di ka saran tari tetek a tarai ning belsur a tarai ane God, pa lar pas dur a totoh a hanua ane God arlar ana diat a bonot pa naur a kalang. <sup>3</sup> Par saran tar a rakrakai tana nuk naur a tena warwara talapor hok, diar mermer ana kaen a tobo pa diar warwara na propet pas ana 1,260 a pukakiar.”

<sup>4</sup> Naur a tena warwara talapor ne, dia naur a rakai a oliw pa naur a turtur a lam, ning dia tur namatana Leklek anuna rakrakan hanua. <sup>5</sup> Ning tik i mang suir alaulau diau, a iah ir hanot miting

na pahan diau pa ir ien sen anun-  
diau na hiruala. Ning tik i mang  
suir alaulau diau, ir mat larot ning.

<sup>6</sup> Naur a barsan ne dia tong akes  
a rakrakai sur diar sairasa a bakut,  
sur gong a kiar i punga ana taem  
ning dia warwara na propet. Dia  
tong akes otleng a rakrakai sur  
diar keles a malum sur a suluk, pa  
diar dapis a rakrakan hanua ana  
urmatana ngas a akadik rop ana  
puka kamisla ning dia mang.

<sup>7</sup> Ning dia ka arop sen a nundiau  
a warwara talapor, a rokoio a in-  
agoi ir han kas kusun a tnan tung  
ning bel al araropna. Ir harum  
taum on diau, pa ir tolsot pas  
diau pa ir um kol sen diau. <sup>8</sup> Pa  
a minatindiau ir borbor ka ting  
na ngas ana tnan hanua di atong  
arlari o e Sodom pa e Ijip, a hanua  
ning di sai ahat otleng anundiau  
a Leklek ia. <sup>9</sup> Pa a tarai miting  
na hananuala rop, pa miting na  
mangis a tarai rop, pa miting la  
ning la warwara ana urmatana  
ngas a warwara rop pa miting na  
matanitula rop lar oroi a minatin-  
diau tuk natol a pukakiar pa takai  
a tuka kamis pa bel lar longor  
sur dir por diau. <sup>10</sup> Pa na tarai  
miting na rakrakan hanua lar gas  
ka on diau, lar asangan anunla na  
gaggas ona artabar tetek la artalai,  
anasa naur a propet ne dia akadik  
a tarai te na rakrakan hanua.

<sup>11</sup> Ika lamur tana natol a  
pukakiar pa takai a tuka kamis,  
e God i wus kas tar a wuwu na  
lalaun on diau. Pa dia laun pa dia  
tur, pa a tnan matmataut i los la  
ning la oroi diau. <sup>12</sup> Pa dia longor a  
tnan elngen takai misaot na langit  
i atai diau mang, "Mu han kas ute."  
Pa dia han kas ana bakut usaot na  
langit, pa nundiau a hiruala la oroi  
sen diau.

<sup>13</sup> Ana puka kamis ot ning, a  
tnan mamais i hanot. Pa takai a  
pukna miting na tnan hanua ning  
i tarege, pa siuk a pukna bel. Pa  
mais a pira a tarai la mat, pa la ning

la laun kes la matmataut kol, pa la  
atong leklek pas e God ning i kes  
saot na langit.

<sup>14</sup> Pa munaur a akadik ka rop.  
Pa munatol a akadik milau ir  
hanot.

### *A ararop a tawuru*

<sup>15</sup> A ararop a angelo ting na mais  
a angelo, i wus anuna tawuru, pa  
galis a tnan elngena tarai saot na  
langit la atongi mang,

"A matanitu ana rakrakan hanua  
ka keles sur a matanitu  
anuna Leklek anundalai, pa  
anuna Karisito anunai.  
Ir kes na king tikin, bel ir rop  
pa bel ir rop."

<sup>16</sup> Naur a bonot pa diat a ningnigo,  
ning la kes ana anunla na keskes  
a king salanigo ta e God, la punga  
hanrawai ona patarinla ting na  
piu, pa la lotu tetek e God. <sup>17</sup> La  
atongi mang,

"Mila atong wakak tetek u a Leklek  
e God ning u rakrakai kol,  
u laun nigo pa u laun anone,  
anasa u ka kubar pas a tnan  
rakraakaim

pa u ka turpasi sur ur kes ana  
keskes a king pa u warkurai.

<sup>18</sup> Na matanitu masik la balakut,  
pa anuma balakut otleng ka  
hanot.

A taem ka hanot sur ur warkurai  
la ning la mat,

pa ur saran a arlou tetek anum na  
tena titol oros, a propetla  
pa anum na tarai, pa la ning la  
hanrawai a risam,  
la ning bel al risanla pa la ning  
la leklek,

pa ur kamar sen la ning la alaulau  
a rakrakan hanua."

<sup>19</sup> Lamur a rumai a artabar ane  
God saot na langit i sapang, pa ting  
na rumai a artabar anunai, di oroi  
anuna bok a kunubus. Pa a pil i pil,  
a unga, a bakut i pugur, a mamais,  
pa a tnan kiar a ais i hanot.

## 12

### *A hane pa dregon*

<sup>1</sup> A tnan akinalang i hanot saot na langit. Ning a hane i mermer ana kamis, pa a kalang kaning i kes ting nahai naur a hana, pa saot na pukulna, a kukuh na king, ning di toli ana ning a bonot pa naur a nangnang. <sup>2</sup> A hane ne i tianan, pa i woiwoi ana tnan kankan, anasa ka milau ir agon.

<sup>3</sup> Ning a akinalang maleng i hanot saot na langit. Oro, a tnan dregon, a palaona i kubar, mais a pukulna, ning a bonot a komna, pa mais a kukuh a king kaning na mais a pukulna. <sup>4</sup> A mukmukna i surupu purum sen a galis a nangnang misaot na bakut pa i minggen purum sen la ute lapiu. Larning di salar a nangnangla miting na natol a pukna, pa takai a pukna la rop la punga purum. Pa a dregon i tur tar salanigo tana hane ning i pele na agon, sur ono otning ir konom e natnalik ning ir agon seni. <sup>5</sup> Pa i agon pas a kaklik barsan, esaning ir warkurai rakrakai na tarai miting na matanitu rop ana bulse na aen. Pa di kibas kapit pas a kaklik usaot tetek e God, pa uting na nuna keskes a king. <sup>6</sup> Pa a hane ning i liu uting na hanua bel, sur uting na pukna ning e God ka sang tari, sur dir tai alari arlar ana 1,260 a pukakiar.

<sup>7</sup> La tur na harum saot na langit. E Maikel pa nuna angelola la harum taum ana dregon, pa a dregon pa nuna angelola otleng la keles la. <sup>8</sup> La tolsot pas a dregon, pa bel ta pukna ulak ma anuna dregon pa nuna angelola saot na langit. <sup>9</sup> Di minggen purum sen a tnan dregon, a soi tagun nating, ning di atongi a tena artitui, pa e Satan, esaning i ben rongon a rakrakan hanua rop. Di minggen purumi taum ana nuna angelola ute lapiu.

<sup>10</sup> Pa a longor a tnan elngen takai saot na langit i atongi mang,

“Onone e God anundala ka alaun pas a tarai, i asangan a rakrakaina, pa anuna matanitu ka hanot, pa a warkurai anuna Karisito anunai ka hanot.

Anasa a tena artitui ning i sira tiu na tastasindala, esaning i sira tiu la namatana e God ana kamisla pa mormla, di ka minggen purum seni.

<sup>11</sup> Na tastasindala la ka tolsot pasi ana suluk a Nat a Sipsip pa ana nunla na warwara talapor.

Bel la mangan alar anunla a lalaun kusun a minat.

<sup>12</sup> Manglarning, a langit pa mulo ning mulo kes onoi, mulor gas.

Ika ir laulau tetek a rakrakan hanua pa a puka tasi otleng, anasa a tena artitui ka han purum tar tetek mu!

Anun a balakut i irnga kol, anasa i tasmani mang bel ma i bongnani.”

<sup>13</sup> Ning a dregon i tasmani mang di ka minggen purum seni ute na rakrakan hanua, i lu a hane ning i agon pas a kaklik barsan.

<sup>14</sup> Di saran tar naur a dehel a tnan manigulai tana hane ning, suir rowoi taum ono sur a pukna ning e God i sang tari saot na hanua bel, sur dir tai alari kusun a soi, arlar ana natol a rau pa tukna. <sup>15</sup> A soi i lewe sen a malum miting na pahana, arlar ana malum, suir los sen a hane ning. <sup>16</sup> Ika a piu i nangan a hane ning, i panganga pa i konom a malum ning a dregon i lewe seni. <sup>17</sup> Pa dregon i balakut kol tetek hane ning, pa i han suir harum taum dingla na natnatna a hane otleng ning. La ning la sira longor ana warkurai ane God, pa la sira mur a warwara talapor o e Iesu. <sup>18</sup> Pa a dregon i tur tar kama tumo na tasi.

## 13

*A rokoio a inagoi i burak ot miting na puka tasi*

<sup>1</sup> Lamur a oroi pas a rokoio a inagoi i burak ot miting na puka tasi. Ning a bonot a komna, pa mais a pukulna, pa ning a bonot a kukuh na king i kes saot na komna. Pa ana taktakai pukulna, di ka tumus tar na risana ning i atong saksakan e God onoi. <sup>2</sup> Pa rokoio a inagoi ning a oroi i arlar ana lepat,\* ika naur a hana i arlar ana naur a hana bea,† pa a pahana i arlar ana pahana laion. A dregon ning, i saran tar a rakrakaina, pa nun a keskes a king, pa anuna tnan warkurai tetek a rokoio a inagoi. <sup>3</sup> Takai a pukul a rokoio a inagoi i tai arlar onoi ning di ka um kol tari, ika a masik a minat ning, ka mah ulak. Pa rakrakan hanua rop la kulkulan, pa la mur a rokoio a inagoi ning. <sup>4</sup> Pa tarai la lotu tetek a dregon, anasa ka saran tar a warkurai tetek a rokoio a inagoi. Pa la lotu otleng tetek a rokoio a inagoi, pa la deke mang, “Esining i arlar ana rokoio a inagoi ne? Esi ning i tolsot sur ir umi?”

<sup>5</sup> Di malmaling tar a rokoio a inagoi suir atong a warwarala na iaunan pa warwarala ning ir anan e God ono, pa ir titol pas ana nuna warkurai diat a bonot pa naur a kalang. <sup>6</sup> I sapang a pahana sur ir anan e God, pa ir atong laulau a risana, pa pukna ning i kes ia pa la ning la kes saot na langit. <sup>7</sup> Di saran tar a rakrakai tana suir harum taum ana tarai ane God, pa ir tolsot pas la. Di saran tar a warkurai tana sur ir warkurai na mangis a tarai rop, a tarai miting na hananuala rop, la ning la warwara ana urmatana ngas a warwarala rop, pa a tarai miting na matanitula rop. <sup>8</sup> Pa la

rop te na rakrakan hanua, ning a risanla bel i kes ting na buk a lalaun, lar lotu tetek a rokoio a inagoi. A buk a lalaun ne, anuna Nat a Sipsip, ning di um kol seni, di ka tumus tari ning e God belot i akes a rakrakan hanua. <sup>9</sup> Esining a talngana kaning, i wakak sur ir longor onoi.

<sup>10</sup> Ning e God i malmaling sur tik ir dodot,

ir dodot ot.

Ning i malmaling sur dir um kol tik ana liwan a harum,

dir um koli ot onoi.

Manglarning, a tarai ane God lar tur rakrakai pa lar tortorot.

*A rokoio a inagoi i pusa ot miting na piu.*

<sup>11</sup> Lamur a oroi ning a rokoio a inagoi maleng i pusa ot miting na piu. Naur a komna i arlar ana kom ana nat a sipsip, ika i warwara lar a dregon. <sup>12</sup> I titol ana warkurai rop miting na ningnigo na rokoio a inagoi, suir nangani, sur a rakrakan hanua, pa la ning la kes teia, lar lotu tetek a ningnigo na rokoio a inagoi, ning a masik a minat kaning onoi ka mah ulak. <sup>13</sup> A rokoio a inagoi ning i pusa ot miting na piu i tol a tatatnan akinalangla. Ning a aki-nalang ning i toli, i tol otnan a iah misaot na langit ute na rakrakan hanua namatana tarai. <sup>14</sup> I ben rongon a tarai ning la kes te na rakrakan hanua, anasa ana aki-nalangla ning i toli ana rakrakai ning di saran tari tana suir nangan a ningnigo na rokoio a inagoi onoi. I atai la sur lar atur a manar a ningnigo na rokoio a inagoi sur lar aitna pasi onoi. A ningnigo na rokoio a inagoi ning nating di so tari ana liwan a harum, ika i laun ot. <sup>15</sup> Di saran tar a rakrakai tana suir tabar a manar a ningnigo na rokoio a inagoi ana wuwu na

\* **13:2:** A lepat, ning a ngas a rokoio a inagoi i arlar ana taiga. Pa hih a palaona i toktok.

† **13:2:** A bea, ning a tnan rokoio a inagoi.

lalaun, suir warwara pa ir warkurai sur dir um kol la ning bel la longor sur lar lotu teteki.

<sup>16</sup> Pa munaur a rokoio a inagoi i angongos pas a tarai rop, sur dir suah a akinalang ting na sot a kunla pa ting na patarinla. I angongos pas la ning bel al risanla pa la ning la lekkek, la ning la lekkek ana gongonla pa na kapan a tarai, na tena titol oros, pa la ning bel na tena titol oros. <sup>17</sup> Bel tik ir lolou pa bel tik otleng ir siusiu-rai, ning bel ta akinalang kaning onoi. A akinalang ning a risana a rokoio a inagoi pa wawas ana risana. <sup>18</sup> Esining i tastamai ir talapor wakak ana utna ne. Ir was taman a wawas ana rokoio a inagoi, anasa a wawas ana barsan. Anuna wawas ine diono na mar diono na bonot pa diono (666).

## 14

*A Nat a Sipsip pa 144 a rip a taraila*

<sup>1</sup> Lamur a tai, pa oroi pas a Nat a Sipsip i tur saot na Mangir Saion taum ana 144 a rip a taraila, la ning di ka tumus tar a risan a Nat a Sipsip pa a risana e Tamana otleng ting na patarinla. <sup>2</sup> Pa a longor a tnan unga misaot na langit i arlar ana unga na malum ning i naro, pa i arlar ana rakrakai a pungpugur. A unga ning a longori, i arlar ana taraila ning la sian anunla na gita. <sup>3</sup> La saken a tona saksak salanigo na keskes a king, pa diat a lalaun na akakes pa a ningnigola. Bel tik ir tolsot pas suir asaer ana saksak ne. 144 a rip ning di ka lou alangolango pas la mite na rakrakan hanua, la ka lar tolsot pasi. <sup>4</sup> La ne bel la dur, anasa bel la borbor taum ana gurarala. La mur a Nat a Sipsip ting na pukpukna ning i sira han ia. Arpotor tana taraila te na rakrakan hanua di lou langolango pas la. Di saran la tetek e God pa tetek a Nat a Sipsip, arlar

ana ningnigo na wana ning di sira sarani ta e God. <sup>5</sup> Bel di longor tar ta asasongo miting na pahanla, pa bel di arup sot pas la on ta rongo.

*Natola angelo ditol warwara talapor ana warkurai*

<sup>6</sup> Lamur a oroi ning a angelo maleng i rowoi saot na solsolna, pa i kibas a Wakak a Warwara ning ir kes tikin, suir warawai onoi tetek a taraila ning la kes te na rakrakan hanua, a taraila miting na matanitula rop, miting na mangis a taraila rop, la ning la warwara ana urmatana ngas a warwara pa a tarai miting na hananuala rop. <sup>7</sup> Pa i warwara ana tnan elngena mang, “Mulor matmataut sur e God, pa mulor atong aitna pasi, anasa anuna pukakiar a warkurai ka hanot. Mulor lotu tetek e God, esaning i akes a bakut, a rakrakan hanua, a puka tasi pa matana malumla.”

<sup>8</sup> A munaur a angelo i mur pa i atongi mang, “A tnan hanua Babilon ka punga! Ka punga! Esaning i agang a tarai miting na matanitu rop ana rakrakai a wain ana pamuk a toltol anunai.”

<sup>9</sup> A munatol a angelo i mur diau pa i warwara ana tnan elngena mang, “Ning tik ir lotu tetek a rokoio a inagoi pa a manarna, pa ir kibas anuna akinalang ting na patarna o a kuna, <sup>10</sup> i otleng ir gang ting na wain a balakut ane God. A wain ne di ka sang tari, a rakrakaina i itna kol, pa di peki ting na kap a balakut ane God. Dir akadiki ana iah pa salfa salanigo tana Nat a Sipsip pa na totoh a angelo ane God. <sup>11</sup> Pa a sasawan ana nunla na kankan ir sasawan kas, bel ir rop pa bel ir rop. La ning la lotu tetek a rokoio a inagoi pa manarna, pa la ning a akinalang ana risana kaning on la, bel lar manah ana kamisla pa moromla.” <sup>12</sup> Larne, ir wakak sur a tarai ane God, lar tur rakrakai, la ning la

sira longor ana warkurai ane God pa anunla a tortorot i tur rakrakai o e Iesu.

<sup>13</sup> Lamur a longor a elngen takai misaot na langit i atongi mang, “Ur tumus a utna ne: La ning la ka mat ana tortorot ana Leklek turpasi anone pa lamur, la angis.” A Talngan Tabu i atongi mang, “Molna, lar manah kusun anunla a titolla, anasa anunla a wakak a titolla ir han taum on la.”

*Dir sol a rakrakan hanua anasa ka makos*

<sup>14</sup> Ning a tai, a oroi pas a kokok a bakut, pa takai i “arlar ana Nat a Barsan” i kes saot onoi. I suah pas a kukuh na king ning di toli ana gol ting na pukulna, pa ting na kuna i tong pas a liwan ning i hangan kol. <sup>15</sup> Ning a angelo maleng i han purum misaot na rumai a artabar, pa i arkabah ana tnan elngena tetek esaning i kes saot na bakut larne, “Kibas pas anuma liwan pa ur sol. A pukakiar na sol ka hanot, anasa a ututnala te na rakrakan hanua ka makos rop.” <sup>16</sup> Pa esaning i kes saot na bakut, i pirat ana nun a liwan te na rakrakan hanua, pa i sol a rakrakan hanua.

<sup>17</sup> Ning a angelo maleng i purum misaot na rumai a artabar saot na langit. I otleng i tong a liwan ning i hangan kol. <sup>18</sup> Pa ning a angelo maleng, esaning i warkurai sur a iah, i purum miting na logo na tun artabar, pa i arkabah ana tnan elngena tetek esaning i tong pas a liwan ning i hangan kol mang, “Ur kot na kurena wain miting na rakrakan hanua, pa ur suah taman la, anasa la ka makos rop.” <sup>19</sup> Pa angelo i pirat ana nun a liwan, pa i suah taum a wana wain miting na rakrakan hanua. Pa i minggen tari ting na tinine tnan tung a hat, ning di sira pas miren a wana wain tingia suir polo. A tnan tung ning i tur aslang a balakut ane God. <sup>20</sup> Pa di miren a wana wain ting na tung a hat ning, ning tumo lapiu ana

taman ana tnan hanua. Pa a suluk i saler ot miting na tung a hat ning. I barah arlar ana natol a mar a kilomita, pa i lomom kas usaot tuk ana puka aen ning i kes na pahana hos.

## 15

*Mais a angelo pa mais a akadik*

<sup>1</sup> Pa oroi ning a tnan akinalang ulak saot na langit, pa a kulkulan kol onoi. A mais a angelo la tong pas a mais a akadik. Na akadik ne, na araropna, anasa a balakut ane God i arlar bot.

<sup>2</sup> Pa oroi ning a utna i tai arlar ana puka tasi di toli ana galas ning di suah tamani ana iah. La ning la tolsot pas a rokoio a inagoi pa manarna pa wawas ana risana, la tur ting na ris a puka tasi ning, pa la tong na gita ning e God ka saran tari tanla. <sup>3</sup> La saken a saksak ane Moses, a tena titol oros ane God, pa saksak ana Nat a Sipsip mang, “Leklek e God u rakrakai kol, anum na titol la itna pa di kulkulan kol on la.

U a King ana mangis a tarai rop, anum na toltol la tostos pa la momol.

<sup>4</sup> Leklek, esining bel ir matmataut sur u?

Pa esining bel ir atong aleklek pas a risam?

Anasa u ka u totoh.

Na tarai miting na matanitu rop lar hanot

pa lar lotu tetek u,

anasa anum na tostos a titol i talapor rop tetek la.”

<sup>5</sup> Lamur tana, a tai pa oroi pas a rumai a artabar saot na langit i sapang. A rumai ning a rumai sel ning i apuasa i mang e God i kes taum ana nun a tarai. <sup>6</sup> Pa mais a angelo ning la tong pas a mais a akadik la purum misaot na rumai a artabar ning. La mermer ana wakak a kaenla ning la totoh pa la talapor kol, pa la dot na malwasinla ana inau a gol. <sup>7</sup> Pa ning



a halin diat a lalaun na akakes i saran tar mais a besen di toli ana gol tetek mais a angelo ning. Pa mais a besen na gol ne la bukus ana balakut ane God, esaning i laun tikin. <sup>8</sup> Pa rumai a artabar i bukus ana sasawan miting na matatar ane God pa miting na rakrakaina. Pa bel tik ir tolsot pasi suir kas uting na rumai, tuk ning dir tolsot pas mais a akadik ana mais a angelo ning.

## 16

*Mais a angelo la pek mais a besen a balakut ane God*

<sup>1</sup> Lamur a longor a tnan elngen takai misaot na rumai a artabar i atongi tetek mais a angelo ning larne, “Mulor han pa mulor pek mais a besen a balakut ane God utumo na rakrakan hanua.”

<sup>2</sup> A ningnigo na angelo i han pa i pek anuna besen a balakut saot na kabalapiu. Pa laulau a masakla, ning la sursuren kol, la hanot ting na palaona tarai ning a akinalang anuna rokoio a inagoi kaning onla pa la lotu tetek a manarna.

<sup>3</sup> A munaur angelo i pek anuna besen a balakut saot na tasi, pa tasi i keles sur a suluk arlar ana suluk a barsan ning i mat. Pa a ututnala rop ning la laun ting latasi la mat.

<sup>4</sup> A munatol a angelo i pek anuna besen a balakut saot na malumla, pa ting na matmatana malumla, pa la keles sur a suluk. <sup>5</sup> Pa a longor a angelo ning i tai alar a puka tasi pa a malumla, i atongi mang,

“E God, u laun nigo pa u laun anone, a Tena Totoh u,  
u tostos anasa u warkurai na arkeles larne.

<sup>6</sup> Ur agang la ana suluk sur ir arlar ana warkurai a arkeles tetek la anasa ana nunla na laulau a titol,  
anasa la ka um kol tar anuma tarai pa anuma propetla, pa a sulukinla ka tapek.”

<sup>7</sup> Pa a longor a elngen takai misaot ana logo na tun artabar i atongi mang,

“A momolna, a Leklek e God u rakrakai kol,  
anum na warkurai i momol pa i tostos.”

<sup>8</sup> Pa mundiat a angelo i pek anuna besen a balakut saot na kamis, pa e God i saran tar a rakrakai ana kamis suir tun a tarai ana iah. <sup>9</sup> Pa tnan laplapang a iah ning, i tun a tarai, pa la atong sakan a risana e God, esaning na akadik ne kaning nahai a warkurai anunai, ika bel la lingir a nuknukinla, pa bel la atong leklek pasi.

<sup>10</sup> A mundilima na angelo maleng i pek anuna besen a balakut saot na keskes a king anuna rokoio a inagoi, pa a pukpukna ning i sira warkurai suri i mormorom rop. Pa a tarai la harat a laigereminla ana tnan kankan ning, <sup>11</sup> pa la atong saksakan e God ning i kes saot na langit, anasa ana tnan kankan pa na laulau a masak kaning na palaonla, ika bel la lingir a nuknukinla kusun anunla na toltol laulaula.

<sup>12</sup> A mundiono na angelo i pek anuna besen a balakut saot na tnan malum lupretis, pa i masa rop suir sang a ngas anuna kingla mitumo na matmatana tobar. <sup>13</sup> Lamur a oroi pas natol a mot ditol tatatai arlar lar natol a rokrok. Ditol purum miting na pahana dregon, a pahana rokoio a inagoi pa pahana asasongo na propet. <sup>14</sup> Ditol natol a mot, pa ditol tol a akinalangla, pa ditol han sarara sur na king miting na rakrakan hanua rop, sur ditol ir ben taum la sur a harum ana tnan pukakiar ane God, esaning i rakrakai kol.

<sup>15</sup> “Oroi i, ar hanot lar a tena kinkinau. Esining i kes na tai alar pa i sang anun na kaenla, i

angis, sur bel ir mengere pa bel ir meme.”

<sup>16</sup> Pa natol a mot ditol ben taum tar a kingla uting na pukna ning di atongi ana warwara Hibu mang Amagedon.

<sup>17</sup> Pa ararop a angelo miting na mais a angelo, i pek anuna besen a balakut saot na maup, pa a tnan elngen takai i purum miting na keske a king saot na rumai a artabar, pa i atongi mang, “Ka rop!” <sup>18</sup> Lamur a pil i pil, a unga, a bakut i pugur pa a tnan mamais kol i hanot. Turpasi miting na akakes ana tarai, belot ta mamais larne i hanot tar te na rakrakan hanua. A tnan mamais ning i laulau kol. <sup>19</sup> A tnan hanua Babilon i tapagal sur natol, pa na tatatnan hanua anuna tarai miting na matanitula, la tarege rop. E God i nuk pas a tnan hanua Babilon pa i agang la ana wain i bukus ana ngalngaliah a balakut anunai. <sup>20</sup> Na lolo rop la ka rorom pa na mangir otleng bel ma di oroi la. <sup>21</sup> A tnan kiar a ais, taktakai tutuna i arlar ana dilima na bonot a kilogrem i punga saot ana tarai. Pa a tarai la atong saksakan e God ana akadik a kiar a ais ne, anasa a akadik ne i laulau kol.

## 17

*A pamuk a hane ning i tur aslang a tnan hanua Babilon*

<sup>1</sup> Takai miting na mais a angelo ning la tong mais a besen i han tetek iau pa i atai iau mang, “Han ute, ar asangan tar u ana warkurai na arkeles tetek a pamuk a hane ning a risana i han sarara ana nuna a toltol laulau. Kaning i kes saot na malumla. <sup>2</sup> Na king mite na rakrakan hanua la tol a laulau taum onoi. Pa tarai miting na rakrakan hanua la sipak ona wain ana pamuk a toltol anunai.”

<sup>3</sup> A bukus ana Talngan Tabu pa angelo ning i kibas pas iau usaot na hanua bel. Tingia a oroi pas

takai a hane i kes tar saot na kubar a rokoio a inagoi. A inagoi ning, mais a pukulna pa ning a bonot a komna pa a palaona i bukus ana risingla ning di atong saksakan e God onoi. <sup>4</sup> A hane ning, i mermer ana kaen i pepol pa i kubar otleng, pa di amermeri ana gol pa a wakak a hatatla ning a matanla i abit, pa na wakak a kabaruruan. Ting na kuna i tong a kap ning di toli ana gol. I bukus ana laulau a ututnala pa na dur a toltol miting na nuna pamuk a toltol. <sup>5</sup> Di tumus tar a risana ting na patarna, a utna na pidik larne,

A TNAN HANUA BABILON, A  
KABATNAN A PAMUK A HANELA PA  
NA LAULAU A TOLTOL KOL ANUNA  
RAKRAKAN HANUA.

<sup>6</sup> A oroi a hane ning i sipak, anasa i gang a suluk a tarai ane God, a sulukinla ning la warwara talapor o e Iesu.

Ning a oroi i, a kulkulan kol. <sup>7</sup> Pa angelo i atai iau mang, “Asa kamkamna ning u kulkulan? Ar pak a kamkama hane, pa a rokoio a inagoi ning i kes tar saot onoi, ning mais a pukulna pa ning a bonot a komna. <sup>8</sup> A rokoio a inagoi ning u oroi tari, i laun pas nating, pa bel i laun anone, pa lamur ir hanot ulak miting na tnan tung ning bel ta araropna, pa ir han suir hirua. Pa a tarai te na rakrakan hanua ning bel di tumus a risanla ana buk a lalaun, turpasi ning e God i akes a rakrakan hanua, lar kulkulan ning lar oroi a rokoio a inagoi ne. Anasa i laun pas nating, pa bel i laun anone, pa lamur ir hanot ulak.

<sup>9</sup> “Esining i tastamai ir talapor wakak ana utna ne. Mais a pukulna a kamkamna mang mais a mangir ning a hane ning i kes tar saot on la. <sup>10</sup> Ning a kamkamna otleng mang mais a king. Dilima ka mat, takai kama kane i kes, pa ning a halinla otleng belot i hanot. Ning ir hanot ir kes siklik pas ka.

11 Pa a rokoio a inagoi ning ka laun pas nating, pa bel i laun anone, esaning a siwal a king. I miting na mais a king ning, pa ir han suir hirua.

12 “Ning a bonot a komna ning u oroi i, la ning, ning a bonot a king, ning belot la kibas ta warkurai sur lar hanot a king. Ika ana diono na bonot a minit ka lar warkurai taum ana rokoio a inagoi arlar ana king. 13 A nuknukinla i takai ka, pa lar saran tar a rakrakainla pa anunla a warkurai tetek a rokoio a inagoi. 14 Lar harum taum ana Nat a Sipsip, ika a Nat a Sipsip ir tolsot pas la, anasa i a Leklek anuna leklekla, pa a King anuna kingla. Pa la ning ka aslang pas la pa ka kabah pas la pa la tortorot momol teteki, lar tolsot taum onoi.”

15 Pa angelo i atai iau mang, “Na malum ning u oroi, ning a pamuk a hane i kes tingia, la tur aslang na tarai miting na hananuala, a galis a tarai, a tarai miting na matanitula pa miting na urmatana ngas a warwara. 16 Pa rokoio a inagoi pa ning a bonot a kom ning u oroi la, lar nget a pamuk a hane. Lar alaulau i pa lar kepsen anuna mermer pa ir mengere kama. Lar ien a sisna, pa lar tun seni ting na iah. 17 Anasa e God ot ka anuknuk tari ana nuknukinla sur lar tolsot pas a nuknukna larne: Lar saran tar a rakrakainla ning la warkurai onoi tetek a rokoio a inagoi, tuk ning dir tolsot pas a warwarala ane God. 18 A hane ning u oroi, a tnan hanua kol, ning i warkurai a kingla te na rakrakan hanua.”

## 18

### *E Babilon ka pungu*

1 Lamur tana utna ne, a oroi ning a angelo maleng i han purum misaot na langit. I tong akes a rakrakai a warkurai pa anuna matatar i atalapor a rakrakan

hanua. 2 Pa i woiwoi ana tnan elngena mang,

“A tnan hanua Babilon ka pungu!  
Ka pungu!

I hanot a pukna ana motla,  
pa a rumai a mumun anuna laulau a ingunla,  
pa a rumai a mumun anuna manila ning la dur  
pa a rumai a mumun anuna inagoila ning la dur pa la bilbilor.

3 Ka pungu, anasa na tarai miting na matanitu rop la ka gang pas a rakrakai a wain ana nuna pamuk a toltolla.

Na king mite na rakrakan hanua la tol a pamuk a toltol taum onoi.

Pa na tena siusiurai mite na rakrakan hanua la leklek ana galis a gongon miting na nuna keskes na lek-lek.”

4 A longor maleng a elngen takai misaot na langit i atongi larne, “Anuk a tarai, mulor purum kusuni, sakana mulor kes taum onoi ana nuna toltol laulaula, sur gong mulo otleng mulo kilang a akadikla ning i kibasi.

5 Anasa anuna toltol laulau i galis kol pa i tuk pas ot a langit, pa e God ka nuk akes anuna laulau a titolla.

6 A toltol ning i toli tetek mulo, dir toli ulak teteki, a utna ning i tol tari tetek mulo, dir kelesi arlar ana naur a dihna teteki.

A kap ning i agang tar mulo onoi, dir abukus tari ana naur a dihna sur dir agangi onoi.

7 Dir saran a tnan kankan pa a tnan bal maris tana, ir galis arlar ana tnan matatar pa a keskes na leklek ning i tong akesi.

I nuki ono i ot mang,  
‘Tau a kwin, pa a kes ana nuk a keskes a kwin.  
Bel iau a lao,

bel ar bal maris lar pas.’

<sup>8</sup> I maining a akadikla ne, a minat,  
a bal maris pa a munurak  
lar hanot teteki ana ning a  
pukakiar sot ka.

Pa dir tun seni ting na iah  
anasa a Leklek e God i  
rakrakai kol,  
esaning i saran tar a warkurai  
na arkeles teteki.

<sup>9</sup> “Na king mite na rakrakan  
hanua, ning la tol a laulauna taum  
ana pamuk a hane ning, pa la ka  
kibas taum a nuna na gongon mit-  
ing na nuna keskes na leklek, ning  
lar oroi a sasawan na iah ning di  
tun a hane ning ono, lar bal maris  
pa lar tangis. <sup>10</sup> Lar tur bakbak tar  
kama kusuni, anasa la matatan a  
kankan ning dir akadiki onoi. Pa  
lar atongi mang,

‘A tnan hanua Babilon ka laulau.  
Ka laulau!  
E Babilon, a rakrakai a hanua!

Ana diono na bonot a minit sot ka,  
anuma warkurai na arkeles  
ka hanot tetek u.’

<sup>11</sup> “Na tena siusiurai mite na  
rakrakan hanua lar tangis pa lar  
bal maris onoi, anasa bel ma tik ir  
lou anunla ututnala na siusiuran.  
<sup>12</sup> A ututnala na siusiurai larné: a  
gol, a silwa, na wakak a hatat ning  
a matana i abit, pa na kabaruruan,  
pa na wakak a kaen, na kaen ning  
i arlar ana sar a taus, na kaen ning  
i silika pa na kubar a kaen, pa  
na rakai ning i toboh wakak, pa a  
urmatana ngas a utna ning di toli  
ana kom a elepan, pa ana wakak  
a rakaila ning a matana i abit, pa  
a bras, a aen pa a wakak a hatat  
ning di atongi ana mabel. <sup>13</sup> Pa  
dingla na ututnala ning i toboh  
wakak, pa naur a utna ning i toboh  
wakak di atong diau ana sinamon  
pa mira, pa a paura di tuni pa  
sasawana i toboh wakak ning di  
atongi ana insens, pa a wain, a wel  
na oliw, a palawa pa a witla, pa a  
bulumakaula pa na sipsip, na hos

pa na karis ono, pa a tarai ning lar  
titol na tena titol oros.

<sup>14</sup> “Na tena siusiurai lar atongi  
mang, ‘Na ututnala ning u mang  
kol suri ka rorom. Anum a  
gongonla pa num na matatar, la  
otleng la ka rorom kusun u, pa  
bel ulak ma ur oroi tar la.’ <sup>15</sup> Na  
tena siusiurai ning la sira siuran  
a ututnala ne, ning e Babilon i  
angis la ana galis a gongon, lar tur  
bakbak tar kama kusuni, anasa lar  
matatan a kankan ning di akadiki  
onoi. Lar bal maris, lar tangis,  
<sup>16</sup> pa lar woiwoi mang,

‘A tnan hanua Babilon ka laulau!  
Ka laulau!

I mermer ana wakak a kaenla,  
ning i pepol pa i kubar,  
pa di amermeri ana gol, pa  
na wakak a hatat ning a  
matana i abit pa na wakak  
a kabaruruan.

<sup>17</sup> Ana diono na bonot a minit ka,  
di alaulau rop sen anuma  
galis a gongon!’

“Pa na kipten rop pa la ning  
la han taltal ana sip, na tena titol  
miting na sipla, pa la ning la kibas  
a mani miting na titol ana sipla,  
lar tur bakbak kusuni. <sup>18</sup> Ning lar  
oroi a sasawan na iah ning di tun e  
Babilon ono, lar woiwoi mang, ‘Esi  
na hanua i arlar taum ana wakak a  
hanua ne i itna kol?’ <sup>19</sup> Lar sapran  
a kubus saot na pukulunla pa lar  
bal maris, lar tangis pa lar woiwoi  
mang,

‘A tnan hanua Babilon ka laulau!  
Ka laulau!

La ning la kibas a mani miting  
na sipla,

la leklek ana nuna na galis a  
gongon!

Diono na bonot a minit ka, pa ka  
laulau rop!

<sup>20</sup> Mulo saot na langit, mulor gas  
ono!

Pa tarai ane God pa na aposel  
pa na propet, mulor gas!

E God i saran a warkurai a arkeles  
teteki ana ututnala ning i  
toli o mulo.’ ”

<sup>21</sup> Pa ning a rakrakai a angelo i kibas pas a tnan hat, i itna arlar ana hat ning di sira gini a witla ono, pa i minggen parung seni salatasi pa i atongi mang,

“Dir minggen tosngen sen a tnan hanua Babilon arlar ana hat ne,  
pa bel ulak ma dir oroi i.

<sup>22</sup> A elngen na tena tol saksak pa na tena wus kaur pa na tena wus tawuru pa na tinangis ana gitala,  
bel ulak ma dir longor tari ting napirim.

Bel ulak ma ta tena titol ana kuna ir kes taum hom.

Pa bel ulak ma dir longor tar a tinangis ana hat ning di sira gini a witla ono.

<sup>23</sup> Bel ulak ma ta talapor ana lam ir sasai ting napirim.

Bel ulak ma dir longor tar a elngen ta tona tinaulai, a barman pa a basbas ting napirim.

Lanigo anum na tena siusiurai la na tatatnan lekkek te na rakrakan hanua.

U ben rongan pas na tarai miting na matanitu rop ana numa kapil.

<sup>24</sup> A suluk a propetla pa na tarai ane God,  
pa la rop otleng ning di um kol la te na rakrakan hanua,  
di pastetek a sulukinla tumo e Babilon.”

## 19

*Di atong aitna pas e God saot na langit*

<sup>1</sup> Ning i rop a ututnala ne, a longor a tnan agaia lar a elngen a tnan kunum a taraila saot na langit, la kukukuk mang,  
“Haleluia!

E God anundalai ka alaun pas dala, pa a matatar pa a rakrakai anunai ka,

<sup>2</sup> anasa anuna warkuraila i momol pa i tostos.

Ka warkurai a pamuk a hane ning a risana i han sarara ana nuna toltol laulau,  
esaning i alaulau a rakrakan hanua ana nuna na pamuk a toltol.

E God ka saran tar a warkurai a arkeles teteki,  
anasa ana suluk anuna tena titol orosla,  
ning i um kol sen la.”

<sup>3</sup> Pa la kukukuk ulak mang,

“Haleluia!  
Pa sasawan a hane ning i han kas usaot bel ir rop pa bel ir rop.”

<sup>4</sup> Naur a bonot pa pisir diat a ningnigo pa diat a lalaun na akakes la punga hanrawai, pa la lotu tetek e God, esaning i kes ana nuna keskes a king pa la atongi mang,  
“Amen, Haleluia!”

<sup>5</sup> Pa elngen takai i hanot miting na keskes a king, i atongi mang,  
“Mulor atong aitna pas anundala a God,

mulo anuna tena titol orosla,  
mulo ning bel al risamulo pa mulo ning mulo lekkek,  
mulo ning mulo hanrawai teteki!”

<sup>6</sup> Pa longor a agaia lar a elngen a tnan kunum a tarai, pa unga na malum ning i naro pa a rakrakai a pungpugur, i kukukuk mang,  
“Haleluia!

Anasa anundala a Lekkek e God,  
ning i rakrakai kol,  
i kes na king.

<sup>7</sup> Dalar gas,  
pa dalar saran a matatar teteki!

Anasa a pukakiar a tinaulai anuna Nat a Sipsip ka hanot,  
pa nana hane ka sang.

<sup>8</sup> Di ka saran tar na wakak a kaen, ning i talapor pa i toh tetek a hane,  
suir mermer ono.”

Na wakak a kaen ning, i tur aslang na tostos a toltol ana tarai ane God.

<sup>9</sup> Pa angelo i atai iau mang, “Ur tumusi lerne: La ning di atai pas la

sur a ngasa na tinaulai ana Nat a Sipsip, la angis!" Pa i atongi otleng mang, "Na warwara ne na momol a warwara ot ane God."

<sup>10</sup> Lamur a punga hanrawai napir naur a hana suar lotu teteki. Ika i atai iau mang, "Gong! Iau otleng a tena titol oros ka lar u pa na tastasim ning la tong akes a warwara talapor o e Iesu. Ur lotu tetek e God! Anasa a warwara talapor o e Iesu i akampur a tarai sur lar warwara na propet."

*Esaning i kas ana kokok a hos*

<sup>11</sup> A oroi a langit ka sapang pa oroi a kokok a hos i tur salanigo tak. Pa esaning i kes saot ono di atongi mang "I sira tolsot anuna titol" pa "I momol." Anuna warkurai pa anuna harum i tostos. <sup>12</sup> Naur a kalso matana i arlar ana irnga na iah, pa a galis a kukuh a king kanisaot na pukulna. Pa di ka tumus tar a rising ting na palaona, ning bel tik i tasmani, i sot ka i tasmani. <sup>13</sup> I mermer ana kaen ning di amurungi ting na suluk. Pa a risana, "A Warwara ane God." <sup>14</sup> A kunum a tarai a harum misaot na langit la kas na kokok a hos pa la muri. La mermer ana wakak a totoh na kokok a kaen. <sup>15</sup> Pa liwan na harum ning i harat kol kaning na pahana i gom pasi, suir kot na tarai miting na matanitula ono, pa ir warkurai rakrakai la ana bulse na aen. I pas gingini a wana wain ting na tung a hat ning i tur aslang a ngalngaliah a balakut ane God, esaning i rakrakai kol. <sup>16</sup> Ting na nuna kaen pa ting na kinwar a hana, di ka tumus tar a risana larne,

A KING ANUNA KINGLA PA LEKLEK  
ANUNA LEKLEKLA.

<sup>17</sup> Pa oroi ning a angelo i tur tar ting na Kamis, pa i arkabah ana tnan elngena tetek a manila rop ning la rowoi saot na solsolna mang, "Mulo rowoi ute, mulor han taum ana tnan ngasa ane God, <sup>18</sup> sur mulor ien a sis a palaona

kingla, na ningnigo anuna tarai a harum, a tarai a harum, na hos pa la otleng ning la kas on la, pa sis a palaona tarai rop, na tena titol oros, pa la ning bel na tena titol oros, la ning bel al risanla pa la ning la leklek."

<sup>19</sup> Lamur a oroi a rokoio a inagoi pa kingla mite na rakrakan hanua, pa anunla na kunum a tarai a harum ning la han taum sur lar harum taum o esaning i kas ana hos pa nuna kunum a tarai a harum. <sup>20</sup> Ika di tong akes pas a rokoio a inagoi pa asasongo na propet, esaning ka tol a akinalangla ana risana rokoio a inagoi. Ning i tol a akinalangla ning, i asongo pas la ning a akinalang ana rokoio a inagoi kaning on la, pa la lotu tetek a manar a rokoio a inagoi. Di minggen lalaun tar a asasongo na propet pa rokoio a inagoi ting na tnan tung a iah ning i irnga ana salfa. <sup>21</sup> Di um kol sen a nundiau a kunum a tarai a harum ana liwan a harum kaning na pahana esaning i kas ana hos. Pa manila rop la ien a sis a palaonla pa lar masur onoi.

## 20

*Takai a rip a rau*

<sup>1</sup> A oroi pas ning angelo i han purum misaot na langit, i tong pas a ki ana tnan tung ning bel ta araropna, pa i tong pas otleng a tnan sen. <sup>2</sup> I tong akes pas a dregon, a soi tagun nating, ning di atongi mang a tena artitui, e Satan. I sen akes tari tuk ot ning takai a rip a rau ir rop. <sup>3</sup> I minggen purum tari ting na tnan tung ning, i tagar alari, sur gong ulak ma i asongo tar a tarai miting na matanitula rop, tuk ning takai a rip a rau ning ir rop. Lamur tana, dir pak seni suir langolango pas ka siklik taem, bel ir bongnani.

<sup>4</sup> Pa oroi na keskes a king, pa la ning la kes saot on la, ning di ka saran tar a rakrakai tanla sur lar warkurai. Pa a oroi a ingun a tarai ning di ka kot kutus sen a pukulunla, anasa ana nunla na warwara talapor o e Iesu pa ana warwara ane God. Bel la lotu tetek a rokoio a inagoi pa a manarna, pa bel di kibas a akinalang anuna rokoio a inagoi ting na patarinla o ting na kunla. La laun ulak pa la warkurai taum o e Karisito ning a rip a rau. <sup>5</sup> Ine a ningnigo na kamkamtur ulak kusun a minat. Ika la rop ning la ka mat pa bel la laun ulak ana puka Kamis ning, lar borbor tuk ning a rip a rau ning ir rop, pa lar kamtur bot kusun a minat. <sup>6</sup> La ning di alaun la ana ningnigo na kamkamtur ulak kusun a minat, la angis pa la na totoh a tarai ane God. A munaur a minat bel ta rakrakai sur ir alaulau la. La na tena artabar tetek e God pa e Karisito. Lar warkurai taum o e Karisito ning a rip a rau.

### *Di tolsot pas e Satan*

<sup>7</sup> Ning a rip a rau ning ka rop, dir pak sen e Satan miting na nuna keskes a dodot. <sup>8</sup> Pa ir han suir asongo pas a tarai miting na matanitula ting diat a matana wuwu, na tarai ning di atong la e Gok pa e Magok. Ir ben taum la sur a harum. A wawasinla ir arlar ana woio miting na hang. <sup>9</sup> Pa lar han miting na hananuala rop te na rakrakan hanua, pa lar tur talilis pas a tarai ane God, pa tnan hanua ning e God i maris koli. Ika a iah ir han purum misaot na langit pa ir tun arop sen a tarai a harum ning. <sup>10</sup> Pa dir minggen purum sen e Satan, esaning i asongo pas la. Ir kes ting na tnan tung a iah pa salfa, ning di ka minggen purum tar kaba a rokoio a inagoi pa asasongo na propet ia. Tingia dir akadik ditol ana kamisla pa na morom, bel ir rop pa bel ir rop.

### *A ararop a warkurai*

<sup>11</sup> Lamur a oroi pas a tnan keskes na king i kokok, pa esaning i kes onoi. A rakrakan hanua pa bakut dia rorom miting namatana, bel ta pukna ulak ma anundiau. <sup>12</sup> Pa oroi a minatla rop, la ning la lekkek pa la ning bel al risanla, ning la tur tar salanigo na keskes a king, pa di sapang a bukla. Di sapang ulak ning a buk, a buk a lalaun. Pa di warkurai a minatla arlar ana anunla a titolla ning di ka tumus akes tari ting na bukla. <sup>13</sup> A puka tasi i saran ulak a minatla ning la mat salatasi. A minat pa Hedes, a hanua anunla ning la mat, diau otleng dia saran ulak a minatla ning kaning on diau. Di warkurai la taktakai arlar ot ana anunla na titol. <sup>14</sup> Lamur di minggen purum sen a minat pa Hedes ting na tnan tung a iah. A tung a iah ning, a munaur a minat. <sup>15</sup> Pa la ning bel di tumus akes na risanla ting na buk a lalaun, di minggen purum sen la uting na tnan tung a iah.

## 21

### *A tona langit pa tona rakrakan hanua*

<sup>1</sup> Lamur a oroi a tona langit pa tona rakrakan hanua, anasa a ningnigo na langit pa a ningnigo na rakrakan hanua dia ka rorom, pa bel ma ta puka tasi. <sup>2</sup> Pa oroi a tona Jerusalem, a hanua ane God, i han purum misaot na langit kusun e God. Di ka sang tari larning di ka amermer wakak tar a hane sur anuna barsan sur diar taulai. <sup>3</sup> Pa a longor a tnan elngen takai misaot ana keskes a king i atongi mang, "Oroi, a hanua ane God ka kes taum ona tarai. I ot ir kes taum on la, pa lar hanot anuna tarai. E God ir kes taum on la, pa ir hanot anunla God. <sup>4</sup> Pa ir sah sen a lurus matanla rop. Bel ta minat ulak ma, bel ta bal maris, bel ta tinangis pa

bel ta kankan ma, anasa a ututnala tagun nating la ka rorom.”

<sup>5</sup> Pa esaning i kes ana keskes a king i atongi mang, “Oroi, onone a atona ututnala rop!” Pa i atongi otleng mang, “Ur tumus akes a warwarala ne, anasa a warwarala ne la momol pa i tolsot pasi sur dir tortorot ono.” <sup>6</sup> Pa i atai iau mang, “Ka rop! Iau a Alpa pa Omega, a kamkamna pa araropna. Esaning i mos ar agangi ana malum miting na matmatana malum, a malum a lalaun, ning bel di sira lou i. <sup>7</sup> Esining ir tolsot pas a harum, ir kibas pas a ututnala rop ne, pa iau ar God anunai, pa ir hanot a natuklik.

<sup>8</sup> “Na tena matmataut, pa la ning bel la tortorot, pa la ning anunla na toltol i dur, pa na tena um kol a tarai, pa la ning la tol na pamuk a toltol, na tena wah, la ning la lotu tetek a asasongo na godla, taum ana tena asasongo rop, anunla pukna kaning na tnan tung ning i irnga ana iah pa salfa. Ine a munaur a minat.”

#### *A tona Jerusalem*

<sup>9</sup> Ning a hal a mais a angelo, ning la tong mais a besen ning i bukus ana mais a ararop a akadik, i hanot pa i atai iau mang, “Han ute, ar asangan tar u ana tona tin-aulai, a hane anuna Nat a Sipsip. <sup>10</sup> A bukus ana Talngan Tabu, pa angelo ning i kibas pas iau usaot na tnan mangir ning i tur kas usaot. Pa i asangan tar iau o e Jerusalem, a hanua ane God, i han purum misaot na langit kusun e God. <sup>11</sup> I sasai ana matatar ane God, a talaporna i pilpil arlar lar a wakak a hat ning a matana i abit, di atongi ana jasper, pa i talapor arlar ana galas. <sup>12</sup> Pa tnan woroh ning i tur talilisi, i tur kas usaot, pa ning a bonot pa pisir naur a taman, pa ning a bonot pa

pisir naur a angelo la tur ting na tamanla. Ting na tamanla ning, di ka tumus tar na risan ning a bonot pa pisir naur a mangis a tarai Israel. <sup>13</sup> Natol a taman ditol tai sur a pukna ning a kamis i pusa ia, natol ting namatana labur, natol ting namatana tobar, pa natol ditol tai sur a pukna ning a kamis i sup ia. <sup>14</sup> A kama woroh na hanua ning, di toli ana ning a bonot pa pisir naur a hat. Pa ting na hatatla ning, di ka tumus tar a risan ning a bonot pa pisir naur a aposel anuna Nat a Sipsip.

<sup>15</sup> Pa takai a angelo ning mia warwara, i tong pas a bulse ning di toli ana gol, suir mak a hanua Jerusalem ono, pa ir mak otleng na taman pa na woroh. <sup>16</sup> A hanua ning diat a ris ono, la arlar rop tar ka. A barahna pa a palarna dia arlar ka. Ning i mak a hanua ana nuna bulse, i arlar ana ning a bonot pa naur a rip a stadia\* a barahna, pa palarna pa a turturna, ditol arlar rop ka. <sup>17</sup> A angelo i mak a butbut ana woroh, i arlar ana ning a mar pa diat a bonot pa diat a kubit†. I mak ana mak ning a tarai la sira titol ono.

<sup>18</sup> A woroh di toli ana jasper, pa hanua di toli ana gol rop ka, pa i totoh kol arlar ana galas. <sup>19</sup> A kama woroh na hanua ning, di amermer tari ana urmatana ngas a hatat rop ning la wakak kol pa a matanla i abit. A ningnigona di toli ana jasper, a munaurna a sapaia, a bulu na hat, a munatolna a aget, a makada na hat, a mundiatna a emeral, a makada na hat, <sup>20</sup> a dilima onoi a sadonik, a hat ning i kokok pa i kubar, a mundiono onoi a konilian, a kubar a hat, a maisna a krisolait, a sinang a hat, a siwalna a beril, a makada na hat, a siuk onoi a topas, a sinang a hat, ning a bonot onoi a krisopres,

\* **21:16:** I arlar ana naur a rip pa naur a mar a kilomita. † **21:17:** I arlar ana diono na bonot pa dilima na kilomita.



a makada na hat, ning a bonot pa pisir takai onoi a jasin, a bulu na hat, pa ning a bonot pa pisir naur onoi a ametis, a kubar a hat. <sup>21</sup> Takai a bonot pa naur a taman, di toli ana kiau a kabolkabolla. Ning a taman ning a kiau a kabolkabol. A ngas ting na hanua di toli ana gol rop ka, i tai solsol arlar ana galas.

<sup>22</sup> Bel a oroi ta rumai artabar ting na hanua ning, anasa a Leklek e God, ning i rakrakai kol, pa Nat a Sipsip, diau a rumai artabar tingia.

<sup>23</sup> A hanua ning bel i kapan sur a kamis pa a kalang diar atalapor, anasa a matatar ane God ot i atalapor, pa Nat a Sipsip i ot, a lam onoi. <sup>24</sup> A tarai miting na matanitula rop lar han ana talaporna, pa kingla mite na rakrakan hanua lar los kas anunla na matatar usaot teteki. <sup>25</sup> Bel ma ta pukakiar ulak ning na taman lar tagar, anasa bel ma ir morom ulak tingia. <sup>26</sup> Na tarai miting na matanitula lar los kas anunla na ututnala na leklek, pa anunla na matatar usaot teteki.

<sup>27</sup> Bel ta dur a utna ir kas tingui na hanua ning, pa bel tik ning i sira tol a ututnala na meme pa bel tik otleng ning i sira asasongo. La ka, ning di ka tumus tar a risanla ting na buk a lalaun ana Nat a Sipsip lar kas.

## 22

*A malum a lalaun pa rakai a lalaun*

<sup>1</sup> Lamur a angelo i asangan iau a malum a lalaun, ning i talapor arlar ana galas. I saler ot miting na keskes a king ane God, anundiau taum ana Nat a Sipsip. <sup>2</sup> I saler potor a tnan ngas ting na hanua ning. A rakai a lalaun i tur ting na naur a ris a malum ning. I sira wai ning a bonot pa naur a maskana wana. Ana kalangla rop, i sira wai, ning a bonot pa naur a kalang ana taktakai rau. Pa

pakanala la sira alangolango na tarai miting na matanitula kusun a tinsamanla. <sup>3</sup> A laulau a ututnala ning a balakut ane God i kes ono, bel ulak ma dir oroi tari. A keskes a king ane God pa anuna Nat a Sipsip ir kes ting na hanua ning, pa na tena titol oros otleng ane God lar lotu teteki. <sup>4</sup> Lar oroi a patarna, pa dir tumus tar a risana ting na patarinla. <sup>5</sup> Bel ulak ma ta morom. Bel lar kapan sur a talapor ana lam pa talapor ana kamis, anasa a Leklek e God ot ir saran a talapor tanla. Pa lar warkurai arlar ana king, bel ir rop pa bel ir rop.

<sup>6</sup> A angelo i atai iau mang, “Na warwarala ne i momol pa di tolsot pasi sur dir tortorot ono. A Leklek, e God, ning i nigon a ingun a propetla sur lar apuasa anuna warwarala, i sune sen anuna angelo sur ir asangan tar anuna tena titol orosla ana ututnala ning milau ir hanot.”

*A tinan ot ulak ane Iesu i milau*

<sup>7</sup> E Iesu i atongi mang, “Oroi, milau ma ar hanot! Esining i mur a warwara na propet mite na buk ne, i angis.”

<sup>8</sup> Iau e Jon, ia ka longor tar a ututnala ne pa ia ka oroi tari. Ning ia ka longor tari pa ia ka oroi tari, a punga ting napir naur a hana angelo sur ar lotu teteki, a angelo ning i asangan tar a ututnala ne tak. <sup>9</sup> Ika i atai iau mang, “Gong! Iau otleng a tena titol oros ka arlar hom pa na tastasim, na propet, pa la rop otleng ning la mur a warwarala mite na buk ne. Ur lotu tetek e God!”

<sup>10</sup> Pa i atai iau mang, “Gong u pidik alar a warwara na propet mite na buk ne, anasa a taem ning a ututnala ne ir hanot ono ka milau. <sup>11</sup> Esining a tena tol a laulau dir madek seni ot suir tol a laulau, pa esining i dur, dir madek seni ot suir tol a dur a durtol, pa esining anuna toltol i tostos, dir madek

seni ot suir tol a tostos a toltol, pa esi otleng ning i totoh, dir madek seni ot suir tol a totoh a toltol.”

<sup>12</sup> E Iesu i atongi mang, “Oroi, milau ma ar hanot! Ar hanot taum ana arlou, par tokom a tarai rop arlar ot ana nunla na titol taktakai. <sup>13</sup> Iau a Alpa pa Omega, iau a ning-nigo pa murmur, a kamkamna pa araropna.

<sup>14</sup> “La ning la gos anunla na kaen, la angis, pa i tostos sur lar hangan miting na rakai a lalaun pa lar kas ting na taman a woroh na hanua ning. <sup>15</sup> Ika a papla, na tena wah, la ning la tol na pamuk a toltol, na tena um kol a tarai, la ning la lotu tetek a asasongo na godla, pa la ning la mang sur a asasongo pa la toli, la kanumo lapiu na woroh.

<sup>16</sup> “Iau e Iesu, a sune sen anuka angelo suir saran a warwara talapor ne tetek mulo, a tarai a lotu ting na hananuala. Iau a wakir o e Dewit pa e tubuna, pa matlai ning i talapor kol.”

<sup>17</sup> A Talngan Tabu pa tona tin-aulai, a hane, dia atongi mang,

“Han ute!” Pa esining i longori, i otleng ir mang, “Han ute!” Esining i mos, i wakak sur ir han ute, pa esining i mang suri, ir gang a malum a lalaun ning bel di sira lou i.

#### *A araropna*

<sup>18</sup> A atumarang la rop ning la longor a warwara na ropet mite na buk ne: Ning tik ir tugus tar ta warwara masik ona warwara na ropet ne, e God ir tugus tar otleng na akadik teteki, ning di ka warwara talapor tar ono, te na buk ne. <sup>19</sup> Ning tik ir kepsen ta warwara mite na buk na ropet ne, e God otleng ir kepsen anuna tiniba kusuni, anuna tiniba miting na rakai a lalaun, pa totoh a hanua ane God, ning di ka warwara talapor tar onoi te na buk ne.

<sup>20</sup> Esaning i warwara talapor ana ututnala ne i atongi mang, “Momol, milau ma ar hanot.”

Amen. Han ute a Leklek e Iesu.

<sup>21</sup> A marmaris anuna Leklek e Iesu ir kes tetek a tarai rop ane God. Amen.